


Xtidxcoob Dios ni  
biädinä dad Jesucrist



New Testament in Zapotec, Mitla (MX:zaw:Zapotec, Mitla)

# **Xtidxcoob Dios ni biädñä dad Jesucrist**

## **New Testament in Zapotec, Mitla (MX:zaw:Zapotec, Mitla)**

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

### **Copyright Information**

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### **The New Testament**

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 22 Feb 2024 from source files dated 29 Jan 2022

5cff1274-8dc3-5398-a94d-f6033bb363c9

## Contents

San Mateo . . . . .	1
San Marcos . . . . .	39
San Lucas . . . . .	63
San Juan . . . . .	103
Hechos . . . . .	132
Romanos . . . . .	169
1 Corintios . . . . .	183
2 Corintios . . . . .	197
Gálatas . . . . .	206
Efesios . . . . .	211
Filipenses . . . . .	216
Colosenses . . . . .	219
1 Tesalonicenses . . . . .	223
2 Tesalonicenses . . . . .	226
1 Timoteo . . . . .	228
2 Timoteo . . . . .	232
Tito . . . . .	235
Filemón . . . . .	237
Hebreos . . . . .	238
Santiago . . . . .	249
1 Pedro . . . . .	253
2 Pedro . . . . .	257
1 Juan . . . . .	260
2 Juan . . . . .	264
3 Juan . . . . .	265
Judas . . . . .	266
Apocalipsis . . . . .	268



<sup>9</sup> Che biejn diajgreni xtidx reii, sã'tireni. Bajl nani bahuiireni lagajc lajdxreni lahtis nijdni lojreni. Che bidzujnlireni cadro yu' bázga, dxejru guzobdx bajlga. <sup>10</sup> Che bahuii remagos loj bajlga, rbalazduxhrene. <sup>11</sup> Si'c bidzujnrene. Che biu'reni nen yu', bahuiireni lo bázga con xnanni Marii. Dxejcti bazuxhijbreni, gojnreni bázga, baxhalreni rexcãlnasa'creni bazalajzreni oor, nãjza yaal nãjza yalnejxh. <sup>12</sup> Che agojl guibi'reni, gunixcãlreni, rãjp Dios lojreni:

—Na'c guibi'tu nez loj Herodes.

Dxejcti gunaazreni garenca nez yuj, gubi'reni lajdxreni.

*Che siini Egipto*

<sup>13</sup> Che sii remagos lajdxreni, biããd te xangl Dios baluilojni lo José lo bacal, rãjpmi:

—Huistie, cua' biuxe're nãjza xnanni, huinãreni Egipto. Ro'c gulãjz che guiniãli lojlu. Siguuil Herodes biuxe're sa'csi rãljzmi ju'tnini.

<sup>14</sup> Dxejc huistiegajc José, cua'ni biuxe're nãjza xnanni, lagajc yããlga biriireni, siireni nez Egipto. <sup>15</sup> Ro'c guyu'reni cheni gujtli Herodes. Guiraa dee guzajc te guzobj diidx ni bacuaa nigui ni gunii xtidx Dios che rãjpmi: “Egiptoli guredxã xi'nã.”

*Che guinibee Herodes gujt rebixbãz*

<sup>16</sup> Che gubee Herodes abasguee remagosni, bidxechduxhni. Gunibeeni guet guiraa rebixniguii ni yu' tio'p iiz nãjza rebixue' ni yu' guxiiru dxej, guideb nen guedx Belén nãjza reguejdx ni re' gabiga, si'cti redxej ni rãjp remagos lojni. <sup>17</sup> Dxejc guzobj diidx ni bacuaa Jeremias ni gunii xtidx Dios che rãjpmi:

<sup>18</sup> Biejn xse' bejn nen guedx Ramã, te yãlhuinduxh, te yãlrbexdij, yãlrbexden: laa Raquel ni roon yejc rexi'nni.

Naaddini jiãjl lajzmi sa'csi agujt rexi'nni.

<sup>19</sup> Cheni gujt Herodes, dxejc lo te bacal huiluloj xangl Dios loj José nen Egipto. <sup>20</sup> Rãjpmi:

—Huistie, cua' biuxe're nãjza xnanni, gubisac nez Israel sa'csi agujt renani rãljz ju't biuxe're.

<sup>21</sup> Dxejcti huistie José, cua'ni biuxe' nãjza xnanni. Gubi'reni Israel. <sup>22</sup> Luxh che biejn diajgni rnibee Arquelao guejdx Judea lacuaa Herodes, xtadni, bidxejbni nuiini ro'c. Dxejc gunisac Dios lojni loj te bacal, ni'c huijni lo reguejdx xten Galilee. <sup>23</sup> Dxejc biãdlãjzmi nen guejdx ni laa Nazare't te si'c guzobj diidx ni bacuaa niguii ni gunii xtidx Dios cheni rãjpmi: “Sirilajni nazaren.”

### 3

*Juan Bautist basule' xtidx Dios loj rebejn*

(Mr. 1:1-8; Lc. 3:1-9, 15-17; Jn. 1:19-28)

<sup>1</sup> Nen redxejga biããd Juan Bautist lo reyubijdz xten guedx Judea, ro'c cagulijdxni, <sup>2</sup> cayãjpmi:

—Colgusiechãljztu rextojltu sa'csi xcãlrmibee Dios abidzũngajxhni.

<sup>3</sup> Juan najc nani basã't Isaías, te niguii ni gunii xtidx Dios, cheni bacuaani:

Riejn xse' te ni rbedxa' nez lo reyubijdz:

“Colguslii xnezuy Dad, colguslii xnezulajzmi.”

<sup>4</sup> Najcw Juan xquichãljãd camei. Naliib te duguijd xque'ni. Rajwmi guxha't nãjza dzujn xten baseergujxh. <sup>5</sup> Riããd reben guedx Jerusalén nãj guiraa reben Judea nãjza rebejn ni tre' gajxh nez ro' gueu Jordán, riããduadiãjgreni xtiidxni. <sup>6</sup> Che ruxhobdojreni xtojreni, rutiobnis Juanreni ro' gueu Jordán.

<sup>7</sup> Che bahuiini siããd xhidajl reben guidoo ni najc refarisee nãjza ni najc resaducee, rãljzreni gutiobnismireni, rãjpmi lojreni:

—La'tu benguidxduxh, najctu si'c bãl. ¿Chu balijdxtu guxũntu loj xcãlrdxe'ch Dios ni siããd?

<sup>8</sup> Colguibansa'c si'cni nungãjl te fiipac rebejn guliipac abasiechãljztu. <sup>9</sup> Na'c litis guntu xhigab naatu: “¡Ni nurnu najcnu rexagdoõ toAbram!” Rniãli lojtu, sajã xca' Dios reguijre gunni gacreni rexi'n toAbram. <sup>10</sup> Asojb guibyãjg lo xlobaa reyãjg, luxh guiraa reyãjg nani di ninexhsa'c xcaj lojni, sidinni te checni. <sup>11</sup> Narã guliicani rustiobnisã con nis si'c te seen cheni abasiechãljztu, abaxhobdojltu. Niluxh nani siããd detxã sutiobnismi la'tu con Sprit Dhan xten Dios nãjza con guiboo. Rnibeeruni loã. Bẽnsacduxhni. Niãla xcura'chni digacdi chanaã. <sup>12</sup> Aca'ni xhi cojn gusiani triuu xtanni te chuchee triuuga nen ngodx xtanni. Dxejcti guixhtriuuga, suze'cni guijxhga lo guiboo ni rejã par tejpas.

*Che gurobnis Jesús*

(Mr. 1:9-11; Lc. 3:21-22)

<sup>13</sup> Dxejc birii Jesús nez Galilee, bidzujnmi ro' gueu Jordán cadro yu' Juan te gutiobnis Juanni. <sup>14</sup> Niluxh naaddi Juan gutiobnis Jesús. Rãjp Juan lojni:

—Luj nanab gutiobnislu narä, niluxh naj alga luj siäädlu loä te gutiobnisälu.

<sup>15</sup> Dxejc räjp Jesús lojni:

—Basaan gacni si'c naj, sa'csi nanab gusoobnu guiraa ni rlazj Dios gac.

Dxejctiru batiobnis Juan Jesús.

<sup>16</sup> Cheni gulujx gurobnis Jesús, birigajcni lo nis. Dxejc bixal xhaguibaa, bahuiini siädjätj Sprit Dxan xten Dios si'c te palom, biäjtni lojni. <sup>17</sup> Dxejc xhaguibaali biejn diajgreni te xse' ni räjp:

—Dee najc xi'nä ni sanälazä. Laani rbanälazä.

## 4

*Che huij Jesús lo reyubijdz*

(Mr: 1:12-13; Lc: 4:1-13)

<sup>1</sup> Dxejc bejn Sprit Dxan xten Dios huij Jesús nez lo reyubijdz te nejzga nuhual beñdxab Jesús.

<sup>2</sup> Che gulujx bacua'n Jesús tiuu gubijdx, tiuu guxhijn, gulaanni. <sup>3</sup> Sas biääd beñdxab lojni, räjpni:

—Palga guliilu Xi'n Dioslu, gunibee gac reguijre yätxtiil.

<sup>4</sup> Badzu' Jesús diidxre lojni, räjpni:

—Loj reguijtz xten Dios caj scree: “Xhet ganaxdi yätxtiil guibajn rebejn; sibajnzani con guiraa diidx nani rniü Dios.”

<sup>5</sup> Dxejcti huinä beñdxab Jesús guedx Jerusalén. Gulä'pnini jiaa yejc xques guidoro. Dxejcro räjp beñdxab lojni:

<sup>6</sup> —Palga Xi'n Dios luj, bitiäjs lo yujli, sa'csi scree caj loj rexquijtz Dios:

Sinibee Dios rexanglni ga'preni luj;

siliäsreni luj con naareni didi gacnaj ni'lu lo reguijga.

<sup>7</sup> Badzu' Jesús diidxre lojni, räjpni:

—Caj loj rexquijtz Dios: “Na'c fallu Dad ni najc Xtioslu.”

<sup>8</sup> Stee huält huinä beñdxab Jesús yejc te danro. Dxejcti baluini lojni guiraa reguejdx, reguedxro ni tre' lo guedxliuj näj guiraa xcäl'nasa'creni. <sup>9</sup> Dxejcti räjpni loj Jesús:

—Guiraa redee sunidxä lojlu palga guzuxhijblu nez loä te ganlu narä.

<sup>10</sup> Dxejcti räjp Jesús lojni:

—jHuij nez rec beñdxab! Scree caj loj rexquijtz Dios: “Dad Xtioslusu ganlu; lojtisni chulu.”

<sup>11</sup> Dxejcti gubicaj beñdxab loj Jesús. Dxejc biääd rexangl Dios biädhuiireni Jesús.

*Gusloj Jesús cayujn xtzuunni*

(Mr: 1:14-15; Lc: 4:14-15)

<sup>12</sup> Che biejn diajg Jesús yu' Juan neñ ladzguiib, huijni nez Galilee. <sup>13</sup> Dxejcti gudejndi guedx Nasare't, huiläjzni guedx Capernaum ni tre' gajxh nez ro' nis, nez reguejdx Zabalón con Neftalí. <sup>14</sup> Si'c gujc te guzobj diidx ni bacuaa Isaías ni gunii xtidx Dios:

<sup>15</sup> Lajdx Zabalón, lajdx Neftalí, nezyuj ni rij nez ro' nisdoo, stelaad gueu Jordán,

Galilee cadro rbäjz rebejn nani di gac rexpen Israel.

<sup>16</sup> Rebejn nani rbäjz neñ te yälcäjy abahuiireni te bajlga,

luxh bajlga basanij xcäriejn renani nabajn lo xcäl'rdxejb, lo xpalaa yälgujt.

<sup>17</sup> Dxejcli gusloj cagulijdx Jesús, räjpni:

—Colgusiejchlajztu, colguxhobdojl te guiban'sa'ctu sa'csi abidzungejxh xcäl'rnibee Dios.

*Che gurejdx Jesús tajp xpejnni*

(Mr: 1:16-20; Lc: 5:1-11)

<sup>18</sup> Sasaj Jesús nez ro' nisdoo xten Galilee che bahuiini lo tio'p niguii. Tejni laa Simón, ni laaza Pedr. Steeni najc lagajc bejtzni, ni laa Andrés. Dzuun ni rujnreni najc rniaazreni bäl, ni'c cacuaareni guijxh lo nisdoo. <sup>19</sup> Dxejcti räjp Jesús lojni:

—Coltanajl narä. Naj riniaaztu bäl, niluxh narä gunä cuedxtu rebejn.

<sup>20</sup> Lagajc dxejc basa'nreni xquijxhreni te sanajlreni laani.

<sup>21</sup> Che gudejdreni ro'c, bahuiini loj stio'p niguii, Jacob con bejtzni Juan. Yu'reni neñ te barcw con xtadreni, ni laa Zebedeo cayunsa'creni guijxh. Dxejc gurejdx Jesúsreni. <sup>22</sup> Lagajc dxejc basa'nreni barcw näjza xtadreni te sanajlreni Jesús.

*Caguluii Jesús xhidajl bejn*

(Lc: 6:17-19)

<sup>23</sup> Sasajti Jesús guideb nez región xten Galilee, caguluiini neñ tejga rexquidooreni. Cagusule'ni redidxcoob xten xcäl'rnibee Dios. Cagusiajczani guiraa yäl'racxhuu ni rajc rebejn guejdxga, guiraa yälgujdx. <sup>24</sup> Biejn diajg rebeñ Siria diidx xcuent ni cayujn Jesús. Sas biäd'näreni guiraa reben'racxhuu ni cayajc guiraloj yälgujdx, yäl'nayan; guiraa reni rajc

yejcreni, guiraa reni rajc malyälgujdx, reni rajc yälguidxbej, guiraareni abixu'n tiejxhreni. Dxejcti basiajc Jesús rebejnğa. <sup>25</sup> Xhidalduxh beñ Galilee huinajlñi, náj rebeñ reguedx Decápolis, nájza rebeñ guedx Jerusalén, nájza rebeñ Judea nájza rebejn ni tre' stelaad gued Jordan.

## 5

### *Yejc te dajn balijdx Jesucrist rebejn*

<sup>1</sup> Che bahuii Jesús loj rebeñ xhidajl, huä'pni yejc te dajn. Dxejcti gubig rexpejnñi ni gurejdxni lojni. <sup>2</sup> Dxejc gusloj caguluii Jesús reni'c, scree räjpni:

#### *Rebejn ni sibaalajz*

*(Lc. 6:20-23)*

<sup>3</sup> —Sibaalajz rebejn nani nanchee rquinduxhreni xcälracnäj Dios, sa'csi laareni nungäjłreni xcälřnibee Dios.

<sup>4</sup> Sibaalajz rebejn nani rac-huin lajzreni xcuent rextojłreni, sa'csi sudzucaj Dios xtojłreni, susiäjłni lajzreni.

<sup>5</sup> Sibaalajz rebejn nani nadolajz nani rłajz guntis si'cni řnibee Dios, sa'csi sacnäj Diosreni lo xcälřnabajłreni lo guedxliujre.

<sup>6</sup> Sibaalajz rebejn ni nastoocanu rliaanreni, riojłreni, sa'csi rłajzreni guibańsa'ctisreni nez loj Dios, sa'csi sudeed Dios lojreni guiraa ni řniabreni.

<sup>7</sup> Sibaalajz rebejn nani rulasłajz sa'reni, sa'csi sulasłajza Diosreni.

<sup>8</sup> Sibaalajz rebejn nani najc nayatis lastooreni rujnreni rexhigabsa'c xten Dios sa'csi suhuiireni lo Dios.

<sup>9</sup> Sibaalajz rebejn nani ruscuecdxilajz sabejnreni, sa'csi laareni sirilajreni rexi'n Dios.

<sup>10</sup> Sibaalajz rebejn nani rusutijp lajzreni che rusacsı bejnreni sa'csi nabańsa'creni nez loj Dios, sa'csi xtenreni najc xcälřnibee Dios xhaguibaa.

<sup>11</sup> Colřpaalajztu che gusacsı bejntu tılňäjreni la'tu, guiniireni guiraloj didx-xhii xcuent xtidxä. <sup>12</sup> Colģuibaalajz, colbalajz sa'csi xhaguibaali sunidxduxh Dios xcuent xtzuuntu. Sigajzca basacsıreni reniguii ni gubajñ galoo ni gunii xtidx Dios.

#### *La'tu najctu si'c sejd lo guedxliujre*

*(Mr. 9:50; Lc. 14:34-35)*

<sup>13</sup> Räjpzani:

—La'tu najctu si'c sejd lo guedxliujre. Palga di sejd gac nadzujy, řxho gacsacni nadzujy? řXhi gun bejnñi dxejc? Susäjłreni sejdga detz yu', suläj bejn yejcnı.

<sup>14</sup> La'tu najctu si'c te bianj lo guedxliujre. Te guejdx nani tre' jiaa yejc te dajn, digacdi guiga'tzni. <sup>15</sup> Digacdi xcaguij te bajł dxejcti jiaũuni neñ te caj. Maazru huen soobni jiaa neñ te gandilieer te gusańjini loj guiraa rebejn ni tre' neñ yu'. <sup>16</sup> Xcälřnabańsa'ctu najc si'c te bajł loj rebeñ guedxliuj. Suhuiireni xtzunsa'ctu dxejc siliä'preni xpala'n xtadtı ni yu' xhaguibaa.

#### *Ruluii Jesús xcuent leii*

<sup>17</sup> Räjpzani:

—Na'c guntu xhigab siädgdzucää leii xten toMoisés, niclaza rediidx ni baluii redad ni gunii xtidx Dios. Xhet siädzucääđini, narä siälä te guluiäpacni si'cni najcni. <sup>18</sup> Řniliäpac, dxejli che ni nitloj guibaa nájza guedxliuj, nicla tej letr ni caj loj leii di nit. Sajcpac guiralii ni caj lo reguijtzga. <sup>19</sup> Ni'cni chutis ni rłajz gusaan te diidx nani caj loj leii, mase te didxbäzni, luxh ruluiini gun bejn si'c, laani guxiduxh sajcnı lajdx Dios guibaa. Niluxh renani rucuađiajg xtidx leii, luxh rujnpacreni si'cni caj lo leii, ruluiizani leii, beńsacduxh gacni lajdx Dios guibaa. <sup>20</sup> Ni'cni rniä lojtu, palga ditı gusańcru xtzun Dios, ditı guibańsa'cru loj reni najñ xcuent xleii toMoisés, nájza loj rebeñ guidoo ni laa farisee, dipactu jiu' lajdx Dios xhaguibaa.

#### *Ruluii Jesús xcuent yälřdxe'ch*

*(Lc. 12:57-59)*

<sup>21</sup> Räjpzani:

—Abiejnza diajgtı nani gunii rebengoldoo: “Na'c ju'tlu. Chutis te nani ju't sa'ni, sinärenini lo guxhtis te jiaũuni neñ latzguuib.” <sup>22</sup> Niluxh narä rniä chutis nani guidxecheduxh lo sa'ni sijni lo guxhtis. Chutis ni guinii didxnaj lo sa'ni, sijni lo juejz. Chutis ni gäb lo sa'ni: “benňayälłajz” sidejđni loj yälřguxhtis xten Dios, sijni gabijł cadro cayejc guiboduxh.

<sup>23</sup> Che sanälu gojn guidoo te gusańluni lo bacuug, palga guinaj lajzlu yu' chu lo cadxe'chlu, <sup>24</sup> basansijc gojn xtenlu lagajc ro'c, huisiälřxga diidx con sa'lu, dxejcti guibi'lu te gac gusańlu gojn xtenlu.

<sup>25</sup> Palga yu' chu řdxe'ch lojlu, basquejn basiäjł diidx con laani lagajc cheni sasanäjłluni lonezyuj te di gutedni luj lo juejz. Luxh juejz suteedni luj loj reguixhajg te gusaũreni luj neñ

latzguiib. <sup>26</sup> Rniliäpac lojlu: “Dilu guirii ro’c palga dilu cue’c guiralii meel nani guiniabni lojlu.”

*Ruluii Jesús xcuent yälrusquee sa’ni*

<sup>27</sup> Räjzpazi:

—Abiejn diajgtu guniireni galoo: “Na’c guesnäjtu gunaa nani di gac chäältu.” <sup>28</sup> Narä rniä, chutis te nani fii loj te gunaa dxejcti guisia’ lajzni gunaaga, abejnni dojl neñ lastooni. <sup>29</sup> Palga balojlu ladbee rujn rujnlu dojl, gulääni basälmi te laad sa’csi hueenru gunijltu te balojlu quela chää guideb tiejxhlu gabijl. <sup>30</sup> Palga naalu ladbee rujn rujnlu dojl, batui’ni sa’csi hueenru gunijltu te naalu quela chää guideb tiejxhlu gabijl.

*Ruluii Jesús xcuent yälrur’o’n chääi bejn*

(Mt. 19:9; Mr. 10:11-12; Lc. 16:18)

<sup>31</sup> Räjzpazi:

—Abiejn diajgtu guniireni galoo: “Chutis niguii ni rlajz guro’n chäälni, nanabtis gudeedni te guijtz nani rniä abaro’nni chäälni.” <sup>32</sup> Narä rniä, niguii nani guro’n chäälni niluxh xhet dojldi bejn chäälni, niguiiga sujn gun chäälni yälgubejxh, niluxh chutis ni guchnaa gunaaga sujnzani yälgubejxh.

*Ruluii Jesús xcuent che ria’n diidx*

<sup>33</sup> Räjzpazi:

—Abiejnza diajgtu gunii rebengool: “Che ria’nlu diidx lo Dios gunlu xhi gunlu, na’c jial lajzlu; basa’pac xtiidxlu lo Dios.” <sup>34</sup> Narä rniä, na’c gunlu juraar, nicla tej mood, nicla por xhaguibaa, sa’csi ro’c najc lajdx Dios, <sup>35</sup> nicla por loj guedxliuj sa’csi ro’c rsiuj ni’ni; nicla por guedx Jerusalén sa’csi ro’c najc guedxlajdx reiiri, <sup>36</sup> niclaza por lagajc bituuejcl, sa’csi digacdi guncheelu te guichyas niclaza te guichnol, nicla tej guijch. <sup>37</sup> Nanab guiniitslu: “Mbaj” o “Ajndi”. Palga yu’ xhuru rniilu, bendxab najc ni rujn rniiluni.

*Chanälajzni rebejn ni rdxe’ch lojni*

(Lc. 6:29-30)

<sup>38</sup> Räjzpazi:

—Abiejn diajgtu gunii rebengool galoo: “Te baloj por ste baloj, te läjy por ste läjy, nalajznu bejn lo sa’lu si’ctis ni rujnni lojlu.” <sup>39</sup> Narä rniä, na’c tilnäjlu te bejn ni bejn te cos guijdx lojlu. Palga chääzni ladbee lojlu badeed stelaad lojlu chääzni. <sup>40</sup> Palga yu’ chu rlajz tilnäjlu te xca’ni xcamangwlu, badeedza näj xsa’cwlu lojni. <sup>41</sup> Palga yu’ chu guinibee guulu xcargwni te kilómetro, huināni tio’p kilómetro. <sup>42</sup> Nani guiniab xhi guiniabxlia’ni lojlu, badeedni. Nani guiniablaa xhi guinablaani lojlu na’c gudxoijnluni lojni, na’c gäblu: “Xhetini.”

<sup>43</sup> Abiejn diajgtu gunii rebengool: “Colchanälajz sa’tu. Colguidxe’ch loj renani rdxe’ch lojtu.” <sup>44</sup> Narä rniä lojtu, colchanälajz rebejn ni rdxe’ch lojtu. Benle’ yejc reni rgue lojlu. Colyejn dxunsa’c loj renani rdxe’ch lojtu. Colcuedjx, colnab loj Dios xcuent rebejn nani rdxagdijltu, rusacsireni la’tu, <sup>45</sup> te si’c gactu xi’n xtadtu ni yu’ xhaguibaa nani rujn rii xcubijdxni lo rebensa’c sigajcza lo reben guijdx. Rujnzani riabj nisguuj lo rebensa’c sigajcza lo rebenguidx. <sup>46</sup> Palga la’tu chanälajzta lagajctis rebejn nani rinälajz la’tu, çxhi gaan guntu dxejc? Najctu lagajc si’c najc rebejn ni rutie’ meel ni rajx lo gubier. <sup>47</sup> Palga guiniitu: “Xchan”, lagajctis loj resa’tu, çxhini’c rujntu ni najc hueenru lo chutis bejn? çLa et sigajcdiza rujn rebejn nani di gumbee Dios? <sup>48</sup> Colyajc bensa’c si’c ni najc xtadtu ni yu’ xhaguibaa.

## 6

*Ruluii Jesús xho gudeedni gojn*

<sup>1</sup> Räjzpazi:

—Na’c gusäbdiidx guntu dzunsa’c nez loj rebejn te flitisreni xhi rujntu. Palga gusäbdiidxtu di xtadtu ni yu’ xhaguibaa guniidx xhi xca’tu. <sup>2</sup> Che gudeedlu gojn, na’c güilu diidx xhi badeedlu. Na’c gunlu si’c rujn rebejn nani rusguee neñ reguidoo, näjza lad nezuyuj. Rujnsireni si’c te ruhuii rebejn xhi rujnreni te rliä’p rebejn xpala’reni. Narä rniä acua’reni gaan xtenreni. <sup>3</sup> Luj che gudeedlu gojn xtenlu, na’c gacbee nicla tej xamiigwlu xhi badeedlu, <sup>4</sup> te gac gojn xtenlu xhiga’tz. Dxejcti xtadlu ni cahuii nani bejnlu xhiga’tz, sacnäjni luj nez loj rebejn.

*Ruluii Jesucrist xho cueedx, guiniabni lo Dios*

(Lc. 11:2-4)

<sup>5</sup> Räjzpazi:

—Cheni rbejdx, rniabtu lo Dios, na’c guntu si’c rujn rebenguidoo ni rusguee. Rchaglajzreni rniabreni lo Dios rsiuliireni neñ reyu’ cadro riel’ xtidx Dios, näjza guiraa resquiin, näjza nez ronejz te ruhuii rebejn xho rujnreni. Rniliäpac, acua’reni gaan



xtenreni. <sup>6</sup> Naj luj cheni cueedx, guiniablu lo Dios, biu' nen xyu'lu. Basäuu ro' yu'ga, dxejcti xhiga'tz gunii loj xtaclu ni yu' xhaguibaa. Dxejcti xtaclu ni cahuii xhi rujnlu xhiga'tz, sacnäjni luj nez loj rebejn.

<sup>7</sup> Cheni caniitu lo Dios, na'c guinisactu balti huält rediidx nani aguniitu. Si'c rujn rebejn nani di gumbee Dios. Naareni sa'csi sanuutis rniireni xhidajl diidx balti huält, siejn diajg Dios. <sup>8</sup> Na'c guntu sigajc ni rujnreni, sa'csi anajn xtaclu xhini'c rquiintu che guiniabtuni lojni. <sup>9</sup> Ni'cni scree colguinii lo Dios:

Xtaclu ni yu' xhaguibaa dxan najc lajlu.

<sup>10</sup> Sujjääd xcäl'rnibeelu;

bejn si'cni rlaizlu lo guedxliujre sigajc rujnlu xhaguibaa.

<sup>11</sup> Nadxej baniidx xcu'nnu sa' ni rdaunu guira dxej.

<sup>12</sup> Basiäjil laizlu redojl xtenu si'c riäjil laiznu redojl xten rebejn ni rujn dojl loonu.

<sup>13</sup> Na'c gusaanlu jiaabnu xhigabguijdx,

baslaa nuure lo dojl,

sa'csi xten guejblu najc yäl'rnibee, yäl'nadip näjza yäl'dimbicha' par tejpas.

Sugacni si'c.

<sup>14</sup> Palga la'tu gusiäjil laiztu redojl ni rujn rebejn lojtu, xtaclu ni yu' xhaguibaa susiäjilza laizni rextojltu. <sup>15</sup> Palga ditu gusiäjil laiztu redojl ni rujn rebejn lojtu, sigajcza xtaclu ni yu' xhaguibaa di laizni jäälza rextojltu.

*Rului Jesús xho gucua'n bejn*

<sup>16</sup> Räjpzani:

—Che rucua'ntu na'c guntu si'c rujn rebejn nani rusguee; rumbaa lojreni te fii rebejn cagucua'nreni. Rniliä acua'reni rexgaanreni. <sup>17</sup> Niluxh la'tu, che rucua'ntu, colcuñ yejcti, colquii lojtu <sup>18</sup> te na'c gacbee rebejn cagucua'ntu, xtaclistu suhuii cagucuanxhiga'tz. Xtaclu ni cahuii xhi cayunxhiga'tztu suniidxni xhi xca'tu nez loj rebejn.

*Yäl'nasa'c ni yu' xhaguibaa*

(Lc. 12:33-34)

<sup>19</sup> Räjpzani:

—Na'c gapdajntu yäl'nasa'c lo guedxliujre cadro rajw reman o rribitiejn xhixtentu, niluxh richu' gubaaan rolijz bejn te rbajnreni. <sup>20</sup> Hueenru ga'ptu xcäl'nasa'ctu xhaguibaa cadro di reman gauu, diza rehxixtentu cuibitiejn, diza regubaan jiu' te cuanreni. <sup>21</sup> Sa'csi cadro yu' xcäl'nasa'ctu, ro'cza naga' lastootu.

*Bianij xten tiejxhtu*

(Lc. 11:34-36)

<sup>22</sup> Räjpzani:

—Bianij xten tiejxhni najc balojni, ni'cni palga rhuisa'c balojtu, guideb tiejxhtu yu' lo bianij. <sup>23</sup> Niluxh palga rebalojtu di fisa'c, guideb tiejxhtu yu' lo nacäjy, ni'cni palga bajl nani yu' tiejxhtu dini gusanij, jlinacäiboo najc guidebtu!

<sup>24</sup> 'Nicla te bejn di gacdi gun dzuun loj tio'p lam tejsi junt, sa'csi sibälazni tejni laga sanälajzni steeni. Digacdi guntu xtuun Dios palga caguüiltistu xcäl'nasa'ctu lo guedxliujre.

<sup>25</sup> 'Ni'cni rniä lojtu, na'c chutu yärsia' por xcäl'nabajntu, xhicha gautu, xhicha yätu, niclaza naatu xhicha lajd gajcwtu. Yäl'nabajn sajru lo yäl'rajw, luxh sajru tiejxhtu lo xhajbtu.

<sup>26</sup> Colhuui remane' ni rtajt xhaguibaa. Direni cue'c binij, dizareni guilia' gäjil, dizareni cuchee xhi gaureni nen yu', luxh xtaclu ni yu' xhaguibaa rudeedni xhi rajwreni. ¿Laa xhet sajcdirutu loj remane'ga, ä? <sup>27</sup> ¿Chu tej la'tu sa'csi ru'tu yärsia' sajz tiobrutu ste bo'c jiaaru?

<sup>28</sup> ¿Xhicuent runduxhtu xhigab xcuent xhajbtu? ¿Colhuui reguii ni tre' nesiät! ¿Xho roobreni? ¿Xho rialreni? Direni gun dzuun, dizareni guzaa xhajbreni. <sup>29</sup> Narä rniä lojtu, nicla reii Salomón guideb najcwni rexhabsa'c xteni di nisiuchee si'c rsiuchee tej reguüiga.

<sup>30</sup> Palga Dios rujn rajc recuaan ni yu' nesiät ni rial nadxej luxh guixee ahuejcreni, ¿xhixh dini gunduxhru par la'tu, bejn nani guxii rililajz? <sup>31</sup> Ni'cni na'c chutu yärsia' guntu xhigab: "¿Xhicha guidaunu, xhicha guiduñnu, xhicha gacwnu?" <sup>32</sup> Sa'csi rebejn nani di gumbee Dios xhigabtsiga rujnreni, caguüilreni guiraa recosga. Niluxh xtaclu ni yu' xhaguibaa anajnni xhini'c rquiintu. <sup>33</sup> Colquilxgaa yäl'rnibee xten Dios näjza yäl'nabansa'c si'cni rlaiz Dios dxejc sica'tu guiraa ni rquiintu. <sup>34</sup> Ni'cni na'c gunduxhtu xhigab xho tedtu dxej guixee. Combast tedtu trabajw nani riääd dxej con dxej.

## 7

*Na'c cubeetu sa'tu*

(Lc. 6:37-38, 41-42)

<sup>1</sup> Räjpzani:

—Na'c cubeetu sa'tu te na'cza cubee Dios la'tu. <sup>2</sup> Sa'csi sigacni rgubeetu sa'tu, sigajcza sigubee Dios xhi rujntu; niluxh lagajc si'cni rutiehxto lo bejn, si'cza sutiehx Dios lojtu. <sup>3</sup> ¿Xhicuent ruhuiilu loj guijxh ni yu' baloj sa'lu, luxh dilu fii yagro nani yu' lagajc balojlu? <sup>4</sup> ¿Xhicuent gäblu lo sa'lu, nädonnu cuää guijxh ni yu' neñ balojlu, luxh dilu fii loj yagro ni yu' neñ balojlu? <sup>5</sup> Benguidx ni rusguee, guläxgaa yagro ni yu' balojlu te gac fisa'clu te cuäälu guijxh nani yu' baloj sa'lu.

<sup>6</sup> Na'c guluiitu guiraa rextidx Dios loj chutis bejn sa'csi yu'reni najc si'c bä'cw, xlia'si rca'renini; sibi'reni, sauya'reni luj. Sigajcza recos sa'cru, na'c gudeeduni loj chutis bejn, sa'csi yu'reni najc si'c cuch rbälazreni cossa'c najczeni si'c cuch ni ruläj yejc xhitis xhi cos.

*Colnab, colquuil, colgusejz rolä'*

*(Lc. 11:9-13; 6:31)*

<sup>7</sup> Räjpszani:

—Colnab lo Dios te guniidxni nani rniabtu. Colquuilni te guidxäjltuni. Colnii rolä', te guixalni jiu'tu. <sup>8</sup> Chutis ni rniab lo Dios sica'ni nani rniabni, nani rguuil xhi cos nez loj Dios rdxälzani nani rguuilni; nani rusejz rolä', suxhalzarenini lojni.

<sup>9</sup> '¿La yu' chu tejtü che guiniab xi'nni te yätxtiil, alga gudeedni te guij, ä? <sup>10</sup> O palga guiniabni te la' bälj, ¿la sudeedni te bäl? <sup>11</sup> Palga la'tu ni najc beñ guijdx rajc rudeedtu cossa'c loj xi'ntu, aticaxh xtadtu ni yu' xhaguibaa. Laani suniidxni cossa'c loj renani guiniabni lojni.

<sup>12</sup> Ni'cni guira'ti cos ni rlanjtu gunnäj bejn la'tu, sigajcza colyennäjreni, sa'csi si'c caj lo leii xten toMoisés, näjza lo diidx ni bacuaa redad ni gunii xtidx Dios.

*Rolä' xten yälñabajn najc dää*

*(Lc. 13:24)*

<sup>13</sup> 'Coljiu' nez rolä' nani najc dää, sa'csi gulajg najc rolä', gulajg najcza nezyuj nani rinä bejn lo yälrunijit, luxh xhidajlreni riu' nejzga. <sup>14</sup> Sa'csi dää najc rolä', dääza najc nezyuj nani rinä bejn nez loj yälñabajn, niluxh guxii najc renani rdxäl nezyujga.

*Ninexhsa'c ni rcaj loj te yajg rujn gumbeeni yajgga*

*(Lc. 6:43-44)*

<sup>15</sup> Räjpszani:

—Colnatiro rebejn nani rlanj gusguee la'tu. Rniisireni rusule'reni xtidx Dios. Rluuisi nadolajzreni si'c te xiiil, niluxh direni gac. Alga si'c loob najczeni, rutie'chreni bejn si'c re'ch xiil che riädchu' loob lojreni. <sup>16</sup> Dzuun nani rujnreni sujñ gumbeetureni. Anajntu di uub xcaj lo reyaguejch, diza iigw xcaj lo guechbiojb. <sup>17</sup> Ni'cni lo guiraa reyagsa'c rcaj ninexhsa'c lojni, per lo guiraa reyajg ni xhet yagsa'cdi, ganax ninejxh ni di ganaxsa'c rcaj lojni. <sup>18</sup> Digacdi xcaj ninexhdxuudx loj te yajg ninexhsa'c. Di gacdiiza xcaj te ninexhsa'c loj te yajg ni di gac yagsa'c. <sup>19</sup> Guiraa reyajg nani di ninexhsa'c xcaj lojni, nanab guidinni te checni. <sup>20</sup> Sigajcza sajg gumbeetu bensa'c sa'csi rujnreni dzunsa'c.

*Xhet guiraadi bejn jiu' lo xcälñabee Dios*

*(Lc. 13:25-27)*

<sup>21</sup> Räjpszani:

—Xhet guiraadi renani rniil, “Dad, Dad”, jiu' lo xcälñabee Dios xhaguibaa. Ganaxtis renani rujn si'cni rlanj Xtadä ni yu' xhaguibaa. <sup>22</sup> Sidzujñ dxej sinii xhidajl bejn loä: “Dad, Dad, con lajlu basule'nu xtiidxlu, con lajzalu biläanu rebendxab, con lajzalu biennu remilagwr.” <sup>23</sup> Dxejc säpä lojreni: “Dina gumbeä la'tu. Colbicaj loä beñlatsiaj.”

*Tio'p cimient*

*(Lc. 6:47-49; Mr. 1:22)*

<sup>24</sup> Räjpszani:

—Chutis nani rucua diajg diidx nani canä, luxh ruzoob xtidxä, laani najc si'c te beñsin nani basoob rolijzni yejc te guilaj. <sup>25</sup> Che biajb nisguij, biäjñ nis gueuu, gubi' bej, bidinreni yejc yu'ga sas di yu'ga niajb sa'csi sojbni yejc guilajga. <sup>26</sup> Nani rieñ diajñi xtidxä, luxh dini guzoob xtidxä najc si'c te beñ gualajz nani basoob rolijzni lo yujxh. <sup>27</sup> Che biajb nisguij, biäjñ nis gueuu, gubi' beduxh bidinreni yec yu'ga. Dxejc ligurebän yu'ga. Lacti xhiroob banijñ bejnğa.

<sup>28</sup> Che gulujx gunii Jesús rediidxga, lacti bidxeloj rebejn rediidx ni baluiini, <sup>29</sup> sa'csi baluiini rebejn si'cpac te nani rniabee, xhet si'c ruluiidi rebejn ni najñ lei.

## 8

*Rusiajc Jesús te bejn ni rañ tiejxhni*

*(Mr. 1:40-45; Lc. 5:12-16)*

<sup>1</sup> Che biäjť Jesűs yec dajn, xhidajł bejn huinajłni. <sup>2</sup> Dxejcti biäd te beņracxhuu ni rał tiejxhni nez loj Jesűs. Bazuxhijbni, räjpnı:

—Dad, palga rłajzlu, sajć gusiajclu narä.

<sup>3</sup> Dxejcti basгаа Jesűs naani, gudajnni dade'ga con naani, räjpnı:

—Rlazä jiajclu. Sıajć tiejxhlu.

Lagajć dxejć gubıcaj guejdx ni rał tiejxhni. <sup>4</sup> Dxejcti räjť Jesűs lojni:

—Arniä, rut lojdi gäblu xhi guzajclu. Huijtis lo rebıxhojć te badeed gojn ni gunii toMoisės gudeed bejn ni riajć, te fıi rebıxhojćga abiajclu.

*Rusiajć Jesűs te xmos capitán roman*

(Lc. 7:1-10)

<sup>5</sup> Che biu' Jesűs guedx Capernaum, bidzujņ te capitán roman nani rnıbee te gayuu soldaad. Gunabduxhni lo Jesűs, <sup>6</sup> räjpnı:

—Dad, xmosä naga' rolizä. Di gacđi guiniibni luxh cayanduxhni.

<sup>7</sup> Räjť Jesűs:

—Do' o te gusiacäni.

<sup>8</sup> Dxejcti räjť capitán lojni:

—Dad, xhet sacäđi; di nungäjł jiu' guejblu rolizä. Guiniitis te diidx, sıacgajć xmosä. <sup>9</sup> Narä nacäza xmos rebejn ni rnıbee, niluxh rnıbeäza te gayuu soldaad. Che rniä lo tejni: “Huij”, rijni. Che gäpä loj steeni: “Gudaa”, riädgajćni. Che gäpä loj xmosä: “Bejn dee”, rungajćni.

<sup>10</sup> Che biejn diajć Jesűs si'c, bidxeloduxhni, räjpnı loj renani sıädnałni: —Rniliäpac lojtu, nicla neņ guideb reguedx Israel dina nidxälä te bejn ni rililajć si'c rililajć dade're. <sup>11</sup> Niluxh rniä, sirii xhidajł benzijť nez ladjıaa, nez ladjiät, te jıädcuenağreni Abram, Isaac, Jacob łajdx Dios xhaguıbaa. <sup>12</sup> Luxh rebeņ Israel nani nıajć xi'n Dios sıjreni te laad lo yälćäy cadro soonreni, sauya'reni läjyreni, sidejťtisreni trabajť par tejpas.

<sup>13</sup> Dxejcti räjť Jesűs loj capitán:

—Gubi' rolijzlu. Sigajćni huililajzlu, sigajćza gacni.

Dxejć lagajć orga bıajć xmosni.

*Rusiajć Jesűs xnansueegr Pedr*

(Mr. 1:29-31; Lc. 4:38-39)

<sup>14</sup> Che bidzujņ Jesűs rolıjć Pedr, bahuiini naga' xnansueegr Pedr, cayacxhuuni, yu'ni xliaa. <sup>15</sup> Dxejć gudajntis Jesűs naani, birıgajćni xliaaga. Dxejcti huistie nane'ga, gusloj cagudeedni xhi gau Jesűs.

*Rusiajć Jesűs xhidajł beņ racxhuu*

(Mr. 1:32-34; Lc. 4:40-41)

<sup>16</sup> Che biu' guxhıjn, biädnağreni loj Jesűs xhidajł bejn ni yu' rebendxab lostooreni; con xtiidxnı gunıbeeni birii guıraa rebendxabga. Basıajćzani guıraa rebeņ racxhuu. <sup>17</sup> Si'c bejnıni te guzojć diidx ni bacuaa todad Isaıas, ni gunii xtidx Dios, che räjpnı: Lagajć laani cua'ni rexcälracxhuunu, sanäzani rexcälınayannu.

*Reni rıajć ninajł Jesűs*

(Lc. 9:57-62)

<sup>18</sup> Che bahuii Jesűs tre' xhidalduxh rebejn guideb gabi cadro suga'ni, gunıbeeni tednäjni rexpejņpacni stelaad ro' nis. <sup>19</sup> Dxejcti biäd te beņnajn loj Jesűs, räjpnı:

—Mastr, sısiaäza cadrotis chäälü.

<sup>20</sup> Räjť Jesűs lojni:

—Rebäjť rajpreni xpiliäğreni, remane' ni rutajť xhaguıbaa rajpreni xpiťiäğreni, niluxh narä Xi'n Dios ni gujć Nıguii dina gapä cadro gaa yecä.

<sup>21</sup> Stee rexpejņpacni räjť lojni:

—Dad, basaan chaxgaa ładxä te chacuatźä xtadä.

<sup>22</sup> Räjť Jesűs lojni:

—Gudanałł narä. Basaan sugucua'tz resabengutreni rebejn nani najć si'c bengut sa'csi najćreni beņdojł.

*Basıacđxi Jesűs te beduxh*

(Mr. 4:35-41; Lc. 8:22-25)

<sup>23</sup> Che biu' Jesűs neņ barcw, biu'za rexpejņpacni lagajć nenga. <sup>24</sup> Dxejć huäjs te bedonduxh lo nisdo. Lirusiäğzani barcw neņ nisdo. Luxh Jesűs nagayejsni. <sup>25</sup> Dxejcti huij rexpejņpacni huıcuäğni, räjpreni:

—Dad, gucnäj nuure te di guetnu.

<sup>26</sup> Dxejć räjť Jesűs:

—¿Xhicuent rdxejbtu, bejn ni guxii rililajć?

Dxejcti huistieni, gudidxa'ni lo bej nájza lo nisdoo, te biacdxireni. <sup>27</sup> Dxejc bidxeloduxh rexejñpacni, rájpreni:

—¿Chuni'c najc niguiire? ¡Ahuilaa xho rucudiajg bej nájza nisdoo xtiidxni!

*Rebendxab ni yu' lajdx regadarenos*

(Mr. 5:1-20; Lc. 8:26-39)

<sup>28</sup> Che bidzuñ Jesús stelaad nisdoo cadro najc lajdx regadarenos, tio'p bejñ ni yu' bendxab lastooreni biächaglojreni Jesús. Rebejñga riireni neñ rebaa, nialazduxhrene, ni'cni rut rajcdi rdejñ nezuyjga. <sup>29</sup> Guredxa'reni rájpreni:

—¿Xhicuent siächu'lu loonu luj ni najc Jesús Xi'n Dios? ¿La siäädlu ree te gusacsílu nuure luxh gad galdi xornu, ä?

<sup>30</sup> Nez te laad, zijte' cadro suga'reni, cayajp bejñ xhidalro cuch. <sup>31</sup> Dxejcti gunab rebendxabga loj Jesús, rájpreni:

—Palga cuäälu nuure, basaan jiu'nu neñ recuchre.

<sup>32</sup> Dxejcti rájñ Jesús:

—Colchäj.

Dxejcti biriireni neñ lastoo redade'ga, huichu'reni neñ recuchga. Dxejcti guiragajc recuchga caguxun'reni, huitejbreni ro' te guilaj, biääzreni neñ nisdoo, gujttireni neñ nis.

<sup>33</sup> Rebejñ ni cayajp recuchga, baxun'reni, huijreni lajdxreni, huiyeireni diidx guiraa ni guzajceni nájza ni guzajc redade' ni guyu' rebendxab lastooreni. <sup>34</sup> Dxejcti guiraa rebenguejdxga huichaglojreni Jesús. Che bahuiireni lojni, gunabduxhrene lojni, jiunejzni lajdxreni.

## 9

*Basiajñ Jesús te bejñ nani abixu'ñ tiejxhni*

(Mr. 2:1-12; Lc. 5:17-26)

<sup>1</sup> Dxejcti biu' Jesús neñ barcw. Gudejñni stelaad ro' nis te bidzuñni lajdxni. <sup>2</sup> Ro'c biädñäreni lojni te bejñ nani abixu'ñ naani, ni'ni. Naga'ni lo te da'. Che bahuii Jesús lacti rililajzreni, rájñni loj benracxhuuga:

—¡Baspaa lajzlu xi'ná! Agubicaj rextojllu.

<sup>3</sup> Dxejcti gaii benñajñ ni ruluui xleii Moisés cayujñreni xhigab ensilaareni, caniyaj dee Dios con rextiüdxni. <sup>4</sup> Dxejc guchbegajc Jesús xhi xhigab cayujñreni, dxejc rájñni lojreni:

—¿Xhicuent cayujntu xhigabgujdx neñ lastootu? <sup>5</sup> ¿Con ni najc guyasiru? Guiniä lo te bejñ: “Agubicaj rextojllu”, o guiniä lo te bejñ: “Huistie, guzaj.” <sup>6</sup> Dec gunä te gacheetu Xi'n Dios ni gujñ Niguii rajp yäl'mibee lo guedxliujre te gudzucajni dojl.

Dxejcti rájñni loj benracxhuuga:

—Huistie, cua' xta'lu, huij rolizlu.

<sup>7</sup> Dxejcti huistie benracxhuuga, siini rolizni. <sup>8</sup> Che bahuii rebejñ lojni, bidxeloduxhrene, gulä'preni xpala'n Dios, ni badeed yäl'mibeega loj rebejñ.

*Che gurejdx Jesús Mateo*

(Mr. 2:13-17; Lc. 5:27-32)

<sup>9</sup> Dxejcti birii Jesús cadro basiajñni benracxhuu, sä'tini. Dxejc bahuiini loj te dade' ni laa Mateo. Sobga'ni loj te yagxhiil cadro rbejñ reni ruquijx xcuent guiraloj. Dxejc rájñ Jesús lojni:

—Gudanajl narä.

Dxejcti huisuni, sanajlni Jesús.

<sup>10</sup> Cheni sobga' Jesús lo mex cayajwreni roliz Mateo, biäädza xhidajl rebejñ nani ruquijx xcuent guiraloj, ni najc rebejñ ni di gac xpen Israel, gurejzarení lo mex náj Jesús nájza reni najc rexejñpacni. <sup>11</sup> Che bahuii rebeñ guidoo, ni laa refarisee, xhi cayujñ Jesús, rájpreni loj rexejñpac Jesús:

—¿Xhicuent raunäj xmastrtu rebejñ nani ruquijx xcuent reyuj nájza rebejñ ni di gac xpen Israel?

<sup>12</sup> Che bieñ diajñ Jesús xhi guniireni, rájñni lojreni:

—Rebejñ nani nadaan dini guiquiñ chu gusajñni, niluxh rebejñ racxhuu ni'c rquiñreni chu gusajceni. <sup>13</sup> Colchäj te colchaseed xhi säloj diidxre ni caj loj reguijtz: “Yäl'rulaslajz rlazä, dina rlazä guniidxtu guidxaa loä.” Sa'csi narä dina niädtedxä rebensa'c, narä siädtedxä rebendojl te gusiechlajzreni.

*Gunabdiidxreni xcuent yäl'rucua'n*

(Mr. 2:18-22; Lc. 5:33-39)

<sup>14</sup> Dxejcti biääd rexejñpac Juan loj Jesús rájpreni:

—Nuure con refarisee rcua'nnu xhidal huält, ¿xhicuent di rexejñpacu gucua'n, ä?

<sup>15</sup> Räj p Jesüs lojreni:

—Che ruchnaa te bi'n, çxhixh rac-huin lajz regelnejdx laga suga' bi'n con laareni? Palga yu' xhi sac bi'nga, dxejc sii soonreni, sucua'nreni.

<sup>16</sup> 'Rut gundi remiend te ladbiejw con te la' ladcoob sa'csi sixu'n ladcoobga, sutiäjsruni ladbiejwga, sajc xhiroobru cadro biräjsga. <sup>17</sup> Niclaza gac guida' bincoob neñ reguidbiejw, sa'csi reguidbiejw siräjsni dxejc sixe' bin, sinijta reguijdg. Ni'cni nanab guida' bincoob neñ reguidcoobza, te si'c nicla tejreni di nit.

*Xindxa'p Jairo näjza gunaa nani gudajn xhajb Jesüs*

(Mr. 5:21-43; Lc. 8:40-56)

<sup>18</sup> Lañ ni caniini rediidxga, biäd te dade' ni rnibee neñ guidoo xten rexpejn Israel. Bazuxhijbni nez loj Jesüs räjpni:

—Entis gujt xindxa'pä. Gudaa, badzuub naalu yejcnj te guibañsacni.

<sup>19</sup> Dxejcti huisu Jesüs, sanäni Jairo. Näj rexpejn pacni sanajlrenini. <sup>20</sup> Luxh guyu' te gunaracxhuu nani agujc tzubito'p ijz cayajcni yälguidxbäii. Bidzujñni nez dejtz Jesüs, gudajñni ro' xhajbni, <sup>21</sup> sa'csi bejñni xhigab neñ lastooni: "Palga sajc canätis ro' xhajbni, siacä." <sup>22</sup> Dxejc gubiré Jesüs bahuiini loj gunaaga, dxejc räjpni:

—Gulecdxilajzlu xindxa'pä. Yälirilajz xtenlu abasiajclu.

Luxh lagajc dxejc biajc gunaaga.

<sup>23</sup> Cheni biu' Jesüs rolizj dade' nani rnibee neñ xquidoo rexpen Israel, bahuiini rebejn ni ro' bizej näjza xhidajl rebejn ni cabedxa' cayoon, li te bieje cayajc, dxejc <sup>24</sup> räjpni loj rebejn ga:

—Colguibicaj. Nagayejstis dxa' pga, gajdñi guet.

Dxejc rebejn ga alga ruxhiznäjreni Jesüs. <sup>25</sup> Cheni abirii rebejn neñ yu', biu' Jesüs, gunaazni naa dxape', dxejc huistie dxape'ga. <sup>26</sup> Dxejcti bire'ch diidxga guiraa neñ reguejdx ni tre' nejzga.

*Bastajc Jesüs tio'p lotiä'p*

<sup>27</sup> Che birii Jesüs ro'c, huinajl tio'p bejñni nani di fi. Rbedxa'reni roonreni räjpreni:

—Balaslajz nuure, Xi'n toDavid.

<sup>28</sup> Che bidzujñ Jesüs cadro caya'nni, gubigreni lojni. Dxejcti gunabdiidx Jesüs lojreni, räjpni:

—¿La rililajztu sajc gunä ni rniabtu?

Redade'ga basejc diidx, räjpreni:

—Sajc gunluni, Dad.

<sup>29</sup> Dxejcti gudajñni balojreni, räjpni:

—Sugacni si'cpacni rililajztu.

<sup>30</sup> Lagajc dxejc bixal balojreni. Sas räjpjac Jesüs lojreni:

—Arniä, na'c chayeitu diidxre, te rut gacbeedi xhi guzajctu.

<sup>31</sup> Cuantsi biriireni ro'c guslojreni cagutie'chreni diidx xuent Jesüs guideb gabi neñ reguejdxga.

*Basnii Jesüs te gop*

<sup>32</sup> Che biriireni cadro biajc baloj rebejn ga, biäd sgaii bejn biädnäreni te gop loj Jesüs. Yu' xprit beñdxab neñ lastoo bejn ga. <sup>33</sup> Che barilaagw Jesüs xprit beñdxab neñ lastoo beñgopga, guslogajcni caniini. Rdxeloduxh rebejn räjpreni:

—Gajdpacnu guihui sa' redzuunre lajdx rexpejn Israel.

<sup>34</sup> Dxejc rebeñ guidoo ni najc refarisee, räjpreni:

—Rbääni rexprit beñdxab con yälrnibee xten beñdxabro.

*Rulaslajz Jesüs rebejn*

<sup>35</sup> Gudejd Jesüs guiraa reguedxro näjza reguedxbäz, basule'ni xtidx Dios nen reguidoo xten rexpejn Israel. Basääbni diidx xten xcälrnibee Dios. Basiajczani guiralaj yälracxhuu, guiralaj yälgujdx ni rajc bejn nen reguejdxga. <sup>36</sup> Che bahuiini loj rebeñ xhidajl biaduxhni rebejn ga sa'csi rdebya' lajzreni, rac-huin lajzreni, najcni si'c najc rexiiil nani di ga'p baxtoor. <sup>37</sup> Dxejcti räjpni loj rexpejn pacni:

—Gulijpac xhidalduxh beñ guedxliuj di gan xtidxä, luxh guxii najc reni guluiireni; najcni si'c gälj ni agojl guilia', niluxh ruti mos ni guilia'ni. <sup>38</sup> Colnab lo Dad nani najc xtenni guedxliujre te guxhañni rebejn ni sajc guluii rebeñ guedxliujre, gacreni si'c mos ni rlia' gälj.

## 10

*Gule Jesüs guitzubitio'p rexpejn pacni*

(Mr. 3:13-19; Lc. 6:12-16)

<sup>1</sup> Dxejcti gurejdxni guitzubitio'p rexpejn pacni, badeedni yälrnibee lojreni te gurilaagwreni rexprit beñdxab lastoo bejn näjza te gusiajczreni guiralaj yälgujdx näjza yälracxhuu.

<sup>2</sup> Laj reguizubutio'p rexpejn ni guleni najc: Simón, ni laaza Pedr; Andrés bejtz Simón; Jacobo xi'n Zebedeo; Juan bejtz Jacobo; <sup>3</sup> Felipe; Bartolomé; Tomás; Mateo, ni najc colectoor; Jacobo, xi'n Alfeo; Lebeo ni rniireni Tadeo; <sup>4</sup> Simón, te bejn ni yu' loj recananita; Judas Iscariote, nani bateed Jesús ladzña rebejn nani rdxe'ch lojni.

*Baxhal Jesús rexpejn pacni gutie'chreni diidx*  
(Mr. 6:7-13; Lc. 9:1-6)

<sup>5</sup> Guitzubutio'p rebejnre baxhal Jesús. Balijdxnireni räjpni:

—Na'c cháātu nez cad yu' rebejn ni di gumbee Dios. Na'c jiu'tu lajdx reben samaritan. <sup>6</sup> Colchäxgaa lo rexpejn Israel nani agunijt nen dojl. <sup>7</sup> Colchäj, colzäbdüdx lo rebejn, colye'tz lojreni xcälrnibee Dios abidzngajxh. <sup>8</sup> Colgusajc ben racxhuu, colgusajc tiejxh rebejn ni ral guejch tiejxhreni, colguspajn bengut. Colgurilaagw xpriit bendxab lastoo rebejn. Ligaj cua'tu yälrnibee, ligajza colyejn dzuun.

<sup>9</sup> Räjpzani:

—Na'c chanātu oor, niclaza pla't, niclaza coobr nen xdobdäjltu, <sup>10</sup> niclaza guijxh na'c chanātu lo nejz. Na'cza chanātu tio'p xhajbtu, nicla gura'ch, nicla baston sa'csi bejn ni rujn dzuun nungäj'l xca'ni xhi gauni.

<sup>11</sup> Räjpzani:

—Che guidzujntu xhitis te guedxro, xhitis te guedxbäz, colquuil te bens'a'c. Rolijztisni coljia'n dxejli ni jiunejztu guejdxga. <sup>12</sup> Cheni jiu'tu nen yu', colni xtidx Dios lo rebejnga. <sup>13</sup> Palga najceni bejn ni numbee Dios, sujia'n yälrbedxilajz loj rebejnga. Niluxh palga direni gac bens'a'c, naaddireni xca'reni xtidx Dios, suguibi' yälrbedxilajzga lojtu, coljiunejz ro'c. <sup>14</sup> Palga direni gusaan jiu'tu rolizreni, palga di rlanjreni gucua diajgreni xtiidxtu, dxej coljiunejz roliz bejnga, o coljiunejz guejdxga, dxej colcuij guxhuj ni'tu si'c te seen gulälazreni xtidx Dios. <sup>15</sup> Rniliäpac lojtu, dxej ni gun Dios xcälguxhtisni, te yälguxhtisoru gun Dios rebejnga, quela yälguxhtis ni gujc reben guedx Sodoma näj Gomorra.

*Yälrusacs' ni siääd*

<sup>16</sup> Räjpzani:

—¡Colhuiire! Narä suxhalä la'tu si'c xile' nez loj reloob, ni'cni colgacnasingduxh si'c najc te bäl, colyajzca nadolajz si'c te palom. <sup>17</sup> Colnatiro rebejn sa'csi suteedreni la'tu ladzña rexucxhtisreni, siguijnzaren la'tu nen xquidooreni. <sup>18</sup> Sinäzaren la'tu nez loj regubier, nez loj rereei xcuent rextidxä, te gusule'tu xtidxä nez lojreni näjza nez loj rebejn nani di gumbee Dios. <sup>19</sup> Cheni chanäreni la'tu nez loj reguxhtis, na'c guntu xhigab xho guiniitu, niclaza guntu xhigab xhicha ni'c guiniitu, sa'csi lagajc Dios suniidx diidx guiniitu orga. <sup>20</sup> Sa'csi et la'ditu ni guini dxej, Sprit xten Xtadtu Dios ni yu' nen lastootu, laani guini nen lastootu.

<sup>21</sup> 'Luxh rebejn suteedreni lagajc bejtzreni ladzña reni ju'treni. Redad suteedreni lagajc xi'nreni, rexi'n bejn sidxe'chzaren lo xczuzajnreni te ju't bejn xczuzajnreni. <sup>22</sup> Guiraa rebejn guedxliuj sidxe'chreni lojtu xcuent xtidxä. Nani chanuu lo xtidxä dxej lultli, ni'c sujn gaan yäl'nabajn par tejpas. <sup>23</sup> Che guirinajreni la'tu te gusacsireni la'tu nen te guejdx, colguxun ro'c, colchäj stee guejdx. Rniliä lojtu, ditu gun gaan tedtu guiraa reguejdx xten rexpejn Israel ansde jääd Xi'n Dios ni gujc Niguii.

<sup>24</sup> 'Di te bejn ni casieedgaj benroru lo xmastrni, diza te mos gac benroru lo xlamni. <sup>25</sup> Te bejn ni casieed, rsieedruni te gacni si'c najc xmastrni, sigajzca rujn mos, riuni xtidx xlamni te gacni si'c najc xlamni. Palga rbälajreni Beelzebú nani rnibee bendxab, çxho direni cuälajza Beelzebú rexi'nni, ä?

*Chuni'c nanab guidxejbni*  
(Lc. 12:2-9)

<sup>26</sup> Räjpzani:

—Ni'cni na'c guidxejbtu rebejn, sa'csi anajntu xheti te cos ni niäuu lojni ni di guidzujn dxej guixal lojni, te fii chutis bejn lojni. Xhetiza te cos xhigat'zdi ni di guidzujn dxej siejn diajg bejn xcuentni. <sup>27</sup> Diidx nani rniä lojtu guxhijn, colguiniini che nianij lo guedxliuj. Rediidx nani rniä chigaj rodiajgtu, colguiniini dip, jiaali colzuj, guredxa' te jiejni. <sup>28</sup> Na'c guidxejbtu renani rugu't bejn, sa'csi direni gun gaan ju'treni xaim bejn. Colguidxejbru nani rugu't tiexh bejn näjza xaim bejn nen gabijl.

<sup>29</sup> 'çLa di bejn guto' tio'p manbäz ni rutajt por te centaab, ä? Luxh racbee Xtadnu ni yu' xhaguibaa che riabj tejni lo yuj. <sup>30</sup> Näjza rexquidxejclu nagab tebgajreni. <sup>31</sup> Ni'cni rniä na'c guidxejbtu; sajcrutu lo te chinaa manbäz ni rutajt.

*Renani rusule' xtidx Jesucrist nez loj rebejn*  
(Lc. 12:8-9)

<sup>32</sup> Räjpzani:

—Chutis renani rusule' xtidxä nez loj rebejn, narä siniäza xcuentni nez loj xtidä ni yu' xhaguibaa. <sup>33</sup> Guiraa renani di gusule' xtidxä nez loj rebejn, sigajcza narä dina guiniä xcuentni nez loj xtidä ni yu' xhaguibaa.

*Rlia' Jesús sa' bejn*

*(Lc. 12:51-53; 14:26-27)*

<sup>34</sup> Räjpszani:

—Na'c guntu xhigab siädnää yälrdxagdilj lo reben guedxliujre, xhet yälcuedxidi ni siädnää, yälrdxagdilj siädnää. <sup>35</sup> Narä siädnää yälrdxagdilj te bi'n con xtidni; te dxa'p con xnanni; te gulijzni con xnansueegri. <sup>36</sup> Ni'cni lagajc resa'tu ni yu' rolizjtu sidxe'chreni lojtu.

<sup>37</sup> Nani sanälajzru xtidni, xnanni, luxh narä dini chanälajz, digacdi gacni xpenä; nani sanälajzru xingaanni o xindxa'pni, di gacdi gacni xpenä. <sup>38</sup> Nani di guu xcrujzni, nalajznu tedni trabajw, jiädna'jlni narä, di gacdi gacni xpenä. <sup>39</sup> Nani guidxäl xcäl'nabajjni lo guedxliujre, sunitni yäl'nabajni xhaguibaa. Luxh nani gunijt xcäl'nabajjni lo guedxliujre xcuent rextidxä, sidxälni yäl'nabaja'sc xhaguibaa.

*Gaan nani xca'ni*

*(Mr. 9:41)*

<sup>40</sup> Räjpszani:

—Nani gunidx rolizjni jia'ntu, runiidxzani rolizjni jia'nä; luxh nani ruscuääz narä rolizjni, rolizjni ruscuääzani Gueb Dios nani baxhal narä. <sup>41</sup> Nani guscuääz te niguii ni rniü xtidx Dios rolizjni sa'csi baxhal Dios niguiiga, sica'za bejnga lagajc gaan ni xca' niguii ni rniü xtidx Dios. Nani guscuääz te be'nsa'c rolizjni sa'csi be'nsa'cni, sica'zani lagajc gaan ni xca' be'nsa'cga. <sup>42</sup> Chutis nani gudeed mase te xhijgtis nis niäljuj xcuentä lo rebiuxe're, rniüäpac lojtu, direni gunijt, sica'pacreni nani nungäjäl xca'reni.

## 11

*Renani baxhal Juan Bautist loj Jesús*

*(Lc. 7:18-35)*

<sup>1</sup> Che gulujx baluii Jesús rexpejn'pacni xho gunreni dzuun, dxejcti biriini ro'c te saluiini, chasule'ni diidx lajdx rexpejn'pacni.

<sup>2</sup> Juan yu' neñ latgziib. Che biejn diajgni xhi cayujn Jesús, baxhalni tio'p xpejn'pacni <sup>3</sup> te huinabdiidxreni:

—¿La luj ni najc Crist ni jiääd, ä?, o ¿la silääznu chu stee bejn?

<sup>4</sup> Dxejcti badzu' Jesús diidxre räjpni:

—Cołchäj, colye'tz loj Juan recos nani riejn diajgtu, näjza recos nani ruhuiitu. <sup>5</sup> Reni di fii, ruhuiireni; reni di sa, arsiajreni, reni rał tiejxhni, abiajc tiejxhreni; reni di jien diajg, ariejn diajg; rebengut, ahuäjzreni, gubansa'ceni. Dxejcti loj rebejn prob nani cabäjz xcäl'racnäjä Dios cagusule'reni xtidx Dios ni rusläa bejn neñ dojl. <sup>6</sup> Chicbaa renani di jieed narä.

<sup>7</sup> Cheni sii rebejnga gusloj Jesús canii loj rebejn xcuent Juan:

—¿Chuni'c huihuiitu nez loj reyubijdz? ¿La te biquii ni rusniib bej, ä? <sup>8</sup> ¿Xhini'c huihuiitu? ¿Te bejn ni sucheduxh, ä? Ni najntu rebejn nani sucheduxh rbäjzreni rolizj rereii. <sup>9</sup> La'tu ¿xhicuent huijtu ro'c? ¿Te fiitu te niguii ni rniü xtidx Dios, ä? O'n. Rniüä lojtu, luxh dini gac bejntis ni rniü xtidx Dios; be'nruruni. <sup>10</sup> Laa Juan nani rusä't ni bacuaa lo reguijtz cadro caj scree:

Narä suxhalä te niguii nani guinii xtidxä nez lojlu; laani susucheeni nezyuj nezlojlu.

<sup>11</sup> Guliipac rniä, loj guiraa rexingaan xten gunaa, nicla tejni gajd guiricaj ni najc te be'nsacduxh loj Dios si'c ni najc Juan Bautist. Niluxh bejn nani najc be'ñ huinru lo xcäl'ribee Dios xhaguibaa, bejnga maazru sajcnii loj Juan.

<sup>12</sup> Cheni guclii dxej ni gusloj rusule' Juan Bautist diidx najli, yu'duxh reni rlaizpac jiu'reni lo xcäl'ribee Dios ni yu' xhaguibaa con yälrdxe'ch, sas reni nadxecha' rlaizreni cuäxuuni xcäl'nabee Dios. <sup>13</sup> Guiraa reniguii ni gunni xtidx Dios näjza xleii Moisés, gunixgaereni recos ni churu gac, galooli hasta che biäädli Juan Bautist. <sup>14</sup> Palga rlaiztu chalälajztu, lagajc Juan najc Eläa, niguii xten Dios nani bia'n diidx jiääd. <sup>15</sup> Nani sobdiajg diidx, gucuadiajgni.

<sup>16</sup> ¿Xhicojn guntebloä rebejn nani tre' naj, ä? Najceni si'c najc rebiuux nani rguijt nez lo guii cadro rdo', rbejdxreni lo sa'reni, <sup>17</sup> rniüireni: “Bielnu bizej te guya'tu luxh ditu nuya'. Dxejcti bielnu redij ni nabaduxh luxh dizatu nioon.” <sup>18</sup> Sa'csi che biääd Juan dini niajw dizani niä', luxh räjp rebejn najcni te xpejn be'ndxab. <sup>19</sup> Dxejcti biälä narä, Xi'n Dios ni gujc Niguii, rauä, rä'ä dxejcti räjp rebejn: “Niguiire rauxha't, rätejzani bin, najcni xamigw rebe'ndojl näjza reniguii ni ruquijx xcuent reyuj ni rajx lo gubier.” Luxh loj rebejn ni najc xpejn Dios yuduxh xcäl'najni Dios, ni'cni baxhalni guiro'p rebejnre.

*Reguejdx guyalajz*  
(Lc. 10:13-15)

<sup>20</sup> Dxejcti gusloj Jesús gudilnäjni rebenguejdx cadro benduxhni remilaagwr, sa'csi naad-direni gusiechlazreni xtojlneni, sanuutis nabajpreni neñ dojl. Dxejcti räjpni:

<sup>21</sup> —jGunatiru guedx Corazín! jGunatiro guedx Betsaida! Paru neñ guedx Tiro nájza guedx Sidón niajc remilaagwr nani gujc guedx lajdxtu, cadxejli nusiejch lajzreni xtojlneni, cadxejli niajcwreni neñ godx, nidääb cobdäj yejreni. <sup>22</sup> Luxh rniä lojtu: che guidzujñ dxej ni gun Dios xcälguxhtisni, sidejdrutu castüigw loj rebejn ni guläjz guedx Tiro nájza guedx Sidón. <sup>23</sup> Luj guedx Capernaum di gunlu xhigab chäslu xhaguibaa; jäjt neñ baa jiajblu, sa'csi paru neñ guedx Sodoma niajc sa' remilaagwr nani gujc guedxlajdxlu, pet najli tresijc guejdxga. <sup>24</sup> Luxh rniä lojtu, dxej ni gun Dios xcälguxhtisni, trabajwduxhru tedtu loj rebejn Sodoma.

*Coltaa loä, te gusilajztu*  
(Lc. 10:21-22)

<sup>25</sup> Laa dxejcti räjp Jesús:  
—Rliä'pä xpala'nlu Xtaäd, Dad xten xhaguibaa nájza guedxliuj, sa'csi bacua'tzlu recosre lo rebennajn, lo rebejn ni racbee, te baluüiluni loj rebennadolajz ni najc si'c biuxbáz. <sup>26</sup> O'n. Guliini, Xtaäd, sa'csi rujnlu xhigab si'c najc hueen gacni.

<sup>27</sup> Guiraa recosre abaniidx Xtaäd loä, rutru numbeedi xingaanni; xtadtisni rumbeeni. Rutruza numbeedi xtadni, xtebtis xingaanni, nájza loj renani gudeed xingaanni gumbee xtadni. <sup>28</sup> Coltaa loä guiraaatu nani abadxajg, nani rsina', narä sunidxä yälrusilajz lojtu. <sup>29</sup> Colguiseed guntu dzuun si'cni ruluiätu. Colhüii xho runä, xho nacä nadolajz, dizana gacä beñnayedxlajz neñ lastoä, ni'cni sidxäl xaimtu yälrusilajz. <sup>30</sup> Sa'csi guyasi najc xtzunä ni ruluiätu, dizani gac naganduxh.

## 12

*Rutie' rexejñ Jesús triuu dxej ni rusilajzreni*  
(Mr. 2:23-28; Lc. 6:1-5)

<sup>1</sup> Che sasaj Jesús nez loj reyuj cadro naga' triuu, luxh dxejga najc dxej ni rusilajz rexejñ Israel, calaan rexejñpacni, guslojreni calädxa'reni dojl lo triuu te cayajwrenini. <sup>2</sup> Che bahüii reben guidoo ni laa farisee, räjpreni loj Jesús:

—Ahüii xho rujn rexejñpacnu dzuun nani di nungäjñ gunreni dxej nani rusilajz bejn.

<sup>3</sup> Luxh laani räjpni lojreni:

—¿La gajdtu goñ xhi caj loj reguijtz xcuent ni bejn toDavid che gulannäjni rexejñni, ä? <sup>4</sup> Biu'reni xquidoo Dios, gudajwreni yätxtiil nani di nungäjñ gauni, nicla laani, niclaza rebejn nani sanäni, sa'csi yätxtiilga rebixhojztis rajwni. <sup>5</sup> O ¿la gajdtu goñ lo reguijtz xten leii cadro caj xcuent rebixhojz, ä? Laareni riu'reni neñ reguidoo dxej ni rusilajz bejn, rujnreni xtzuunreni niluxh xhet dojldi rujnreni. <sup>6</sup> Narä rniä lojtu, ree suga' tej nani sajrcu loj guidoo. <sup>7</sup> Paru niacheetu xhi säloj dee: “Yälrusilasaj rlazä, xhet yälrejtdi guidxaa”, ditu nucaquij redee ni xhet bejndi. <sup>8</sup> Sa'csi narä Xi'n Dios ni gujc Niguii rniäbeä dxej ni rusilajz rebejn.

*Niguii ni rxu'n naani*  
(Mr. 3:1-6; Lc. 6:6-11)

<sup>9</sup> Che birii Jesús ro'c, biu'ni te xquidobäzreni. <sup>10</sup> Ro'c suga' te bejn ni gubijdz te naani. Luxh sa'csi caguüilreni xho gucaquijreni Jesús, gusloj canabdiidxreni lojni, räjpreni:

—¿La rusaan leii gusiajcti beñracxhuu dxej ni rusilajz bejn, ä?

<sup>11</sup> Badzu' Jesús diidxre lojreni, räjpni:

—Chutejtu ni rajp te xiil niluxh palga guitejbni neñ bisie che gal dxej ni rusilajz bejn, ¿xhixh dini cuää xiilga neñ bisie, ä? <sup>12</sup> Sacduxhru te bejn loj te xiil, ni'cni susaan leii gun bejn dzunsa'c dxej nani rusilajz bejn.

<sup>13</sup> Dxejcti räjpni loj dade'ga:

—Baslii naalu.

Che basliinini, dxejc biajc naani, gujcti tebloj si'c najc stelaad naani. <sup>14</sup> Dxejcti birii reben guidoo ni laa farisee, bachags'a'zreni te bia'nreni diidx ju'treni Jesús.

*Diidx ni guniireni xcuent Jesús*

<sup>15</sup> Che gucbee Jesús xhi xhigab cayujnreni, biriini ro'c. Xhidajl bejn sanajlni, dxejc basiajc Jesús guiraa rebenracxhuu. <sup>16</sup> Dxejc räjpni lojreni:

—Na'cpac gäbreni chu najcni.

<sup>17</sup> Si'c gujc te gusojb diidx ni gunii Isaías ni gunii xtidx Dios che räjpni:

<sup>18</sup> Deeni najc xmosä nani aguleä, laani sanälazä, laani rbanälazä, sudedä sprit xtenä lojni te gusule'ni yälguxhtis xtenä lo guedxliuj.



<sup>19</sup> Dini tiġnāj bejn, dizani cuedxa';  
rudza jiejn di diajn ni xse'ni lad nezuj.

<sup>20</sup> Dini qui'ch nicla te niġt ni cabiejc,  
dizani gusuui te duxiil ni cayujn guxh,  
dxejl che gunni gaan guinibeeni yālguxhtis.

<sup>21</sup> Lajtisni sustioob lastoo rebejn ni digac xpejn Israel.

*Rucuaquijreni Jesús rajpni yālrnibee xten bendxab  
(Mr. 3:19-30; Lc. 11:14-23; 12:10)*

<sup>22</sup> Dxejcti biādnāreni loj Jesús te bejn ni di fii, dizani guinii, yu' te bendxab lastooni. Dxejcti basiajc Jesúsni, te gujc guniini, te gujcaz bahuini. <sup>23</sup> Guiraa rebejn bidxelojreni, rājpreni:

—Xhaa laa Xi'n toDavidni, ā?

<sup>24</sup> Che biejn diajg rebejn guidoo ni laa farisee rediidxga, rājpreni:

—Bejnre rbāā rebejndxab con yālrnibee xten Beelzebú ni rnibee loj rebejndxab.

<sup>25</sup> Che guchee Jesús xhi xhigab cayujnreni, dxejc rājpni:

—Guiraa yālrnibee nani rlia' sa'ni sinitloj; te guedxro sigajc te famil nani rlia' sa'reni, nani ridiġnāj sa'reni, sinitlojreni. <sup>26</sup> Sigajca palga bendxab rbāā sabendxabni, silia' sa'reni, dxejc xho gac chanuu xcālrnibereeni? <sup>27</sup> Palga narā rbāā rebejndxab con yālrnibee xten Beelzebú, ċchu xcālrnibee rajc rbāā rexejntu bendxab, ā? Ni'cni lagajc laareni suluiireni xhet laadi rujntu xhigab. <sup>28</sup> Palga narā rbāā rebejndxab con Xprit xten Dios, guliipacni abidzujn xcālrnibee Dios lojtu.

<sup>29</sup> Bahuilaare. Xho gac jiu' te bejn cuan rolizj te bēndaan, xho gac cuanni xhixten bejnġa, palga dini gulibxgaani bendaanga? Che abiliib bejnġa, sajc cuanni rexhixten bejnġa.

<sup>30</sup> Nani xhet yu' di xladā, rdxe'chni loā. Nani di jiādnajl narā, rutie'chni reni siādnajl narā.

<sup>31</sup> Ni'cni rniā guira'ti dojl, guira'ti yālruguee xte bejn sajc gusiājl lajzni xtebtis yālrniyaj Sprit Dxan xten Dios di Dios gusiājl lajzni. <sup>32</sup> Chutis ni guinii xhi te diidx yālrniyaj Xi'n Dios ni gujc Niguii sajc gusiājl lajzni, luxh chutis ni guiniyaj Sprit Dxan xten Dios, di Dios gusiājl lajzni, nicla lo guedxliujre, niclaza xhaguibaa.

*Sajc gumbeetu bejn xcuent diidx ni rniireni  
(Lc. 6:43-45)*

<sup>33</sup> Palga nasa'c te yajg sicaj ninexhsa'c lojni, per che di yajg gac yagsa'c, xho xcaj ninexhsa'c lojni. Ni'cni huenliisi siembeetu te yajg che fiitu xho najc ninejxh ni rcaj lojni.

<sup>34</sup> Sa' la'tu beŋguijdx ni najc si'c te bāl niālasduxh, xho gac guiniitu te didxsa'c?, ni ro' bejn rniitis rexhigab ni yu' neŋ lastoo bejn. <sup>35</sup> Te beŋsa'c rniini didxsa'c, sa'csi ganax xhigabsa'c yu' neŋ lastooni, te beŋguijdx rniitisi cosguijdx sa'csi ganax xhigabguijdx yu' neŋ lastooni.

<sup>36</sup> Narā rniāza, guiraa rediidxguijdx nani rniū bejn sudeedreni cuent lo Dios cheni gunni yālguxhtis, <sup>37</sup> sa'csi lagajc rextiidxlu sujn guinii Dios najclu beŋsa'c, lagajc rextiidxlu sujn gunijtu lo Dios.

*Rebeŋguijdx rniab te milagwr si'c te seen  
(Mr. 8:12; Lc. 11:29-32)*

<sup>38</sup> Dxejcti rebejn ni ruluii xleii toMoisés nājza rebejn guidoo ni laa farisee, rājpreni loj Jesús:

—Mastr, nuurnu rlaiznu guihuini te seen; bejn te milagwr te fiinuni.

<sup>39</sup> Badzu' Jesús diidxre, rājpni:

—Rebeŋguijdx ni rusguee rniab te seen, niluxh xhetru seendi fiireni xseentis Jonás, dade' ni gunii xtidx Dios. <sup>40</sup> Sa'csi lagajc si'cni guyu' Jonás xque' te bālro choŋ dxej, choŋ yāāl, si'ca chu Xi'n Dios ni gujc Niguii neŋ lastoo guedxliuj choŋ dxej, choŋza yāāl. <sup>41</sup> Cheni gac yālguxhtis xten Dios pet sistie rebejn ni siāād Nīnive te fiireni gac yālguxhtis rebejn ni tre' lo guedxliuj naj, niluxh sājb rebejn Nīnive abanijt rebejnre sa'csi rebeŋ Nīnive basiejch lajzreni, bia xtojreni che basule' Jonás xtidx Dios lojreni. Luxh nani yu' lojtu naj, sacduxhruni loj Jonás. <sup>42</sup> Nājza reiŋ xten rebejn sur sistieni te fiini gac yālguxhtis rebejn ni tre' lo guedxliujre naj, niluxh nājzani sājbni abanijtreni. Sa'csi laani zitduxh biriini te biādcuadiajni reyālnajn xten Salomón, luxh nani yu' lojtu naj nanduxhruni loj Salomón.

*Te spritdxuudx ni rbisac  
(Lc. 11:24-26)*

<sup>43</sup> Rājpzani:

—Cheni rii te spritdxab neŋ lastoo te bejn, ricanzajni nez lo reyubijdz, ritiilni cadro gusilajzni, per cad rdxāldini. <sup>44</sup> Dxejcti rujnii xhigab, naani, guibisacā cadro biriā. Cheni rbisacni ro'c, rdzujnii si'c rdzujn te bejn neŋ te yu' ni naya neŋni, naliobsa'cni, sucheeni, luxh rut rbājzdi ro'c. <sup>45</sup> Dxejcti rijni, rixiini sgajdz sprit nani najc nadxuudxru lojni te jiādlāznājreni neŋ lastoo bejnġa. Dxejcti rxhinduxhru bejnġa lojni gujcn galoo. Sigajca gac rebejn ni tre' lo guedxliujre naj.

*Xnan Jesús con rebejtzni**(Mr. 3:31-35; Lc. 8:19-21)*

<sup>46</sup> La<sub>l</sub> ni caninäjni rebejn, bidzujn xnanni con rebejtzni, suga'reni rolä' rlanjreni guini-ireni lojni. <sup>47</sup> Dxejcti biääd tej ni räjp loj Jesús:

—Xnanlu näjza rebejtzlu suga' rolä' rlanjreni guininäjreni luj.

<sup>48</sup> Laani badzu'ni diidx lo bejnga räjpni:

—¿Chuni'c najc xnanä? ¿Chuni'c najc rebetzä?

<sup>49</sup> Dxejcti basgaani naani nez loj rexpejnpacni, räjpni:

—¡Redee najc xnanä redeeza najc rebetzä! <sup>50</sup> Chutis nani rujn si'cni rnibee Xtadä ni yu' xhaguibaa ni'c najc betzä, ni'c najc bisianä, ni'cza najc xnanä.

**13***Xcuent bejn nani rbe'c binij**(Mr. 4:1-9; Lc. 8:4-8)*

<sup>1</sup> Lagajc dxejga birii Jesús royu'ga, huicueni nez ro' nisdoo. <sup>2</sup> Xhidalduxh bejn bire' cadro suga'ni, sas biu'ni neñ te barcw, ro'c gurejni. Dxejcti rebejn gurej nez lo plaii. <sup>3</sup> Dxejc gusloj caguluui Jesús con recuent, räjpni:

—Colcuadiajg. Birii te dade' ni rbe'c binij te cue'cni binij. <sup>4</sup> La<sub>l</sub> ni cabe'cni binij yu' binij ni bitejb gajxh nez ro' nesuij, biääd remane' ni rutajt, sas gudajwreni binijga. <sup>5</sup> Yu' binij ni bitejb nez neñ reguij cadro guxii yu' yuj. Gulengajc binijga sa'csi direni nibej jiät neñ yuj.

<sup>6</sup> Che birii gubijdx, bigolreni sa'csi xhetiza xlobaani, dxejc gubijdzni. <sup>7</sup> Yu'za binij ni bitejb neñ reguejch. Che guroob reguejchga, dini nusaan niroob regä'le', gubijdzireni. <sup>8</sup> Guyu' binij ni gurej lo reyusa'c, ro'c gucduxhni. Yu' binij cuaj te gayuu, yu'za binij cuaj gayojñni, yu'za ni cuaj galbitzuuni loj cade tej binij ni gurej. <sup>9</sup> Nani rsobdiajg diidx gucuadiajgni diidxre.

*Xhi pajr najc recuent xten Jesús**(Mr. 4:10-12; Lc. 8:9-10)*

<sup>10</sup> Dxejcti gubig rexpejnpacni, gunabdiidx lojni, räjpreni:

—¿Xhicuent rusule'lu diidx loj rebejn con recuent?

<sup>11</sup> Dxejcti badzu' Jesús diidx räjpni lojreni:

—Sacnäj Dios la'tu te gacheetu recos xhiga'tz xten xcäl'rnibee Dios xhaguibaa, luxh laareni digacdi gacheereni. <sup>12</sup> Chutis ni arajp yäl'racbee, sica'runi te gapruni yäl'racbee. Sas nani guxii rajp yäl'racbee, guiraa yäl'racbee ni rajpni sibicaj. <sup>13</sup> Ni'cni rniä lojreni con recuent sa'csi mase cadxelojreni, direni fii, mase cacuadiajgreni di diajgreni jiejn, xhet racheedireni. <sup>14</sup> Laareni najcreni si'c te soob diidx ni gunii Isaías, dade' ni gunii xtidx Dios, che räjpni:

Siejn diajgpactu, niluxh xhetliidi gacheetu, sidxelojactu, niluxh ditu fii.

<sup>15</sup> Sa'csi gualajz rebejnre, lastooreni najc si'c te guij, di diajgreni jiejn,

luxh niäuzä balojreni, didi fisa'creni con balojreni,

didi jiejnza diajgreni, didi gacheeza lastooreni,

didi gusiejch lajzreni guibi'reni loä te gusiaca lastooreni.

<sup>16</sup> La'tu colguibalaznäj balojtu sa'csi rhuusa'ctu, riensa'cza diajgtu. <sup>17</sup> Rniliäpac, xhidajl redade' ni gunii xtidx Dios, näjza xhidajl beñsa'c rlazduxh nuhuui sa' recos ni cahuuutu, luxh direni nuhuuini, rlanjreni niejn diajgreni sa' rediidx nani cayejn diajgtu, luxh di diajgreni niejnni.

*Rusule' Jesús xcuent bejn ni rbe'c binij**(Mr. 4:13-20; Lc. 8:11-15)*

<sup>18</sup> Colcuadiajg xhi säloj xcuent bejn nani rbe'c binij. <sup>19</sup> Rebejn nani rucuardiajg diidx xten xcäl'rnibee Dios, niluxh direni gacheeni, najcreni si'c najc binij nani bitejb nez ro' nesuyuj; riääd beñdxab rudzucajni rediidx nani biu' neñ lastooni. <sup>20</sup> Rebinij nani bitejb nez neñ reguij, najc si'c rebejn nani rucuardiajg diidx, gustli rca'reni diidxga, <sup>21</sup> luxh guxii yu' xlobaani, direni sutijp. Che rdejreni trabajw, che rdxe'ch bejn lojreni, sa'csi rucuardiajgreni xtidx Dios, rusiejch lajzreni, rbälazni diidxga. <sup>22</sup> Rebinij nani gurej neñ reyaguejch säloj rebejn nani rucuardiajg rextidx Dios rujnruuni te gunreni dzuun te ga'preni yäl'nasa'c ni yu' lo guedxluujre. Dxejcti rexcañ'nasa'c xten guedxluujre rusgueereni. Guiraa recosre rutau lo xtidx Dios neñ lastoo rebejnre, dini gusaan gac te cosechsa'c neñ lastoo rebejnre. <sup>23</sup> Dxejc rebinij nani rtejb lo reyusa'c, ni'c najc si'c rebejn nani rucuardiajg xtidx Dios, nani racbee diidxga, nani rutie'ru sa'reni te racxhidajlreni. Yu' bejn ni najc si'c binij ni gujc te gayuu; yu' bejn ni najc si'c binij ni gujc gayojñ; yu'za bejn ni najc si'c binij ni gujc galbitzuu.

*Xcuent triuu cadre guyu' cuanguejch*

<sup>24</sup> Dxejc bij Jesús stee cuent, räjpni:

—Xcälrnibee Dios xhaguibaa najc si'c te bejn nani gule'c ganax triusa'c lo xyujni. <sup>25</sup> Lal nagaguejs bejnga, biääd te bejn nani rdxe'ch lajz loj xpaxhuaan binijga, biädle'cni bedz cuanguejch lo xtriuu bejnga, dxejcti sääni. <sup>26</sup> Cheni gulejn triuuga, birii doj lojni, dxejc biricaj näjza cuanguejch ro'c. <sup>27</sup> Dxejcti räjp remos lo xlamreni; "Dad, ða et ganax triusa'c di gule'clu, ä? ¿Caxh bazaj cuanguejchre?" <sup>28</sup> Räjp xlamreni: "Te bejn ni rdxechlajz loä biädle'cchani." Dxejcti gunabdiidx rexmosni räjpreni: "¿La rlajz guejblu cholädxa'nu recuanguejchga, ä?" <sup>29</sup> Dxejc räjp xlamreni: "Na'c, sa'csi che guiliäädxtu cuanguejchga, nägajcza triuu guiliäädxtu. <sup>30</sup> Colsaan tiobreni tebloj. Che guire' cose'ch, dxejc guinibeä remos gutiexgaareni cuanguejch, guliibrenini gacni ters, dxejcti checni. Dxejcti sajc gutie'reni triuu chucheeni neñ yu'."

*Xcuent bedz muxhtas*

(Mr. 4:30-32; Lc. 13:18-19)

<sup>31</sup> Bijza Jesús stee cuent räjpni:

—Xcälrnibee Dios xhaguibaa najcni si'c te bedz muxhtas nani cue'c te bejn lo xyujni. <sup>32</sup> Gulii bejdzga najc bäze'ru loj guiraa rebejdz, per che roob yajgga, rajcni guroobru loj guiralii recuaan, rajcni te yagro, luxh riääd remane' ni rutajt riädyujn xpitiääreni lo xajcw yajgga.

*Xcuent levaduur*

(Lc. 13:20-21)

<sup>33</sup> Bijzani stee cuentre, räjpni:

—Xcälrnibee Dios xhaguibaa najc si'c levaduur nani rugu'ch te gunaa lo choñ mediid arin, dxejc ni'c rusaguijni guideb cojba.

*Xhicuent baluii Jesús ganaxtis con cuent*

(Mr. 4:33-34)

<sup>34</sup> Baluii Jesús guiraa rebejn ganaxtis con recuent, xhetiru stee mood nuluini, ganaxtis con cuent guniini lojreni. <sup>35</sup> Si'c bejn ni te guzojb xtidx dade' ni gunii xtidx Dios che bacuaani lo reguijtz, räjpni: Suiyä diidx con recuent, suiyä diidx xcuent recos ni naga'tz che bencheeli Dios guedxliuj.

*Rusule' Jesús xcuent cuanguejch neñ triuu*

<sup>36</sup> Dxejcti basadiidx Jesús rebejn, biu'tini neñ yu' cadre bire' rexpejn pacni lojni, räjpreni lojni:

—Basule' loonu xcuent cuanguejch ni guyu' loniaa.

<sup>37</sup> Räjp Jesús lojreni:

—Bejn nani rbe'c retriusa'c, najc Xi'n Dios ni gujc Niguii; <sup>38</sup> loniaaga najc guedxliuj; retriusa'c najc rebejn nani najc xpejn Dios, nani rucuaadijg xtiidxni; recuanguejchga najc rebejn ni najc xpejn bendxab. <sup>39</sup> Bejn nani rdxe'ch lajz najc lagajc bendxab. Cose'ch säloj che nitloj guedxliuj; reni gutie' cose'ch najc rexangl Dios. <sup>40</sup> Sigacni guire' recuanguejch te chääni lo guiboo te checni, sigajcza gac che gac fis guedxliuj. <sup>41</sup> Xi'n Dios ni gujc Niguii suxhañ rexanglni te jäädgutie'reni, te jäädlääreni lo xcälrnibeeni guiraa renani rujn riabj bejn neñ dojñ, näjza reni rujn cosguijdx. <sup>42</sup> Susälreni rebejnga neñ te oñ cadre cayecdudx. Ro'c sonduxhreni, sauya'reni läijyreni. <sup>43</sup> Dxejcti rebeñsa'c sidimbicha'reni si'c gubijdx lo xcälrnibee Xtadreni. Palga sobdiajgtu, colgcuadiagsa'c.

*Te cossacduxh ni naga'tz*

<sup>44</sup> Räjpzani:

—Si'cza xcälrnibee Dios xhaguibaa najc si'c te cossacduxh ni naga'tz lo te yuj loniaa. Bidxäl te dade'ni, luxh bacuatzsacnini. Dxejcti rbalajzni, huijni, huito'ni guiraa xhixtenni te rajpni meel siini yujga.

*Perl nani sacduxh*

<sup>45</sup> Räjpzani:

—Xcälrnibee Dios xhaguibaa najcza si'c najc te dad rapduxh nani caguuil perlsa'c te siini. <sup>46</sup> Che bidxäl ni te perlsa'c, tejni sacduxh, bato'ni guiraa xhixtenni te gusiini perлга.

*Guijxh ni rniaaz bäjl*

<sup>47</sup> Räjpzani:

—Xcälrnibee Dios xhaguibaa najcza si'c te guijxh ni rusäl bejn lo nis te rniaazreni guiraloj cuaa bäjl. <sup>48</sup> Cheni agudxajni, rbäärenini nez ro' nisdoo, te ro'c rbereni loj rebäjñ. Rebäjñ ni najc hueen rucheeni neñ te dxijm; nani di gac hueen rusälrenini te laad. <sup>49</sup> Si'cza gac che gac

fis guedxliuj; sirii rexangl Dios te sudzucajreni rebeṅguijdx lo rebeṅsa'c. <sup>50</sup> Dxejcti susälreni rebeṅguijdx neṅ te or cadro cayecduhx; ro'c sonduhxreni, sauya'reni läjyreni.

*Te beṅ rajp*

<sup>51</sup> Dxejcti gunabdiidx Jesús lojreni, räjpni:

—¿La racbeetu guiraa ni caniä lojtu, ä?

Dxejcti räjpreni:

—O', racbeenuni Dad.

<sup>52</sup> Dxejcti räjpni lojreni:

—Cheni rsieed te beṅ nani najn leii xcuent yälṛnibee xten Dios xhaguibaa, najcni si'c te lam nani rajc rbää lo rexcälṛnasa'cni recos ni nacoob, näjza recos bieṅw.

*Jesús lo guedx Nazare't*

(Mr: 6:1-6; Lc: 4:16-30)

<sup>53</sup> Che gulujx basule'ni recuentre, biriini ro'c, sääni. <sup>54</sup> Huijni lagajc lajdxni. Ro'c gusloj caguluiini neṅ xquidobäzreni ro'c. Dxejcti rdxeloduxh rebeṅ ro'c, räjpreni:

—¿Caro bisieedni reyälṛnainre? ¿Xho rajc rujjni remilagwr? <sup>55</sup> ¿La et laadi dee ni najc xi'n carpinteer, ä? ¿La et Mariidi najc xnanni? Dee ni najc bejtz Jacoob, José, Simón con Judas.

<sup>56</sup> Luxh rebisiajñni rbäjzreni lo guejdxre. ¿Cacharo bisieedni guiraa nani caguluiini?

<sup>57</sup> Dxejcti cayujnreni xhigab chugan la guliini, dxejc räjp Jesús lojreni:

—Guiraa rebeṅ rinälajz te niguii nani rñii xtidx Dios, biädla rebeṅ lajdxpacni direni jiu xtiidxni.

<sup>58</sup> Ni'c dini niujn xhidäl milagwr ro'c sa'csi direni chalilajz xtiidxni.

## 14

*Che gujt Juan Bautist*

(Mr: 6:14-29; Lc: 9:7-9)

<sup>1</sup> Lagajc neṅ redxejga Herodes, ni laaza tetrarca, bieṅ diajgñi diidx xcuent ni cayujn Jesús. <sup>2</sup> Dxejc räjpni lo rexmosni:

—Dee najc Juan Bautist. Pet agubaṅsacni lo rebengut, ni'cni rajpni yälṛnibee te rujñni remilagwr.

<sup>3</sup> Si'c gunii Herodes sa'csi laani basäuuni Juan neṅ latzguiiib. Niluxh gunibeeni biliibni con caden neṅ latzguiiib xcuent Herodías, ni gujc chääł bejtzni Felipe. <sup>4</sup> Bidxe'chni sa'csi räjp Juan lo Herodes:

—Et laadi rujnlu rbäznäjlu chääł bejtzlu.

<sup>5</sup> Rlajz Herodes nugu'tni Juan, luxh rdxejbnii rebeṅguejdx, sa'csi guiraareni rñiireni Juan najc te niguii ni rñii xtidx Dios. <sup>6</sup> Dxejc che gojl laj Herodes gujc lanij, birii xindxa'p Herodías te baya'ni nez loj regolnejdx. Luxh sa'csi bidxaglazduhx Herodes baya'ni, <sup>7</sup> räjpni loj gunaaga:

—Gunab xhitis ni rlajzlu, sa'csi gudix lazä gunidxä ni guiniabtislu.

<sup>8</sup> Dxejcti gunaaga, abalijdx xnannini, räjpni lo Herodes:

—Loj te platón baniidx bitiyuejc Juan Bautist.

<sup>9</sup> Diidxga benhuin lastoo reii Herodes, per sa'csi abia'n diidx, niluxh abiejn diajg rebeṅ, gunibeeni gudeedreni nani guiniab gunaaga. <sup>10</sup> Dxejcti gunibeeni biru' yejc Juan Bautist neṅ latzguiiib. <sup>11</sup> Sas biädñäreni yejcnii lo te platón, badeedrenini loj gunaaga. Dxejcti gunaaga badeednini lo xnanni.

<sup>12</sup> Dxejcti bidzujn rexpejn Juan sanäreni togoolda te huicua'tzrenini. Dxejcru huisa'nreni diidx loj Jesús.

*Bayaan Jesús gaii mil bejn*

(Mr: 6:30-44; Lc: 9:10-17; Jn: 6:1-14)

<sup>13</sup> Che bieṅ diajg Jesús xhi guzajc Juan, xtebni huä'pni neṅ te barcw huijni stee laad nez lo reyubijdz. Che gucbee rebeṅ caro sääni, huinajlreni Jesús lo yuj. Guiraa neṅ reguejdxga biriireni. <sup>14</sup> Che birii Jesús neṅ barcw, bahuini loj xhidalduxh beṅ, dxejc balazlajznireni, basiajcnii rebeṅ nani racxhuu. <sup>15</sup> Cheni acayu' guxhijn, gubig rexpejpacni lojni räjpreni:

—Rut rbäjzdi nez lo reyubijdzre, niluxh agudxej naj. Basadiidx rebeṅ te jiireni nez rerench te chasiireni xhi gaureni.

<sup>16</sup> Räjp Jesús:

—Xhicuent jiireni. La'tu colgudeed xhi gaureni.

<sup>17</sup> Dxejcti räjpreni:

—Xhetru rajpdinu ree. Gaiitis yätxtiil näjza tio'p bäjl rajpnu.

<sup>18</sup> Laani räjpni:

—Cołtanäni ree.

<sup>19</sup> Dxejcti gunibeeni gurej rebejn lo guixa'. Dxejcti cua'ni guigaii yätxtiil näjza guiro'p bäjl, guläśni lojni xhaguibaa, badeedni xquixhtios lo Dios, dxejcti gula'ni reyätxtiil. Badeednini loj rexpejn pacni. Dxejcti rexpejn pacni gudisreneni loj reben xhidajl. <sup>20</sup> Guiraareni gudajw, gudxaj xque'reni. Dxejcti batie'reni yätxtiilbiuj nani bia'n. Si'cti tzubitio'p dxijm gudxajni. <sup>21</sup> Renani gudajw najcreni si'cti gaii mił niguii, xhet näjdi regunaa niclaza rebuiux bigab.

*Gusaj Jesús lo nisdoo*

(Mr. 6:45-52; Jn. 6:16-21)

<sup>22</sup> Sas gunibee Jesús biu' rexpejn pacni neñ barcw te ganidreni tedreni stee lad nis lałni casadiidxni rebejn. <sup>23</sup> Che gulujx basadiidxni rebejn, huä'p Jesús yecdajn te xtebni guninäjni Dios Xtadni. Che gojl guxhiñ, ro'c sugaxteb Jesús. <sup>24</sup> Luxh barcw galäii lo nis saaj. Cagunibduxh reol barcw, liriääzni lo nis sa'csi cabi' beduxh cadro sääreni. <sup>25</sup> Rsildooru gubig Jesús, bidzujñni lojreni, siädsajni lo nisdoo. <sup>26</sup> Che bahuii rexpejn pacni siädsajni lo nisdoo, bidxejbreni, räjpreni:

—Colhuui te fantasmni —guredxa'reni sa'csi bidxebduxhrenei.

<sup>27</sup> Dxejc gunii Jesús lojreni, räjpni:

—Na'c guidxejbtu, laa naräni; colsutijp lastootu.

<sup>28</sup> Dxejcti gunii Pedr lojni, räjpni:

—Dad, palga lujni, gunibee jäälä lojlu nez lo nisre.

<sup>29</sup> Räjp Jesús:

—Gudaa pues.

Dxejcti birii Pedr neñ barcw gusajni lo nis te sääni nez loj Jesús. <sup>30</sup> Che bahuii Pedr beduxh ni cabi', bidxejbni, dxejc gusloj cayääzni neñ nisdoo. Guredxa'ni, räjpni:

—Dad, igulää narä!

<sup>31</sup> Lagajc dxejc gunaaz Jesús naani, räjpni loj Pedr:

—Guxii rajplu yälirilajz. ¿Xhicient guctio'p lajzlu?

<sup>32</sup> Che huä'preni neñ barcw, guläzgjajc bej. <sup>33</sup> Dxejcti renani sää neñ barcw bazuxhijbreni nez loj Jesús räjpreni:

—Guliipacni najclu Xi'n Dios.

*Basiajc Jesús reben racxhuu guedx Genesare't*

(Mr. 6:53-56)

<sup>34</sup> Che gudejdreni lo nis, bidzujñreni nez lo reyuj xten Genesare't. <sup>35</sup> Che biembeee reben ro'cni, batie'chreni diidx gudeb gabi lajdxreni. Dxejcti biädnäreni guiraa reben racxhuu lojni. <sup>36</sup> Gunabduxhrenei gusaanni canreni ro' xhajbtisni. Dxejcti guiraa renani gudajw xhajbni, biajcreni.

## 15

*Nani ruxhiñ bejn*

(Mr. 7:1-23)

<sup>1</sup> Dxejcti gubig gaii rebejn nani ruluii leii näjza rebejn guidoo ni laa farisee. Siäädreni guedx Jerusalén, räjpreni loj Jesús:

<sup>2</sup> —¿Xhicient di rexpejn pacnu jiu xcostrumbr rebengool? ¿Xhicient direni gusoob yälrdiib naareni che rajwreni?

<sup>3</sup> Badzu'ni diidx, räjpni:

—¿Xhicient di la'tu gusoobzatu xtidx Dios? Dee alga riurutu rexcostumbrtu. <sup>4</sup> Dios gunibeeni xho guntu che räjpni: “Gojp xpala'n xtaclu, xnanlu”, näjza “Nani guiniyaj lo xtaclu o loj xnanni, suguetni.” <sup>5</sup> Luxh la'tu rniitu sajc gäb chutis bejn loj xtaclu o loj xnanni: “Digacdi gacnäätu sa'csi guiraa ni rapä abadedäni lo Dios.” <sup>6</sup> Luxh chutis ni guinii si'c, xhetru nanabdi gacnäjni xtaclu o xnani. Si'c ni cabälaztu rextidx Dios te gac chanuutu rexcostumbrtu. <sup>7</sup> ¡Bejn ni rusguee najctu! Laaca gunii Isaias, bejn nani gunii xtidx Dios xcuenttu cheni räjpni:

<sup>8</sup> Rebenguejdxre con ro'reni rliä'preni xpala'nä niluxh lastooreni zijt suga' nez loä.

<sup>9</sup> Xlia'si rajñreni narä, sa'csi ruluiireni si'c xtidxä reyälñribee xten reben guedxliuj.

<sup>10</sup> Dxejcti gurejdxni rebejn, räjpni lojreni:

—Colcuadijg, colyacbee. <sup>11</sup> Nani riu' ro' bejn di guxhiñ bejnğa, sanga nani rii ro' bejnğa ni'cni ruxhiñ bejnğa.

<sup>12</sup> Dxejcti rexpejn pacni gubig lojni, räjpreni:

—¿La najnlu bidxe'ch rebejn farisee che biejn diajgreni diidx ni guniilu?

<sup>13</sup> Dxejc laani räjpni:

—Xhitis yajg nani di Xtaclä ni yu' xhaguibaa nusuj siliädxa'ni guideb xlobaani.

<sup>14</sup> Colgusaanreni; lotiä'preni, ruluiireni nezyuj lo salotiä'preni. Luxh palga te beñ lotiä'p guluii canejz chää stee lotiä'p, guiro'preni sitejbreni neñ te gueed.

15 Räjpedr loj Jesús:

—Basule' cuentre loonu.

16 Räjpedr Jesús:

—¿La nájza la'tu ditu gacbee, ä? 17 ¿La ditu gacbee guiraa ni rajw bejn ru' xque'ni, dxejcti che rdejdní xque'ni, abigo'nni? 18 Niluxh diidx nani rii ro' bejn, neñ lastoo bejn riini; dee ni ruxhñ bejn. 19 Sa'csi neñ lastoo bejn rii rexhigabgujdx xten rebejn ni rugu't sa'ni; xten rebejn ni rusguee gunaa; xten rebejn ni rusguee cháäl sa'ni; xten rebejn ni rbajn; xten rebejn ni rnii didxxhii lo sa'ni; xtenza rebejn ni rutijl sa'ni. 20 Laa sa' recosre ni ruxhñ bejn. Che dini gusoob recostumbr xte yälrdiib naani, di ni'c guxhñ bejn.

*Te gunazit nani huililajz xtidx Jesús*

(Mr: 7:24-30)

21 Biriiti Jesús ro'c, sääni nez región xten Tiro nájza Sidón. 22 Neizga rbäjz te gunaa cananee, cabedxa'ni biädni lo Jesús, räjpedr:

—Dad, xi'n toDavid, balaslajz narä. Xindxa'pä yu' xpej bendxab lastooni, niluxh cagusaesiduxhnini.

23 Xhet räjpedr Jesús lojni. Dxejcti biädnaidx rexpejn pacni lojni, räjpedr:

—Barilaagw gunaare, didi rbedxa'ni siädnaalni luj.

24 Dxejcti räjpedr Jesús lojni:

—Dios baxhañ narä lojtis xpen Israel nani agunijt neñ dojl.

25 Dxejcti gubig gunaaga, bazuxhijbni nez loj Jesús, räjpedr:

—Dad, gucnäj narä.

26 Dxejcti räjpedr Jesús lojni:

—Di gac hueen xca' bejn xcuxtiil rexi'nni gusañnini lo rebä'cw.

27 Dxejcti räjpedr Jesús lojni:

—Guliini Dad, nájza rebä'cw rajw te la' yätxtiil ni rtejb lo mex xten xpaxhuaanni.

28 Dxejcti räjpedr Jesús lojni:

—Nane', lacti guroob najc xcälrililajzlu. Sugac si'cni rlanjzlu.

Lagajc dxejcti bñajc xindxa'pni.

*Basiajc Jesús xhidäl ben racxhuu*

29 Biriit Jesús ro'c gudejdní nez ro' nisdoo ni laa Galilee. Huäpgajcni yejc te dajn, ro'c gurejni. 30 Xhidajl bejn bidzujñ cad sobga'ni. Siädnañreni reben ni rajc ni'ni, reben ni najc lotiä'p, reben gop, reben ni xheti naani, nájza xhidälro beñ racxhuu, bidzunñajrenini nez loj Jesús. Dxejcti basiajcñreni. 31 Ni'cni lacti bidxeloduxh reben xhidajlga che bahuiireni rnii regop, rijac reni xheti naani, rsiaj reni rajc ni'ni, ruhuu relotiä'p, dxejcti rliä'preni xpala'n Xtios rexpen Israel.

*Badeed Jesús xhi gudajw tajp mñl bejn*

(Mr: 8:1-10)

32 Gurejdx Jesús rexpejn pacni räjpedr lojreni:

—Riaä rebejnre sa'csi agujc choñ dxej yunäjreni narä luxh xhet ca'direni gaureni. Di rlazä guxhalañreni jüreni rolizreni palga gajdreni gau didi guidxajreni lo nezyuj.

33 Dxejcti räjpedr Jesús lojni:

—¿Xho guidxälñu xhi gau reben xhidajlre nez lo reyubijzre cadro rut rbäjzdi, ä?

34 Räjpedr Jesús lojreni:

—¿Bal yätxtiil ca'tu?

Räjpedr:

—Gajdzitisi, nájza gaii bälbäze'.

35 Sas gunibee Jesús cue rebejn lo yuj. 36 Dxejcti cua' Jesús guigajdz yätxtiilga nájza rebäj, badeedni xquixtios lo Dios dxejcti gula'ni reyätxtiilga nájza rebäjilga badeedniireni loj rexpejn pacni. Dxejcti laareni gudisreni yätxtiilga con rebäjilga lo rebejn xhidajlga. 37 Guiraareni gudajw, gudxaj xque'reni. Che gulujx gudajwreni, batiereñi reyätxtiil ni bia'nga, gudxaj gajdz dxijmni. 38 Renani gudajwga najc si'cti tajp mñl bejn, niluxh xhet näjdi regunaa niclaza rebiiux bigab. 39 Dxejcti basadiidx Jesús rebejn, biu'tini neñ barcw te gudejdní lo nisdoo nez región xten Magdala.

## 16

*Reben guidoo ni laa farisee nájza saducee rniabreni te milagwr si'c te seen*

(Mr: 8:11-13; Lc: 12:54-56)

1 Refarisee nájza resaducee bidzujñreni lo Jesús, gunabreni gunni te milagwr, gudeedni te seen ni rien xhaguibaali. Niluxh cagugueesireni, sa'csi rlanjreni guiga' Jesús. 2 Dxejcti badzu' Jesús diidxre räjpedr lojreni:

—Che rajl gudxej, rniitu: “Saru gac te dxej guixee sa'csi naxniaa xhaguibaa.” <sup>3</sup> Che rajl rsil rniitu: “Elaadi gac te dxej nadxej sa'csi naxniaa xhaguibaa niluxh tre' za.” Xhoxh numbeetu xhi säloj reseen ni rien xhaguibaa, luxh ditu gumbee xhi säloj reseen xcuent redxejre, nalajznu recos ni cayajc. <sup>4</sup> Rebeñ guijdxre, rebeñ guyalajz rniab te senro, te milagwr, luxh dirureni fii stee milagwr; suhuiitisreni xsen Jonás.

Dxejcti basa'n Jesúsreni ro'c, sä'tini.

*Levaduur xten refarisee*

*(Mr. 8:14-21)*

<sup>5</sup> Che gudejd rexpejn pacni stelaad nisdoo biäl-lajzreni ninäreni yätxtiil. <sup>6</sup> Dxejcti räjp Jesús lojreni:

—Bacuadiajg, colnati levaduur xten refarisee näjza resaducee.

<sup>7</sup> Dxejcti bejnreni xhigab neñ lastooreni: “Si'c caniini sa'csi dinu niopnä yätxtiil.” <sup>8</sup> Luxh gucbee Jesús xhigabga, dxejcti räjpni lojreni:

—¿Xhicuent rujntu xhigab xhet yätxtiildi ca'tu, ä? ¡Huinduxh najc xcälirililajztu! <sup>9</sup> ¿La gajd tu gacbee? ¿La diza lajztu guinaj che gudisä gaii yätxtiil gudajw gaii miñ bejn, ä? ¿Bal dxijmni batie'tu, ä? <sup>10</sup> ¿La diza lajztu guizaj che gudisä gajdz yätxtiil gudajw tap miñ bejn, ä? ¿Bal dxijmni batie'tu? <sup>11</sup> ¿Xhicuent ditu gacbee et yätxtiildi cagusa'tä cheni caniä lojtu colnati levaduur xten refarisee näjza resaducee?

<sup>12</sup> Dxejcti gucbeereni dini niäjp: “Colnati levaduur xten yätxtiil.” Laani caniini: “Colnäati yälrlulii xten refarisee näjza resaducee.”

*Bicäjp Pedr Jesús najc Cristpac*

*(Mr. 8:27-30; Lc. 9:18-21)*

<sup>13</sup> Che bidzujñ Jesús región xten Cesarea xten guedx Filipo, gunabdiidx Jesús loj rexpejn pacni, räjpni:

—¿Chu naj rebejn nacä narä Xi'n Dios ni gujc Niguii?

<sup>14</sup> Laareni räjpreni:

—Yu'reni naj luj najclu Juan Bautist; yu'zareni rni luj najclu Elías, peta sgaiireni rni luj najclu Jeremías o stee niguii ni rni xtidx Dios.

<sup>15</sup> Dxejcti räjpni lojreni:

—La'tu, ¿chuni'c rniitu nacä?

<sup>16</sup> Dxejcti räjp Simón Pedr:

—Luj najclu Crist, Xi'n Dios nani nabajn.

<sup>17</sup> Badzu' Jesús diidxre, räjpni:

—Chicbaalu, Simón Pedr, xi'n Jonás, sa'csi xhet bejndi baluii dee lojlu, Xtadätis ni yu' xhaguibaa baluiinini lojlu. <sup>18</sup> Narä rniä lojlu, luj najclu Pedr, nani säloj: “Te guij.” Sa'csi sibäxtejlu guidxagsa'za renani rililajz xtidxä, niluxh che guetreni, direni nitloj. <sup>19</sup> Narä gunidxä yälrnibee lojlu te gulijdxlu rebejn nani ahuiilajz xtidxä. Xhitis ni gusaanlu gunreni, o xhitis ni dilu gusaan gunreni, susoob Dios xtiidxlu.

<sup>20</sup> Dxejcti gunibee Jesús rutlojdi gäb rexpejn pacni laani najc Guejb Crist.

*Gunii Jesús xho guetni*

*(Mr. 8:31-9:1; Lc. 9:22-27)*

<sup>21</sup> Lagajc dxejcti gusloj cagusule' Jesús diidx lo rexpejn pacni, guniini lojreni xho nanabpac chääni guedx Jerusalén te ro'c tedni trabajwduxh ladzña rebengool xten guidoo, ladzña rebixhojz, näjza rebejn ni najn xleii Moisés. Guniizani sugu'trenini, niluxh ni riojn dxejcti sibansacni lo rebengut.

<sup>22</sup> Dxejcti huinä Pedr Jesús te laad, gusloj cadilñajni, räjpni:

—¡Gacnäy Dioslu, Dad! ¡Gurniälojlu gaclu si'c!

<sup>23</sup> Dxejcti gubiré Jesús, räjpni lo Pedr:

—¡Gubicaj loä bendxab! Na'c rusiejytsilu loä. Luj dilu gun xhigab xten Dios, alga xhigab xten rebenguedxliuj rujnlu.

<sup>24</sup> Dxejcti räjp Jesús loj rexpejn pacni:

—Palga yu' chu tejt u rlaiz guirinajl narä, sucuälazni lagajc laani, suguuni xcruzjni, nalajznu tedni trabajw, sujiädnajlni narä. <sup>25</sup> Sa'csi nani rlaiz gunni gaan xcälñabajni, sunijtnini. Luxh nani runijc xcälñabajni por narä, sidxälni xcälñabajni par tejpas. <sup>26</sup> Sa'csi ¿xhi gaan gun te bejn palga ga'pni guideb guedxliuj, luxh nit xaimni lo Dios, ä? o ¿la yu' xhi gudeed bejn te siini xaimni? <sup>27</sup> Sa'csi narä Xi'n Dios ni gujc Niguii siälä lo yälrdimbicha' xten Xtadä con rexanglni, dxejcti siguiäxä tebgaj bejn si'ctis ni gujc xtzuumni. <sup>28</sup> Rniliäpac lojtu, loj reni tre' ree naj, yu'reni di guet dxejli ni fixgaareni jiälä narä Xi'n Dios ni gujc Niguii lo xcälñibeä.

## 17

*Chuni'c najc guroob**(Mr: 9:2-13; Lc: 9:28-36)*

<sup>1</sup> Che gudeed xho'p dxej, huinā Jesús Pedr, Jacoob, con Juan betz Jacoob, xtebreni huijreni jiaa yejc te dajn. <sup>2</sup> Dxejcti nez lojreni bidxaa xho rujn lojni. Lojni gusloj rdimbicha' si'c gubijdx; xhajnbi gujc nolbāj si'c te bajl. <sup>3</sup> Dxejc bahuigajcreni loj Moisés nājza loj Elías, cayujyreni diidx con Jesús. <sup>4</sup> Dxejcti rājp Pedr loj Jesús:

—Dad, ¡huenduxh suga'nu ree! Palga rrlajzlu, sajc jiennu choñ yuguijxh, tejni gac xten guejblu, steeni gac xten Moisés, steeni gac xten Elías.

<sup>5</sup> Lañi canii Pedr, biājt te za ni rdimbicha' guideb gabireni; neñ zaga biejn te xse' ni rājp: —Dee najc xi'nā ni sanälazā, ruspaduxhni lazā, colcuadiajg xtiidxni.

<sup>6</sup> Che biejn diajg rexpejnpac Jesús diidxga, bazuxhijbreni, basajbreni lojreni lo yuj, bidxebduxhreni. <sup>7</sup> Dxejcti gubig Jesús lojreni, batzuubni naani yejcreni, rājpni:

—Colchasulii, na'c rdxejbtu.

<sup>8</sup> Che gulās lojreni, lojtis Jesús bahuiireni, rutru suganājdiini.

<sup>9</sup> Cheni sayājtreni yejc dajnga, gunibee Jesús lojreni, rājpni:

—Rutlojdi gābtu xhini'c bahuiitu dxejli ni guibañsacā narā Xi'n Dios ni gujc Niguui lo rebengut.

<sup>10</sup> Dxejcti gunabdiidx rexpejnpacni lojni:

—¿Xhicuent rñii rebejn ni najn xleii Moisés ganid Elías nanab jīād, ā?

<sup>11</sup> Badzu' Jesús diidxre, rājpni:

—Guliini siādxcgaa Elías, laani gūnsa'cni guira'ti, <sup>12</sup> niluxh narā rñiā lojtu, abiāād Elías, di rebejn nienbeeni, luxh bennājrenini si'ctis ni rrlajzreni, basacsiduxhrenini. Sijajcza gunnājreni narā Xi'n Dios ni gujc Niguui, susacsiduxhreni narā.

<sup>13</sup> Dxejcti gucbee rexpejnpacni caniini xcuent Juan Bautist.

*Jesús basiajc te biuux ni guyu' xpej bendxab**(Mr: 9:14-29; Lc: 9:37-43)*

<sup>14</sup> Cheni bidzujnreni cadro tre' xhidajl bejn, gubig te bejn lojni bazuxhijbni, dxejc rājpni:

<sup>15</sup> —Dad, balaslajz xinā sa'csi laani cayacxhuuni, rajcni yālguidxbej, rusacsiduxh yālguidxcgani, yu' huālt rtejbni lo guiboo yu' huālt rtejbni lo nis. <sup>16</sup> Biādnāāni loj rexpejnpaclu, luxh di niajcdi nusajcneni.

<sup>17</sup> Jesús badzu' diidxre lojreni rājpni:

—Benguijdx, bejn ni di chalilajz, ¿gucli yu'ā lojtu? ¿Cati gac gunā huant la'tu? ¡Coltanā biuuxga ree!

<sup>18</sup> Dxejcti gudilñāj Jesús bendxab ni yu' lastoo biuuxga, gunibeeni biriini, lagajc dxejc biajc biuuxga.

<sup>19</sup> Dxejc gunināj rexpejnpacni Jesús te laad, gunabdiidxreni rājpreni:

—¿Xhicuent di niajcdi nibāānu bendxab neñ lastoo biuuxga?

<sup>20</sup> Jesús rājp lojreni:

—Sa'csi la'tu guxiduxh rililajztu. Rñiliā lojtu, paru najc yālrililajz xtentu si'cti te bejdz muxhtas, sajc gābtu loj dajn rec: “Gubicaj ro'c, gudejd stelaad”, luxh sibicaj dajnga. Palga rililajzpaclu, xhetliidi yu' ni di gacdi guntu. <sup>21</sup> Niluxh sa' bendxabre, dini guirii palga ditu guiniabduxh lo Dios, gucua'nzatu.

*Jesús rusule' stehuālt xho guetni**(Mr: 9:30-32; Lc: 9:43-45)*

<sup>22</sup> Lañi sasajreni nez región xten Galilee, rājp Jesús:

—Suteedreni narā Xi'n Dios ni gujc Niguui ladznaa rebendojl te gusacsireni narā. <sup>23</sup> Niluxh sugu'treni narā, dxejc ni riojn dxej sibañsacā lo rebengut.

Che biejn diajgreni diidxga, guc-huinduxh lajzreni.

*Gudijxni impuest xten guidoo*

<sup>24</sup> Che bidzujn Jesús nājza rexpejnpacni guedx Capernaum, biāād rebejn ni rusquijx xcuent guidoo lo Pedr, gunabdiidxreni lojni, rājpreni:

—¿La di xmastrtu quiix impuest xten guidoo?

<sup>25</sup> Rājp Pedr:

—Rguijxnini.

Che biu' Pedr neñ yu', ganid Jesús gunii lojni, rājpni:

—¿Xhi rchalolu, Simón? ¿Chuni'c rusquijx rebejn ni rñibee lo guedxliujre? ¿Chuni'c rguijx reimpuet, recuyo't? ¿Reben lajdxreni o rebenzijt?

<sup>26</sup> Badzu' Pedr diidxre rājpni:

—Rebenzijt.



Räjp Jesús:

—Ni'cni di rexi'nreni quiixni. <sup>27</sup> Luxh te di guidxe'chreni, huij ro' nisdoo, bacuaa ansuel, gulää bälj ni guiniazngaalu. Ro' bäljga sidxällu te melpla't ni sajl te chatijxlu impuest xcuentä näjza xcuentlu.

## 18

*¿Chuni'c sajcru lajdx Dios xhaguibaa?*

(Mr. 9:33-37; Lc. 9:46-48)

<sup>1</sup> Laa dxejctni gubig rexpejn<sub>pac</sub> Jesús lojni te gunabdiidxreni:

—¿Chuni'c sajcru lajdx Dios xhaguibaa?

<sup>2</sup> Dxejcti gurejdx Jesús te biuxbáz, bazujnini nez galäiireni, <sup>3</sup> dxejc räjpni:

—Rniliäpac lojtu, palga ditu gusiechljaztu, palga ditu gac nadolajz si'c te biuxbáz, ditu jiu' lajdx Dios xhaguibaa. <sup>4</sup> Ni'cni chutis bejn nani gac nadolajz si'c biuxe're, laani gac ni sajcru lajdx Dios xhaguibaa. <sup>5</sup> Chutis ni riu te sa' biuxe're, sa'csi rinälajzni narä, lagajc narä riuni.

*Riezw jiajbni neñ dojl*

(Mr. 9:42-48; Lc. 17:1-2)

<sup>6</sup> Räjpzani:

—Chutis ni gudzucay lo xnezyuä te sa' biuxe're ni ahuililajzni xtidxä, maazru huen niliib te guij xten molin dojb yejnni, chatejbni loj nisdoo, palga gunni jiajb tej reni'c lo dojl. <sup>7</sup> Proobza guedxliuj sa'csi yuduxh xhigabguijdx lojni. Sa'csi nanabpac chu xhigabguijdx. Gunatiro, bejn ni ruzobloj rexhigabguijdxre, ni rujn riajbza lo dojl reni rililajz xtidxä, ni najc si'c biuxe're.

<sup>8</sup> 'Palga ni'lu o ñaalu gun jiajb<sub>lu</sub> lo dojl, batiu'ni. Hueenru jiu'lu lo xcäl<sub>ñ</sub>abajn Dios nitiujnglu o natiujnglu lacuaa jiulu con guiro'p ni'lu o guiro'p ñaalu lo balduxh ni rej<sub>c</sub> par tejpas. <sup>9</sup> Palga te baloju rujn riajb<sub>lu</sub> lo dojl, gulääni. Hueenru jiu'lu lo xcäl<sub>ñ</sub>mibee Dios najclu lo<sub>t</sub>iä'p lacuaa chu guiro'p baloj chazäl<sub>reni</sub> luj lo balduxh ni rej<sub>c</sub> par tejpas.

*Xcuent xiil ni gunijt*

(Lc. 15:3-7)

<sup>10</sup> Räjpza Jesús lojreni:

—Col<sub>n</sub>atiro, andi cuälaztu rebejn ni najc si'c biuxbázre ni sasaj lo xnez Dios, sa'csi rexangl Dios ni cahuiireni, guiraatis dxej yu'reni loj Dios. <sup>11</sup> Sa'csi Xi'n Dios ni gujc Niguii biäd te gusläani rebejn nani agunijt neñ dojl.

<sup>12</sup> Räjpzani:

—¿Xho rhuiitu? Palga rajp te bejn te gayuu xiil, dxejc nit tejni, ¿laa dini gusaan stabitzubigaaga ni yu' neñ gurajl te chatiilni xile' ni gunijt, ä? <sup>13</sup> Luxh palga guidxäl<sub>ni</sub> xile'ga, rniliä lojtu, sibalazduxhruni xcuent xile'ga luxh guxiiru guibanäj lajzni xcuent rexiil nani di ninijt. <sup>14</sup> Sigajcza Xtdadnu ni yu' xhaguibaa di r<sub>l</sub>ajz nit lo Dios nicla tej reni ahuililajz xtiidxni, ni najc si'c biuxbázre.

*Xho gunnäjlu bejtzlu*

(Lc. 17:3)

<sup>15</sup> Räjpzani:

—Palga gun bejtzlu te cosguijdx lojlu, guninäjni xtebtislu, gojs lojni xhi dojl bejn<sub>ni</sub> lojlu. Palga saru gucuadiajgni xtiidxlu, abiäj<sub>l</sub> lajzlu. <sup>16</sup> Palga naaddini gucuadiajgni, dini jiu xtiidxlu, dxejc huinä stee o stio'p bejn chaninäjluni, te guiraa ni guiniitu jiejn diajg rebejnga, te arajplu tio'p o choñ testiigw. <sup>17</sup> Palga di bejtzlu gucuadiajg xtidx rebejnga, luxh dizani jiu xtiidxreni, neñ guidoo huile'c xquejlu loj rebejn ni ricuadiajg xtidx Dios. Palga dizani jiu reben guidoo, sugacni nez lojlu si'c te beñguijdx ni di gumbee xtidx Dios o si'c rebejn nani rusquix loj rebejn nani ruto'.

<sup>18</sup> 'Ni'cni rniliäpac lojtu, guiraa yäl<sub>g</sub>uxhtis xten bejn ni di gusiechljaz xtoj<sub>l</sub>reni ni guntu lo guedxliuj, si'c jia'nni xhaguibaa; guiraa redojl nani gusiäj<sub>l</sub> lajzlu lo guedxliuj sa'csi basiechljaz bendoj<sub>l</sub>ga, si'cza jia'nni xhaguibaa.

<sup>19</sup> 'Sigajcza rniä lojtu, palga tio'ptu tejsi xhigab guntu xhini'c guiniabtu lo Dios, che guiniab<sub>t</sub>uni lo Dios, Xtdä ni yu' xhaguibaa suniidxni ni rniabtu lojni. <sup>20</sup> Sa'csi cadrotis nadxagsa' tio'p o choñ bejn sa'csi rinälajzreni narä, anasuga'a galäi rebejnga.

<sup>21</sup> Dxejcti gubig Pedr loj Jesús, gunabdiidxni:

—Dad, ¿palga gunijt betzä loä, bal huält nanab gusiäj<sub>l</sub> lazä? ¿La sajl gajdzli huält, ä?

<sup>22</sup> Badzu' Jesús diidxre lojni räjpni:

—Dina guiniä gajdztis huält, rniä gayoñbidzuu huält, nalajznu si'ctiza huält basiäj<sub>l</sub> lajzlu.

*Xcuent tio'p bejn ni nazääb meel*

<sup>23</sup> Xcäl̄rnibee Dios xhaguibaa najc si'c te reii ni rlaiz gunni cuent lac nazäb rexmosni lojni. <sup>24</sup> Agusloj cayujni xcuenti chela bidzunnäjreni te mos ni nazäb balti mil lojni. <sup>25</sup> Luxh mosre xhet rajpdini te quiixni rexti'nni, ni'c gunibee reii guido'ni si'c sclav, näjza chääl̄ni, näjza rexi'nni, nägajcza guiralii xhixtenni, te gaxh xti'nni. <sup>26</sup> Dxejcti mosga bazuxhijbni loj xlam̄ni, gunabduxhni lojni, räjpni: "Guläzsijc tiop-choñ dxej, Dad, te gac quixä xti'nä." <sup>27</sup> Dxejcti lamga balazlajzni xmosni, badzucajni guiraa ni nazäb mosga lojni, baslaanini. <sup>28</sup> Cheni birii mosga rolizj xlam̄ni, bidxaagni stee samosni ni nazäb bale'si beex lojni. Gunaaznini, baxhiya'ni yejn̄ni, dxejc räjpni: "Gudijxga ni nazäb̄lu loä." <sup>29</sup> Dxejcti ste mosga bazuxhijbni lojni, räjpni: "Guläzsijc. Siguixäca guiraa ni nazäb̄ lojlu." <sup>30</sup> Luxh steega naaddini, alga huisäugacni samosni neñ latzguuib te bejn̄ni gaan gudijxni guiraa ni nazäb̄ni. <sup>31</sup> Cheni bahuii sgaii mos xhini'c bejn̄ni, gucnaduxhlaizreni, huiye'tzreni lo xlam̄reni xhi huiyejn̄ni. <sup>32</sup> Dxejcti gurejdx xlam̄reni mosga, räjpni lojni: "¡Mos guijdx! Narä badzucaä di'n ni nazäb̄lu loä, sa'csi gunabduxhlu loä." <sup>33</sup> Si'cza niunnäjlu sa'lu, nulazlajzluni sigajc ni balazlazälu." <sup>34</sup> Sas lacti bidxechduxh lamga, gunibeeni biäuuni te gudijxni guiragajc ni nazäb̄ni lo xlam̄ni.

<sup>35</sup> Baluux Jesús cuentga, räjpni:

—Sigajcza gunnäj Xtadä ni yu' xhaguibaa guiraa rebejn̄ ni di gusiällajzpac guiraa redojl̄ ni rujn̄ resa'ni lojni.

## 19

*Jesús rului xcuent yäl̄ruo'n sa'ni*

(Mr. 10:1-12; Lc. 16:18)

<sup>1</sup> Che gulujx gunii Jesús recuentre, biunejzni Galilee, huijni lo región xten Judea, stelaad gueu Jordán. <sup>2</sup> Xhidajl̄ bejn̄ birinajl̄ni, ro'c basiajcn̄i rebenracxhuu, <sup>3</sup> dxejc gubig refarisee lojni, rlaizreni gusguesireni Jesús ni'c räjpreni lojni:

—¿La sajc guro'n te niguii chääl̄ni che rlaiztisi, ä?

<sup>4</sup> Badzu' Jesús diidxre lojn̄ni, räjpni:

—¿La gajdtu goj lo reguijtz nani bacuaa toMoisés cadro caj xho benchee Dios bejn̄ galooli: "Niguii näjza gunaa bencheenireni"? <sup>5</sup> Guniiza Moisés: "Ni'cni gusaan niguii xtadni con xnanni te xca'ni chääl̄ni, dxejc dirureni gac tio'p, tejtis bejn̄ najcreni." <sup>6</sup> Ni'cni dirureni gac tio'p, anajcreni tejtis bejn̄, digacdi guilia' rebejn̄ lo sa'ni nani abachagsa' Dios lo sa'ni.

<sup>7</sup> Dxejcti gunabdiidxreni lojni, räjpreni:

—¿Xhicuent gunibee Moisés gudeed niguii te guijtz lo chääl̄ni te si'c gac guro'ni gunaaaga, ä?

<sup>8</sup> Räjp Jesús lojn̄ni:

—Sa'csi najc lastootu si'c te guij, ni'c basaan toMoisés baro'n niguii chääl̄ni, niluxh galodoo et si'cti gujcn̄i. <sup>9</sup> Luxh rniä lojtu, niguii nani gusaan chääl̄ni, luxh xhet dojl̄di bennäj chääl̄ni stee niguii, dxejcti guchn̄aani ste'ca gunaa, rujn̄ni dojl̄. Sigajcza niguii ni guchn̄aa gunaaaga ni abaro'n chääl̄nini, rujnza niguiiga dojl̄.

<sup>10</sup> Dxejc räjp rexejnpacni lojni:

—Palga si'c najc xcuent niguii con chääl̄ni, hueenru na'c guchn̄aani.

<sup>11</sup> Jesús räjp lojn̄ni:

—Xhet guiraadi bejn̄ rajc gacbee rediidxre, rebejntis ni rudeed Dios te xcäriensa'c ni'ctis racbee. <sup>12</sup> Yu' xhicuent digacdi guchn̄aa niguii: yu'reni digacdi guchn̄aa sa'csi si'c gojl̄reni; yu'reni digacdi guchn̄aa sa'csi baxhiñ sabejn̄reni; yu'zaren̄ni digacdi guchn̄aaren̄ni sa'csi rlaizreni gunreni xtzuumtis Dios. Nani rajc racbeeni rediidxre, sugacbeenireni.

*Biädnäreni rebiiux loj Jesús*

(Mr. 10:13-16; Lc. 18:15-17)

<sup>13</sup> Dxejcti biädnäreni rebiiuxe' loj Jesús te gudzuubni naani yejcreni, guiniabni lo Dios xcuentreni. Luxh rexejnpacni gudil̄näj rebejn̄ ni siädnä rebiiuxe'ga. <sup>14</sup> Dxejc räjp Jesús lojn̄ni:

—Colgusaan guibig rebiiuxe' loä, na'c gudxojturen̄ni, sa'csi xcäl̄rnibee Dios xhaguibaa najc xten reni nadolajz si'c najc rebiiuxe're.

<sup>15</sup> Che gulujx badzuubni naani yejc rebiiuxe', biunejzni ro'c.

*Te beñ ni rajp guninäj Jesús*

(Mr. 10:17-31; Lc. 18:18-30)

<sup>16</sup> Dxejc biääd te bi'n lo Jesús, gunabdiidxni lojni; räjpni:

—Mastr sa'c, xhini'c nanab gunä te xca'ä yäl̄nabajn̄ lo Dios par tejpas?

<sup>17</sup> Dxejc räjp Jesús lojni:

—¿Xhicuent rniilu maestr sa'c narä? Diostis najc sa'c. Per par rlaizlu xca'lu yäl̄nabajn̄ lo Dios, bazoob rextidx Dios ni caj lo xleii Moisés.

<sup>18</sup> Dxejcti räjp bi'nga lojni:

—¿Xhi rediidxga?

Dxejc räjp Jesús lojni:

—Na'c ju'tlu, na'c guesnäjl'u bejn nani di gac chäällu, na'c cuanlu, na'c guiliäslu didxxhii xcuent bejn. <sup>19</sup> Bazoob xtidx xtadlu con xnanlu, huinäälajz sa'lu si'cni sanälajzlu lagajc luj.

<sup>20</sup> Dxejcti räjp bi'nga lojni:

—Guiraa rediidxre runä che nacäli biuux. ¿Xhiruxni'c riäädx gunä?

<sup>21</sup> Dxejc räjp Jesús lojni:

—Palga rlajzlu gaclu beñsa'c lo Dios, huij, bato' guiraa ni rajplu, dxejc gudisni lo rebenproob, dxejc xhaguibaa sapduxhlu xhixtenlu. Dxejcti gudaä te jiädnajl'u narä.

<sup>22</sup> Cheni biejn diajg bi'nga rediidxre, guc-huinduxh lajzni sa'csi rajpni xhidalduxh xhixtenni.

<sup>23</sup> Sas Jesús räjp loj rexpejnpacni:

—Rniliäpac lojtu, naganduxh jiu' te beñ rajp loj xcäl'rnibee Dios. <sup>24</sup> Rnisacä lojtu, guyasiru ted te cameii neñ baloj te guux; naganduxhru jiu' te bejn ni rajp lo xcäl'rnibee Dios.

<sup>25</sup> Che biejn diajg rexpejnpacni rediidxre, bidxeloduxhrene, dxejc canabdiidx loj sa'reni:

—¿Chuni'c sajc jiu' lo xcäl'rnibee Dios?

<sup>26</sup> Dxejc bahuidzu'tz Jesús lojreni, räjpni:

—Naganduxh gun rebejn dee, Diostis sajc gun guraloj.

<sup>27</sup> Dxejcti Pedr räjp lojni:

—Nuurnu basa'nnu guiraa xhixtenu te siopnalnulu. ¿Xhini'c jia'pnu ro'c?

<sup>28</sup> Jesús räjp lojreni:

—Rniliäpac lojtu, la'tu ni biädnajl'u narä, che guscobä guiraa recos cheni cueä narä, Xi'n Dios ni gujc Niguii, lo yagxhil cadre guinibeä lo guiraa reben guedxliuj, la'tu ni siädnajl'u narä sibejzatu lo tzubitio'p yagxhil te guinibeetu loj guitzubitio'p guejdx xten rexpejn Israel. <sup>29</sup> Luxh guiraa rebejn ni basa'n rolizni o rebejtzni, o rebisiajnni, o xtadni, o xnanni, o chäälni, o xi'nni, o rexhujni, te siädnajl'u narä, rebejnnga sajp te gayuu huält locni gojpn, nägajc ga'preni xcäl'nabajn Dios par tejpas. <sup>30</sup> Rebejn nani rchalo najcreni beñroru lo sa'reni nez loj Dios, reni'c gac bejn ni guxii sajc nez loj Dios. Rebejn nadolajz ni di guchalo sajrcureni lo sa'reni, reni'c sajrcureni nez loj Dios.

## 20

### *Xcuent reni rujn dzuun*

<sup>1</sup> Räjpszani:

—Xcäl'rnibee Dios najc si'c te bejn ni najc baxhuaan xten te renchro. Rsildooru biriini te satiilni mos gun dzuun lo xyujni, lo reyaguub. <sup>2</sup> Che bidxälni gaii mos, bachaagni diidx. Bia'nreni diidx quixnireni te denaar tebdxej cade tej remosga. Dxejc baxha'nireni loj xyujni sayujnreni dzuun. <sup>3</sup> Birisacni, satiilni sgaii mos si'cti rcagaa, rsil. Bidxaagni sgaii bejn ni xhet cayujndi, suga'sireni nez lo guii. <sup>4</sup> Räjpni lojreni: “Näjza la'tu colchayujn dzuun lo xyuä. Narä siguixä si'cni riäj'l xca'tu.” Sä'ti rebejnnga lo dzuun. <sup>5</sup> Birisac dade' si'cti läiidxej, birisaczani si'cti rcachon gudxej. Bidxaagni sgaii bejn, sigajcza räjpni loj rebejnnga. <sup>6</sup> Dxejc si'cti rcagaii birisacni, huijni lo guii. Ro'c bidxälni sgaii bejn ni xhet cayujndireni, suga'sireni nez lo guii. Dxejc räjpni lojreni: “¿Xhicuent suga'tu ree guideb dxej xhet cayujnditu?” <sup>7</sup> Dxejc räjpreni lojni: “Sa'csi rut siädtildinu te choyennu dzuun.” Dxejcti räjpni lojreni: “Näjza la'tu colchayejn dzuun lo xyuä. Narä siguixsa'cätu.” <sup>8</sup> Che biu' guxhijn, räjp lam lo mos ni rnibee remos: “Gurejdx remos te quixlureni. Gudix-xgaa reni biu' gudxejru lo dzuun. Lult gudijx reni biu' ganid lo dzuun.” <sup>9</sup> Dxejc ganid biu' remos ni agudxej biu'reni lo dzuun. Cade tejnreni cua' te denaar, si'cni rca' ni rujn dzuun guideb dxej. <sup>10</sup> Cheni biu' reni biu' lo dzuun rsiltoo, bejnreni xhigab sica'rureni meel, per sigajcza laareni cua'reni te denaar cade tejnreni. <sup>11</sup> Che cua'reni xcuentreni susloj cadze'chreni lo baxhuaan xten dzuunga. <sup>12</sup> Räjpreni: “Redee ni biu' lult lo dzuun pet teb ortis bejnreni dzuun, luxh gudijxlureni sigajcni gudijxlu nuurnu, luxh biennu dzuun guideb dxej, luxh biennu dzuun lo yäl'nanaa.” <sup>13</sup> Dxejc räjp lamga lo tejnreni: “Xamigwä, xhet cosguijdxdi cayunä lojlu. ¿La xhet bia'ndinu diidx te denaar quixälu tebdxej? <sup>14</sup> Huij, cua' xmeellu. Narä rlazä quixä bejnre ni biu' lult sigajc ni gudixä lojlu. <sup>15</sup> ¿La di gacdi gunä si'ctis ni rlazä con xmelä? ¿O rdxechlajzlu loä sa'csi nacä hueen, ä?” <sup>16</sup> Ni'cni reni biädä lult sajcreni tebloj con reni biädä ganid, luxh reni biädä ganid sajcreni tebloj con reni biädä lult.

*Gunisac Jesús xho guetni*

(Mr. 10:32-34; Lc. 18:31-34)

<sup>17</sup> Che sasaj Jesús lo nezyuj sääni Jerusalén, huinäni rexpejnpacni te laad te räjpni lojreni:

18 —La'tu ruhuiitu sosaanu nez guedx Jerusalén. Ro'c narä, Xi'n Dios ni gujc Niguii, siabä ladznaa reni rnibee lo rebixhojz, näjza lo rebejn ni najn lei. Laareni sinibeereni guetä. 19 Suteedreni narä ladznaa rebenzjzt te cubeereni narä quinreni narä, dxejc gucuareni narä lo cruzj. Luxh ni riojn dxej, sibansacä loj rebengut.

*Ni gunab xnan Jacob näjza Juan*

*(Mr 10:35-45)*

20 Dxejcti gubig xnan Jacob näjza Juan, xi'n Zebedeo loj Jesús. Bazuxhijbni nez loj Jesús, te gunabni lo Jesús. 21 Gunabdiidx Jesús lojni:

—¿Xhini'c rlajzlu?

Räjp gunaaga lojni:

—Che jiu'lu lo xcälrnibeelu, gunibelaa cue tej rexi'nä xladbeelu, steeni cue xladbäjgwlu.

22 Dxejc räjp Jesús:

—¡Ditu gan xhini'c rniabtu! ¿La sajc tedtu yälrsacsí sa'ni tedä? ¿La sajc tedtu trabajwduxh sa'ni nanab tedä?

Dxejc räjpreni:

—Sajc tednuni.

23 Dxejcti räjp Jesús lojreni:

—Guliipacni. Sidedxgaatu trabajw, sidedxgaazatu yälrsacsí. Et narädi cueä reni cue xladbägwä o xladbeä. Xtadä ni yu' xhaguibaa alaguleni rebejnnga.

24 Che biejn diajg stzuu rexejnpac Jesús, bidxe'chreni loj guiro'p rexi'n nane'ga. 25 Dxejc gurejdx Jesús reni, räjpni:

—La'tu najntu xho rujn regubier ni rnibee lo rebenzjzt, rnibeereni rebejnnga si'c xlamreni. Luxh reni najc rebenro lojreni runnäjreni rebejnnga si'ctis ni rlajzreni. 26 Et si'cni gunditu la'tu loj rebejn. Chutis rlajz gac be'no lojtu, nanab gunni dzuun gacnäjni guiraliitu si'c te mos. 27 Luxh chutis tejtu ni rlajz guiliä'p xpala'nni, nanab gacni si'c xmos lo guiraliitu. 28 Sigajcza biääd Xi'n Dios ni gujc Niguii. Dini niniab mos chu lojni, alga laani najc xmos bejn, badeedzani lagajc yäl'nabajn xtenni te gudijxni baslaani xhidal bejn ni yu' lo dojl.

*Jesús rusajc tio'p lotiä'p*

*(Mr 10:46-52; Lc 18:35-43)*

29 Che gojl guiriireni guedx Jericó, xhidalduxh bejn sanajlni. 30 Dxejcti sobga' tio'p bejn ni di fii cuä' nez yuj. Che biejn diajgreni sadejd Jesús ro'c, gusloj cabedxa'reni:

—Dad, Xi'n toDavid, balazlajz nuurnu.

31 Gudilnäj rebejnreni, te gusaureni ro'reni. Luxh laareni dipru guredxa'reni:

—¡Dad, Xi'n toDavid, balazlajz nuurnu!

32 Dxejc guzudxi Jesús, gurejdxni reni di fii, räjpni lojreni:

—¿Xhini'c rlajztu gunä'?

33 Räjpreni lojni:

—Dad, rlaaznu guixal balojnu te gac fiinu.

34 Dxejc balazlajz Jesúsreni, gudajjni balojreni. Sas biacgajc balojreni, gujc bahuiireni, sanajltireni Jesús.

## 21

*Biu' Jesús guedx Jerusalén*

*(Mr 11:1-11; Lc 19:28-40; Jn 12:12-19)*

1 Cheni Siäddzungajxhreni guedx Jerusalén, bidzujnreni te guedxbäz ni laa Betfagé, cuä' dajn ni laa Oliib. Baxhal Jesús tio'p xpejnpacni, 2 räjpni lojreni:

—Colchäj loj guedxbäzre ni tre' nez lojtu. Ro'c guidxälu te burgunaa caduu näjza teburhuin. Colguxhečni, coltanäni loä. 3 Palga yu' chu naa: “¿Xhini'c rujntu?”, colye'tz lojni: “Dad caquiinnini terate'. Suxhalgajcni.”

4 Luxh guiraa dee gujc te guzobj diidx ni gunii dade' nani bacuaa xtidx Dios agujc xchero, che räjpni:

5 Colye'tz loj reni rbäjz guedx Sión,

bahuii xreilu siääd lojlu,

nadolajzni bijbni te burbäz, te burbäz, xi'n man ni rujn dzuun, ni ruu cargw.

6 Dxejcti huij rexejnpacni, bejnreni si'c gunibee Jesús gunreni. 7 Biädnäreni burga näjza burbäz xi'nni. Gudixhreni xhajbreni detz burbäzga, dxejc gubijb Jesús burbäzga.

8 Xhidalduxh bejn tre' ro'c, luxh yu' reni gudixh xhajbreni lo nez yuj, peta sgaireni batiu' balajg te gudixhreni rebalajg lo nez yuj cadro ted Jesús. 9 Rebejn ni nijd, näjza reni siääd dejtzn gusloj cabedxa'reni, räjpreni:

—¡Xchej guibajn Xi'n toDavid! ¡Chicbaa ni siääd xcuent Gueb Dios! Rliä'pnu xpala'n Guejblu Dios.

<sup>10</sup> Cheni biu' Jesús nen guedx Jerusalén, guiraa reben guejdxga gusloj camojn, yu'reni canabdiidxreni loj sa'reni:

—¿Chucha najc bejnre?

<sup>11</sup> Yu'zareni räjp:

—Dee najc Jesús, niguii ni rusule' xtidx Dios. Guedx Nazare't xten Galilee siäädni.

*Basia Jesús guidoro*

(Mr. 11:15-19; Lc. 19:45-48; Jn. 2:13-22)

<sup>12</sup> Dxejc biu' Jesús nen guidoro xten Dios, gulääni guiraa rebejn ni caguto' näjza rebejn ni casii. Barexhätini remex xten reni ruchaa meel xten rebejn, näjza reyagxhül xten reni ruto' repalom. <sup>13</sup> Dxejc räjpni lojreni:

—Loj reguijtz ni bacuaa rebengaloo caj: “Sirilaj xquidoä yu' xten yälrbjdx, yälriab loj Dios.” Niluxh la'tu abejntu xpiliää gubaan.

<sup>14</sup> Lagajc nen guidooga, gubig loj Jesús gaii bejn ni di fii näjza gaii bejn ni rsiacoj, luxh basiajcnireni. <sup>15</sup> Cheni bahuii reni rnibee loj rebixhojz, näjza reni najn leii remilagwr ni bejn Jesús, luxh biejnza diajgredi xho cabedxa' rebixuxe' caniireni: “Rliä'pnu xpala'nlu Xi'n to'reii David”, bidxe'ch rebixhojzga. <sup>16</sup> Dxejc räjpreni loj Jesús:

—¿La riejn diajglu xhi caniireni, ä?

Badzu' Jesús diidxre lojreni räjpni:

—O'n, riejn diağani. ¿La gadtu goj lo reguijtz ni bacuaa te dade' ni gunii xtidx Dios? Ro'c caj xcuent redee, cadro caj rediidxre:

Abejnlu goj rebiiux näjza rebäznite' dij ni rliäpsa'cpac xpala'n Dios.

<sup>17</sup> Dxejcti basaan Jesúsreni, biunejzni ro'c sääni guedxe' ni laa Betania, ro'c gudejdni yääl.

*Te yag iigw ni gubijdz*

(Mr. 11:12-14, 20-26)

<sup>18</sup> Cheni bara yääl, rsilru gubisac Jesús guedx Jerusalén. La' ni sääni, gusloj calaanni. <sup>19</sup> Bahuiini loj te yag iigw cuä' nezyuj. Gubigni gajxh ni' yajgga, per xhet ninejxhdi bidxälni, ganaxhtis balajc caj lo yajgga. Dxejc räjp Jesús lo yajg iigwga:

—jNuncru xcaj nicla tej ninejxh lojlu!

Dxejcti gubidzgajc yajgga. <sup>20</sup> Cheni bahuii rexpejnpacni, bidxeloduxhrene, gunabdiidxreni loj Jesús:

—¿Xhi cuent gubidzgajc yajgga?

<sup>21</sup> Räjp Jesús lojreni:

—Rniliäpac lojtu, palga chalilajzpacktu, luxh ditu gun tio'p lajztu, xhet ganaxdi sa' cosre guntu, palga gäbtu lo te dajn: “Gubicaj ro'c, gusuj galäii nisdoo”, si'c gacni. <sup>22</sup> Guiraa ni guiniabtu loj Dios, palga chalilajzpacktu, suniidxnini.

*Xcälrnibee Jesús*

(Mr. 11:27-33; Lc. 20:1-8)

<sup>23</sup> Dxejcti biu' Jesús nen guidoro, dxejc la' ni caguluiini rebejn gubig reni rnibee loj rebixhojz näjza rebengool, gunabdiidxreni lojni:

—¿Xhi yälrnibee rajplu ni'cni rajc rujnlu recosre? ¿Chuni'c baniidx yälrnibeere lojlu?

<sup>24</sup> Badzu' Jesús diidxre lojreni räjpni:

—Sigajcza narä gunä te yälgunabdiidx lojtu; palga sajc gudzu'tu diidxga loä, dxejc guiniä lojtu chuni'c baniidx yälrnibee te runä recosre. <sup>25</sup> ¿Chuni'c gunibee gutiobnis Juan ni rutiobnis? ¿La Dios o la beñ guedxliuj?

Dxejc gusloj cayäjp lo sa'reni, palga jie'tznu Dios gunibeeni, dxejc sinajni loonu, ¿xhicuent ditu nililajz xtiiidxni? <sup>26</sup> Palga jie'tznu bejn guedxliuj gunibeeni, dxejc sixa't rebejn yejcnu sa'csi guiraareni rililajzreni Juan najc te Dade' ni gunii xtidx Dios. <sup>27</sup> Dxejc räjpreni loj Jesús:

—Dinu guidon.

Dxejc räjp Jesús lojreni:

—Sigajcza narä dina guiniä caro siääd yälrnibee te runä guiraa recosre.

*Te dade' ni guyu' tio'p xi'nni*

<sup>28</sup> Jesús räjp lojreni:

—Guidon xho guichalootu diidxre. Te dade' guyu' tio'p xi'nni. Räjpni loj xingangalojni: “Xi'nä, nadxej chayujnlu dzuun cadro care' uub.” <sup>29</sup> Dxejc badzu' xi'nni diidx lojni, räjpni: “Di rlazädi cha'a.” Luxh che gojl ste ra't, basiejch lajzni säätini sayujjni xtzun xtadni. <sup>30</sup> Dxejc räjp dade'ga lo stee xi'nni: “Xi'nä, nadxej chayujnlu dzuun.” Dxejc badzu' xi'nni diidxre, räjpni: “Mbaj, dad, sia'ä.” Luxh dini nij. <sup>31</sup> Loj guiro'preni, ¿chuni'c bejn si'cni rlanj xtadni?

Dxejc räjpreni:

—Xingangalooni.

Dxejcti räjp Jesús lojreni:

—Rniliäpac lojtu, reni ruquijx guiraloj, näjza regunabdxab ganidreni jiu'reni lojtu loj xcäl'rnibee Dios, <sup>32</sup> sa'csi Juan ni rutiobnis biädluini la'tu xho guibajntu, luxh ditu nililajz xtiidxni. Biädla reni ruquijx guiraloj, näjza regunadxab huililazduxhrene xtiidxni. Niluxh la'tu bahuiitu guiraa recosga, ditu nusiechajz te nililajztu xtiidxni.

*Xcuent remosguijdx*

(Mr. 12:1-12; Lc. 20:9-19)

<sup>33</sup> 'iColcuadijag stee cuentre! Guyu' te dade' ni najc baxhuaan xten te renchro, gule'cni yaguub loj xyujni, bateedni bazaa guideb gabi yujga. Gudäänni te guede te gujcn te tanc te chuchee nisuubga cherxii reuub. Bencheezani te yu' ni najc jiaaro te ro'c cue te ni fii guideb loj xyujni. Badedlaani yujga loj gatii bejn ni rujn dzuun, sä'tini te biäj zijtro. <sup>34</sup> Che agojl guire' cose'ch baxhaļ baxhuaanga gatii xmosni loj xyujni te chaxiireni cose'ch ni riäjļ xca' baxhuaanga. <sup>35</sup> Dxejc reni biannäj yujga gunaazreni remos, gudijnreni tejni, bagu'treni steeni, bacuaareni guij yejc steeni. <sup>36</sup> Dxejc baxhaļsac baxhuaanga sgaii mos. Niluxh reni biannäj yujga sigajzca bennäjreni remosga.

<sup>37</sup> 'Dxejcti bejn baxhuaanga xhigab: "Maazru huen guxhaļä xi'nä; sucuadijguren i xtiidxni." <sup>38</sup> Cheni bahuiireni lo xi'n baxhuaan xten yujga, bejnreni xhigab: "Deeni jiannäj yujre; do'o guigu'tnuni te jiannänu yujre." <sup>39</sup> Dxejcti gunaazrenini, guläärenini te laad, dxejc bagu'trenini.

<sup>40</sup> Dxejc gunabdiidx Jesús räjpni:

—Che jiäd baxhuaan xten yujga, çxhi gunnäjni rebejn nani biannäj xyujni?

<sup>41</sup> Dxejc räjpreni loj Jesús:

—Dini gulazlajz rebenguijdxga, sugu'tnireni, sudedlaani xyujni loj ste'ca bejn nani gudeed cose'ch ni riäjļ xca'ni che gaļ guire' cose'chga.

<sup>42</sup> Dxejcti räjp Jesús lojreni:

—çLa gajdtu goļ lo reguijtz nani bacuaa dade' nani gunii xtidx Dios galoo? Rediidxre caj ro'c:

Guij nani gulälaz reni runchee yu',  
cua' Dios lagajc guijga gudixhnini squiin yu',  
sajcruni loj guiraa reguij.

Dee bejn Gueb Dios, luxh rdxeloduxhnu dzunrore ni bejnni.

<sup>43</sup> 'Ni'cni riä lojtu, sibicaj xcäl'rnibee Dios lojtu, sidejdni loj rebejn nani gudeed ni riäjļ xca' xcäl'rnibee Dios, nalajznu renani chalilajzpac xtiidxni. <sup>44</sup> Luxh xcuent guijga: nani jiajb lo guijga, silia'ni, per nani guitejb guijga yejcn, li siujyni, gacni däj.

<sup>45</sup> Che biejn diajg reni rnibee lo rebixhojz näjza referisee recuent ni canii Jesús, gucheereni cagusä'tni lagajc laareni. <sup>46</sup> Rlajzreni niniaazrenini, per bidxejbreni rebejn sa'csi salilajz rebejn najc Jesús bejn ni rnii xtidx Dios.

## 22

*Xcuent yäl'ruchnaa*

<sup>1</sup> Guslosac canii Jesús lojreni con recuent, räjpni:

<sup>2</sup> —Xcäl'rnibee Dios najc si'c te reii ni bejn te sa' te guchnaa xi'nni. <sup>3</sup> Baxhaļni rexmosni te saxiireni regelnejdx chääreni sa', niluxh rebejnre di rlaajzdireni. <sup>4</sup> Dxejc baxhaļsacni rexmosni, räjpni: "Colye'tz loj reni abidon, agujc comiid. jAbagutä balti gonsa'c, gonguro!' Anacchee guira'ti yäl'rajw. Col'taa." <sup>5</sup> Niluxh reni abidonga di niu xtiidxreni. Tejni sahuui rexyujni, steeni säa lo rexnegosni, <sup>6</sup> dxejcti sgaii reni niaj biooz gunaazreni rexmos reii, basacsireni remosga, sas bagu'trenini. <sup>7</sup> Che biejn diajg reiiiga, bidxe'chduxhni, baxhaļni rexsoldaadni te sagu'treni guiraa rebenguijdxga, te saze'czareni gajdx cadro rbäjzreni. <sup>8</sup> Dxejcti räjpni loj rexmosni: "Guiraa dee anacchee, di nungäjļ jiäädru reni abidon. <sup>9</sup> Col'chäj, pues, lo resquim lo nezyuj, col'cuejdx chutis bejn ni guidxaaagtistu." <sup>10</sup> Birii rexmosni, sääreni lo nezyuj. Dxejc bachagsa'reni guiraatis bejn ni bidxaagreni, reni najc benguijdx sigajc reni najc bejhueen te gudxaj rolizj reiiiga.

<sup>11</sup> 'Dxejc biu' reii biädhuini loj rebiooz. Bahuiini loj te bejn ni sobga' ro'c, luxh xhet xhablanijdini najcwni. <sup>12</sup> Dxejc räjp reii lojni: "Xamigwä, çxho bejnlu biu'lu ree luxh xhet xhablanijdilu najcwlu?" Dxitis sobga' bejnnga, xhet rniidini. <sup>13</sup> Dxejc räjp reii loj rexmosni: "Colguliib ni'ni näjza ñaani, col'säl'ni detzyu' cadro nacäj te ro'c gonduxhni chubejli reläjyni." <sup>14</sup> Sa'csi xhidajļ najc reni bidon luxh guxii najc reni bibee.

*La sajc quiixni impuest*

(Mr. 12:13-17; Lc. 20:20-26)

<sup>15</sup> Dxejcti sii referisee, bia'nreni diidx siguiilreni xho gunijt Jesús te diidx te guiga'ni. <sup>16</sup> Ni'c baxhaļreni gatii xpejnreni näjza gatii bejn ni nadxaag Herodes te räjpreni loj Jesús:

—Mastr, anajnnu rniilu ganax didxlii, ruluiizalu xtiidxpac Dios, luxh dilu jiu xhi rni rebejn, sa'csi dilu cue bejn ni sajcro lo stee bejn. <sup>17</sup> Gunii loonu, pues: ¿La laaca najc quixnu impuest lo César ni rniabee loonu o et laadi?

<sup>18</sup> Dxejc gucbee Jesús xhet laadi xhigab cayujnreni nen lastooreni, dxejc räjpni lojreni:

—¡Benguijdx! ¿Xhicient rlanjtu guquiiiltu narä? <sup>19</sup> Colguluii te meel loä.

Dxejc badeedreni te meel ni laa denario. <sup>20</sup> Che bahuii Jesús loj meelga, gunabdiidxni lojreni, räjpni:

—¿Chuni'c caj lo meelre?

<sup>21</sup> Dxejc räjpreni:

—Loj César.

Dxejc räjp Jesús lojreni:

—Colgudeed lo César ni riäjl xca' César, colgudeedza lo Dios ni riäjl xca' Dios.

<sup>22</sup> Che biejn diajgreni rediidxre, bidxeloduxhrene. Dxejc basaanrenini, sä'tireni.

*Canabdiidxreni xho gac che guiban̄sac rebejn*

(Mr. 12:18-27; Lc. 20:27-40)

<sup>23</sup> Lagajc dxejga bidzujn gatii reni laa saducee, reni di chalilajz sibansac bejn loj rebengut. Gubigreni loj Jesús, gunabdiidxreni, <sup>24</sup> räjpreni:

—Mastr, si'c naj toMoisés, palga yu' te bejn ni abachnaa, luxh ruti xi'nni che guetni, riäjl guchnaa bejtni biuudga te chu xi'nreni xcuent bejtni. <sup>25</sup> Mbaj. Loonu yu' gajdz niguii ni najc bejtz sa'reni. Betzgooga bachnaa, dxejc gujtni, luxh di xi'nni niu'. Basa'nni chäälni lo bejtni. <sup>26</sup> Sigajcza gusajc ni ro'p bejtni; sigajcza gusajc ni riojn bejtni. Si'c huinuu gujc che basa'li guigajdz bejtzga. <sup>27</sup> Sas che gujt guiraareni, näjza gunaaga gujt. <sup>28</sup> Che guiban̄sac rebejn̄ga lo rebengut, ¿chu tej lo rebejtzga gac chäälpac gunaaga, ni guiraareni bachnaareni gunaaga?

<sup>29</sup> Dxejcti badzu' Jesús diidxre lojreni, räjpni:

—Et laadi rujntu xhigab sa'csi ditu gacbee xtidx Dios niclaza xcuent xcäl̄rnibee Dios. <sup>30</sup> Ni che guibajn rebengut, diru yäl̄ruchnaa chu, diruza bejn gudeed rexindxa'preni guchnaa. Dxejc sajcreni si'c rexangl Dios ni yu' xhaguibaa. <sup>31</sup> Dxejc xcuent yäl̄rbansac loj rebengut, ¿la gajdtu goł̄ reguijtz ni bacuaa toMoisés che räjp Dios xcuent retoxtadgoldoonu: <sup>32</sup> “Narä nacä Xtios Abram, Xtios Isaac, näjza Xtios Jacoob”, ä? Dios di gac Xtios bengut, Xtioستی rebejn ni nabajn najcni.

<sup>33</sup> Che biejn diajg rebejn xtidx Jesús, bidxeloduxhrene diidx ni ruluiini.

*Diidx ni maazru saj*

(Mr. 12:28-34)

<sup>34</sup> Che gucbee refarisee basäu Jesús ro' resaducee, bidojpreni, bachaagreni diidx. <sup>35</sup> Dxejc tejreni nani najn leii, rlanjzni guquiiilni Jesús ni'c gunabdiidxni lojni räjpni:

<sup>36</sup> —Mastr, ¿xhi diidx ni gunibee Dios sajcro lojreni caj lo leii?

<sup>37</sup> Räjp Jesús lojreni:

—Nani rni scree: “Huinälajz Dad Xtioslu guideb lastoolu, guideb xaimlu, näjza guidebgajc xcäriejnlu.” <sup>38</sup> Diidxre ni gunibee Dios najc ni sajcro, luxh ganidni siädni loj rextidx Dios. <sup>39</sup> Ni ro'pga sigajcza najcni: “Huinälajz resa'lu sigajc ni sanälajzlu lagajc luj.” <sup>40</sup> Guiro'p remandamientre nanab te guzoob bejn guiraa rediidx ni bacuaa toMoisés näjza ni bacuaa redade' nani gunii xtidx Dios.

*¿Chu xi'n najc Crist?*

(Mr. 12:35-37; Lc. 20:41-44)

<sup>41</sup> Lał̄ni tre' refarisee, gunabdiidx Jesús lojreni, räjpni:

<sup>42</sup> —¿Xhi rujntu xhigab xcuent Crist? ¿Chu xi'n najcni?

Räjpreni lojni:

—Laani najc xajg toDavid.

<sup>43</sup> Räjp Jesús lojreni:

—¿Xhicient räjp David “Xtadä” lojni che basanij Sprit Dxan xten Dios lastooni? Ni'c bacuaa toDavid rediidxre:

<sup>44</sup> Dad Dios räjp lo Xtadä,

gurej xladbeä lał̄ ni gudzugä guiraa reni rdxe'ch lojlu ladzni'lu.

<sup>45</sup> Palga lagajc David rni: “Dad” lojni, ¿xho mood najcni xi'nni?

<sup>46</sup> Dxejc rut gujcdi badzu' nicla te diidx lojni, luxh dxejliga rutru gojpd̄i xhi diidx niniabdiidxrureni lojni.

## 23

*Rucuaquij Jesús refarisee nájza rebejn nani najn lei*  
(Mr. 12:38-40; Lc. 11:37-54; 20:45-47)

<sup>1</sup> Dxejc rájpp Jesús loj reben xhidaalga nájza loj rexpejn pacni:

<sup>2</sup> —Rebejn ni najn lei nájza refarisee rajp yálnajn te gusule'reni xleii Moisés. <sup>3</sup> Ni'cni colguzoob guiraa rextiidxreni, na'c guntu sa' recos ni rujnreni, sa'csi laareni rniireni xhini'c guntu, dxexcti lagajc laareni direni gun ni rnibeereni guntu. <sup>4</sup> Rnibeereni gun rebejn cos naganduxh ni najc si'c te cargw naduxh ni di'gac guu bejn, per laareni nicla con te bicuenaareni direni gusniibni. <sup>5</sup> Guiraa recos ni rujnreni, rujnrenini te fiitis rebejn. Rchaglajzreni rcaj lo cuajsreni nájza roxhajn gwreni recaje' cadro yu' tla' guijtz ni caj xtidx Dios lojni. Rustioolzareni xi' xhajbreni. <sup>6</sup> Rlajzreni ganidreni tredeni lo mex che gal te lanij; rljazreni cuereni lo rebancw ni suga' delant neñ reguidobáz. <sup>7</sup> Sigajcza rljazreni guchagro' bejn naareni nez lo guii, guiniiza rebejn “Mastr” lojreni.

<sup>8</sup> Na'c gusaantu guinii rebejn “Mastr” lojtu, sa'csi tejtisni yu' ni najc Mastr, laani najc Crist. Peta la'tu guiraaantu najctu tejsi sa'tu. <sup>9</sup> Na'c guiniitu “Xtadá” loj te beñ guedxliuj sa'csi yu' tejtis ni najc Xtadtu, ni'c najc Dios ni yu' xhaguibaa. <sup>10</sup> Na'cza gusaantu guiniireni lojtu “Mastr” sa'csi yu' tejtis Mastr, ni'c najc Crist. <sup>11</sup> Ni yu' si'c mos lojtu ni'c najc beñroru loj resa'ni. <sup>12</sup> Sa'csi chutis ni rchaloni najcni beñro lo sa'ni, ni'c sustuiyá lojni, chutis ni najc nadolajz loj Dios, ni'c sunáni beñro lo sa'ni.

<sup>13</sup> ¡Proobzatu remastr xten lei nájzatu refarisee, najctu benguijdx! Sa'csi rudxoijntu jiu' rebejn loj xcálrnibee Dios. Lagajc la'tu ditu jiu' luxh dizatu gusaan jiu' rebejn ni rljaz jiu'.

<sup>14</sup> ¡Proobzatu remastr xten lei nájzatu refarisee, najctu benguijdx! Sa'csi rudzucajtu rolizj renanbiuud lajsi cabedx canabduxhtu lo Dios, naatu gusgueetu bejn si'c. Sa'csi rujntu scree, siabduxh fis xten Dios yejctu.

<sup>15</sup> ¡Proobzatu remastr xten lei nájzatu refarisee, najctu benguijdx! Zijt rijtu lo reneyuj nájza lo nisdoo te guntu gaan guchaa mase tejtis bejn xmoodni te ganni Dios si'c rajntuni. Luxh che ahuililajz bejnga xtiidxtu, rujntuni tio'p huált maazru te xi'n gabijl loj ni najctu.

<sup>16</sup> ¡Proobzatu, najctu si'c lotiá'p, rljaztu guluiitu nezyuj! La'tu ni rniil palga te bejn guiniliipac xtiidxni guzá'tni guidoro, xhet sajcdi xtiidxni. Palga guiniliipacni guzá'tni oor ni yu' neñ guidoo, dxejc sii rniliini dxejc nungájl guzoobni xtiidxni. <sup>17</sup> ¡Ben nayáäl, benlotiá'p! ¿Xhini'c sajcrú? ¿La oor la guidoro ni rundxan oorga? <sup>18</sup> Rniizatu: “Palga te bejn guiniliipacni guzá'tni lo bacuug ni yu' neñ guidoro, di'xcentudi xtiidxni. Luxh palga yu' chu guiniliipac guzá'tni gojn ni dzuub lo bacuug, dxejc sii rniliipacni dxejc nungájl gusoobni xtiidxni.” <sup>19</sup> ¡Ben nayáäl, ben lotiá'p! ¿Xhini'c sajcrú? ¿La gojn o la bacuug nani rundxan gojnga, á? <sup>20</sup> Nani ruzá't lo bacuug che rniliipacni, et ganaxdi lo bacuug ruzá'tni, nájza guiraa ni tre' lo bacuug ruzá'tni. <sup>21</sup> Ni ruzá't guidoro che rniliipacni, et ganaxdi guidoro ruzá'tni, nájza Dios ni rbájza neñ guidoro ruzá'tni. <sup>22</sup> Sigajcza ni ruzá't guibaa che rniliipacni caguzá'tzani yagxhíro xten Dios nájza lagajc Dios ni sobga' ro'c.

<sup>23</sup> ¡Proobzatu remastr xten lei nájzatu refarisee, najctu benguijdx! Bedzxtiil, anis nájza comín ni rajntu, rudeedtu lo Dios tej tantga yejc cade te tzuu, niluxh ditu jiu' ni sajcrú lo xtidx Dios, cadro caj xcuent yálnabanya, yálrulazlajz, nájza yálrililajz. Deeza ni riájlpac guntu la'l ni cayujnzatu steega. <sup>24</sup> ¡La'tu, lotiá'p ni rljaz guluii nezyuj! Riutu rediidx ni guxii saj, niluxh rediidx ni sacduxh ditu jiu'ni, najctu si'c bejn ni rbáä te rex lo xplá'tni dxejcrú rájmi te cameii.

<sup>25</sup> ¡Proobzatu remastr xten lei nájzatu refarisee, najctu benguijdx! Rusiatu detz bas nájza pla't luxh neñni najc-dxuudx. Sigajcza la'tu riuduxhtu recostumbr, luxh lastootu guidxa yálgubaan nájza yáldrxe'chljajz. <sup>26</sup> Farisee ni najc lotiá'p: gudibxgaa neñ bas nájza neñ pla't, dxejc náj dejtzní sajc naya.

<sup>27</sup> ¡Proobzatu remastr xten lei nájzatu refarisee, najctu benguijdx!, sa'csi najctu si'c rebaa ni nacchesa'c; nolbájreni, saru rluuini, luxh neñreni guidxa dzuajt xte bengut nájza bályudx. <sup>28</sup> Sigajcza najctu la'tu. Saru rujn lojtu, rchalo rebejn najctu bensa'c, niluxh lastootu guidxa yálrusguee nájza yálguyalajz.

<sup>29</sup> ¡Proobzatu remastr xten lei nájzatu refarisee, najctu benguijdx! Runcheetu xpaá redade' ni gunii xtidx Dios galoo, rusucheezatu ro' xpaá rebejn ni gujc bensa'c, <sup>30</sup> dxejc rniitu: “Paru nibajntu neñ redxej ni gubajn retoxtagoldoonu dinu niacnáj reni bagu't redade' ni gunii xtidx Dios.” <sup>31</sup> Lagajc con rediidxre rcájptu najctu rexajj renani bagu't redade' nani gunii xtidx Dios. <sup>32</sup> ¡Colguscuááz guntu sa' recos ni guláxtiej retoxtagoldootu!

<sup>33</sup> ¡La'tu ni najc si'c bál, la'tu ni najc si'c te bitiaáz guidxa bálnialajz! ¿Xho guntu te na'c cháātu gabijl par tejpas? <sup>34</sup> Ni'cni, guxhalá rexpəná ni guinii xtidxá, nájza ben'najn, nájza mastr. Luxh yu'reni sugu'ttu sucuaatreni lo cruiz; yu'zarení siguijntu neñ reguidobáz, sirinajltreni guejdx por guejdx. <sup>35</sup> Si'cza yejctu jiajb xtiejn guiraa rebennadolajz ni bagu't



bejn xchejli toAbel ni gujc nadolajz, xchejliza Zacarías, xi'n Berequías, ni bagu'ttu nen guidoro gajxh lo bacuug. <sup>36</sup> Rniliäpac lojtu, dojl xten guiraa recosga siabj yejc rebejn ni tre' lo guedxliuj naj.

*Jesús biin xcuent guedx Jerusalén*  
(Lc. 13:34-35)

<sup>37</sup> Räjpa Jesús:

—jJerusalén, Jerusalén! Xpejnlu rugu't redade' ni rnii xtidx Dios, rucuaazareni guij yejc rebejn ni ruxhał Dios te gusule'reni xtiidxni lojtu. jBalti huält rlazä nutie'ä la'tu si'cni rutie' guidco'c rexquidbäzni nen xhigani, per ditu nicäjb! <sup>38</sup> Colhuii xho jianxteb xquidootu cuälazreneni. <sup>39</sup> Rnixgaä lojtu, naj dirutu fi loä, dxejli che guiniitu: “Benle' Dios nani siääd xcuentni.”

## 24

*Jesús räj sibijl guidoro*  
(Mr. 13:1-2; Lc. 21:5-6)

<sup>1</sup> Birii Jesú nen guidoro te asiini, dxejc gubig rexpeljnpacni lojni, gusloj caguluiireni reyuduxhga lojni. <sup>2</sup> Dxejc räj Jesú lojreni:

—¿La ruhuiitu guiraa reyu're? Rniliäpac nicla tej guij di jia'n yejc sa'ni ree; guiragajc reyu're sibijl.

*Cos ni guluijoj gac fis*  
(Mr. 13:3-23; Lc. 21:7-24; 17:22-24)

<sup>3</sup> Dxejcti huijreni yejc te dajn ni laa Oliib. Che gurej Jesú ro'c, biääd rexpeljnpacni lojni te xhiga'tz gunabdiidxreni lojni:

—Rlaaznu guiniilu loonu guc gac guiraa recosre. ¿Xhi seen guluijoj ameer jiäädu näjza che ameer nitloj guedxliuj?

<sup>4</sup> Dxejc räj Jesú lojreni:

—jColnatiro te rut gusueedi la'tu! <sup>5</sup> Sa'csi su' xhidajl reni jiääd, naareni: “Narä nacä Crist”, luxh susgueereni xhidajl bejn. <sup>6</sup> Siejn diajgtu xcuent cadro cayajc guer, näjza xcuent cadro rlazj chu guer, na'c guidxtejbtu sa'csi si'c nungäjł gac, niluxh gajd galđi nitloj guedxliuj. <sup>7</sup> Sa'csi siäjs te naciön sidilnäjni stee naciön; te yälrnibee sujñ guer con stee yälrnibee, luxh su' gubijn, su' yälguijdx, su'za xuduxh xhidajl lajt. <sup>8</sup> Luxh guiraa redee cuäxtiejtis retrabajwduxh ni churu chu.

<sup>9</sup> Dxejc guteedreni la'tu ladznaa rebendojl te gusacsireni la'tu, te gugu'tzareni la'tu, luxh guiraa rebejn sidxe'ch lojtu sa'csi sanälajztu narä. <sup>10</sup> Nen redxejga, xhidajlreni sibälaz xcälřililajztu, sidxe'ch lo sa'reni, suto' sa'reni lo sa'reni. <sup>11</sup> Dxejc siricaj xhidajl bejn ni rusguee, gäbreni xcuent Dios rniireni, luxh susgueereni xhidajl bejn. <sup>12</sup> Sa'csi lacti suduxh yällatsij lo guedxliuj, diru bejn chanälajz sa'ni. <sup>13</sup> Dxejcti bejn ni chasanäj xnezuytis Dios, ni'c sun gaan xca'ni yälñabajñ par tejpas. <sup>14</sup> Luxh sisiule' xtidx Dios guideb lo guedxliuj te gacbee guiraa reben guedxliuj xtiidxni; dxejcru jiääd fis xten Dios.

<sup>15</sup> Cheni fiitu asobga' te benguidxduxh nen yu' ni najc dxan nen guidoro, si'cni gunixgaa toDaniel ni gunii xtidx Dios gacni, bejn ni goł dee sugacheeni nani rołni, <sup>16</sup> dxejc renani rbäjz lo guedx Judea, suguxunreni gucuatxlojreni nen dajn. <sup>17</sup> Bejn ni niä'p yejc xyu'ni dxejga di galđi jiajtni te chalääni xhixtenni nen xyu'ni; <sup>18</sup> bejn nani cayujñ dzuun lo niaa, na'c guibi'ni niclaza chaxhiini xhajbni. <sup>19</sup> jProobza regunaa ni nuxi'n, näjza reni cagusiä' báz nen redxejga! <sup>20</sup> Colñabduxh loj Dios xhet nenđi redxej ni cayacnalduxhđi nanab guxunđitu, niclaza dxej che rusilajz bejn. <sup>21</sup> Sa'csi su' trabajwduxh nen redxejga, sa' ni gajd bejn fi dxejli ni guzobloj guedxliuj, luxh che tedni, diru guibi' chuni. <sup>22</sup> Luxh palga di Dios gutiu' yejc redxejga, nicla tej bejn di laa. Luxh sutiu' Dios yejc redxejga sa'csi rinälajzni reni aguleni.

<sup>23</sup> Nen redxejga palga yu' chu naa lojtu: “Colhuii, aree Crist”, o “Colhuii ani arec”, na'c chalilajztuni. <sup>24</sup> Siääd xhidajl niguii ni rusguee, gäbreni najcreni crist; sidzujpza rebejn ni rusguee ni gäb xtiidxpac Dios rusule'reni; luxh sujñreni remilagwr sujñzareni senro, parsi gusgueereni, susgueduxhreni rebejn, niluxh rlazjreni gusgueezareni rebejn ni agule Dios, ni rililajz xtiidxni. <sup>25</sup> Agunixgaä lojtu xhini'c gac. <sup>26</sup> Ni'cni palga naareni lojtu: “Bahuii, a crist yu' nez lo reyubjdz”, na'c chäätu; o palga naareni: “A crist suga' nen yu're”, na'c chalilajztureneni. <sup>27</sup> Sa'csi si'cni guideb xhaguibaa rien che rdinya' ladjiaa näjza ladjiätli, si'cza suhuiitu loä, Xi'n Dios ni gujc Niguii, cheni jiälsacä lo guedxliuj. <sup>28</sup> Ni najntu cadro naga' te mangut, ro'c re' regolbetz.

*Cheni jiädsac Xi'n Dios ni gujc Niguii*  
(Mr. 13:24-37; Lc. 21:25-33; 17:26-30, 34-36)

<sup>29</sup> Räjpszani:

—Cuantsi ted guiraa retrabajwduxh, sicäjy lo gubijdx, diruza bäii gusanij, sitejzba rebajl ni yu' xhaguibaa, sinibduxhza guideb xhaguibaa. <sup>30</sup> Dxejcti suhuiireni xhaguibaa seen xten Xi'n Dios ni gujc Niguii, luxh guiraa rebejn ni rbäjz nen guiraa reguejdx lo guedxliujre, sonduxhrene suhuiireni siääd Xi'n Niguii lo reza xhaguibaali. Siäädni con yärlnibee näjza yärlimbichaduxh. <sup>31</sup> Dxejc suxhalni rexanglni con te trompet ni guscuedxa'reni dipduxh te guire' guiraa rebejn ni aguleni lo guidajp lajd squiin guedxliuj, guideb lo guedxliuj näjza xhaguibaa.

<sup>32</sup> Colgusieed ni ruluii yajg iigw! Che naren reñaani che cabääni be'n, asiääd bäi curex, <sup>33</sup> sigajcza cheni fiitu cayajc guiraa recosre, sabeetu asiädgajxh fis, rolä'li abidzujjni. <sup>34</sup> Rniliäpac lojtu, guiraa redee sajc laļ ni nabajñ gaii rebejn ni suga' ree nāj. <sup>35</sup> Guibaa näjza guedxliuj sinifloj, niluxh xtidxä di nitloj.

<sup>36</sup> Rut najndi xhi dxej, xhior gacni, nicla rexangl Dios, niclaza Xi'n Dios; Dad Diostis najn.

<sup>37</sup> Sigajcni gujc nen redxej che gubajñ toNoé, si'cza gac che jäälä Xi'n Dios ni gujc Niguii. <sup>38</sup> Nen redxe galoo, cheni gajd nisguiduxhga jiajb, rebejn ni nabajñ dxejc cayajwreni, cayä'reni, caguchnaareni, cagudeedza bejn xindxap'reni guचना, dxejli cheni biu' Noé nen barcwro. <sup>39</sup> Direni niacbee xtiidxni; cheni biäädli nisguiduxh ni sanä guiraareni dxejcru gucbeereni. Sigajcza gacni che jäälsacä narä Xi'n Dios ni gujc Niguii. <sup>40</sup> Nen redxejga palga cayujñ tio'p bejn dzuun lo niaa tejni guibee, steeni sia'n. <sup>41</sup> Palga cayo't tio'p gunaa xobniil, tejni guibee, steeni sia'n.

<sup>42</sup> Ni'cni colsusin, sa'csi ditu gan xhi dxej jääd Dad xtentu. <sup>43</sup> Colganchee, paru niacbee baxhuan xten yu' cor yääl niääd gubaan ni siädlan rolizjni, nisuusinni dxejc, dini nusaan niu'ni rolizjni te cuanni. <sup>44</sup> Ni'cni colsusinza la'tu, sa'csi siääd Xi'n Dios ni gujc Niguii lagajc or ni ditu gan xhigab jäädni.

*Xcuent te mossac näjza te mosguijdx  
(Lc. 12:41-48)*

<sup>45</sup> Chuni'c najc mossac ni ruzoob diidx, ni basannäj xlamñi rebejn ni yu' rolizjni te gudeedni xhi gaureni ä? <sup>46</sup> Chicbaa mos ni saru cayujñ xtuunni che guidzujñ xlamñi. <sup>47</sup> Rniliäpac lojtu, lamga susa'nni sa' mosga te fini guiraa xhixtenni. <sup>48</sup> Dxejc palga mosga di gusoob xtidx xlamñi, gunni xhigab: "Sacladuxh gubi' xlamä", <sup>49</sup> dxejc guisloj cagusacsini resamosni, guislojni gaunäjni, yänäjni rebengu. <sup>50</sup> Dxejc sidzujñ xlamñi dxej che dini gun xhigab jäädni, luxh or ni dini gan guidzujñni. <sup>51</sup> Dxejc siguiduxhni mosguijdxga, surilaagwnini te guidxagsa'ni sabenguijdxni, dxejc sonduxhni, chubejli reläjyni.

## 25

*Xcuent tzuu gunaa*

<sup>1</sup> Räjpsa Jesús:

—Pues xcälrnibee Dios najc si'c tzuu gunadxa'p nani cua' xcandilse'treni te huiireni ni sa'. <sup>2</sup> Gaii regunaaga nasin, sgaiireni nayääl. <sup>3</sup> Reni nayäälga sanäreni xcandilreni, niluxh direni nica' sijn se't. <sup>4</sup> Niluxh reni nasinga sanäreni sijn se't te guze'reni nen xcandilreni. <sup>5</sup> Sa'csi bi'nga di nidzungaj, gunaaz bacaļ regunadxa'pga, gudiejstireni. <sup>6</sup> Dxejc si'cti garol yääl, biejn te xse' ni räjp: "Bi'n asiääd, colchäj, colchachaglojni." <sup>7</sup> Guiraa regunaare huistieguxunreni, dxejc bensa'creni xcandilreni, te cuaguijreni. <sup>8</sup> Dxejc guigaii regunayääl räjpreni loj reni nasin: "Colgumidxlaa te bo'c se't gusanijnu xcandilnu, sa'csi arlajzni jjiuini." <sup>9</sup> Dxejcti regunanasin räjp lojreni: "Digacdini, dxejc dini gaļ nicla par nuurnu nicla par la'tu. Colchäj cadro ruto'reni se't colchazii xse'ttu." <sup>10</sup> Laļni sasii guigaii regunaa-nayäälga se't, bidzujñ bi'n. Regunaa-sin ni cabäjz bi'n biunäjrenini lo sa', biäauti ro lä'. <sup>11</sup> Cheni bidzujñ regunanayäälga, räjpreni: "Dad, Dad, baxhal ro lä'." <sup>12</sup> Dxejc räjpni lojreni: "Rniliäpac lojtu, dina gumbeätu."

<sup>13</sup> Dxejc Jesús räjp lojreni:

—Colsusinza, sa'csi ditu gan nicla xhi dxej nicla xhi or siääd Xi'n Dios ni gujc Niguii.

*Xcuent lamñi ni badeed meel*

<sup>14</sup> Xcälrnibee Dios xhaguibaa najc si'c te bejn ni agojñ guirii chääni zijt te biaj. Gurejdxni rexmosni, badeedni meel lojreni.

<sup>15</sup> Lo tejni badeedni si'cti gaii miļ meel, lo steeni badeedni si'cti tio'p miļ, dxejc steeni cua' te miļ. Loj tejgani badeedni si'cti ni rujñni xhigab sajc gunnäjreni dzuun, dxejcti biriini xpiajni. <sup>16</sup> Ni cua' gaii miļ meel bejn te dzunro, bejnñi gaan sgaii miļ meel. <sup>17</sup> Sigajcza ni cua' tio'p miļ meel, bejnñi gaan stio'p miļ. <sup>18</sup> Dxejcti ni cua' te miļ meel, huicua'tzni xmeel xlamñi nen te gueed ni gudääni lo yuj.

<sup>19</sup> Gudejdti balti bäii, dxejc gubi' xlamñi remosga, bejnñi cuent loj guiraareni. <sup>20</sup> Che bidzujñ ni cua' gaii miļ meel, bidzunäjni sgaii miļ meel ni bejnñi gaan, räjpni loj xlamñi:

“Dad, baniidx guejblu gaii mił loä. Aree sgaii mił meel ni benä gaan.” <sup>21</sup> Räjþ xlamni lojni dxej: “Huenca, mos huen najclu, rusoobzalu xtidä. Sa'csi gujclu bensa'c con te cos báz, naj sunidä guinibeelu xhiroobru. Biu' loä, bibalaznäj narä.” <sup>22</sup> Che bidzujñni ni cua' tio'p mił meelga, räjpni loj xlamni: “Baniidx guejblu tio'p mił meel loä, aree stio'p mił meel ni benä gaan.” <sup>23</sup> Räjþ xlamni lojni: “Mbaj. Mos huen najclu rusoobzalu diidx. Sa'csi gujclu bensa'c con te cosbáz, naj sunidä guinibeelu xhiroobru. Biu' loä, bibalaznäj narä.” <sup>24</sup> Che bidzujñ mos ni cua' te mił meel, räjpni lo xlamni: “Dad, ananä najclu te bejn ni di gulazlajz; rca'lu cose'ch cadro dilu nibe'c binij, rutojþzalu cadro dilu nutie'ch binij.” <sup>25</sup> Ni'cni bidxebä, huicua'tzá xmeellu neñ yuj. Niluxh axh aree xmeellu.” <sup>26</sup> Dxej räjp xlamni lojni: “jMos guj'dx, mos ploj! Najnlu rca'ä cose'ch cadro dina nibe'cä binij, rutopä cadro dina nutie'chä binij.” <sup>27</sup> Riäj! nisa'nlu xmelä neñ te bancw te che nibi'ä nicasacä xmelä con xi'nni ni niujni gaan.” <sup>28</sup> Dxej räjpni loj reni suga' ro'c: “Colgudzucaj te mił meel ni ca'ni colgudeedni loj ni rajp tzuu mił meel.” <sup>29</sup> Sa'csi loj ni rajp sudedäru, niluxh ni xhet rajpdi sudzucä tudxe'n nani rajpni.” <sup>30</sup> Dxej räjpni: “Colca' mosre ni xhet sajcdi, colguzäni lo yälñacäj, cadro chu yälñonduxh, näjza yälrajw reläj bejn.”

### *Yälguxhtis xten reguejdx*

<sup>31</sup> Che jiädsac Xi'n Dios ni gujc Niguii con yälrdimbicha' xtenni, siädñäni rexangl Dios. Dxej sibejni lo troñ ni rdimbicha' xtenni te guinibeeni. <sup>32</sup> Dxej sidojþ nez lojni guiraa rebeñ guedxliuj. Dxej sibeñi lojreni, silia'ni sa'reni si'c rujn te baxtoor cheni rbeni rexil loj redxib, te rlia'reni loj sa'reni. <sup>33</sup> Suzujni rexil xladbeeni dxej redxib xladbäjgwni. <sup>34</sup> Dxej säjb rei loj reni suga' xladbeeni: “Coltaa, la'tu ni benle' Xtaä. Coljiu' lo yälñmbee ni guc-chee cheni guzoblojli guedxliuj.” <sup>35</sup> Sa'csi che calanä la'tu baniidx xhi gudauä, che cayolä, la'tu baniidx xhi gu'ä. Che cuanzaä si'c te benzijt, la'tu banidxlaatu cadro bia'nä. <sup>36</sup> Che xheti xhabä, la'tu baniidxni, che guc'huä, la'tu biädhuiitu narä, che guyu'ä neñ latzguuib, biädhuiitu narä.” <sup>37</sup> Dxej sinii reni suga' xladbeeni, säjbreni: “Dad, ¿guc bahuiinu gulaanlu, baniidxnu xhi gudajwlu? ¿Guc bahuiinu cayojllu, baniidxnu xhi gu'lu? <sup>38</sup> ¿Guc bahuiinu najclu si'c te benzijt, baniidxnu cadro bianlaalu, o biäädx xhajblu, baniidxnu xhi gojtu? <sup>39</sup> O ¿guc bahuiinu cayacxhuulu, o yu'lu neñ latzguuib, biophuiinu lojtu?” <sup>40</sup> Dxej reiiga säjb lojreni: “Rniliäpac lojtu, xhitis xhi bejntu loj te rexpənä ni rnii xtidä mase probreni, lagajc loä bejntu recosga.”

<sup>41</sup> Dxej säjþzani loj reni suga' ladbäjgwni: “Colguibicaj loä, benguijdx, colchäj lo balduxh ni cayejc par tejpas ni cayejc par bendxab ni rnibee näjza rexpədxabni. <sup>42</sup> Sa'csi gulanä, luxh ditu nuniidx xhi niaü; biolä, per ditu nuniidx xhi niä'ä; <sup>43</sup> cuanzaä si'c te benzijt, luxh ditu nuniidxlaa cadro nia'nä, biädxza xhabä, niluxh ditu nuniidx xhi niacwä; guc'huä, guyu'äza neñ latzguuib, niluxh ditu niädhuii loä.” <sup>44</sup> Dxej laareni säjbreni: “Dad, ¿guc bihuiinu calaanlu, o cayojllu, o canzajlu si'c te benzijt, o cayäädx xhajblu, o cayacxhuulu, o yu'lu neñ latzguuib, luxh dinu niacnäjlü?” <sup>45</sup> Dxej säjb reiiga lojreni: “Rniliäpac lojtu, loj xhitis ni ditu niacnäj rebejn ni rililajz xtidä, mase probreni naräni ditu niacnäj.” <sup>46</sup> Dxejcti sij rebejnre lo yälñrusacsä par tejpas, per rebejn ni nadolajz, ni agule Dios, sijreni lo xcälñabajñ Dios par tejpas.

## 26

### *Bejnreni xhigab xho guiniaazreni Jesús*

(Mr. 14:1-2; Lc. 22:1-2; Jn. 11:45-53)

<sup>1</sup> Che gulujx gunii Jesús rediidxre, räjpni loj rexpəjñpacni:

<sup>2</sup> —Anajntu stio'p dxejtis cayäädx gac lanij ni laa pascw. Luxh suteedreni narä, Xi'n Niguii ladzñaa reni gucuaa narä lo cruiz.

<sup>3</sup> Dxej bidojþ rebejn ni rnibee rebixhojz, näjza remastr xten leii, näjza rebeñgool lo rexpəjñ Israel. Lo xle' Caifás, ni rnibee loj rebixhojz, bidojþreni. <sup>4</sup> Ro'c bachaagreni diidx xho guiniaazreni Jesús con yälñrusguee, te ju'trenini. <sup>5</sup> Luxh räjpreni lo sa'reni:

—Na'c jiennuni neñ redxe lanij, te di gun rebejn bieiduxh.

### *Te gunaa ni biädñä perfum*

(Mr. 14:3-9; Jn. 12:1-8)

<sup>6</sup> Che yu' Jesús guedx Betania, rolijz Simón te bejn ni basiajcnii che ral tiejxhni, <sup>7</sup> ro'c gubig te gunaa lojni, ca'ni te vasgij ni laa onix, guidxani te perfum ni sajc melro. Che sobga' Jesús lo mex, bachajni perfum yejc Jesús. <sup>8</sup> Che bahuii rexpəjñpacni xhi cayujñni, bidxe'chreni, gusloj cayäjþreni:

—¿Xhicuent casälxlia'ni perfumga? <sup>9</sup> Perfumre niajc nido'ni, nirii xhidajl meel lojni te niacnäjni rebeñproob.

<sup>10</sup> Biejn diajz Jesús xhi caniireni, dxej räjpni lojreni:

—¿Xhicuent cadxe'chnäjtu gunaare? Ni te coshueen najc dee nani bejnni loä. <sup>11</sup> Ni guirasi dxej su' rebejn ni xhet rajpdi lojtu, peta narä guxii dxej su'ä lojtu. <sup>12</sup> Nani bejn gunaare che bachajni perfumre guideb lagaa tiexhä, najcni par guzucheeni narä te guigatzä. <sup>13</sup> Rniliäpac lojtu, cadrotis gusule'reni xtidxä lo guideb guedxliuj, sujyreni diidx xcuent ni bennäj gunaare narä, te guinaj lajzreni gunaare.

*Judas bato' Jesús*

(Mr. 14:10-11; Lc. 22:3-6)

<sup>14</sup> Dxejc lo retzubitio'p rexpenpac Jesús birii tej ni laa Judas Iscariote, huininäjni rebejn ni rnibee loj rebixhojz, <sup>15</sup> räjpni:

—¿Lac guniidxtu loä te gutedä Jesús ladzñaatu?

Dxejc badeedreni galbitzuu melpla't lojni. <sup>16</sup> Dxjecli caguuil Judas xho gutedni Jesús lojreni.

*Lult xchej xten Jesús*

(Mr. 14:12-25; Lc. 22:7-23; Jn. 13:21-30; 1Co. 11:23-26)

<sup>17</sup> Primer dxej lanij, dxej ni rajwreni yätxtiil ni di saguij, gubig rexpejnpackni loj Jesús, räjpreni lojni:

—¿Caro rlaizlu chozuccheenu te gaulu xchej xten lanipascw?

<sup>18</sup> Dxejc räjpni lojreni:

—Colchäj lo guejdx rolijz te dade', colye'tz lojni: “Si'c naj Dad maestr: Asiäddzungajxh xorni, ni'cni rolijzlu gaunäjni rexpejnpackni xchej lanipascw.”

<sup>19</sup> Bejnti rexpejnpackni si'cni gunibee Jesús gac, bazuccheereni xchej xten pascw.

<sup>20</sup> Che biu' guxhijn, sobga' Jesús lo mex con retzubitio'p xpejnpackni. <sup>21</sup> Lał ni cayajwreni räjpni lojreni:

—Rniliä lojtu, yu' tejtü ni guto' narä.

<sup>22</sup> Dxejc guc-huinduxh lajzreni, räjpreni lojni:

—Dad, ¿andi naräni?

<sup>23</sup> Dxejcti räjp Jesús lojreni:

—Ni gaunäj narä neñ tejtis pla't, laa ni'cni guto' narä. <sup>24</sup> Xi'n Dios ni gujc Niguii sajc si'ctis ni caj loj guijtz xten Dios, per gunatiro bejn ni guto'ni. Huenru na'c niaj bejnğa.

<sup>25</sup> Dxejcti gunii Judas, ni caguto' Jesús, räjpni:

—Mastr, ¿andi naräni?

Jesús räjp lojni:

—O'n, lujni.

<sup>26</sup> Lał ni sobga'reni cayajwreni, guläs Jesús yätxtiil, badeedni xquixtios lo Dios, dxejcti gula'nini, badeednini loj rexpejnpackni, räjpni:

—Coltajw; dee najc si'c tiexhä.

<sup>27</sup> Dxejc guläsni te vas, badeedni xquixtios lo Dios, dxejcti badeednini loj rexpejnpackni, räjpni:

—Guiraatu colyä', <sup>28</sup> sa'csi dee najc si'c xtienä; ni'cni riannä la'tu te didxcoob, luxh rejnre sixe'ni xcuent xhidajl bejn te guslaanireni neñ dojl. <sup>29</sup> Luxh rniä lojtu, diruna yä'ä nis nani rii yejc uub, dxejlini yänäsacätu lo xcälrnibee Dios, Xtadä.

*Räjp Jesús sibälaz Pedroni*

(Mr. 14:26-31; Lc. 22:31-34; Jn. 13:36-38)

<sup>30</sup> Che gulujx bilreni te dij, biriireni, sääreni lo dajn ni laa Oliib. <sup>31</sup> Dxejc räjp Jesús lojreni:

—Guiragajctu sactio'p lajztu xcuentä, susa'ntu narä naguxhijn sa'csi lo reguijtz xten Dios caj scree: “Sugu'treni baxtoor dxejc sire'ch rexiiil.” <sup>32</sup> Dxejc cheni guibañsacä lo rebengut, ganidä cha'ä región Galilee, dxejcti jädnajltu narä.

<sup>33</sup> Dxejc räjp Pedr loj Jesús:

—Masque guiraareni cuälazlu, narä dina cuälazälu.

<sup>34</sup> Dxejc räjp Jesús lojni:

—Rniliäpac lojtu, lagajc guxhijnre, nicla gajd guidgäi cuedxa', luxh luj alagulälazlu narä choñ huält.

<sup>35</sup> Räjp Pedr loj Jesús:

—Masque riäj l guetnäälü, dina cuälazälu.

Dxejc sigajcza gunii guiraa rexpejnpackni.

*Gurejdx-gunab Jesús loj Dios neñ Getsemani*

(Mr. 14:32-42; Lc. 22:39-46)

<sup>36</sup> Dxejcti bidzujn Jesús näjza rexpejnpackni te lajt ni laa Getsemani, räjpni lojreni:

—Colcuésijc ree lał ni cuedx-guiniabä lo Dios.

<sup>37</sup> Dxejc sanäni Pedr näjza guiro'p xi'n Zebedeo, luxh gusloj cayachuinduxh lajzni, cayu'zani yärsiaduxh. <sup>38</sup> Dxejc räjpni lojreni:

—Te yälhuinduxh yu' lastoä; astoocanu agojl guetä. Coljia'n ree, coltie'ch bacal lojtu.

<sup>39</sup> Dxejc guzaj Jesüs stla', guzuxhijbni dxejc basajb lojni lo yujli, gusloj cabedx-canabni lo Dios:

—Xtadä, palga sajnci, basanlaa tedcaj trabajwduxhre ni tedä, te na'c tedäni. Xhet si'cdi ni rlazä gacni; si'cpacni rlazzlu gac, si'c gacni.

<sup>40</sup> Dxejcti gubi'ni cadro suga' guichon rexpejn'pacni, che bidzuj'ni ro'c, nagayejsreni. Räjpni lo Pedr:

—¿La di ni ajcdi nutie'chtu bacal lojtu nicla tebor, ä? <sup>41</sup> Colguibajn, colnab lo Dios te na'c jiajbtu nen dojl. Guliipacni, lastootu nadip, niluxh tiejxhtu rdxajc.

<sup>42</sup> Gubi' Jesüs stehuält, gurejdx-gunabni loj Dios, räjpni:

—Xtadä, palga digacdi tedcaj tedä trabajwre, sugacni si'ctis ni rlazzlu gacni.

<sup>43</sup> Dxejc gubisacni, bidxäli rexpejn'pacni, nagayejsreni sa'csi yuduxh bacal lojreni.

<sup>44</sup> Basaannireni, dxejc säasacni, gurejdx-gunabni lo Dios ni riojn huält, gunisacni lagajc rediidx ni guniini galoo. <sup>45</sup> Dxejc huijni cadro suga' rexpejn'pacni, räjpni lojreni:

—¡Naj sii, colguejs, colgusilajz! Abidzuj' or ni gutedreni Xi'n Dios ni gujc Niguii ladz'naa rebendojl. <sup>46</sup> ¡Colchastie, colcho', colhuii! Asiääd nani guted narä ladz'naa rebendojl.

### *Gunaazreni Jesüs sanärenini pres*

(Mr. 14:43-50; Lc. 22:47-53; Jn. 18:2-11)

<sup>47</sup> Lalni canii Jesüs bidzuj' Judas, nani najc tej retzubitio'p xpejn'pacni. Bidzunnäjni xhidalduxh bejn ni ca' espaad, ni ca' garo't, najczeni xpejn reni rnibee rebixhojz, näjza xpejn rebengool xten rexpejn Israel. <sup>48</sup> Judas, ni bato' Jesüs, abadedxgaani te seen lojreni räjpni:

—Nani guchagro'ä, ni'c najc laani; colguiniaazgajcni.

<sup>49</sup> Dxejc gubigni loj Jesüs, räjpni:

—Xchan, Dad Mastr:

Dxejc bachagro'ni lojni. <sup>50</sup> Jesüs räjp lojni:

—Xamigwä, ¿xhi siäädldu?

Dxejcti gubig rebejn lojni, gunaazrenini.

<sup>51</sup> Per tej reni suganäj Jesüs gulääni te spaad, batiu'ni diajg te mos xten rebixhojz ni rnibee. <sup>52</sup> Dxejc räjp Jesüs lojni:

—Guluchee xspaadlu loj xse'ni. Guiraa reni rucuanäj con spaad, lagajc con spaad guetreni. <sup>53</sup> ¿La ditu gan sajzca guiniabä lo Xtadä, luxh laani suxhalgajcni gayonbitzubitio'p miñ xanglni gacnä' narä? <sup>54</sup> Dxejc xho gac soob diidx ni caj lo reguijtz xten Dios ni rnixgaa riälj gac guiraa recosre lagajc si'cni cayajcni.

<sup>55</sup> Dxejc räjp Jesüs loj rebejn xhidajlga:

—¿La siädnätu spaad näjza garo't te guiniaaztu narä astoocanu nacä si'c te gubaan? Ni guirasi dxej gureä galäiitu, baluäitu nen guidoro, luxh ditu niniaaz narä. <sup>56</sup> Niluxh guiraa recosre cayajc te soob rediidx ni caj lo reguijtz ni bacuaa redade' ni gunii xtidx Dios.

Dxejcti guiraa rexpejn'pacni basanxtebreni Jesüs, baxunreni lojni.

### *Jesüs nez loj rebixhojz*

(Mr. 14:53-65; Lc. 22:54-55, 63-71; Jn. 18:12-14, 19-24)

<sup>57</sup> Reni gunaaz Jesüs huinänini nez loj Caifás, ni rnibee loj guiraa rebixhojz, bidzuj'reni cadro abidojp guiraa rebejn nani ruluii leii näjza rebengool xten xpejn Israel. <sup>58</sup> Dxejcti zit-zijt biäd'najl Pedr rebejn'ga, bidzuj'nireni lole' xten bixhojz ni rnibeega. Ro'c biu'ni, gurenäjni rexquixhajg bixhojzga te ro'c bia'n'ni te fiini xhini'c gac.

<sup>59</sup> Reni rnibee rebixhojz, näjza rebengool con guiraa reni rajp yälrnibee gusloj caguiilreni xhitis te diidx, masque xhet guliidini, te gucuaquijreni Jesüs te guinibeereni guetni.

<sup>60</sup> Niluxh xhet bidxäldireni, luxh gubig xhidajl bejn, guniireni xhidajl didx-xhii xcuent Jesüs. Dxejcti bidzuj' tio'p dade' ni gunii didx-xhii, <sup>61</sup> räjpreni:

—Niguiire gunii scree: “Narä sajz gutzulä guidoro xten Dios, sajzca gunchesacäni nen chon dxej.”

<sup>62</sup> Dxejc gusulii dade' ni rnibee lo rebixhojz, räjpni loj Jesüs:

—¿Xhicuent xhet rniidilu, ä? ¿Xhini'c canii reniguiire cagucuaquijreni luj?

<sup>63</sup> Niluxh dxitis suga' Jesüs. Dxejcti räjp dade' ni rnibee loj rebixhojz lojni:

—Rnibeä guiniliilu, guiniliipaclu con laj Gueb Dios nani nabajn. Gunii don, ¿la luj najc Crist, Xi'n Dios?

<sup>64</sup> Jesüs räjp lojni:

—Lagajc gueb'lu naj si'c. Niluxh empac rniä lojtu, desde najli suhuiitu cueä narä Xi'n Dios ni gujc Niguii xladbee Dios ni rnibee, suhuiizatu jiälä lo reza ni tre' xhaguibaa.

<sup>65</sup> Dxejc batiäjs dade' ni rnibee loj rebixhojz xhajbni, räjpni:  
—iNiguiire aguniyajni Dios con xtiidxni! ¿Xhiru testiügw rquiinnu? Abiejn diajgtu didxyaj xtenni. <sup>66</sup> ¿Xhi rchalotu?

Dxejc basejreni diidx:

—iAbiga'ni! Riäjl guetni.

<sup>67</sup> Dxejc batiobxhejnreni lojni, gudijnreneni. Yu'reni gudajp lojni, <sup>68</sup> räjpreni lojni:

—Palga najclu Crist, gunii chuni'c gudijnlu.

*Di Pedr nicäjp numbeeni Jesús*

(Mr. 14:66-72; Lc. 22:56-62; Jn. 18:15-18, 25-27)

<sup>69</sup> Laḷ ni cayajc reni'c, Pedr sobga' lole'. Dxejc gubig te dxape' ni rujn dzuun ro'c, räjpni lojni:

—Näja luj cuansanäjlu Jesús, ni siääd nez Galilee.

<sup>70</sup> Per di Pedr nicäjp nez loj guiraareni, räjpni:

—Dina ganä xhini'c caniilu loä.

<sup>71</sup> Asii Pedr nez ro' puert, che bidxaagni stee dxape' ni rujn dzuun ro'c. Dxape're räjp loj reni suga' ro'c:

—Näja dade're cuansanäj Jesús ni siääd Nazare't.

<sup>72</sup> Dxejc basguee Pedr stehuält, räjpni:

—Rniliäpac dina gumbleä dade'ga.

<sup>73</sup> Che gojl sterate', gubig reni suga' ro'c loj Pedr, räjpreni:

—Guliini; näja luj najclu te xpejn; huenliisi riejn diidx ni rniilu.

<sup>74</sup> Dxejcti guslojni cagueni, caguzä'tni Dios, räjpni:

—Dipacna gumbleä niguiiga.

Guniitnsi si'c, chela guredxa' te guidgai. <sup>75</sup> Dxejcru banalajz Pedr rediidx ni gunii Jesús lojni che räjpni: “Che gajdli guidgai cuedxa', choñ huält alaguniilu dilu gumbee narä.” Dxejc birii Pedr ro'c, gusloj cayonduxhni.

## 27

*Batedreni Jesús loj Pila't*

(Mr. 15:1; Lc. 23:1-2; Jn. 18:28-32)

<sup>1</sup> Che bianij lo guedxliuj, guiraa reni najc rebixhojz ni rnibee näja rebengool xten rexpelj Israel bia'nreni diidx xho gunreni ju'treni Jesús. <sup>2</sup> Baliibrenini, guläärenini ro'c, huisa'nrenini loj Ponceo Pila't, ni najc gubernadoor.

*Xho gujt Judas*

<sup>3</sup> Dxejcti Judas, ni bato' Jesús, che bahuiini bacuaquijreni Jesús, basiejch lajzni, guchuin lajzni, dxejc huidzu'ni galbitzoo meel pla't loj rebixhojz ni rnibee näja loj rebengool.

<sup>4</sup> Räjpni:

—Banitduxhä lo Dios sa'csi bato'ä te bejn ni xhet bejndi.

Dxejc räjpreni lojni:

—Xhixh gunnu. Ni'c najc xcuentlu; lujti najn.

<sup>5</sup> Dxejc bacuaa Judas meelga lo yuj neñ guidoro, biritiini ro'c. Sas huijni, baliibni te duu guejn, gojlni lo te yajg, ro'cti gujtni.

<sup>6</sup> Rebixhojz ni rnibee batojpreni meelga, räjpreni:

—Di gac di guizälnu meelre neñ caj gojn sa'csi najcni xcuent xtiejn te bejn.

<sup>7</sup> Dxejc bia'nreni diidx con meelga siireni te la' yuj xten te dade' ni runchee guejs te ro'c gucua'tzreni rebenzijt. <sup>8</sup> Ni'cni najli rniireni yujga: “Yurejn”. <sup>9</sup> Si'c gusojb diidx ni gunii Jeremias, dade' ni gunii xtidx Dios galoo che räjpni: “Cua'reni galbitzoo melplat'ga si'cti basoob rexi'n Israel sajc bejnga. <sup>10</sup> Con meelga guziireni yuj lo bejn ni runchee guejs, sigacni gunibee xtdadnu Dios.”

*Gusuj Jesús nez loj Pila't*

(Mr. 15:2-5; Lc. 23:3-5; Jn. 18:33-38)

<sup>11</sup> Bidzupnäjreni Jesús loj Pila't ni najc gubernadoor. Dxejc gunabdiidxni, räjpni lo Jesús:

—¿La luj najc reii xten rexpelj Israel, ä?

Räjp Jesús lojni:

—Najcni si'cni najlu.

<sup>12</sup> Laḷni cabe'c rebixhojz ni rnibee näja rebengool rexquej Jesús xhetliidi guniidi Jesús. <sup>13</sup> Dxejc räjp Pila't lojni:

—¿La di diajglu jiejn guiraa rediidx ni caniireni cagucuaquijreni luj, ä?

<sup>14</sup> Per xhetliidi diidxdi basejc Jesús, nicla xcuent tejsi diidx ni bacuaquijrenini. Ni'cni bidxeloduxh gubernadoorga.

*Gunibeereni guet Jesús**(Mr. 15:6-20; Lc. 23:13-25; Jn. 18:38-19:16)*

<sup>15</sup> Nen redxe lanij rajpreni costumbr ruslaa Pila't tej bejn ni cue rebejn loj reni yu' nen latzguuib. <sup>16</sup> Nen redxejga guyu' te bejn ni sääb xtiidxni ni laa Barrabás. <sup>17</sup> Cheni tre' guiraareni ro'c, gunabdiidx Pila't lojreni:

—¿Chuni'c rlanjtu guslaä, la suslaä Barrabás o Jesús ni laa Crist?

<sup>18</sup> Sa'csi najn Pila't rdxe'chlajzreni lo Jesús, ni'c bateedrenini lojni.

<sup>19</sup> Lañ ni sobga' Pila't lo yajgxhiil cadro rujnni yälguxhtis, baxhañ chäälni diidx lojni, räjpni: —Xhet gundilu dade'ga ni xhet bejndi, sa'csi nuchej nadxuudx gunixcalä xcuentni.

<sup>20</sup> Niluxh rebixhojz ni rnibee näjza rebengool baquuilreni rebejn te gunabreni laa Barrabás, näjza te guet Jesús. <sup>21</sup> Dxejcti gunii gubernadoor stehuält, räjpni lojreni:

—¿Chu tej loj guiro'preni rlanjtu guslaä?

Dxejc guredxa'reni, räjpreni:

—¡Barrabás!

<sup>22</sup> Gunabdiidx Pila't, räjpni:

—¿Xhi gunnä Jesús ni laaza Crist?

Guiraareni guredxa':

—Bacuaani lo crujz.

<sup>23</sup> Dxejc räjp Pila't lojreni:

—¿Xhi latsiaj bejnni?

Niluxh laareni guredxa'rureni, räjpreni:

—¡Bacuaani lo crujz!

<sup>24</sup> Che bahuii Pila't xlia'si caniini, alga gusloj rebejn cayujn te bieiduxh, cua'ni nis, gudiibni ñaani nez lojreni, räjpni:

—Dina xcaquiä xtiejn bejnre ni xhet bejndi. La'tu colhuii xho guntu. Xcuenttitu najcni.

<sup>25</sup> Dxejc guiraa rebejnnga badzu' diidxre, räjpreni:

—Suxcaquiinu xtiejnni, nuurnu näjza rexi'nnu.

<sup>26</sup> Dxejc baslaa Pila't Barrabás, dxejc gunibeeni gudijnreni Jesús dxejc bateednini ladznäa rebejn te gucuaarenini lo crujz.

<sup>27</sup> Dxejc huinä resoldaad xten gubernadoor Jesús lo pretoor, yu' cadro rujnreni yälguxhtis, ro'c batojpreni guiraa resa'reni. <sup>28</sup> Dxejc gulääreni xhajnbi, bashuajcwrenini te lad xniaa. <sup>29</sup> Dxejc bencheereni te coron guejch, basäl'renini yejcní, basäl'reni te yabixijl ñaani, xladbeeni, sas bazuxhijbreni nez lojni guslogajc caguxhisnäjrenini, räjpreni:

—¡Collä'p xpala'n reii xten rexpejn Israel!

<sup>30</sup> Sas batiobxhejnreni lojni, cua'reni yabixijlga te ni'c batiäjljreni yejcní. <sup>31</sup> Che gulujx baxhiznäjrenini, gulääreni lad xniaa ni najcwni. Dxejc bashuacwsacrenini lagajc xhajnbi, sanätireneni te xcajni lo crujz.

*Bacuaareni Jesús lo crujz**(Mr. 15:21-32; Lc. 23:26-43; Jn. 19:17-27)*

<sup>32</sup> Cheni sariireni, bidxaagreni te bejn ni siääd guedx Cirene, laani Simón, basguureni dade'ga xcrujz Jesús.

<sup>33</sup> Che bidzujnreni te lajt ni laa Gólgota, nani säloj: dan Calabeer, <sup>34</sup> ro'c badeedreni bin nu'ch cuanlaa te gu' Jesús. Te bochäztisni gu'ni, dxejc naaddiruni niä'nini.

<sup>35</sup> Cheni abacuaareni Jesús lo crujz, gudzujt resoldaad yejc xhajnbi, te si'c gudisreni xhajn Jesús cua'reni, te si'c guzojz diidx xten te dade' ni gunii xtidx Dios. <sup>36</sup> Gurejtireni ro'c, gusloj canäjreni Jesús. <sup>37</sup> Yejc crujzga bacuaareni te guijt con lettro. Lo guijtza rcaj xhini'c najc xtojñ nani cayejt. Lo guijtza caj: “Dee najc Jesús reii xten rexpejn Israel.”

<sup>38</sup> Näjza tio'p gubaan cuaj lo stio'p crujz con laani. Tejni cuaj lo te crujz xladbee Jesús, steeni cuaj xladbäjgwni. <sup>39</sup> Luxh renani sadejd nejzga guniyajreni Jesús, cagusniibreni yejcní, <sup>40</sup> cayäjpreni lojni:

—¡Ja'ä! Luj ni nutiexhlu guidoo, luxh choñtis dxej niunchesacluni; palga gulií najclu Xi'n Dios, biäjt loj crujzga.

<sup>41</sup> Näjza rebixhojz ni rnibee, näj remastr xten leii, baxhiznäjrenini räjpreni loj sa'reni:

<sup>42</sup> —Baslaani xhidajñ bejn, xhoxh di gacdi guslaani lagajc laani. Palga najcni reii xten rexpejn Israel, sujiäjtni lo crujz nañaj te chalilajznu xtiidxni. <sup>43</sup> Huinäljzni Dios, ñaj suguslaa Diosni palga sanälajz Diosni; ni najni: “Narä nacä Xi'n Dios.”

<sup>44</sup> Regubaan ni caj lo recrujz sigajcza guniyajreni Jesús.

*Che gujt Jesús**(Mr. 15:33-41; Lc. 23:44-49; Jn. 19:28-30)*

<sup>45</sup> Dxejcti bicäjy guideb guedxliuj läidxej hasta rcachon gudxej. <sup>46</sup> Si'cti rcachon gudxej guredxa' Jesús dipduxh, räjpni:

—Elí, Elí, ¿lama sabacatani? —dee säloj: Xtiozä, Xtiozä, ¿xhicuent gulälazlu narä?

<sup>47</sup> Yu' reni suga' ro'c, che beijn diajgreni räjpni si'c, räjpreni:

—Cabejdx Dade're Elías.

<sup>48</sup> Baxungajc tejreni, huica'ni te sponj, bahuajdxnini loj binagr, bacuaanini yejc te biquii te badzugni binargra ro' Jesús. <sup>49</sup> Dxejc reni tre' ro'c räjp:

—Basaan; guidon la siäd Elías te guslaanini.

<sup>50</sup> Dxejc guredxaduxh Jesús stehuält, baslaatini xpritni. <sup>51</sup> Lagajc orga biräsya' ladro ni zääb nen guidoro, gujcní tio'p la' jiaali hasta lo yuj. Gujc te xuro, sas gusuj bej reguiro.

<sup>52</sup> Dxejc gubicaj reguij ni niäuu ro' rebaa, luxh gubansac xhidajl xpejn Dios ni gujt aguc xchej. <sup>53</sup> Dxejcti, che huäjs Jesús lo rebengut, biriireni nen baa, baluilojreni lo xhidajl bejn ni rbäjz guedx Jerusalén.

<sup>54</sup> Dxejc capitán xten resoldaad näjza resoldaad ni canäj Jesús, che bahuiireni xuduxh näjza guiraa recos ni gujc ro'c, bidxejbreni, räjpreni:

—Guliipacni najc dade're Xi'n Dios.

<sup>55</sup> Zijtru tre' xhidajl regunaa ni biädñajl Jesús che biriini nez Galilee te bahuiireneni. Cadxelojtisreni guiraa ni cayajc ro'c. <sup>56</sup> Tej regunaaga najc Marii Magdalen, steeni najc Marii xnan Jacob näjza José, steeni najc xnan rexi'n Zebedeo.

### *Huicua'tzreni Jesús*

(Mr. 15:42-47; Lc. 23:50-56; Jn. 19:38-42)

<sup>57</sup> Che gojl gudxej, bidzujñ te benrajp ni siäd guedx Arimatea; laani José. Näjza dade'ga najc tej reni birinajl Jesús. <sup>58</sup> Huij dade'ga loj Pila't, gunabni tiejxh Jesús. Dxejc gunibee Pila't gudeedreneni lojni. <sup>59</sup> Cua'ti José tiejxh Jesús, batejbnini nen te bariadya, <sup>60</sup> huitixhnini nen xpaapacni. Nacoob baaga, gojnñi bidäänni cuä' te guilaj. Dxejc basääni ro' baaga con guiro, dxejcti siini. <sup>61</sup> Sobga'za Marii Magdalen näjza stee Marii nez loj baa, bahuiireni biga'tzni.

### *Xhi räjp resoldaad ni cuanäj xpaä Jesús*

<sup>62</sup> Che gudejd dxej xten ni gulec-cheereni lanij, bara yääl bidojpx rebixhojz ni rnibee näjza rebejn ni laa refarisee, bidzujñreni loj Pila't, <sup>63</sup> räjpreni lojni:

—Dad, banaj laaznu xhi räjp bejn ni rusgueere. Räjpni: “Che ted choñ dxej sibansacni loj rebengut.” <sup>64</sup> Ni'c baxhal chu chacanäj ro' baaga dxejli guisa' choñ dxej, te di chää rexpejñpacni chalääreneni tiejxhni, dxejc gäbreni loj rebejn: “Agubansacni loj rebengut.” Yälrusgueega sajc cuentroru loj ni gujc ganid.

<sup>65</sup> Räjp Pila't lojreni:

—La'tu rajptu te cuaa soldaad; colchäj, basäutzu'tz ro' baaga si'ctis ni sajc guntu.

<sup>66</sup> Dxejcti sääreni, basäutzu'tzreni ro' baaga; con resoldaad bacuaareni te seii lojni te rut falđini. Dxejc basa'nreni resoldaad canäj ro'c.

## 28

### *Sibansac Jesús loj rebengut*

(Mr. 16:1-8; Lc. 24:1-12; Jn. 20:1-10)

<sup>1</sup> Che gudejd sabd, dxej ni ruzilajz rexpejn Israel, che gusloj cayänij lo guedxliuj te jiu' stee xmaan, bidzujñ Marii Magdalen näjza stee Mariiga, siädhuiireni lo baa. <sup>2</sup> Luxh alagujc te xuro ni basniib lo yuj, sa'csi biäd te angl xten Dios xhaguibaali te badzucajni guij ni niäuu ro' baaga, dxejc gurejni yejc guijga. <sup>3</sup> Rdimbichaduxhni si'c najc che rdinya', luxh xhajbni najc nolbäj si'c najc yejg ni riabj. <sup>4</sup> Che bahuii resoldaadni, bichebduxhreni, sädiidxreni, gujcreni si'c bengut. <sup>5</sup> Dxejc räjp guixhajg xte Diosga loj regunaa:

—Na'c guidxejbtu. Ananä caguilltu Jesús ni cuaj lo cruzj. <sup>6</sup> Rutini ree sa'csi agubansacni sigajc ni najni. Coltahuii cadro gojtñi. <sup>7</sup> Colguxun, colchaye'tz loj rexpejñpacni agubansacni loj rebengut. Luxh naj agunijdñi lojtu sääni región xten Galilee. Ro'c suhuiitu lojni. Dee najc diidx ni rniä lojtu.

<sup>8</sup> Dxejcti rusquenduxh regunaaga, biriireni ro' baaga. Cadxejbreni, cabalazduxhzareni sanäreni diidx loj rexpejñpac Jesús. <sup>9</sup> Chela bidxaagreni Jesús lo nejz, räjpni: “Xchan”, lojreni. Sas gubigreni loj Jesús, bazuxhijbreni, gudaäzreni guenni'ni, gojñrenini. <sup>10</sup> Dxejc räjpni lojreni:

—Na'c guidxejbtu. Colchanä diidx loj rexpenä, chääreni región Galilee, sa'csi ro'c suhuiireni loä.

### *Rediidx ni räjp resoldaad*

<sup>11</sup> Lañi sää regunaaga, bidzujñ gaii soldaad ni huicanäj ro' baa lo guejdxga, huisa'nreni diidx lo rebixhojz ni rnibee xcuent guiraa ni guzajc ro' baaga. <sup>12</sup> Dxejc rebixhojz ni rnibee



bachagsa'zareni con rebengool te bia'nreni diidx gudeedreni xhiroob meel lo resoldaad, <sup>13</sup>räjpreni lojreni:

—Scree colye'tz lo rebejn: “La<sub>l</sub> ni nagayesnu, canäjnu ro' baa, biääd rexpejn<sub>pac</sub> Jesús guläxhiga'tzreni tiejxhni.” <sup>14</sup>Palga jientiajg gubernadoor dee, siohuiinuni te di yu' xhi gunni la'tu.

<sup>15</sup>Dxejcti cua' resoldaad meel, bejnreni si'cni räjp rebixhojz. Luxh si'c bire'ch diidx loj guiraa rexpejn Israel. Najli canisijcreni si'c.

*Baxha<sub>l</sub> Jesús rexpejn<sub>pac</sub>ni*

*(Mr. 16:14-18; Lc. 24:36-49; Jn. 20:19-23)*

<sup>16</sup>Dxejcti sää retzubiteeb xpejn<sub>pac</sub> Jesús lo región Galilee, lo dajn cadro bia'n Jesús diidx guidxaagnireni. <sup>17</sup>Cheni bahuiireni loj Jesús, bazuxhijbreni, gojnrenini, per yu' reni ractio'p lajzreni. <sup>18</sup>Dxejc gubig Jesús lojreni, guninäjnireni, räjpni:

—Arapä guiraa yä<sub>l</sub>rnibee xhaguibaa näjza lo guedxliuj. <sup>19</sup>Ni'cni, colchäj, guideb guedxliuj colchagajn bejn gac xpenä, colgutiobnisreni, con laj Gueb Dios, näj laj Xi'n Dios näjza laj Sprit D<sub>xan</sub> xten Dios. <sup>20</sup>Colguluiireni gusoobreni guiraa rediidx ni guinibeä. Luxh lagajc narä suganää la'tu guiraa redxej, dxejli che nitloj guedxliuj. Sugacni si'c.

## Diidx Xcuent Jesucrist Nani Bacuaa San Marcw

*Baluu Juan ni rutiobnis*

(Mt. 3:1-12; Lc. 3:1-9, 15-17; Jn. 1:19-28)

<sup>1</sup> Scree gusloj diidx xcuent Jesucrist, Xi'n Dios. <sup>2</sup> Si'cni bacuaa toIsaías, ni gunii xtidx Dios, che räjp Dios:

Bahuü gan, guxhaĵä ni chanä xtidxä, ganidni chääni lojlu te guzucheeni xnezyujlu.

<sup>3</sup> Riejn xse' ni rbedxa' nez loj reyubijdz:

“Colyunsac xnezyuj Dad, colslü rexnezyulajzni.”

<sup>4</sup> Biricaj Juan ni rutiobnis nez loj reyubijdzga. Rägajcni nanabpc gusiechljazreni, tiobnisgajczeni, te jia xtojreni. <sup>5</sup> Riädcuadiajg xhidajl reni rbäjz Judea, näjza reni rbäjz guedx Jerusalén. Dxejcti cheni ruhxobdojreni lo Dios, rustiobnis Juanreni neñ gueu Jordán.

<sup>6</sup> Xhajb Juan nacchee con guichlajd cameii, xsindoorni nacchee con guiid, niluxh gudajwni guxha't näjza dzunbäserguijxh. <sup>7</sup> Caguluüni rebejn, rägajcni:

—Detzä siääd tej nani sajrcu loä, nani nicla di nungäjĵ surloä, cuää xcura'chni. <sup>8</sup> Narä abatiobnisä la'tu con nis, biädla laani guxhaĵni Sprit Dxiän xten Dios te cuääzni neñ lastootu. Si'c gustiobnis nani jääd detzä la'tu.

*Batiobnis Juan Jesús*

(Mt. 3:13-17; Lc. 3:21-22)

<sup>9</sup> Dxejc, neñ redxejga, birii Jesús guedx Nasare't ni yu' Galilee. Dxejrcu batiobnis Juan Jesús neñ gueu Jordán. <sup>10</sup> Che birii Jesús neñ nis, bahuüni bixal guibaa. siädäjĵ Sprit Dxiän xten Dios yejcti si'c te palom. <sup>11</sup> Dxejcti guibaali biejn xse' te ni räjp:

—Luj najclu xi'nä ni sanälazä; rbanälazduxhälu.

*Bateed bendxab prueb Jesús*

(Mt. 4:1-11; Lc. 4:1-13)

<sup>12</sup> Sas baxhaĵ Sprit Dxiän xten Dios Jesús lo reyubijdz. <sup>13</sup> Dxejc guyu' Jesús ro'c tiuu dxej, guyu'ni cadro yu' reman. Sas gudiil bendxab nani rnibee, nani laa Satanás, xho niujjni te nusoo Jesús xtiidxni. Dxejrcu biäd reangl xten Dios, biädhuiireni.

*Gusloj Jesús xtzuumni*

(Mt. 4:12-17; Lc. 4:14-15)

<sup>14</sup> Basälreni Juan neñ latzguiib. Dxejcti huij Jesús nez Galilee, huiluiini xtidx Dios. <sup>15</sup> Dxejc räjp Jesús:

—Abidzujn dxej, luxh yälrnibee xten Dios abidzujn gajxh. Colsiejch lajztu, colchalilaj xtidx Dios.

*Gurejdx Jesús tajp bejn ni rniaaz bäjĵ*

(Mt. 4:18-22; Lc. 5:1-11)

<sup>16</sup> Sasajti Jesús nez ro' nis xten Galilee, che bahuüni lo Simón näjza loj Andrés bejtz Simón. Cazälreni xquijxhreni lo nis, sa'csi rniaazreni bäjĵ. <sup>17</sup> Dxejc räjp Jesús lojreni:

—Coltanajl narä, te gunä cueedxtu bejn lacuaa ni guiniaaztu bäjĵ.

<sup>18</sup> Lagajc dxejc basa'nreni rexquijxhreni, sanätireni.

<sup>19</sup> Dxejc gusaj Jesús sche'n, sas bahuüni loj Jacob näj Juan, rexi'n Zebedeo. Cayunsa'ceni xquijxhreni neñ xcanuureni. <sup>20</sup> Guredxgajcni guiro'preni, dxejcti laareni basa'nreni xtadreni Zebedeo neñ canuu, näjza rexmosni, sanätireni Jesús.

*Te bejn nani guyu' bendxab neñ lastooni*

(Lc. 4:31-37)

<sup>21</sup> Bidzujntireni guedx Capernaum. Dxejrcu sabd, dxej ni rusilajz rexpen Israel, biu' Jesús neñ guidobäz xten rexpen Israel. Dxejcti baluu Jesús rebejn ni tre' ro'c. <sup>22</sup> Bidxelojni rebejn xtiidxni, sa'csi caguluüinireni si'cpac te ni rnibee, xhet si'cdi remastr xten leiidi. <sup>23</sup> Neñ xquidobäzreni yu' te bejn yu' te bendxab neñ lastooni. Bendxabga guredxa', räjpni:

<sup>24</sup> —Jesús, ni siääd Nazare't, çhicient riu'lu loonu? ¿La siädgunitloju nuunu? Narä numbeälu, luxh nanä luj najclu bendxan ni siääd lo Dios.

<sup>25</sup> Dxejcti gudidxa' Jesús lo bendxabga, räjpni lojni:

—Basäuu ro'lu, birii neñ lastoo niguiire.

<sup>26</sup> Sas bendxabga batienguij niguiiga, luxh cabedxa'ni biriini neñ lastoo niguiiga. <sup>27</sup> Bidxejbtü guiraareni, canabdiidx loj sa'reni:

—¿Xhi dee? ¿Xhi dzuun nacoobre ruluini? Niguiire nrubeeni naj rebeñdxab, luxh ruzoobreni xtiidxni.

<sup>28</sup> Di niaclaa gucbee rebejn guideb nez Galilee xhi rujn Jesús.

*Basiajc Jesús xnan suegr Pedr*  
(Mt. 8:14-15; Lc. 4:38-39)

<sup>29</sup> Che biriireni xquidobáz rexpejn Israel, huinā Jesús Jacoob naj Juan rolizj Simón najza Andrés. <sup>30</sup> Luxh xnan suegr Simón naga', yu'ni xliaa. Dxejc rājpreni lo Jesús:  
—Cayacxhuuni.

<sup>31</sup> Dxejcti gubig Jesús lojni, gunaazni ñaani, gulāsnini; lagajc dxejc biriini xliaa. Dxejc gusloj cayunireni.

*Xhidajl benracxhuu basiajc Jesús che huāáz gubijdx*  
(Mt. 8:16-17; Lc. 4:40-41)

<sup>32</sup> Che huāáz gubijdx, luxh abiu' guxhijn, biādnāreni guiraa rebenracxhuu loj Jesús, najza renani yu' beñdxab neñ lastooni. <sup>33</sup> Luxh guideb guejdxga bidojp ro' yu'ga. <sup>34</sup> Basiajc Jesús xhidajl renani rajc garen-garen yālguijdx. Niluxh gulāāzani xhidajl beñdxab, niluxh dini nusaan nani rebeñdxabga, sa'csi najnreni chu najcni.

*Baluu Jesús nez Galilee*  
(Lc. 4:42-44)

<sup>35</sup> Che bara yāäl, cājyru bistie Jesús, biriini sāāni te laad cadro ruti bejn. Ro'c cabejdx-canabni loj Dios. <sup>36</sup> Dxejcti Simón naj resa'ni huitiilreni Jesús. <sup>37</sup> Che bidxālenini, rājpreni lojni:

—Guiraa rebejn caguillu.

<sup>38</sup> Dxejc rājp Jesús lojreni:

—Cołcho' reguejdx ni yu' gajxh, te gusuleā xtidx Dios ro'c. Par ni'cpac biālä.

<sup>39</sup> Dxejcro cuansaj Jesús guideb nez Galilee, caguluini xtidx Dios neñ reguidobáz xten rexpejn Israel. Gunibeezani birii rebeñdxab neñ lastoo xhidajl rebejn.

*Basiajc Jesús te bejn ni ral tiejxhni*  
(Mt. 8:1-4; Lc. 5:12-16)

<sup>40</sup> Gubig te benracxhuu ni ral tiejxhni loj Jesús, bazuxhijbni. Dxejcti rājpni lojni:

—Narā nanā sajc gusajclu narā palga rļajzlu.

<sup>41</sup> Balaslajz Jesús benracxhuuga, gunaazni ñaani, rāpgajcni:

—Rlazā jiajclu. Biajc ñaj.

<sup>42</sup> Cheni guniini scree, biacgajc benracxhuuga. <sup>43</sup> Dxejcti gulunejz Jesús bejnğa. Per rāpxgaani lojni:

<sup>44</sup> —Ahuire, rutlojdi guiniilu dee. Huilui tiejxhlu lo bixhojz. Badedgajc lo Dios nani rājp toMoisés gudeed bejn lo Dios si'c te seen, te gacbee rebejn abiajclu.

<sup>45</sup> Dxejc sāā bejnğa. Sas gusloj cayujyni diidx lo rebejn xcuent guiraa nani gujcn. Ni'cni diru niajcdi niu' Jesús nicla te j guejdx. Cansajni te laad cadro ruti bejn. Niluxh guiranejz ri rebejn, siādhuiireni Jesús.

## 2

*Basiajc Jesús te bejn ni di guniib*  
(Mt. 9:1-8; Lc. 5:17-26)

<sup>1</sup> Che agudejd balti dxej, biusac Jesús neñ guedx Capernaum. Dxejcti biejn diajg rebejn arbājzni. <sup>2</sup> Bidopgajc xhidalduxh bejn. Gudxaj neñ yu'. Nicla rolā' di niajñ nisiujreni. Dxejcti caguluini Jesús xtidx Dios lo rebejn. <sup>3</sup> Dxejcti bidzujñ tajp bejn, nuureni te bejn ni digacti guniib; siādnārenini lo Jesús. <sup>4</sup> Luxh di niajcdi nidzujñreni cadro suga' Jesús, sa'csi yu' xhidajl bejn ro'c. Ni'c baxhalreni yejc yu' nejz cadro sujni. Dxejcro cadro baxhalreni basiājtreni da' ni naga' benracxhuuga lojni. <sup>5</sup> Che bahuii Jesús rililajzreni, dxejc rājpni loj benracxhuuga:

—Xi'nā, agubica j rextojllu.

<sup>6</sup> Sas gaii bejn ni ruluini leii ni sobga' ro'c bejnreni xhigab neñ lastooreni, naareni: <sup>7</sup> “¿Xhicuent rñii niguiire scree? Caniyajni Dios; rut rajcdi rudzucaj dojl. ¡Dioſtis rajc rudzucaj dojl!” <sup>8</sup> Dxejcti gucbegajc Jesús xhi xhigab cayujñreni. Dxejc rājpni lojreni:

—¿Xhicuent rujntu xhigab si'c neñ lastootu? <sup>9</sup> ¿La guyasiru gābni loj benracxhuure: “Agubica j rextojllu”, o la gābni: “Huistie, cua' xta'lu, gusaj?” <sup>10</sup> Baj naj, te gantu rajc rudzucaj Xi'n Dios, nani gujc Niguii, dojl lo guedxliujre, caniā loj benracxhuure:

<sup>11</sup> —Lojlu rñiā, ¡Huistie, cua' xta'lu, huij rolizlu!

<sup>12</sup> Lagajc dxejc huistie benracxhuuga, gulāzni xta'ni, biriini ro'c nez loj guiraareni. Ni'cni bidxelo guiraareni. Dxejc gulā'preni xpala'n Dios, rājpreni:

—Gajdpacnu guihuii sa' dzuunre.

*Gurejdx Jesús Leví*  
(Mt. 9:9-13; Lc. 5:27-32)

<sup>13</sup> Dxejcru gubisac Jesús ro' nis xten Galilee, luxh che bidojpx guiraa rebejn lojni, baluiini xtidx Dios lojreni. <sup>14</sup> Sasaj Jesús che bidxaagni Leví, xi'n Alfeo. Sobga'ni cadro rusquijxni rebejn. Dxejc räjp Jesús lojni:

—Gudanajl narä.

Sas huisuni, sanajltini Jesús.

<sup>15</sup> Dxejc sobga' Jesús cayajwni rölijz Leví. Luxh sobganäj Jesús xhidajl reni rusquijx, näjza rebendojl ni di chasanäj leii, näjza rexpejn pacni, lo mex. Xhidajlreni tre', luxh sanajlreni Jesús. <sup>16</sup> Dxejcru rebejn ni ruluii leii näj referisee, che bahuiireni cayaunäjni renani rusquijx näjza rebendojl, räjpreni loj rexpejn pac Jesús:

—¿Xhicuent rbenäj xmastrtu reni rusquijx näj rebendojl, luxh raunäjnireni, ränäjnireni?

<sup>17</sup> Che biejn diaj Jesús xhi caniireni, räjpni lojreni:

—Renani nadip nadaan di guiquiin doctor, per reni racxhuu rquiin doctor. Dina niädtedxä rebeñsa'c, biädtedxä rebendojl, te gusiech lajzreni.

*Gunabdiidxreni loj Jesús xcuent yälrucua'n*  
(Mt. 9:14-17; Lc. 5:33-39)

<sup>18</sup> Cagucua'n rexpejn Juan näj rexpejn referisee, renani najc rebenguidoo loj guedx Israel. Dxejc biäd gaii bejn loj Jesús, gunabdiidxreni lojni räjpreni:

—¿Xhicuent cagucua'n rexpejn Juan näj rexpejn referisee luxh rexpejn pacu di gucua'n?

<sup>19</sup> Dxejcti räjp Jesús lojreni:

—¿La rucua'n rebejn ni rdon chää cadro ru' yälruchnaa che meer suga' bi'n? Che meer suga' bi'n lojreni, direni gucua'n. <sup>20</sup> Per sidzujn dxej sibicaj bi'n lojreni, dxejc sii sucua'nreni.

<sup>21</sup> Rut rucuaadi tla' ladcoob loj tla' ladyux, sa'csi ladcoob rxu'nni luxh rutiäjzni ladyuxga, dxejc xhiroobruni räjs. <sup>22</sup> Rutza rusäldi bin ni gajd guilaj neñ guidyux ni abigaa. Sa'csi bin ni gajd guilajga sutiäjzni guijdga che guilajni, luxh sinijt binga näjza guijdga. Ni'cni nanab gusälni bincoob nen guidcoobza.

*Batojpx rebejn ni rinajl Jesús triuu sabd*  
(Mt. 12:1-8; Lc. 6:1-5)

<sup>23</sup> Te sabd, dxej ni rusilajz rexpejn Israel, sasaj Jesús nez loj reyuya'n. Sas gusloj rexpejn pacni caläädx doj lo triuu. <sup>24</sup> Dxejc räjp referisee, renani najc rebenguidoo loj guedx Israel, loj Jesús:

—Arniä, ¿xhicuent rujn rexpejn pacu dzuun ni di guchaag gunni neñ dxej ni rusilajznu, ä?

<sup>25</sup> Dxejcti räjp Jesús lojreni:

—¿La gajdtu goj nani bejn toDavid te huält, laani näj resa'ni, ä? Che biädäx xhi gauureni, gulaanreni. <sup>26</sup> Biu' David neñ xyu' Dios cheni guyu' toAbiatar loj Dios. Abiatar sajcru loj rebixhojz ni guyu' neñ xquidoo rexpejn Israel. Dxejc gudajw toDavid reyätxtiil ni dzuub ro'c. Badeedzanini gudajw rebejn ni yunäjni. Luxh rebixhojzti rajc rajw yätxtiilga.

<sup>27</sup> Räjpza Jesús lojreni:

—Dios bejn dxe sabd sa'csi najnni naquuinpac gusilajz bejn. Dini niujn sabd te gapda bejn. <sup>28</sup> Ni'cni narä, Xi'n Dios ni gujc Niguii, näjza sabd rnibeä.

### 3

*Niguii ni nabijdz te naani*  
(Mt. 12:9-14; Lc. 6:6-11)

<sup>1</sup> Biu' Jesús stehuält neñ xquidobäz rexpejn Israel. Ro'c yu' te niguii nani nabijdz te naani. <sup>2</sup> Niluxh ro'c cagula'tz rebejn Jesús don la susiajzni niguiiga sabd, dxej ni rusilajz rexpejn Israel, sa'csi rlaizreni cue'creni xquejni loj nani rnibee rexpejn Israel. <sup>3</sup> Dxejc räjp Jesús lo niguii nani nabijdz naani:

—Huistie, guzuj galäiire.

<sup>4</sup> Dxejcti gunabdiidxgajcni loj gaii rebejn ga, räjpni:

—¿La laaca gunni dzunza'c, o la dzunguidx, sabd, ä? ¿La suslaani yäl nabajn, o la sugu'tni? Luxh laareni biacdxireni. <sup>5</sup> Dxejc nadxe'ch bahuii Jesús lojreni, luxh guc-huin lajzni, sa'csi guc najd lajzreni. Dxejc räjp Jesús loj niguiiga:

—Baslii naalu.

Dxejcti basliini naani. Biajctini. <sup>6</sup> Dxejcru biunejz referisee. Guslogajczeni caguchaa- reni diidx con reni nadxaag Herodes, te don xho ju'treni Jesús.

*Xhidajl bejn bire' ro' nis*

<sup>7</sup> Jesús nájza rexpejn pacni sääreni ro' nis, luxh xhidajl bejn Galilee birinajlni. <sup>8</sup> Che gojnreni redzunro ni rujn Jesús, xhidajlreni biäd. Yu'reni birii Judea, yu'reni birii guedx Jerusalén, yu'reni birii Idumea, yu'zareni birii nejz stelaad gueu Jordán, biriizareni nez guedx Tiro, náj nez guedx Sidón, biädhuireni loj Jesús. <sup>9</sup> Ni'cni räjp Jesús loj rexpejn pacni quuilreni te canuu, te na'c gutää rebejnxhidaalgani. <sup>10</sup> Abasiajc Jesús xhidajl bejn racxhuu, ni'cni guiraasi bejn racxhuu caxa't lojni, te cajnreni te jiajcreni. <sup>11</sup> Niluxh che rhuii rebejndxab lojni, ruzuxhijbreni lojni. Dxejcti rbedxa'reni räjpreni:

—Luj najclu Xi'n Dios.

<sup>12</sup> Dxejcti Jesús gudidxa' lojnreni te na'c niäjbreni chu najcni.

*Gule Jesús tzubitiop bejn loj reni rinajlni*

(Mt. 10:1-4; Lc. 6:12-16)

<sup>13</sup> Birii Jesús sääni lo te dajne' cadro gurejdxni renani rlaizni cueni. Gubigtireni lojni. <sup>14</sup> Dxejcti guleni tzubitiop'reni te sanäjreni laani, te guxhalnirenini chaluireni xtidx Dios; <sup>15</sup> te ga'preni yälrnibee te gusiajcreni bejn racxhuu, te cuääzarenini rebejndxab. <sup>16</sup> Retzubitio'p bejn ni gule Jesús najc: Simón, ni gulälajzani Pedr. <sup>17</sup> Dxejcti Jacob con Juan, rexi'n Zebedeo, gulälaj Jesús Boanerges. Con xtiidxnu sälojni bejn ni nasesya', si'c guzii. <sup>18</sup> Náj Andrés, Felipe, Bartolomé, Mateo, Tomás, Jacob xi'n Alfeo, Tadeo, Simón, ni di guidxejbn rnigajc, <sup>19</sup> náj Judas Iscariot, ni bato' Jesús loj reni rdxechlajz lojni. Sä'tireni rolijz te dade'.

*Yälrnijaj loj Sprit Dxan xte Dios*

(Mt. 12:22-32; Lc. 11:14-23; 12:10)

<sup>20</sup> Dxejc bidopsac rebejnxhidaalga; nicla niajc niaunäj Jesús rexpejn pacni. <sup>21</sup> Che biejn diajg resa' Jesús dee, biädxhiirenini, sa'csi naareni, yejcni cayajc.

<sup>22</sup> Rebejn ni ruluii leii ni birii guedx Jerusalén bidzujnza lo Jesús, dxejc räjpreni:

—Beelzebú, nani rnibee rebejndxab, yu' nejn lastoo niguiire. Niluxh nani rnibee rebejndxab ruedeed yälrnibee lo Jesús te cuääni bejndxab.

<sup>23</sup> Dxejc gurejdx Jesús rebejn ga, bijyni te cuent ni ruluii lojnreni, räjpni:

—¿Xho gurilaagw bejndxab lagajc sabendxabni? <sup>24</sup> Palga rebejn xten te yälrnibee la'reni, luxh tilnäj te cuani ste cuaaga, di yälrnibeega chu xchej. <sup>25</sup> Palga te famij rdilnäj lagajc sa'ni, di famijga chu xchej. <sup>26</sup> Palga bejndxab nani rnibee tilnäj lagajc laani, di xcälrnibeeni chu xchej, sa'csi ni'c gun luuxni.

<sup>27</sup> Rut gacdi jiu' rolijz te niguidaan, cuanni xhixhtenni, palga dini gulibxgaani, si'ctis sajc cuanni xhixhtenni.

<sup>28</sup> Rniläpac lojtu guiraa dojl nájza yälrnijaj xten rebejn sajc jia. <sup>29</sup> Nani guiniyaj Sprit Dxan xten Dios, digacdi guibicaj rextoljni, anuutisni xtojlni par tejpas.

<sup>30</sup> Räjpni si'c sa'csi caniireni yu' bejndxab nejn lastooni.

*Xnan con rebetzhuin Jesús*

(Mt. 12:46-50; Lc. 8:19-21)

<sup>31</sup> Dxejcru bidzujn xnan Jesús, náj rebetzhuinni. Direni niu', baxhaltrisreni chu huitejdxni.

<sup>32</sup> Rebejn ni sobga' gabi Jesús räjpreni lojni:

—Xnanlu náj rebejtzu suga' ro lä', caguiilreni luj.

<sup>33</sup> Dxejcti räjp Jesús lojnreni:

—¿Chu reni'c najc xnanä náj rebetzä?

<sup>34</sup> Bahuigajcni loj renani sobga' gabini, dxejc räjpni lojnreni:

—Redee najc xnanä, rebetzä. <sup>35</sup> Chutis ni rujn ni rlaiz Dios, ni'c najc betzä, bisianä, nájza xnanä.

## 4

*Xcuent niguii ni sale'c binij*

(Mt. 13:1-23; Lc. 8:4-15)

<sup>1</sup> Suga' Jesús ro' nis guslosac caguluiini xtidx Dios, luxh bidojp xhidajl bejn cadro suga'ni. Xhidalduxh najceni, ni'cni biu' Jesús nejn te canuu ni suga' ro' nisga. Dxejcti gurejni nengga, biäd guiraa bejn bia'tireni ro' nis. <sup>2</sup> Dxejc baluiniireni guiraloj, ganax cuent ni ruluii guniini. Che caguluiini, räjpni lojnreni:

<sup>3</sup> —Gucua diajgtu dee. Guyu' te niguii. Biriini sale'cni binij. <sup>4</sup> Che guslojni cabe'cni, yu' lajt biajb binijga cuä' nezyuj. Sas biäd reman xhaguibaa, gudajwreni binijga. <sup>5</sup> Stee lajt biajb binijga nejn guij cadro xheti xhidajl yuj. Binijga gulengajcni, sa'csi xheti xhidajl yuj ro'c. <sup>6</sup> Dxejc, sa'csi lo jiaa yu' xlobaani, che birii gubijdx, bigolni, gubijdzitini. <sup>7</sup> Stee lajt biajb binijga nejn yaguejch. Dxejcti biroob reyaguejchga, luxh bejnreni balaa loj binijga, ni'cni gujcn ganax bilii. <sup>8</sup> Per stee lajtga biajb binij lo yusa'c. Gulejn reyäjilga, guroobreni, gucsa'ceni. Yu'reni cuaj galbitzuu xob, yu'reni cuaj gayojn xob, yu'zareni cuaj tegayuu xob.

<sup>9</sup> Dxejc räjpni lojreni:

—Chutis ni rlaĵz guisieed, sucuadiaĵgni.

<sup>10</sup> Che asii xhidajl bejn, rebejn nani suga' gajxh cadro suganäj Jesús guitzubitio'p xpejnĵpacni gunabdiidx lo Jesús xhi säloj cuentre. <sup>11</sup> Dxejc räjp Jesús:

—Dios abejn gacbeetu te gantu xho najc yälxhiga'tz xten xcälrnibee Dios nani najc xhiga'tz najli. Niluxh lo ste'ca bejn con cuenttis rniä guiraa recosre, <sup>12</sup> te mase cahuiireni direni gumbee, te mase cayiejn diaĵgreni, direni gacbee. Scree gacni, te na'c gusiejch laĵzreni, te na'c guibicaj xtojreni.

<sup>13</sup> Räjpzani lojreni:

—¿La ditu gacbee cuentre? ¿Xhocha gacbeetu xhidajlru cuent? <sup>14</sup> Niguiire nani sale'c binij najc si'c te nani ruluui xtidx Dios. <sup>15</sup> Yu' bejn ni najc si'c binij ni biajb cuä' nezyuj: riejn diaĵgreni xtidx Dios nani ruluui bejn. Dxejc che jiejn diaĵgreni xtidx Dios, riäd Satanäs rbägajcni xtidx Dios ni yu' neĵ lastooreni. <sup>16</sup> Yu'za rebejn ni najc si'c binij ni biajb neĵ reguij, renani che jiejn diaĵgreni xtidx Dios, rbaa laĵzreni rca'reni diidxga. <sup>17</sup> Niluxh direni nisiudzu'tz, sa'csi guxii hulii laĵzreni. Che rdejdreri trabajw o che rusacsi bejnreni xcuent xtidx Dios, rusaanreni xtidx Dios. <sup>18</sup> Yu'zarenı najc si'c binij ni biajb neĵ yaguejch, riejn diaĵgreni xtidx Dios, <sup>19</sup> dxejc che ru'rureni yärsia' xcuent recos guedxliujre, rsia' laĵzreni ga'preni meel, rlaĵzreni ga'prureni guiraloj recos, dxejc riu' redee neĵ lastooreni, rusäuuni lo xtidx Dios, xlia'si biejn diaĵgreni xtidx Dios. <sup>20</sup> Yu'za bejn ni riejn diaĵgreni xtidx Dios, rlii laĵzreni diidxga, xhet xlia'ti biejn diaĵgreni xtidx Dios. Najczeni si'c binij ni biajb loj yusa'c. Yu' rebejn ni najc si'c nani cuaj galbitzuu xob lojni, yu'za rebejn ni najc si'c nani cuaj gayojn xob lojni, yu'za rebejn ni najc si'c nani cuaj tegayuu xob lojni.

*Xhet yuchetzu'tzdi ni di guidzujn dxej sisäbdiidx  
(Lc. 8:16-18)*

<sup>21</sup> Räjpza Jesús lojreni:

—¿La riädnätu te bajl te suuni dejtz te alm, o neĵ te loon, ä? ¿La xhet nanabdi suuni jiaa te guzanijni, ä? <sup>22</sup> Xhet yuchetzu'tzdi ni di guidzujn dxej sisäbdiidx. Xhetiza xhicos nagatztis. Naga'tzni naj, niluxh sidzujn dxej sule'ni. <sup>23</sup> Pal yu' chu rlaĵz guisieed, sucuadiaĵgni.

<sup>24</sup> Räjpza Jesús lojreni:

—Colyxngaa xhigab rediıdix ni riejn diaĵgtu. Nani rusältu loj xhigabtu, ni'cza guniıdix Dios xca'tu, luxh sisiojbrı yejc ni xca'tu. <sup>25</sup> Renani rajp che'n yäl'najn, lojreni sudeedru Dios yäl'najn. Luxh renani xhetru rusälđi loj xhigabreni, sudzucaj Dios yäl'najn nani rajpreni.

*Xcuent binij ni roob*

<sup>26</sup> Guniıza Jesús lojreni:

—Yälrnibee xten Dios najc si'c rsiajc te niguii che rbe'cni binij lo yuj, <sup>27</sup> dxejc yälä riguesni, rdxee ristieni, dxejcti rliejn binijga, luxh di niguiıga can xho roobni. <sup>28</sup> Acanajn yujga rajc binij lojni. Galoo rii cuane'ga, sas rii doj lojni. Dxejcrı rdıxaj bejdzı' neĵ dojga. <sup>29</sup> Dxejcti che aguyajl bedze'ga, ruxhalni chu ritiuugni, sa'csi abidzujn dxej ni guidojpnı.

*Xcuent bedz muxhtas*

*(Mt. 13:31-32; Lc. 13:18-19)*

<sup>30</sup> Räjpza Jesús:

—¿Xhini'c najc si'c najc xcälrnibee Dios? ¿Xhi te cuent guiniınu te guiluiınnı? <sup>31</sup> Si'c te bedz muxhtas ni rbej loyuj, si'c najcni. Bedz muxhtas najcni bedz bäze'ru loj guiralii bedze' ni yu' loj guedxliuj. <sup>32</sup> Dxejc che agurejni, roobni, rajcni yagrorı loj recuaan. Dxejcti roob rexajcwnı te rajc rujn reman xhaguıbaa xpitiäznı neĵ xpałaanı.

*Si'c baluii Jesús ganax con cuent*

*(Mt. 13:34-35)*

<sup>33</sup> Si'c ruluui Jesús rebejn xtidx Dios guniıni xhidal cuent sa' redee, si'ctis ni rajc rabeerenı. <sup>34</sup> Con recuent ni ruluıitis guniı Jesús lojreni. Niluxh lo rexpejnĵpacni basule'ni guiraa recuentre.

*Rusiadxi Jesús bejnäj nisdoı*

*(Mt. 8:23-27; Lc. 8:22-25)*

<sup>35</sup> Lagajc gudxejga räjpni loj rexpejnĵpacni:

—Colcho', chonnu steaad nis xten Galilee.

<sup>36</sup> Basa'ntireni rebejn, sanätırenı Jesús neĵ canuu cadro sobgajcni. Dxejcti sgaiı canuu sanajni. <sup>37</sup> Chela gubi' te beduxh, gusloj cayu' nis neĵ canuuga. Cadıxaj canuuga nis.

<sup>38</sup> Nagayejs Jesús dejtz canuuga, nagayejsni. Bacuäänrenı Jesús, räpgajczeni lojni:

—Dad mastı, ¿la dilu jıu siäänı neĵ nis, ä?

<sup>39</sup> Dxejc huıstie Jesús, gudıdxa'ni lo bejga, räjpzani lo nis:

—Guredxi.

Guläzgjajc bej, biacdxini. <sup>40</sup> Räjþ Jesús loj rexpejnþpacni:

—¿Xhicuent cadxebduxhtu? ¿La ditu chailajz xtidxä, ä?

<sup>41</sup> Luxh laareni bidxelojreni, räjpreni loj sa'reni:

—¿Chucha dee ni rnibee bej con nis, luxh ruzoobreni xtiidxnþ?

## 5

*Nigui Gadara ni yu' bendxab neñ lastooni*

(Mt. 8:28-34; Lc. 8:26-39)

<sup>1</sup> Bidzujntireni stelaad ro' nisga, lo yuj xten Gadara. <sup>2</sup> Si'tctis ni birii Jesús neñ canuu, biädgjajc te niguii lojni ni birii neñ rebiliää cadro rgat'z bengut. Yu' bendxab neñ lastoo niguiiga. <sup>3</sup> Räjþžni neñ rebiliääga luxh rut rajcdi rucuaaduuni, nicla con cadenguiib. <sup>4</sup> Xhidajl huält agacbacuaduureni ni', naa niguiiga con cadenguiib, luxh litis batiuugni recadenguiibga, rut rajcdi rusiacdxini. <sup>5</sup> Si'tctis canzajni, dxej, yääl. Rbedxa'ni neñ redajn, neñ rebiliää, luxh cagutiugni tiejxhni con reguij. <sup>6</sup> Che bahuiini loj Jesús zijtru, baxunni huichaglojni Jesús, bazuxhijbni lojni. <sup>7</sup> Dxejcti rbedxaduxhni, räjpni:

—¿Xhicuent siäädlu löä, Jesús, Xi'n Dios ni yu' jiaro? Rniabä lojlu nez loj Dios na'c gusacsilu narä.

<sup>8</sup> Sa'csi agac cayäjb Jesús lojni:

—Luj, bendxab, birii neñ lastoo niguiiga.

<sup>9</sup> Dxejcti gunabdiidx Jesús räjpni:

—¿Chu laalu?

Dxejc räjpni:

—Narä laä Legión, nani säloj xhidaltro, sa'csi xhidajl najcnu.

<sup>10</sup> Sanuutis canabni lo Jesús na'c guxhañni rebenðxabga ste'ca guejdx. <sup>11</sup> Ro'c tre' xhidalduxh cuch cuä' dane'ga, cayajwreni. <sup>12</sup> Dxejc gunab rebenðxabga loj Jesús, räjpreni:

—Baxhañ nuure loj recuchre te jiu'nu neñ lastooreni.

<sup>13</sup> Dxejcti basaan Jesúsreni. Biriiti rebenðxabga neñ niguiiga, dxejc biu'reni neñ lastoo recuchga. Yu' si'tcti tiop miñ cuch ro'c. Baxun recuchga, dxejc birolreni ro' guilaj, bitejbreñi neñ nis, gujtireni neñ nisga.

<sup>14</sup> Renani cayajp recuchga baxunreni, huiyeiireni diidxga neñ guejdx, näjza loniaa. Dxejc biääð bejn biähuii nani gujc ro'c. <sup>15</sup> Che bidzujntireni cadro suga' Jesús, bahuiireni loj niguii nani guyu' rebenðxabga neñ lastooni. Sobga'ni ro'c, najcwni xhajbni luxh nasa'c yejcní. Niguiire najc nani guyu' bendxab ni laa Legión neñ lastooni. Bidxejbti rebejn nani bahuii lojni. <sup>16</sup> Dxejcru rebejn ni bahuii xhi gujc ro', huiyeiireni diidx xho guzajc niguiire nani guyu' bendxab neñni galoo, näjza nani guzajc recuch. <sup>17</sup> Dxejc gusloj canabreni loj Jesús jiunejzni.

<sup>18</sup> Che biu' Jesús neñ canuu, niguii nani guyu' bendxab neñ lastooni gunabni loj Jesús, räjpni:

—Huinä narä.

<sup>19</sup> Per di Jesús nusaan nijni. Räjþ Jesús lojni:

—Huij rolizlu, lo resa'lu. Huiyei diidx lojreni xho bennäj Dadlu, näjza xho balaslajzni luj.

<sup>20</sup> Sä'tti niguiiga, gusloj cayujyni diidx neñ reguejdx xten Decápolis xho bennäj Jesúsni. Guiraa rebejn bidxeloj.

*Xindxa'p Jairo näjza gunaa ni bahual xhajb Jesús*

(Mt. 9:18-26; Lc. 8:40-56)

<sup>21</sup> Che bidzunsac Jesús stelaad ro' nisga neñ canuu, bidzujn xhidalduxh bejn cadro suga'ni. Bia'nti Jesús ro' nisga. <sup>22</sup> Dxejcru biääð te niguii nani laa Jairo, ni rnibee neñ xquidobäz rexpen Israel. Che bahuiini loj Jesús, bazuxhijbni lojni. <sup>23</sup> Canabpacni lojni, räjpni:

—Xindxap'ä acayejt. Guda, guzujlu ñaalu yejcní, te jiajcní, te guibajñni.

<sup>24</sup> Sanätí Jesús bejnğa. Xhidajl bejn sanajlni, luxh cagutäärenini. <sup>25</sup> Loj rebenxhidaalga yu' te gunaa ni agujc tzubitio'p ijz racxhuuni yälguidxbäi. <sup>26</sup> Aguededduxhni trabajw, abahuii xhidajl doctoorni. Xlia'si abanijtni guiraa nani rajpni, luxh xhet racnäjdini, alga rxuuruni. <sup>27</sup> Sa'csi biejn diajgni xhini'c canii rebejn xcuent Jesús, gubig gunaaga nez dejt Jesús, guideb neñ rebejn, bahualni xhajb Jesús. <sup>28</sup> Cayujnni xhigab, naani: "Palga narä falä xhajbtisni, siacä." <sup>29</sup> Lagajc dxejc guläjz caxe' xtiejñni, gucbeeza tiejxhni abirii xcälracxhuuni. <sup>30</sup> Gucbegajc Jesús yu' chu abasiajcní. Gubiregajcní neñ rebenxhidaalga, räjpni:

—¿Chuni'c bahual xhabä?

<sup>31</sup> Dxejcru räjp rexpejnþpacni lojni:

—Rhuuilu beṅxhidaal cagutäälu, luxh naalu: “¿Chuni'c bahual xhabä?”

<sup>32</sup> Sas cahuii Jesús nez ree, nez rec, te fiini loj nani bahualni. <sup>33</sup> Dxejc bidxejb gunaare, racsejsni, sa'csi gucbeeni xhini'c gujčni. Dxejc biäädni, bazuxhijbni loj Jesús, räbliini loj Jesús guira'ti ni bejnii. <sup>34</sup> Dxejc räjp Jesús lojni:

—Xindxa'pä, abiajclu sa'csi huililajzlu. Gulecdxi lajzlu, huij rolizlu, abiajc xcälracxhuulu.

<sup>35</sup> Canisijc Jesús si'c che bidzujñ renani birii roliz dade' ni rnibee neñ xquidobáz rexpejn Israel. Räjpreni:

—Agujt xindxape'lu. ¿Xhicuent rusieedru lu Dad mastr?

<sup>36</sup> Dxejc che biejn diajg Jesús nani caniiireni, räjpni lo dade'ga:

—Na'c guidxejblu. Bililajzti.

<sup>37</sup> Luxh dini nusaanru nij chu ninäni, Pedrtis näj Jacoob näjza Juan bejtzni. <sup>38</sup> Che bidzujñni roliz dade'ga, bahuii Jesús bieje ni cayujñ rebejn ni rbedxa' roon. <sup>39</sup> Biu'tini räjpni:

—¿Xhicuent rujntu si'c? Gajd dxape're guet. Nagayejssini.

<sup>40</sup> Alga baxhiznäjäreneni. Dxejc gunibee Jesús birii guiraa rebejnğa. Dxejcti huinäni xczujñ dxape'ga con renani sanäni. Biu'reni cadro naga' dxape're. <sup>41</sup> Gunaazni ñaa dxape'ga, dxejc räjpni:

—Talita cumi —nani säloj con xtiidxnu: Dxape', lojlu rniä, huistie.

<sup>42</sup> Dxejcti huistiegajc dxape'. Tzubitio'p iyz yu' dxape'ga. Bidxeloduxh rebejn ni bahuii guläs Jesús dxape'ga. <sup>43</sup> Dxejc balijdx Jesús reni te rut lojdi chayet'reni xhini'c gujc. Gunibegajcni gudeedreni xhi gauu dxape'ga.

## 6

### *Che guyu' Jesús Nazare't*

(Mt. 13:53-58; Lc. 4:16-30)

<sup>1</sup> Dxejcu birii Jesús ro'c, huijni lajdxni, sanäzani rexpejn pacni. <sup>2</sup> Che bidzujñ sabd, dxej nani ruslajz rexpejn Israel, gusloj caguluuini neñ xquidobáz rexpejn Israel. Bidxeloj xhidajl bejn nani biejn diajg rextiidxni, räjpreni:

—¿Caro bisieed nguüre guiraa recosre? ¿Xhi yälñajre cua'ni ni'c rajc rujñni rextzunduxh Dios con ñaani? <sup>3</sup> ¿La xhet laadi carpinteer, xi'n Marii, bejtz Jacoob, näj José, näj Judas, näjza Simón dee, ä? ¿La xhet reedi rbäjz rebisianhuinni?

Luxh bidxechlajzreni lojni. <sup>4</sup> Dxejc räjp Jesús lojreni:

—Catis rinälajzreni te ni rnii xtidx Dios. Lajdxtisni, lagajc loj resa'ni, roliztisni, ro'c rut rinälajzdini.

<sup>5</sup> Luxh di niajcdi niujñ Jesús xhidajl milaagwr ro'c. Tiopchontis beñracxhuu basiajčni, bazujñ ñaani yejcreni. <sup>6</sup> Bidxelo Jesús sa'csi di lajzreni nilii. Caguluuini neñ guiraa reguejdx'e ni ria'n gajxh nejzga.

### *Baxhal Jesús tzubitio'p bejn ni rinajlni chaluireni xtidx Dios*

(Mt. 10:5-15; Lc. 9:1-6)

<sup>7</sup> Dxejcu gurejdxni guitzubitio'p xpejn pacni. Gusloj caguxhalni tiopgajreni; badeedzani yälrnibee lojreni te guinibeereni loj rebeñdxab. <sup>8</sup> Gunibeeni xhet chanädireni lo nejz, ganaxhtis te yajg te sanäjreni. Di nungäjñ chanäreni nicla bisiuud, nicla yätxtiil, niclaza meel neñ dobdäjñ. <sup>9</sup> Nungäjñza xcaj gura'ch ni'reni, nägajc ga'preni tejtis gamangw, xhet tio'pdini.

<sup>10</sup> Dxejcti räjpni lojreni:

—Cadrotis jiu'tu neñ te guejdx, coljia'n neñ tejtis yu' guiraa redxej ni chutu guejdxga.

<sup>11</sup> Palga yu' te guejdx cadro direni gusaan jiu'tu luxh di rñajzreni cuadijgreni diidx ni sanäta, colrii guejdxga, colcuijb gudxuj ni'tu si'c te seen te gacbeereni xhet laadi bejnreni. Rñiäpac lojtu, guxiiru trabajw ted rebeñ Sodoma näj rebeñ Gomorra quela rebejn ni yu' guejdx cadro direni gusaan jiu'tu.

<sup>12</sup> Dxejc biriireni, sääreni. Cayäbgajczeni nanabpac gusiejch lajz rebejn. <sup>13</sup> Gulääzaren i xhidajl beñdxab dxejcti gudääbreni se't yejc xhidajl beñracxhuu, luxh biajcreni.

### *Xcälgujt Juan ni rutiobnis*

(Mt. 14:1-12; Lc. 9:7-9)

<sup>14</sup> Herodes najc nani rnibee dxejc. Biejn diajgñi xpala'n Jesús, sa'csi guiralii rebejn calä'p xpala'nni. Dxejc räjp Herodes:

—Juan nani rutiobnis ahuäjs loj rebengut, ni'c rajc rujñni remilagwre.

<sup>15</sup> Sgaii bejn räjp:

—Laa Elías ni gunii xtidx Diosni.

Sgaiireni räjp:

—Laa te bejn ni rnii xtidx Dios, o sa' te rebejn ni gunii xtidx Dios agujc xchero.

<sup>16</sup> Che biejn diajg Herodes si'c, räjpni:



—Laa Juan dee, nani gunibeä biru' yejcní, luxh naj agubansacni loj rebengut.

<sup>17</sup> Sa'csi lagajc Herodes gunibee biga' Juan, dxejc bacuaduurenini con cadenguiib nen latzguiib, xcálnasa'c Herodías. Herodías gujc cháäl Lib, bejtz Herodes, dxejc cua' Herodes gunaaga si'c cháälni. <sup>18</sup> Rájǰ Juan loj Herodes:

—Xhet laadi rbáznájlu cháäl bejtzlu.

<sup>19</sup> Ni'cni rdexchlajz Herodías loj Juan, luxh rlanjzi ju'tnini, luxh di niajcdini <sup>20</sup> sa'csi rdxejb Herodes Juan, sa'csi najnni beńsa'c, beńdxan najc Juan, ni'cni dini nusaan niujn Herodías latsiajni. Mase dini gacbesa'c ni rnií Juan, rucuađiagsa'cni xtiidxni. <sup>21</sup> Niluxh guyu' xmood Herodías. Che gojǰ laj Herodes, bayaanni rexejǰni ni rnibee, nájza rebejǰ nani sajc nez región Galilee. <sup>22</sup> Dxejcti biu' xindxa'p Herodías cadro cayajwreni, baya'ni nez lojreni. Bidxaglazduxh Herodes nájza rexpíoozni baya' gunaaga, xindxa'p Herodías. Dxejc rájǰ Herodes lo gunaaga:

—Gunab ni rlanjztislu loä, narä sunidxäni.

<sup>23</sup> Dxejcru ráplii Herodes lojni:

—Sunidxä xhitis ni guiniablu. Mase gala' yuj ni rnibeä.

<sup>24</sup> Biriitini nen yu', huiye'tzni loj xnanni, rájǰni:

—¿Xhini'c guiniabä lojni?

Dxejc rájǰ xnanni lojni:

—Gunab yejc Juan ni rutiobnis lojni.

<sup>25</sup> Huigajcni loj reii, sas gunabni lojni, rájǰni:

—Rlazä gunidxgajclu loä yejc Juan ni rutiobnis. Nen te pla't baniidx yejcní.

<sup>26</sup> Dxejcti guc-huinduxh lajz Herodes, sa'csi abadeedni xtiidxni lojni, luxh sa'csi abiejn diajg renani sobganájni lo xmexni, ni'c dipac rlanjzi nudxojnni nani gunab gunaaga lojni. <sup>27</sup> Baxhalgajc reii te soldaad ni rcanáj ro'c, baxhalnini, te chaxiini yejc Juan. <sup>28</sup> Ni'c huij, dxejcti bagu'tni Juan nen latzguiib, biädñätini yejc Juan nen te pla't. Badeednini loj gunaaga. Dxejcti gunaaga badeednini loj xnanni.

<sup>29</sup> Che biejn diajg rexejǰpac Juan si'c, biädñäsreni togoolga. Dxejcti bacua'tzrenini nen te baa.

*Bayaan Jesús gaii mil bejǰ*

(Mt. 14:13-21; Lc. 9:10-17; Jn. 6:1-14)

<sup>30</sup> Che gubi' renani baxhal Jesús, bijreni diidx guiraa ni bejnreni nájza ni baluiireni.

<sup>31</sup> Dxejc rájǰ Jesús lojreni:

—Coltaa, xtebnu chońnu cadro rut rbájzdi, guisilaaznu tudxe'n.

Rájǰ Jesús si'c sa'csi yu' xhidajǰ bejǰ ni sää, ni sääd, nicla gal gauureni. <sup>32</sup> Dxejcti sääreni nen te canuu cadro rut rbájzdi. <sup>33</sup> Bahuii xhidajǰ bejǰ sääreni, biembeereni Jesús. Dxejc xhidajǰreni huini' ro'c, xhidajǰ guejdx biriireni, ganidreni bidzujǰreni loj Jesús nájza rexejǰpacni, dxejcti bidojǰreni lojni. <sup>34</sup> Birii Jesús nen canuu, bahuiini loj beńxhidaalga. Dxejc balazlajznireni, sa'csi najceni si'c rexiił ni ruti baxtoor xtenreni. Dxejc gusloj caculuiinireni guiraloj. <sup>35</sup> Che gojǰ gudxej, gubig rexejǰpacni lojni, rájǰreni:

—Rut rbájzdi ree, luxh agudxej naj. <sup>36</sup> Baxhal rebejǰ te cháäreni lo reguejdx, nájza reřench, te chasiireni yätxtiil gauureni sa'csi xheti xhi gauureni ree.

<sup>37</sup> Dxejc rájǰ Jesús lojreni:

—La'tu coldeed xhi gauureni.

Dxejc rájǰreni loj Jesús:

—¿Xhixh sajǰ tiop gayuu meel yätxtiil chosiinu gauu guiraa rebenxhidajǰre?

<sup>38</sup> Dxejcti rájǰ Jesús lojreni:

—¿Bal yätxtiil rajptu? Colchahuii.

Che gojǰreni balni dxejc rájǰreni:

—Gaii yätxtiil, nájza tiop bájǰ.

<sup>39</sup> Dxejcru gunibee Jesús rájǰreni loj guiraa rebejǰ:

—Colcuj xcua-xcuauu loj guixhaya'.

<sup>40</sup> Sas gurej xcua-xcuareni. Yu' lajt gurej tegayuureni, yu' lajt gurej garol gayuureni.

<sup>41</sup> Dxejcti cua' Jesús guigaii yätxtiilga nájza guiro'p bájǰga, bahuiini xhaguibaa, badeedni xquixhtios loj Dios. Dxejcti gula'ni yätxtiil nájza guiro'p bájǰ, badeednini loj rexejǰpacni te badeedrenini loj guiraa rebenxhidaalga. <sup>42</sup> Dxejc gudajw guiraareni, gudxaj xque'reni. <sup>43</sup> Dxejcru batojǰreni tzubitioj dxijǰm guidxadoo yätxtiil nájza bájǰ ni bia'n. <sup>44</sup> Luxh loj guiraa rebejǰ ni gudajw yu' si'cti gaii mil niguii.

*Guzaj Jesús loj nis*

(Mt. 14:22-27; Jn. 6:16-21)

<sup>45</sup> Gunibee Jesús jiu' rexejǰpacni nen canuu, chägajceni Betsaida, ni tre' dejtz nis stelaad, lałni cacusadiidxni rebejǰ. <sup>46</sup> Che gulujx basadiidxnireni, sääni nen redane', sanabni lo

Dios. <sup>47</sup>Cheni acayu' guxhijñ, yu' rexpejn<sup>pacni</sup> neñ canuu galäii nis laj ni suga' Jesús xtebni ro' nis. <sup>48</sup>Dxejcti bahuii Jesús abadxajgreni cagusajreni xcanuureni, sa'csi säbduxh bej. Bejga rulanaareni nez dejtzeni stehuält. Dxejcru che acara yääl, gusaj Jesús loj nis, huijni cadre sasajreni, rlanjni ninijdni lojreni. <sup>49</sup>Dxejc che bahuiireni sasaj Jesús loj nis, naareni pet te beñmalni, ni'c guredxa'reni. <sup>50</sup>Guiraareni bahuiireni lojni, bidxebduxhzeni. Sas gunigajcni lojreni, räjpni:

—Colsutijp lajztu. Laa naräni. Na'c guidxejbtu.

<sup>51</sup>Dxejcti huä'p Jesús neñ canuu cadre yu'reni. Lagajc dxejc biacdxi bej, luxh laareni bidxeloduxhzeni, <sup>52</sup>sa'csi direni niacbee xhini'c bennäj Jesús reyätxtiil. Guc najd lajzreni, ni'c direni niacbee.

*Basiajc Jesús rebenracxhuu neñ guedx Genesare't*  
(Mt. 14:34-36)

<sup>53</sup>Gudejdreni lo nis, bidzujñreni lo yuj xten Genesare't. Ro'c bacuaduureni canuu ro' nis. <sup>54</sup>Che biriireni neñ canuu, biembegajc rebejn Jesús, <sup>55</sup>dxejcti birii rebejn guideb nejzga. Guslojti siädnäreni beñracxhuu loj Jesús, naga' rebenracxhuuga lo da'. Cadrotis riejn diajgreni yu' Jesús riädnäreni rebenracxhuu. <sup>56</sup>Niluxh cadrotis rij Jesús, neñ reguedxbáz, neñ reguedxro, näzja loj reñench, rguixhzeni rebenracxhuu cadre rajc guii. Dxejcti rniabreni loj Jesús te gac caanreni xhajbni, niluxh biajc guiralii renani gudajn xhajb Jesús.

## 7

*Nani runijt lastoo bejn*  
(Mt. 15:1-20)

<sup>1</sup>Dxejcti refarisee, renani najc beñguidoo loj guedx Israel, näzja gaii rebejn ni ruluii leii, renani birii Jerusalén, bidojpreni loj Jesús. <sup>2</sup>Bahuiireni cayajw gaii rexpejn<sup>pac</sup> Jesús, luxh canii rebejn nacdXuudx naareni (dee säloj direni quuib ñaareni si'ctis ni rdiib ñaa rebeñ lajdxzeni). Ni'cni guniyajreni rexpejn<sup>pac</sup> Jesús. <sup>3</sup>(Guiraa rebejn xten Israel, näzja refarisee, sasanäj nani baluii rebengool ni yu' guedx Israelreni. Direni gauu palga direni quuib ñaareni balti huält. <sup>4</sup>Che rbi'reni rijreni lo guii, rguibsa'creni naareni, lojreni, ni'reni, dxejcti rajc rajwreni. Niluxh guyu' xhidajl costumbr ni sasanäjruureni, luxh yu' mood rguibreni rextrastreni näzja rexplooreni, näzja rextrastguibreni, näzja rexloonreni.) <sup>5</sup>Dxejc gunabdiidx refarisee näzja rebejn ni ruluii leii loj Jesús, räjpreni:

—¿Xhicuent di rexpejn<sup>pac</sup>lu gun si'cni baluii rebengool, niluxh rajwreni guideb nacdXuudx ñaareni?

<sup>6</sup>Dxejcti gunii Jesús lojreni räjpni:

—¡Beñ guijdx! Laaca gunii Isaias xcuenttu che guniini xtidx Dios. Scree cajni loj guijtz:

Guejdxre sanälajz narä con rextiidxni,  
niluxh lastooreni zitro suga' loä.

<sup>7</sup>Xlia'si ruzuxhijbreni, sa'csi direni chanälajz narä.

Ruluiireni si'c xtiidxpac Dios nani rniie rebejn.

<sup>8</sup>Rusa'ntu xleii Dios, sasanädzu'tztu costumbr nani baluii rebengool. Rdibsa'c rexploortu, rextrasttu, luxh rujnzatu xhidajlrú cos sa' redee.

<sup>9</sup>Räjpza Jesús lojreni:

—Rusa'ntu xtidx Dios te risanäjtu recostumbr xtenttu. <sup>10</sup>Sa'csi räjp Moisés: “Huinälajz xtdadlu con xnanlu.” Räjpzani: “Suju'tpactu nani gudzubde yejc xtdadni o yejc xnanni.”

<sup>11</sup>Niluxh la'tu rniitu sajç gäb bejn loj xtdadni o loj xnanni: “Dina gapä xhi cojn gacnäälú” (nani säloj, abadedä guira'ti loj Dios). <sup>12</sup>La'tu ditu gusaan gunru bejn por xtdadni nicla por xnanni. <sup>13</sup>Si'c rbälaztu xtidx Dios, te sasanäjtu recostumbr nani ruluiitu, luxh xhidajl cos sa' dee rujntu.

<sup>14</sup>Gurejdx Jesús guiraa rebejn, dxejc räjpni loj guiraareni:

—Colcuadiajç, colyacbee xtidxä. <sup>15</sup>Rexhicos yälrajw ni rajw bejn, dini gunijt bejnga, rediidx ni rii neñ lastoo bejn, näzja recos ni rujn bejn, ni'c runijt bejnga. <sup>16</sup>Pal yu' chu rlanj guisieed, sucuadiajçni.

<sup>17</sup>Dxejcti gula'reni loj rebenxhidaal, biu'reni neñ yu'. Dxejc gunabdiidx rexpejn<sup>pacni</sup> loj Jesús xhi säloj cuent ni guniini. <sup>18</sup>Basejc Jesús diidx lojreni, räjpni:

—¿La näzja la'tu xheti xcäriejntu? ¿La di'tu gacbee xhitis yälrajw nani riu' neñ bejn digacdi gunijnti lastoo bejn, ä? <sup>19</sup>Sa'csi dini jiu' neñ lastooni; riu'ni xque'ni, rdejdtini.

Si'c guniini te baluiini guira'ti xhicos najc naya. <sup>20</sup>Dxejc räjpni:

—Rediidx ni rii neñ lastoo bejn, näzja recos ni rujn bejn, ni'c sii runijt lastoo bejn. <sup>21</sup>Sa'csi neñ lastoo rebejn rii rexhigabguijdx, näzja yälresnäç chääl sa'ni, yälresnäç ni xhet najcdi chäälni, yälrugut sa'ni, <sup>22</sup>yälğubaan, yälrlajçni ga'pni xhixhten bejn, yälłtsiaç, yälłrusgueeni,

yäl xheti xtujy lojni, yälrdxechlajz, yälrudzubde sa'ni, yälñayechlajzni, yälguyalajz. <sup>23</sup> Guiraa reyälatsiajre neñ lastoo bejn řiireni, luxh reni'csi runijt bejn.

*Tej guna Sirofenicia ni bililajz xtidx Jesús*  
(Mt. 15:21-28)

<sup>24</sup> Dxejc biriini ro'c, sääni nez guedx Tiro nájza nez Sidón. Ro'c bia'nni neñ te yu' sa'csi di rlanjzi niacbee rebejn caro yu'ni, niluxh di niajcdi niuxhiga'tztisni. <sup>25</sup> Biengajc diajg te gunaa ro'c yu' Jesús. Xindxape' gunaaga yu' bendxab neñ lastooni. Bidzujñ gunaaga, bazuxhijbni lo Jesús. <sup>26</sup> Gunaaga rñii griegw, najcñ beñ Sirofenicia. Gunabni lojni guinibeeni guirii bendxabga neñ lastoo xi'nni. <sup>27</sup> Dxejc räjp Jesús lojni:

—Basaan gauxgaa rebiuux, sa'csi xhet laati gudzucajni xcuxtiil rebiuux te gudeednini loj rebä'cw.

<sup>28</sup> Dxejc gunii gunaaga, räjpni loj Jesús:

—Yo, Dad. Nájza rebäcue' ni suga' neñ mex rajw nani rtejb ro' rebiuux.

<sup>29</sup> Dxejcti räjp Jesús lojni:

—Laaca nñiliilu. Huij rolijzlu. Abirii bendxab neñ lastoo xindxape'lu.

<sup>30</sup> Luxh che bidzujñ gunaare rolijzni, a dxape' naga' lo da'. Gucbegajc gunaaga abirii bendxab neñ lastoo dxape'ga.

*Basiaj Jesús te bengop*

<sup>31</sup> Dxejcro birii Jesús stehuält lo rexyuj guedx Tiro, gudejdni nez Sidón nájza rexyuj Decápolis. Bidzujntini ro' nis xten Galilee. <sup>32</sup> Biädñä gaii bejn te niguii ni nacua't diajgni lo Jesús. Digacdiza guñisa'c niguiiga. Biädñabreni lo Jesús nusujni ñaani yejc niguiiga. <sup>33</sup> Dxejcti badzucanjini loj rebejn. Baquitzgajcni rebicueñaani neñ diajgni, dxejcro batiobxhejni, gudajntini lujdxni. <sup>34</sup> Bahuiini xhaguibaa, bazaa lajzni, dxejc räjpni:

—jEfata! —nani säloj bixal.

<sup>35</sup> Dxejcro bixalgajc rediajgni, gubangajc lujdxni, gunisa'cni. <sup>36</sup> Dxejcti gunibee Jesús rojdi gäbreni, per che räjpni lojreni si'c, laareni batie'churenii diidxga. <sup>37</sup> Rdxeloduxhrene, räjpreni:

—Guira'ti laaca rujñni; ruxhalni diajg rediagcua't, luxh rusniini regop.

## 8

*Bayaan Jesús tajp mil bejn*

(Mt. 15:32-39)

<sup>1</sup> Neñ redxejga bidojp xhidalro bejn, luxh xheti xhigauureni. Dxejc gurejdx Jesús rexpejnpacni ni rinajlñi, räjpni lojreni:

<sup>2</sup> —Rulazlazä rebejnre, sa'csi ñaj rajc choñ dxej tre'reni loä, luxh xhet yu'di gauureni.

<sup>3</sup> Niluxh palga guxhaläreni rolijzreni, xliajzreni, sidxajzreni lo nejz; sa'csi yu' renani zijtru siädreni.

<sup>4</sup> Dxejcro räjp rexpejnpacni lojni:

—¿Caro chaca'nu yätxtiil te cha xque' rebejnre ree, cadro rut rbäjzdi?

<sup>5</sup> Sas gunabdiidx Jesús lojreni:

—¿Bal yätxtiil rajptu?

Dxejcro räjpreni:

—Gajdztisni.

<sup>6</sup> Gunibee Jesús gurej rebexhidaalga loj yuj. Sas cua'ni guigajdx yätxtiilga, badeedni xquixhtios lo Dios, guña'ni reyätxtiilga. Dxejc badeednini loj rexpejnpacni te guteedrenini loj rebexhidaal. Bateedtireni yätxtiilga lo rebexhidaalga. <sup>7</sup> Rajpzareni gaii bälbäz, dxejcti badedsac Jesús xquixhtios lo Dios, gunibeeni bateedzareni rebälbäzre loj rebexhidaalga.

<sup>8</sup> Dxejc gudajwreni, gudxaj xque'reni. Dxejc batojp rexpejnpac Jesús gajdz dxijm reyätxtiil näj rebäjñ dxuc ni bia'n. <sup>9</sup> Niluxh renani gudajwga najczeni si'cti tajp mil bejn. Dxejcti basadiidxnireni. <sup>10</sup> Biunägajc Jesús rexpejnpacni neñ canuu, biädreni nez Dalmanuta.

*Gunab refarisee te senro loj Jesús*

(Mt. 16:1-4; Lc. 12:54-56)

<sup>11</sup> Biädä refarisee, renani najc rebenguidoo loj guedx Israel, guslojreni cayeinäjreni Jesús. Canabreni gunni te senro nani Diostis ni yu' guibaa sajc gun. Cagula'tzsireni, don xhi gunni. <sup>12</sup> Dxejcti bazaa lajz Jesús neñ lastooni, räjpni:

—¿Xhicuent rñajz rebejn ni nabajñ ñaj fii gac resenro xten Dios? Rñiliäpac lojtu, di rebejn ni nabajñ ñaj fii nicla tej sen xhaguibaali.

<sup>13</sup> Dxejcti basa'nnireni ro'c, biusacni neñ canuu, sä'tini stelaad nisga.

*Levaduur xten refarisee*

(Mt. 16:5-12)

<sup>14</sup> Biaĵlazreni nica'reni yätxtiil, luxh xhetliidi sanädireni. Tejtis yätxtiil nuureni neñ canuu.

<sup>15</sup> Caguliĵdx Jesús rexpejñpacni, räjpni lojreni:

—Col̄susiñ, col̄nati levaduur xten refarisee, col̄natiza levaduur xten Herodes. (Nalajznu, xtiidxreni najc si'c levaduur.)

<sup>16</sup> Dxejcti cayeinäj sa'reni diidx xcuent nani gunii Jesús lojreni, dxejc räjpreni:

—Sa'csi dinu jia'p yätxtiil, ni'c rñiini scree.

<sup>17</sup> Che gucbee Jesús xhini'c caniireni, räjpni:

—¿Xhicuent rñiitu: “Sa'csi dinu jia'p yätxtiil”? ¿La gajdu fii, la gajdu gacbee? ¿La lałtis nacnajd lastootu? <sup>18</sup> ¿La yu' baloĵtu, luxh ðitu fii? ¿La sojb diaĵgtu luxh ði diaĵgtu jiejn? ¿La dilajztu guizaj? <sup>19</sup> Che guĵa'a guigaii yätxtiil te gudajw gaii mil niguii, ¿bal dxijm̄ yätxtil biujy batoĵptu?

Sas räjpreni lojni:

—Tzubitio'pni.

<sup>20</sup> —Che guĵa'a guigajdz yätxtiil te gudajw tajp mil bejn, ¿bal dxijm̄ yätxtil biujy batoĵptu?

Sas räjpreni:

—Gajdzni.

<sup>21</sup> Dxejc räjpni lojreni:

—¿La gajdu gacbesa'c xhi benä?

*Basiajc Jesús te lotiä'p Betsaida*

<sup>22</sup> Bidzunäj Jesús rexpejñpacni guedx Betsaida. Dxejc biändnäreni te lotiä'p loj Jesús, gunabreni loj Jesús caanni bejnga. <sup>23</sup> Dxejc gunaazni naa lotiä'pga, guläänini neñ guejdx. Che batiobxhejn̄ni neñ rebaloĵni, basugajcni ñaani yejc baloĵ lotiä'pga, gunabdiidxgajc Jesús:

—¿La yu' xhi rhuiilu, ä?

<sup>24</sup> Luxh che bahuii bejnga räjpni:

—Rhuiä sasaj rebejn, luxh si'c yajg rhuiä lojreni.

<sup>25</sup> Basusac Jesús ñaani yejc rebaloĵ bejnga. Dxejc bejn Jesús bahuii bejnga. Biajctini, zijtru gujc bahuisa'cni lo guiraa rebejn. <sup>26</sup> Dxejcti baxhaĵ Jesúsni rolizjni, räjpni:

—Basquejn, huijga rolizjlu, na'c jiu'lu neñ guejdx, na'c gäblu xhi gujclu lo rebejn ni yu' neñ guejdx.

*Basule' Pedr Jesús najc Crist*

(Mt. 16:13-20; Lc. 9:18-21)

<sup>27</sup> Birinäj Jesús rexpejñpacni lo reguejdx ni ria'n nez Cesarea xten Filipino. Lałni sasajreni lo nejz räjp Jesús loj rexpejñpacni:

—¿Chuni'c rñii rebejn nacä narä?

<sup>28</sup> Sas räjpreni lojni:

—Yu'reni rñii najclu Juan ni batiobnis, yu'zareni rñii najclu Eliás, yu'zareni rñii najclu te rebejn ni gunii xtiidx Dios.

<sup>29</sup> Dxejc räjpni lojreni:

—¿La'tu a'? ¿Chuni'c rñiitu nacä narä?

Dxejc bazejc Pedr diidx, räjpni lojni:

—Luj najclu Crist.

<sup>30</sup> Dxejcti räjp Jesús lojreni:

—Rutloĵdi gäbtu chu nacä.

*Gunii Jesús xho guetni*

(Mt. 16:21-28; Lc. 9:22-27)

<sup>31</sup> Dxejcti gusloj Jesús caguluiini rexpejñpacni, räjpni:

—Narä nacä Xi'n Dios, ni gujc Niguii. Nanabpac tedä trabajwduxh. Sibälaz reben̄gool ni najc guxhtis neñ guedx Israel narä, näjza renani rñibee loj rebixhojz, näjza rebejn ni ruluii lei: sugu'treni narä, luxh ni rioĵn̄ dxej guibañsacä lo reben̄gut.

<sup>32</sup> Guyasi guniini rediidxre. Sas huinä Pedr Jesús telaad, dxejc räjpni loj Jesús:

—Na'c guiniilu si'c.

<sup>33</sup> Dxejc batzuré loj Jesús, bahuiini loj rexpejñpacni. Dxejc gudilñajni Pedr räjpni:

—Gubicaĵ loä, Satanás, luj ðilu gun xhigab xten Dios, xhigab ni rujn rebejntis rujnlu.

<sup>34</sup> Dxejc gurejdxni reben̄xhidaal con reni najc xpejñpacni, räjpni lojreni:

—Palga yu' chu rĵajz gac xpenäpac, sucuaáz gunni ni rsia' lajzni gunni, sutedni trabajw si'c tej ni caj lo cruĵz, suĵiädnaĵni narä. <sup>35</sup> Sa'csi nani rĵajz gusĵaa xcälñabajñni, suniĵtni xcälñabajñni. Luxh nani runiĵt xcälñabajñni xcälñasa'c narä, xcälñasa'c xtiidxä, siliaapac xcälñabajñni. <sup>36</sup> Xlia' ga'p bejn guiraloj lo guedxliujre palga nitni lo Dios par tejpas. <sup>37</sup> Xhet gacdi gudeed bejn te guibaññajni Dios. <sup>38</sup> Nani guituinäj narä con rextiidxä ñaj, cheni najc

rebejn beŋdoj], narä, Xi'n Dios nani gujc Niguii, situinäázani che jiädnäá reangl xten Dios che jiälää lo xcälrdimbicha' Xtaä.

## 9

<sup>1</sup> Dxejc räjp Jesús lojreni:

—Rniliäpac lojtu, yu'reni suga' ree nani di guet fixgaareni abiääd xcälrnibee Dios.

*Gubixhlo Jesús garenca*

(Mt. 17:1-13; Lc. 9:28-36)

<sup>2</sup> Che gudejd xho'p dxej, Jesús cua' Pedr, näj Jacob, näjza Juan, laatisreni huiinäni yejc te danro. Ro'c gubixhlojni garenca lojreni. <sup>3</sup> Gusloj rdimbicha' rexhajbni, gujc xhajbni nolbäj. Rut rajcti rusquijtz lajd lo guedxliujre si'c biquijtz xhajbni. <sup>4</sup> Dxejc baluiiolo Elías näjza Moisés lojreni, cayuinäjreni Jesús diidx. <sup>5</sup> Sas räjp Pedr loj Jesús:

—Dad, laaca dxunnu ree. Näj jiennu choŋ yuguixa', tejni xtenlu, steeni xten Moisés, steeni xten Elías.

<sup>6</sup> Si'c guniini sa'csi nicla niacbeeni xhini'c guiniini, sa'csi cadxebduxhreni. <sup>7</sup> Dxejc biääd te za bejn balaa yejreni. Neŋ zaga biejn xse' te ni räjp:

—Dee najc xi'nä nani sanälazä, coŋcuadiajg xtiidxni.

<sup>8</sup> Che batzuré lojreni, bahuiireni rutru suganäjti Jesús, xtebtis Jesús suga'.

<sup>9</sup> Che siädjäjtreni dajnga, gunibee Jesús rut lojdi guiniireni xcuent ni bahuiireni, guibanxgaasi Xi'n Dios nani gujc Niguii lo rebengut. <sup>10</sup> Basälcheereni rediidxre neŋ lastooreni. Dxejcru canabdiidx lo sa'reni xhicha säloj guibaŋsacni lo rebengut. <sup>11</sup> Sas gunabdiidxreni lojni, räjpreni:

—¿Xhicuent rnii remastr xten leii naquuinpac jiädxgaa Elías?

<sup>12</sup> Dxejcti bazejcti diidx lojreni, räjpni:

—Guliireni siädxgaapac Elías, luxh sunsa'cni guira'ti xhi cos. Näj a', ¿xhicuent caj lo guijtz xcuent Xi'n Dios ni gujc Niguii, sidejcti trabajwduxh, rutza jiidini? <sup>13</sup> Luxh narä rniä lojtu, abiääd Elías, luxh bennäjreni si'ctis ni rlaizreni, si'cpac ni caj loj guijtz ni rusule' xcuentni.

*Basiajc Jesús te biuux ni guyu' beŋxab neŋ lastooni*

(Mt. 17:14-21; Lc. 9:37-43)

<sup>14</sup> Che asiäädreni cadro tre' sgaii rexpejpac Jesús, bahuiireni loj xhidalro bejn ni tre' lojreni, luxh cayeinäj rebejn ni ruluii leiireni. <sup>15</sup> Che bahuii guiraa rebejn loj Jesús, bidxeloduxhreni, baxunreni, huiye'tzreni xchan lojni. <sup>16</sup> Dxejc gunabdiidx Jesús lojreni:

—¿Xhini'c rusieinäjtu laareni?

<sup>17</sup> Sas gunii tej reni yu' lo beŋxhidaalga, räjpni:

—Dad, ree siädnäá xi'nä lojlu, yu' beŋxab neŋ lastooni, nani rujn najcni gop. <sup>18</sup> Cheni rniaaznini, rutienta'ni xi'nä, luxh riduxh bitzun ro'ni, näjza rauya'ni ro'ni, luxh cabijdzni. Aräpä loj rexpejpacu cuääreni beŋxabga, niluxh di niajcti nibäärenini.

<sup>19</sup> Dxejcti gunii Jesús lojreni, räjpni:

—La'tu, bejn ni di chalilajz, ¿gucli chu'ä lojtu te chalilajztu? ¿Gucli gusieedtu narä? ¿Coltanäni loä!

<sup>20</sup> Dxejc biädnäreni biuuxga lojni. Che bahuii beŋxab lo Jesús, basnijn bi'nga, basälta'tinini lo yuj. Sädiidxni, luxh caŋti bitzun ro'ni. <sup>21</sup> Gunabdiidx Jesús loj xtaäni:

—¿Gucli rajcni si'c?

Dxejc räjp dade'ga:

—Che gujclini biuxbäz. <sup>22</sup> Balti huält rusäl'nini lo guiboo näjza lo nis te ju'tnini. Palga yu' xhi gac gunlu, balazlajz nuunu, gucnäj nuunu.

<sup>23</sup> Sas räjp Jesús lojni:

—¿Xhicuent rniabdiidxlu la sajc gacnäälu? Xhitis sajc gac par nani rililajz.

<sup>24</sup> Guredxa' xtaä bi'nga, räjpni:

—¿Rililazä! Gucnäj narä te chaliiru lazä.

<sup>25</sup> Che bahuii Jesús bixa't xhidajl bejn lojni, gudidxa'ni lo beŋxabga räjpni lojni:

—Beŋxab ni rujn gop, narä canibeä, birii neŋ lastoo bi'nga. Na'cru chulu neŋ lastooni.

<sup>26</sup> Dxejcru guredxa' beŋxabga, luxh basnibzejsni bi'nga, dxejcru biriini neŋ lastooni. Astoo te bengut bia'n bi'nga ro'c. Xhidajl rebejn räjp:

—Agujtni.

<sup>27</sup> Dxejc gunaaz Jesús naa bi'nga guläsnini. Guzuliiti bi'nga. <sup>28</sup> Dxejcti che abiu' Jesús nen yu', gunabdiidx rexpejpacni lojni:

—¿Xhicuent di niajcti nibäänu beŋxabga?

<sup>29</sup> Dxejc räjp Jesús lojreni:

—Di gacdi cuäätu sa' beŋxabre palga ditu cuedx-guinab lo Dios, palga ditu gucuanxgaa.

*Gunisac Jesús xho guetni*  
(Mt. 17:22-23; Lc. 9:43-45)

<sup>30</sup> Dxejc biriireni ro'c, gudejdreni Galilee. Luxh di rlaiz Jesús niacbee rebejn sadejdreni nejzga, <sup>31</sup> sa'csi caguluiini rexpejnpacni. Cayäjpni lojreni: "Xi'n Dios ni gujc Niguii sidejdní ladzña rebejn, niluxh sugu'trenini. Che guiza' choñ dxej gujtni, sibajpni stehuält."  
<sup>32</sup> Niluxh laareni direni niacbee xhini'c guniini, bidxejbzareni niniabdiidxreni lojni.

*¿Chuni'c sajrcu?*  
(Mt. 18:1-5; Lc. 9:46-48)

<sup>33</sup> Bidzujntireni Capernaum. Che biu'ni neñ yu' räjpni lojreni:  
—¿Xhini'c cagusiejytu lo nejz?

<sup>34</sup> Dxejc xhet guniitireni, sa'csi laareni cagusieinäj sa'reni lo nejz don chuni'c sajrcu lojreni. <sup>35</sup> Sas gurej Jesús, dxejc gurejdxni guitzubitio'p xpejnpacni, räjpni lojreni:  
—Palga yu' chu rlaiz gasajrcu lojtu, sugacxgaani si'c te nani xhet sajcti, sugunzani xtzuun chutis.

<sup>36</sup> Dxejcti cua'ni tej biuxbáz, huinänini galäiireni. Dxejc gudääzni biuxbázga, räjpni lojreni:  
<sup>37</sup> —Chutis ni gacnäj te rebixue're sa'csi rinälajzni narä, sacnäjni narä, luxh nani gacnäj narä, xhet narätis gacnäjtini, näjza xtaďä nani baxhał narä racnäjni.

*Nani di guiniyaj nuunu, xladnu yu'ni*  
(Lc. 9:49-50; Mt. 10:42)

<sup>38</sup> Dxejcti gunii Juan räjpni lojni:

—Bahuiinu lo te bejn ni rbää bendxab con xcälrmibee lajlu, niluxh dini sanäj nuunu. Sas huiye'tznu lojni na'c gunni si'c sa'csi dini sanäj nuunu.

<sup>39</sup> Dxejc räjp Jesús lojni:

—Na'c gudxoju ggunni si'c sa'csi bejn nani rujn milagwr con xcälrmibee laä digacdi guiniyagajcni narä. <sup>40</sup> Nani di guidxagdijl nuunu, xlaadnu yu'ni. <sup>41</sup> Rniliäpac lojtu, chutis ni guniidx te bas nis lojtu sa'csi najctu xpejnpac Crist, siguijx Diosni xcuent nani bejnni.

*Nani rujn jiajb bejn lo dojl*  
(Mt. 18:6-9; Lc. 17:1-2)

<sup>42</sup> 'Chutis ni gusiu' tej rebixue' ni rililajz narä neñ dojl, sugal te guimolin vejnni dxejcti gucuaarenini lo nisdoo. <sup>43</sup> Palga tej ñaalu gun gunlu dojl, batiu'ni: hueenru natiujnglu chaläjzlu cadro yu' Dios quela sojb guiro'p ñaalu gusälreni luj gabijl, loj bajl ni di jiuui, <sup>44</sup> cadro diza xpisiujgreni guet, diza bajl jiuui. <sup>45</sup> Luxh palga tej ni'lu gun gunlu dojl, batiu'ni: hueenru natiujnglu chaläjzlu cadro yu' Dios quela sojb guiro'p ni'lu luxh chäälü gabijl, lo bajl ni di jiuui, <sup>46</sup> cadro di xpisiujgreni guet, diza bajl jiuui. <sup>47</sup> Luxh palga tej balojlu gun gunlu dojl, gulääni: hueenru chäälü cadro rnibee Dios natiä'p lojlu quela sojb guiro'p balojlu chäälü gabijl, <sup>48</sup> cadro di xpisiujgreni guet, diza bajl jiuui.

<sup>49</sup> 'Si'cni rloj sejd yejc xhi cos yälrajw, si'cza guiloj bajl yejc guiraareni. Guilojza sejd lo guira'ti ni rdeed bejn lo Dios. <sup>50</sup> Hueen najc sejd, luxh palga agudejđ yälñadzj yejcti, ¿xho guntu te gacsacni nadzij? Colyajc nadzij la'tu, colguibaññasa'c sa'tu.

## 10

*Baluu Jesús xcuent rärru'o'n sa'ni*  
(Mt. 19:1-12; Lc. 16:18)

<sup>1</sup> Dxejrcu birii Jesús ro'c huijni nez Judea näjza nez ro' gueu Jordán stelaad. Ro'c bidojp xhidajl bejn lojni stehuält, sas guslosacni caguluiinireni si'ctis ni rluuiinireni. <sup>2</sup> Sas refarisee, renani najc rebenguidoo loj guedx Israel, gubigreni loj Jesús, cagula'tzreni Jesús. Ni'c gunabdiidxreni, räjpreni:

—¿La laaca gun niguii gusaan chäälüni, ä?

<sup>3</sup> Dxejc laani bazejcti diidx, räjpni lojreni:

—¿Xhini'c gunibee Moisés guntu?

<sup>4</sup> Dxejrcu räjpreni:

—Moisés basaan gudeedni te guitz gusaan chäälüni che guro'nñini.

<sup>5</sup> Dxejc Jesús räjp lojreni:

—Sa'csi guyaa lajztu, ni'cni bacuaa Moisés diidxga lojtu. <sup>6</sup> Niluxh che birixtiej beñ guedxliuj, "niguii con gunaa benchee Diosreni." <sup>7</sup> "Ni'cni te niguii siriiini loj xtaďni, loj xnanni te cuäänäjni chäälüni. <sup>8</sup> Niluxh renani gujc tiop bejn sajrceni si'c tejsi bejn", dirureni gac tiop bejn, si'c tejsi bejn gacreni. <sup>9</sup> Na'c gudzucay bejn lo sa bejn nani abachaag Dios lo sa'ni.

<sup>10</sup> Che biu'reni neñ yu' gunabdiidxsac rexpejnpacni lojni xcuent rediidxre. <sup>11</sup> Dxejc räjpni lojreni:

—Chutis niguii ni gusaan chäälni, sas guchñaani ste'cani, rujnni dojl. <sup>12</sup> Niluxh palga gunaa guro'n chäälni sas guchñaani ste'ca niguii, rujnzani dojl.

*Gunab Jesús gunle' Dios yejc rebiuxbáz*  
(Mt. 19:13-15; Lc. 18:15-17)

<sup>13</sup> Biädnäza rebejn biuxbáz lojni te gutzuub Jesús ñaani yejcreni, sas gudidxa' rexpejnpacni lojreni. <sup>14</sup> Che bahuii Jesús xhi cayujn rexpejnpacni, bidxe'chni räjpni lojreni:

—Colsaan jiääd rebiuxbáz loä. Na'c gudxojnureni, sa'csi xcälñibee Dios najc xten reni najc nadolajz si'c najc biuxbáz. <sup>15</sup> Rñiliäpac lojtu, chutis ni rlanj jiu' lo xcälñibee Dios nanab guzobdiajgreni xtidx Dios si'c ruzobdiajg rebiuxe' xtidx xtradreni. Palga dini gun si'c, dini jiu' lo xcälñibee Dios.

<sup>16</sup> Dxejcti gudäáz Jesús rebiuxbáz, bazujzani ñaani yejcreni, gunab Jesús gunle' Dios yejcreni.

*Te bi'n ni rapduxh guninäj Jesús*  
(Mt. 19:16-30; Lc. 18:18-30)

<sup>17</sup> Che birii Jesús loj xnejzni, ruxuñ te niguii biääd lojni, bazuxhijbni. Dxejcti gunabdiidx niguiiga lojni räjpni:

—Dad, beñsa'c, çxhini'c gunä te xca'ä yälñabajn par tejpas?

<sup>18</sup> Sas räjp Jesús lojni:

—Çxhicuent rñiilu loä beñsa'c? Tejtisni najc beñsa'c; Diostis najc beñsa'c. <sup>19</sup> Najnlu xhini'c gunibee Dios gunni: “Na'c guesnäjlü chääł sa'lu, na'c ju'tlu, na'c cuanlu, na'c gusgueelu chutis, na'c cuäälü yejc xhixten sa'lu, huinälajz xtradlu, xnanlu.”

<sup>20</sup> Dxejc räjp niguiiga lojni:

—Dad, guiraa redee cayunä cheni gucäli bi'n.

<sup>21</sup> Che bahuii Jesús lojni, huinälajznini, räjpni lojni:

—Tejtis nani cayäädx gunlu. Huij, huito' guiraa xhixtenlu, badeed xcuentni loj rebejn nani diga'p, dxejcti gunidx Dios xhidajl xhi ga'plu xhaguibaa. Gudanjäl narä, mase tedlu trabajw.

<sup>22</sup> Dxejc che biejn diajgni diidxre, guc-huin lajzni, xhet laadi yu'ni siini, sa'csi naclenduxh xhixtenni yu'.

<sup>23</sup> Dxejc bahuii Jesús guideb gabi lojreni, räjpni loj rexpejnpacni:

—Naganduxh jiu' rebejn nani yu'duxh xhixtenni lo xcälñibee Dios.

<sup>24</sup> Dxejc bidxelo rexpejnpacni che biejn diajgreni rextiidxni. Dxejc räjp Jesús lojreni stehuaält:

—jAitu xi'näl, lacti naganduxh gusaan renani sanälajz xhixtenni guinibee Diosreni.

<sup>25</sup> Guyasiru ted te cameii ni' te guux quela gusaan te bejn ni yuduxh xhixtenni guinibee Diosni.

<sup>26</sup> Dxejc bidxeloduxhreni, räjpreni lojni:

—ÇChuxhni'c sajç laa lo dojl?

<sup>27</sup> Dxejc bahuii Jesús lojreni, räjpni:

—Bejn digacdi gusläa sabejnni, Diostis rajc rusläa bejn lo dojl, sa'csi Dios rac rujn guira'ti.

<sup>28</sup> Sas gusloj Pedr cayäjp lojni:

—Naj nuure ahuilälaznu guira'ti te siopnajlnu luj.

<sup>29</sup> Dxejc räjp Jesús:

—Rñiliäpac lojtu, chutis nani cuälaz rolizjni, rebejtni, rebisiajnni, xtradni, xñanni, chäälni, rexi'nni, rexyujni, xcälñasa'c narä, näjza xcälñasa'c xtidx Dios, <sup>30</sup> sica'ni lo guedxliujre te gayuu huält xhidajlrü. Sica'ni rolizjni, rebejtni, rebisiajnni, xñanni, rexi'nni, rexyujni. Sisiunajlrenini naj, dxejc xhaguibaa sica'ni yälñabajn par tejpas. <sup>31</sup> Xhidajl rebejn nani sajç lo guedxliujre xhet sajcdireni xhaguibaa; niluxh rebejn nani xhet sajçdi lo guedxliujre, xhaguibaaru gasajceni.

*Gunisac Jesús diidx xho guetni*  
(Mt. 20:17-19; Lc. 18:31-34)

<sup>32</sup> Dxejcru sasaj Jesús, nijdni lo rexpejnpacni sääreni Jerusalén, luxh cadxelojreni. Cadxejbza rebejn nani sanajlreni. Dxejcti guläsac Jesús rexpejnpacni lo rebejn, gusloj cayäjpni lojreni guira'ti nani sacni. <sup>33</sup> Räjp Jesús:

—Sionnu Jerusalén, luxh narä, Xi'n Dios nani gujc Niguii, sidedä ladznäa rebixhojz nani rñibee näjza rebejn ni ruluii lei. Luxh sinibeereni guetä. Suteedreni narä lo rebenzjit nani digac xpejn Israel. <sup>34</sup> Suxhisnäjreni narä, siguijnreni narä, sutiobxhejnzareni loä, dxejcru sugu'treni narä. Che riojn dxej sibañsacä.

*Gunab Jacob näjza Juan te yälñasa'c*  
(Mt. 20:20-28)

<sup>35</sup> Dxejcti gubig Jacoob nájza Juan, rexi'n Zebedeo, rájpreni lojni:

—Dad, rlaaznu gunlaalu nani guiniabnu lojlu.

<sup>36</sup> Dxejc rájp Jesús lojreni:

—¿Xhini'c rlaiztu gunä xcuent la'tu?

<sup>37</sup> Rájpreni:

—Cue teju cuä'lu ladbee, xteenu cue cuä'lu ladbärgw che acanibeelu.

<sup>38</sup> Dxejc rájp Jesús lojreni:

—Ditu gan xhini'c rniabtu. ¿Xhixh sajc yätu nani yä'ä? ¿Xhixh sajca guirobnistu si'cni guirobnisä? Nalajznu, xhixh sajc tedtu trabajw nani tedä narä.

<sup>39</sup> Sas rájpreni lojni:

—Sajc tednuni.

Dxejc rájp Jesús lojreni:

—Guliini sajc yätu nani yä'ä, luxh guirobnistu si'cni guirobnisä narä. <sup>40</sup> Te cue teju ladbee xtenä steetu cue xladbärgwä, xhet xtenä dini te gunidxäni. Rebejn nani agule Dios, reni'c cue xladbeä, xladbärgwä.

<sup>41</sup> Luxh che biejn diajg stzuureni bidxe'chreni loj Jacoob nájza loj Juan. <sup>42</sup> Sas gurejdx Jesúsreni, rájpreni lojreni:

—La'tu najntu renani rnibee lo rebejn nani digac xpejn Israel, rdxaglajz gasajcrueni lo rebejn. Luxh rebejn ni sajc rnibeduxhreni lo rebejn. <sup>43</sup> Xhet si'cni guntu la'tu. Chutis nani rlaiz gasajcru lojtu, riäjł gacni mos lojtu. <sup>44</sup> Luxh chutis la'tu nani rlaiz gasajcru, riäjł gacni xmos guiraatu. <sup>45</sup> Di Xi'n Dios ni gujc Niguii niääd, te ga'ptisni mos, biäädzani te quixni con xcäl'nabajni te laa xhidajł bejn lo dojl.

*Basiajc Jesús Bartimeo, ni natiä'p lojni*

(Mt. 20:29-34; Lc. 18:35-43)

<sup>46</sup> Dxejcti biäädreni Jericó. Che birii Jesús ro' guedx Jericó con rexpejn pacni nájza rebenxhidaal, cuä' nezyuj sobga' Bartimeo, xi'n Timeo. Natiä'p lojni. Ro'c cabääni gojn.

<sup>47</sup> Che biejn diajgni laa Jesús ni siääd Nasare't ni sadejd ro'c, guslojni rbedxa'ni, rájpreni:

—Jesús, xi'n David, balazlajz narä.

<sup>48</sup> Xhidajłreni gudidxa' lojni, te jiäuu ro'ni. Dxejc laani dipru rbedxa'ni rájpreni:

—Xi'n David, balazlajz narä.

<sup>49</sup> Dxejc guzudxi Jesús, gunibegajcni gucrejdx niguiiga.

Gurejdxreni lotiä'pga, rájpreni lojni:

—Basutijp lajzlu, gusulii, luj cabejdxni.

<sup>50</sup> Sas ro'ca xhabajłzni gudixhni, huisuliini, biäädtni lo Jesús. <sup>51</sup> Dxejc rájp Jesús lojni:

—Naja', ¿xhini'c rlaizlu gunä?

Dxejc rájp lotiä'pga loj Jesús:

—Dad, rlažä gunlu fiä.

<sup>52</sup> Dxejcti rájp Jesús lojni:

—Huij, abiajclu sa'csi rililajzlu.

Lagajc dxejc gujc bahuiini. Sanajłtni Jesús lo nejz.

## 11

*Biu' Jesús Jerusalén*

(Mt. 21:1-11; Lc. 19:28-40; Jn. 12:12-19)

<sup>1</sup> Cheni sadzujłreni gajxh Jerusalén, gudejdreni nejn reguedx Betfagé nájza nejn guedx Betania nez cuä' dajne' ni laa dan Oliib. Baxhal Jesu'c tiop xpejn pacni, <sup>2</sup> rájpreni lojreni:

—Colchäj guedxe' ni ria'n nez lojtu. Che guidzujłtu ro' guejdxga, sidxälu te bure' ni caduu. Gajd bejn cuibni. Colxhecni, coltanägajcni. <sup>3</sup> Palga yu' chu naa lojtu: “¿Xhicuent rujntu si'c?” Colye'tztis: “Dad caquiinni.” Dxejc suxhalgajcni bure'ga ree.

<sup>4</sup> Sääitreni ro'c. Dxejrcru ronejz bidxälreni te bure' caduu ro' te lä'. Dxejcti baxhecrenini.

<sup>5</sup> Gaii bejn ni tre' ro'c rájpreni lojreni:

—¿Xhicuent caguxhectuni?

<sup>6</sup> Dxejc rájpreni loj rebejn ga si'cni rájp Jesús lojreni gäbreni. Basangajc rebejn ga sanäreni bure'ga. <sup>7</sup> Dxejrcru biädnäreni bure'ga loj Jesús. Badzuubreni xhabajłzreni dejtz bure'ga. Gubijłti Jesús bure'ga. <sup>8</sup> Xhidajłza bejn gudixh xhabajłzreni lo nezyuj, sgaiireni gudi'ch balaj lo reyaj te gudixhnenini lo nezyuj.

<sup>9</sup> Rebejn ni nijd lojni náj reni sanajł dejtzni guredxa'reni, rájpreni:

—¡Colguiliä'p xpala'nni! Coldeed xquixhtiooz loj Dios sa'csi baxhalni nani siääd xcuentni.

<sup>10</sup> Coldeed xquixhtiooz loj Dios sa'csi agubiré xcäl'rnibee toxtadnu David. ¡Colguiliä'p xpala'n Dios ni yu' jiaro!



<sup>11</sup> Dxejcti biu' Jesús nen̄ guedx Jerusalén. Biu'zani nen̄ guidoro. Che bahuii Jesús guira'ti ni cayajc nenga, sanáni guitzubitio'p xpejn̄pacni, sääreni Betania sa'csi agudxej.

*Batzubde Jesús yejc te yagiigw ni xhet cajdi lojni*  
(Mt. 21:18-19)

<sup>12</sup> Che bara yääl, biunejzreni Betania. Dxejcti gusloj calaan Jesús, <sup>13</sup> bahuiini zijt sojb te yag iigw caj balajg lojni. Sas gubigni, bahuiini don gaxäjsi caj iigw lojni. Xhet bidxäldini lojni; balajgtis caj lojni, sa'csi xhet xtiempdi iigw dxejc. <sup>14</sup> Sas gunii Jesús räjpni loj yag iigwga:

—Rutru gauudi ninejxh ni rcaj lojlu par tejpas.  
Biejnza diajg rexpejn̄pacni.

*Gulää Jesús renani ruto' näj renani rsii nen̄ guidoo*  
(Mt. 21:12-17; Lc. 19:45-48; Jn. 2:13-22)

<sup>15</sup> Dxejcti bidzujn̄reni guedx Jerusalén. Biu' Jesús nen̄ guidoro. Gusloj cabääni renani ruto' näj renani rsii nen̄ guideoga. Niluxh batiejxhni rexmex renani ruchaa meel, näjza reyagxhil xten renani ruto' paloom. <sup>16</sup> Diruni nusaan nidednäjreni xhicos nez nen̄ guideoga. <sup>17</sup> Dxejc caguluiinireni, räpgajcni lojreni:

—¿La et screedi caj loj guijtz? “Xyu'ä sirilaj yu' cadro rninab guiraa rebenguedxliuj lo Dios.” La'tu abejntuni si'c xpiliää gubaan.

<sup>18</sup> Rebixhojz ni rnibee näjza remastr xten leii biejn diajgreni nani gunii Jesús. Sas gudiilreni xho ju'trenini, sa'csi rdxejbrei Jesús, sa'csi guiraa rebejn̄ rdxeloy rextidx Jesús. <sup>19</sup> Che biu' guxhijn̄, birii Jesús guedxga.

*Gubijdz yagiigw ni bidzubde*  
(Mt. 21:20-22)

<sup>20</sup> Che bara yääl gudejdreni, bahuiireni agubijdz guideb yagiigw, näj rexlobaani. <sup>21</sup> Dxejc banaj lajz Pedr, räjpni loj Jesús:

—Dad, bahuii yagiigw nani batzubdelu yejcn̄i, agubijdzni.

<sup>22</sup> Dxejcti gunii Jesús räjpni lojni:

—Colchalilajz Dios. <sup>23</sup> Rniliäpac lojtu, chutis nani gäb loj dajnre: “Gubicaj, bitejb loj nisdoo”, luxh dini guntio'p lajzni, chalilajztisni scree gac nani guniini, sajcpac nani guniini. <sup>24</sup> Ni'cni rniä lojtu, xhitis nani guiniabtu lo Dios che rninäjtni, colchalilajz xca'tuni, dxejc sica'tuni. <sup>25</sup> Luxh che guiniabtu Dios, palga yu' chu loj rdxechlajztu, colsiäjla lajztu, te näjza Xtadtu nani yu' xhaguibaa gusiäjla rextojltu. <sup>26</sup> Palga ditu gusiäjla lajztu con resa'tu, diza Xtadtu nani yu' xhaguibaa gusiäjla lajzni rextojltu.

*Yälrnibee xten Jesús*  
(Mt. 21:23-27; Lc. 20:1-8)

<sup>27</sup> Sas bidzunsacreni guedx Jerusalén. Laḷ ni sasaj Jesús nen̄ guidoro, rebixhojz nani rnibee, näjza rebejn̄ ni ruluii leii, näjza reguxhtis gubig lojni. <sup>28</sup> Räjpreni lojni:

—¿Xhi yälrnibee rajplu, ni'c rujnlu redzuunre? ¿Chu baniidx yälrnibee rujnlu redzuunre?

<sup>29</sup> Dxejc räjp Jesús lojreni:

—Guiniabdixäza lojtu. Coltzu'ni loä, dxejcti guiniäza xhi yälrnibeere rapä ni'c runä redzuunre. <sup>30</sup> ¿Chu baxhal Juan ni batiobnis? ¿La Dios o la rebejn̄? Colni loä näj.

<sup>31</sup> Dxejcti gunii loj sa'reni, räjpreni:

—Palga jie'tznu “Dios”, naani “¿xhicuent ditu nililajz xtiidxni?” <sup>32</sup> Diza niacti niäjbrei “rebejn̄” sa'csi rdxejbrei reben̄xhidaal, sa'csi guiraa rebejn̄ huililajz Juan gujc te bejn̄ ni guniipac xtidx Dios.

<sup>33</sup> Dxejcti guniireni, räjpreni loj Jesús:

—Dinu guidon.

Sas räjp Jesús lojreni:

—Dizana guiniä xhi yälrnibeere rapä runä redzuunre.

## 12

*Te xcuent rebenguidx ni rbäzlaa*  
(Mt. 21:33-46; Lc. 20:9-19)

<sup>1</sup> Dxejcti gusloj caguseed Jesús rebejn̄ con recuent ni ruluii, räjpni:

—Yu' te bejn̄ bazuj yaguub loj xyujni, bejn̄zani bazaani, dxejcru gudäänni te lajt cadro jäät uubga. Dxejcti bejn̄ni te yu' jiaa, te ro'c cue nani ga'p lo xyujni.

'Badedlaatinini loj gaii bejn̄, sä'tini zijt. <sup>2</sup> Che bidzujn̄ xpäii uub, baxhal baxhuaan uubga te xmosni loj rebejn̄ ni rbäzlaa ro'c, te xca'ni uub nani riäjla xca' bejn̄ga. <sup>3</sup> Dxejc rebejn̄ ni rbäzlaa ro'c gunaazreni mosga, gudijn̄renini, luxh bazejcrenini siini ganaxni. <sup>4</sup> Dxejcru baxhal baxhuaanga stee mos lojreni. Niluxh laareni bacuaareni guijni, gudilguijdxreni yejc

mosga, xho rniajni gubi'ni. <sup>5</sup> Dxejc baxhaḷ bejn̄ga stee mos, dxejc bagu'trenini. Baxhaḷni xhidajlrureni. Gaii gudilguixdreni, sgaiani bagu'treni.

<sup>6</sup> 'Yu'za tejtis xi'n̄ni, luxh sanälajzn̄ini. Por lult näjza xi'n̄ni baxhaḷni, naani: "Siucareni xi'n̄nä." <sup>7</sup> Dxejc rebejn̄ nani rbäzlaa ro'c räjp loj sa'reni: "Dee najc laa ni jiannäj ree. Coltaa, guigu'tnuni, te xca'nu yujre." <sup>8</sup> Sas gunaazrenini, bagu'trenini. Guläätrenini lo yujga.

<sup>9</sup> 'Xhicha gun baxhuaan yaguubga rebejn̄re? Siäädni luxh sugu'tni rebejn̄re, dxejcti gudeedni yujga loj ste'ca bejn̄.

<sup>10</sup> '¿La gajdtu goḷ guijtz ni rnii scree?

Guij nani guläcaj renani runchee yu',  
ni'c agujc mastr ni guzuj galoo.

<sup>11</sup> Dad xtenuu bejn̄ scree, cos sacduxhni nezlojnu.

<sup>12</sup> Dxejc rlaiz reguxhtis nani bacuadiajg cuentre niniaaz Jesús, sa'csi gucbeereni laareni cacuaa Jesús diidxre. Sa'csi bidxejbreni reben̄xhidaal, ni'c basa'nrenini, sä'tireni.

*Diidx xcuent reimpuet*

(Mt. 22:15-22; Lc. 20:20-26)

<sup>13</sup> Dxejcti baxhaḷreni gaii xpejn̄ refarisee näjza gaii xpejn̄ Herodes loj Jesús te gula'tzreni don xho gac guiniaazreni Jesús. <sup>14</sup> Dxejcti biäädreni, räjpreni lojni:

—Dad, nadonnu luj najclu te bejn̄ ni rnili. Par luj guiraasi bejn̄ sajc tebloj, sa'csi dilu fii la sajc bejn̄ o la xhet sajc di bejn̄. Luj ruluiipaclu xhini'c rlaiz Dios gun bejn̄. ¿La laaca quiix bejn̄ reimpuet lo xcubieer César o la xhet laadi? ¿La guidiixnu o la dinu guidiix?

<sup>15</sup> Dxejcti laani gucbegajcni rujsireni si'cni rniabdiidxreni. Räjpni lojreni:

—¿Xhicuent runnäjtü narä scree? Coltanä te meelga loä, te fiä lojni.

<sup>16</sup> Badeedtireni te meel lojni, dxejc räjpni lojreni:

—¿Chu yejc caj lojni, chu laj caj lojni?

Dxejc räjpreni:

—Xten César.

<sup>17</sup> Dxejc räjp Jesús lojreni:

—Coldeed nani najc xten César loj César; coldeedza nani najc xten Dios loj Dios.

Baschelojni rebejn̄ga con xtiidxni.

*Yälmiabdiidx xcuent yälrbansacni lo rebengut*

(Mt. 22:23-33; Lc. 20:27-40)

<sup>18</sup> Sas biädhuui resaducee loj Jesús. Resaducee najc rebejn̄ nani rnii di rebengut guibaḅsac. Dxejc gunabdiidxreni lojni, räjpreni:

<sup>19</sup> —Dad, xleii Moisés ruluii loonu, palga guet te niguii luxh gusa'n̄ni chääl̄ni ruti xi'n̄ni, nanabpac xca' bejtzni chääl̄ni, te chu xi'n̄ni con laani lacua niu' xi'n̄n tobejtzni. <sup>20</sup> Guyu' gajdz niguii, bejtz najceni. Sas cua' niguigalooga chääl̄ni. Che gujtni ruti xi'n̄ni. <sup>21</sup> Dxejcti cua' ni rojppa gunaaga. Che gujtni, rut gajc di xi'n̄ni. Si'cza sajac ni riojnga. <sup>22</sup> Si'cza guläznäj gunaaga guigajdzreni. Per nicla tej reni di xi'n̄reni niu'. Dxejcti gujtzta gunaaga. <sup>23</sup> Guigajdzreni guläznäjreni gunaare. Cheni guibaḅsacreni lo rebengut, ¿chu chääl̄ gacni?

<sup>24</sup> Dxejc bazejc Jesús diidx lojreni, räjpni:

—Et laadi rniitu, sa'csi ditu gumbesa'c rextidx Dios nani bacuaa reniguii lo guijtz, dizatu gumbee yäl̄rnibee xten Dios. <sup>25</sup> Che guibaḅsacreni loj rebengut, direni guchnaa, rutza gudeedtireni te guchnaareni. Niluxh sajcreni si'c najc rexangl Dios nani yu' xhaguibaa.

<sup>26</sup> Palga canabdiidxtu la rbaḅsac rebengut, ¿la di lajztu guisaj biltu guijtz ni bacuaa Moisés? Moisés bacuaa nani gunii Dios lojni nen bajl, räjpni: "Narä nacä Xtios Abraham, Xtios Isaac, Xtios Jacob." <sup>27</sup> Palga Dios najc Xtios rebejn̄re, direni gac bengut, nabannäjreni Dios. Et laadi najc xhigabtu.

*Yälrnibee ni sajcro*

(Mt. 22:34-40)

<sup>28</sup> Dxejcro bidzujn̄ tej rebejn̄ ni najn̄ lei, biejn̄ diajgni xhi caniireni, biejn̄za diajgni laaca gunii Jesús lojreni. Dxejcti gunabdiidxni loj Jesús:

—¿Xhi mandamient sajcro lo guiraareni?

<sup>29</sup> Dxejc räjp Jesús lojreni:

—Mandamient nani sajcro loj guiraareni najc dee: "Bacuadiajg luj, guejdx xten Israel, Dad Xtiosnu, Dad tejtis najcni. <sup>30</sup> Chanälajzlu Dad Xtioslu guideb lastoolu, näj xaimlu, näj guideb xcäriejn̄lu, näjza guideb xcäl̄nadiplajzlu." <sup>31</sup> Sigajcza najc mandamient ni rojppa: "Huinalajz sabejn̄lu si'ctis sanälajzlu lagajc luj." Redee najc remandamient nani sajcro loj guiraareni.

<sup>32</sup> Dxejcti räjp bejn̄ga ni najn̄ lei lojni:

—Laaca guniilu Dad. Tejtis najc Dios, luxh ruti chu stee najc si'c laani. <sup>33</sup> Luxh sacduxh chanälajz bejn Dios guideb lastooni, näj xcäriejnni, näjza xaimni, näj guideb xcälñadiplajzni, luxh chanälajzni resabejnni sigajc laani. Redee sajrcu loj ni rujn bejn che rudeedreni gojn lo Dios.

<sup>34</sup> Che bahuii Jesús laaca guniini, räjpni lojni:  
—Guxii cayäädx te jiu'lu loj xcälñabee Dios.  
Sas rutru biajxhdi gunabdiidx loj Jesús.

*Chu xi'n najc Crist*  
(Mt. 22:41-46; Lc. 20:41-44)

<sup>35</sup> Che caguseed Jesús neñ guidoro, räjpni:  
—¿Xho mood rñii rebejn ni najn leii Crist najc xi'n David? <sup>36</sup> Sprit Dxan xten Dios basnii David che bacuaani:

Räjp Dios loj Dad xtenä:

“Gurej ladbee xtenä, che gudzugäli reni rdxe'ch lojlu.”

<sup>37</sup> Palga lagajc David räjp: “Dad, xtenä”, che guniini xcuent Crist, ¿xhoxh najc Crist xi'n David?

Rebenxhidaal nani yu' guejdxga bacuadiagsa'creni xtiidxnii.

*Gule'c Jesús xquej remastr xten leii*  
(Mt. 23:1-36; Lc. 11:37-54; 20:45-47)

<sup>38</sup> Lañi caguseedni rebejn, räjpni lojreni:  
—Colñusün, na'c gu'chtu loj rebejn ni ruluii leii. Laareni rñajz sanäj reladsiiool xtenreni. Rdxagljazreni rñii bejn lojreni nez lo reguii. <sup>39</sup> Rñajzarenii cuereni cadre rbej renani sajrcu neñ reguidoo näjza cadre ru' relanij. <sup>40</sup> Rudzucajzarenii xhixten rebiiud, rñiizarenii xhidalduxh diidx che roñreni le', te rusäuureni loj rebejn. Castigwroru gac redee.

*Gojn xten te biud prob*  
(Lc. 21:1-4)

<sup>41</sup> Dxejcti gurej Jesús cuä' caj cadre rusäl bejn gojn. Cahuiini cagusäl rebejn meel neñ cajga. Xhidajl reni rajp cagusäl xhidajl meel nenga. <sup>42</sup> Che biäd te biud prob, basäni tiop melbäz ni sajc si'cti tej centaab. <sup>43</sup> Dxejrcu gurejdx Jesús rexpejnpacni, räjpni lojreni:

—Rñiliäpac lojtu, biud proobre basäl xhidajlrlo lo guiraa renani basäl neñ cajre, <sup>44</sup> sa'csi guiraa renani abasäl che'nsi xhixtenreni. Luxh gunaare basäl guiraa nani rajpni. Ni'ctis najc nani gaunäjni.

## 13

*Gunii Jesús sibijl guidoo*  
(Mt. 24:1-2; Lc. 21:5-6)

<sup>1</sup> Cheni sariireni neñ guidoro, räjp tej rexpejnpacni lojni:

—Dad, bahuii lacti reguij, lacti reyu'.

<sup>2</sup> Dxejcti räjp Jesús lojni:

—¿La rhuiilu loj reyu're? Nicla tej guij diija'n dzuub yejc sa'ni, guiraliireni sire'ch.

*Recos ni gac che ameer nitloj guedxliuj*  
(Mt. 24:3-28; Lc. 21:7-24; 17:22-24)

<sup>3</sup> Dxejc sobga' Jesús yejc dajne' ni laa dan Oliib, cahuiini nez ro' guidoo. Che sugaxhtebreni, gunabdiidx Pedr näj Jacoob näjza Juan näjza Andrés lojni, räjpreni:

<sup>4</sup> —Gunii loonu, ¿gac gac dee? ¿Xhi guihuiinu te gacheenu asiäddzünğajxh soob guiraa rediidxre?

<sup>5</sup> Dxejcti gusloj gunii Jesús lojreni, räjpni:

—Colñuii, te rut gusgueedi la'tu, <sup>6</sup> sa'csi xhidalduxh bejn jiaäd con laä, gäbreni: “Narä nacä Crist”, luxh rñiisireni si'c, susgueezarenii xhidajl bejn.

<sup>7</sup> ‘Che jiejn diajgtu yu' guer näj yälñadxeeb xten guer, na'c guidxejbtu. Nanabpac gacni; et dxejcti nitloj guedxliuj. <sup>8</sup> Säjs nación yejc sanacionni, näj yälñabee yejc sayälñibeeni. Xhidajl lajt sajcxu, siliaanza bejn, luxh säjs rebejn yejc sa'ni. Redee najc ni guisloj guidxejb, gachuinza lajzni.

<sup>9</sup> ‘Dxejc la'tu colñusün sa'csi suteedreni la'tu ladznäa reguxhtis, siguijnzarenii la'tu neñ reguidoo. Sacrejdxtu lo regubieer näjza loj reñeii xcälñasa'c narä, te si'c gac guiniitu xtidxä lojreni. <sup>10</sup> Nanabpac guirechxgaa xtidx Dios loj guiraa reben guedxliuj. <sup>11</sup> Che guiniaazreni la'tu, che chanäreni la'tu loj reguxhtis, na'c gunxgaatu xhigab xhi diidx guiniitu. Colñii nani jiaätis yejcti dxejc, sa'csi xhet la'ditu ni guinii, Sprit Dxan xten Dios ni guinii. <sup>12</sup> Luxh suto' bejn lagajc bejtzni te guet bejtzni. Suto'za dad lagajc xi'nñi. Säjs rebiiux yejc rexcusajnni

te guet reguzajnga. <sup>13</sup> Sidxechlajz guiraa rebejn lojtu sa'csi najctu xpenä; nani ted guiraa retrabajwre, ni'c gudeed Dios xcäl'nabajnani.

<sup>14</sup> 'Che fitu loj nani najc yäl'rdxechlajz, nani najc yäl'runitloj, nani gunii Daniel ni gunii xtidx Dios. Che fitu nani suga' cadro di nunyäj'l suuni, dxejcti suguxun renani yu' nez Judea chääreni nez neñ redajn. (Nani goł guijtzre sugacbeenini.) <sup>15</sup> Bejn nani suga' yejc yu' na'c jiaätjni jiu'ni neñ te yu' xca'ni gaii xhixtenni. <sup>16</sup> Nani yu' loj niaa, di gal jiaät te xca'ni xhablajzni. <sup>17</sup> jAii! Xhiza nalas chu regunaa ni nuu báz, luxh renani rusiä' xi'nni, neñ redxejga. <sup>18</sup> Col'nab loj Dios na'c sactu scree neñ rebäinajl. <sup>19</sup> Neñ redxejga su' trabajwduxh, nani gajd chu che bencheeli Dios guedxliuj, luxh diruni chu, dxejctis chuni. <sup>20</sup> Paru di Dad gusia'tz redxejga, nicla tej bejn di laa. Susia'tzni redxejga sa'csi sanälajzni rexpejnni nani aguleni.

<sup>21</sup> 'Dxejc palga yu' chu naa lojtu: "Col'huii, aree Crist", o "Col'huiire, ani suga' rec", na'c chailajztuni. <sup>22</sup> Sa'csi su' bejn nani rniisi najcni Crist. Su'za renigui nani rniisi rniireni xcuent Dios. Sujnzareni milaagwr, te gusgueerene, te palga sajcn, rlanjzreni gusgueelireni renani agule Dios. <sup>23</sup> Ni'cni la'tu col'susin; agunixgaä lojtu guira'ti ni gac.

*Xho gac che jiaäd Xi'n Dios ni gujc Niguii*  
(Mt. 24:29-35, 42-44; Lc. 21:25-36)

<sup>24</sup> Neñ redxejga, cheni luux retrabajwduxhga, sicäy lo gubijdx, luxh diru bäii gusanij. <sup>25</sup> Sitejb rebäl'xhaguibaa, sinibsejs recos nani nasnäj rebäl'xhaguibaa. <sup>26</sup> Dxejcti suhuii rebejn loä. Xi'n Dios nani gujc Niguii, siälä neñ reza guideb yäl'rribeduxh xtenä, näjza xcäl'dimbicha'ä. <sup>27</sup> Dxejcti guxhalgacä rexanglä jiaätojpreni renani guleä guideb lo guedxliuj, cat nalooli guedxliuj näjza cadro nalooli guibaa.

<sup>28</sup> 'Col'guiseed nani ruluii yagiigw. Cheni rii rebäte' lojni luxh che rcaj balajz lojni, acaxhnajntu bäii gusguij asadzungajxh. <sup>29</sup> Sigajcza, che fitu acayajc recosre, sacbeetu asiädgaxhä, ameer guidzunä. <sup>30</sup> Rniliäpac lojtu, rebejn ni nabajn dxejc, direni nitloj, fixgaareni gac recosga. <sup>31</sup> Sinitloj guibaa näjza guedxliuj, rextidxä di nitloj.

<sup>32</sup> 'Naj, rut najndi guc gac recosga, nicla rexangl Dios ni yu' xhaguibaa, niclaza narä Xi'n Dios, Xtadätis najn.

<sup>33</sup> 'Col'huii, col'susin, col'nab loj Dios, sa'csi ditu gan guc guidzujn redxejga. <sup>34</sup> Dee najc si'c najc te bejn ni birii sää zijt. Che gajdlini guirii, badeedni xtzun rexmosni, luxh gunibeezani susin nani canäj rolä'. <sup>35</sup> Si'cza col'susin, sa'csi ditu gan guc jiaäd baxhuaan yu'ga, la jiaädni gudxej, o la jiaädni garol yääl, o la cäy, o la jiaädni rsil. <sup>36</sup> Col'susin, te di guiga'tu nagayejstu che guidzujn. <sup>37</sup> Rediidx nani rniä lojtu, loj guiraa rebejn rniäni: col'susin.

## 14

*Ruchaagreni diidx te guiniaazreni Jesús*  
(Mt. 26:1-5; Lc. 22:1-2; Jn. 11:45-53)

<sup>1</sup> Riäädx tiop dxej guidzujn lanij, dxej ni ruzaa lajzreni gulaareni ladznaa reEgipto. Neñ redxejga rajwreni yätxtiil nani di saguij. Rebixhojz nani rniibee neñ guidoo xten rexpejn Israel näj rebejn ni ruluii leii rlanjzreni niniaazreni Jesús con yäl'rusguee, te nugu'trenini.

<sup>2</sup> Dxejcti räjpreni lo sa'reni:

—Na'c jiennu scree neñ redxelani, te na'c gun beñguejdx biey.

*Te gunaa ni basäl se't yejc Jesús Betania*  
(Mt. 26:6-13; Jn. 12:1-8)

<sup>3</sup> Yu' Jesús Betania, roljz Simón, nani guyu' guejch ni ral tiejxhni. Che sobga'ni lo mex, biääd te gunaa ca' te bo'tguij yu' setnard neñni. Rlianexhduxhni, sacduxhni. Dxejc gud'i'chni yejn bo'tguijga, te basäl'ni se'tga yejc Jesús. <sup>4</sup> Yu'za gaiireni ro'c ni bidxe'ch, räjp loj sa'reni:

—¿Xhicuent banijtni setnejxhga? <sup>5</sup> Paru nido' se'tga, nijni si'cti choñ gayuu denar, te nica' meelga rebejn ni xhet rajpdi meel.

Luxh caguidxa'reni loj gunaaga.

<sup>6</sup> Dxejc räjp Jesús lojrent:

—Col'saanni, ¿xhicuent rodxojntu nani cayujn gunaare? Cos sacduxh dee bennäni narä. <sup>7</sup> Guideb ni guibajntu, su' rebejn nani xhet rajpdi lojtu, luxh che rlanjztu sajz gacnäjturen. Narä et xchejdi chu'ä lojtu. <sup>8</sup> Gunaare abejnini nani gujctis bejnini. Abaslanexhxaanni tiexhä, te chää tiexhä neñ baa. <sup>9</sup> Rniliäpac lojtu, cadrotis guidzujn xtidx Dios, guideb lo guedxliuj, siniizareni xcuent nani bejn gunaare, te guinaj lajzreni gunaare.

*Rlajz Judas guto' Jesús*  
(Mt. 26:14-16; Lc. 22:3-6)

<sup>10</sup> Dxejcti huij Judas Iscariot, nani najc tej retzubitio'p xpejñpac Jesús, loj rebixhojz nani rnibee te guto'ni Jesús lojreni. <sup>11</sup> Che biejn diajg rebixhojz xtiidxni, bibalajzreni. Räjpreni sudeedreni meel lojni. Dxejcti caguiil Judas xho guto'ni Jesús.

*Gudauxchej Dad con rexpejñpacni*

(Mt. 26:17-29; Lc. 22:7-23; Jn. 13:21-30; 1Co. 11:23-26)

<sup>12</sup> Biu'ti xmaan che rajwreni yätxtiil ni di saguij. Dxej lanjga, rugu'treni xiil, te ruzaa lajzreni dxej ni gułaareni ladznaa reEgipto. Räjprej rexpejñpacni loj Jesús:

—¿Caro rlanjzlu chosucheenu te gauulu nadxej, dxelanij?

<sup>13</sup> Dxejce baxhałni tiop rexpejñpacni, räjpreni lojreni:

—Cołchäj neñ guejdx, ro'c guidxaagtu te niguii ni nuu te re' nis. Cołchanajl niguiiga.

<sup>14</sup> Cadro jiu'ni colye'tz loj bejn ni najc rolizjni ro'c: “Naj Dad mastř, ¿con yu' cadro ria'n rebiooz, cadro gaunäjni rexpejñpacni nadxej, dxelanij?” <sup>15</sup> Dxejcti guluiini lojtu te yu' ni sojb jiaaliga yeje sa'ni, ni asuchexгаа neñni. Colyujn xhi guidaunu ro'c.

<sup>16</sup> Sas huij rexpejñpacni, bidzujñreni neñ guejdxga. Bidxälreni te yu' si'cni räjpre Jesús lojreni. Ro'c bejnreni xhi gudajwreni dxelanij.

<sup>17</sup> Che huääz gubijdx, bidzunäj Jesús guitzubitio'p xpejñpacni. <sup>18</sup> Lałni sobga'reni lo mex cayajwreni, räjpre Jesús lojreni:

—Rniliäpac lojtu, tej la'tu ni cayaunää, suto'ni narä.

<sup>19</sup> Dxejcti gusloj cayac-huin lajzreni, räjpre tebgajreni lo Jesús:

—¿La naräni?

Räpgajc steeni:

—¿La naräni?

<sup>20</sup> Dxejcti guniini, räjpreni lojreni:

—La tej retzubitio'p, tej ni cayajw loj xpla'tä. <sup>21</sup> Sa'csi narä Xi'n Dios nani gujc Niguii, sia'ä, si'cpacni caj loj xtiidx Dios, per xhiza nalajz niguii ni guto' narä. Huentejti na'c niajl niguiire.

<sup>22</sup> Lałni cayajwreni, cua' Jesús yätxtiil, badeedzani xquixhtiooz loj Dios dxejce guła'nini, badeednini lojreni. Dxejcti räjpreni:

—Cołca' yätxtiilre. Dee najc si'c tiexhä.

<sup>23</sup> Cuagajcni te bas. Che abadeedni xquixhtiooz loj Dios, badeednini lojreni, gu' guiraareni neñ basga. <sup>24</sup> Dxejcti räjpre Jesús lojreni:

—Dee najc si'c xtienä ni ruluu diidx ni biä'nmu, nani guixe' xcuent xhidajl rebejn.

<sup>25</sup> Rniliäpac lojtu, diruna yä'ä bin nani rii yeje uub, dxejli yä'äni stehuält loj xcäl'rnibee Dios.

*Gunii Jesús sinii Pedr dini gumbeeni*

(Mt. 26:30-35; Lc. 22:31-34; Jn. 13:36-38)

<sup>26</sup> Che gulujx bilreni te dij xten Dios, biriireni, sääreni nez dajne' ni laa dan Oliib. <sup>27</sup> Dxejcre räjpre Jesús lojreni:

—Guiraatu sibälaztu narä naguxhijn, sa'csi si'c cajni lo guijt: “Sugu'tä baxhtoor luxh suxun rexiiil.” <sup>28</sup> Che guibañsacä loj rebengut, ganidä cha'a Galilee, dxejcti jiäädte.

<sup>29</sup> Dxejce räjpre Pedr loj Jesús:

—Palga guiraareni cuälazlu, narä dina cuälazälu.

<sup>30</sup> Dxejce räjpre Jesús lojni:

—Rniliäpac lojlu, lagajc guxhijnre, nicla gajd guidgaii cuedxa' tiop huält, luj aguiniilu choñ huält dilu gumbee narä.

<sup>31</sup> Luxh laani sanuutis xtiidxni, räjpreni:

—Cadro guetlu setäza, dina guiniä dina gumbeälu.

Luxh guiraa rexpejñpacni gunii si'c.

*Gunab Jesús loj Dios che yu'ni Getsemani*

(Mt. 26:36-46; Lc. 22:39-46)

<sup>32</sup> Dxejcti bidzujñreni te lajt cadro laa Getsemani. Dxejce räjpreni loj rexpejñpacni:

—Cołcuj ree lałni chanabä lo Dios.

<sup>33</sup> Dxejcre sanäni Pedr näj Jacoob näjza Juan. Dxejce gusloj cayac-huinduxh lajzni, luxh cayu'ni yälrsiaduxh. <sup>34</sup> Dxejce räjpreni lojreni:

—Cayac-huinduxh lazä, an sugu'tni narä. Cołjia'n ree, coltie'ch bacal.

<sup>35</sup> Sas gusajni tla', bazuxhijbni lo yuj, dxejcti gunabni lo Dios don la niajc nidedcaj nani sacni dxejce. <sup>36</sup> Räjpreni:

—Abba, xtadä, luj rajc rujnlu guira'ti: badzucay retrabajwre loä. Xhet si'cni rlanjzä narä, bejn si'cni rlanjzlu luj.

<sup>37</sup> Dxejce biäädni gunaaznireni nagayejsreni. Dxejce räjpreni lo Pedr:

—Simón, ¿la nagayejslu? ¿La nicla te rate' diniajcdi nutie'chlu bacal? <sup>38</sup> Coltie'ch bacal, colnab lo Dios, te na'c guntu dojl. Lastootu rlanj gutie'chtu bacal, luxh tiejxhtu abadxajg.

<sup>39</sup> Huij Jesús stehuált, binabni loj Dios, guniini lagajc rediidx ni guniini galoo. <sup>40</sup> Dxejcti biádsacni cadro tre'reni, gunazsacnireni nagayejsreni, sa'csi yuduxh bacal lojreni. Luxh direni nidxäl xhi niniireni lojni. <sup>41</sup> Ni riojn huált biáädni, dxejc räjpni lojreni:

—Agojl colguejs, colsilajz, agujc, abidzujñ or ni ted Xi'n Dios ni gujc Niguii ladzña rebeñdojl. <sup>42</sup> Colchastie, colcho'. Asiáddzungajxh ni guto' narä.

*Gunaazreni Jesús*

(Mt. 26:47-56; Lc. 22:47-53; Jn. 18:2-11)

<sup>43</sup> Canisijcni scree, che bidzujñ Judas, ni najc te retzubitio'p xpejn pacni, siädnäni xhidajl bejn. Ca'reni spaad, ca'reni yajg biriireni lo rebixhojz nani rnibee, näjza rebejn ni ruluii lei, näjza rebeñgool nani najc guxhtis. <sup>44</sup> Niluxh nani ruto' Jesús abadeedni te seen lojreni, räjpni:

—Nani guchagro'ä, ni'c najc laani. Colnaazni, colyaptzu'tzni te si'c chanätuni.

<sup>45</sup> Che bidzujñ Judas, gubigni loj Jesús, räjpni lojni:

—Dad, Dad.

Sas bachagro'nini. <sup>46</sup> Dxejcru gunaazreni Jesús ro'c.

<sup>47</sup> Dxejc tej reni suga' ro'c, gulää xspaadni, gudilguijdxni xmos bixhojz nani sajcru, batiu'ni diajgni. <sup>48</sup> Dxejc räjp Jesús loj rebejn:

—¿La siädxhiitu narä con spaad näjza garo't si'c rixiitu te gubaan? <sup>49</sup> Guiraa dxej guyu'ä lojtu nen guidoo, caguluiätu xtidx Dios luxh ditu niniaaztu narä. Scree cayajcni, te soob diidx ni caj lo reguijtz.

<sup>50</sup> Dxejcru rexpeljñ pacni gulälazrenini, baxuñtirenini.

*Bi'n nani baxuñ*

<sup>51</sup> Sanajlza te bi'n Jesús, nadejbni ganaxhtis te bariaad. Si'c gunaazrenini. <sup>52</sup> Dxejcti baxuñni, libasa'nni bariaadga, sä'tini xhabäälni.

*Suga' Jesús loj reguxhtis*

(Mt. 26:57-68; Lc. 22:54-55, 63-71; Jn. 18:12-14, 19-24)

<sup>53</sup> Dxejc biädnäreni Jesús loj bixhojz ni sajcru. Bidojñ rebixhojz nani rnibee, näj rebeñgool ni najc guxhtis, näjza rebejn ni ruluii lei. <sup>54</sup> Luxh Pedr zijt zijt sanajlni Jesús. Che bidzujñtini lo xle' bixhojz ni sajcru, gurenäjni rebejn nani rajp ro'c, cagucha' lajzni lo bajl.

<sup>55</sup> Rebixhojz nani rnibee, näjza guiraa rebeñgool ni najc guxhtis, caguiilreni xhi tej xquej Jesús nidxälreni, te nugu'treni Jesús, xhet bidxäldireni. <sup>56</sup> Xhidajl bejn gunii didxxhi, räjpreni et laadi rujñ guni, niluxh di xtiidxreni nile', sa'csi garen garen guniireni. <sup>57</sup> Dxejc huisulii gaii bejn ni guniireni stee didxxhi xcuent Jesús, räjpreni:

<sup>58</sup> —Nuunu biejn diaagnu guniini: “Sutiexhä xyu' Dios ni guc-chee con ñaa rebejn, luxh chontx dxej guncheä steeni, ni nac-chee et con ñaadi rebejn.”

<sup>59</sup> Nicla si'c di xtiidxreni nile', sa'csi garen garenza guniireni.

<sup>60</sup> Dxejcti huisulii bixhojz ni sajcru galäii guiraa rebejn, gunabdiidxni loj Jesús räjpni:

—¿La digacdi guiniilu xhi guiniilu xcuent requej ni cabe'c reniguiire, ä?

<sup>61</sup> Laani niäuuñtis ro'ni, xhet guniidini. Dxejcti gunabdiidxsac bixhojz ni sajcru lojni, räjpni:

—¿La luj ni najc Crist, xi'n Dios nani rliä'p bejn xpala'nni, ä?

<sup>62</sup> Dxejcti räjp Jesús lojni:

—Naräni. Suhuiitu loä, Xi'n Dios nani gujc Niguii, sobga'ä xladbee Dios ni rnibee, siäläza nen reza ni tre' xhaguibaa.

<sup>63</sup> Dxejcru bixhojz ni sajcruga, batiäjsni tla' xhajbni, räjpni:

—¿Xhi jienrunu guidiilnu diidx xcuentni? <sup>64</sup> Abiejñ diajgtu xho guniyajni Dios. Naja', ¿xhi najtu?

Dxejcti guiraareni räjp nungäjl pac guetni.

<sup>65</sup> Dxejc yu' reni gusloj cagutiobxhejn lojni, luxh basäuureni lojni, dxejc huääzrenini, räjpreni lojni:

—Guni, ¿chuni'c huääzlu?

Luxh renani canäjni gudajp lojni.

*Gunii Pedr dini gumbee Jesús*

(Mt. 26:69-75; Lc. 22:56-62; Jn. 18:15-18, 25-29)

<sup>66</sup> Dxejc suga' Pedr lo yuj, nez lo le'ga, che biääd te xcriaad bixhojz ni sajcru. <sup>67</sup> Luxh bahuiini cagucha' lajz Pedr, cadxelojni lojni. Dxejcti räjpni:

—Näj luj nadxaaglu Jesús ni siäd Nazare't.

<sup>68</sup> Dxejc Pedr basgueeni, räjpni:

—Dina gumbeäni. Dizana ganä xhini'c caniilu.

Dxejcti biriini sääni ro' suaan. Dxejcti guredxa' guidgaa. <sup>69</sup>Dxejc bahuisac criaadga lojni, räjpni loj renani suga' ro'c:

—Niguiire najc laa tejreni.

<sup>70</sup>Luxh laani basgueeni stehuält. Che gojl stera't, räpsac renani suga' ro'c loj Pedr:

—Guliipacni näj luj najclu tejreni, sa'csi beṇ Galileelu, luxh guyasi riejn rniilu si'c rni rebeṇ Galilee.

<sup>71</sup>Dxejc gusloj canii Pedr:

—Dios gun castiigw narä palga xhet guliidi ni caniä. Dios najc testiigw, dina gumbaä niguii nani caniitu.

<sup>72</sup>Dxejcti baroj huält guredxa' guidgaa. Dxejc banalajz Pedr nani räjp Jesús lojni: “Che gajdli guidgaa cuedxa' tiop huält, luj gacla choṇ huält aräjplu dilu gumbee narä.”

Dxejc guslojni cayooni.

## 15

### *Suga' Jesús loj Pila't*

(Mt. 27:1-2, 11-14; Lc. 23:1-5; Jn. 18:28-38)

<sup>1</sup>Che bara yääl bidxaag sa' rebixhojz ni rnibee, näj rebeṇgool ni najc guxhtis, näjza rebeṇ ni ruluii leii, näjza guirali reguxhtis. Dxejcti gusloj cachaagreni diidx xho gunreni. Baliibreni Jesús, sanätirenini, niluxh badeedrenini loj Pila't. <sup>2</sup>Dxejc gunabdiidx Pila't loj Jesús räjpni:

—¿La luj ni najc reii xten rexpejṇ Israel, ä?

Räjp Jesús lojni:

—Si'cni guniilu, si'c najcni.

<sup>3</sup>Dxejc gusloj rebixhojz nani rnibee cabe'c rexquej Jesús. <sup>4</sup>Gunabdidxsac Pila't lojni:

—¿Xhet rniidilu ä? Ahuii lacti xquejlu cabe'ceni.

<sup>5</sup>Bidxeloj Pila't sa'csi nicla si'c xhetru guniidi Jesús.

### *Gunibeereni guet Jesús*

(Mt. 27:15-31; Lc. 23:13-25; Jn. 18:38-19:16)

<sup>6</sup>Dxelaniipac ruslaa Pila't tej rebeṇ ni yu' latzguiib. Ruslaani chutis te ni rniab rebeṇ. <sup>7</sup>Lo rebeṇ ni yu' latzguiib nadxaag te niguii ni laa Barrabás. Bagu'tni te bejṇ che nu'chni lo te cuaa bejṇ ni gudilnäj gubieer. <sup>8</sup>Dxejc bidojpxhidajl bejṇ loj Pila't, gunabreni lojni gunni si'ctis rujnni casob lanij. <sup>9</sup>Dxejc gunabdiidx Pila't lojreni, räjpni:

—¿La rlanjtu guslaä reii xten rexpejṇ Israel, ä?

<sup>10</sup>Sa'csi gucbegajcni rdxechlajz rebixhojz loj Jesús, ni'c bateedrenini lojni. <sup>11</sup>Ni'cni baquiiilza rebixhojz ni rnibee rebeṇxhidaal te gäbreni lo Pila't:

—Baslaa Barrabás loonu lacuaa ni guslaalu Jesús.

<sup>12</sup>Dxejc räjp Pila't lojreni stehuält:

—¿Xhini'c rlanjtu gunnä nani rniitu reii xten rexpejṇ Israel?

<sup>13</sup>Dxejcru guredxa'reni:

—¡Bacuaani lo crujz!

<sup>14</sup>Dxejc räjp Pila't lojreni:

—¿Xhini'c xhet laati bejnni?

Dxejcti laareni rbedxa'rureni:

—¡Bacuaani lo crujz!

<sup>15</sup>Baslaati Pila't Barrabás, sa'csi rlanjz ni nuspaani lajz rebeṇxhidaal. Che gulujx gunibee Pila't, bia Jesús. Bateedti Pila't Jesús loj rexsoldaadni, te xcajni loj crujz.

<sup>16</sup>Dxejc huinä rexsoldaadni Jesús neṇ Pretoor, yu' cadre rujnreni yälguxhtis, ro'c batojpreni guiraa resa'reni. <sup>17</sup>Dxejcti bashuajcwreni Jesús te lad moraad, bencheereni te coron guejch basälreni yejčni. <sup>18</sup>Guslogajc caguxhi näjrenini, caniiireni lojni:

—¡Colguiiä'p xpala' reii xten rexpejṇ Israel!

<sup>19</sup>Batiäjreni te yabixhijl yejčni, batiobxhejnreni lojni, luxh guzuxhijbreni te rajnrenini. <sup>20</sup>Che gulujx basacsireni Jesús, gulääreni lad moraad ni najcwni, sas bashuajcwrenini xhajbpacni. Gulägajceni Jesús te cuaarenini lo crujz.

### *Bacuaareni Jesús loj crujz*

(Mt. 27:32-44; Lc. 23:26-43; Jn. 19:17-27)

<sup>21</sup>Te niguii ni laa Simón, ni siääd Cirene, sadejd ro'c, bazajni lo nejz. Niguiire najc xtad Alejandro näjza Rufo. Che sadejdni nejzga, la fuerz basguurenini xcrujz Jesús.

<sup>22</sup>Dxejcti huinäreni Jesús cadre laa Gólgota, nani säloj: dan Calabeer. <sup>23</sup>Ro'c badeedreni lo Jesús bin nani nu'ch mir lojni, dxejc laani naaddini niä'ni binga. <sup>24</sup>Che gulujxti bacuaareni Jesús loj crujz, gudzujtreni yejcx rexhajbni, te don xhini'c xca' tejgareni.

<sup>25</sup> Agujc choŋ or gulejn gubijdx che bacuaareni Jesúś lo cruzj. <sup>26</sup> Letreer cadro bacuaareni xtojlni scree bejnrenini: “Reii xten rexpejn Israel.” <sup>27</sup> Bacuaazareni lo stiop cruzj tiop gubaan, tejni xladbee Jesúś, xtee xladbājgwni. <sup>28</sup> Dxejc guzobj diidx ni caj loj guijtj nani rni: “Loj rebeŋgijdx bigabni.”

<sup>29</sup> Luxh renani sadejd nejzga guniyajreni Jesúś, cagusniibreni yejcreni, rājpreni lojni: —jJaa! Luj nutiejxhlu guidoo luxh choŋtis dxej niunchesacluni. <sup>30</sup> Naj basłaa lagajc luj, biājť loj cruzjga.

<sup>31</sup> Nājza rebixhojz ni rnibee, nāj rebejn ni ruluii leii, baxhiznārenini, rājpre loj sa'reni: —Ste'ca bejn ruslaani, xhoxh digacdi guslaani lagajc laani. <sup>32</sup> Naj sujiājť Cristre, reii xten rexpejn Israel, lo cruzj te guihuinu, te chalilaaznu.

Nāj regubaan ni caj lo cruzj guniyajzareni Jesúś.

*Xcālgujť Jesúś*

(Mt. 27:45-56; Lc. 23:44-49; Jn. 19:28-30)

<sup>33</sup> Che gojł läidxej, bicājy si'cti choŋ or. <sup>34</sup> Che gudejd choŋ orga, guredxa' Jesúś dipro, rājpre ni con xtiidxni:

—Eloi, Eloi, ¿lama sabactani? —dee säloj: Xtiozā, Xtiozā, ¿xhicient gulālazlu narā?

<sup>35</sup> Biejn diajg gaii bejn ni suga' ro'c rājpre ni si'c, dxejc rājpreni:

—Cołcuadijg, Elías cabejdxni.

<sup>36</sup> Sas baxuŋ tejni, bahuajdxni te sponj loj binagr. Dxejrcru basālnini yejc te yabixhijł, badeednini loj Jesúś te yānini, rābgajcni:

—Colgusaan guihuinu don la siādłājd Elíasni loj cruzj.

<sup>37</sup> Dxejrcru guredxaduxh Jesúś, gujtjini. <sup>38</sup> Dxejc lajd ni najł neŋ guidoro birājsni, gujčni tiop la', jiaali lo yujłi. <sup>39</sup> Suga' capitān nani rnibee te gayuu soldaad nez loj Jesúś, luxh che bahuiini xho guredxa' Jesúś scree nāj xho gujtņi, rājpreni:

—Guli'pacni, niguiire najc Xi'n Dios.

<sup>40</sup> Suga'za gaii gunaa, zijť cadxelojreni. Lojreni yu' Marii Magdalen, nāj Marii, xnan Jacob ni najc huinru, nājza José, nājza Salomee. <sup>41</sup> Che guyu' Jesúś Galilee birinajł regunaare Jesúś, luxh bahuiirenini. Yu'za xhidajłru regunaa ni biādajł Jesúś che biādni Jerusalén.

*Biga'tz Jesúś*

(Mt. 27:57-61; Lc. 23:50-56; Jn. 19:38-42)

<sup>42</sup> Biu' gudxhijŋ, luxh najcni dxe bispr che rusucheereni par sabd, dxej ni rusilajz rexpejn Israel. <sup>43</sup> Biāād José ni siāād Arimatea, najcni te rebejn ni sajč loj reguxhtis. Nājza laani cabājzni xcālriibee Dios. Guideb yālnabajŋ gunabni tiexh Jesúś lo Pila't. <sup>44</sup> Bidxelo Pila't alagujť Jesúś, sas gurejdxni capitān ni rnibee tej gayuu soldaad, gunabdiidxni lojni la balagujť Jesúś. <sup>45</sup> Che rājpre capitānga lojni agujť Jesúś, dxejc badeed Pila't tiexh Jesúś loj José. <sup>46</sup> Agusii José te bariaad, luxh che gulātņi Jesúś lo cruzj, batejbnini neŋ bariaadga. Dxejc gudixhni Jesúś neŋ te biliāā ni caj cuā' te guilaj, dxejrcru batzugni te guiro ro' biliāāga. <sup>47</sup> Bahuii Marii Magdalen nāj Marii xnan José cadro biga'tz Jesúś.

## 16

*Huājz Jesúś loj rebeŋgut*

(Mt. 28:1-10; Lc. 24:1-12; Jn. 20:1-10)

<sup>1</sup> Che gudejd sabd, dxej ni rusilajz rexpejn Israel, Marii Magdalen nāj xnan xnan Jacob nājza Salomee gusii setnejxh te chatāābreni se'tga tiexh Jesúś. <sup>2</sup> Che biu' xmaan, rsildooru, che calejn gubijdx, biāādreni ro' xpaani. <sup>3</sup> Cayājpre loj sa'reni:

—¿Chu gudzucaj guiroga ro' xpaani te jiu'nu?

<sup>4</sup> Che gudixhlojreni, bahuiireni alagubicaj guijg, luxh najcni te guiroduxh. <sup>5</sup> Che biu'reni neŋ biliāāga, bahuiireni lo te bi'n sobga' ladbee neŋ biliāāga. Najcw bi'nga te ladnol ni najc siool. Dxejc bidxejb regunaaga. <sup>6</sup> Dxejcti rājpre bi'nga lojreni:

—Na'c guidxejbtu. Caguiiltu Jesúś ni siāād Nazare't, nani cuaj lo cruzj. Rutiruni ree. Agubajņni lo rebeŋgut, colťahuii cadro gudixhreni tiejxhni. <sup>7</sup> Cołchāj, cołchaye'tz lo rexpejŋpacni, loj Pedr, ganidla Jesúś guidzujŋ Galilee, dxejcti guidzujņtu. Ro'c fiitu lojni, si'cni guniini lojtu.

<sup>8</sup> Biriitireni ro' biliāāga, racejslireni sa'csi cadxejbreni. Rut lojdi guniidireni sa'csi cadebduxhreni.

*Baluiloj Jesúś loj Marii Magdalen*

(Jn. 20:11-18)

<sup>9</sup> Gubajŋ Jesúś loj rebeŋgut rsildooru che biu' xmaan. Baluilojni galoo loj Marii Magdalen, nani agacgulāāni gajdz beŋdxab neŋ lastooni. <sup>10</sup> Dxejcti huij Marii Magdalen, huiye'tzni



loj renani cuansanäj Jesús, renani cayac-huin lajzni, cayoonreni. <sup>11</sup> Che biejn diajgreni ahuäz Zac Jesús lo rebengut, luxh Marii abahuii lojni, di lajzreni nilii.

*Baluiloj Jesús loj tiop xpejn pacni*  
(Lc. 24:13-35)

<sup>12</sup> Ste'ca najc Jesús baluilojni loj tio'p renani sasaj sääreni lo nejz. <sup>13</sup> Dxejcti gubi'reni, huiye'tzreni loj sgaiiga, luxh nicla xtidx reni'c di lajzreni nilii.

*Baxhal Jesús repost*  
(Mt. 28:16-20; Lc. 24:36-49; Jn. 20:19-23)

<sup>14</sup> Lult baluilojni loj guitzubiteebreni che sobga'reni lo mex. Gudidxa' Jesús lojreni, sa'csi di lajzreni nilii luxh guyaa lajzreni. Di lajzreni nilii xtidx renani bahuii loj Jesús che gubangajcni loj rebengut. <sup>15</sup> Räj p Jesús lojreni:

— Colchäj guideb lo guedxliuj, colnii xtidx Dios lo guiraa rebejn. <sup>16</sup> Nani chalilajz luxh tiobnisni, siliaani loj dojl; biäda nani di lajzni chalii sinijtni lo dojl. <sup>17</sup> Niluxh remilagwre jiannäj renani chalilajz: sibääreni bendxab xcuentä; siniireni ste'ca diidx; <sup>18</sup> guiniaazreni bäl con ñaareni; masque yäreni xhicos ni rugu't bejn, xhet gacdireni; susujreni ñaareni yejc rebenracxhuu luxh siajc rebenracxhuu.

*Huä'p Jesús xhaguibaa*  
(Lc. 24:50-53)

<sup>19</sup> Gulujxti gunii Dad Jesús si'c lojreni. Dxejc huäjsni sääni xhaguibaa. Ro'c huicueni cuä' Dios ladbee. <sup>20</sup> Dxejcti laareni bire'chreni, guniireni xtidx Dios guiranejz. Lagajc Dadga gucnäjreni, bejnii milagwr te gucbee bejn laapac xtidx Dios ni caniiireni. Sugacni si'c.

## Rediidx Nani Bacuaa Lucas Xcuent Jesucrist

### *Xhicuent bacuaa Lucas rediidxre*

<sup>1</sup> Xhidajl bejn abacuaa lo guijt xcuent guiraa redzuun ni gujc nez loonu te cuäxnejzreni redzuunga <sup>2</sup> si'cpac ni biääd rediidxga loonu. Rebejn nani bahuiloj guiraa recosre cheni guslojlireni, näjza reni gucnäj basule' xtidx Dios najc renani basule' rediidxga loonu. <sup>3</sup> Luxh sa'csi abijä, abahuiloä, abenduxhä xhigab xcuent guiragajc ni gusajc che gusoblojlini, ni'c runä xhigab laaca gucuaa' rediidxre, xnejz-xnejzni lo guejblu, Dad Teófilo, <sup>4</sup> te gacbesa'c guejblu ni najc didxlii xcuent guiraa rediidx ni abisieed guejblu.

### *Te xangl Dios gunii xho gaal Juan ni rutiobnis*

<sup>5</sup> Cheni gujc Herodes reii xten región Judea, guyu' te bixhojz ni laa Zacarías, ni nadxaag lo rexpeljñ Abías. Chäälni laa Elisabe't, ni najcza te xagdoe bixhoz Aarón. <sup>6</sup> Guiro'preni najczeni nadolajz nez loj Dios, ruseobreni xtidx Dios näjza xleii Dios, ni'c digacdi gucuaquij bejnreni xcuent nicla tej dojl. <sup>7</sup> Luxh ruti xi'nreni, sa'csi chäälni digacdi chu xi'nni. Luxh guiro'preni anajczeni bengool.

<sup>8</sup> Te dxej, laj ni cayujñ Zacarías dzuun neñ guidoro si'c bixhojz nez loj Dios, <sup>9</sup> dxejc con daad bibee chuni'c jiu' neñ yudxan xten guidoro te guze'creni yaal si'cni najc costumbr xten rebixhojzga. Dxejc si'c gulereni Zacarías gunni. <sup>10</sup> La' ni caguze'cni guxhyaal, suga' guiraa rebejn lo xle' guidoro, cabedx-canabreni lo Dios. <sup>11</sup> Dxejcti baluiloj te xangl Dios lo Zacarías, suliini ladbee lo dxan cadro cayejc guxhyaal. <sup>12</sup> Che bahuii Zacarías lo xangl Dios, di jien xhi gunni, lacti bidxebduxhni. <sup>13</sup> Sas xangl Dios räjp lojni:

—Na'c guidxejblu, Zacaríi, sa'csi Dios abiejñ diajgni xtiidxlu, luxh su' te xi'n chäálu, Elisabe't; cuälajluni Juan. <sup>14</sup> Sibalazduxhlu, siroob lastoolu; xhidajl bejn sibalajz sa'csi gaalni, <sup>15</sup> sa'csi benro gac xi'nlu nez loj Dios. Dini yä bin, nicla maxcaal. Sibäjz Sprit Dxan xten Dios neñ lastooni cheni gaallini. <sup>16</sup> Sujñni gusiechljaz xhidajl rexpeljñ Israel, guibi'reni lo Gueb Dios. <sup>17</sup> Juanre sinjñdñi loj Dad, sujñi lagajc xhigab, sajñni lagajc yälrnibee ni gojpprofe't Elías, te che jiejn diajgreni xtiidxni susiechljaz redad, susiäjzarenii diidx con rexi'nreni. Sigajcza rebejn ni di gusoob xtidx Dios sisieedreni gusoobreni xtidx Dios, te si'c jiädsucheeni lastoo rebejn te chalilajzreni xtidx Dad ni jiääd.

<sup>18</sup> Gunabdiidx Zacaríi loj anglga, räjpni:

—¿Xho mood gacbeä guliilu? Sa'csi anacä bengol, sigajcza chälä.

<sup>19</sup> Dxejcti räjp anglga lojni:

—Narä nacä Gabriel, runä dzuun lo Dios. Laani baxhalni narä te guininää luj, jiädnääd didxhueenre lojlu. <sup>20</sup> Luxh naj, sa'csi dilajzlu nilii xtidxä, sia'nlu gop, digacdiru guiniilu, cheni gaalli xi'nlu sinisaclu. Rextidxä sisiojñ che guidzujñ dxej che riäjñ gacni.

<sup>21</sup> La'ni cayajc dee, cadxeloj rebejn ni suga' nez ro' yudxan cabäjzreni guirii Zacaríi sa'csi cayaclaani neñ yudxan. <sup>22</sup> Che birii Zacaríi, di niajcdiru niniini loj rebejn; dxejc gucbeereni yu' xhi cosro bahuiini neñ yudxan xten guidoo. Dxejc con seen guininäjñi rebejnnga, sa'csi xheti xse'ni te niniini.

<sup>23</sup> Che gulujx bejnñi dzuun neñ guidoro, gubi'ni rolijzñi. <sup>24</sup> Che gudejd redxj dxejcti bazen nuu Elisabe't, chäälni, báz, gaii bäii diruni nirii rolijzñi. Bejnñi xhigab, räjpni: <sup>25</sup> “Si'c bejn Dad Dios narä naj, gucnäjñi narä te diru bejn cuälaz narä sa'csi ruti xi'nä.”

### *Biäddeed te xangl Dios diidx lo Marii gaal Jesús*

<sup>26</sup> Che gudejd xho'p bäii, baxhal Dios xanglñi Gabriel lo te guedx Galilee ni laa Nazare't, <sup>27</sup> te chahuiini te dxapxteeb ni laa Marii. Agojt xtiidxni te guchnaani te dade' ni laa José. Dade're najc xagdoe to'reii David. <sup>28</sup> Biu' anglre cadro sobga' dxape'ga, räjpni lojni:

—Xchan, dxa'p ni sanälajz Dios, ni agule Dios loj guiraa regunaa. Dios gacnäjluni. Abenle' Dioslu loj guiraa regunaa.

<sup>29</sup> Luxh che bahuiini lo xangl Dios bidxelojni lo rextiidxni, rujñni xhigab: “¿Xhicuent caniiñi si'c loä?” <sup>30</sup> Dxejc räjp xangl Dios lojni:

—Na'c guidxejblu, Marii; agule Dios luj. <sup>31</sup> Bacuadijz diidx. Suulu báz, su' te xi'nlu. Che gaalni guirilajñi Jesús. <sup>32</sup> Laani sajñni te bejn ni sacduxh. Sirilajzani Xi'n Gueb Dios ni yu' xhaguibaro. Gueb Dios sujñ gacni reii sigajc ni gujc toxtadgoldooni David, <sup>33</sup> te tejpas guinibeeni loj rexi'n Israel, luxh dipac xcälrnibeeni nitloj.

<sup>34</sup> Dxejc gunabdiidx Marii lo xangl Dios, räjpni:

—¿Xho mood gac dee? Ni dxapxteeb narä, gajd narä gumbeä niguii.

<sup>35</sup> Badzu' xangl Dios diidxre lojni, räjpni:

—Sprit Dxan xten Dios siääd lojlu, xcälrnibee Gueb Dios ni yu' xhaguibaa suhuajcwni luj si'c te za. Ni'cni báz ni gaal sajñni te beñdxan, sibälaj bejnñi Xi'n Dios. <sup>36</sup> Näjza sa'lu Elisabe't

su' te xi'nni luxh anajnci te beŋgool; ni'cni gunaa nani najreni digacdi chu xi'nni agujc xho'p bäi nuuni bäz. <sup>37</sup> Xheti te cos ni naganduxhtej nez loj Dios —räjp Xangl Dios.

<sup>38</sup> Dxejcti räjp Marii:

—Narä nacä xmos Xtadnu Dios; mbaj, sugunnäj Dios narä si'ctisni gunii gueblu loä. Dxejcti biunejz angl xten Dios lojni, sä'tini.

*Bihuii Marii lo Elisabe't*

<sup>39</sup> Neŋ redxejga, basquejn Marii sääni lo te guejdx ni tre' neŋ redajn xten Judea. <sup>40</sup> Biu'ni rolizj Zacarü, guniini xtiidxbee loj Elisabe't.

<sup>41</sup> Che biejn diajg Elisabe't guniini, biniib xi'nni xque'ni, gudxaj Sprit Dxan xten Dios lastoo Elisabe't. <sup>42</sup> Dxejc dipduxh guniini räjpni:

—Abenle'ru Gueb Dios luj loj guiraa regunaa. Abenle'zani xi'nlu. <sup>43</sup> ĴChu narä te siädhuii xnan Xtioozä narä? <sup>44</sup> Biejntis diağä xtiidxlu, bibalazgajc xi'nä, biniibni xque'ä. <sup>45</sup> Sibaa lajzlu, luj ni huililajz sisiojbpac nani gunii Xtadnu Dios.

<sup>46</sup> Dxejc räjp Marii:

Xaimä rliä'p xpala'n Xtadnu Dios.

<sup>47</sup> Rbalazduxha lastoä xcuent Dios ni ruslaa narä lo dojl.

<sup>48</sup> Sa'csi agule Dios narä,

nacä te mos gunaa ni xhet sajcdi, luxh najli sinii rebejn näjza reni churu chu lo guedxliuj, chicbaani loj guiraa regunaa.

<sup>49</sup> Sa'csi Gueb Dios ni rajp guiraa yälrnibee abejn xhidajl cosro loä, dxanduxh najc lajni.

<sup>50</sup> Dini cuääz gulasajzni guiraa rebejn ni riu xtiidxni, reni rajpni.

<sup>51</sup> Xhidajl cosnagaj abejnni con lagajc naani, abatie'chni renani rustioob lastooreni rliä'p lagajc xpala'nreni.

<sup>52</sup> Abasajbni reni rnibee, per rebeñnadolajz bejni gacreni beñro.

<sup>53</sup> Bachajni xque' reni calaan,

badeedni ganax cossa'c, niluxh badzu'ni rebejn ni yu' xhixtenreni xhet badeed dini lojreni.

<sup>54</sup> Gucnäjni nacióŋ xten xpejn Israel, ni najc xmos Dios.

Di lajzni niäl nulasajznireni

<sup>55</sup> sa'csi si'c bia'nni diidx con retoxtadgoldoonu, sinuu gulazlajzni toAbram näjza rexagdooni par tejpas.

<sup>56</sup> Dxejc bia'n Marii rolizj Elisabe't si'cti choŋ bäi, dxejc gubisacni rolizjni.

*Che gojl Juan ni rutiobnis*

<sup>57</sup> Che baza' xpäi Elisabe't, dxejc gojl xpäzni te bäz niguiini. <sup>58</sup> Dxejc bidzujñ rexpisijnä näjza resa'ni biädhuiireni guiro'preni che gubeereni lacti hueen gujc Dios con laani. Bibalaznäjreni. <sup>59</sup> Che gudejd xhujñ dxej, huinäreni bäze'ga chuni bee. Rlajz rebejn nirilajz bäze'ga si'c laa xtadni, Zacarü. <sup>60</sup> Niluxh xnanni räjp:

—Na'c, guirilajpacni Juan.

<sup>61</sup> —ĴXhicuent? —räjpreni—. Ruti xfamillu ni laa si'c.

<sup>62</sup> Dxejcti gunabdiidxreni con seen lo xtad bäze'ga te gabeereni xho rlanjz guirilajz bäze'ga. <sup>63</sup> Xtadni gunab te la' guijt, dxejc bacuaani: “Lajni najc Juan.” Dxejc guiraareni bidxelojreni. <sup>64</sup> Luxh lagajc dxejc gujc gunii Zacarü stehuält, dxejc guslojni calä'pni xpala'n Dios. <sup>65</sup> Bidxeloduxh rexpisijnä xhini'c gujc ro'c. Luxh bire'ch diidx xcuent recose guideb neŋ redajn xten Judea. <sup>66</sup> Guiraa reni biejn diajg rediidxga gusloj cayujnreni xhigab, dxejc gunabdiidxreni loj sa'reni:

—ĴChuchani'c gac biuxe'ga?

Si'c guniireni sa'csi huenliisi abenle' Diosni.

*Dij ni bił Zacarü*

<sup>67</sup> Dxejcti biääd Sprit Dxan xten Dios neŋ lastoo xtadni Zacarü, gusloj caniini rediidx ni badeed Dios lojni, räjpni:

<sup>68</sup> Guiliä'pnu xpala'n Dios, Xtios rexpejn Israel,

sa'csi abiädhuiini loonu, ni najcnu rexpejñni,

te siädguslaani nuurnu neŋ dojl.

<sup>69</sup> Abaxhalni loonu te bejn ni rajp yälrusladuxh bejn neŋ dojl.

Najcni te rexagdoo toxmosni David.

<sup>70</sup> Lagajc si'cni badeed Dios gunii redade' ni bacuaa xtiidxni lo guijt galoo:

<sup>71</sup> Suslaani nuurnu loj reni rdxe'ch loonu,

näjza ladzn̄aa rebejn̄ ni gulälaz nurnu.

<sup>72</sup> Te gulaslajzni retoxtdagdoonu, te soob diidx ni bia'nni con rebejn̄ga.

<sup>73</sup> Scree bia'nni diidx con toxtadgooloonu, Abram:

<sup>74</sup> Suslaani nuurnu ladzn̄aa rebejn̄ ni rdxe'ch loonu, te na'c guidxeebnu chunu lojni gusoobnu xtiidxni,

<sup>75</sup> con yäl'nabaŋsa'c näjza yälguxhtis guiraa redxej ni guibajnnu.

<sup>76</sup> Luxh luj, bāze', sirilajlu dade' nani rnii xtidx Gueb Dios ni yu' xhaguibaa, sa'csi sinijdlu lo Dad te gusucheelu rexnezyulajzni,

<sup>77</sup> te gunlu gacbee rexpejn̄ni xho gac laani lo dojl, te gac guibicaj xtojln̄eni.

<sup>78</sup> Sa'csi Dios sanälajz bejn̄,

näjza rulaslajzni bejn̄ ni'cni xhaguibaali suxhałni xi'n̄ni te jiādn̄ani te dxecoob,

<sup>79</sup> te gusanijni lo rebejn̄ ni nabajn̄ lo yälxcājy xten dojl,

näjza rebejn̄ ni nabajn̄ lo xpalaa yälgujt,

te guluini xho sānu lo xnez yälrbecdxilajz.

<sup>80</sup> Dxejc gunis biuxe'ga, guyuduxh xcāriejn̄ni xcuent recos xten Dios. Gubajnni nez loj reyubijdz cheni bidzujn̄li dxej che baluilojni loj rexpejn̄ Israel, che gusloj cagusule'ni xtidx Dios.

## 2

### *Che gojl Jesús*

(Mt. 1:18-25)

<sup>1</sup> Neñ redxejga, gunibee Augusto César xcaj laj rebejn̄ guideb guedxliuj lo xquijtni. <sup>2</sup> Ni'c nacobgucj yälbigabre cheni najc Cirenio gobernadoor xten Siria. <sup>3</sup> Guiraa rebejn̄ nanab chāāreni lagajc lajdxreni te ro'c guigabreni. <sup>4</sup> Ni'cni birii José guedx Nazare't Galilee, te huijni Judea, lo guedx Belén, cadro gojl toDavid, sa'csi najc José xagdoo toDavid. <sup>5</sup> Huinäni Marii, nani guchnaani, huijreni guedx Belén te ro'c guigabreni. Luxh nuu Marii bāz. <sup>6</sup> Lalsi yu'reni guedx Belén, bidzujn̄ dxej ni gaal xi'n̄ Marii. <sup>7</sup> Ro'c gojl xi'n̄ galooni, dxejc batejbn̄ini te xzuudni. Dxejc gudixhn̄ini cadro rusälreni guijxh rajw reguidxaa sa'csi xhetiru yu' xcalaareni jia'nreni.

### *Rexangl Dios näjza rebaxtoor*

<sup>8</sup> Gajxh guejdxga guyu' gaii baxtoor cayajpreni xhiilreni lo niaa guxhijn̄. <sup>9</sup> Chela baluiloj te xangl Dios, luxh bianij guideb gabireni con yälrdimbicha' xten Dios, dxejc bidxebduxhreni. <sup>10</sup> Sas anglga räjp lojreni:

—Na'c guidxejbtu, narā siādnāā lojtu te didxsa'c ni suspalajz guiraa beñ guedxliuj. <sup>11</sup> Nadxej gojl neñ guejdx xten toDavid, tej ni guslaa bejn̄ neñ dojl, laani najc Crist ni najc Dad. <sup>12</sup> Dee najc te seen lojtu, sidxältu bāze'ga nadejbn̄i neñ te xzuudni, naga'ni cadro rusälreni guijxh rajw reguidxaa.

<sup>13</sup> Lagajc dxejc guideb gabi anglga baluiloj naclejñ xangl Dios, gulā'preni xpala'n Dios, räjpreni:

<sup>14</sup> Collä'p xpala'n Dios ni yu' xhaguibaali.

Suchu yälrbecdxilajz lo rebeñ guedxliuj ni balazlajzni.

<sup>15</sup> Che gubi' rexangl Dios xhaguibaa, gusloj rebaxtoor canii loj sa'reni:

—Colcho' guedx Belén colchohuii ni guzajc ro'c ni gunii Xtadnu Dios loonu.

<sup>16</sup> Rusquenduxhreni säāreni, dxejc bidxälreni Marii näjza José näjza bāze' ni naga' neñ cadro rusälreni guijxh rajw reguidxaa. <sup>17</sup> Cheni bahuiireni loj rebejn̄ga, bijreni diidx xhi räjp rexangl Dios lojreni xcuent bāze'ga. <sup>18</sup> Niluxh guiraa reni biejn̄ diajg rediidxre bidxelo-duxhreni xtidx rebaxtoorga. <sup>19</sup> Niluxh Marii gulucheeni guiraa rediidx ni biejn̄ diajgni neñ lastooni, rujntisni xhigab xcuent rediidxga. <sup>20</sup> Dxejcti rebaxtoorga gubisacreni cayolreni, calā'pzareni xpala'n Dios xcuent guiraa rediidx ni biejn̄ diajgreni näjza ni bahuiireni sa'csi guiraani gujc si'cni räjpreni lojreni.

### *Cheni huinäreni Jesús chuni bee*

<sup>21</sup> Che gudejd xhujn̄ dxej, huinäreni bāze'ga chuni bee, dxejc gulälajreni Jesús, lagajc laj ni räjp xangl Dios loj Marii guirilajni galooli guuni bāzga.

<sup>22</sup> Che basa' redxej ni gac naya te nan si'cni gunibee toMoisés loj xquijtni, huinäreni bāze'ga guedx Jerusalén, neñ guidoro gunabreni gacnāj Diosni par tejjpas. <sup>23</sup> Bejn̄reni scree sa'csi caj lo guijtz xten Dios: “Guiraa rexingalangoo xten bejn̄ guilia'tu lo sa'reni te gunreni xtzunā,” räjp Dios. <sup>24</sup> Bidzujn̄reni ro'c ca'reni te gojn̄ si'cni rnibee rexquijtz Dios: “Tio'p gague' o tio'p palombāz.”

<sup>25</sup> Neñ redxejga, neñ guedx Jerusalén rbájz te dade' ni laa Simeón. Najcni te bensacduhx, randuxhni Dios, cabájzni jiáad te bejn ni guslaa rexpejn Israel. Rbájz Sprit Dxián xten Dios nen lastoo Simeón. <sup>26</sup> Sprit Dxián abejn gacbeeni dini guet ansde fiini loj Crist ni guxhał Dios. <sup>27</sup> Dxejcti rájpp Sprit Dxián xten Dios lojni chááni guidoro. Lalni yu'ni neñ guidoo, bidzujn José con Marii, biádnäreni báz Jesús, te gunnájreni Jesús nani rñibeex tixdx Dios gunreni. <sup>28</sup> Dxejx gudááz Simeón báze'ga, gusloj calá'pni xpala'n Dios, rájppi:

<sup>29</sup> Dad, asajc gusaanlu guetá con yálrbedxilajz, sa'csi abasoooblu nani bia'n diidx gunnájlu xmoslu.

<sup>30</sup> Sa'csi abahuiloá nani siádguslaa nuurnu neñ dojl,

<sup>31</sup> ni abasujlu nez loj guiraa rebeñ guedxliuj.

<sup>32</sup> Laani najc bianij ni susanij loj rebejn ni di gac xpejn Israel, nájza nani gac xpala'n rexpejnlu guedx Israel, lajdxlu.

<sup>33</sup> Bidxeloj José nájza xnan Jesús rediidx ni canii Simeón xcuent báze'ga. <sup>34</sup> Dxejx benle' Simeón yejcreni, dxejx rájppi lo Marii xnan Jesús:

—Bahuii gan; báze're biáad te loj rexpejn Israel chu reni sibálaz xtiidxni, te chuza reni sililajz xtiidxni. Laani gacni te seen nani sibálaz bejn, <sup>35</sup> te si'c jienloj xhi xhigab rujn cade tej rexpejn Israel neñ lastooreni. Dxejcti par luj sajcní asdoo chááz te spaad lastoolu, sa'csi gac-huinduxh lastoolu.

<sup>36</sup> Suga'za te nane' ni laa Ana ro'c, rñiini tixdx Dios xcuent recos ni churu gac. Najcni xindxap Fanuel, ni najc famíl xten Aser. Anajcni bengolduxh. Bachnaani che najcni dxaphuin, luxh gajdzitiz ijj guláznájni cháalni che bia'nni biuud. <sup>37</sup> Najcni te gunabiúud ni yu' tajbitajp ijj. Diruni guirii guidoro, ro'ctis yu'ni dxej, yáal te yu'tisni lo Dios con yálrucua'n nájza yálrbedx-rniab lo Dios. <sup>38</sup> Che gubigni lojreni lagajc dxejx, badeedni xquixtios lo Dios sa'csi abidzujn tej ni guslaa rebejn lo dojl. Dxejx gusloj caniini diidx xcuent báz Jesús loj guiraa renani cabájz yálruslaa xten Jerusalén.

#### *Che gubi'reni guedx Nazare't*

<sup>39</sup> Che gulujx bejn xcuzajnni guiraa recos ni caj lo xquijtz Dios gunreni, gubisacreni Galilee, lo guedx Nazare't, lajdxreni. <sup>40</sup> Gunís biuxe'ga, guc nadaanni, guc nasinruzani sa'csi cayacnáj Diosni.

#### *Che biu' Jesús guidoro*

<sup>41</sup> Casob ijj rij rexuczajn Jesús guedx Jerusalén te rinäreni te gojn xten lanij pascw. <sup>42</sup> Che basa' Jesús tzubitio'p ijj, huuj guiraareni guedx Jerusalén si'c najc costumbr gac lanijga. <sup>43</sup> Che gulujx lanijga, gubisacreni. Bia'n Jesús guedx Jerusalén, luxh nicla xnanni niclaza José direni niacbee bia'nni. <sup>44</sup> Bejnreni xhigab pet siádsanájni rebeñsa'ni. Si'c guzajreni tebdxej, dxejx gudilrenini loj resa'reni, nájza loj reni rumbeereni, <sup>45</sup> direni nidxálni. Dxejx gubisacreni guedx Jerusalén te huitilrenini ro'c.

<sup>46</sup> Choñ dxej gudiilrenini dxejx bidxälrenini neñ guidoro, sobga'ni nez galáii rebejn ni najn leii, cacuadiajni xtiidxreni, cayujnzani yálgunabdiidx lojreni. <sup>47</sup> Luxh guiraareni cacuadiajx xtiidxni, cadxeloduxhreni yálnajn xtenni, nájza rediidx ni cagudzu'ni lojreni. <sup>48</sup> Che bahuii rexuczajnni lojni, bidxelojreni. Dxejx rájpp xnanii lojni:

—Xi'ná, ¿xhicuent bennájlu nuurnu scree? Nará nájza xtdadu cayunduxhnu xhigab caguuilnu luj nezree, nezre'c.

<sup>49</sup> Dxejcti rájpp Jesús lojreni:

—¿Xhicuent caguilto nará? ¿La ditu gan riájl guná xtzun Xtdá, á?

<sup>50</sup> Luxh laareni direni niacbee rediidx ni guniini lojreni.

<sup>51</sup> Dxejcti gubinájreni guedx Nazare't, sanuuni rusoobni xtiidxreni. Luxh Marii guluchetisni guiraa recosre neñ lastooni. <sup>52</sup> Duurtis gunís Jesús, caroobruza xcálnajnni. Sanálajz Diosni, sanálajza guiraa rebejnni.

## 3

#### *Yálrusule' Juan ni rutiobnis*

(Mt. 3:1-12; Mr. 1:1-8; Jn. 1:19-28)

<sup>1</sup> Neñ redxej cheni agujc tzuun ijj najc Tiberio César rei, Poncio Pila't najc gobernadoor xten Judea; Herodes najc gobernadoor xten Galilee; Felipe, bejtz Herodes najc gobernadoor xten Iturea nájza Traconite; Lisania najc gobernadoor xten Abilinia. <sup>2</sup> Lagajc nen redxejga Anás nájza Caifás najc rebixhojzro xten guidoro guedx Jerusalén. Neñ redxejga biáad tixdx Dios lo Juan, xi'n Zacarí cheni rbájzni nez lo reyubijdz. <sup>3</sup> Ni'c cuanzaj Juan guideb nez reyuj xten gueu Jordán, ro'c basule'ni xcuent yálrusiechłajz, yálröbnis ni nanab gunreni te gudzucáj Dios xtojreni. <sup>4</sup> Si'cni caj lo xquijtz Isafás, dade' ni gunii tixdx Dios, cadro rájppi:

Riejn xse' te ni rbedxa' nez loj reyubijdz:

“Colyunsac xnezyuj Dad, colslu rexnezyulajzni.”

<sup>5</sup> Guiraa cadro sojb gueed sidxe'ni, guiraa relom sibicajreni, guiraa renezyuj ni xhet naliidi, siliireni, guiraa renezyudxuudx, sacsa'ceni.

<sup>6</sup> Dxejcti guiralii bejn suhuiu loj nani guxhaļ Dios.

<sup>7</sup> Che bahuii Juan siāad xhidalduxh bejn te guirobnisreni, rājpni lojreni:

—iLa'tu benguijdx ni najc si'c bālnialajz! iChuni'c balijdxtu guxuņtu loj xcāļrdxe'ch Dios ni siādgajxh, ā? <sup>8</sup> Colguchaa xmoodytu te si'c fi bejn guliini abasiechļajztu. Na'c cuentis rniitu lagajc neņ lastootu “Abram najc xtadnu”, sa'csi narā rniā lojtu, sajc xca' Dios reguijre te con laareni guncheeni bejn gac rexagdo to Abram. <sup>9</sup> Aguiybyajg naga' cuā' xlobaa reyajg; ni'cni guiraa reyajg nani di ninexhsa'c xcaj lojni, sidinreni te checreni.

<sup>10</sup> Dxejcti gunabdiidx rebejn lojni, rājpreni:

—iXhini'c nanab jiennu?

<sup>11</sup> Dxejc badzu' Juan diidxre rājpni:

—Ni rajp tio'p xhajbni, sugudeedni tejni lo bejn ni xhet rajpdi. Sigajcza gun reni rajp xhi gaureni, quisrenini loj ni xheti xhi gauni.

<sup>12</sup> Nājza gaii bejn nani rusquijx xcuent reimpuest bidzujņ lojni te guirobnisreni, dxejc gunabdiidxreni lo Juan rājpreni:

—Dad, mastr, iXhini'c nanab jiennu?

<sup>13</sup> Rājp Juan lojreni:

—Na'c gusquijxtu bejn maazdi ni nungāļ quixreni.

<sup>14</sup> Nājza gaii resoldaad gunabdiidx lojni rājpreni:

—iNurnu a'? iXhini'c nanab jiennu?

Dxejc rājpni lojreni:

—Na'c guchejbtu bejn; na'c gābtu chale'ctu xcāļquij bejn ni xhet bejndi parsi guniidxreni meel lojtu; colbalaznāj nani rujntu gaan.

<sup>15</sup> Cadxeloj rebejn, cayujnreni xhigabduxh, naareni, “pet Juan najc Crist ni jiāad.” <sup>16</sup> Dxejc badzu' Juan diidxre, rājpni loj guiraa rebejn:

—Guliipac rutiobnisā la'tu con nis, luxh siāad tej ni sajcro loā, nani nicla gac surloā, cuāā xcura'chni. Laani sutiobnisni con Sprit Dxan xten Dios te cuāāzni neņ lastootu nājza con guiboo, sa'csi rajpruni yāļrnibee loā. <sup>17</sup> Aca'ni pal te gusiani triuu te cuāāni triusa'c lo guijxh te cucheeni triuu neņ ngodx xtenni, dxejcti reguixhtriuuga suze'cnini lo bajļ ni rejc par tejpas.

<sup>18</sup> Rediidxre nājza xhidajļ yāļrulijdx gunii Juan te basule'ni redidxcoob loj rebejn. <sup>19</sup> Nājza lo Herodes ni najc gobernadoor basule' Juan diidx, gudilnājnini sa'csi xhet laadi cayujni, sa'csi rbāznājni Herodias, chāāl bejzni Felipe, nājza xcuent sgaii doļļ ni bejnni. <sup>20</sup> Di Herodes niu xtidx Juan, alga bejnni stee doļļ, basāļni Juan neņ latzguuib.

*Che gurobnis Jesús*

(Mt. 3:13-17; Mr. 1:9-11)

<sup>21</sup> Che batiobnis Juan rebejn, nājza Jesús birobnis. Cheni cabedx-canabni lo Dios, bixal xhaguibaa, <sup>22</sup> dxejc biājt Sprit Dxan xten Dios si'c te palom, bidzujņni cadro suga' Jesús. Dxejc xhaguibaali biejn xse' te ni rājp:

—Luj, najclu xi'nā ni sanālazā. Rbanālazduxhā luj.

*Resa' Jesús*

(Mt. 1:1-17)

<sup>23</sup> Yu' Jesús galbitzuu ijz che gusloj cayujni dzuun ni badeed Dios gunni. Rchalo rebejn najcni xi'n José, xi'n Elí. <sup>24</sup> Elí gujc xi'n Matat. Matat gujc xi'n Leví. Leví gujc xi'n Melqui. Melqui gujc xi'n Jana. Jana gujc xi'n José. <sup>25</sup> José gujc xi'n Matatias. Matatias gujc xi'n Amós. Amós gujc xi'n Nahum. Nahum gujc xi'n Esli. Esli gujc xi'n Nagai. <sup>26</sup> Nagai gujc xi'n Maat. Maat gujc xi'n Matatias. Matatias gujc xi'n Semei. Semei gujc xi'n José. José gujc xi'n Judá. <sup>27</sup> Judá gujc xi'n Joana. Joana gujc xi'n Resa. Resa gujc xi'n Zorobabel. Zorobabel gujc xi'n Salatiel. Salatiel gujc xi'n Neri. <sup>28</sup> Neri gujc xi'n Melqui. Melqui gujc xi'n Adi. Adi gujc xi'n Cosam. Cosam gujc xi'n Elmodam. Elmodam gujc xi'n Er. <sup>29</sup> Er gujc xi'n Josué. Josué gujc xi'n Eliezer. Eliezer gujc xi'n Jorim. Jorim gujc xi'n Matat. <sup>30</sup> Matat gujc xi'n Leví. Leví gujc xi'n Simeón. Simeón gujc xi'n Judá. Judá gujc xi'n José. José gujc xi'n Jonán. Jonán gujc xi'n Eliaquim. <sup>31</sup> Eliaquim gujc xi'n Melea. Melea gujc xi'n Mainán. Mainán gujc xi'n Matata. Matata gujc xi'n Natán. <sup>32</sup> Natán gujc xi'n David. David gujc xi'n Isai. Isai gujc xi'n Obed. Obed gujc xi'n Booz. Booz gujc xi'n Salmón. Salmón gujc xi'n Naasón. <sup>33</sup> Naasón gujc xi'n Aminadab. Aminadab gujc xi'n Aram. Aram gujc xi'n Esrom. Esrom gujc xi'n Fares. Fares gujc xi'n Judá. <sup>34</sup> Judá gujc xi'n Jacob. Jacob gujc xi'n Isaac. Isaac gujc xi'n Abraham.

Abraham gujc xi'n Taré. Taré gujc xi'n Nacor. <sup>35</sup> Nacor gujc xi'n Serug. Serug gujc xi'n Ragau. Ragau gujc xi'n Peleg. Peleg gujc xi'n Heber. Heber gujc xi'n Sala. <sup>36</sup> Sala gujc xi'n Cainán. Cainán gujc xi'n Arfaxad. Arfaxad gujc xi'n Sem. Sem gujc xi'n Noé. Noé gujc xi'n Lamec. <sup>37</sup> Lamec gujc xi'n Matusalén. Matusalén gujc xi'n Enoc. Enoc gujc xi'n Jared. Jared gujc xi'n Mahalaleel. Mahalaleel gujc xi'n Cainán. <sup>38</sup> Cainán gujc xi'n Enós. Enós gujc xi'n Set. Set gujc xi'n Adán. Adán gujc xi'n Dios.

## 4

### *Che biricaj bendxab loj Jesús*

(Mt. 4:1-11; Mr. 1:12-13)

<sup>1</sup> Jesús, sa'csi rbájz Sprit Dxan xten Dios lastooni, biunejzni gueu Jordán, dxejc huinã Sprit Dxan xten Diosni lo reyubijdz. <sup>2</sup> Ro'c bia'nni tiuu gubijdx, tiuu guxhijñ. Ro'c bidzujñ bendxab ni rnibee te rlanjñ gunni gusoob Jesús xtiidxni. Luxh calaan Jesús, sa'csi gajdñi gau guiraa neñ redxejga. <sup>3</sup> Dxejc rájñ bendxab lojni:

—Palga guliilu Xi'n Dioslu, gunibee gac reguijre yãtxtiil.

<sup>4</sup> Badzu' Jesús diidx lojni rájñi:

—Acáj loj reguijtz xcuent Dios: “Xhet ganaxdi yãtxtiil gun sajc guibajñ bejñ, nãjza guiraa diidx nani rnii Dios sujñ guibajñ bejñ.”

<sup>5</sup> Dxejcti huinã bendxab Jesús jiaa yejc te dajñ. Teratbãztis baluilojni guiraa reguedxro ni tre' lo guedxliuj. <sup>6</sup> Dxejc rájñ bendxab lojni:

—Narã sunidxã guiraa yãlrnibee nãjza reyãlnasa'c ni yu' loj reguejdxga sa'csi xtenã guiraareni, luxh sajc gudedãni lo chutis ni rlazã. <sup>7</sup> Palga luj suzuxhijblu loã, guiliã'plu xpala'nã, guiraani sajc xtenlu.

<sup>8</sup> Dxejc Jesús badzu' diidx, rájñi lojni:

—Acáj loj xquijtz Dios: “Dad Xtiostislu ganlu, luxh lojtisni chulu gunlu dzuun.”

<sup>9</sup> Dxejcti huinã bendxabni lo guedx Jerusalén, huinãnini jiaa yejc xques guidoro. Dxejc rájñ bendxab lojni:

—Palga guliilu najclu Xi'n Dios, gutiãjs lo yuj <sup>10</sup> sa'csi si'c caj loj rexquijtz Dios: Suxhaj Dios rexangni te ga'preni luj,

<sup>11</sup> guiniaazreni luj didi jiajblu lo guij.

<sup>12</sup> Badzu' Jesús diidx lojni, rájñi:

—Cajza lo rexquijtz Dios: “Na'c fallu Dad ni najc Xtioozlu.”

<sup>13</sup> Che baluux bendxab rextiidxni, gubicajni lo Jesús sa'csi dini niujñ gaan nusoob Jesús xtiidxni. Gulãjzni guidzujñ stee dxej te gusacsiruni Jesús.

### *Gusloj Jesús cayujñ xtzauuni*

(Mt. 4:12-17; Mr. 1:14-15)

<sup>14</sup> Dxejc gubi' Jesús lo rexyuj Galilee rájñi yãlrnibee xten Sprit Dxan. Bire'ch diidx xcuentni guiraa neñ reguejdx ni tre' nejzga. <sup>15</sup> Ruluiini neñ reguidobãz luxh guiraa rebejñ rliã'p xpala'nni.

### *Jesús guyu' guedx Nazare't*

(Mt. 13:53-58; Mr. 6:1-6)

<sup>16</sup> Dxejcti huij Jesús guedx Nazare't cadro gulaani. Che gojl dxej ni rusilajz rexpejñ Israel, biu'ni neñ guidobãz sigajc ni rujñpacni, dxejc huisuliini te biñi <sup>17</sup> reguijtz xten Dios. Badeedreni lojni guijtz ni bacuaa Isaías; cheni baxhalni guijtzga, bidxãlni cadro rnii scree:

<sup>18</sup> Sprit Dxan xten Dios suganãj narã,

sa'csi agule Dios narã te gusule'ã xtidxcoobni lo rebenproob.

Baxhalni narã te gusiaca lastoo renani di lastooreni cuedxi,

te gusule'ã yãlruslaa lo rebejñ ni yu' lo dojl,

te gusiaca baloj reben lotiã'p, te guslaã reben ni cadejd trabajw,

<sup>19</sup> te gusule'ã abiu' ijzsa'c che rulaslajz Dios rebejñ.

<sup>20</sup> Dxejc basãu Jesús reguijtzga, badeednini loj bejñ ni cayacnãj neñ guidooga, dxejc gurejñi. Sa'csi guiraa rebejñ ni sobga' neñ guidooga cahuidzu'tzreni lojni, <sup>21</sup> gusloj guniini, rájñi lojreni:

—Lagajc nadxej guzobj rediidx ni caj lo reguijtzre nez loj guiraatu.

<sup>22</sup> Guiraareni sarú guniireni xcuent Jesús, bedxelouxhzareni redidxsaruduxh ni guniini lojreni. Gunabdiidxreni loj sa'reni, rájñi:

—¿La et xi'ndi José dade're, ã?

<sup>23</sup> Dxejc rájñ Jesús lojreni:

—Siniipactu rediidxre loã: “Doctoor, basiajc lagajc luj”; siniizatu loã: “Recos ni bieñ diajgnu bejñlu nez guedx Capernaum, lagajc recosga bejñ nez ree cadro najc lajdxlu.”

<sup>24</sup> Dxejc huinuu xtiidxni, rájñi lojreni:

—Rniliäpac lojtu, nicla tej redade' ni rnii xtidx Dios, di reben lajdxreni jiu xtiidxni. <sup>25</sup> Luxh rniliä lojtu, che gubajñ Elias lo guedxliuj, guyu' xhidajñ gunabiuud guedx Israel che di nisguij niajb choñ ijz garol, dxejc guyu' yälrianduxh guideb guejdxga. <sup>26</sup> Luxh di Dios nuxhal Elias rolijz nicla tej regunabiuud ni guläz guedx Israel, alga baxhalnini lo benzijz, rolijz te gunabiuud ni rbäjz Sarepta, gajxh guedx Sidón. <sup>27</sup> Sigajcza che gubajñ Eliseo lo guedxliuj, guyu' xhidajñ ben raxxhuu ni rañ tiejxhreni guedx Israel, luxh dini nusiajc nicla tejreni, alga basiajcni dade' ni laa Naamán, ni siääd te guedxzijz ni laa Siria.

<sup>28</sup> Che biejn diajg reni sobga' neñ guidoo rextidx Jesús, bidxechduxhreni, <sup>29</sup> huisuliireni, guläärenini neñ guejdxga. Dxejc huinärenini yejc dajn cadro tre' guejdxga cadro yu' te balaro, te ro'c rlanjreni nustejbrenini. <sup>30</sup> Dxejc Jesús sigaj gudejdni galäiireni, sä'tini ste'ca lajt.

*Gulää Jesús benđxab lastoo te dade'*  
(Mr. 1:21-28)

<sup>31</sup> Dxejc huij Jesús guedx Capernaum, te guejdx xten Galilee. Ro'c gusloj cagusule'ni diidx loj rebejn che gojl dxej ni rusilajz rexepeñ Israel. <sup>32</sup> Bidxeloduxhreni xtiidxni sa'csi rusule'ni si'c te beñnajn, si'c te ni rnibee.

<sup>33</sup> Neñ guidooga suga' te dade' ni rbäjz te benđxab neñ lastooni. Guredxa'ni <sup>34</sup> räjpni:  
—¡Aii! ¡Basaan nurru! ¿Xhicuent riädchu'lu loonu Jesús ni siääd Nasare't? ¿La siäädlu te gunitlojlu nuurnu, ä? Narä numbeälu, nanä najclu Xin Dxan Dios.

<sup>35</sup> Gudidxa' Jesús lo benđxabga, räjpni lojni:

—Basäu ro'lu, birii lastoo niguiire.

Dxejcti benđxabre basäl niguiiga lo yuj nez loj guiraareni, dxejc biriini neñ lastoo dade'ga, per xhet bejndini dade'ga. <sup>36</sup> Bidxeloduxh rebejnga, dxejc gusloj caniireni lo sa'reni, räjpreni:

—¿Xhi diidx najc redee? Bahuii xho rnibee dade're rebenđxab con yälrnibee, luxh rusooob rebenđxab xtiidxni, řiireni lastoo bejn.

<sup>37</sup> Dxejc gusääb xtidx Jesús lo guiraa reguejdx ni tre' guideb gabi guejdxga.

*Rusiajc Jesús xnan xueerg Pedr*  
(Mt. 8:14-15; Mr. 1:29-31)

<sup>38</sup> Birii Jesús guidobäz, huijni rolijz Simón. Dxejc naga' xnan sueerg Simón, cayacxhuuni, yu'ni xliaduxh. Sas gunabduxhreni lojni te gusiajcni. <sup>39</sup> Gubig Jesús loj nane'ga, gudidxa'ni xliaaga, luxh lagajc orga biriini xliaa. Dxejc huistiegajcni, gusloj cayujñni mandaad, cahuiinireni.

*Rusiajc Jesús xhidajñ yälracxhuu*  
(Mt. 8:16-17; Mr. 1:32-34)

<sup>40</sup> Lal ni cayääz gubijdx, guiraa reni rajp benracxhuu ni rajc garen garen yälracxhuu biädnäreni rebejnga lo Jesús. Dxejc laani batzuubni naani yejc teygareni, dxejc biajc rebenracxhuuga. <sup>41</sup> Loj rebenracxhuuga, yu'reni birii rebenđxab neñ lastooreni, rbedxa'reni räjpreni:

—Luj najclu Xi'n Dios.

Luxh Jesús gudilñajni rebenđxab, dini nusaa niniireni sa'csi laareni najnreni najcni Crist ni cabäzreni.

*Rusule' Jesús xtidx Dios*  
(Mr. 1:35-39)

<sup>42</sup> Che bianij, biriini lo guejdx, huijni te lajt cadro rut rbäjzdi. Niluxh gudiil rebejnñi, dxejc bidzujñreni cadro suga'ni. Rlanjreni nuscuääzrenini te di nuini. <sup>43</sup> Dxejc Jesús räjp lojreni:

—Nanab cha'a chasule'ä rextidx xcuent xcälrnibee Dios xhidajñruza guejdx, ni'cni baxhalpac Dios narä.

<sup>44</sup> Dxejc si'ctis cuanzaj Jesús basule'ni xtidx Dios neñ guiraa reguidobäz neñ reguejdx xten Galilee.

## 5

*Che gunaazreni xhidajñ bäjl*  
(Mt. 4:18-22; Mr. 1:16-20)

<sup>1</sup> Cheni suga' Jesús ro' nis ni laa Genesare't, gubig xhidajñ bejn lojni te jiejn diajgreni xtidx Dios. <sup>2</sup> Dxejc bahuii Jesús tio'p barcw ni suga' ro' niska, rud yu'di neñreni sa'csi rebejn ni rniaaz bäjl abiriireni neñ rebarcw te caguiireni xquijxhreni ro' niska. <sup>3</sup> Dxejc biu' Jesús neñ te barcw ni najc xten Simón, dxejc gunab Jesús cháä barcwga lo nis te la', te guibicajni ro' yuj. Dxejc gurej Jesús neñ barcwga, ro'cli guslojni caguluini rebejn. <sup>4</sup> Che gulujx xtiidxni, räjpni loj Simón:



—Huinä barcw cadro jiätro, colcuaa xquijxhtu lo nis te guiniaaztu bäjl.

<sup>5</sup> Räj p Simón lojni:

—Mastr, guideb yäl biennu dzuun, luxh dinu niniaaz nicla tej bäjl, niluxh naj agunibeelu gusälsacnu guijxh lo nis.

<sup>6</sup> Cheni basälreni xquijxhreni lo nis, gunaazreni xhidalduxh bäjl, dxejc guslojli caräjs xquijxhreni. <sup>7</sup> Dxejc bejnreni seen loj resa'reni ni yu' neñ stee barcwga te jiädycnäreni. Bidzujntireni, bachajreni guiro'p barcw. Gudxaduxh rebarcw, ameer niääzreni neñ nis.

<sup>8</sup> Che bahuii Simón Pedr recosre, bazuxhijbni nez loj Jesús, dxejc räj pni:

—Gubicaj löä Dad, sa'csi narä nacä te beñdojl.

<sup>9</sup> Si'c gunii Simón sa'csi bidxejb laani näjza guiraa rebejn ni yunäjni sa'csi gunaazreni xhidalduxh bäjl. <sup>10</sup> Näjza Jacoob näjza Juan, rexi'n Zebedeo, ni runnä j Simón dzuun, näjzaren bidxejbreni. Per Jesús räj p lo Simón:

—Na'c guidxejblu, najli gusloj cueedxlu bejn lacuaa ni guiniaazlu bäjl.

<sup>11</sup> Dxejc, che bidzunjäreni rebarcw ro' nis, basa'nreni guiraa xhixtenreni, te sanajlreni Jesús.

*Basiaj Jesús te bejn ni ral tiejxhni*  
(Mt. 8:1-4; Mr. 1:40-45)

<sup>12</sup> Cheni guyu' Jesús tej reguejdx, bidzujn te bejn lojni ni rajc lepra te yälguidxduxh ni ral tiejxhni. Che bahuiini loj Jesús, bazuxhijbni, basajbni lojni lo yuj, räj pni lojni:

—Dad, palga rlajzlu, sajz gusajclu narä.

<sup>13</sup> Dxejc batzuub Jesús naani yej cni räj pni lojni:

—Rlazä jiajclu. Susiacälu.

Che guniini rediidxre, biacgajc beñ racxhuuga. <sup>14</sup> Dxejcti gunibee Jesús lojni rut lojdi gäbni xhi guzajcni. Räj pni lojni:

—Huijtis lo bixhojz te fini lojlu, huisa'nza gojn xcuent ni biajclu si'cni rnibee xleii Moisés, te filoj rebejn abiajclu.

<sup>15</sup> Luxh xpala'n Jesús sanuutis cayä'pruni, guixe-guixee care'ch diidx xcuentni. Rdoj pza xhidalduxh bejn te gucuadijgreni xtidx Jesús näjza te gusajcni yälracxhuu xtenreni.

<sup>16</sup> Yu'za huält riunejz Jesús rijni relajt cadro ruti rebejn, te ro'c rbedx-rniabni lo Xtadni Dios.

*Basiaj Jesús te bejn ni digacdi guiniib*  
(Mt. 9:1-8; Mr. 2:1-12)

<sup>17</sup> Te dxej lajni caculuiini rebejn, nejzga sobga' gaii farisee näjza gaii bejn ni ruluii leii garen-garen reguejdx, siäädreni guideb nez reguejdx xten Galilee, näjza región Judea, näjza guedx Jerusalén. Dxejc huenliisi rluiloj suganäj xcälrnibee Dios Jesús te rajc russiaj cni rebeñracxhuu. <sup>18</sup> Dxejc bidzujn gaii dade' nuuren lo te lonbáz te bejn ni di gacdi guiniib, rlajzreni gusiu'renini neñ yu' te quixhrenini nez loj Jesús. <sup>19</sup> Niluxh direni nidxäl canejz niu'reni sa'csi nadäduxh ro'c sa'csi tre' xhidajl rebejn. Dxejc huäpnäjrenini yej c yu'ga, badzucajreni gaii tej, dxejc basajbreni xloon beñracxhuuga yej cni yu'ga te guj c bidzujni nez loj Jesús. <sup>20</sup> Che bahuii Jesús yälrlilajz xtenreni, räj pni loj beñracxhuuga:

—Dade', agubicaj xtojllu.

<sup>21</sup> Dxejc rebejn ni ruluii leii näjza refarisee gusloj cayujnreni xhigab, naareni: “¿Chucha niguiire ni caniyajni Dios con rextiidxni? Ruti te bejn ni sajz gudzucaj xtoj l rebejn, Diostis rudzucaj dojl.”

<sup>22</sup> Dxejc gubee Jesús xhi xhigab cayujnreni, ni'c räj pni lojreni:

—¿Xhicuent rujntu xhigab si'c neñ lastootu? <sup>23</sup> ¿Xhini'c najc guyasiru guiniini: “Agubicaj rextojllu”, o guiniini: “Huistie, guzaj”, ä? <sup>24</sup> Mbjaj naj, suluiä nez lojtu Xi'n Dios ni guj c Xi'n Niguii rajp yälrnibee, yäl nadip lo guedxliujre te gudzucajni xtoj l rebejn.

Dxejc räj pni lo bejnga ni digacdi guiniib:

—Lojlu rniä, jhuistie, guläs xloonlu, huij rolizlu!

<sup>25</sup> Lagajc dxejc nez lojreni huistiegajc bejn ni digacdi guiniib, guläsi xlooni cadro naga'ni, dxejc siini rolizjñ, calä'pni xpala'n Dios.

<sup>26</sup> Guiraaren rdxeloduxhreni recosga, dxejc guslojreni calä'preni xpala'n Dios, rdxejblireni räj pni:

—Abihuiinu cosro, cos ni guidxeloj bejn nadxej.

*Rbejdx Jesús Leví*  
(Mt. 9:9-13; Mr. 2:13-17)

<sup>27</sup> Che gudejd gulujx recosre, birii Jesús ro'c. Dxejc bahuiini lo te bejn ni rusquijx xcuent impuest, nani laa Leví. Sobga'ni lo te mex cadro rusquijxni impuest; ro'c bahuii Jesús lojni. Räj p Jesús lojni:

—Gudanajl narä.

<sup>28</sup> Dxejc huisu Leví, basa'nni guiraa recosga, dxejc sanajlni Jesús.

<sup>29</sup> Dxejc bejn Leví te lanij rolizni par Jesús. Biääd xhidajl bejn ni rusquijx xcuent impuest näjza sgaai bejn; sobganäjnireni lo mex. <sup>30</sup> Dxejcti refarisee näjza rebejn ni ruluui leii guslojreni cayeinäjreni rexpejn pac Jesús, räjpreni:

—¿Xhicuent raunäjtu, ränäjtu rebejn ni rusquijx impuest näjza rebeñdojl, ä?

<sup>31</sup> Dxejc badzu' Jesús diidxre, räjpni lojreni:

—Rebejn ni nadaan di guiquini te doctoor, ganaxtis rebejn nani racxhuu rquiinreni te doctoor. <sup>32</sup> Dina niädtedxä rebeñsa'c, narä biädtedxä rebeñdojl te gusiechljazreni.

*Gunabdiidxreni loj Jesús xcuent yälrucua'n*

(Mt. 9:14-17; Mr. 2:18-22)

<sup>33</sup> Dxejc gunabdiidx rebeñga loj Jesús, räjpreni:

—¿Xhicuent lacti rucua'n rexpejn Juan näjza rexpeñ refarisee, lacti rbedx-rniabreni loj Dios; niluxh rexpejn pacu alga rajwreni, rä'reni?

<sup>34</sup> Badzu' Jesús diidxre lojreni, räjpni:

—¿La sajc gucua'n rebejn ni yu' lo te sa' la'ni yunäjreni bi'n, ä? <sup>35</sup> Niluxh sidzujñ dxej cheni sibicaj bi'n lojreni, dxejc sii sucua'nreni.

<sup>36</sup> Guniiza Jesús cuentre lojreni, räjpni:

—Rut rucuaadi te remiend ladcoob loj te ladyujxh, sa'csi che rxu'n ladcoob rutäjzni ladyujxhga, dxejc xhiroobruni guiräjs, luxh diza ladcoob guchaag lo ladyujxh. <sup>37</sup> Di gacdi gusälni bincoob neñ te guidbiejw sa'csi bincoobga sutiäsa'ni guidbiejwga dxejc sixe' binga, sixijñza guidbiejwga. <sup>38</sup> Ni'cni nanab gusälni bincoob neñ guidcoob si'c sigucheeza guiro'preni. <sup>39</sup> Luxh nicla tej bejn ni agu' bin ni yu' agujc xchej rljaj yä bincoob, sa'csi säjbn: "Bin ni yu' agujc xchej najc huenru."

## 6

*Rutie' rexpejn Jesús triuu dxej nani rusilajzreni*

(Mt. 12:1-8; Mr. 2:23-28)

<sup>1</sup> Te dxej ni rusilajz rexpejn Israel sasaj Jesús näjza rexpejn pacni nez loj reyuj cadro naga' triuu. Dxejc, sa'csi calaanreni gusloj caläädxreni doj lo triuu te cayajwrenini. <sup>2</sup> Dxejc gunabdiidx gaii refarisee ni najc beñguidoo, räjpreni lojreni:

—¿Xhicuent rujntu dzuun ni di nungäjñ guntu che rajl dxej ni rusilajznu?

<sup>3</sup> Dxejc räjp Jesús lojreni:

—¿La gajdtu goñ lo reguijtz xhi bejn toDavid cheni calannäjni rebejn nani sanäni, ä?

<sup>4</sup> Biu'ni neñ xquidoo Dios, gudajwni yätxtiil nani di nungäjñ gau bejn sa'csi xtebtis rebixhojz rajc rajwni, luxh badeedni yätxtiilga gudajw resa'ni.

<sup>5</sup> Räjpza Jesús lojreni:

—Sigajcza narä, Xi'n Dios ni gujc Niguii, rnibeä dxej ni rusilajztu.

*Niguii ni nabijdz naani*

(Mt. 12:9-14; Mr. 3:1-6)

<sup>6</sup> Che gojl stee dxej ni rusilajz rexpejn Israel, biu'ni neñ te guidobäz, dxejc guslojni caguluini rebejn. Lagajc ro'c sobga' te dade' ni nabijdz naani ladbee. <sup>7</sup> Dxejc remastr xten leii näjza refarisee cagula'tzreni te don la susiajnci beñga dxej ni rusilajzreni, sa'csi caguiilreni xho gucuaquijreni Jesús. <sup>8</sup> Niluxh laani najnni xhi xhigab cayujnreni, dxejc guiniini lo dade' ni nabijdz naani, räjpni:

—¡Huisuliii! ¡Gudaa nez galäiire!

Dxejc huisulii beñga, gubigni lojni. <sup>9</sup> Dxejc räjp Jesús lojreni:

—Rlazä guiniabdidxä lojtu dee: ¿Xhini'c najc huen gunni che rajl dxej ni rusilajznu? ¿La te dzunsa'c o la te dzunguijdx? ¿La gacnäjnu bejn laa xcäl'nabajnni o la gudzucajnu yäl'nabajnni, ä?

<sup>10</sup> Che gulujx bahuii Jesús loj guiraa rebejn ni tre' guideb gabini, räjpni loj bejn ni nabijdz naani:

—¡Baslii naalul!

Dxejc bejn si'c, luxh biacgajc naani. <sup>11</sup> Dxejc bidxechduxh rebejn ni tre' ro'c, gusloj canabdiidxreni lo sa'reni xhi gunnäjreni Jesús.

*Gule Jesús guitzubio'p rexpejn pacni*

(Mt. 10:1-4; Mr. 3:13-19)

<sup>12</sup> Neñ redxejga, huij Jesús loj te dajn te huininäjni Xtadni Dios. Ro'c gudejndi yääl cabedx-canabni lo Dios. <sup>13</sup> Che bianij lo yuj, gurejdxni rexpejn. Ro'c guleni tzubio'preni te gacreni xpejn pacni. Gulälajnnireni reapost. <sup>14</sup> Renani guleni najc Simón ni gulälajni Pedr; Andrés, bejtz Simón; Jacob; Juan; Felipe; Bartolomé; <sup>15</sup> Mateo; Tomás; Jacobo xi'n Alfeo;

Simón ni nagab loj rexpen cananista; <sup>16</sup> Judas, bejtz Jacob; nájza Judas Iscariote ni guto' Jesús loj rebixhojz.

*Ruluu Jesús xhidajl bejn  
(Mt. 4:23-25)*

<sup>17</sup> Che biätnäj Jesúsreni yejc dajnga, guzudxireni yejc te danbäs sa'csi suga' xhidajl bejn ro'c. Siädreni guiraa nez reguedx Judea, nájza guedx Jerusalén nájza reguejdx ni tre' gajxh nisdoo Tiro con Sidón. Rebejnga bidzujnreni te gucuadiajgreni xtidx Jesús, te gusi-ajczanireni xcälracxhuureni. <sup>18</sup> Guiraa ni rdejdz trabajw yu' bejndxab nen lastooreni nájza reni'c biajc. <sup>19</sup> Guiraa rebejn rlanj caan Jesús, sa'csi rusiajcní guiraareni con xcälrmibeeni.

*Balijdx Jesús rebejn  
(Mt. 5:1-12)*

<sup>20</sup> Dxejc bahuii Jesús loj rexpejn pacni räjpni lojreni:  
—Chicbaatu, bejn nani xheti xhixtentu, sa'csi xtentu najc cadro rnibee Dios xhaguibaa.  
<sup>21</sup> Chicbaatu, bejn nani calaan naj, sa'csi suniidx Dios lojtu nani rniabtu.  
'Chicbaatu, bejn nani roon naj sa'csi susiäjł Dios lajztu dxejcrú suxhijztu.  
<sup>22</sup> Chicbaatu, bejn nani rdexchlajz bejn lojtu, rbääreni la'tu te laad, rniyajreni la'tu, luxh rbälazreni lajtu si'c te cos guijdx sa'csi rililajztu xtidx Xi'n Dios ni gujc Niguii. <sup>23</sup> Colguibalajz neñ redxejga, na'c gac-huin lastootu sa'csi sunidduxh Dios xhi xtentu xhaguibaa. Sigajcza basacsí retoxtadgoldooreni rebejn nani gunii xtidx Dios galoo.  
<sup>24</sup> 'Probe'zatu, la'tu benrajp, sa'csi agojptu xcäl'nasa'ctu, xcälrbalajztu lo guedxliujre.  
<sup>25</sup> 'Probe'tu nani rajp guiraloj xhixtentu naj, sa'csi sidejdtu yälrliaan.  
'Proobzatu ni ruxhijztu naj, sa'csi sonduxhtu sidejdtu yäl'huinduxh, yäl'nalas.  
<sup>26</sup> 'Probe'tu palga rliä'p rebejn xpala'ntu naj, sa'csi si'c bejn retoxtadgoldooreni rebejn ni gunii didx-xhü lacuaa niniireni xtiidxpac Dios.

*Chanälajzni rebejn nani rdxe'ch lojni  
(Mt. 5:38-48; 7:12)*

<sup>27</sup> Räjzpni:  
—La'tu ni cacudiajgtu rextidxä rniä diidxre lojtu: colchanälajz rebejn ni rdxe'ch lojtu, colyujn dzunsa'c loj rebejn ni rdexchlajz lojtu. <sup>28</sup> Benle' yejc rebejn ni rgube la'tu. Gunab lo Dios xcuent rebejn ni rcuaquij la'tu. <sup>29</sup> Palga yu' chu rlanj quiin te laad lojlu, badeedza stelaad quiinni. Palga yu' chu gudzucuj xhablojiaalu, badeedza naj xcamangwlu xca'ni. <sup>30</sup> Xhitis ni guiniabreni lojlu, badeedni; ni gudzucuj te xhi xtenlu lojlu, na'c guiniabsacluni lojni. <sup>31</sup> Sigajc ni rlanjlu gunnäj bejn la'tu, si'cza la'tu colyennäj bejn.  
<sup>32</sup> Palga la'tu sanälajztistu rebejn nani sanälajz la'tu, xlia'sini, sa'csi sigajcza rujn rebejdojl.  
<sup>33</sup> Palga guntu hueen lojtis rebejn ni rujn hueen lojtu, xhet laadi cayujntu, sa'csi sigajcza rujn rebejn ni nabajn neñ dojl. <sup>34</sup> Palga gudedlaatu lojtis reni rujntu xhigab gunidxsacni lojtu, xxi cos hueen rchalotu rujntu? Ni rebejdojl rudedlaazareni loj rebejn ni najnreni siguixsac ni nasääbreni. <sup>35</sup> La'tu, nanab chanälajztu rebejn ni rdxe'ch lojtu, guntu hueen lojreni, gudedlaatu loj rebejn, na'c gunlojtu xcasactu recos ni rudedlaatu, te si'c guroob gac nani guzalajz Dios lojtu; te si'c gactu xi'n Gueb Dios ni nabajn xhaguibaa. Sa'csi si'cza najc Dios huenduxh loj reni di gudeed xquixtios lojni, nájza loj rebejdojl. <sup>36</sup> Colgulasajz resa'tu si'c rulasajz Xtdadnu Dios guiraa rebejn.

*Colgulasajz sa'tu  
(Mt. 7:1-5)*

<sup>37</sup> Räjzpni:  
—Na'c guntu yälguixhtis nani rujn bejn, naatu xhet laadi rujnni; te na'cza gun Dios yälguixhtis rextojltu. Na'c gucuauquijtu bejn te sigajcza di Dios gucuauquij la'tu. Colgusiäjł-lajz dojl ni rujn sa'tu, te si'cza gusiäjł-lajz Dios rextojltu. <sup>38</sup> Colgudeed loj bejn ni rquiinreni te si'cza guzalajz Dios ni rquiintu. Suniidxreni xca'tu te mediid guidxadoo, sibetijp ni yu' neñni, cupe'tlini gusäl'reni neñ xpolstu. Dios suniidx lojtu lagajc con mediid ni rudeedtu loj rebejn.

<sup>39</sup> Guniiza Jesús stee cuent räjpni:

—¿La sajc guluu te beñ lotiä'p nez yuj lo stee beñ lotiä'p, ä? ¿La di guiro'preni guitejb neñ te guede, ä? <sup>40</sup> Te bejn ni casieed di gacdi guisieedruni loj ni najn xmastrni. Te bejn, che agulujx bisieedni, sajcni si'cni najc mastr xtenni.

<sup>41</sup> '¿Xhicuent cahuiilu guixhe' ni yu' baloj bejtzlu, luxh dilu fii yagro ni yu' balojlu? <sup>42</sup> O, xho mood gäblu lo bejtzlu: "Guidon cuää guixhe' ni yu' balojlu"; luxh dilu gacbee yu' te yagro balojlu, ä? ¡Beñgujdx! Guläxgaa yagro ni yu' balojlu, dxejc sajc fisa'clu te cuäälu guixhbäs ni yu' baloj bejtzlu.

*Ninexhsa'c ni rcaj loj te yajg sujn gumbeeni yajg*  
(Mt. 7:17-20; 12:34-35)

<sup>43</sup> Räj pzani:

—Xheti te yagsa'c ni ruded ninejxh ni xhet sajcdi, xhetiza te yajg ni xhet sajcdi ni ruded ninexhsa'c. <sup>44</sup> Sa'csi tebgaj reyajg rusenlojni xhi yajgni xcuent ninejxh ni rcaj lojni. Di bejn gutie' iigw lo reyaguejch, diza bejn gutiu' uub lo te yag balagrejn. <sup>45</sup> Rebensa'c rnii didxsa'c, sa'csi xhigabsa'c yu' neñ lastooni. Niluxh rebenguijdx rnii ganax didxguijdx sa'csi xhigabguijdx yu' neñ lastooni, sa'csi ro'ni rnii nani yu' neñ lastooni.

*Tio'p bejn ni benchee tio'p yu'*  
(Mt. 7:24-27)

<sup>46</sup> Räj pzani:

—¿Xhicuent rniitu loä: “Dad, Dad,” luxh ditu gun nani rniä guntu? <sup>47</sup> Guiniä lojtu chuni'c najc si'c bejn ni riääd loä, rucua diajgni xtidxä luxh rusoobni xtidxä. <sup>48</sup> Najcni si'c te bejn ni benchee rolizni, ganid gudäänni jäät, dxejcti bejnii cimient yejc te guilaj. Cheni biäjt nisro ro' gueuu, bidijn nisro cuä' yu'ga, luxh nicla nusniibnini, sa'csi yu'ga sobgadzu'tz yejc te guilaj. <sup>49</sup> Niluxh reni rcua diajg xtidxä, dxejc direni guzoob xtidxä, najcni si'c te bejn ni bejn xyu'ni loj yujxh, dini niujn cimient xten yu'ga. Dxejcti biäjt nisro, bidijni cuä' yu'ga, dxejc li gurebä'n yu'ga, gunitojtini.

## 7

*Basiajc Jesús xmos te beñ roman ni rnibee*  
(Mt. 8:5-13)

<sup>1</sup> Che gulujx gunii Jesús loj rebejn, huijni te guejdx ni laa Capernaum. <sup>2</sup> Ro'c yu' te beñ roman ni rnibee, yu' te mos lojni, luxh sanälazduxhni mosga. Cayacxhuduxh mosga, ameerli guetni. <sup>3</sup> Che biejn diajg capitán cagasä'treni Jesús, baxhalgajcni gaii bengool lo rexepejn Israel te chagajnneni Jesús jäädni te gusiajcnii xmos dade'ga. <sup>4</sup> Che gubigreni loj Jesús, gusloj gunabduxhreni lojni, räjpreni lojni:

—Dade're najc bensä'c, nungäjl gacnäjluni <sup>5</sup> sa'csi sanälajzni lajdx rexepejn Israel, luxh lagajc laani gunibee guc-chee xquidobäznu.

<sup>6</sup> Dxejcti huinä Jesúsreni. Cheni siäd dzungajxhreni royu', baxhal capitán gaai xamiigwni, gäbreni loj Jesús:

—Si'c naj capitán: “Di rlazä gotalä xtzuunlu. ¿Chu narä te jiu'lu rolizä? Xhet sacädi. <sup>7</sup> Ni'c dina niapä baloor te lagajc narä niädganä guejblu, sa'csi rajplu yäl'mibeduxh niluxh narä rut nacädi. Ni'cni gunibeetis jiajc xmosä, luxh laani siacgajcni. <sup>8</sup> Sa'csi narä nacä xmos rebejn ni rnibee, luxh rnibeäza loj resoldaad. Che gäpä lo tejni: Huij rec, rijni; che gäpä loj steeni: Gudaa ree, riäädni; che gäpä loj xmosä: Bejn dee, rungajcni.”

<sup>9</sup> Che biejn diajg Jesús rediidxre, bidxeloduxhni, gubiréni loj rebejn ni siädnajni, räjpni lojreni:

—Rniliäpac lojtu, nicla lo rexepejn Israel gajdna guidxälä te bejn ni rililajzduxh si'c ni rililajz capitánre.

<sup>10</sup> Che gubi' rebejn ni huij loj Jesús roliz capitán, bahuiireni abiajc xmosni.

*Baspansac Jesús xi'n te gunabiuud*

<sup>11</sup> Neñ redxejga, huij Jesús te guejdx ni laa Naín. Huinäni rexepejnpacni näjza xhidajl bejn ni sanajlni. <sup>12</sup> Che bidzujjni gajxh ro' guejdxga, bahuiini sacua'tzreni te bengut, te bi'n ni najc xtebtis xi'n te gunabiuud. Xhidalduxh bejn sacua'tzni. <sup>13</sup> Che bahuii Jesús loj gunabiuudga, biani nane'ga, räjpni lojni:

—¡Na'c roonlu!

<sup>14</sup> Dxejc gubig Jesús lo rebejn ni sanä bengutga, dxejc guzudxi reni nuu bengutga. Dxejc räjp Jesús loj bengutga:

—¡Bi'n!, narä rniä lojlu; ¡Huistie!

<sup>15</sup> Dxejc huistie bengutga, sobga'ni guslojni caniini. Dxejc badeed Jesúsni lo xnanni. <sup>16</sup> Che bahuiireni xhini'c gujc, bidxejbreni, bidxeloduxhreni, guslojreni calä'preni xpala'n Dios, räjpreni:

—Te niguiscaduxh ni rnii xtidx Dios abidzujn nez loonu.

Caniizareni:

—Lagajc Guejb Dios abiädhuui rexepejni.

<sup>17</sup> Dxejc bire'ch diidx xcuent Jesús guideb nez reguedx Judea näjza guiraa reguejdx ni tre' nejzga.

*Xpejn Juan ni rutiobnis huinabdiidx loj Jesús*  
(Mt. 11:2-19)

<sup>18</sup> Rexpejn pac Juan ni rutiobnis bij rediidxga lojni che yu'ni latzguuib. <sup>19</sup> Dxejc baxhalni gaiireni lo Jesús te sanabdiidxreni: “¿La guliipac najluc Crist ni jiaäd o sibäjznu chu stee bejn, ä?” <sup>20</sup> Dxejcti gubig rexpejn Juan loj Jesús, räjpreni:

—Juan ni rutiobnis baxhal nuurnu te guiniabdiidxnu lojlu: “¿La luj najc Crist ni jiaäd o la sibäjznu chu stee bejn?”

<sup>21</sup> Lagajc dxejc che bidzujnreni, basiajc Jesús xhidajl bejn ni rajc garen-garen yälguidx, ni yu'za rebenxab lastooreni, basiajczani baloj ni di fi. <sup>22</sup> Dxejcti badzu' Jesús diidxre, räjpni: —Colchaye'tz lo Juan guiraa ni abahuiitu näjza ni abiejn diajgtu. Colye'tz lojni: “Relotiä'p ruhuisac; rebencoj rsiasa'c; reben ni raj guejdx tiejxhni, abiajc tiejxhni; rediagcua't riensac diajgreni; rebengut, agubansacreni; luxh loj rebenproob nani cabäjz xcälracnäj Dios riejn diajgreni rsiule' xtidx Dios xcuent xho laa bejn lo dojl. <sup>23</sup> Chicbaa nani rumbree narä, nani di cuälaz narä.”

<sup>24</sup> Cheni sii rexpejn Juan, gusloj Jesús caniini xcuent Juan loj rebejn, räjpni:

—¿Chuni'c huihuiitu nez lo reyubijdz? ¿La te niyt ni rusniib bej, ä? <sup>25</sup> ¿Xhini'c huihuiitu? ¿Te bejn ni sacheduxh, ä? La'tu najntu rebejn ni sacheduxh näjza reni nabansa'c, rolizj rerei yu'reni. <sup>26</sup> ¿Chuxhni'c biriitu huihuiitu? ¿Te niguii ni rniit xtidx Dios, ä? O'n, rniliä lojtu, luxh te ni sacduxhru loj guiraa reniguii ni rniit xtidx Dios. <sup>27</sup> Juan najc niguii ni ruzä't rexquitz Dios cadro caj scree:

Narä guxhalä te niguii nani guinii xtidxä, te nidni lojlu, te laani guzucheeni xnezyujlu nez lojlu.

<sup>28</sup> Rniliäpac, loj guiraa rexingaan regunaa, nicla tejni gajd guiricaj ni najc te bensacduxhru nez loj Dios si'c najc Juan ni rutiobnis. Niluxh nani guxiiru sajc lo xcälrnibee Dios ni jiaäd, sajcruni loj Juan.

<sup>29</sup> Che biejn diajg rebejn näjza reni rusquijx impuest rextiidxni xcuent Juan, gucbeereni rujn Dios yälguxhtissa'c, sa'csi abatiobnis Juanreni. <sup>30</sup> Niluxh refarisee näjza rebejn ni ruluii leiü gulälazreni nani niujn Dios par laarenä, sa'csi direni nicäjb nutiobnis Juanreni. <sup>31</sup> Räjpza Jesús lojreni:

—¿Xhocha guiniä najc rebejn nani tre' naj? <sup>32</sup> Najczeni si'c rebixbäz nani rguijt nez lo guii cadro rdo', rbedxa'reni loj sa'reni, rniireni: “Bielnu te bizej te guya'tu, niluxh ditu nuya'. Bielzanu te dij ni nabaduxh dxejcti dizatu nioon.” <sup>33</sup> Sa'csi che biääd Juan, dini niauxha't, dizani niä' bin, luxh räjpju: “Yu' bendxab lastooni.” <sup>34</sup> Dxejcti biälä narä, Xi'n Dios ni gujc Niguii, rauä, rä'ä. Dxejc räjpju: “Bahuiilaare, dade're rauxha't, rä'zani, najcni xamiigw rebenojl näjza rebejn ni rusquijx reimpuet xten gubier.” <sup>35</sup> Ni'cni xcälnajn Dios huenliisi rienloj loj dzuun ni rujn rebejn ni najn.

### *Jesús huij rolizj Simón ni najc farisee*

<sup>36</sup> Dxejc tej refarisee gunii loj Jesús, räjpni:

—Jiaädlu rolizä te guidaunu.

Dxejc huij Jesús rolizni, ro'c gurejni lo mex. <sup>37</sup> Rbäjz te gunagubejxh lo guejdxga. Che biejn diajgni satajw Jesús rolizj fariseega, bidzunnäjni te bo't guidxa se't nejxh, luxh bo'tga najc si'c onix, botsa'cni. <sup>38</sup> Che biu' gunaaga, bidzujni lo ni' Jesús, guslojni cayoorni. Con nisbee caguiibni ni' Jesús, dxejc caguspjdzni ni'ni con xquidxejcnä. Dxejc bachagro'ni ni'ni bazaazani setnejxhga ni' Jesús. <sup>39</sup> Che bahuii farisee ni gurejdx Jesús rolizni, recosre, bejn ni xhigab: “Palga guli najc niguiire Xi'n Dios, sacbeeni chu najc näjza xho najc gunaare ni cagajn ni'ni, sacbeezani najcni te gunadolduxh.” <sup>40</sup> Dxejc gunii Jesús loj fariseega, räjpni:

—Simón, yu' xhi rlazä guiniä lojlu.

Dxejc räjp fariseega lojni:

—Guniini, Dad mastr.

<sup>41</sup> Dxejc räjp Jesús lojni:

—Tio'p bejn nazäab meel lo te bejn ni rudedlaa meel. Tej reni nazäab si'cti gaiigayuu meel. Steeni nazäab si'cti tiubitzu meel. <sup>42</sup> Cheni di niajcdi niguijxreni xti'nreni, basiäl lajzni xti'n guiro'preni. Naj gunii loa, ¿chu tejreni sianälajzru dade'ga, ä?

<sup>43</sup> Badzu' Simón diidxre lojni, räjpni:

—Rchaloä bejn ni nazäabru lojni.

Dxejc räjp Jesús:

—Laaca rniilu.

<sup>44</sup> Dxejc gubiré Jesús, bahuiini loj gunaaga. Dxejc räjpni loj Simón:

—¡Bahuii loj gunaare! Che biu'ä rolizjlu, dilu nuniidx nis te nidiib ni'ä. Per gunaare gudibnäjni ni'ä nisbee ni birii balojni, dxejc baspijdzni ni'ä con xquidxejcnä. <sup>45</sup> Dilu nuchagro' narä, luxh laani cheli biu'ä ree, gajdni cuäaz guchagro'ni ni'ä. <sup>46</sup> Dilu nusäl se't yecä, niluxh laani basälni se't ni rlianexhduxh ni'ä. <sup>47</sup> Ni'cni rniä lojlu, dojl xten gunaare,

luxh xhidalduxh najcreni, abadzucaj Dios redojlga sa'csi huenliisi sanälajzni Dios. Luxh rebejn ni rudzucaj Dios guxii xtojłreni, guxiiza sanälajzreni Dios.

<sup>48</sup> Dxejcti räjpni loj gunaaga:

—Agubicaj rextojłlu.

<sup>49</sup> Dxejx rebejn ni sobga' lo mex con laani, che biejn diajgreni rediidxre, gusloj canii lo sa'reni, räjpreni:

—¿Chuchani'c najc niguiire, ni'cni rudzucajłini xtojł bejn, ä?

<sup>50</sup> Räjp Jesüs loj gunaaga:

—Agułaal lo xtojłlu sa'csi ahuililajzlu; huij naj, bascuedx lajzlu.

## 8

### *Regunaa ni gucnäj Jesüs*

<sup>1</sup> Dxejcti gusloj huij Jesüs guiraa reguejdx näjza rerench, cagusule'ni xtidx Dios, cagului-  
ini xcuent xcälřnibee Dios loj rebejn. Sanäni rexpejnřpacni <sup>2</sup> näjza gaii gunaa ni abasajcni, agulääni rebędxab lastooreni, näjza basajcni xcälřguijdxreni. Tejni laa Marii ni laaza Magdalen, ni gulää Jesüs gajdz będxab neņ lastooni. <sup>3</sup> Stee gunaa laa Xuan, ni najc chääł Chuza, ni ruhuui xhixten Herodes. Stee gunaa laa Susan. Guyu'za sgaii gunaa. Guiraa reni'c rudeed lagajc xhixtenreni te rio' recos ni rquineni.

### *Xcuent bejn ni rbe'c binij*

(Mt. 13:1-9; Mr. 4:1-9)

<sup>4</sup> Dxejcti bire' xhidajł bejn lojni ni birii xhidajł reguejdx. Lojreni gunii Jesüs con te cuent ni ruluui, räjpni:

<sup>5</sup> —Birii te bejn sale'c binij. Cheni cabe'cni binij, yu' binij ni bitejb cuä' nezyuj. Che sadejd rebejn baläřeni yejc binijga, biäädza remane' ni rutajł xhaguibaa, gudajwrenini.

<sup>6</sup> Yu'za lajt bitejb binijga neņ reguij cadro xheti xhidajł yuj. Che gulejn binijga, gubidzgajcni sa'csi xheti xcojř ro'c. <sup>7</sup> Yu'za lajt bitejbni nez neņ reyaguejch. Che gulejni, di reyaguejch nusaan niroob gäljga. <sup>8</sup> Yu'za lajt bitejb binijga lo yusa'c, ro'c gucduxhni. Cheni guroobni, yu' binijga gujc te gayuu xob loj teja binij ni gule'c dade'ga.

Che gulujx guniini scree, dxejx guniini dip räjpni:

—Palga sajc gucuadiajgtu rediidxga, colcuadiagsa'cni.

### *Xhicuent gunii Jesüs recuent*

(Mt. 13:10-17; Mr. 4:10-12)

<sup>9</sup> Dxejcti gunabdiidx rexpejnřpacni lojni räjpreni:

—¿Xhi säloj cuentre?

<sup>10</sup> Dxejx räjpni lojreni:

—Lojtu ni najc rexpejnä suniidx Dios yälřnajn te gacheetu reyälřxhiga'tz xten xcälřnibeeni. Loj chutis stee bejn, siniä recuent lojreni te mase cadxelojreni, direni fisa'c, luxh mase cacuadiajgreni, direni gachesa'c.

### *Rusule' Jesüs xcuent ni rbe'c binij*

(Mt. 13:18-23; Mr. 4:13-20)

<sup>11</sup> Räjpzani:

—Scree säloj cuentre, rebini najc si'c xtidx Dios. <sup>12</sup> Binij ni biajb lo nezyuj najc si'c rebejn ni rucuardiajg xtidx Dios. Dxejx riääd będxab, riäädzucajni rediidxga lastooreni te na'c chalilajzreni xtidx Dios, te na'cza laareni lo dojl. <sup>13</sup> Binij ni biajb neņ reguij najc si'c rebejn ni rucuardiajg xtidx Dios, rbaalajzreni; per sa'csi xheti xlobaareni, nälajznu, direni gandzu'tz xtidx Dios, rililajzreni te bo'c, per che rsacsi rebejnřeni, rbälazreni xtidx Dios. <sup>14</sup> Binij ni biajb neņ reyaguejch najc si'c rebejn ni rucuardiajg xtidx Dios, per lał ni sanuureni xnejzreni, rijia'nreni lo recos guedxliuj, lo yälřnasa'c ni ruhuireni, näjza rujnřeni si'ctis ni rälajz tiejxhřeni. Reni'c rujn řunijřeni xtidx Dios, ni'cni direni guzoob xtidx Dios, direni chanuu te gunreni xtzunsa'c Dios. <sup>15</sup> Binij ni riab lo reyusa'c najc si'c rebejn nani rucuardiajg xtidx Dios, ni rililajz diidxga guideb te lastoya ni najc hueen. Randzu'tzreni xtidx Dios, dxejx rudeedreni te yälřnasa'c, nalajznu ruzoobreni xtidx Dios, rujnřeni xtzunsa'c Dios.

### *Xhet yu'di ni naga'tz par tejpas*

(Mr. 4:21-25)

<sup>16</sup> Räjpzani:

—Ruti te bejn ni rucuauij te bajł dxejx rusäuni te caj yejc bajłga, dizani gusujnini dejtz te loon. Alga rusoobnini neņ candilieer loj te mex te guzanijni guideb neņ yu'ga te reni jiu' fiireni lo bajłga. <sup>17</sup> Xhet yu'di ni yuchetu'tzdi ni di guidzujř dxej guiluiini; xhet yu'diza ni naga'tz naj ni di guidzujř dxej gacheb bejřni.

<sup>18</sup> Ni'cni coꝫcuadiagsa'c diidx; sa'csi guiraa rebejn ni rajp yälracbee, sajprureni yäl'najn. Luxh reni di ninuu nuquadiajg xtidx Dios, lojni sibicaj näj ni abacuadiajgni, ni rchaloni najjni.

*Xnan Jesús con rebejtzni*  
(Mt. 12:46-50; Mr. 3:31-35)

<sup>19</sup> Dxejc bidzujñ xnan Jesús näjza rebejtzni cadro suga'ni, niluxh di niajcdi nibigreni lojni sa'csi tre' xhidalduxh bejn ro'c. <sup>20</sup> Dxejcti huisa'n te bejn diidx loj Jesús, räjpni:

—Xnan guejblu näjza rebejtz guejblu suga' rolä', luxh rlaizreni fiireni lo guejblu.

<sup>21</sup> Badzu' Jesús diidxre lojreni, räjpni:

—Xnanä näjza rebetzä najc rebejn ni rucuadiajg, ni ruzoobza xtidx Dios.

*Basiacdxí Jesús te beduxh*  
(Mt. 8:23-27; Mr. 4:35-41)

<sup>22</sup> Te dxej biu' Jesús näjza rexpejn pacni neñ te barcw. Dxejc räjpni lojreni:

—Coꝫcho' stelaad ro' nisre.

Basyu'reni barcw lo nis, sä'tireni. <sup>23</sup> Cheni sadejdreni galäii nisga, gudiejs Jesús nen barcw. Dxejc gubi' te beduxh lo nisga, luxh sa'csi lacti nadip ro' bejga, gusloj cayu' nis nen barcw, ameerli jääz barcwga lo nis. <sup>24</sup> Dxejcti huicuäänreni Jesús, räjpreni lojni:

—¡Mastr! ¡Mastr! ¡Cayääznu lo nis!

Che gubajñni, huistieni, dxejc gudidxa'ni lo bejga näjza lo nis ni cayäsjaa. Dxejc guläjz bejga, guredxiza nisga. <sup>25</sup> Dxejc räjpni lojreni:

—¿Con xcälirililajztu, ä?

Per laareni bidxejbreni, bidxeloduxh'reni, canabdiidxreni lo sa'reni:

—¿Chuni'c najc niguiire te rnibeeni bej näjza nis, luxh rusobdiajg bej näjza nis xtiidxni?

*Te ben Gadara ni guyu' rexsprit beñdxab lastooni*  
(Mt. 8:28-34; Mr. 5:1-20)

<sup>26</sup> Bidzujñtireni lo yuj xten Gadara ni tre' stelaad ro' nis nez loj reyuj xten Galilee. <sup>27</sup> Cheni biäjt Jesús nen barcw baläjni lo yuj, gubig te bejn ni siääd guejdxga lojni. Agujc xchej yu' rebendxab nen lastooni. Dini gacw xhajbni, dizani cuääz nen yu', alga rbäjzni cadro yu' rebaa. <sup>28</sup> Che bahuiini loj Jesús bazuxhijbni nez lojni, guredxa'ni räjpni:

—¿Xhicuent riädchu'lu loonu, luj, Jesús Xi'n Gueb Dios ni rbäjz xhaguibaa? Rniabduxhä lojlu, na'cru gusacsilu nuurnu.

<sup>29</sup> Guniini rediidxre sa'csi canibee Jesús guirii rebendxabga nen lastoo bejn're. Agujc xchero cazob rniaaz rebendxabga bejnga ruliib rebejn ni'ni, ñaani con cadenguiib te guilibdzu'tzni, te xhet gundini bejn. Niluxh laani rutiugya'ni recaden, dxejc rebendxabga rinärenini nez lo reyubijdz. <sup>30</sup> Jesús gunabdiidx lojni, räjpni:

—¿Chu laalu?

Dxejc badzu'ni diidxre loj Jesús räjpni:

—Legión najc laä.

Si'c guniini sa'csi xhidalduxh najc rebendxab ni yu' neñ lastooni. <sup>31</sup> Dxejc gunabduxh'reni loj Jesús na'c guxhaꝫsacnireni cadro biriireni. <sup>32</sup> Lagajc dxejc suga' xhidajl cuch cayajwreni guixa' lagajc nejzga lo te bala'. Dxejc gunab rebendxabga loj Jesús te gusaanni jiu'reni neñ recuchga. Che cuäjz Jesús, <sup>33</sup> birii rebendxabga nen lastoo dade'ga, biugajc'reni neñ recuchga. Che biu'reni neñ recuch, baxuñ recuchga bitejbreni ro' te bala', dxejc biajbreni lo nis, ro'cti gujtreni.

<sup>34</sup> Baxuñ reni cayajp recuchga che bahuiireni xhini'c gujc ro'c, huisa'nreni diidx lo rebenguejdxga näjza lo reben rench. <sup>35</sup> Dxejc biädhuii rebejn xhini'c gujc ro'c. Che bidzujñreni cadro suga' Jesús, bahuiireni loj bejn ni birii beñdxab lastooni. Sobga'ni cuä' ni' Jesús, najcwni xhajbni, luxh xhetru rajcdi yejçni; dxejc bidxebduxh rebejnga. <sup>36</sup> Sas reni bahuiioj xho gujçni, bijreni diidx xho basiajç Jesús bejn ni guyu' rebendxabre lastooni. <sup>37</sup> Dxejc guiraa reben Gadara näjza reguejdx ni tre' nejzga, gunabreni jiunejz Jesús ro'c sa'csi cadxebduxh'reni. Ni'cni biu' Jesús neñ barcw te gubisacni nejz cadro siäädni. <sup>38</sup> Dade' ni birii rebendxab lastooni gunabni lo Jesús gusaanni chanajlnini, niluxh Jesús gunibee jia'nni, räjpni lojni:

<sup>39</sup> —Gubi' rolijzlu te güilu diidx recosro ni bejn Dios xcuent luj.

Dxejc sääni, batie'çhni diidx guideb lo guejdxga xhi bennäj Jesúsni.

*Xindxa'p Jairo näjza te gunaa ni gudajñ xhajb Jesús*  
(Mt. 9:18-26; Mr. 5:21-43)

<sup>40</sup> Che gubi' Jesús stelaad nis, bibalajz rebejn gubi'ni, sa'csi cabäjpacreni guibisacni. <sup>41</sup> Dxejc bidzujn te bejn ni laa Jairo, ni rnibee te guidobäz, bazuxhijbni nez loj Jesús, gunabni chanänini rolizjni <sup>42</sup> sa'csi yu' tejtis xindxa'pni. Yu'ni tzubutio'p ijz, luxh cayacxhuuni, ameerli guetni. Lalsi sää Jesús rolizjni, birinajl xhidalduxh bejn, catäälireneni.

<sup>43</sup> Loj rebejnğa nadxaag te gunaa ni agujc tzubio'p ijz cayacxhuuni, cayajcni yälguidxbäii. Xlia'si abanijtni guiraa xhixtenni cua' renani rujn remeed. <sup>44</sup> Gubig gunaaga dejt Jesús te gudajnni ro' xhajbni. Lagajc dxejc biacgajcni.

<sup>45</sup> Dxejcti gunabdiidx Jesús räjpni:

—¿Chuni'c najc ni gudajn narä, ä?

Guiraa rebejn räjp:

—Dinu gan.

Räjpza Pedr:

—Mastr, ni yu'lu galäii reben xhidajl, luxh cagutäälireni luj. ¿Xhicuent rniabdiidxlu: “¿Chu gudajn narä?”

<sup>46</sup> Räjppac Jesús lojni:

—Yu' chu gudajn narä, sa'csi gucbeä yu' chu basiajc xcälrnibeä.

<sup>47</sup> Che gucbee gunaaga anajn Jesús gudajnni xhajbni, bidxejbni, racsejslini gubigni loj Jesús, bazuxhijbni lojni. nez loj guiraa rebejn räjpni xhicuent gudajnni xhajbni näjza xho biacgajcni.

<sup>48</sup> Dxejc räjp Jesús lojni:

—Huij. Gulecdxilajzlu, xinda'pä. Abiajclu sa'csi huililajzlu.

<sup>49</sup> Lalni canii Jesús si'c bidzujn te bejn ni siääd roliz Jairo, ni rnibee te guidobäz. Räjpni loj Jairo:

—Agujt xindxa'plu. Na'cru gutajllu xtzuum Dad Mastr.

<sup>50</sup> Che biejn diajg Jesús rediidxga, räjpni loj Jairo:

—Na'c guidxejblu. Huililajztis te jiac xindxa'plu.

<sup>51</sup> Che bidzujnreni rolizjni, xtebtis Pedr, Jacobo, Juan näjza xczuzajn dxape'ga biunäjni nen yu'ga. Peta rebejn ni siädnajni bia'nreni rolä'. <sup>52</sup> Cayonduxh guiraa rebejn ni sobga' nen yu'. Dxejc Jesús räjp lojreni:

—Na'c roontu, gajd dxape're guet, nagayejstisni.

<sup>53</sup> Alga baxhiznäjreneni, sa'csi anajnreni agujt dxape'ga. <sup>54</sup> Dxejcti gunaaz Jesús naa dxape'ga, dip guniini, räjpni lojni:

—¡Dxape', huistie!

<sup>55</sup> Dxejc gubansac dxape'ga, huistiegajcni. Dxejc gunibee Jesús gudeedreni xhi gauni.

<sup>56</sup> Bidxeloduxh rexuzajnni. Per gunibee Jesús na'c güireni diidx xhini'c gujc ro'c.

## 9

*Ruxhal Jesús guitzubitio'p rexejnpacni*  
(Mt. 10:5-15; Mr. 6:7-13)

<sup>1</sup> Batie' Jesús guitzubitio'p rexejnpacni te badeedni yälrnibee lojreni te cuääreni re-bendxab lastoo rebejn, näjza te gusiajcreni rebenracxhuu. <sup>2</sup> Baxhalnireneni te gusule'reni diidx xcuent xcälrnibee Dios näjza te gusiajcreni rebenracxhuu. <sup>3</sup> Dxejc räjpni lojreni:

—Xhet chanäditu lo nejz, nicla baston, nicla bols, nicla yätxtiil, nicla meel; na'cza chanätu tio'p xhajbtu; tejtisni chanätu. <sup>4</sup> Chutis rolizj bejn cadre guidzujntu, ro'c coljia'n cheni guiriilitu lo guejdxga. <sup>5</sup> Palga direni gusaan jiu'tu rolizjreni, che jiunejztu lo guejdxga, colcuijb guxhuj ni'tu si'c te seen direni nililajz xtiidxtu.

<sup>6</sup> Dxejc biriireni sääreni garen-garen reguejdx, cagusule'reni xtidx Dios, cagusiajczareni rebenracxhuu cadrotis rdzujnreni.

*Xho gujt Juan ni rutiobnis*

(Mt. 14:1-12; Mr. 6:14-29)

<sup>7</sup> Che biejn diajg Herodes ni rnibee guiraa ni cayujn Jesús, guyu'ni yärsia', dini gan xho gunni xhigab, sa'csi yu' reni canii laa Juan ni agubansac lo rebengut. <sup>8</sup> Sgaiireni canii abaluiloj Elías. Yu'zareneni canii pet laa stee niguii ni gunii xtidx Dios galoo ni agubansac.

<sup>9</sup> Per räjp Herodes:

—Lagajc narä gunibeä biru' yejc Juan ni rutiobnis, ¿chuchani'c najc niguiire ni riejn diagä xhidajl didxro xcuentni?

Dxejc rlanjpac Herodes fii lojni.

*Bayaan Jesús gaii mil bejn*

(Mt. 14:13-21; Mr. 6:30-44; Jn. 6:1-14)

<sup>10</sup> Che gubi' rexejnpacni, bijreneni diidx loj Jesús xhini'c bejnreneni. Sas huinä Jesúsreneni te lajt cadre ruti bejn, gajxh te guejdx ni laa Betsaida. <sup>11</sup> Che gucbee rebejn caro sääreni,



huinajlrenini bidxälrenini. Che siäädreni lojni huichaglojnireni, sas gusloj cagusule'ni lojreni xcuent xcälrmibee Dios. Basiajczani rebejn ni cayacxhuu.

<sup>12</sup> Che gusloj cayäaz gubijdx, gubig rexpejnpacni loj Jesús, räjpreni lojni:

—Gojs loj rebejnre, agojl jiireni te chatiilreni xhi gaureni, näjza cadro tedreni guxhijn lo rerench, neñ reguedxbäz, sa'csi ree xhet yu'di.

<sup>13</sup> Dxejcti räjp Jesús loj rexpejnpacni:

—¡La'tu colgudeed xhi gaureni!

Dxejc räjpreni lojni:

—Xhet rajpdinu, gaiitis yätxtiil näjza tio'p bäjl. Ni'ctis yu' palga dinu chasiiru xhi gau rebeñ xhidajlre.

<sup>14</sup> Luxh najc rebejnğa si'cti gaii mil niguii. Dxejc räjp Jesús loj rexpejnpacni:

—Colyejtz lojreni cuereni xcua-xcuaareni, si'cti tiuubituzagajreni te cuaa.

<sup>15</sup> Si'c bejnrenini, sas gurej guiraa rebejnğa si'c. <sup>16</sup> Dxejc cua' Jesús gaii yätxtiilğa näjza tio'p bäjlğa, guläsni lojni xhaguibaa, badeedni xquixtios lo Dios xcuent yälrajwga. Che gulujx badeedni xquixtios gula'ni reyätxtiilğa näjza rebäjlğa, dxejc sanuutis badeednini loj rexpejnpacni te gudisrenini loj rebejnğa. <sup>17</sup> Guiraa rebeñ xhidaalğa gudajw, gudxaj xque'reni. Dxejcti batojpreni ni bia'n bachajreni tzubitio'p dxijm yätxtilbiujy näjza bälbiujy ni bia'n.

*Gunii Pedr Jesús najc Crist*

*(Mt. 16:13-19; Mr. 8:27-29)*

<sup>18</sup> Te dxej lälni cabedx-canab Jesús lo Dios, xtebni näjza rexpejnpacni, gunabdiidxni lojreni, räjpni:

—¿Chuni'c rnii rebejn nacä?

<sup>19</sup> Dxejc räjpreni lojni:

—Yu'reni rnii najclu Juan ni rutiobnis; yu'zareni rnii najclu Elías; sgaiireni rnii najclu stee niguii ni gunii xtidx Dios galoo ni agubañsac.

<sup>20</sup> Dxejc gunabdiidxni lojreni, räjpni:

—¿La'tu a? ¿Chuni'c rniitu nacä?

Dxejc räjp Pedr lojni:

—Luj najclu Crist Xi'n Dios ni cabääznu.

*Jesús rnixгаа xho guetni*

*(Mt. 16:20-28; Mr. 8:30-9:1)*

<sup>21</sup> Dxejc gunibee Jesús lojreni, räjpni:

—Na'c gäbtu si'c lo rebejn.

<sup>22</sup> Räjpszani lojreni:

—Nanab ted Xi'n Niguii trabajwduxh; rebengool xten guidoo, näjza rebixhojz, näjza rebejn ni ruluii xleii Moisés sibälazreni narä, naareni dina gacä Crist ni cabääznu. Sugu'treni narä Xi'n Dios ni gujc Niguii, niluxh sibañsacä ni riojn dxej.

<sup>23</sup> Dxejc räjpni loj guiraareni:

—Palga chu tejtu rlaiz guirinañ narä, nanab jiällajzni xhixtenni, te guixe-guixee guntisni nani gudedä gunni. <sup>24</sup> Sa'csi nani rlaiz guiniazdzu'tzni xcälñabajjni, sunijtni yälñabajn lo Dios; luxh nani runijt xcälñabajjni xcuent xtidxä, sica'ni yälñabajn par tejpas. <sup>25</sup> Sa'csi ¿xhi gaan gun te bejn palga xca'ni guideb guedxliuj, luxh gunijtni xcälñabajni lo Dios? <sup>26</sup> Niluxh nani guituinäj narä näjza xtidxä, sigajcza narä, Xi'n Dios ni gujc Niguii, situinääzani cheni jiälä si'c reii guideb yälrdimbicha' xten Xtadä näjza rexanglni. <sup>27</sup> Guliiipac rniä lojtu, yu' gaii reni suga' ree, ni di guet, suhuixgaareni xcälrmibee Dios.

*Bachaa xho rluiloj Jesús*

*(Mt. 17:1-8; Mr. 9:2-8)*

<sup>28</sup> Gudejdti xhujn dxej gunii Jesús diidxre, dxejcru huinä Jesús Pedr näjza Jacobo näjza Juan, huijreni jiaa yejc te dajn te guredx-gunabni loj Dios. <sup>29</sup> Lälni cabedx-canab Jesús lo Dios, bidxaa xho rului lojni; dxejc xhajbni gujc nolbäj, rdimbicha'lini. <sup>30</sup> Biricajza tio'p dade' caninäjrenini. Redade'ga najc toMoisés näjza Elías. <sup>31</sup> Rdimbicha'za redade'ga. Caninäjreni Jesús xcuent xho guetni guedx Jerusalén. <sup>32</sup> Luxh Pedr näjza resa'ni guyuduxh bacal lojreni; che bire'ch bacal lojreni bahuiireni lo yälrdimbicha' xten Jesús näjza loj guiro'p redade' ni caninäjni. <sup>33</sup> Cheni agojl jiunejz redade'ga loj Jesús, räjp Pedr loj Jesús:

—Dad, Mastr, huenduxh suga'nu ree. Basaan jiencheenu choñ yue', tejni par luj, tejni par Moisés, steeni par Elías.

Luxh di Pedr gaan xhini'c caniini. <sup>34</sup> Lälni caniini si'c, bire' te za gusloj cayäjt yejcreni, dxejc bidxejbreni che biu'reni neñ zaga. <sup>35</sup> Dxejcti biejn diajgreni neñ zaga te xse' te ni gunii, räjpni:

—Dee najc Xi'nä ni sanälazä, colcuadiajg xtiidxni.

<sup>36</sup> Che gulujx guniini rediidxga, bahuiireni sugaxteb Jesús. Dxejc niäutis ro'reni neñ redxejga, rut lojdi bijireni diidx xcuent ni bahuiireni ro'c.

*Basiajc Jesús te biuux ni guyu' bendxab lastooni*  
(Mt. 17:14-21; Mr. 9:14-29)

<sup>37</sup> Barayääl cheni biäjtreni yejc dajnga, xhidalduxh bejn cabäjz Jesús. <sup>38</sup> Dxejcti te dade' ni nadxaag rebejnğa guredxa'ni, räjpni loj Jesús:

—Mastr, balaslajz narä, gudahuüi xi'nä, sa'csi xtebtisni najcni xinganä. <sup>39</sup> Luxh bendxab rniaazni, sas ruscuexda'nini, rajcni si'c yälguidxbej, rbääni bitzun ro'ni, rusacsiduxhnini, luxh dini gusaanni. <sup>40</sup> Agunabä loj rexpejn paclu nibääreni bendxabga, luxh di niajcdini.

<sup>41</sup> Dxejc badzu' Jesús diidxre, räjpni:

—Bejn ni di chalilajz, benguijdx! ¿Gucli chunäätu, gucli gunä huant la'tu? ¡Gudanä xi'nlu ree!

<sup>42</sup> Dxejc che cabig biuuxga lojni, basälta' bendxabga biuuxga lo yuj, sas gusloj cayajcni si'c yälguidxbeduxh. Dxejc gudidxa' Jesús loj bendxabga, basiacgajcni biuuxga, dxejc badeednini lo xtadni. <sup>43</sup> Guiraa rebejn bidxeloduxh yälrnibeduxh xten Dios.

*Rnii Jesús stehuält xho guetni*  
(Mt. 17:22-23; Mr. 9:30-32)

Lalni cadxeloj rebejn lo recos ni bejn Jesús, räjpni loj rexpejn pacni:

<sup>44</sup> —Colcuadiajgsa'c rediidxre, na'cza jällajztureni, sa'csi sutedreni narä Xi'n Dios ni gujc Niguüi ladznaa rebejn.

<sup>45</sup> Niluxh di rexpejn pacni niacbee xhi säloj rextiidxni, sa'csi Dios bacua'tznini lojreni te di niacbeerenini. Bidxejbzareni niniabdiidxreni loj Jesús xhi säloj rediidxga.

*Chuni'c sajcru*  
(Mt. 18:1-5; Mr. 9:33-37)

<sup>46</sup> Guslojza rexpejn Jesús canabdiidx lo sa'reni:

—¿Chuchani'c sajcru loonu?

<sup>47</sup> Per gucbee Jesús xhi xhigab cayujnreni. Dxejc cua'ni te biuxbäz, bazujnini cuä'ni, <sup>48</sup> räjpni lojreni:

—Chutis ni xca' te biuxe' sa'csi sanälajzni narä, naräni rca'ni luxh ni rca' narä, rca'ni xtadä ni baxhal narä. Ni najc maazru nadolajz lojtu, ni'c najc ni sajcru.

*Nani di guiniyaj nuurnu, xladnu yu'ni*  
(Mr. 9:38-40)

<sup>49</sup> Dxejc räjp Juan loj Jesús:

—Mastr, bihuiinu loj te bejn ni rbää rexpendxab neñ lastoo bejn con xcälrnibee lajlu. Dxejc rie'tznu lojni na'cru gunni si'c, sa'csi dini sanäj nuurnu.

<sup>50</sup> Dxejc räjp Jesús lojreni:

—Na'c gudxojtuni, sa'csi nani di guiniyaj nuurnu, xlaadnu yu'ni.

*Jesús gudidxa' loj Jacoob näjza Juan*

<sup>51</sup> Che siäddzujn redxej ni chää Jesús xhaguibaa, bejnini xhigab chää pacni guedx Jerusalén. <sup>52</sup> Baxhalni gaii bejn gunijd lojni chääreni te guejdx xten Samaria te satiilreni cadro jia'nreni ro'c. <sup>53</sup> Luxh rebejn samaritan di rlajzreni gudedlaareni te lajt cadro jia'nreni, sa'csi najnreni chääreni guedx Jerusalén. <sup>54</sup> Che biejn diajg Jacoob näj Juan, tio'p xpejn pacni, si'c, sas räjpreni loj Jesús:

—Dad, ¿La rlajzlu guinibeenu jäjät guiboo xhaguibaali te guze'cni guiraa rebeñguejdxga si'cni bejn Elías?

<sup>55</sup> Dxejc bahuii Jesús lojreni, gudidxa'ni lojreni, räjpni:

—Ditu gaan chuni'c rnibee lastootu. <sup>56</sup> Sa'csi narä Xi'n Dios ni gujc Niguüi dina niälä te gudzucää xcäl nabajn rebejn. Narä biälä te guslääreni lo dojl.

Dxejcti huijreni garenca guejdx.

*Reni rlajz nirinajl Jesús*  
(Mt. 8:19-22)

<sup>57</sup> Lalni sääreni lo nezyuj, biäd te bejn gunii loj Jesús, räjpni:

—Dad, narä rlazä jäädnalä guejblu cadrotis chää guejblu.

<sup>58</sup> Dxejc badzu' Jesús diidxre lojni, räjpni:

—Rebäjz rajp xpiliääreni, remane' ni rutajt rajp xpitääzreni, niluxh narä Xi'n Dios ni gujc Niguüi, dina gapä nicla te lajt cadro guscugä yecä.

<sup>59</sup> Dxejcti räjp Jesús lo stee bejn:

—Gudanajl narä.

Luxh laani räjpni:

—Dad, basaan suchacua'tzxaagä xtaä, dxejcru jäädnaä guejblu.

<sup>60</sup> Dxejc räjp Jesús lojni:

—Basaan suchacua'tz rebejn ni najc si'c bengut, resabengutreni. Per luj, huij, huisule' diidx xcuent xcälrnibee Dios.

<sup>61</sup> Dxejc räjp steeni lojni:

—Dad, rlažä jäädnaälä, niluxh basanxgaa chasadixä resa'a ni tre' rolizä.

<sup>62</sup> Dxejc räjp Jesús lojni:

—Nani ruzuj naani yejc garaad, dxejc ruzuré lojni ruhuiini nez dejtzni di gacdi gunni dzuun lo xcälrnibee Dios.

## 10

*Ruxhal Jesús regayonbitzuu*

<sup>1</sup> Che gulujx reni'c, gule Jesús gayonbitzuu bejn, baxhalnireni tio'pgajreni te basnijdnireni lojni loj reguejdx cadro nanab tedni. <sup>2</sup> Räjpni lojreni:

—Guliipacni, cayacduxh cose'ch, niluxh guxii najc rebejn ni gun dzuun gutie'nini. Ni'cni colguiniab lo baxhuaan xten cose'ch te guxhalni xhidajlru bejn ni gun dzuun gutie'xcose'chni. <sup>3</sup> Colchäj la'tu, colhuui xho ruxhalä la'tu si'c xiil galäii recuyo't sa'csi sunnäjreni la'tu si'ctisni rlažreni. <sup>4</sup> Na'c chanätu ngodx, niclaza guijxh, niclaza xcura'chtu, luxh na'c sudxitu guininäitu bejn lo nejz. <sup>5</sup> Cheni jiu'tu roliž te bejn, ganiddoo colye'tz: "Sucuedxilajz reni rbäjz ree." <sup>6</sup> Palga najcni te bejn ni rdxaglaž yälrbecdxilajz sia'n xcälrbecdxilajz ro'c, luxh palga dini gac, sibi' xcälrbecdxilajz lojtu. <sup>7</sup> Coljia'n lagajc roliž bejn cadro guidzujntu. Ro'c coltajw, colyä'za xhitis ni guniidxreni, sa'csi nani rujn dzuun, riälj xca'ni xcuent dzuunga. Coljia'n tejtis lajt dxejtis ni chutu lo guejdxga. <sup>8</sup> Xhitis te guejdx ni jiu'tu, palga jiu'reni la'tu, colgajw xhitis ni guniidxreni lojtu. <sup>9</sup> Colgusiajx rebenracxhuu ni yu' ro'c, colye'tz lojreni: "Abidzujngajxh xcälrnibee Dios." <sup>10</sup> Palga jiu'tu te guejdx cadro di rlažreni gucudajgreni xtiidxtu, colrii lo nezyuj, ro'c colye'tz lojreni: <sup>11</sup> "Guxhuj xten lajdxtu ni rcaj ni'nu, rudzu'nuni nez lojtu si'c te seen sa'csi ditu nililajz xtiidxnu. Colgabee dee, abidzujngajxh xcälrnibee Dios lojtu." <sup>12</sup> Ni'cni nriliäpac lojtu, che gac fis xten Dios, nalasru gac fis xten Dios lo guejdxga loj ni gujc guejdx Sodoma ni guyu' galoo.

*Reguejdx ni di niu xtidx Jesucrist*

(Mt. 11:20-24)

<sup>13</sup> Räjpszani:

—iProbe'tu bejn guedx Corazín! iProbe'zatu bejn guedx Betsaida! Paru nuhuii rebenzijt ni gubajñ guedx Tiro näža Sidón remilaagwr ni benä nez lojtu, pet gucli nusiechlažreni, niajcwreni ladnagas, nibežazreni lo cobdäj si'c te seen abasiechlažreni. <sup>14</sup> Che gun Dios fis rextolj rebejn guedxliuj, guxiiru gac xfis Dios lo rebenzijt ni gubajñ guedx Tiro näža Sidón. Fisroru gun Dios reguedx Corazín näža Betsaida. <sup>15</sup> Luxh luj guedx Capernaum, rchalolu siajšlu xhaguibaa, alga siajblu gabijlli, cadro gaclu fisro xten Dios.

<sup>16</sup> Räjpszani lo rexpejn pacni:

—Ni riu xtiidxtu, laa xtidxä ni riuni. Nani di jiu xtiidxtu, laa xtidxä ni dini jiu. Luxh ni di jiu xtidxä, laa xtiidx ni baxhal narä ni dini jiu.

*Rbi' regayonbitzuu*

<sup>17</sup> Che gubi' regayonbitzuu bejn nani baxhal Jesús, rbaduxh lažreni, räjpreni:

—Dad, näža rebenäx rusobdiajg xtiidxnu che rusä'tnu lajlu.

<sup>18</sup> Räjp Jesús lojreni:

—O'n. Ni'cni narä bahuiä che gunijt xcälrnibee benäx, bitejbni xhaguibaa si'c bianij xten guzii. <sup>19</sup> Colgabee. Narä runidxä yälrnibee lojtu te guläitu yejc bäl näža yejc naxejb; runidxäza yälrnibee te guntu gaan lo xcälrnibee benäx. Xhetliidi gun daan la'tu. <sup>20</sup> Na'c guibalajztistu sa'csi rusobdiajg rebenäx xtiidxtu; colguibalajzru sa'csi acuaj lajtu lo xquijtz Dios xhaguibaa.

*Bibalajz Jesús*

(Mt. 11:25-27; 13:16-17)

<sup>21</sup> Lagajc dxejc bibalaznäž Jesús Sprit Dxan xten Dios, dxejc räjpni lo Dios:

—Rliä'pä xpala'nlu Xtaä ni rnibee xhaguibaa näža guedxliuj, sa'csi bacua'tzlu xnezyujlu lo reben nanduxh, per baluuiulu xnezyujlu loj rebejn ni najc nadolajz si'c te biuxbäz. O'n, Xtaä, sa'csi si'c rlažzlu gunlu.

<sup>22</sup> Guiraa recosre abaniidxlu loä Xtaä. Dadtis najñ chuni'c najc Xi'nni, rutru najñdi chu najcni. Rutza najñdi chuni'c najc Guejblu Xtaä, xtebtis narä ni najc Xi'nlu, con rebejn ni rlažä gumbee luj.

<sup>23</sup> Dxejc bahuii Jesús loj rexpejn pacni, räjpni lojtisreni:

—Chichaa la'tu näjza renani ruhuii guiraa nani cahui lojtu. <sup>24</sup> Sa'csi rniliä lojtu, balti redade' ni gunii xtidx Dios galoo, baltiza regeii rlanj nuhuiireni guiraa ni cahui lojtu, niluxh direni nuhuiini. Rlanjreni niejn diajgreni rediidxre ni cayejn diajgtu, luxh di diajgreni niejnni.

*Xcuent te beñhuen ni siääd Samaria*

<sup>25</sup> Dxejc huisulii te mastr xten leii, huininäjni Jesús, rlanjni nuxhiidni Jesús lo xtiidxni, gunabdiidxni lojni:

—Dad, Mastr, ¿xhini'c nanab gunä te guibanää Dios par tejpas?

<sup>26</sup> Sas räjp Jesús lojni:

—¿Xhini'c caj lo guijtz xten leii? ¿Xho rolluni?

<sup>27</sup> Dxejc badzu'ni diidxre, räjpni:

—Chanälajzlu Dad, Xtioslu guideb lastoolu, guideb xaimlu, guideb xtijplu, näjza guideb xcäriejnlu. Huinälajzza resa'lu si'ctis ni sanälajzlu lagajc luj.

<sup>28</sup> Dxejc räjp Jesús lojni:

—O'n, laaca rudzu'lu diidx. Palga gunlu si'c, sajplu yäl nabajnre.

<sup>29</sup> Per mastr xten leii, rlanjni nidedbiani ni'cni gunabdiidxni loj Jesús räjpni:

—¿Chuni'c najc resa'ä?

<sup>30</sup> Dxejc räjp Jesús lojni:

—Te beñ laadxnu birii guedx Jerusalén, sääni guedx Jericó. Dxejc lo nezyuj biricaj gaii gubaan, gulajjnreni guiraa xhixtenni, näjli xhajbni ni najcwni. Sas gudijnrenini, basa'nrenini ro'c, guxii cayäädx nugu'trenini. <sup>31</sup> Gudejd te bixhojz ni siääd laadxnu, sazaj lagajc nezyuga, cheni bahuiini lojni, alga gudejdni stee laad, sä'tini. <sup>32</sup> Gudejz te levita, bejn ni rujnza dzuun neñ guidoo. Che bidzujjnni cadro naga' bejnga, gudejdni stelaad, sä'tini. <sup>33</sup> Dxejcti te beñ Samaria, lalni sääni bial, gudejdni nezyuga, bidzujjnni cadro naga' bejnga. Che bahuiini lojni, balaslajznini. <sup>34</sup> Gubigni loj bejnga, basäl'ni se't näjza bin loj bejn ni nadxälguijdx, dxejc batejbnini te la' lajd. Dxejc bascuibjnini dejt lagajc xmanni, huinänini cadro rudedlaareni yu', ro'c cuanäjnini. <sup>35</sup> Che bara yääl, gulääni tio'p meel badeedni lo baxhuaan yu'ga. Dxejc räjpni: “Cuanälaa bejnre; palga gunijtrulu, siguixätini lojlu che guibi'ä.”

Sä'tini.

<sup>36</sup> Dxejc räjp Jesús lo mastr xten leii:

—¿Chu tej lo guidxon rebejnnga najc si'c sa' xten dade' ni bialjb ladznäa gubaan?

<sup>37</sup> Dxejc räjpni loj Jesús:

—Ni balaslajz bejnnga.

Dxejc räjp Jesús lojni:

—Huij te sigajcza chayejnlu.

*Bidzujn Jesús rolizj Mart näjza Marii*

<sup>38</sup> Lalni huinuu xnezyujni, bidzujjnni te guejdx. Ro'c bidxaagni te gunaa ni laa Mart ni huinänini rolizj. <sup>39</sup> Yu' te bälj Mart ni laa Marii, luxh laani gurejni cuä' ni' Jesús te cacuadiajgni xtiidxni. <sup>40</sup> Mart cagusquejnni cayujjnni xhi gaureni. Sas gubigni loj Jesús, räjpni lojni:

—¿La dilu jiu rusanxteb bälä narä te xtebä cayunä remandaad? ¿Gojs lojni gacnäjni narä!

<sup>41</sup> Dxejc räjp Jesús lojni:

—Mart, Mart, cayuduxhlu yärsia', riulu xhidajl cos, <sup>42</sup> luxh yu' tejtis ni nanabpac. Agule Marii ni najc huenru, rut sajcdi gudzucajjnini lojni.

## 11

*Rului Jesús xho guiniabni lo Dios*

(Mt. 6:9-15; 7:7-11)

<sup>1</sup> Te huält cabedx-canab Jesús loj Xtdani Dios, suga'ni te lajt. Che gulujx cabedx-canabni, gunii te xpejn pacni lojni, räjpni:

—Dad, baluii nurnu xho cuedx-guiniabnu lo Dios, si'c baluii Juan ni batiobnis rexpejn pacni.

<sup>2</sup> Dxejc räjp Jesús lojreni:

—Che cuedx-guiniabtu lo Dios, scree colnii:

Xtadnu ni yu' xhaguibaa, suchä'p xpala'nlu, sujiääd xcäl'rnibeelu.

Sugac si'ctisni rlanjzlu gac lo guedxliuj si'cpac rajcni xhaguibaa.

<sup>3</sup> Guira dxej baniidx xcu'nnu si'ctis ni rquiinnuni.

<sup>4</sup> Basiäj laljzlu redojl xtennu si'cni riäj laljznu redojl ni rujn rebejn loonu.

Na'c gusaanlu jiajbnu lo xcäl'rnibee bendxab.

Baslaa nuurnu lo dojl.

<sup>5</sup> Dxejc räjpza Jesüs lojreni:

—Paru teju tu' te xamiüwni, luxh guidzujñni rolijzni garol yääl, gäbni: “Xamigwä, banidxlaa choñ yätxtiil, <sup>6</sup> sa'csi bidzujñ te xamigwä rolizä ni bazaj biaj, luxh xhet ra'pädi te gudedä xhi gauni.” <sup>7</sup> Xhixh sinii ni naga' neñ xyu'ni, gäbni: “Na'c riädtie'chlu bacal loä. Niäu rolä' luxh rexi'nä naga' cuä'ä, digacdi chästieä te gunidxä xhi gunidxä lojlu.” <sup>8</sup> Rniliä lojtu, mase dini chastie te gudeednini sa'csi najcni xamiüwni, sistieni, sudeedni nani rquintisni te na'cru gutie'chni bacalni. <sup>9</sup> Sigajcza rniä lojtu, palga guiniabtu xhi guiniabtu, sica'tuni. Palga chatiiltu xhi chatiiltu, sidxältuni. Palga chasejztu rolä', suxhalreni rolä' lojtu. <sup>10</sup> Sa'csi chutis ni rniab, rca'ni nani rniabni; chutis ni rguuil xhi cos, rdxälñini; nani rusejz rolä', suxhalzaren lojni.

<sup>11</sup> 'Paru teju tu ni najc dad, jiaäd te xi'ntu guiniabni te yätxtiil lojtu, çla sudeedtu te gui, ä? O palga guiniabni te bälj, çla sudeedtu te bälj, ä? <sup>12</sup> O palga guiniabni te tzutbejt, çla sudeedtu te naxejb, ä? <sup>13</sup> Palga la'tu, ni najc bendojl, rajc rudeedtu cossa'c loj rexi'ntu, aticaxh Dios ni yu' xhaguibaa sudeedni Sprit Dxan xtenni loj renani rniabni lojni.

*Rucuaquijreni Jesüs, rnüreni räjpni yäl'rnibee xten bendxab*

(Mt. 12:22-30; Mr. 3:19-27)

<sup>14</sup> Gulää Jesüs te bendxabgop lastoo te bejn. Che birii bendxabga lastoo bejnga, guslogajc canii bejnga, dxejc bidxeloduxh reben xhidaalga. <sup>15</sup> Dxejc yu' reni räjp:

—Niguiire rbää rebendxab con yäl'rnibee xten Beelzebú ni rnibee loj rebendxab.

<sup>16</sup> Sgaiireni rlaž ququii'renini, ni'c canabreni gunni te seen ni siääd xhaguibaali. <sup>17</sup> Niluxh laani gucbeeni xhi xhigab cayujñreni dxejc räjpni lojreni:

—Xhitis gubieer ni rliä' sa'ni lo sa'ni, luxh tilñäj te cuaani stee cuaaga, di gaçlaa sinijt gubierga lo guedxliuj. Palga te famil' rdilñäj lagajc sa'ni, di gaçlaa sinitloj familga. <sup>18</sup> Palga guiliä' sa' rebendxab, çxho mood chanuu xcäl'rnibee'reni? Dee rniä sa'csi la'tu rniitu narä rbää rebendxab con lagajc yäl'rnibee xten Beelzebú. <sup>19</sup> Palga si'c najcni, çchuni'c rudeed yäl'rnibee loj rexpejtu te rbää'reni bendxab? Lagajc laareni ruluii xhet laadi rujntu xhigab. <sup>20</sup> Palga narä rbää rebendxab con xcäl'rnibee Dios, ni'cni rululoj abidzujñ xcäl'rnibee Dios lojtu.

<sup>21</sup> 'Cheni suga' te bendaan, ca'ni guib, canäjni rolijzni, rutliidi ruhualdi rexhixtenni. <sup>22</sup> Niluxh che jiaäd stee ni nadipru lo bendaanga, rudxagdiññini, rujñni gaanni, dxejc rudzucajni xquii'bni ni badeed yäl'bendaan lojni, dxejc sajc chanäni guiraa rexhixtenni. <sup>23</sup> Reni xhet yu'di xladä, rdxe'chreni loä. Ni di gutopñäj narä, rutie'chni.

<sup>24</sup> Räjpzani:

—Cheni rii te bendxab neñ lastoo te bejn, ricansajni nez lo reyubijdz, caguuilni cadro gusilajzni. Che cad rdxäldini, rujñni xhigab, naani: “Guibisacä rolizä cadro biria.” <sup>25</sup> Cheni gubi'ni, rdxälni lastoo bejnga si'c te yu' ni entis gulujx bilioobni, suchesa'cni. <sup>26</sup> Dxejcti rixiini sgajdz bendxab ni rujñru latsiaj lojni. Dxejc riu'reni neñ lastoo bejnga, dxejc nalasru ria'n bejnga loj ni gujnci galoo.

*Chicbaa renani riu xtidx Dios*

<sup>27</sup> Laç ni canii Jesüs rediidxre, te nane' ni yu' lo reben xhidaalga dipli guniini, räjpni:

—çChicbaa nan ni biädñälu guedxliuj! Chicbaaza nani baslaa luç.

<sup>28</sup> Luxh laani räjpni:

—Xhet si'c di najcni; chicbaaru rebejn ni rucuaajg xtidx Dios, ni ruzoobza xtiidxni.

*Rebenguijdx rniab te milagwr si'c te seen*

(Mt. 12:38-42; Mr. 8:12)

<sup>29</sup> Sanuutis cadojpb rebejn gabi Jesüs, dxejc guslojni caniini, räjpni:

—Rebejn ni yu' naj benguidxduxh'reni, rniabzaren te milaagwr si'c te seen; niluxh xhetru seendi fiireni, seentis xten Jonás, dade' ni gunii xtidx Dios galoo fiireni. <sup>30</sup> Lagajc si'c ni gujc Jonás te seen loj rebejn guedx Nínive, si'cza narä, Xi'n Dios ni gujc Niguii, gacä te seen lo rebejn ni nabajñ naj. <sup>31</sup> Cheni guidzujñ dxej ni gac fis sistie te nane' ni gujc rein lo reyuj ni tre' ladbäjgw, sucuaquijni rebejn ni tre' guedxliuj naj sa'csi laani biriini zitduxh te bacuadajgpacni yäl'najñ xten Salomón. Ree suga' galäiitu tej ni sadcxhru lo Salomón, <sup>32</sup> luxh ditu chalilajz xtiidxni. Rebejn ni guläjz guedx Nínive sisiunäj rebejn ni nabajñ naj neñ redxej ni gac fis. Dxejc sucuaquijreni rebejn ni nabajñ naj sa'csi laareni, che huinälä Jonás xtidx Dios lojreni, basiechhajz'reni, basa'nreni xtojñreni. Ni suga' lojtu naj sajcruni lo Jonás, niluxh ditu jiu xtiidxni.

*Ni rusanij xcäriejn bejn*

(Mt. 5:15; 6:22-23)

<sup>33</sup> Räjpzani:

—Rut rucuaquijdi te bajl, te gusujnini te lat xhiga'tz, ni claza nen te caj. Susujni bajlga jiaa te rajc ruhuisa'c chutis ni riu' nen yu'. <sup>34</sup> Balojlu najc si'c bajl xten xcäriejnlu. Palga ruhuisa'c balojlu, guideb xcäriejnlu yu' si'c bianij. Palga rajc balojlu dilu fisa'c, guideb xcäriejnlu yu' si'c lo nacäy. <sup>35</sup> Gunatiro te di gac xpianijlu yäl'nacäy. <sup>36</sup> Palga guideb xcäriejnlu yu' bianijtis, xheti te lajt nacäy, sajc fisa'clu guira'ti, si'c najc che rusanij te bajl nen yu'.

*Rucuaquij Jesús refarisee näjza rebejn ni najn lei*

(Mt. 23:1-36; Mr. 12:38-40; Lc. 20:45-47)

<sup>37</sup> Che gulujx gunii Jesús, biädgajn te farisee Jesús chääni rolizjni te chatajwni. Sä'tireni. Che biu' Jesús, gurejni lo mex. <sup>38</sup> Bidxeloj fariseega sa'csi dini niguiib naani si'cpac caj lo xleii Moisés gunreni te gaureni, sa'csi rujnreni xhigab si'c racnayareni lo Dios. <sup>39</sup> Dxejcti räjp Jesús lojni:

—La'tu ni najc refarisee, rguibtu nez dejtz te bas näjza te pla't, niluxh la'tu guidxa lastootu yäl'gubaa näjza yällatsiaj, <sup>40</sup> ¡Ben nadduxh! ¿La ditu gacbee? Nani benchee dejtzni, bencheeza nenni. <sup>41</sup> Colyajc nadolajz, colyacnäy rebejn con ni rniitu, dxejc guiraa recos sajc naya par la'tu.

<sup>42</sup> ¡Probe'zatu, ben farisee! Rudeedtu lo Dios tej lo tejga tzuu ni rajptu: rudeedtu bedzxtiil näjza ruud, näj guiraa recuane' ni rajptu lo le', niluxh ditu jiu xcäl'guxhtis Dios näjza xcäl'rinälajz Dios. Dee nanab guntu ganid, luxh na'cza gusaantu guntu ni alacayujntu par Dios.

<sup>43</sup> ¡Proobza la'tu reben farisee! Rchagljaztu rbejtu lo reyagxhil xten rebejn ni sajc nen reguidobäz; rchagljaztu saru rnii rebejn "xchan Dad" lojtu che rijtu lo guii.

<sup>44</sup> ¡Probe'zatu! La'tu najctu si'c rebaa ni di guzen, rsiaj rebejn yejc cadro naga'reni luxh direni gan.

<sup>45</sup> Dxejcti badzu' tej rebejn ni ruluii lei diidxre lojni, räjpni:

—Dad mast; che rniilu rediidxre, rniyajlu nuurnu.

<sup>46</sup> Dxejc räjp Jesús lojreni:

—¡Probe'za la'tu rebejn ni ruluii lei! Sa'csi rnibeetu gun rebejn recos naganduxh ni najc si'c te cargw naduxh ni di gacdi guu bejn. Luxh la'tu di rlanjztu fałtuni nicla con te bicuenabäztu.

<sup>47</sup> ¡Proobzatu! Sa'csi runcheetu xpa'a redade' ni gunii xtidx Dios galoo, luxh najctu rexajc renani bagu't redade'ga. <sup>48</sup> Ni'cni najnpactu xhi gusajczeni, rchagljaztu redzuun ni bejn retoxtadgoldootu; si'cza gunnäjtu narä sa'csi laareni bagu'treni redade'ga, dxejc la'tu runcheetu xpaareni.

<sup>49</sup> Ni'cni gunii Dios, sa'csi yuduxh xcäl'najnni, räjpni: "Suxhalä reniguii ni guinii xtidxä näjza reapost, luxh sugu'treni gaiireni, susacsizareni sgaiireni." <sup>50</sup> Loj rebejn ni nabajn naj siniab Dios gudeedreni cuent xcuent xtiejn guiraa redade' ni gunii xtidx Dios ni bagu'treni cheni guc-cheeli guedxliuj. <sup>51</sup> Guislojni xtiejn toAbel, näjza xtiejnli Zacarias ni bagu'treni galäi nez lodxan nen guidoro. Ni'cni rniä lojtu, siniab Dios cuent xten xcäl'guyt guiraareni loj rebejn ni nabajn naj.

<sup>52</sup> ¡Probe'za la'tu, rebejn ni ruluii lei! Sa'csi rniitu la'tistu rajptu yäl'naj, luxh di rlanjztu chalilajztu xtidx Dios, dizatu gusaan chalilajz rebejn ni rlanjz chalilajz xtidx Dios.

<sup>53</sup> Cheni räjp Jesús rediidxre, bidxe'ch rebejn ni ruluii lei näjza refarisee lojni. Dxejc guslojreni canabdiidxreni xhidalduxh diidx, <sup>54</sup> te cagula'tzreni don la sajc guiga'ni lo xhitis te diidx ni guiniini.

## 12

*Jesús ruluii xcuent levaduur*

<sup>1</sup> Lał ni caniini, bidojp xhidajl mił bejn ro'c, calaro'li sa'reni. Dxejc gusloj canixgaa Jesús loj rexpejn pacni, räjpni lojreni:

—Colnati levaduur xten refarisee, rusgueerene rniitisreni xhidajl diidx luxh direni gunni.

<sup>2</sup> Sa'csi xheti xhi niäu lojni ni di guxal lojni luxh xheti xhi naga'tz ni di jienloj. <sup>3</sup> Ni'cni guiraa ni guniitu lo nacäy, siepni lo bianij xten dxej. Luxh ni gunii xhigatztu nen reyu' ni niäudz'u'tz, sibedxa'renini rediidxga yejcli reyu'.

*Chuni'c nanab guidxejbtu*

(Mt. 10:28-31)

<sup>4</sup> Räjpzani:

—Rniä lojtu, xamigwä, na'c guidxejbtu rebejn ni sajc ju't tiejxhtu, dxejc xhetru sajcdi gunreni. <sup>5</sup> Guiniä lojtu chuni'c nanab guidxejbtu. Colguidxejb nani che abadzucajni yäl'nabajn räjpni yäl'rnibee gusäni la'tu gabijl lo bajl ni cayejc par tejpas. Ni'csii colguidxejb.

<sup>6</sup> 'Anajntu sajc jio' gaii mane' tio'p melbäz, luxh di Dios jiällajz nicla tej remane'ga. <sup>7</sup> Rexquidxejctu abigab tebgajni. Na'c guidxejbtu; la'tu sajcrutu loj xhidajl remane'ga.

*Reni riembee Jesús nez loj rebejn**(Mt. 10:32-33; 12:32; 10:19-20)*<sup>8</sup> Räjpszani:

—Rniä lojtu, guiraa rebejn nani rcäjp rililajzni xtidxä nez loj rebejn, narä Xi'n Dios ni gujc Niguii sicäpä najcni xpenä nez loj rexangl Dios. <sup>9</sup> Luxh reni di guicäjp rililajzni xtidxä nez loj rebejn, sigajcza sunnääni nez loj rexangl Dios xhaguibaa.

<sup>10</sup> 'Chutis ni guiniu te didxnaj xcuentä, susiäjlajz Dios laani. Niluxh chutis ni guiniyaj Sprit Dxaan xten Dios, di Dios gusiäjlajz xtojlni.

<sup>11</sup> 'Cheni chanäreni la'tu nez loj rebejn guidobäz o nez loj reguxhtis, na'c guntu xhigab xhi gudzu'tu diidx o xhini'c guiniitu, <sup>12</sup> sa'csi che guidzujn or ni guiniitu, Sprit Dxaan xten Dios suluini xhini'c guiniitu.

*Reyäl'nasa'c rusajb bejn nen dojl*<sup>13</sup> Te niguii ni nadxaag rebejn xhidaalga räjpni loj Jesús:

—Dad, Mastr, gojs lo betzä guniidxni gala' xhixtenä ni basa'n toxtadnu loonu.

<sup>14</sup> Dxejc räjp Jesús lojni:

—Dade', çchuni'c gule narä gunä yälguxhtis o gacä abogaad lojlu, ä?

<sup>15</sup> Dxejc räjp sac Jesús lojreni:

—Colnatiro, colgantzu' te di rlaajtistu ga'ptu yäl'nasa'ctis sa'csi xcäl'nabajn bejn dini gac yälrajptis xhidajl xhi cos.

<sup>16</sup> Dxejcti bij Jesús te cuent, räjpni lojreni:

—Guyu' te bejn rapduxh. Racduxh cose'ch lo rexcäjlni. <sup>17</sup> Dxejcti gusloj bejn xhigab: “çXhocha gunä? Dina gapä cadro cucheä recose'ch.” <sup>18</sup> Sas bejn xhigab: “Ananä xhini'c gunä. Gudzulä reyu' cadro rgucheä recose'ch, te gustiobä reyu'ga, te ro'c cucheä guiraa recose'ch näjza rexhixtenä.” <sup>19</sup> Dxejcti siniä lo lastoä: “Lastoä, agulucheelu xhidajl xhi cos, sajlni xhidajl ijz. Basilajz naj, gudajw, gu', bibalajz.” <sup>20</sup> Dxejc räjp Dios lojni: “iBejn najd! Lagajc guxhijne siniabä xaimlu. çDxejca'? çChu xca' guiraa recos ni gulucheelu?” <sup>21</sup> Si'c sisiajç guiraa rebejn ni rguilitis xcäl'nasa'creni lo guedxliujre, niluxh xhet rajpdireni loj Dios.

*Rcanäj Dios rexi'nni**(Mt. 6:25-34)*<sup>22</sup> Che gojl stera't, räjp Jesús loj rexpejn pacni:

—Ni'cni rniä lojtu, na'c rujntu xhigab xcuent xho guibajntu o xhini'c gautu te guibajntu, niclaza xcuent lajd ni gacwto. <sup>23</sup> Yäl'nabajn sajcruni lo yälrajw; tiejxhni sajcruni lo lajd ni rajcw bejn. <sup>24</sup> çColhuui rebaloo! Direni cue'c binij, dizareni gutojp cose'ch, dizareni ga'p nicla yu' nicla te cadro chuchee cose'ch, per rudeed Dios xhi rajwreni. çLa xhet sajcdirutu loj rebalooga, ä? <sup>25</sup> Luxh çChu tejtü palga rundoxhni xhigab sajç tiobruni sgarol metr? <sup>26</sup> Palga di gacdi guntu nicla te cosbäz, çxhucuent ru'tu yärsia' xcuent xhi stee cos?

<sup>27</sup> çColhuui xho rga' reguino'ch! Direni gun dzuun, dizareni gun lajd lo dzuuj, luxh rniä lojtu, nicla reii Salomón con guiraa xcäl'nasa'cni, dini nisiuchee si'c rsiuchee reguiiga. <sup>28</sup> Palga rusuchee Dios recuaan ni rga' lo niaa, ni rial nadxej, luxh guixee-huijdx, che agubijdzni, rejcn lo däj, aticaxh Dios suniidx xhi gacw la'tu, ibejn nani guxii rililajz! <sup>29</sup> Ni'cni rniä na'c runtejtü xhigab xho quilltu xhini'c gautu, xhini'cza yätu, na'c chutistu yärsia'. <sup>30</sup> Si'ctis rujn rebeguedxliuj guideb xtijpreni rguilreni rexhicosre. Niluxh xtadtu ni yu' xhaguibaa anajnni xhini'c rquiintu. <sup>31</sup> La'tu colquilltis xcäl'rnibe Dios, dxejcti laani suniidxzani guiraa recos ni rquiintu.

*Yäl'nasa'c ni yu' xhaguibaa**(Mt. 6:19-21)*<sup>32</sup> Räjpszani:

—La'tu ni najc rexilä'ä, na'c guidxejbtu, sa'csi rbaali lajz Dios, aguleni la'tu te la'tu guntu yälguxhtis lo xcäl'rnibeeni. <sup>33</sup> Colguto' xhixtentu, colgudeedni loj rebejn ni caquinduxhni, te si'c guntu te bols ni di jiuujx, te chu yäl'nasa'c nenni xhaguibaa cadro di gubaan jiu' niclaza xcabäj rexhicos. <sup>34</sup> Sa'csi cadro rajptu xcäl'nasa'ctu, ro'cza yu' lastootu.

*Nanab susintu*<sup>35</sup> Räjpszani:

—çColsusin! çColhualguij rebajl! <sup>36</sup> Colyujn si'c remos ni cabäjz guibi' xlamreni ni säa te sa', te cheni guibi'ni guxhalgajcreni rolä'. <sup>37</sup> Chicbaa remos ni susin che guibi' xlamreni. Rniliäpac lojtu, lagajc xlamreni sajcwni xhajbni sibe'cni rexmosni lo mex, dxejc lagajc laani sudeedni xhi gauren. <sup>38</sup> Mase guidzujnni garol yääl, mase guidzujnni cäjyru, palga guidxälni arexmosni susin, çchicbaa remosga! <sup>39</sup> Colyacbeepac, paru gacbee baxhukaan xten yu' xhi or guidzujn gubaan rolizni, dini gusaan guxhalreni rolizni te cuanreni xhixtenu. <sup>40</sup> Näjza la'tu colsusin, sa'csi or ni ditu gun xhigab jäädni, sidzujn Xi'n Dios ni gujc Niguii.

*Te mos guijdx*  
(Mt. 24:45-51)

<sup>41</sup> Dxejc gunabdiidx Pedr lojni, räjpni:

—Dad, ¿la lootisnu rujylu cuentre o la najcni par guiraa rebejn?

<sup>42</sup> Dxejc räjp Jesús lojreni:

—¿Chuni'c najc mos hueen, mos nasin, ni rusanäj xlamni guiraa rexmosni te gudeedni xhi gaureni che gal oor, ä? <sup>43</sup> Chicbaa mosga palga laaca cayujnni che guibi' xlamni. <sup>44</sup> Rniliäpac lojtu, lamga sudeed guiraa rehxixtenni te xcanäj mosgani. <sup>45</sup> Per palga gun mosga xhigab nen lastooni: “Saclaa guibi' xlamä”, sas guislojni gusacsini resamosni, gunaa sigajc niguii, dxejc guisloj gauni, yäni, soozni; <sup>46</sup> sibi' xlamni te dxej ni xhet cabäjdinini, or ni dini gun xhigab guidzujnni. Dxejc sii sudeedni te castigwro lojni, sutiäjlni te duu dejtzni dxejc sinibeeni jüini, guidxaagni rebejn ni di gusobdiajg diidx.

<sup>47</sup> Mosga ni najn xhini'c rlanj xlamni gac, luxh dini susin, dizani guzoob xtiidxni, sutiälduxhrene duu dejtzni. <sup>48</sup> Niluxh mos ni di gan xhi rlanj xlamni gac, ni'c rujnni rduzuun ni di xlamni guidxagljaz gac, guxiiru castiigw gacni. Reni rca' xhidajl, xhidajlza riäj gudeedreni; loj reni rca' yäl'rnibeduxh, xhiroobza siniabni lojni.

*Rlia' Jesús bejn lo sa'ni*  
(Mt. 10:34-36)

<sup>49</sup> Räjpza Jesús:

—Narä biälä te gucuaguäi guedxliujre; ¡malaii alagusloj cayejcni! <sup>50</sup> Niluxh nanab tedä te yäl'robnis ni säloj te trabajwduxh, ni'c cayuduxhä yärsia' cheni chale'lini. <sup>51</sup> ¿La rujntu xhigab biälä te jiädnää yäl'rbexi loj guedxliuj, ä? Rniä lojtu, dini gac si'c. Alga biälä te guilia' ä bejn lo sa'reni. <sup>52</sup> Silia' sa' te famil; loj gaiireni, sidxe'ch choñreni loj tio'preni, luxh tio'preni sidxe'chza lo choñreni. <sup>53</sup> Silia' sa'reni; sidxe'ch dad lo xingaanni, luxh xingaanga sidxe'chza lo xtadni; nane' sidxe'ch lo xindxa'pni, luxh xindxa'pga sidxe'chzani lo xnanni; nansuegr sidxe'chni lo xculijzni, luxh gulijzga sidxe'ch lo xnansuegrni.

*Reseen xten retieimp*  
(Mt. 16:1-4; Mr. 8:11-13)

<sup>54</sup> Caniiza Jesús lo reben xhidajlga, räjpni:

—Cheni rhuütu räjs reza nez lad jäät, rniitu: “Siajb nisguij.” Luxh riabni. <sup>55</sup> Che rbi' bej nez lad danbägw, rniitu: “Sacnalaa nadxej”, luxh si'c rajcni. <sup>56</sup> ¡Bejn ni rusguee! La'tu racbeetu xhi säloj reseen ni rien lo guedxliuj näjza xhaguibaa, ¿xhicuent ditu gan xhi säloj retieimp ni dxunnu naj, ä?

*Basiäj diidx con rebejn ni rdxe'ch lojlu*  
(Mt. 5:25-26)

<sup>57</sup> Räjpzani:

—¿Xhicuent ditu quiiil lagajc la'tu xhini'c najc hueen, xhini'c najc laaca te guntuni? <sup>58</sup> Sa'csi palga yu' chuni'c chale'c xquejlu lo guxhtis, lalni sanäni luj ro jusgaad, basiäj diidx con laani lo nejz, te na'c chanäni luj lo reguxhtis, sa'csi dxejc reguxhtis sutedreni luj lo reguixhajg te gusaureni luj nen latzguuib. <sup>59</sup> Luxh rniä lojlu, dilu guirii ro'c hasta gusa'lu quixlu guiraa lojreni.

## 13

*Colgusiejch lajztu te di guettu*

<sup>1</sup> Lagajc dxejc, gubig gaii reni huisa'nreni diidx loj Jesús xcuent gaii ben Galilee ni bagu't Pila't nen guidoo, bagu'chni xtiejnreni con xtiejn reman ni siädnäreni si'c gojn lo Dios. <sup>2</sup> Sas räjp Jesús lojreni:

—¿La rujntu xhigab si'c gusajc reben Galileega sa'csi najcruren ben dojl lo rebejn lajdxreni? <sup>3</sup> Narä rniä, dini gac si'c. Palga di'tu gusiechljaz sigajcza sejt guiragajctu. <sup>4</sup> O xcuent guitzunchon rebejn nani gujt che gubixh te or ni laa Siloé yejcreni, ¿La rujntu xhigab najcruren ben dojl lo rebejn ni rbäjz guedx Jerusalén, ä? <sup>5</sup> Narä rniä, dini gac si'c. Palga di'tu gusiechljaz, sigajcza sejt guiragajctu.

*Xcuent te yag iigw*

<sup>6</sup> Dxejcti gosloj bij Jesús te cuent ni ruluiini lojreni, räjpni:

—Te dade' gojp te yagügw ni basujni lo xyujni. Sas huihuini don la caj ninejxh lojni. Luxh xhet ninejxhdi bidxalni. <sup>7</sup> Dxejc räjpni loj bejn ni canäj xyujni, agujc choñ ijz siädtilä ninejxh lo yajgre, luxh xhetini. Batin yajgre. ¡Xlia'si sujni lo yuj! <sup>8</sup> Luxh xmosni räjp lojni: “Dad, basaanni steb ijz, guslää yuj ni'ni, gusälä abonni. <sup>9</sup> Palga xcaj ninejxh lojni steb ijz, laaca, palga dini xcaj, dxejc guitinnuni.”



*Rusiajc Jesús te gunaa*

<sup>10</sup> Te dxej ni rusilajz rexpejn Israel caguluii Jesús neñ te guidobáz. <sup>11</sup> Ro'c suga' te nane' ni agujc tzunbichon ijz racxhuuni. Beñdxab caguscoodni, niluxh di gacdi suliini. <sup>12</sup> Che bahuii Jesús lojni, gurejdxnini, dxejc rájp Jesús lojni:

—Gunaa, abasaan yálguijdxga luj.

<sup>13</sup> Che basujni naani yejnci, lagajc dxejc gujc gusulii nane'ga. Dxejc guslojni calá'pni xpala'n Dios. <sup>14</sup> Luxh dade' ni rnibee guidobáz bidxe'chni sa'csi basiajc Jesús nane'ga che najcni dxej ni rusilajzreni, ni'c gusloj cayájpni loj rebejn:

—Xho'p dxej sajc gun bejn dzuun; neñ redxejga sajc jiáadtu te jiajctu, per na'c jiáadtu dxej ni rusilajz rexpejn Israel.

<sup>15</sup> Dxejc badzu' Jesús diidxre, rájpni lojni:

—¡Beñ rusguee! ¿La di chutis tejtú guxhec xconni o xpurni te chanánini yáni nis, mase najcni dxej ni rusilajz bejn, á? <sup>16</sup> Luxh nane're najc te xagdoó toAbram, nani numbee Dios, ni agujc tzunbichon ijz baliib beñdxabni, ¿la digacdi guixecni lo xcálguijdxni mase najcni dxej ni rusilajz bejn, á?

<sup>17</sup> Che gunii Jesús rediidxre, bianxtujy rebejn ni rdxe'ch loj Jesús, luxh rebeñ xhidaalga cabalazduxhrene sa'csi cayujn Dios redzunro nez lojreni.

*Xcuent bedz muxhtas*

(Mt. 13:31-32; Mr. 4:30-32)

<sup>18</sup> Ni'cni rájp Jesús lojreni:

—¿Xhocha najc xcálrnibee Dios? ¿Xhicha cojn guiniá najcni tebloj? <sup>19</sup> Najcni si'c te bedz muxhtas ni rbe'c te bejn lo xyujni. Luxh che guiroobni, rajcni te yagro. Dxejc riáad remane' ni rutajt siádyunchee xpitiiáazni loj rexhajcwni.

*Xcuent cojb ni rusaguij*

(Mt. 13:33)

<sup>20</sup> Guniiza Jesús stehuált te gacheereni xho guire'ch rextidx Dios. Rájpni lojreni:

—¿Xhicha cojn guntebloá xcálrnibee Dios? <sup>21</sup> Najcni si'c levaduur ni rugu'ch te gunaa lo chon mediid arin, luxh rusaguijni guiraa cojbga.

*Dää rolá' cadre jiu'ni xhaguibaa*

(Mt. 7:13-14, 21-23)

<sup>22</sup> Huinuu Jesús xnejzni sääni guedx Jerusalén. Lañni sadejdni reguejdx nájza rerench caguluiini rebejn. <sup>23</sup> Dxejc gunabdiidx te bejn lojni, rájpni:

—Dad, ¿la guxii najc rebejn ni calaa loj rextoljreni, á?

Dxejc rájpni lojreni:

<sup>24</sup> —Dää rolá' cadre jiu' bejn xhaguibaa. Ni'cni coltip lajtu te jiu'tu ro'c, sa'csi xhidajl bejn rlanj jiu'reni ro'c, niluxh direni gun gaan. <sup>25</sup> Cheni abasá baxhuan xten yu' rolá', dxejc la'tu ni suga' detz yu' guisloj gusejstu rolá', guiniitu: “Dad, baxhal-laa rolá’”, dxejc laani sudzu'ni diidx, siniini: “Dina ganá caro siáadtu.” <sup>26</sup> Dxejc guislojtu guiniitu: “Bidxunnáanu, bidaunáanu, bidunnáanu luj, baseedlu nuurnu lo xnezyuunu.” <sup>27</sup> Dxejc siniini lojtu: “Rniliá lojtu, dipacná gumbeá la'tu. Coljij guiraatu, beñlatsiaj.” <sup>28</sup> Dxejcti sonduxhtu, chubeljli lájytu che fiitu abiu' toAbram, con toIsaac, con toJacoob, nájza guiraa redade' ni gunii xtidx Dios, suga'reni lo xcálrnibee Dios xhaguibaa, luxh la'tu di gacdi jiu'tu. <sup>29</sup> Dxejga sidzujn xhidajl beñzijt ni siáad ladjiaa, ladjiát, ladbájgw, nájza ladbee, te jiu'reni lo xcálrnibee Dios xhaguibaa, ro'c sibejzreni lo mex. <sup>30</sup> Luxh yu' reni rujntu xhigab guxii sajcreni naj, sacduxhrene dxejc. Yu'za reni rchalotu sacduxh naj, xhet sajcdireni dxejc.

*Jesús biin xcuent guedx Jerusalén*

(Mt. 23:37-39)

<sup>31</sup> Lagajc dxejga, bidzujn gaii refarisee, rájpreni lojni:

—Huij, biunejz ree, sa'csi Herodes rlanj ju'tlu.

<sup>32</sup> Dxejc laani badzu'ni diidxre lojreni, rájpni:

—Goz lo bájzga, beñ rusguee: “¡Bahuii! cabáá beñdxab lastoo rebejn, cagusiacá rebejn ni racxhuu nadxej nájza guixee, luxh huijdxli guluxá xtzuná.” <sup>33</sup> Niluxh mase si'c gacni nanab chanuá xnezyuá nadxej nájza guixee, huijdx, sa'csi di gacdi guet te dade' ni rnií xtidx Dios ste'ca guejdx, guejdxitis Jerusalén sajc guetni.

<sup>34</sup> ¡Probe'tu, la'tu beñ Jerusalén! Rugu'ttu redade' ni riádnii xtidx Dios lojtu, rucuaazatu guij yejc rebejn ni ruxhal Dios lojtu. Balti huált rlazá nuchagá sa'tu si'c ruchagsa' te guidco'c rexquidbázni lajd xhigani, niluxh ditu nicájp. <sup>35</sup> Bahuii xho bianxteb xquidootu. Ni'cni arnixgá lojtu, dirutu fii loá cheni guidzujnli dxej ni guiniitu loá: “Chicbaa ni siáad xcuent Dios.”

## 14

*Rusiajc Jesús te bejn ni guidxa guij*

<sup>1</sup> Che gojl te dxej ni rusilajz rexpejn Israel, huitajw Jesús rolizj tej ni rnibee loj refarisee. Cagula'tz gail refarisee, guidon xhini'c gun Jesús, <sup>2</sup> sa'csi nez loj Jesús suga' te dade' ni guidxa guij tiejxhni. <sup>3</sup> Dxejc gunabdiidx Jesús lo rebejn ni ruluii leii nájza lo refarisee, rájpmi lojreni:

—¿La sajc gusaijcmi te bejraxhuu dxej ni rusilajz bejn o la di gacdini?

<sup>4</sup> Per laareni dxtis suga'reni, niáutis ro'reni. Dxejc cua' Jesús bejraxhuuga, basiajcnini, gunibeezani biunejzmi. <sup>5</sup> Dxejc rájpmi loj refarisee:

—Chu la'tu ni rajp te bur o te gon, palga jiajbni nen te bisie, ¿la ditu chalägajcmi mase najcni dxej ni rusilajz bejn, ä?

<sup>6</sup> Dxejc di niajcmi nudzu'reni diidx lojmi.

*Reni bidoñ chää sa'*

<sup>7</sup> Cheni bahuii Jesús xho rchaglajz rebejn rbereni latsa'c te cuereni cuä' rebejnro, bijni te cuent ni ruluii lojreni, rájpmi:

<sup>8</sup> —Cheni guidontu chäätu te sa', na'c guntu te cuetu cuä' rebenro, te di guidzujñ te bejroru lojlu, <sup>9</sup> dxejc jiäd bejn ni cayujñ lanij, naani lojlu: “Badeed cue dade're ro'c.” Dxejc situjylilu chacuelu ste'ca lajt lo le'li. <sup>10</sup> Maazru hueen, cheni guidonlu chäälu te sa', huicue lo mex ni zuj lo le' te che guidzujñ bejn ni cayujñ lanij, naani lojlu: “Xamigwä, gudaa cuelu nen yu' cadro rbej rebenro.” Si'c sä'p xpala'nlu nez loj guiraa rebejn ni sobganäjlu lo mex. <sup>11</sup> Sa'csi ni rlaiz chä'p xpala'nmi nez loj rebejn, sianxtujyni nez lojreni. Luxh bejn ni najc nadolajz, sä'p xpala'nmi nez loj guiraa rebejn.

<sup>12</sup> Rájpmi loj bejn ni cagudeed xhi gaureni:

—Cheni gunlu te lanij o gutedlu bejn lo xmexlu, na'c cuedxtislu rexamigwlu con rebejtzu, con resa'lu, niclaza rexpisnlu ni najc ri'cw, sa'csi laareni sigajca sibejdxreni luj che gunreni te lanij, luxh si'c agudijxreni ni badeedlu lojreni. <sup>13</sup> Che gunlu te lanij, alga gurejdx rebenproob, rebencoj, nájza rebenlotiä'p, <sup>14</sup> dxejcti sibaa lajzlu sa'csi laareni di gacdi gunidxsacreni ni badeedlu lojreni; luxh si'c siguixsac Dios ni bejnlu che gal dxej ni guibansac rebejn loj rebengut.

*Xcuent te laniro*

<sup>15</sup> Che biejn diajz tej reni sobga' lo mex, rájpmi loj Jesús:

—Chicbaa rebejn ni gau yätxtiil cadro rnibee Dios.

<sup>16</sup> Dxejc rájpmi Jesús lojmi:

—Guyu' te dade' ni bejn te laniro rolizjmi. Gunibeeni bidoñ xhidajl bejn te jiädtaunäjrenini.

<sup>17</sup> Che bidzujñ or ni gaureni, baxhal dade'ga te xmosni chatejdxmi rebejn ni abidoñ, rájpmi lojreni: “Colchä, asuchee lo mex.” <sup>18</sup> Dxejc guiragajcmi gosloj cayäjb di gacdi chääreni. Tejni rájpmi: “Entis gusiä te la' yuj, luxh naj nanab chahuiä xho najcni. Goslaa di gacdi jiälä.” <sup>19</sup> Steeni rájpmi: “Gusiä gail nejs gon, luxh nanab chahuiä xho rujnreni dzuun. Goslaa di gacdi jiälä.” <sup>20</sup> Steeni rájpmi: “Entis bachnaä ni'cni di gacdi jiälä.” <sup>21</sup> Che gubi' mosga, badeedni diidx lo xlamni xhi rájpmi rebejnnga lojmi. Dxejc bidxechduxh lamga, rájpmi lo xmosni: “Basquejn huij ladnezuyj nájza ladnezuyj dää, gudanä rebenproob, rebencoj, rebenlotiä'p, rebennatujñc.” <sup>22</sup> Si'c bejn mosga. Che gubi'ni rájpmi lo xlamni: “Dad, abenä si'c ni gunibeelu, luxh lajtru yagxhiil.” <sup>23</sup> Dxejc rájpmi lamga lo xmosni: “Huij lo renezuyj ni sii loj reguedxzijj, gudanäj rebejn ni guidxaaglu nejzga, te cha bejn rolizä. <sup>24</sup> Rniliä lojtu, nicla tej reni bidoñ ganid di gau xhuej nani benä.”

*Ni nanab gunni te chanajlmi Crist*

<sup>25</sup> La'l sasaj Jesús lo nejz, xhidalduxh bejn sanajlmi. Dxejc gubiréni, gosloj cayäjpni lojreni:

<sup>26</sup> —Palga yu' chu tej ni jiäd loä, ni di cuälaz xtdadni, xnanni, chäälni, rexi'nmi, rebejtzmi, nájza rebisaijpmi, nájgajca xcäl nabajpmi, di gacdi gacni te rexpenä. <sup>27</sup> Palga yu' chutis tej ni di rlaiz tedni trabajw te jiädnajlmi narä, di gacdi gacni te rexpenäpac. <sup>28</sup> Chu tejtmi ni rlaiz gun te yuro, ni di gunxgaa xhigab lacti meel chanä yu'ga, te guidon la sajc guluuxnini. <sup>29</sup> Didi cheni abejpmi recimient, di gacdi guluuxnini, dxejc guiraa reni fii lojmi suxhiznäjrenini, <sup>30</sup> säjpmi: “¡Bahuilare! Bejnre gosloj bencheeni te yu' per di niajcti nuluuxnini.” <sup>31</sup> ¿Chu te reii ni gun xhigab chachagdijlmi stee reii, ni di gunxgaa xhigab don la sajc gunni gaan con tzuu mi'l soldaad loj stee reii ni siäd con gal mi'l soldaad, ä? <sup>32</sup> Palga di gacdi gucuanäjpmi, che gacbeeni zijtli siäd stee reiiiga, suxhalni te xpejpmi chanab yälrbexdi lojmi. <sup>33</sup> Ni'cni palga chutis tejtmi di gusaan rexhixtenni te jiädnajlmi narä, di gacdi gacni te rexpenäpac.

*Che diru sejd gac nadzujy*

(Mt. 5:13; Mr. 9:50)

<sup>34</sup> Rájpmi:

—Huen najc sejd. Per cheni diruni gac nadzujy, ¿xho gacru gac nadzujyni? <sup>35</sup> Xhetru sajcdini, nicla te chääni loj yuj, niclaza te chääni lo abon. Gusältis bejn sejdga. Reni rlajz gucuadiajg xtidxä, sucuadiags'a'creni.

## 15

*Xcuent xiil ni gunijt*  
(Mt. 18:10-14)

<sup>1</sup> Guiraa reni rusquijx impuest näjza rebendojl cabigreni loj Jesús, te cuadiajgreni rextiidxni. <sup>2</sup> Refarisee näjza rebejn ni ruluii leiü gusloj camojmreni, räjpreni:

—Bejnre rusaan rbig rebendojl lojni, luxh raunäjzanireni.

<sup>3</sup> Dxejcti bij Jesús cuent ni ruluiire lojreni, räjpni:

<sup>4</sup> —Chutejtu ni rajp tegayuu xiil, palga chanijtni tejni, ¿la dini gusaan stapbitzuubigaa rexiilni lo niaa te chatiilni xile' ni gunijt, hasta guidxällinini, ä? <sup>5</sup> Luxh che guidxällinini sibanduxh lajzni, dxejc sutzuubnini ro xhacwni. <sup>6</sup> Che guidzujnini rolijzni sutojpnj rexami-igwni näjza rexpisinni te gäbni lojreni: “Colguibalaznäj narä sa'csi abidxälä xile' ni gunijt.” <sup>7</sup> Rniä lojtu, sigajcza su'ru yälrbalajz xhaguibaa xcuent tejtis bejn ni guibig lo Dios ni gusiechlajz xtojlni quela xcuent tapbitzubigaa bejn ni di guiquiin gusiechlazreni xtojlni.

*Xcuent meel ni gunijt*

<sup>8</sup> Räjpzani:

—Sigajcza te gunaa ni rajp tzuu meel, palga chasäljni tejni, ¿la dini gusanij te bajl te guloobni nen yu' hasta guidxällinini, ä? <sup>9</sup> Luxh che guidxällinini, sutojpnj rexamiügwni näjza rexpisinni, säjpnj lojreni: “Colguibalaznäj narä sa'csi abidxälä meel ni gunijt.” <sup>10</sup> Rniäza lojtu, sigajcza sibalajz rexangl Dios xhaguibaa xcuent te beñdojl ni rusiechlajzni.

*Te bejn ni baxun te xi'nni*

<sup>11</sup> Dxejc bijza Jesús cuentre lojreni:

—Guyu' te dade' ni yu' tio'p xingaanni. <sup>12</sup> Dxejc xi'nni ni najc huinruga, räjpni lo xtdadni: “Dad, baniidx yälmasa'c nani nungäjlxca'a.” Sas badeed xtdadni xerensni. <sup>13</sup> Di niacclaa, balsi dxej gudejd, chela bato' xinhuinni guiraa xhixtenni, dxejc sääni, bidzujnini te guedxzijt. Ro'c banijtni guiraa xmeelni lo recosgujdx. <sup>14</sup> Che abanijtni guiraa xhixtenni, biääd te gubinduxh guedxzijtga cadro yu'ni. Sas guslojzani calaanni. <sup>15</sup> Dxejc huitiilni dzuun lo te beñguedxga. Baxhal beñgani te huigajpnj cuch lo xyuj dade'ga. <sup>16</sup> Luxh calanduxhni bejnini xhigab malai sajc gauni recuaan ni najc si'c lia ni cayajw recuch, niluxh rut badeeddi xhi niajwni. <sup>17</sup> La! ni cadejndi trabajwga, bianij xcäriejnini bejnini xhigab, naani: “Balti rexmos xtdä rausa'c, ria'nru xhi gaureni. Luxh narä ree calanduxhä, ameerli guetä. <sup>18</sup> Guibi'älis ladxä, rolijz xtdä, gäpä lojni, Dad, banitä lo Dios näjza lojlu. <sup>19</sup> Diru nungäjlx guirilaä xi'nlu. Cua' narä si'c te xmoslu.” <sup>20</sup> Dxejc gunazgajcni nejz te gubi'ni rolijz xtdadni.

‘Cheni zijtru siäädni, bahuii xtdadni lojni. Dxejc balaslajznini, ruxunlini, huichaglojnini, sas gudääznini, bachagro'ni lojni. <sup>21</sup> Dxejc räjp xi'nni lojni: “Dad, abanitä lo Dios näjza lojlu. Diru nungäjlx guirilaä xi'nlu.” <sup>22</sup> Per räjp xtdadni loj rexmosni: “Coltanä te ladsa'c, colshuajcwnini xi'nä, colgusäl te niil bicuenaani, xcajza te gura'ch ni'ni. <sup>23</sup> Coltanä te biser ni guro' colgu'tni. ¡Colsquejn te guidauunu, jiennu te lanij! <sup>24</sup> Sa'csi xi'näre abenä xhigab gujtni, luxh naj si'cni agubansacni, gunijtni niluxh naj abidxäjlni.” Dxejc guslojreni bejnreni te lanij.

<sup>25</sup> La! ni cayajc dee, xingangalooni cayujn dzuun lo niaa. Che gubi'ni, siäddzungajxhni rolijzni, che biejn diajgni cayel rolijzni, caguya'zarenini. <sup>26</sup> Dxejcti gurejdxni te mos, gunabdiidxni lojni xhi cayajc royu'. <sup>27</sup> Dxejc räjp mosga lojni: “Gubisac bejtzlu, luxh xtdadlu gunibee gujt te biser guro' te gac lanij sa'csi nadaanni gubi'ni.” <sup>28</sup> Dxejc bidxe'ch xingangalooni. Naadtini jiu'ni rolijzni. Che gubee xtdadni naadtini jiu'ni, bihuüi xtdadnini te gunabni jiu'gani. <sup>29</sup> Dxejc räjpni lo xtdadni: “¡Bahuilaa! Agujc xchej cayunä dzuun lojlu, luxh rusobdiagä guiraa xtiidxlu, per nicla tej huält gajdlu guniidx nicla te dxibe' loä te gunä te lanij con rexamiügwä. <sup>30</sup> Luxh naj ni abidzujn xi'n lure, ni banijt xmeellu con regunadxab, xhoxh bagu'tlu te biser guro' te cayujnlu xlanijni.” <sup>31</sup> Dxejc räjp xtdadni lojni: “Xi'nä, sugagajclu loä, luxh guiraa ni rapä najc xtenlu. <sup>32</sup> Niluxh naj riäjlpac jiennu lanij, guibalaaznu, sa'csi bejtzlu ni benä xhigab agujt, agubi'ni naj, najcni si'cni gubansacni; gunijtni, naj abidxäjlni.”

## 16

*Xcuent te ni rnibee loj remos*

<sup>1</sup> Dxejc cayujza Jesús stee cuent loj rexpejn pacni, räjpni:

—Guyu' te beñrajp ni guyu' lojni te ni rnibee loj rexmosni. Dxejc biääd reni badeedreni di-idx lojni, räjpreni: “Bejn ni rnibee loj rexmoslu xhetlaadi cayujni cagujitni rexhixtenlu.”<sup>2</sup> Dxejcti gurejdx xlamnini, räjpni lojni: “¿Xhi dee ni riejn diagä caniireni xcuentlu, ä? Naj guniidxlu loä cuent xte xtzuunlu, sa'csi dirulu chanuu guinibeelu lo rexmosa?”<sup>3</sup> Dxejc bejnga bejn xhigab: “¿Xhichani'c gunä naj ni gudzucaj xlamä dzuun loä? Dina ga'pä yälřstijp te guunä dzuun lo niaa, luxh situjyä chanabä gojn.”<sup>4</sup> Ananä xhini'c gunä te che dirunä ga'pä dzuun, sibejdx rexamigwä narä rolijzreni.”<sup>5</sup> Dxejcti gurejdxni tebgajreni rebejn ni nazäáb lo xlamni, dxejc räjpni loj ni bidzuxxgaa: “¿Lac nazäáblu lo xlamä?”<sup>6</sup> Dxejc räjpni: “Nazäbä si'c te gayuu baril se't.” Dxejc räjpni lojni: “Basquejn, cua' guijtze, bacuaa tiubitzuutis baril nazäáblu lojni.”<sup>7</sup> Dxejc gunabdiidxni loj steeni, räjpni: “¿Luj a'? ¿Lac nazäáblu lo xlamä?” Dxejc räjpni lojni: “Te gayuu dximro triuu.” Dxejc räjpzani: “Aree xquijtzu; bacuaa tajtis dximro.”<sup>8</sup> Bidxeloj xlamni, gulä'pni xpala'n benguijdxga ni gunibee sa'csi bisinni bejnni recosga. Dxejc räjpza Jesús, rebejn ni di gumbee xtidx Dios nadxälajzruren lo rextzuunreni con sa'reni loj rebejn ni arumbee xtidx Dios.

<sup>9</sup> Rniä lojtu, colquii rexamiigwtu con reyäl'nasa'c ni räjpnu loj guedxliujre, te che abaraj xhixtentu, sica' Diostu xhaguibaa cadro yu' rolijztu par tejpas.

<sup>10</sup> Renani runsa'c dzuun lo te dzunbáz, sajca gusa'cni dzuun lo te dzunro, luxh reni di gacdi gusa'c dzuun lo te dzunbáz, di gacdiza gusa'cni dzuun lo te dzunro.<sup>11</sup> Ni'cni palga xhetlaadi cuaräl'näjtü reyäl'nasa'c xten guedxliuj, jxho guniidx Dios reyäl'nasa'c xtenni lojtu!<sup>12</sup> Palga xhetlaadi cuaräl'näjtü xhixten bejn, ¿chu guniidx lojtu ni gac xtenpactu, ä?

<sup>13</sup> Nicla tej mos di gacdi gunni dzuun lo tio'p lam, sa'csi sidxe'chni lo tejni, steeni sinälajzni o susobdiajpacni xtidx tejni, sibälazni steeni. Di gacdi gun bejn xtzun Dios la ni sanälajztisni xcäl'nasa'cni.

<sup>14</sup> Mbaj naj, refarisee, sa'csi rchaglazduxhreni meel, cacuadiagdzu'tzreni xtiidxni, dxejc caguxhšnäjreni Jesús.<sup>15</sup> Dxejcti räjp Jesús lojreni:

—La'tu najctu bejn ni ruhuii rebejn lojtu, naareni beñsacduxhtu, niluxh acanajn Dios xhi xhigab rujntu neñ lastootu. Sa'csi guiraa ni rchalojtu najc yäl'nasacduxh, guiraa ni'c rbixhlajz Diosni.

#### *Xleii Moisés con xcäl'rnibee Dios*

<sup>16</sup> Räjpzani:

—Dxejli ni biääd Juan ni rutiobnis, guyu' xleii Moisés, näjza xtidx redade' ni gunii xtidx Dios. Cheni biääd Juan gusloj rsule' didxsa'c xcuent xcäl'rnibee Dios, ni'cni xhidajl bejn cagusutijp lajzni te jiu'reni loj yäl'rnibeega.

<sup>17</sup> Per guyasiru nitloj xhaguibaa näjza guedxliuj quela di jialoj guiralii rediidx ni bacuaa Moisés; nicla tej diidxga di nitloj.

#### *Rului Jesús xcuent ruro'n sa' bejn*

(Mt. 19:1-12; Mr. 10:1-12)

<sup>18</sup> Räjpzani:

—Palga guro'n te bejn chääl'ni, dxejc guchnaani stee gunaa, rujno dojl, luxh nani ruchnaa te gunaa ni abaro'n chääl'ni, niguiiga rujnzani dojl.

#### *Te beñrajp näjza Lázaro*

<sup>19</sup> Räjpzani:

—Guyu' te beñrajp ni rchaglajz rajcwni ganax reladsacduxh, luxh guixe-guixee rujni laniro.<sup>20</sup> Guyu'za te beñproob ni laa Lázaro ni rniab gojn, ricueni ro xlä' beñrajpga, yu' guejdx ni rgaadz tiejxhni.<sup>21</sup> Rlajzni maläii xho gunni gauni nani rtejb loj xmex beñrajpga, luxh direni gusaan. Dxejc rebä'cw siääd rilejp loj reguejdx ni rgaadz ni guidxa tiejxhni.<sup>22</sup> Guyu'ti te dxej gujt beñproobga, biädläs rexangl Dios xaimni, huinäreni cadro yu' Abram xhaguibaa. Dxejcti näjza beñrajpga gujt, huicua'tztirenini.<sup>23</sup> Che yu'ni gabijl cadro rij guiraa rebeñdojl, ro'c cadejdni trabajwduxh. Dxejcti guläsni lojni, bahuiini zitduxh cadro suganäj Abram Lázaro.<sup>24</sup> Dxejcti guredxaduxh beñrajpga, räjpni lo Abram: “¿Xtadä Abram! Balazlajz narä, baxhal Lázaro guhuajdxni yejc bicuenaani nis te gusiäljujni ludxä, sa'csi ree cadedä trabajwduxh lo guibo.”<sup>25</sup> Luxh räjp Abram lojni: “Xi'nä, basaa lajzlu che gubajnju lo guedxliuj gojplu guira'ti xhixtenlu, luxh sigajca Lázaro gudejdni trabajwduxh. Per naj ree casilajzni, naj luj cadejdnu trabajwduxh.<sup>26</sup> Luxh di gacdi jiaäd Lázaro ro'c, sa'csi yu' te baladuxh ni rlia' sa'nu, te mase rlanj bejn guirii ree te tedreni lojlu ro'c, di gacdni. Di gacdiza ted reni yu' ro'c te jiaädreni loonu.”<sup>27</sup> Dxejcti räjp beñrajpga lojni: “Rniabduxhä lojlu, xtadä, baxhallaa Lázaro chääni rolijz xtadä,<sup>28</sup> sa'csi ro'c yu' gaii betzä, te chalijdxni laareni, te gusiechlajzreni, te di näjza laareni jiaädreni ree cadro rdejd bejn trabajwduxh.”<sup>29</sup> Dxejc räjp Abram lojni: “Arajpreni guijtze cadro caj xleii Moisés näjza xtidx redade' ni gunii xtidx Dios, sugusobdiajgreni rediidxga.”<sup>30</sup> Luxh beñrajpga badzu' diidxre, räjpni

lojni: “Gulii dad Abram, per palga chäs te bejn loj rebengut, chanii lojreni, dxejc sii per susiechlazreni.”<sup>31</sup> Dxejc räjp Abram lojni: “Palga direni gusobdiajg xtidx toMoisés näjza xtidx redade' ni gunii xtidx Dios, dizareni chalilajz xtidx te bejn ni guibañsac loj rebengut.”

## 17

### *Riesgw jiajbni lo dojl*

(Mt. 18:6-7, 21-22; Mr. 9:42)

<sup>1</sup> Räjp Jesús loj rexpejnpacni:

—Siäädpac recos ni gun jiajb bejn lo dojl. Proobza bejn ni rujn riajb bejn lo dojl. <sup>2</sup> Maaz guliibni te guij xten molin guejni, gusäl bejn ni lo nisdoo cadro jiätro quela gunni jiajb rexi'nä ni ahuililajz xtidxä. <sup>3</sup> Colsusin!

'Palga gun bejtzlu dojl lojlu, balijdxni. Palga gusiechlazni, basiäj! diidx con laani. <sup>4</sup> Masque gajdz huält nen teb dxej gunni dojl lojlu, palga jiädniini lojlu gajdz huält, naani: “Xhet laadi benä, basiäj! lajzlu”, basiäj! lajz con laani.

### *Bastioob xcälirililaaznu*

<sup>5</sup> Gunii rexpejnpacni lo Jesús, räjpreni:

—Dad, baniidrxu yälirililajz loonu.

<sup>6</sup> Dxejc räjp Jesús lojreni:

—Palga rajptu yälirililajz, mase najcni si'cti te bedzbäz xten muxhtas, sajc gäbtu lo yagro rec: “Biliädxa' ro'c, guzuj galäii nisdoo”, susobdiajg yajgga xtiidxtu.

### *Ni riäj! gun te mos*

<sup>7</sup> Räjpzani:

—¿Chu tejtü ni rajp te mos ni riga'n o ni rigajp rexquidxaani ni gäbni lojni che guibi'ni lo niaa: “Biu'ga, gurej lo mex te gaulu”? <sup>8</sup> Dini gäb si'c. Niluxh säjpn lojni: “Bachaa xhajblu. Bejn xhi gauä, gudanäni löä. Che luux gauä, yä'ä, dxejc sajc gauzalu, yäzalu.” <sup>9</sup> Dini gudeed xquixtios lo mosga sa'csi rujn ni recos ni gunibeeni sa'csi si'c riäj! gunni. <sup>10</sup> Sigajcza la'tu, che luux guntu guiraa redzuun ni guniä guntu, riäj! guiniitu lo Dios: “Najcnu mos ni xhet sajcdi, nani riäj! jiennu, ni'ctis biennu.”

### *Basajc Jesús tzuu bejn ni ral tiejxhreni*

<sup>11</sup> La! ni sasaj Jesús nez guedx Jerusalén, gudejdni loj región Samaria näjza región Galilee. <sup>12</sup> Che biu'ni tej reguejdxga, huichagloj Jesús tzuu bejn ni rajc te yälguijdx ni ral tiejxhreni, niluxh zijtru guzujreni. <sup>13</sup> Dxejc rbedxa'reni räjpreni:

—Jesús, Dad, Mastr, balaslajz nuurnu.

<sup>14</sup> Che bahuii Jesús lojreni, räjpni lojreni:

—Colchäj, te fii rebixhojz abiajctu.

La! ni sääreni, bia tiejxhreni. <sup>15</sup> Dxejc tejreni, che bahuiini abiajcti, gubiguxunni, cabedxa'ni calä'pni xpala'n Dios. <sup>16</sup> Bazuxhijbni nez loj Jesús, basajbni lojni lo yuj cagudeedni xquixtios loj Jesús. Luxh bejnre najc te benzijt, te beñ Samaria. <sup>17</sup> Dxejcti räjp Jesús lojni:

—¿La et tzuudi najc reni bjaic, ä? ¿Con sgaareni? <sup>18</sup> ¿La rutru gubi'di löä te guiliä'preni xpala'n Dios, xtebtis benzijtre, ä?

<sup>19</sup> Dxejc räjp Jesús loj bejnre:

—¡Huisulii, huij! Abiajclu sa'csi huililajzlu.

### *Xho guidzujn xcälrnibee Dios*

(Mt. 24:23-28, 36-41)

<sup>20</sup> Dxejc, sa'csi agunabdiidx refarisee loj Jesús guc guidzujn xcälrnibee Dios, badzu'ni diidxre, räjpni lojreni:

—Di xcälrnibee Dios guidzujn con seen ni sajc fiitu. <sup>21</sup> Diza bejn naa: “Bahuii, aniree”, o “Anirec”, sa'csi abidzujn xcälrnibee Dios lojtu.

<sup>22</sup> Dxejc räjp Jesús loj rexpejnpacni:

—Sidzujn dxej rlaizgatu fiitu te dxej sa' ni chu che jiädsac Xi'n Dios ni gujc Niguii, luxh ditu fini. <sup>23</sup> Luxh siniireni lojtu: “Aniree”, o “Anirec”, per na'c chäätu, na'cza chanajltu reni rihuii. <sup>24</sup> Sa'csi sigajc ni rien che rdinya' te laad xhaguibaa hasta stelaad xhaguibaa, si'cza gac che jiälä narä, Xi'n Dios ni gujc Niguii, che gal dxej guibi'ä. <sup>25</sup> Luxh ganiddoo sidedä trabajwduxh, sa'csi sibälaz reben guedxliuj ni tre' naj narä. <sup>26</sup> Si'cni gujc nen redxej cheni gubajn toNoé, si'cza gac nen redxej che jiälä narä, Xi'n Dios ni gujc Niguii. <sup>27</sup> Nen redxej ni gubajn toNoé gudajwreni, gu'reni, bachñaareni, badeedzareni xindxa'preni guchnaa bejn, bidzujnli dxej cheni biu' toNoé nen barcwro ni bencheeni. Dxejc biääd nisguiduxh, gujt guiraa reben dojl, guzääbreni lo nis. <sup>28</sup> Sigajcza gujc nen redxej ni gubajn toLo't: gudajwreni, gu'reni, gusiireni, bato'reni, gule'creni binij, bencheezareni

rolijzreni. <sup>29</sup> Niluxh cheni birii Lo't lo guedx Sodoma, biajb guiboo xhaguibaali, näjza te däj ni rudxuii, gunitlojti guiraa rebejn dojl, huejcreni. <sup>30</sup> Sigajcza gac neñ redxej cheni jialä narä, Xi'n Dios ni gujc Niguii.

<sup>31</sup> 'Dxejga, palga yu' chu niä'p yejc yu', diru galdi jiajtni te chalääni rexhixtenni ni yuchee neñ yu'; palga yu' chu suga' nezjiät, di galdiruni guibi'ni rolizjni. <sup>32</sup> Colgusnaj lajzto xhi gujc chää toLo't. <sup>33</sup> Ni rlanj ga'p xcäl'nabajñni lo guedxliujre, sunijtnini, nani gunijt xcäl'nabajñni lo guedxliujre xcuent rextidä, xcäl'nabajñni rajpni xhaguibaa.

<sup>34</sup> 'Rniä lojtu, guxhijnga ni jialä lo tio'p reni naga' lo te da', chää tejni, steeni jia'n. <sup>35</sup> Lo tio'p gunaa ni cayo't, chää tejni, steeni jia'n. <sup>36</sup> Lo tio'p bejn ni yu' lo niaa, chää tejni, steeni jia'n.

<sup>37</sup> Che biejn diajgreni rediidxre, gunabdiidxreni lojni, räjpreni:

—Dad, ¿caro gac recosre?

Badzu' Jesús diidxre, räjpni:

—Cadro naga' te mangut, ro'c rdojps regolbetz.

## 18

### *Xcuent te gunabiuud con te juejz*

<sup>1</sup> Bijza Jesús te cuent ni ruluii lojreni, te guisieedreni xho riajl cuedx-guiniabreni lo Dios lacuaa gac-huin lajzreni, <sup>2</sup> räjpni lojreni:

—Te guejdx guyu' te juejz ni di chalilaz xtidx Dios, dizani jiu rebejn. <sup>3</sup> Lagajc guejdxga guyu' te gunabiuud. Guixe-guixee rijni lo juejz, rniabni lojni gunni yälguxhtis lo bejn ni rdxe'ch lojni. <sup>4</sup> Balti dxej naadti juejzga gun yälguxhtisga. Dxejcti bejn ni xhigab, naani: “Mase dina guidxebä Dios, dizana jiuä rebejn, <sup>5</sup> sa'csi gunabiuudre sanuutisni siäädni loä, abasiedliini narä, gunälis yälguxhtis xten gunaaga, te di chanuutis riädgusieedni narä.”

<sup>6</sup> Dxej räjp Jesús lojreni:

—Riejn diajgtu xtidx juezgujdxga, <sup>7</sup> Naj ¿xho di Dios, ni najc hueen, gucuadijg xtidx rexi'nni ni rbedx-rniab lojni dxej-yääl? Di gaclaa gunni yälguxhtis xcuent reni aguleni. <sup>8</sup> Ni'cni rniä lojtu, sungajcni yälguxhtis par laareni. Luxh che guibi' Xi'n Dios ni gujc Niguii, ¿la sidxälmi bejn ni rililajz xtiidxni lo guedxliuj?

### *Xcuent te farisee con te ni rusquijx impuest*

<sup>9</sup> Bij Jesús stee cuent ni ruluii loj rebejn ni rluuisi najc beñsa'c, ni rchalo xhet sajcdi resabejnreni. Räjpni:

<sup>10</sup> —Tio'p dade' huij guidoo te huinabreni lo Dios. Tej ni najc farisee, steega najc te dade' ni rusquijx impuest. <sup>11</sup> Sulii fariseega laj ni canabni lo Dios, räjpni: “Dad, Dios, runidxä xquixtios lojlu sa'csi dina gacä si'c najc rebejn ni najc gubaan, ni najc beñ nadiplajz, ni najc bendojl, dizana gacä si'c najc bejnre ni rusquijx impuest. <sup>12</sup> Rucua'nä tio'p huält neñ te xmaan, luxh rudedä te tzuu lo te beex loj guiraa ni runä gaan.” <sup>13</sup> Niluxh bejn ni rusquijx impuest, zijtru suga'ni, dini guiliäs lojni xhaguibaa. Catiäl'naatisni lastooni, caniini lo Dios, räjpni: “Dad, Dios, ¿balaslajz narä, nacä te bendojl!” <sup>14</sup> Rniliäpac lojtu, ni rusquijx impuest rbaali lajzni gubi'ni rolizjni sa'csi badzucaj Dios rextojl, ni, niluxh di Dios nudzucaj rextojl beñ farisee. Sa'csi guiraa rebejn ni rlanj guiliä'p lagajc xpala'nni, susanxtiuj Diosreni, dxej reni di rlanj guiliä'p lagajc xpala'nreni, siliä'p Dios xpala'nreni.

### *Benle' Jesús yejc rebixbäz*

(Mt. 19:13-15; Mr. 10:13-16)

<sup>15</sup> Yu'reni siädnä rexpixbäzreni loj Jesús te guzujni naani yejcreni. Che bahuii rexpejpacni si'c, gusloj cadliidixreni con rebejn te na'c jiaädna'reni rebixue'. <sup>16</sup> Dxej gurejdx Jesúsreni, räjpni lojreni:

—Colgusaan jiaäd rebixue' loä, na'c gudxojtreni, sa'csi xcäl'rnibee Dios najc xten reni najc nadolajz si'c rebixbäz're. <sup>17</sup> Rniliäpac lojtu, chutis ni rlanj jiu' lo xcäl'rnibee Dios nanab gusobdiajgreni xtidx Dios si'c rusobdiajg rebixue' xtidx xtdareni. Palga dini gun si'c, dini jiu' lo xcäl'rnibee Dios.

### *Te bi'n ni rajp xhidajl xhixtenni*

(Mt. 19:16-30; Mr. 10:17-31)

<sup>18</sup> Te bi'n ni rnibee gunabdiidx loj Jesús, räjpni:

—Dad, mastrsa'c, ¿xhini'c nanab gunä te xca'ä yäl'nabajñ par tejpas?

<sup>19</sup> Dxej räjp Jesús lojni:

—¿Xhicuent rniilu narä: “Mastrsa'c”? Rutru najcdi beñsa'c, xtebtis Dios. <sup>20</sup> Anajnlü xho najc remandamient ni caj lo xleii Moisés: “Na'c guesnäjlü gunaa ni di gac chäällu; na'c ju'tlu bejn; na'c cuanlu, na'c guiniilu didx-xhii xcuent bejn; bazoob xtidx xtdadlu, xnanlu, bahuiizarenä.”

- <sup>21</sup> Dxejc räjp bi'nga lojni:  
—Guiraa remandamientre rusobä cheni gucäli biuux.
- <sup>22</sup> Che biejn diajg Jesús xtiidxni, räjpni lojni:  
—Tejtis cayäädx gunlu. Bato' guiraa rehxixtenlu, gudisni loj rebejn ni xhet rajpdi dxejc sajplu xcäl'nasa'clu xhaguibaa. Dxejc gudanajl narä.
- <sup>23</sup> Che biejn diajg bi'nga rediidxre, guc-huinduxh lajzni, sa'csi najcni te bejn ni rapduxh.
- <sup>24</sup> Dxejc rdxelotjis Jesús lojni, guc-huinza lajzni räjpni:  
—Naganduxh jiu' rebenrajp lo xcäl'nibee Dios. <sup>25</sup> Guyasiru ted te cameii ni' te guux lo ni jiu' rebenrajp lo xcäl'nibee Dios.
- <sup>26</sup> Reni biejn diajgni rediidxre, räjpreni:  
—¿Chuxhni'c sajc laa lo dojl, palga si'c najcni?
- <sup>27</sup> Dxejc räjp Jesús lojreni:  
—Guira'ti ni di gacdi gun rebejn, guyasi rajc rujn Diosni.
- <sup>28</sup> Dxejc räjp Pedr lojni:  
—Dad, nuurnu abasa'nnu guiraa rehxixtennu te siopnalnu luj.
- <sup>29</sup> Dxejc badzu' Jesús diidxre lojni, räjpni:  
—Rniliäpac lojtu, chutis ni gusaan rolijzni näjza rexcuzajnni, rebejtzni, chäälmi, xi'nni xcuent xcäl'nibee Dios, <sup>30</sup> sica'ni xhiroobru lo guedxliujre, luxh sica'ni yäl'nabajñ par tejpas.

*Rusule' Jesús stehuält xho guetni*  
(Mt. 20:17-19; Mr. 10:32-34)

- <sup>31</sup> Gurejdx Jesús rexpeljnpacni te laad, te räjpni lojreni:  
—Naj chonnu guedx Jerusalén cadro nanab soob rediidx nani bacuaa dade' ni gunii xtidx Dios galooli xcuent Xi'n Dios ni gujc Niguii. <sup>32</sup> Sutedrenini ladz'naa rebenzjit, suxhiznäjrenini, susacs'ärenini, sutiobxhejnlireni lojni, <sup>33</sup> luxh che luux quiinrenini, dxejc sugu'trenini, luxh ni riojn dxej sibansacni loj rebengut.
- <sup>34</sup> Dxejc laareni direni niacbee rediidxre, dizareni gan xhini'c caniini, sa'csi najczeni diidx ni di gacdi gabeereni.

*Rusajc Jesús te ben lotiä'p*  
(Mt. 20:29-34; Mr. 10:46-52)

- <sup>35</sup> Cheni sadzujñ Jesús te guejdx ni laa Jericó, sobga' te ben lotiä'p ro' nezyuj, canabni gojn.
- <sup>36</sup> Che biejn diajgni cadejd xhidajl bejn lo nezyujga, gunabdiidx ben lotiä'pga xhini'c cayajc.
- <sup>37</sup> Dxejc räjpreni:  
—Jesús ni siääd Nazare't cadejdni nezga.
- <sup>38</sup> Dxejc guredxa'ni räjpni:  
—¡Jesús, xi'n toDavid, balaslajz narä!
- <sup>39</sup> Rebejn ni nijd lojreni gudil'näjreni ben lotiä'pga te jäu ro'ni, niluxh laani dipru guredxa'ni, räjpni:  
—¡Xi'n toDavid, balaslajz narä!
- <sup>40</sup> Dxejc guzudxi Jesús ro'c, gunibeeni jädnäreni bejnğa lojni. Che bidzujñni lojni, gunabdiidx Jesús lojni, räjpni:  
<sup>41</sup> —¿Xhini'c r'lajzlu gunnää luj?  
Badzu' ben lotiä'pga diidxre, räjpni:  
—Dad, r'lazä jien loä.
- <sup>42</sup> Dxejc räjp Jesús lojni:  
—¡Sujien balojlu! Abiajclu sa'csi huililajzlu.
- <sup>43</sup> Lagajc dxej, biengajc lojni, calä'pni xpala'n Dios, huinajlmi Jesús. Luxh guiraa rebejn ni bahuii xhi guzajcni, gulä'pzareni xpala'n Dios.

## 19

*Huij Jesús rolijz te bejn ni laa Zaqueo*

- <sup>1</sup> Dxejc biu' Jesús guedx Jericó, sadejdzani guejdxga. <sup>2</sup> Ro'c rbäjz te benrapduxh, ni laa Zaqueo, ni rnibee lo reni rusquixx xcuent impuest. <sup>3</sup> R'laz Zaqueo fiini loj Jesús te gumbeeni, per digacdi fiini lojni sa'csi najcni te benxhate', luxh xhidajl bejn siädsaj guideb gabi Jesús. <sup>4</sup> Ni'c baxuñni gunijdni lojreni, huä'pni lo te yajgro ni suga' gajxh nez cadro ted Jesús te si'c sajc fiini loj Jesús. <sup>5</sup> Che gudejd Jesús nejzga, guläsni lojni jiaa, bahuiini cadro sobga' bejnre. Dxejc räjpni lojni:  
—Zaqueo, basquejn biäjt ro'c, lagajc nadxej r'lazä chajia'nä rolijzlu.
- <sup>6</sup> Dxejcti biätguxuñ Zaqueo lo yajgga, rbalazduxhni huinäni Jesús rolijzni. <sup>7</sup> Che bahuii guiraa rebejn xhi gujc, gusloj camojm'reni, direni jiu'lajz, räjpreni:  
—Jesús sajia'n rolijz te benđojl.
- <sup>8</sup> Dxejcti huisulii Zaqueo, räjpni loj Jesús:

—Bahulaare, Dad, gala' xhixtenä gudedä loj reben<sup>9</sup>proob; luxh palga yu' chu loj cua'ä xhixteni con yälrusguee, sudzu'ä lojni tajp huält si'cti ni cua'ä.

<sup>9</sup> Räj Jesú lojni:

—Lagajc nadxej gubica j xtojllu näjza xtoj l reni rbäjz rolizlu, sa'csi guliipac najclu te xagdoo to Abram. <sup>10</sup> Pues Xi'n Dios ni gujc Niguui biädtil rebendoj l te gusaani rebejn ga ni gunjt nen dojl.

### *Xcuent tzuu meel*

<sup>11</sup> La l ni cagucua diajg reni xtidx Jesús, bijzani te cuent ni rului, sa'csi asiäddzuj ngajxh reni gue dx Jerusalén, luxh laareni rujn reni xhigab sisloj guinibee Jesús si'ctisni guidzuj nni guej dx ga. <sup>12</sup> Dxejc räj pni loj reni:

—Guyu' te bejn, benraj pni, huijni te guej dx zijtro te gacni rei i, dxejc guibisacni. <sup>13</sup> Che gajdni guirii, gurej dxni tzuu xmosni, te badeedni lo tebgaj reni te melpla't ni sacdxh, räj pni loj reni: “Colyujn dzuun con meelre che guibisacäli.” Sä'tini. <sup>14</sup> Per reben laj dxni dipacreni guichag lajz bejn ga, ni'c baxha l reni gaii bejn te saye'tzreni: “Di rla jz dinu gacni xreinu.” <sup>15</sup> Luxh empac guj cni rei i, dxejc gubisacni laj dxni. Che bidzuj nni gurej dxni rexmosni ni badeedni meel cua'reni, te gacbeeni lac bejn te jgareni gaan. <sup>16</sup> Ni bidzuj n ganid räj pni loj ni: “Dad, xmeellu bejn gaan stzuu meel.” <sup>17</sup> Dxejc räj p rei i loj ni: “Hueenca, luj najclu te mossa'c, sa'csi laaca bejn lu dzuun lo te dzunbäz, naj sunidxä guinibeelu loj tzuu guej dx.” <sup>18</sup> Bidzuj n stee mos loj ni, räj pni: “Dad, xmeellu bejn gaan gaii meel.” <sup>19</sup> Dxej cti räj pni loj ni: “Luj guinibeelu loj gaii guej dx.” <sup>20</sup> Bidzuj nti stee mos loj ni, räj pni: “Dad, aree xmeellu, gulu chedzu'tzäni nen te baii <sup>21</sup> sa'csi bidxebä guej b lu, sa'csi najc guej b lu te bejn nadiplajz, rutoj p guej b lu cadro di guej b lu nuzuj, luxh rliäs guej b lu cose'ch cadro di guej b lu nibe'c.” <sup>22</sup> Dxej cti räj p rei i loj ni: “iMosguj dx! lagajc ro'lu birii diidx ni gunälu yälgu xhtis. Palga najnlu nacä te bejn nadiplajz, najnlu rutopä cadro dina nusuä, najnlu rliäsä cose'ch cadro dina nibe'cä, <sup>23</sup> xhicutent dilu nisa'n xmelä nen te bancw te che nibi'ä nica'a xmelä nägajc xi'n meelga?” <sup>24</sup> Dxejc räj pni loj reni suga' ro'c: “Colgudzucaj meelga loj ni, colgudeedni loj ni rajp tzuu meel.” <sup>25</sup> Laareni räj pni: “Dad, per laani araj pni tzuu meel.” <sup>26</sup> Dxejc badzu' rei i diidx re loj reni, räj pni: “Ni'cni rniä, reni rajp, sica'ru reni, niluxh reni di ga'p loj reni sibica j guiraa recosbäz ni rajp reni. <sup>27</sup> Luxh xcuent reni rdxe'ch loä, ni di rla jz niacä rei i loj reni, coltanä reni ree, colgugu'treni nez loä.”

### *Che biu' Jesús guedx Jerusalén*

(Mt. 21:1-11; Mr. 11:1-11; Jn. 12:12-19)

<sup>28</sup> Che guluj x guniini guiraa redi dx re, huinuuni xnejz ni, sääni nez lo guej dx Jerusalén. <sup>29</sup> Che asadz ngaj xhni reguej dx ni laa Betfagé näjza Betania, gaj xh lo dajn ni laa Oliib, baxha l ni tio'p rexpejn pacni, <sup>30</sup> räj pni loj reni:

—Colchäj lo guej dx'e' ni suga' lad rec. Che guidzuj ntu, guidxäl tu caduu te bur huin ni gajd bejn cuib. Colguxheeni, coltanäni ree. <sup>31</sup> Palga yu' chu guiniabdi dx loj tu: “xhicutent caguxhectuni?” colye'tz loj ni: “Dad caquiinnini.”

<sup>32</sup> Sä'ti rexpejn pacni nani baxha l ni, bidxäl reni manga sigajctisni räj Jesú. <sup>33</sup> Cheni caguxheereni bure'ga, rexpaxhuanan bure'ga räj loj reni:

—xhicutent caguxhectu bure'ga, ä?

<sup>34</sup> Dxejc badzu'reni diidx re, räj pni:

—Sa'csi caquin Dadni.

<sup>35</sup> Sas huinä reni bure'ga loj Jesús, gudixh reni xhajbreni dejtzni, te gubijb Jesúsni. <sup>36</sup> Guideb cadro gudej d Jesús gudixh reni xhajbreni lo nezyuj cadro tedni. <sup>37</sup> Cheni ameer guidzuj nni bajaad xten dan Oliib, gusloj cabaa lajz guiraa rebejn, rbedxa'li reni calä'preni xpala'n Dios sa'csi bahui reni guiraa remilagwr ni bejn ni. <sup>38</sup> Räj pni:

Chicbaa rei i ni siääd xcuent Xtanu Dios te guinibeeni loonu.

Sucuedxilajz guiraa reni yu' guibaa, chä'p xpala'n Dios xhaguibaali.

<sup>39</sup> Dxejc gaii refarisee ni suga' galäi rebejn, räj pni loj Jesú:

—Mastr, guidixä' lo rebejn ni siäd najllu te na'cru guiniireni si'c.

<sup>40</sup> Dxejc Jesús räj loj reni:

—Rniliä loj tu, palga redee gusa ro'reni, sibe dxä' reguij re.

<sup>41</sup> Che bidzuj nni gaj xh, che bahui ni guedx Jerusalén, biin Jesús xcuent guej dx ga, <sup>42</sup> räj pni: —iMaläi gacbeelu, masque nen redxej re, xhini'c saj c guniidx yälrbedxilajz loj lu! Per naj naga'tzni, luxh digacdi fiilu loj ni. <sup>43</sup> Sidzuj n dxej ga loj lu, cheni j ääd reni rdxe'ch loj lu suj n reni si'c te guralyuj guideb gabilu, nez loj lu sigajc nez dejtzu sisiuj reni. <sup>44</sup> Susäl ta'reni luj lo yuj li. Sugu'treni rebejn ni rbäjz ro'c, luxh nicla gusaan reni cuib te guij yej c sa'ni sa'csi dilu niembee dxej ni biääd Dios biädhui lu.



*Rusia Jesús neñ guidoro**(Mt. 21:12-17; Mr. 11:15-19; Jn. 2:13-22)*

<sup>45</sup> Dxejcti biu' Jesús neñ guidoro, guslojni cabääni rebejn ni caguto' nájza reni casii.

<sup>46</sup> Dxejc rájpmi lojreni:

—Loj rexquijtz Dios caj rediidxre: “Rolizá sajc te yu' cadro jiádnabtu lo Dios”, niluxh la'tu abejntuni si'c te biliää xte gubaan.

<sup>47</sup> Guixe-guixee caguluii Jesús neñ guidoro, luxh reni rnibee loj rebixhojz nájza rebejn ni ruluii leii, nájza rebengool xte guejdxga caguiilreni mood te ju'trenini, <sup>48</sup> luxh direni nidxájl xho niujnrenini sa'csi guiraa rebejn cacuadiagdzu'tzreni xtiidxni.

**20***Xcälrnibee Jesús**(Mt. 21:23-27; Mr. 11:27-33)*

<sup>1</sup> Te dxej suga' Jesús neñ guidoro, caguluiini rebejn, cagusule'zani diidx xcuent xho guibicaj xtojlreni, che bidzujñ reni rnibee loj rebixhojz nájza rebejn ni ruluii leii nájza rebengool, <sup>2</sup> rájpmi lojni:

—¿Xhi yälrnibee rujnlu recosre? ¿Chu baniidx yälrnibeega lojlu?

<sup>3</sup> Dxejcti rájp Jesús lojreni:

—Nará sigajcza gunä te yälgunabdiidx lojtu, colgudzu' diidxre loä, <sup>4</sup> ¿chuni'c baxhal Juan te gutiobnisni rebejn? ¿La Dios o la rebejn, ä?

<sup>5</sup> Niluxh laareni guslojreni canabdiidx lo sa'reni, rájpmi:

—¿Xhichani'c jie'tznu? Palga jie'tznu Dios baxhalni, dxejc naani loonu: “¿Xhixhcuent ditu ninilajz xtiidxni?” <sup>6</sup> Palga jie'tznu: “Rebejn baxhalni”, guiraa rebejn sucuaa guij yejcnu, ju'tlireni nuurnu sa'csi laareni rujnpacreni xhigab gunii Juan xtidx Dios.

<sup>7</sup> Dxejc badzu'reni diidxre, rájpmi:

—Dinu guidon chuni'c baxhal Juan te biädtiobnisni.

<sup>8</sup> Dxejc rájp Jesús lojreni:

—Dizana guiniä xhi yälrnibee rapä te runä recosre.

*Xcuent remosguijdx**(Mt. 21:33-44; Mr. 12:1-11)*

<sup>9</sup> Dxejc gusloj canii Jesús loj rebejn, bijni cuentre lojreni, rájpmi:

—Guyu' te bejn bazuj yaguub lo xyujni. Dxejc badeklaanini lo gaii bejn cháäreni meed, sä'tnini zijt, gucladuxhni ro'c. <sup>10</sup> Che bidzujñ dxej ni guidojp cose'ch, baxhalni te xmosni sanab cose'ch ni riájl xca'ni. Per laareni gudijnreni mosga, xhetliidi badeedreni chanäni lo xpaxhuanu yujga. <sup>11</sup> Dxejcti baxhalni stee mos lojreni. Dxejc sigajcza gudilñajrenini, gudijnrenini, luxh xhetza badeeddiireni lojni, ganaxni gubi'ni lo xlamni. <sup>12</sup> Dxejcti baxhalni ni riojn mos lojreni, per sigajcza gudinduxhrenini, barilaagwrenini.

<sup>13</sup> “Dxejc bejn baxhuaanga xhigab, naani: “¿Xhichani'c gunä? Suxhalä xi'nä ni sanälazä; che fiireni lojni, pet siureni xtiidxni.” <sup>14</sup> Dxejc che bahuü reni go'n-meed lo xi'nni, dxejc rájpmi lo sa'reni: “Laa deeni gac xtenni reyujre. Do'o guigu'tnuni te nuurnu xca'nu yujre gacni xtenu.” <sup>15</sup> Dxejcti barilaagwrenini lo yujga, sas bagu'trenini.

Dxejc gunabdiidx Jesús lojreni, rájpmi:

—¿Xhichani'c gunnä xpaxhuanu yujga reben guiidxre, ä? <sup>16</sup> Sidzujñni, sugu'tni guiraa reni cayujn dzun-meed lo yujga, dxejc sudeedni yujga lo garenca bejn.

Che biejn diajgreni rediidxre, rájpmi:

—¡Na'c gusaan Dios gacni si'c!

<sup>17</sup> Bahuii Jesús lojreni, dxejc rájpmi:

—¿Xhixhni'c caj lo guijtz ni bacuaa redade' ni gunii xtidx Dios galoo? Ro'c cajni:

Guij nani guläcay renani runchee yu',

ni'c agujc guisa'c ni guzuj galoo.

<sup>18</sup> Chutis ni jiajb yejc guijga, sianduxhni, per nani jiajb guijga yejcni siujypacni, li däj gacni.

*Xcuent reimpuet**(Mt. 21:45-46; 22:15-22; Mr. 12:12-17)*

<sup>19</sup> Reni rnibee loj rebixhojz, nájza reni ruluii leii rlaizreni guiniaazreni Jesús lagajc orga, sa'csi gubeerreni lojreni gunii Jesús cuentre, luxh xhet bejndireni sa'csi rdxejbreni rebejn. <sup>20</sup> Dxejc cagula'tztisrenini, baxhalreni gaii bejn te gunsireni si'c ni najcreni bendxan, te gucuadiagjreni xtiidxni don gaxájssi guiga'ni lo te diidx te guteedrenini lo yälguixhtis, yälrnibee xte gubernadoor. <sup>21</sup> Dxejc gunabdiidxreni lojni, rájpmi:

—Dad, Mastr, nadonnu laaca rniü guejblu, laaca ruluii guejblu, luxh di guejblu fixgaa la yu' chu najc bejn, ruluiisa'c guejblu xnez lo Dios. <sup>22</sup> Gunilaa loonu, ¿la laaca guidiixnu reimpuet loj xcubieer César o la xhet laadini, ä?

<sup>23</sup> Sas guchbegajc Jesús cayujnsireni yälgunabdiidxga, dxejc räjpni lojreni:

—¿Xhicuent runnäjtu narä scree? <sup>24</sup> Baluui loä te xmeeltu. ¿Chucha yejc caj lojni, chucha laj caj lojni?

Dxejc räjpreni:

—Xten César.

<sup>25</sup> Dxejc räjpni lojreni:

—Cołdeed lo César nani najc xten César; cołdeedza lo Dios nani najc xten Dios.

<sup>26</sup> Luxh direni niujn gaan niga'ni loj nicla te diidx ni guniini nez loj rebejn. Rdxelojtisreni lo rextiidxni, biäuti ro'reni, guzudxireni.

*Rniabdiidxreni xcuent yälrbansac lo rebengut*

(Mt. 22:23-33; Mr. 12:18-27)

<sup>27</sup> Dxejc huij gaii resaduceos huihuiireni loj Jesús. Di resaduceos chalilajz rbansac bejn lo rebengut. Ni'cni gunabdiidxreni loj Jesús, <sup>28</sup> räjpreni:

—Dad, Mastr, basa'n Moisés guijt loonu, lojga caj: “Palga guet te bejn, gusaanni chäälni ruti xi'nni, nanabpac xca' bejtzni gunaaga te chu xi'nni con laani xcuent tobejtzni.” <sup>29</sup> Guyu' gajdz niguii, bejtz najczeni. Sas cua' niguigalooga chäälni. Che gujtni ruti xi'nni. <sup>30</sup> Dxejcti cua' ni rojpga gunaaga. Che gujtni, rutiza xi'nni. <sup>31</sup> Sigajcza guzajc ni riojnga. Si'cza guläsnäj gunaaga guigajdzreni. Guiraareni gujt, nicla tejreni di xi'nreni niu'. <sup>32</sup> Dxejcti näj gunaaga gujt. <sup>33</sup> Guigajdzreni guläsnäjreni gunaare, ni'cni, che guibansacreni lo rebengut, ¿chu chäälgacni, ä?

<sup>34</sup> Dxejc räjp Jesús lojreni:

—Lo guedxliujre ruchnaa rebejn, rudeedzaren i xindxa'preni ruchnaa. <sup>35</sup> Niluxh rebejn ni agule Dios te chääreni xhaguibaa, näjza te guibansacreni loj rebengut, di reni'c guchnaa, dizareni gudeed xindxa'preni guchnaa, <sup>36</sup> sa'csi diru gac guetreni, najczeni si'c najc rexangl Dios. Laareni najc xi'n Dios sa'csi abaspansac Diosreni. <sup>37</sup> Moisésli basule' xcuent ni rbansac reben loj rebengut che bacuaani diidx xcuent yajg ni gurebajl. Ro'c gurejdxni Dios räjpni: “Xtios Abram, Xtios Isaac, näjza Xtios Jacob”, ni'cni nabajnpacreni lo Dios. <sup>38</sup> Sa'csi di Dios gac Xtios rebengut; najcni Xtios rebejn ni nabajnpac par teppas, sa'csi par laani guiraa rebejn nabajnpac.

<sup>39</sup> Dxejc gaii reni ruluii leii badzu'reni diidxre, räjpreni lojni:

—Mastr, laaca guniilu.

<sup>40</sup> Sa'csi diruren i niajx niniabdiidxruren i lojni.

*Chu xi'n najc Crist*

(Mt. 22:41-46; Mr. 12:35-37)

<sup>41</sup> Dxejcti räjp Jesús lojreni:

—¿Xho mood rniireni Crist najc xi'n toDavid, ä? <sup>42</sup> Ni lagajc toDavid bacuaa lo reguijtz ni laa reSalmo:

Dad Dios räjp lo Xtadä:

<sup>43</sup> “Gurej xladbeä cheni guidzujnli dxej ni gudzugä guiraa ni rdxech lojlu te gacheereni luj rnibeelu guira'ti.”

<sup>44</sup> ¿Xho mood gacni xi'nni palga rni i toDavid lojni “Dad”?

*Rucuaquij Jesús reni ruluii leii*

(Mt. 23:1-36; Mr. 12:38-40; Lc. 11:37-54)

<sup>45</sup> Guiraa rebejn cagucuaadiajg che räjp Jesús loj rexpejnpacni:

<sup>46</sup> —Colyajp cuidaad reni ruluii leii, sa'csi rdxagljazreni rajcwreni lajd siool, rljazreni saru guini i guiraa rebejn “xchan” lojreni, rljazreni jiu bejnreni nez loguii, rljazreni cuereni lo reyagxhilsa'c nen reguidobáz, näjza cadre rajc lanij. <sup>47</sup> Rudzucajzaren i rexhixten regunabiuud, dxejc rojreni rele' siolduxh che rniabreni lo Dios te fii rebejn, te naa bejn najczeni bendxan, luxh lojreni suxhal Dios te castigwroru.

## 21

*Gojn xten te gunabiuud*

(Mr. 12:41-44)

<sup>1</sup> Nen guidoro bahuii Jesús cagusäl rebenrajp gojn nen te guijn cadre rdojp gojn.

<sup>2</sup> Bahuiizani lo te gunabiuud, lacti proobni. Basälni xcojnni nen guijnga, tio'ptis melbáz basälni. <sup>3</sup> Dxejc räjp Jesús:

—Rniliäpac lojtu, gunabiuud proobga basälruni loj guiraa reni casäl gojn, <sup>4</sup> sa'csi guiraa reded ni cagusäl xcojnni casälreni tudxe'nsi xmeelreni, niluxh gunaare loj xcälproobni, basälni guiragajc ni rajpni te jio' xhi gauni.

*Räjp Jesús sibijl guidoro**(Mt. 24:1-2; Mr. 13:1-2)*<sup>5</sup> Yu' reni cayujy diidx xcuent guidoro, räjpreni:

—Lacti sacruduxh rieni sa'csi guisa'c naccheeni, suchenäjzani xhidajl recossa'c ni badeed bejn si'c gojn.

Dxejc gunii Jesús lojreni, räjpni:

<sup>6</sup> —Sidzujn dxej sibijl guiralli ni cahuiitu, nicla tej guij di jia'n yejc sa'ni, guiragajcni sibijl.*Reseen ni chu che nitloj guedxliuj**(Mt. 24:3-28; Mr. 13:3-23)*<sup>7</sup> Dxejc gunabdiidx rexpejn pacni lojni, räjpreni:

—Dad, Mastr, ¿guc gacni? ¿Xhi seen chu che gac recosga?

<sup>8</sup> Räjp Jesús lojreni:—¡Colsusin te na'c gusgueereni la'tu! Sa'csi xhidajl reni jiaäd sinii: “Narä nacä Crist”, o “Asiädgajxh redxej che jiaädni”, per na'c chalilajztu xtiidxreni, na'cza chanajltureni. <sup>9</sup> Luxh che jiejn diajgtu cayajc guer cadilnäj sa' bejn, na'c guidxejbtu, sa'csi ganid recosga gac, luxh gad galđi nitloj guedxliuj.<sup>10</sup> Dxejc sanuu cayajpni lojreni:—Säjs te nación, sucuanäj stee nación, näjza te ladx bejn sucuanäj stee lajdx bejn. <sup>11</sup> Sajcza xuro, su' gubijn, su'za yälguijdx nez ree nez rec. Luxh xhaguibaali sien guiraloj ni ruchejb näjza seenro.<sup>12</sup> Luxh ganid gac recosre, siniaazreni la'tu, sirinajlreni la'tu, suteedreni la'tu trabajw. Suteedreni la'tu lo reben guidobäz, susälzarenı la'tu neñ latzguib, sinäzarenı la'tu nez loj rei näjza gubernador sa'csi rinälajztu xtidxä. <sup>13</sup> Luxh guiraa dee sajctu te gac gusule'tu xtidxä lojreni. <sup>14</sup> Na'c gunxgaatu xhigab neñ lastootu xhini'c guiniitu lojreni, <sup>15</sup> sa'csi narä sunidxä diidx guiniitu, sunidxäza yälnajn lojtu te digac gudzu'reni diidx lojtu niclaza gacđi guiniyajreni xtiidxtu. <sup>16</sup> Näjza rex cuzajntu sibire lojtu, suto'reni la'tu, sigajza rebejtztu, resa'tu, rexamiigwtu, luxh yu'tu sugu'treni. <sup>17</sup> Guiraa rebejn guedxliuj sibälaz la'tu sa'csi rinälajztu xtidxä. <sup>18</sup> Niluxh ni'cla tej xquidxejctı di nitloj. <sup>19</sup> Luxh palga sutijptis lajztu, sajptu yäl nabajn par tejpas.<sup>20</sup> Che fiitu tre' xhidajl soldaad guideb gabi guedx Jerusalen colyacbee abidzujn dxej ni guibijlni. <sup>21</sup> Dxejc reni yu' guedx Judea, nanab guxunreni chacuatzlojreni neñ redajn; reni yu' guedx Jerusalén, nanab jiunejzreni ro'c; reni suga' lo niaa, na'c guibi'reni lo guejdxga, <sup>22</sup> sa'csi neñ redxejga sujn Dios fis lo guejdxga te soob rediidx ni caj lo reguijtz xten Dios. <sup>23</sup> Probe'za regunaa ni nuu báz neñ redxejga, näjza regunaa ni ca' báz, sa'csi su' yälhuinduxh lo guedxliuj, näjza fis ni gun Dios loj rebejnğa. <sup>24</sup> Yu'reni guet lo guer, yu'zarenı chää pres, sijreni balti guedxzijt. Dxejc rebenzıjt sinıbee guedx Jerusalén che guiza'li redxej ni gusaan Dios guinıbee rebejn ni di gac xpejn Israel.*Cheni jiaäd Xi'n Niguii**(Mt. 24:29-35, 42-44; Mr. 13:24-37)*<sup>25</sup> Räjpzani:—Dxejc su' seen lo gubijdx näjza lo bäii, näjza loj rebajle' ni yu' xhaguibaa. Luxh lo renacion guedxliuj su' rebejn yärsia', di jien xhi gunreni, sidxebduxhreni sa'csi siejn diajgreni chubeduxh lo nisdoo, säsduxh nis ni räjs lo nisdoo. <sup>26</sup> Sitiol rebejn xcuent yälrdxebduxh che gunreni xhigab xhicharuni'c gac lo guedxliuj, sa'csi näj guideb guibaa sinıbsejs. <sup>27</sup> Dxejtı suhuiireni lo Xi'n Dios ni guj Niguii, siäädni lo te za guideb xcälrnıbeeni, näjza yälrdımbıchaduxh. <sup>28</sup> Che guisloj gac recosre, colsutijp lajztu, colguiliäs yejctı, colguibajz sa'csi asadzujn dxej gusilajztu.<sup>29</sup> Guniizani stee cuent lojreni, räjpni:—¡Colhuii lo yagiıgw näjza lo guiraa reyajg! <sup>30</sup> Che fiitu acabääni be'n, colyacbee lagajc la'tu, abidzıngajxh bäii nısguij. <sup>31</sup> Sigajcza che fiitu agusloj cayajc recosre, colyacbee asiädzujn xcälrnıbee Dios.<sup>32</sup> Rniliäpac lojtu, guiraa recosre sajz ansde guet rebejn ni yu' naj. <sup>33</sup> Guibaa näjza guedxliuj sinıtloj, rextıdxä dıni nitloj.<sup>34</sup> ¡Colsusin lagajc la'tu! Na'c gusaantu cha lajztu yälrausa'c, yälrä', yälga'ptu xhıxtentı, dxejđ dıtu gacbee che bidzujn dxejga. <sup>35</sup> Sa'csi si'c sidzujn dxejga loj guiraa reben guedxliuj. <sup>36</sup> Colsusin, colbejdx, colguiniabtıs lo Dios, te gac laatu lo guira'ti ni gac, gacza suutu nez loj Xi'n Dios ni guj Niguii.<sup>37</sup> Rdxee rului Jesús neñ guidoro dxej guxhijn sajia'nıni yejc dan Oliib. <sup>38</sup> Rsilru ristie rebejn te rdzujnreni lo Jesús neñ guidoro casob rsil, te gucuadiajgreni rextıdxni.

## 22

*Ria'nreni diidx xho guiniaazreni Jesús**(Mt. 26:1-5, 14-16; Mr. 14:1-2, 10-11; Jn. 11:45-53)*

<sup>1</sup> Siäddzūngajxh dxe lanij che rajwreni yätxtiil ni di säguij, laaza lanijga pascw. <sup>2</sup> Dxejc reni rnibee loj rebixhojz näjza rebejn ni ruluui leii caguilreni xho gunreni te ju'treni Jesús, sa'csi rdxejbreni rebeņguedx.

<sup>3</sup> Dxejc biu' bendxab lastoo Judas ni laaza Iscariote, ni najc tej retzubitio'p xpejn'pacni. <sup>4</sup> Dee huininäjni dade' ni rnibee loj rebixhojz näjza loj reni rnibee rexcuxhtis guidoo. Guninäj Judasreni xho gunni te guteedni Jesús ladzñaareni. <sup>5</sup> Dxejc bibalajzreni, bia'nreni diidx gudeedreni meel lojni. <sup>6</sup> Cuäjbtı Judas, dxejcnı guslojni caguilni xho gunni guteedni Jesús ladzñaareni che rut bejndi suga'.

*Xchej xten Dad Jesús**(Mt. 26:17-29; Mr. 14:12-25; Jn. 13:21-30; 1Co. 11:23-26)*

<sup>7</sup> Bidzujn dxe lanij che rajwreni yätxtiil ni di säguij, che rugu'tzarenı te xiil si'c ni caj lo xleii toMoisés. <sup>8</sup> Dxejc baxhal Jesús Pedr näjza Juan, räjpni lojreni:

—Colchayejn xchej xten pascw te guidaununi.

<sup>9</sup> Dxejc laareni gunabdiidxreni lojni, räjpreni:

—¿Caro rıajzlu choyennuni?

<sup>10</sup> Räjp Jesús lojreni:

—Cheni jiu'tu lo guejdx, sidxaagtu te dade' ni nuu te re' nis. Colchanajni, coljiu' rolijz bejn cadro jiu'ni laani. <sup>11</sup> Dxejc colye'tz lo bejn ni najc rolijznı ro'c: "Si'c naj Dad Mastr: ¿Con yu' cadro sajc gauxchenää rexpənä naj pascw?" <sup>12</sup> Dxejc guluini lojtu te yu' ni sojb jiaa yejc stee yu'. Asuchexгаа yu'ga. Ro'c colyejn xhi guidaunu.

<sup>13</sup> Sä'tireni. Si'ctis ni räjp Jesús lojreni, si'cpac bidxälreni. Dxejc bejnreni xchej xte lanij pascw gaureni.

<sup>14</sup> Che bidzujn or, gurenäj Jesús rexpejn'pacni lo mex. <sup>15</sup> Dxejc räjpni lojreni:

—Guyuduxhä gaan gaunääpactu xchej xten pascw ansde tedä trabajwduxh. <sup>16</sup> Sa'csi rniä lojtu, diruna gaunää la'tu pascw cheni guidzujnli dxej ni gacni lo xcälrnıbee Dios.

<sup>17</sup> Dxejc cua'ni te co'p, badeedni xquixtios lo Dios, räjpni:

—Colyä' dee, colgudeedni lo sa'tu. <sup>18</sup> Sa'csi rniä lojtu, diruna yä'ä nis ni rii yejc uub stehuält cheni guidzujnli xcälrnıbee Dios.

<sup>19</sup> Dxejcti cua'ni yätxtiil, badeedni xquixtios loj Dios, gula'nini, gudisnini lojreni, räjpni:

—Dee najc si'c tiexhä ni gudedä ju'treni xcuenttu. Colyejn screeza te guinalajztu narä.

<sup>20</sup> Si'cza bennäjni co'p che gulujx gudajwreni, räjpni lojreni:

—Ni yu' neņ co'p najc si'c xtienä ni guixe' che ju'treni narä xcuenttu te si'c jiu' didxcoob ni jia'n Dios con rebejn ni aguleni.

<sup>21</sup> Per bahulaare, bejn ni guto' narä sobganäj narä lo mexre. <sup>22</sup> Guliipacni, Xi'n Dios ni gujc Niguii sinuu tedni loj nezuyj ni abaluuı Dios lojni. Luxh proobza bejn ni guto' narä.

<sup>23</sup> Dxejc gusloj canabdiidxreni lo sa'reni, ¿chuchani'c gunni?

*Cayejyreni chuni'c najc beņroru*

<sup>24</sup> Sas gusloj cayejyreni, don chuni'c guıbee gac beņro lojreni.

<sup>25</sup> Dxejcti räjp Jesús lojreni:

—Reıeiı ni rnıbee lajdx bejn ni digac xpejn Israel, rnıbeerenı lojrenı astoo xtenpacrenı najc reguejdxga. Luxh rebeņguejdxga rniı lacti hueen najc reıeiıga. <sup>26</sup> Per la'tu na'c gactu si'c. Nani najc bengoolru lojtu, ni'c riäjł gacni si'c najc ni huınru lojtu. Luxh nani rnıbee riäjł gacni si'c mos. <sup>27</sup> ¿Chuni'c sajcrı lo bejn? ¿La bejn ni rbej lo mex te gauni o la ni ruteed xhi gaureni lo mex? ¿La xhet sajcdıru bejn ni sojb lo mex, ä? Niluxh narä yu'ä lojtu si'c ni ruteed xhi gauni.

<sup>28</sup> La'tu najctu ni gusunäj narä guideb ni gudedä retrabajw ni gudedä. <sup>29</sup> Ni'cni narä runıdxä yälrnıbee lojtu sigajc ni baniıdx xıad yälrnıbee loä, <sup>30</sup> te gautu, yätu lo xmexä xhaguıbaa, te cuzatu lo yagxhıl cadro guntu yälguxhtis loj rexpejn guitzubitio'p rexagdoı Israel.

*Räpıxaa Jesús di Pedr guicäjı numbeeni**(Mt. 26:31-35; Mr. 14:27-31; Jn. 13:36-38)*

<sup>31</sup> Räjp Jesús loj Simón:

—Simón, Simón, agunab beņdxab ni laa Satanás luj te gusniıbni luj si'c rusniıb bejn xob te jiani. <sup>32</sup> Narä agunabä lo Dios xcuenttu te na'c jiäädx xcälrlıılajzlu. Luxh luj che gusıejch lajzlu, guıbi'lu, bastıoob lastoo resa'lu.

<sup>33</sup> Räjp Simón lojni:

—Dad, narä sirinalälu; mase gusaureni luj latzguiib, näjza narä siäunäälü; mase ju'treni luj, näjza narä setnäälü.

<sup>34</sup> Dxejcti räjp Jesús loj Simón:

—Pedr, rniä lojlu, nicla gajd guidgaii cuedxa' nadxej niluxh luj alaräjplu choñli huält, dipaclu gumbee narä.

*Nanab soob rediidx ni bacuaareni xcuent Jesús*

<sup>35</sup> Dxejc gunabdiidx Jesús lojreni räjpni:

—Che ganaxtu baxhañä la'tu, xhet bolsdi sanätu, nicla carterdi, niclaza stee gura'chdi, ¿la yu' xhi biquiintu, xhi biäädx lojtu, ä?

Dxejc räjpreni:

—Xheti.

<sup>36</sup> Dxejc räjpni lojreni:

—Luxh naj rniä lojtu, ni rajp bols, suchanänini; sigajcza carter. Luxh ni di ga'p espaad, guto'ni xchamarni te siini tejni. <sup>37</sup> Sa'csi rniä lojtu, sisiojb rediidx ni caj lo reqüijt Dios xcuentä, cadro caj: “Bigabnäjni reben latsiaj.” Guiraa ni caj lo regüijt xten Dios xcuentä nanab soobpacni.

<sup>38</sup> Dxejc räjpreni lojni:

—Dad, aree tio'p espaad.

Dxejc räjpni lojreni:

—Sajl reni'c.

*Rbedx-rniab Jesús loj Dios*

(Mt. 26:36-46; Mr. 14:32-42)

<sup>39</sup> Dxejcti birii Jesús, si'cni rujnpacni, sääni nez dajn ni laa Oliib. Dxejc sanajl rexpejnpacni. <sup>40</sup> Che bidzujñreni ro'c, räjpni lojreni:

—Colcuedx, colnab lo Dios te na'c jiajbtu lo dojl.

<sup>41</sup> Dxejc gubicaj Jesús lojreni, huijni te lajt zite' cadro suga'reni, si'cti cadro rdzujñ te gui che rucuaanini. Ro'c bazuxhijbni, gurejdx-gunabni lo Dios, <sup>42</sup> räjpni:

—Xtadä, palga rlajzlu, baslaa narä loj trabajwduxhre. Niluxh na'c gacni si'c ni rlazä narä. Bejn si'cni rlajzlu gunlu.

<sup>43</sup> Dxejc biricaj te xangl Dios lojni te badeedni yälrutiplajzni. <sup>44</sup> Lañi cadejdni trabajwduxh, cayac-huinduxh lajzni, cabedx-canabrui lo Dios. Guzunislini gusloj catejb lo yuj biniduxh si'c rejñ lojni.

<sup>45</sup> Cheni huisuni, gulujx gurejdx-gunabni lo Dios, huijni cadro suga' rexpejnpacni. Ro'c bidxälnireni nagayejs guiraareni sa'csi cayac-huin lajzreni. <sup>46</sup> Dxejc räjpni lojreni:

—¿Xhicuent nagayejstu? ¡Colchastie! ¡Colnab lo Dios te na'c jiajbtu lo dojl!

*Che gunaazreni Jesús*

(Mt. 26:47-56; Mr. 14:43-50; Jn. 18:2-11)

<sup>47</sup> Lañ ni canii Jesús lojreni, bidzujñ xhidajl bejn. Tej rexpejnpacni ni laa Judas, nijdni nez loj rebejnga. Dxejcti gubigni loj Jesús, te bachagro'ni loj Jesús. <sup>48</sup> Dxejc räjp Jesús lojni:

—Judas, ¿la con te yäl'ruchagro' ruteedlu Xi'n Dios ni gujc Niguii ladznaa rebejñre, ä?

<sup>49</sup> Che bahuii reni suganäj Jesús xhini'c cayajc ro'c, gunabdiidxreni loj Jesús, räjpreni:

—Dad, ¿la sixa'tnu yejcreni con spaad, ä?

<sup>50</sup> Sas tej rexpejñ Jesús gudilñäj te mos xten ni rnibee loj rebixhojz, batiu'ni diajgni ladbee. <sup>51</sup> Dxejc räjp Jesús lojreni:

—¡Agujc! ¡Colgusaanreni!

Dxejc gudajn Jesús diajg mosga, basiajcnini. <sup>52</sup> Gunigajc Jesús loj reni rnibee loj rebixhojz näjza reni najc guixhajn xten guidoo näjza reben'gool, guiraa reni siädxiiini, räjpni:

—¿La siädñätu spaad näjza garo't, astoocanu siädxiitu te gubaan, ä? <sup>53</sup> Cheni suga'a lojtu guixe-guixee neñ guidoo, ditu nuhuañ narä. Per dee najc xortu, luxh arnibee yälñacäjy la'tu.

*Di Pedr guicäjñ numbeeni Jesús*

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

<sup>54</sup> Dxejcti gunaazreni Jesús huinärenini roliz bixhojz ni rnibee lo guiraa rebixhojz. Siädñäj Pedrni zit-zijt. <sup>55</sup> Che bidzujñreni gule'creni guiboo galäi lole' xten bixhojzga, gurejreni guideb gabi, te bidxa' lajzreni. Näj Pedr nadxaag lojreni gurej ro'c. <sup>56</sup> Dxejc te gunaa ni rujñ dzuun ro'c, che bahuiini sobga' Pedr ro'c, rdxelojtisni lojni, räjpni:

—Näj niguiire gyunäj Jesús.

<sup>57</sup> Dxejc basuni' Pedr räjpni:

—Nan, dina gumbeäni.

<sup>58</sup> Che gojl stera't, che bahuii stee bejn lojni, räjpni lojni:

—Näj luj najclu te rexpejñni.

Per Pedr räjp lojni:

—Gurniälojlu, Dad, dina gacä xpejnni.

<sup>59</sup> Che gudejd si'cti teb or, räjp stee bejn lojni:

—Gullipacni, näj bejnre guyunäjni, sa'csi laani najczani te bejn Galilee.

<sup>60</sup> Dxejc räjp Pedr lojni:

—Gurniälojlu Dad, dipacna ganä xhini'c caniilu loä.

Lałni canii Pedr rediidxre, guredxa' te guidgai, <sup>61</sup> luxh gubiréza Jesús, bahuidzu'tzni lo Pedr, dxejc banalajz Pedr nani gunii Jesús lojni, räjpni: “Che gajd guidgaii cuedxa', abazuni'lu choñ huält, räjplu dilu gumbee najrä.” <sup>62</sup> Dxejcti guc-huin lajz Pedr, biriini ro'c, ronduxhni.

*Rniyajreni Jesús*

(Mt. 26:67-68; Mr. 14:65)

<sup>63</sup> Rebejn ni canäj Jesús, gusloj caguxhisnäreneni, caguinjzareneni. <sup>64</sup> Dxejc basäuren lojni, gudajpreni lojni, räjpreni lojni:

—¡Gunii chuni'c gudijnlu!

<sup>65</sup> Luxh guiraloj cayäjbreni lojni, caniyaduxhreneni.

*Bidzunäjreni Jesús nez loj rebixhojz*

(Mt. 26:59-66; Mr. 14:55-64; Jn. 18:19-24)

<sup>66</sup> Che bara yääl, bidojp rebeñgool ni rnibee, näjza reni rnibee loj rebixhojz, näjza rebejn ni ruluii leii, huinäreni Jesús te suuni nez lojreni nen yu' cadro rujnreni yälguhxhtis. Dxejcti räjpreni lojni:

<sup>67</sup> —Palga luj najclu Crist, bicäjpni loonu.

Dxejc badzu' Jesús diidxre lojreni, räjpni:

—Palga guicäpäni, ditu chalilajz. <sup>68</sup> Luxh palga gunä te yälgunabdiidx lojtu xcuent Crist, ditu gudzu' diidxga loä. <sup>69</sup> Per najli sibej Xi'n Dios ni gujc Niguii xladbee Gueb Dios ni yu' xhaguibaa.

<sup>70</sup> Dxejc gunabdiidx guiraareni lojni, räjpreni:

—Mbaj pues, ¿la luj najclu Xi'n Dios, ä?

Dxejc badzu' Jesús diidxre lojreni räjpni:

—Nacäni, si'cni najtu la'tu.

<sup>71</sup> Dxejc räjpreni lo sa'reni:

—¿Xhirucxhamaaz rlanjtu? Dirunu guiquiin diidx guinii bejn, sa'csi lagajc nuurnu abiejn diajgnu diidx ni guiniini lagajc laani.

## 23

*Jesús nez loj Pila't*

(Mt. 27:1-2, 11-14; Mr. 15:1-5; Jn. 18:28-38)

<sup>1</sup> Dxejc huisu guiraareni, huinäreni Jesús nez loj Pila't. <sup>2</sup> Ro'c guslojreni cabe'reni xquejni, räjpreni:

—Bidxälnu bejnre cayujnni biejy lo rexpeljnu. Räjpzani xhet nanabdi quixnu impuest lo reii César. Caniizani laani najcni Crist, nalajznu najczani reii.

<sup>3</sup> Dxejc gunabdiidx Pila't lojni, räjpni:

—¿La luj ni najc reii xten rexpejn Israel, ä?

Sas badzu' Jesús diidxre räjpni:

—Najcni lagajc si'c ni guniilu.

<sup>4</sup> Dxejc räjp Pila't loj reni rnibee loj rebixhojz näjza loj guiraa rebejn:

—Dina guidxälä nicla tej dojl xten bejnre.

<sup>5</sup> Niluxh laareni sanuutis caniireni, dipru caniireni, räjpreni:

—Guiraa rebeñ Judea cayu' yärsia' xcuent xcäl'ruluiini. Guslojni guedx Galilee, luxh reeli sanu caguluiinini.

*Jesús nez loj Herodes*

<sup>6</sup> Che biejn diajg Pila't rediidxre, gunabdiidxni: “¿La Galilee siääd bejnga?” <sup>7</sup> Cheni räjpreni ro'c siäädni, baxhałnini loj Herodes ni najc gubernadoor xten Galilee, sa'csi nen redxejga yu' Herodes guedx Jerusalén. <sup>8</sup> Che bahuii Herodes loj Jesús, bibalajzni sa'csi agujc xchej rlanjni fini lojni, sa'csi abiejn diagni diidx xcuent ni cayujnni. Luxh rlanjni fini gunni te milaagwr. <sup>9</sup> Xhidajl yälgunabdiidx bejn Herodes, luxh xhet guniidi Jesús. <sup>10</sup> Ro'c suga'za reni rnibee loj rebixhojz näjza rebejn ni ruluii leii, cabecduxhurenini xquejni. <sup>11</sup> Dxejc gulälaz Herodes näj rexsoldaadni Jesús, baxhiznäjprenini, ni'c bashuajcwrenini te ladsa'c sa' ni rajcw reii, dxejcti baxhałsacrenini loj Pila't. <sup>12</sup> Lagajc dxejga, Pila't näjza Herodes gujcreni amiigw, luxh galoo bidxe'ch lo sa'reni.

*Gunibeereni guet Jesús**(Mt. 27:15-26; Mr. 15:6-15; Jn. 18:39-19:16)*

<sup>13</sup> Dxejc gurejdx Pila't reni rnibee loj bixhojz, nájza rebengool ni najc guxhtis, nájza rebenguejdx. <sup>14</sup> Dxejc rájpmi lojreni:

—La'tu biädnätu bejnre loä, najtu caguquĩni rebejn gunreni bieje, luxh narä agunabdi-dixä guiraloj lojni nez lojtu, luxh abahũitu dina nidxälä nicla tej dojl ni cagucuaquijtuni. <sup>15</sup> Niclaza Herodes di nidxälä nicla tej dojl, ni'cni baxhalšacnini loonu, luxh abahũitu xhet dojldi bejnmi te guetni. <sup>16</sup> Ni'cni quinäni, dxjecti guslaäni.

<sup>17</sup> Najc costumbr ruslaa Pila't te bejn ni yu' neñ latzguuib casob rajc lanijre. <sup>18</sup> Per guiraareni guredxa'reni si'c tejsi bejn, rájpmi:

—¡Bagu't bejnre, baslaa Barrabás!

<sup>19</sup> Barrabás najc ni basäl'reni latzguuib sa'csi batojpmi te cuaa bejn ni bacuanäj resoldaad xten Rom, nájza sa'csi yu' chu bagu'tni. <sup>20</sup> Rlajzpac Pila't guslaani Jesús, ni'c gunisacni lojreni, <sup>21</sup> niluxh rebejn dipru guredxa'reni, rájpmi:

—¡Bacuaani lo cruju, bacuaani lo cruju!

<sup>22</sup> Riojn gunisac Pila't lojreni, rájpmi:

—¿Xhi doļduxh bejnmi? Xhetlidi dojl rdxälä bejnmi te guetni. Ni'cni siguinäni dxejc suslaäni.

<sup>23</sup> Luxh laareni sanuutis guredxa'reni, gunabreni xcaini lo cruju. Luxh sa'csi guredxa'tisreni, bejntireni gaan gujc si'c ni rlaizreni. <sup>24</sup> Dxejc cuäjb Pila't gunibeeni gac si'c ni gunabreni. <sup>25</sup> Dxejc baslaani bejn ni yu' latzguuib sa'csi bejnmi bieje, bagu'tzani bejn, dxejc badeedni Jesús lojreni te gunnäjreni si'ctis ni rlaizreni.

*Che cuaj Jesús lo cruju**(Mt. 27:32-44; Mr. 15:21-32; Jn. 19:17-27)*

<sup>26</sup> Cheni sanäreni Jesús xcaini lo cruju, gunaazreni te bejn ni laa Simón ni siääd guedx Cirene; basaj bejnga lo niaa. Dxejc basguurenini cruju, siädnajltini dejt Jesús.

<sup>27</sup> Siädnajlza xhidalduxh bejn, nájza xhidajl gunaa ni cayonduxh, cabedxa'reni sa'csi cayac-huinduxh laizreni xcuent Jesús. <sup>28</sup> Dxejc gubiré Jesús, rájpmi lojreni:

—Gunaa Jerusalén, na'c roontu xcuentä, colyoon lagajc xcuenttu nájza xcuent rexi'ntu. <sup>29</sup> Sa'csi sidzujn dxej gäbreni: “Chicbaa regunaa ni di gacdi chu xi'ni, chicbaaza reni di nuxi'n, renani di nusiä' báz.” <sup>30</sup> Dxejc guisloj rebejn gäb loj redajn: “Coljiajb yejcnu”, säjzarenini loj relom: “Colgucua'tz nuurnu.” <sup>31</sup> Palga scree runnäjreni narä ni nacä si'c te yagnaga, aticaxh gunnäjreni la'tu ni najc si'c te yagbijdz.

<sup>32</sup> Sanäzarenini tio'p bejnguidx xcajzarenini loj recruju, guetni Jesús. <sup>33</sup> Che bidzujnreni te lajt ni laa Calabeer, ro'c bacuaareni Jesús lo te cruju, bacuaazarenini guiro'p rebenguidxga lo stio'p cruju, tejni xladbee, steeni xladbäjgwni. <sup>34</sup> Cheni cagucuaa rebejn reni lo cruju, gunii Jesús, rájpmi:

—Xtadä, badzucaj xtojł rebejnre, sa'csi direni gan xhini'c cayujnreni.

Dxejc gudzujt resoldaad daad yejc xhajbni, te gudisreni xhajbni cuarenini. <sup>35</sup> Suga' rebejn ro'c cadxelojtisreni. Nájza reguxhtis caguxhisnäjreni laani, cayäjpreni:

—Balti bejn baslaani, naj suguslaani lagajc laani palga guliini laani najcni Crist ni gule Dios.

<sup>36</sup> Nájza resoldaad caguxhisnäjni, gubigreni lojni te badeedreni bin-nii yäni. <sup>37</sup> Dxejc rájpmi lojni:

—Palga gulli najclu reii xten rexpejn Israel, baslaa lagajc luj.

<sup>38</sup> Luxh bacuaareni gaii diidx loj te baräjd ni cuaj yejc cruju. Con didx griegw, con didx latin, nájza didx hebreo, bacuaareni scree: “Dee najc Reii xten rexpen Israel.”

<sup>39</sup> Te rebejn gujdx ni najl lo te cruju ni caj cuä'ni caniyajni Jesús, rájpmi lojni:

—Palga luj najclu Crist, baslaa lagajc luj nägajcza nuurnu.

<sup>40</sup> Per benguidx ni najl lo cruju stelaadga gudidxa'ni loj stee bejnguidx ni caniyaj Crist, rájpmi:

—¿La dilu guidxejb Dios? ¡Ni cayajczalu tejsi castiigw! <sup>41</sup> Per nuurnu cayajcnu castiigw ni riäjł gacnu te guidixnu redojl ni biennu. Luxh laani xhet dojldi bejnmi.

<sup>42</sup> Dxejc rájpmi loj Jesús:

—Bazalajzlu narä che guidzujnlu lo xcäl'rnibeelu.

<sup>43</sup> Dxejc badzu' Jesús diidxre, rájpmi lojni:

—Rniliäpac lojlu, lagajc nadxej chunäjlu narä xhaguibaa.

*Che gujt Jesús**(Mt. 27:45-56; Mr. 15:33-41; Jn. 19:28-30)*

<sup>44</sup> Agojl si'cti läidxej. Dxejc bicäy guideb guedxliuj, si'c bianxcäy si'cti rcachon̄ti. <sup>45</sup> Bicäy lo gubijdx, luxh ladró ni najl neñ yudxanro xten guidoro, biräjsni gucni tio'p la'. <sup>46</sup> Dxejcti guredxa' Jesús, räjpni:

—Xtadä, ladzñaalu rutedä xaimä.

Che guniini si'c, gujttini.

<sup>47</sup> Che bahuii capitán ni rnibee loj resoldaad guiraa ni guzajc, gulä'pni xpala'n Dios, räjpni: —Guliipacni, xhet dojl̄di bejn bejnre.

<sup>48</sup> Guiraa rebejn ni suga' ro'c ni bahuii guiraa ni guzajc ro'c, gubi'reni rolizreni, cayääreni lagajc lastooreni. <sup>49</sup> Luxh guiraa reni rumbee Jesús, näjza regunaa ni biädnajl̄ni che biriliini Galilee, zijtru bia'nreni cahuiireni guiraa recos ni cayajcre.

*Che biga'tz Jesús*

(Mt. 27:57-61; Mr. 15:42-47; Jn. 19:38-42)

<sup>50</sup> Guyu' te bejn ni laa José, lacti huen najcni, luxh laaca rujnni guira'ti. Siädni guedx Arimatea, región Judea. Nadxaagzani loj reni rnibee neñ guidoro xten rexpejn̄ Israel. <sup>51</sup> Cabäjjza José jiäd yälrnibee xten Dios, ni'cni dini nidxaglaz nani bejn resa'ni. <sup>52</sup> Dxejcti huijni lo Pila't, gunabni tiejxh Jesús. <sup>53</sup> Che gulät̄nini lo crujz, batejbn̄ini neñ te bariaad, dxejcti bacua'tzn̄ini neñ te baa ni guc-chee cuä' te guilaj. Nacoob baaga, nicla tej bejn gajd guiga'tz ro'c. <sup>54</sup> Dxejga najc dxej ni ruscheereni guira'ti, luxh agojl̄ jiu' dxej ni rusilajzreni.

<sup>55</sup> Regunaa ni guzanäj Jesús che biriliini Galilee huihuiireni robaaga te bahuiireni xho gudixh̄reni togoolga neñ baa. <sup>56</sup> Che gubi'reni rolizreni bencheereni recuaan ni rlianexhd̄uxh näj te ni najc si'c te saj ni rlianexhd̄uxh ni ruzaareni retogool. Dxejcti basilajzreni dxej ni rusilajz bejn, si'cni caj lo xleii Moisés gunreni.

## 24

*Che gubansac Jesús lo rebengut*

(Mt. 28:1-10; Mr. 16:1-8; Jn. 20:1-10)

<sup>1</sup> Dxej ni gosloj xmaanga, rsildooru huinä regunaaga robaa recuaan ni rlianexh̄ni bencheereni. <sup>2</sup> Che bidzuj̄n̄eni, bahuiireni agubicaj guij ni rusäu ro' baa. <sup>3</sup> Dxejc che biu'reni neñ baaga, direni nidxäl tiejxh Jesús. <sup>4</sup> La'l̄ ni cadxelojreni, di jien̄ xhi gunreni, biricaj tio'p dade' gusuj cuä'reni. Rðimbichaduxh xhajibreni. <sup>5</sup> Bidxebd̄uxh regunaaga, basajbreni lojreni lo yuj. Dxejc räjp redade'ga lojreni:

—¿Xhicuent siäd̄tiltu te bejn ni nabajn lo rebengut, ä? <sup>6</sup> Rutini ree. Agubansacni. Colgusnaj lajztu rediidx ni guniini cheni guyusijcni Galilee, <sup>7</sup> che najni lojtu: “Riäl̄ jiajb Xi'n Dios ni gujc Niguui ladzña rebendojl̄, xcajzani lo crujz, dxejc ni riojn̄ dxejga sibansacni loj rebengut.”

<sup>8</sup> Dxejc banaj lajz regunaa xtidx Jesús, <sup>9</sup> biriireni robaa, gubi'tireni te bijreni diidx lo retzubiteeb rexpejn̄pacni näjza loj rebejn̄ ni yunäjreni. <sup>10</sup> Reni huisa'n diidx loj rexpejn̄pac Jesús najc redee: Marii Magdalen, näjza Xuan, näjza Marii xnan Jacoob, näjza sgaii gunaa. <sup>11</sup> Niluxh rexpejn̄pacni bejn xhigab didxnayääl̄ni, direni nililaj xtidx regunaaga.

<sup>12</sup> Dxejc huisu Pedr; ruxxun̄ini huijni ro' baa. Che gudixh̄lojni, bahuiini neñ baaga, ganaxtis bariaad dzuub te laad. Dxejc gubi'ni rolizni, rdxelojt̄isni xcuent ni gujc.

*Ni guzajc lo nezyuj ni sii guedx Emaús*

(Mr. 16:12-13)

<sup>13</sup> Lagajc dxejga, tio'p rexpejn̄pacni sääreni te guejdx ni laa Emaús, ni ria'n si'cti tzubiteeb kilómetro loj guedx Jerusalén. <sup>14</sup> La'l̄ ni sasajreni lo nezyujga, cayuj̄yreni diidx xcuent reni gujc ro'c. <sup>15</sup> La'l̄ ni caniireni gubig Jesús lojreni, gosloj sasanäj̄n̄ireni. <sup>16</sup> Luxh mase cahuiireni lojni, yu' xhi badxojn̄ niembeereni. <sup>17</sup> Dxejc gunabdiidx Jesús lojreni, räjpni:

—¿Xhini'c rujytu la'l̄ ni sasajtu, ä? ¿Xhicuent cayac-huin lajztu?

<sup>18</sup> Tejreni ni laa Cleofas badzu' diidxre, räjpni:

—Guiraasi bejn najn xhi gujc neñ guedx Jerusalén. ¿La lujtis bia'nlu neñ guejdxga ni di gan xhi gujc ro'c, ä?

<sup>19</sup> Dxejcti räjp Jesús lojreni:

—¿Xhini'c gujc ro'c?

Dxejc räjpreni lojni:

—Recos xcuent Jesús ni siäd̄ guedx Nazare't, ni gujc te niguii ni gunii xtidx Dios, rajpni yälr̄nibed̄uxh xten Dios loj redzuun ni rujnni näjza loj rediidx ni rniini, nez loj Dios näjza nez loj rebejn̄. <sup>20</sup> Näjza xho bejn reni rnibee loj rebixhojz näjza rexcuxht̄isnu, bateedreniini ladzña reni gunibee guetni, dxejc bacuaarenini lo crujz. <sup>21</sup> Niluxh nuurnu cabääznu laani gacni nani nuslaa rexpejn̄ Israel ladzña reben̄zijt. Naj agujc choñ dxej ni gujc recosre. <sup>22</sup> Luxh yu' gaii gunaa ni nadxaag loonu ni baschelojreni nuurnu. Barsil, che huijreni robaa xtenni, <sup>23</sup> direni nidxäl̄ tiejxhni. Biädsä'nreni diidx loonu najreni bahuiireni lo tio'p



xangl Dios ni räjp lojreni, agubansac Jesús lo rebengut. <sup>24</sup> Dxejcti huihuii gaii sa'nu robaa, bahuiizareni najcni si'ctis ni naj regunaaga loonu, niluxh direni nuhuii loj Jesús.

<sup>25</sup> Dxejc räjp Jesús lojreni:

—¡Lacti nayääl tre' xcäriejntu! Lacti nen rililajztu xtidx redade' ni gunii xtidx Dios xcuent Crist. <sup>26</sup> ¿La di nungäjl tedxgaa Crist retrabajwduxhre dxejcti jiu'ni lo xcälrdimbicha' Dios, ä?

<sup>27</sup> Dxejc gusloj cagusule'ni guiraa rediidx ni caj lo xquijtz Dios xcuent Crist. Guslonäjni xtidx Moisés, dxejc huinuuni basule'ni guiraa reguijtz ni bacuaa redade' ni gunii xtidx Dios.

<sup>28</sup> Che bidzujnreni guejdx cadre sääreni, bejn Jesús si'cni chanuuni chääni lo nezyuj.

<sup>29</sup> Dxejc laareni bascuääzrenini te jiannäjnreni, räjpreni lojni:  
—Biannäj nuurnu, sa'csi acayajc gudxey, agojl jiu' guxhijn.

Dxejcti biu' Jesús te jiannäjnreni. <sup>30</sup> Cheni sobganäjnreni lo mex, cua'ni yätxtiil, benle'nini, dxejc gula'nini, gudisnini lojreni. <sup>31</sup> Lagajc dxejc, baxhal Dios balojreni, biembeereni Jesús, dxejc laani gunitlojni lojreni. <sup>32</sup> Dxejcti räjpreni lo sa'reni:

—¿La di lastoonu nibeguiboos cheni siädniini loonu lo nezyuj, che cagusule'ni xtidx Dios?

<sup>33</sup> Dxejc dirureni nibäjz ro'c, alga gunasgajczeni nez, gubi'reni guedx Jerusalén. Ro'c bidxälreni abidojp xpejn pac Jesús näjza sgaii bejn. <sup>34</sup> Dxejcti bijreni diidx loj guiro'preni bidzujn, räjpreni:

—Guliipac gubansac Jesucrist, luxh baluilojni loj Simón.

<sup>35</sup> Dxejc guiro'p reni bidzujn bijzareni diidx ni gusajczeni lo nezyuj, näj xho biem-beezareni Jesús che gula'ni yätxtiil.

*Baluiloj Jesús loj rexpejn pacni*

(Mt. 28:16-20; Mr. 16:14-18; Jn. 20:19-23)

<sup>36</sup> Canisi'czeni rediidxre chela baluiloj lagajc Jesús galäiireni, guniini xchan lojreni, räjpni:

—¡Colcuedxi lajztu!

<sup>37</sup> Per laareni rdxeloreni bidxeybreni, naareni cahuiireni lo te sprit. <sup>38</sup> Dxejc räjp Jesús lojreni:

—¿Xhicuent cadxeybtu? ¿Xhicuent rac tio'p lastootu? <sup>39</sup> ¡Colhuii reñaä, näjza reni'äl! Lagajc naräni. Colcajn narä te fiipactu laa naräni, sa'csi anajntu di te sprit ga'p bääl niclaza tzujt si'c rapä narä.

<sup>40</sup> Che guniini rediidxga, baluigajcni reñaani näjza reni'ni. <sup>41</sup> Laļ ni cadxelojreni, di gacdi chalilajzreni, sa'csi cabaduxh lajzreni, räjpni lojreni:

—¿La yu' xhi rajptu gauä ree, ä?

<sup>42</sup> Dxejc badeedreni te la' bälbigue', näjza te la' seer ni yu' tzujn. <sup>43</sup> Ni'c cua'ni gudajwnini nez lojreni. <sup>44</sup> Dxejc räjpni lojreni:

—Dee najc xtidxä ni rniä lojtu cheni yusicä lojtu, rniä riäjļ soob guiraa rediidx xcuentä ni caj lo xleii Moisés, näjza lo rexquijtz redade' ni gunii xtidx Dios näjza ni caj lo rexquitz Salmos.

<sup>45</sup> Dxejcti basanijni xcäriejnreni te gucbeereni xhi säloj rediidx ni caj lo rexquijtz Dios xcuentni. <sup>46</sup> Dxejc räjpni lojreni:

—Scree caj lo reguijtz: Nanab guet Crist, dxejc ni riojn dxej, guibansacni loj rebengut.

<sup>47</sup> Sire'chza diidx xcuent xho ruslaa Crist rebejn nen dojl che rusiejchreni lajzreni, che rililajzreni xtiidxni. Guedx Jerusalén guislojni, dxejc sire'ch diidx guideb guedxliuj. <sup>48</sup> La'tu najctu testiigw guiraa recosre. <sup>49</sup> Narä suxhalä Sprit Dxan xten Dios lojtu, ni'c coljia'n guedx Jerusalén cheni jiädläjzlini nen lastootu, guniidxni yälrnibee ni siääd xhaguibaali.

*Huäjs Jesús xhaguibaa*

(Mr. 16:19-20)

<sup>50</sup> Dxejc huinä Jesúsreni stelaad guedx Jerusalén gajxh lo te guejdx ni laa Betania. Ro'c gulänsi naani, benle'ni vejreni. <sup>51</sup> Laļ ni cayujnni si'c, gubicajni lojreni, huäjsni xhaguibaa.

<sup>52</sup> Peta laareni gulujx gojnrenini, dxejc cabalazduxhrene gubi'reni guedx Jerusalén. <sup>53</sup> Ro'c guixe-guixee guyu'reni nen guidoro, calä'preni xpala'n Dios. Sugacni si'c.

## Redidxhuen Xten Jesucrist Ni Bacuaa San Juan

### *Xtidx Dios najc te Niguii*

<sup>1</sup> Galodoo che gusloj guira'ti, ala yu' Diidx. Luxh nani najc Diidxga yunäj Dios, luxh Diidxga najc Dios. <sup>2</sup> Che gajd gac-cheeli guedxliuj, yunäjni Dios. <sup>3</sup> Xcuent laani benchee Dios guedxliuj näjza guira'ti ni yu' lojni. Guiraa recos ni yu' di gacdi niu'reni paru rutini. <sup>4</sup> Laani gojp yäl'nabajn. Yäl'nabajnga najc bianij xten rebejn. <sup>5</sup> Luxh bianijga rdimbicha' nez lo yälcäjy, niluxh yälcäjyga di niajcdi nusuiinini.

<sup>6</sup> Guyu' te niguii birilaj Juan, ni baxhal Dios. <sup>7</sup> Laani biäädni te basule'ni diidx. Biädsule'ni diidx xcuent bianij te nililajz guiraa rebejn diidx xcuent bianij. <sup>8</sup> Laani dini gac bianij, laani biädsule'ni diidx xcuent bianij. <sup>9</sup> Laa bianijpacga ni rusanij lastoo guiraa rebejn, luxh najc biäädni lo guedxliujre.

<sup>10</sup> Nani najc Diidxga guyu' lo guedxliujre, xcuent laazani guc-chee guedxliujre, luxh di reben guedxliujre nililajz chu najni najcni. <sup>11</sup> Biäädni loj rexpejn Israel, niluxh rexpejnni direni nicäjb niu'ni lojreni. <sup>12</sup> Dxejc loj guiraa reni cuäjb guyu'ni lojreni, loj renani huililajz xtiidxni, loj reni'c badeedni yäl'rnibee gacreni xi'n Dios. <sup>13</sup> Laa reni'c ni di gac si'c xi'n ben guedxliuj, ni gojl sa'csi rlajz te biniet chu xi'nni, dee najcpacreni Xi'n Dios sa'csi sudeedni yäl'nabajn par tejpas lojreni.

<sup>14</sup> Diidxga gujc te ben guedxliuj. Guläjzni lo guedxliujre, bahuilozzanu xcäl'rdimbicha'ni, si'c yäl'rdimbicha' xten xingan xteb xtadni, laani najcpacni nani sanälajz nuurnu, nani rniididxlii loonu. <sup>15</sup> Juan gunii xcuent Jesús. Guredxa'ni, räjpni:

—Laa dee ni rniä, nani siääd detzä sajcruni loä, sa'csi laani ganidni nabajpni loä.

<sup>16</sup> Sa'csi guiraanu cua'nu xcäl'nasacduxhni, yäl'racnäj detz yäl'racnäj. <sup>17</sup> Leii xten Dios biädnä toMoisés, niluxh yäl'racnäj näjza redidxlii biädnä Jesucrist. <sup>18</sup> Rut chu tejdi abahuii lo Dios, xinxtebni ni yunäjpac Dios, laani basule'ni diidx xcuent Dios loonu.

### *Juan ni rutiobnis gunii chuni'c najc Jesucrist*

(Mt. 3:11-12; Mr. 1:7-8; Lc. 3:15-17)

<sup>19</sup> Dee najc diidx nani gunii Juan ni rutiobnis che baxhal rexpejn Israel rebixhojz näjza rexpejn guidoo ni laa levitas, biriireni guedx Jerusalén te sanabdiidxreni lo Juan, räjpreni lojni:

—¿Luj chu najclu?

<sup>20</sup> Dxejcti bicäjpni lojreni, xhet bacua'tzdini lojreni, räjpni:

—Et narädi nacä Crist ni jiääd.

<sup>21</sup> Dxejcti gunabdiidxreni lojni, räjpreni:

—¿Chuxhni'c najclu? ¿La lujni najc Elías?

Räjpni:

—Dina gacäni.

Räjpreni:

—¿La najclu te dade' ni gunii xtidx Dios ni cabäüznu jiääd?

Dxejc räjpni:

—Dina gacäni.

<sup>22</sup> Räjpreni:

—¿Chuxhni'c najclu? Te chonänu diidx loj reni baxhal nuure. ¿Xhi rniilu, chuxhni'c najclu?

<sup>23</sup> Räjp Juan:

—Narä nacä nani rbedxa' nez lo reyubijdz si'c ni gunii Isaías, ni gunii xtidx Dios scree: “Colyensa'c xnezyuj Dad.”

<sup>24</sup> Rebejn ni baxhal redee najc reni rniireni “farisee”. <sup>25</sup> Dxejc gunabdiidxreni stee, räjpreni lo Juan:

—¿Xhicuent rutiobnislu palga dilu gac Crist ni jiääd niclaza Elías niclaza stee niguii ni rniididx Dios ni cabäüznu jiääd, ä?

<sup>26</sup> Dxejcti räjp Juan lojreni:

—Narä rutiobnisä con nis, niluxh galäiitu yu' tej nani ditu gumbee. <sup>27</sup> Laa dee ni siääd detzä niluxh di nungäjil nicla surloä cuää xcura'chni, sa'csi sajcruni loä.

<sup>28</sup> Guiraa recosre gujc stelaad cadro laa Betábara, ni ria'n stelaad ro' gueu Jordán cadro cagutiobnis Juan.

### *Jesús najc Xile' xten Dios*

<sup>29</sup> Che bara yääl, bahuui Juan siääd Jesús lojni. Dxejc räjpni:

—¡Colhuii! Aree Xile' xten Dios nani rudzucaj xtojĵ rebeñ guedxliuj. <sup>30</sup> Lagajc xcuent dee ni rniä cheni guniä lojtu: “Detzä siääd te niguii ni sajru loä, sa'csi ganidli narä agac nabajñni.” <sup>31</sup> Luxh dina niembeäni, per biädtiobnisä con nis te guluiä lo rexpejn Israel chu najcni.

<sup>32</sup> Guniiza Juan stee diidx xcuentni, räjpni:

—Narä bahuiä biäjť Sprit Dxiän xten Dios xhaguibaa si'c te palom guzudxini yejcní. <sup>33</sup> Dina niembeäni, per nani baxhaĵ narä gutiobnisä con nis, laani najni loä: “Cheni fiĵlu jiäjť Sprit Dxiän xten Dios xhaguibaa si'c te palom, sudxini yejc te bejn, laanini najc ni gutiobnis con Sprit Dxiän xten Dios.” <sup>34</sup> Narä abahuiä lojni, ni'cni rniĵliä: “Dee ni najc Xi'n Dios.”

*Reni gujc xpejn Jesús ganiddoo*

<sup>35</sup> Che bara stee yääl, sugasac Juan ro'c, suganäjni tio'p rexpejñni. <sup>36</sup> Bahuiini lo Jesús che sasajni, dxejc gunii Juan, räjpni:

—¡Colhuii! ¡Laa dee ni najc Xiĵl xten Dios!

<sup>37</sup> Biejn diajg guiro'p rexpejn pac Juan diidxga, dxejc sanajłreni Jesús. <sup>38</sup> Che gubiré Jesús bahuiini siäd najłreni, dxejc räjpni:

—¿Xhi caguĩiltu?

Räjp rebejn ga:

—Mastř, ¿caro rbäjzlu?

<sup>39</sup> Badzu' Jesús diidxre, räjpni:

—Coltaa, te fiitu.

Dxejcti huijreni te bahuiireni caro rbäjzni ro'c. Biannäjrenini ro'c sa'csi agojł si'cti rcatajł gudxej.

<sup>40</sup> Tej reni biejn diajgni xtidx Juan laa Andrés, bejť Simón Pedř dxejc huinäjłni Jesús.

<sup>41</sup> Ganiddoo huitiĵl ni bejťzni, dxejc räjpni lojni:

—Abidxäłnu Mesias nani sälojza Crist ni cabääznu jiääd.

<sup>42</sup> Sas huinänini loj Jesús. Che bahuii Jesús lojni, räjpni:

—Luj najłcu Simón xi'n Jonäs; sirilajł Cefas nani sälojza Pedř.

*Gurejdx Jesús Felipe näjza Natanael*

<sup>43</sup> Bara yäälga rłajz Jesús chää nez Galilee. Dxejc bidxaagni Felipe, räjpni lojni:

—Gudanajł narä.

<sup>44</sup> Felipe siääd guedx Betsaida, guedxro ni najcza lajdx Andrés näjza Pedř. <sup>45</sup> Felipe bidxaag Natanael räjpni lojni:

—Abidxäłnu bejn nani bacuaa to Moisés xcuentni lo reguijťz xten leiĵ agujc xchej, nani bazä'ťza reniguii ni gunii xtidx Dios, Jesús xi'n José ni siääd Nazare't.

<sup>46</sup> Räjp Natanael:

—¿La sajč guiriĵ te beñsa'c guedx Nazare't, ä?

Räjp Felipe lojni:

—Gudaa, te fiĵlu.

<sup>47</sup> Che bahuii Jesús siääd Natanael nez lojni, räjpni:

—Colhuii te beñ Israelpac nani dipacni gusguee.

<sup>48</sup> Räjp Natanael:

—¿Xho numbeelu narä?

Badzu' Jesús diidxre lojni räjpni:

—Che gajđ Felipe cuedx łuj, che suga'łilu ni' te yagiigw, bahuiä lojlu.

<sup>49</sup> Badzu' Natanael diidxre, räjpni:

—Mastř, łuj najc Xi'n Dios, łuj najc Reii xten rexpeñ Israel.

<sup>50</sup> Räjp Jesús lojni:

—Sa'csi rniä lojlu, “bahuiä suga'łilu ni' yagiigw”, ¿ni'c rililajzlu, ä? Xhidajł cosroru suhuiĵlu.

<sup>51</sup> Dxejcti räjpzani:

—Rniĵliä pac lojtu, suhuiĵtu guixal xhaguibaa, näjza rä'p riäjť rexangł Dios yejc Xi'n Dios ni gujc Niguii.

## 2

*Te sa'ni guyu' guedx Canä xten Galilee*

<sup>1</sup> Che gudejđ choñ dxej, guyu' te sa' guedx Canä xten Galilee. Ro'c guyu' xnan Jesús. <sup>2</sup> Huijza Jesús näjza rexpejn pacni, sa'csi bidoñreni chääreni lo sa'ga. <sup>3</sup> Gubijđz bin. Dxejc räjp xnan Jesús lojni:

—Dirureni ga'p bin.

<sup>4</sup> Dxejc badzu' Jesús diidxre räjpni:

—¿Xhicuent rniĵlu si'c loä, xnanä? Gajđ xhorä guidzujñ.

<sup>5</sup> Niluxh räjp xnanni loj remos ni tre' ro'c:

— Colyejn guira'ti si'ctis ni guiniini lojtu.

<sup>6</sup> Suga' xho'p guesgij nani rdxaj nis te rdiib naa rexpejn Israel te racnayareni te si'c guisa' xleii to Moisés. Nen tejjga guesgijga ru' si'cti te gayuu litr nis. <sup>7</sup> Räj p Jesús loj remos:

— Colguchaj reguesgijre nis.

Dxejcti bachadoo rebejnngani. <sup>8</sup> Dxejcti räj p Jesús lojreni:

— Colca' che'nni naj te colchanäni lo nani cahuii cayajc sa're.

Dxejc huinä remosga che'n bin lojni. <sup>9</sup> Che gu' dade'ga che'n nis ni gubixhloj bin (luxh dini gan caro siädni, remostis ni gulä'p nis, ni'ctis najn). Dxejcti gurejdx dade'ga bi'n. <sup>10</sup> Dxejcti räj pni:

— Guiraa rebejn rudeedreni binsa'c räxga rebejn, dxejcti che agudxaj xque'reni, rudeedreni bin nani di xcuent, niluxh luj gulucheelu binsa'cre najli.

<sup>11</sup> Seenre najc ganiddoo ni gusloj bejn Jesús; bejnnini nen guedx Caná xten Galilee. Seenga bazäbdiidx yäl'mibee xtenni luxh ni'cni huililajx rexpejnpacni xtiidxni.

<sup>12</sup> Che gudejd sa'ga, huijni guedx Capernaum con xnanni, rebejtzni näjza rexpejnpacni. Ro'c bia'nreni tio'p-choñ dxej.

### *Basia Jesucrist guidoro*

(Mt. 21:12-13; Mr. 11:15-18; Lc. 19:45-46)

<sup>13</sup> Sa'csi abidzungajxh lanij pascw xten rexpejn Israel cheni rnalajzreni guxhijñ ni gudejd guixhajg xten yälgujt nen Egipto, ni'c sää Jesús guedx Jerusalén. <sup>14</sup> Nen guidoro bidxäni xhidajl bejn nani ruto' gon, xiil, palom näjza reni sobga' caguchaa melzijt. <sup>15</sup> Dxejc bejnini te chico't con gaii duu, gulääni regon con rexiiil nen guidoo. Batie'chni xcoobr rebejn nani ruchaä melzijt, barexh-xhätni rexmexreni. <sup>16</sup> Räj p zani loj reni caguto' repalom:

— Colcuää redee, na'c rujntu rolizj xtaä si'c te guii cadro rdo' guiraloj.

<sup>17</sup> Dxejcti banajlajx rexpejnpacni xhi caj lo reguijt ni bacuaa redade' ni gunii xtidx Dios: “Gucnaj lazä xcuent ni runnäjreni rolizjlu.”

<sup>18</sup> Dxejcti gunabdiidx reni najc xpejn Israel lojni, räj p reni:

— ¿Xhi seen guluuilu loonu naj te fiinu arajplu yäl'mibee te abejnlu recosre?

<sup>19</sup> Badzu' Jesús diidxre räj pni:

— Colgutzujl guideore, luxh narä nen chontis dxej sunchesacäni.

<sup>20</sup> Räj p rexpejn Israel lojni:

— Tiubixho'p ijz guclaa ni guc-chee guideore, ¿xhixh sajg gunchesacluni nen chontis dxej, ä?

<sup>21</sup> Niluxh laani caniini xcuent guidoo ni najc lagajc tiejxhni. <sup>22</sup> Ni'cni cheni gubansacni loj rebengut, banajlajx rexpejnpacni rediidxre ni guniini, dxejc huililajzreni nani caj lo rexquijt Dios näjza rediidx ni gunii Jesús.

### *Numbee Jesús guiraa rebejn*

<sup>23</sup> Cheni guyu' Jesús guedx Jerusalén cadro cayajc lanij pascw, lañ ni cayajc lanijga, xhidajl rebejn huililajx xtiidxni, bahuiizareni remilagwr ni bejnini. <sup>24</sup> Luxh di Jesús nililajx xtidx rebejnnga, sa'csi arumbeeni xho najc rebejn. <sup>25</sup> Niluxh dini niqiiin chu gäb lojni xho najc bejn, sa'csi lagajc laani anancheeni xho najc lastoo tejjga bejn.

## 3

### *Jesús con Nicodem*

<sup>1</sup> Guyu' te niguii lo rexpejn refarisee ni laa Nicodem, najcni te benroro loj reni rnibee rexpejn Israel. <sup>2</sup> Te guxhijñ biädxhiga'tzni nez loj Jesús, räj pni lojni:

— Mastr, nadonnu lo Dios siädädu si'c te ni ruluii, sa'csi rut rajcdi rujn sa' remilagwr nani rujnlu palga di Dios sunäjni.

<sup>3</sup> Dxejcti räj p Jesús lojni:

— Rniliäpac lojlu, nani di gaal stehuält, di gacdi fiini xcäl'mibee Dios xhaguibaa.

<sup>4</sup> Dxejcti räj p Nicodem lojni:

— ¿Xho gac gaal te bejn stehuält niluxh anajcni bengool? ¿Xhixh sajg chusacni xque' xnanni stehuält te galsacni, ä?

<sup>5</sup> Badzu' Jesús diidxre räj pni:

— Rniliäpac lojlu, nani di gaal con nis, näjza con Sprit D xan xten Dios, di gacdi jiu'ni lo xcäl'mibee Dios xhaguibaa. <sup>6</sup> Nani rajl xi'n ben guedxliujre, ni'c najctisni bejn guedxliuj, luxh nani rajl por Sprit D xan xten Dios, Spritza najcni. <sup>7</sup> Na'c rdxelojlu sa'csi rniä: “Nanabpac gaallu stehuält.” <sup>8</sup> Rbi' bej cadrotis rlaizni; riejn diajglu rubejni niluxh dilu gan caro siädni, dizalu gan caro sääni. Si'cza rebejn guedxliuj direni gan xho rajl rexpejn Dios stehuält con Sprit D xan xten Dios.

<sup>9</sup> Badzu' Nicodem diidxre, räj pni:

— ¿Xho mood sajg gac recosre?

<sup>10</sup> Räj p Jesús lojni:

—¿La najclu te maestr xten rexpejn Israel luxh dilu gan recosre, ä? <sup>11</sup> Rniliäpac lojlu, aguniinu xcuent recos ni nadonnu, abasule'nu recos ni abahuiloonu, niluxh la'tu ditu nililajz xtiidxnu. <sup>12</sup> Palga ditu chalilajz xtiidxnu che guniinu xcuent recos guedxliuj nani rniinu: ¿Xho chalilajztu xtiidxnu palga guiniinu xcuent recos xhaguibaa?

<sup>13</sup> 'Rut chutejdi ahuä'p xhaguibaa, xtebtis nani biäjt xhaguibaa, lagajc Xi'n Dios ni gujc Niguii. <sup>14</sup> Lagajc si'cni guläsjiaa toMoisés bäl guuib lo yajg neñ reyubijdz, sigajcza nanab chäs Xi'n Dios ni gujc Niguii jiaa; <sup>15</sup> te guiraa renani chalilajz xtiidxni direni nit lo Dios, sica'reni yäl'nabajñ par tejpas.

*Xho huinälajz Dios reben guedxliuj*

<sup>16</sup> 'Sa'csi huinälazduxh Dios rebejn guedxliuj, ni'cni badeedni biääd Xinxtebni lo guedxliuj, te guiraa renani chalilajz xtiidxni direni nit lo Dios, sa'csi sajpreni yäl'nabajñ par tejpas. <sup>17</sup> Sa'csi di Dios nuxhal xi'nni te gusnijtni rebejn guedxliuj, alga baxhal'nini te laa rebejn neñ xtoj'reni xcuentni.

<sup>18</sup> 'Nani chalilajz xtiidxni näjza chalilajz najcni chu najni najcni dini nit, luxh nani di chalilajz xtiidxni agunijtni sa'csi dini nililajz xtidx Xinxteb Dios. <sup>19</sup> Ni'cni dee najc yäl'nijtga: abiääd bianijga loj guedxliuj, biädnä Xi'n Diosni, niluxh rebejn guedxliuj bidxagljazruren i yäl'nacäjäy cadro tre'reni, gulälazreni bianijga sa'csi xhet laadi najc xtzunreni. <sup>20</sup> Guiraa reni rujn dzunguijdx, rbälaz bianijga, dizareni guibig loj bianijga, didi gululoj bianijga rextzunguijdxreni. <sup>21</sup> Luxh reni rusoob didxlii, rbigreni loj bianijga, te bianijga ruluuloj najc rextzunreni redzunsac xten Dios.

*Rnisac Juan ni rutiobnis xcuent Jesús*

<sup>22</sup> Dxejcti biääd Jesús näjza rexpejn'pacni nez lo reyuj xten Judea. Ro'c guyunäjniren i, batiobnisza rexpejn'pacni rebejn. <sup>23</sup> Juan ni Rutiobnis cagutiobniszani bejn te lajt ni laa Enón ni tre' gajxh Salim, sa'csi ro'c yu' sijl nis. Ro'c säa rebejn lojni te cagutiobnisniren i. <sup>24</sup> Dxejc gajdreni gusäu Juan neñ latzguuib.

<sup>25</sup> Dxejcti gusloj rexpejn Juan cayujy diidx con gaii xpejn Israel xcuent yäl'rudiib ñareni ni najc xcostumbr rexpejn Israel. <sup>26</sup> Dxejc biäädreni lo Juan, räjpreni:

—Mast, dade' nani guyunäjlu stelaad gueu Jordán, nani basule'lu xcuentni, adade'ga cagutiobnis, luxh guiraa rebejn asää lojni.

<sup>27</sup> Dxejc badzu' Juan diidxre, räjpni lojreni:

—Nicla tej bejn digacdi ga'p te xhi cos palga di Dios gudeedni lojni. <sup>28</sup> Lagajc la'tu nancheetu guniliä: “Dina gacä Crist ni cabäjztu jääd.” Guniäza: “Narä nacä nani biädnijd lojni.” <sup>29</sup> Che rajc sa', nani sobganäj dxa'p, ni'c najc bi'n ni gac chäälni, luxh xamigw bi'n nani suga' ro'c, riejn diajgni rniini, rbalazduxhni sa'csi riejn diajgni xse' bi'n. Sigajcza abibaduxh lazä xcuentni. <sup>30</sup> Nanab gacni laani beñroru, beñsajcru, biädla narä rijañ gacä beñhuinru, ni guxiiru sajç lojni.

*Nani siääd Xhaguibaa*

<sup>31</sup> 'Nani siääd jiaali, ni'c rnibee guiralii, niluxh nani najc beñ guedxliuj ni'c rni i xcuent recos guedxliuj. Nani siääd xhaguibaa ni'c rnibee guiralii. <sup>32</sup> Nani bahuiini, nani biejn diajgni, ni'c rusule'ni niluxh guxii rililajzreni xtiidxni. <sup>33</sup> Nani rililajz diidx ni rusule'ni, bejn ga ruluuloj guliipac najc xtidx Dios. <sup>34</sup> Nani baxhal' Dios, ni'c rni i xtidx Dios sa'csi che rudeed Dios Sprit xtenni, dini gudeed guxiini. <sup>35</sup> Dad Dios sanälajzni xingaanni, abadeedzani guiralii chu ladzñaani. <sup>36</sup> Nani rililajz xtidx xingaanni arajp yäl'nabajñ par tejpas, luxh ni di chalilajz xtidx xi'nni, dini fii yäl'nabajñ, siääd xcälrdx'e'ch Dios yej'cni, sujñ Dios castiigw ni.

## 4

*Rdxaag Jesús te gunaa Samaria*

<sup>1</sup> Che gucbee Jesús abiejñ diajg refarisee xhidajlru bejn sanajl Jesús luxh guxiiru sanajlreni Juan, luxh cagutiobnisreni, <sup>2</sup> (niluxh xhet Jesúsd i cagutiobnis. Rexpejn'ni i catiobnis), dxejc <sup>3</sup> biriini Judea gubisacni nez Galilee.

<sup>4</sup> Lañ ni sasajni, nanab tedni nez Samaria. <sup>5</sup> Ni'c bidzujñni te guedxro xten Samaria ni laa Sicar. gajxh nejz loj te la' yuj ni badeed toJacoob lo xi'nni toJosé. <sup>6</sup> Ro'c sojb te bisie ni rniireni “xpisie Jacoob”. Sa'csi abadxajg Jesús siädsajni, gurejni ro bisiega. Agojl läidxej. <sup>7</sup> Bidzujñ te gunaa siädlä'pni nis, dxejc räjp Jesús lojni:

—Baniidx che'n nis yä'ä.

<sup>8</sup> Sa'csi rexpejn'pacni asääreni guejdxga sasiireni xhi gauren i.

<sup>9</sup> Räjpti guna samaritanga lo Jesús:

—¿Xho mood rniablul nis loä, luj ni najc te beñ Israel luxh narä nacä gunaa samaritan?

(Sa'csi di rexpejn Israel chanä sa'reni rebejn Samaria.) <sup>10</sup> Räjþ Jesús lojni:

—Paru najnlu xhini'c najc yälruulaslajz xten Dios, paru numbeelu chuni'c canab nis lojlu, luj siniablu lojni te laani guniidxni nisnabajn lojlu.

<sup>11</sup> Räjþti gunaaga lojni:

—Dad, xhet ca'dilu te guiliä'plu nis, luxh bisiere najc jätduxh. ¿Caxh chaca'lu nisnabajnga, ä? <sup>12</sup> ¿La beñrorulu lo toxtadgoldoonu Jacoob ni basa'n bisiere cadro huä'p nis gu'ni, gu'za rexi'nni, näjza rexquidxaani, ä?

<sup>13</sup> Badzu' Jesús diidxre lojni, räjþni:

—Guiraa reni rä' nis bisiere, siojlrēni stehuält. <sup>14</sup> Luxh nani yä nis nani gudedä, diruni jiojl, sa'csi nis nani gudedä neñ lastooni sajñni si'c te bisie nani rdatis nisni te gudeedni yälñabajn par tejpas.

<sup>15</sup> Dxejcti räjþ gunaaga lojni:

—Dad, banüidx nisga yä ä, te na'cru jiojä, te na'cruza guibi'ä jiadlä'pä nis ree.

<sup>16</sup> Räjþ Jesús:

—Huij, huitejdx chäälū gudanäni ree.

<sup>17</sup> Räjþ gunaa loj Jesús:

—Ruti chälä.

Räjþ Jesús lojni:

—Laaca guniilu, <sup>18</sup> sa'csi aguyu' gaaili chäällū. Luxh nani rbäznäjlu ñaj dini gac chäällū; guliica najlu.

<sup>19</sup> Che biejn diajg gunaaga si'c, räjþni:

—Dad, rchaloä najclu te niguii ni rñii xtidx Dios. <sup>20</sup> Retoxtadgoldoonu gojñreni Dios lo dajñre, luxh la'tu rñiitu guedx Jerusalēn najc cadro nanab ganni Dios.

<sup>21</sup> Räjþ Jesús lojni:

—Gunaa, huililajz xtidxä, sidzujñ or cheni nicla lo dajñre, niclaza guedx Jerusalēn ditu chagajñ Dad Dios. <sup>22</sup> La'tu rajñtu Dios nani ditu gumbee, nuunu rajñnu Dios nani rumbeenu; sa'csi yälruslaa bejn lo dojl siäd xcuent rexpejn Israel. <sup>23</sup> Niluxh sidzujñ or, luxh alabidzujñni, che reni guliipac rajñ Dad, reni'c neñ lastooreni, lo xcäriejñreni sajñreni Dios. Sa'csi sa' bejñre rguuil Dad Dios te ganrenini. <sup>24</sup> Dios najc te Sprit. Reni rajñ Dios nanab ganrenini neñ lastooreni, lo xcäriejñreni, guideb xtijpñreni sa'csi rumbeerenini.

<sup>25</sup> Räjþ gunaa lojni:

—Ananä siäd Mesías ni laaza Crist. Cheni jiaädni, laani susule'ni guiraliiti loonu.

<sup>26</sup> Räjþ Jesús lojni:

—Narä ni caniä lojlu, nacä laani.

<sup>27</sup> Dxejc bidzujñ rexpejñpacni, bidxelojreni sa'csi gunii Jesús lo gunaaga, niluxh rut gunabdiidxdi xhi rlažni, niclaza rut gunabdiidxdi xhini'c caninäjni gunaaga. <sup>28</sup> Dxejcti basa'n gunaaga xtie'ni, sä'tini guedxroga. Dxejcti räjþni loj rebejn:

<sup>29</sup> —Coltaa, fiitu te niguii ni gunii loä guira'ti nani abenä. ¿La et laadi dee Crist ni cabäüznu jiaäd, ä?

<sup>30</sup> Dxejc birii rebejñguejdxga, bidzujñtirenini lojni. <sup>31</sup> Reni najc rexpejñpacni canabduxhreni gau Jesús, räjþreni:

—Mastr, gudajw.

<sup>32</sup> Laani räjþni:

—Narä rapä xhi gauä nani ditu gumbee.

<sup>33</sup> Dxejcti räjþ rexpejñpacni lo sa'reni:

—¿Xhaa yu' chu abiädnä xhi gudajwini, ä?

<sup>34</sup> Räjþ Jesús:

—Yälrajw xtenä najc gunä si'cni rlaž nani baxhal narä, näj guluxä xtzuunni. <sup>35</sup> La'tu rñiitu riäädx tajp bäii te guire' cose'ch. Narä rñiä colguiliäs lojtu, colfisa'c loniaa, abiquijtz regäj, agojl guire' cose'ch. <sup>36</sup> Nani rujñ dzuun rutie' cose'ch rca'ni xcuentni, luxh ni caca'ni najc par yälñabajn par tejpas, te tejsi guibalazñaj nani gule'c binij näj nani batie' cose'ch. <sup>37</sup> Sa'csi guli najc diidx nani rñii bejn, rñiireni: “Tejñi rbe'c binij, ste'cani rutie'ni.” <sup>38</sup> Narä abaxhaälä la'tu gutie'tu cose'ch nani ditu nibe'c; ste'ca najc bejn dzuun gule'cni binij, dxejc la'tu jiu'tu gutie'tu cose'ch loj xtzuunni.

<sup>39</sup> Xhidajl rebeñ Samaria huililajz xtidx Jesús xcuent rediidx ni räjþ gunaaga lojreni che räjþni: “Guniini loä guiraliini nani abenä.” <sup>40</sup> Ni'cni, che biäd rebeñ guedx Samaria lojni gunabreni loj Jesús jia'nni lajdxreni. Dxejc bia'nni ro'c tio'p dxej. <sup>41</sup> Dxejc xhidajlrurenini huililajz xtiidxni ni guniini lojpacreni. <sup>42</sup> Dxejcti räjþrenini loj gunaaga:

—Dirunu chalilajz ganaxtis xcuent diidx ni guniilu loonu, sa'csi lagajc nuure abiejñ diajgñu xtiidxni, ni'c nancheenu dee najcpac ni ruslaa rebejn guedxliuj loj dojl. Laani najc Crist ni cabäüznu jiaäd.

*Basiajc Jesús xi'n te bejn ni rujn xtzuum gubier*

<sup>43</sup> Che gudejd tio'p dxej, biriini guedx Samaria, huinuuni xnezyujni nez Galilee. <sup>44</sup> Sa'csi lagajc Jesús gunii, räjpni: Te bejn nani rnii xtidx Dios di rebeñ lajdxpacni chanälajz xtiidxni. <sup>45</sup> Che bidzujñni rexyuj Galilee, reben Galilee huichaglojrenini sa'csi näj laareni huijreni lanij pascw guedx Jerusalén, ro'c bahuiireni guiraa redzuun nani bejnii.

<sup>46</sup> Gubisacni, bidzujñni guedx Caná xten Galilee cadro bejnii bidxaa nis gujcnii bin. Dxejcti guyu' te dade' nani rujn xtzuum reii. Guedx Capernaum naga' te xi'nni cayacxhuu. <sup>47</sup> Che biejn diajg dade'ga abirii Jesús Judea, abidzujñni nez Galilee, huijni lo Jesús, gunabduxhni lojni cháäni te gusiajcnii xi'nni nani naga' cuentro, ameerli guetni. <sup>48</sup> Dxejcti räjp Jesús lojni:

—Paru ditu fii reseen, remilagwr, ditu chalilajz chuni'c nacä narä.

<sup>49</sup> Dade' ni rujn xtzuum reii, gunii lojni, räjpni:

—Do'o Dad, te di guet xi'nä.

<sup>50</sup> Räjp Jesús lojni:

—Huij. Di xi'nlu guet.

Huillilajz dade'ga, sä'tini. <sup>51</sup> Che gubi'ni rolizjni, birii rexmosni, huichaglojni, badeedreni diidx nabajñ xi'nni.

<sup>52</sup> Dxejcti gunabdiidxni:

—¿Corti gusloj cayajcni?

Räjpreni lojni:

—Naii si'cti rcatej gudxej biriini xliaa.

<sup>53</sup> Dxejcti gubee dade'ga lagajc orga ni räjp Jesús lojni: “Di xi'nlu guet.” Dxejc dade'ga näjza guiraa rebeñ ni yu' rolizjni huillilajzreni Jesús najc ni cabäzreni jääd.

<sup>54</sup> Dee barojp seen ni bejn Jesús cheni biriini Judea, biu'ni Galilee.

**5***Bejn Betesda nani naxu'n*

<sup>1</sup> Che gujcti recosre, guyu' te lanij xten rexpejn Israel, dxejc huij Jesús guedx Jerusalén. <sup>2</sup> Guedx Jerusalén, gajxh ro' puert ni laa xten rexii, yu' te guipilro nis; xtidx hebreo laani Betesda. Cuä' guipilroga caj gaii cordoor. <sup>3</sup> Ro'c naga' xhidajl bejn racxhuu, yu' bejn ni di fii, beñcoj, näj bejn nani bixu'n tiejxhni. Cabäzreni guiniib nisga <sup>4</sup> sa'csi gucti-guc riääd te xangl Dios rusniib nisga. Dxejc bejn nani gun gaan chachu' lo nis ganiddoo che guiniibni, riajcnii lo xhitis yälguijdx ni rajcni. <sup>5</sup> Ro'c guyu' te beñ racxhuu nani agujc galbitzubixhujñ ijz cayacxhuuni. <sup>6</sup> Cheni bahuii Jesús naga'ni, badeedzani cuent lacti xchero raxchuuni, räjpni lojni:

—¿La rlaizlu jiajclu?

<sup>7</sup> —Dad —räjp beñ racxhuuga lojni—, dina gapä chu gusal narä neñ nis cheni rniib nisre. Cheni rlažä chachu'ä lo nis, stee bejn rujn gaan narä, ganidni richu'ni lo nisga.

<sup>8</sup> Räjp Jesús lojni:

—Huistie, guläs xta'lu, guzaj, huij.

<sup>9</sup> Lagajc dxejc biajc bejnğa, guläsni xta'ni, gusloj gusajni. Niluxh dxejga najc dxej nani rusilajz rexpejn Israel, <sup>10</sup> ni'c räjp rexpejn Israel lo bejn ni biajcgä:

—Nadxej najc dxej ni rusilajz bejn. Di gacdi guulu xta'lu.

<sup>11</sup> Laani räjpni:

—Nani basiajc narä, laani naj loä: “Guläs xta'lu, gusaj.”

<sup>12</sup> Dxejc gunabdiidxreni lojni:

—¿Chuni'c naj lojlu “Guläs xta'lu, gusaj”?

<sup>13</sup> Dxejcti beñ racxhuu ni biajcgä dini gaan, sa'csi gunitloj Jesús, biriini ro'c lañ ni tre' xhidajl bejn lajtga. <sup>14</sup> Che bidxaagni Jesús stehuält neñ guidoro, räjp Jesús lojni:

—Ahuui, naj ni abiajclu, na'c gunlu dojl stehuält, didi sajclu xhi stee ni najc cuentroru.

<sup>15</sup> Sä'ti bejnğa, huiye'tzni loj rexpejn Israel laa Jesús ni basiajcnii. <sup>16</sup> Ni'cni gusloj rexpejn Israel carinajlreni Jesús, rlaizreni guiga'ni te ju'trenini, sa'csi rujnii redzuunga dxej ni rusilajzreni. <sup>17</sup> Luxh räjp Jesús lojreni:

—Xtadä Dios najli cayujñni dzuun, ni'cni näjza narä cayunä dzuun.

<sup>18</sup> Ni'cni rlaizru rexpejn Israel ju'tni, xhet ganaxdi sa'csi rujnii dzuun dxej ni rusilajzreni, per näjza sa'csi räjpni Dios najc Xtadni, rniizani tebloj najcni con Dios.

*Yälrnibee xten Xi'n Dios*

<sup>19</sup> Badzu' Jesús diidxre räjpni lojreni:

—Rniliä, rniliäpac lojtu. Di gacdi gun Xi'n Dios dzuun xtebni, palga dini fixgaa rujn Xtadni dzuunga, sa'csi guira'tis dzuun ni rujn Xtadni, dzuunga rujnza Xi'nni sigajc rujn Xtadni. <sup>20</sup> Sa'csi rinälajz Dad xi'nni, ruluiini lo xi'nni guiraa redzuun nani rujnii, luxh

dzunroruzca suluini lojni gunni, te guidxelojtu. <sup>21</sup> Sigajc ni rliäs Dios rebengut, rudeedni yälnabajñ lojreni, sigajcza sudeed xi'nni yälnabajñ lo renani rlanjtsini. <sup>22</sup> Nicla Dad di gun yälguxhtis, alga badeedni guiralii yälguxhtis gun Xi'nni, <sup>23</sup> te guiraa bejn guiliä'p xpala'n xi'nni si'cni rliä'preni xpala'n Dad. Nani di guiliä'p xpala'n Xi'nni, dizani guiliä'p xpala'n Xtdadni ni baxhałni biädni.

<sup>24</sup> Rniliä, rniliäpac lojtu, nani rucudiajg xtidxä, ni chalilajzani nani baxhał narä, ni'c rajpni yälnabajñ par tejpas; niluxh dini ted lo yälguxhtis, alga abiriini lo yälgujt, agudejdni lo yälnabajñ. <sup>25</sup> Rniliä, rniliäpac, sidzujñ or, luxh alabidzujñni, cheni siejn diajg rebengut xse' Xi'n Dios, luxh reni riejn diajgñi diidxga sibañsacreni lo rebengut. <sup>26</sup> Si'cni rajp Dad Dios yälnabajñ lagajcsi laani, sigajcza badeedni lo Xi'nni ga'pni yälnabajñ lagajcsi laazani. <sup>27</sup> Badeedzani lojni yälnabee te gunni yälguxhtis, sa'csi najcni Xi'n Dios ni gujc Niguii. <sup>28</sup> Na'c rdxelojtu rediidxre, sa'csi sidzujñ or cheni guiraa reni yu' neñ baa siejn diajgreni xse'ni <sup>29</sup> siriizareneni neñ baa. Reni bejn dzunba'sa'c siriireni te guibañsacreni loj yälnabañsa'c, niluxh reni bejn dzungujdx, siriireni te guibañsacreni te tedreni lo xcälguxhtis Dios.

### *Nani ruluiloj yälnabee ni rajp Jesús*

<sup>30</sup> Xhet rajcni runä lagajcsi narä. Sigajc ni riejn diağ, sigajcza runä yälguxhtis. Luxh yälguxhtis ni runä laaca najcni sa'csi dina quilä gunä nani rlazätis, rguilätis gunä si'c ni rlanj Dad nani baxhał narä. <sup>31</sup> Palga narätis rniä diidx lagajc xcuentä, xhet sajcdi diidxga. <sup>32</sup> Yu' stee nani rniliä diidx xcuentä, luxh nancheä diidx ni rniini xcuentä sacduxhni, guliipacni. <sup>33</sup> La'tu abaxhaltu chu huij loj Juan, huinabdiidxreni lojni "chu najc bejnga", niluxh badzu'ni diidx lojreni guniini diidx guliipac xcuent chu nacä. <sup>34</sup> Narä dina jiuä diidx nani rnii rebejn xcuentä luxh canisacä rediidxre te laatu lo xtojltu. <sup>35</sup> Juan gujc si'c te bajl ni ralguij, basanjzani. Luxh la'tu huihuiituni bibalajztu lo xpianijni balsi dxej. <sup>36</sup> Luxh narä rapä xhi ruluilojru chu nacä lo diidx ni gunii Juan; sa'csi lagajc dzuun nani baniidx Xtdadä gunä, lagajc redzuun ni runä, huenliisi ruluilojreni Xtdadä Dios baxhał narä. <sup>37</sup> Xtdadä ni baxhał narä lojtu agunilii chu nacä. Gajdpactu jiejn diajg xse'ni, gajdzatu fii lojni. <sup>38</sup> Dizatu ga'p xtiidxni neñ lastootu, sa'csi di lajztu chalii xtiidx nani baxhał narä. <sup>39</sup> La'tu rołduxhtu reguijtz xten Dios sa'csi rchalotu si'c sidxältu yälnabajñ par tejpas, luxh lagajc reguijtzga rusule' chu narä. <sup>40</sup> Naadditu jiaädту loä te ga'ptu yälnabajñ par tejpas.

<sup>41</sup> Narä dina quilä chu bejn guiliä'p xpala'nä nez loä. <sup>42</sup> Luxh narä anumeätu, ananä ditu chanälajz Dios neñ lastootu. <sup>43</sup> Narä biälä xcuent Xtdadä, luxh ditu gucudiajg xtidxä; paru jiaäd chu stee bejn xcuentceni, ni'c sii sucudiajgtu xtiidxni. <sup>44</sup> Xho gac chalilajztu, ni rliä'ptu xpala'n lagajc sa'tu. Ditu quuil xho gac guiliä'p Gueb Dios xpala'ntu. <sup>45</sup> Di naatu pet narä ni chale'cä xquejtu lo Xtdadä. ToMoisés ni chale'c xquejtu, luxh rujntu xhigab lagajc xleiini gacnäj la'tu. <sup>46</sup> Paru la'tu nililajzpcactu xtidx toMoisés, dxejc niliiza lajztu xtidxä sa'csi xcuentä bacuaa toMoisés lo reguijtz. <sup>47</sup> Palga ditu chalilajz nani bacuaani lo reguijtz, xho chalilajztu rediidx nani cania lojtu, ä?

## 6

### *Bayaan Jesús gaii mil niguii*

(Mt. 14:13-21; Mr. 6:30-44; Lc. 9:10-17)

<sup>1</sup> Che gulujx gujc recosre, dxejc sää Jesús stelaad nezro' nisdoo xten Galilee, nani rniizareneni nisdoo xten Tiberias. <sup>2</sup> Sanajl xhidajl bejn ni sa'csi rhuiireni remilagwr ni rujñni lo rebenracxhuu. <sup>3</sup> Dxejcti huä'p Jesús yejc te dajn, ro'c gurenäjni rexpejn pacni. <sup>4</sup> Niluxh ameer gac lanij pascw xten rexpejn Israel, cheni rudeedreni xquixhtios lo Dios xcuent dxej ni biriiireni Egipto. <sup>5</sup> Cheni guläs Jesús lojni, bahuiini siädä xhidalduxh bejn, siädäreni nez lojni, dxejcti räjpni loj Felipe:

—¿Caro guisiinu yätxtiil te gau rebejnre?

<sup>6</sup> Dxejc räjpzani si'c te don xhi xhigab gun Felipe, luxh laani anajñni xho gunni. <sup>7</sup> Räjp Felipe lojni:

—Di tio'p gayuu beex yätxtiil gal te gauren i tlagaj.

<sup>8</sup> Tej rexpejn pacni ni laa Andrés, bejtz Simón Pedr, räjp lojni:

<sup>9</sup> —Ree suga' te biuux ca' gaii yätxtiil con tio'p bajl, xhixh sajł ni'c gau reben xhidajlre?

<sup>10</sup> Dxejcti räjp Jesús:

—Coljejtz loj rebejnre cuereni.

Yuduxh guixa' ro'c. Dxejcti gurej reniguii. Si'cti gaii mil najc reniguii. <sup>11</sup> Dxejcti cua' Jesús yätxtiilga, badeedni xquixhtios lo Dios, gudisni yätxtiilga lo rexpejn pacni. Dxejcti rexpejn pacni gudisrenini loj rebejn nani sobga'. Sigajcza gudisreni rebajł si'ctisni rlanjreni gauren i.

<sup>12</sup> Che gulujx gudajwreni, gudxaj xque'reni, dxejcti räjp Jesús loj rexpejn pacni:

—Colgutie' guiraa reyätxtiilbiujy nani bia'n te xhet nitdi.



<sup>13</sup> Batie'tireni reyättilbiujy, guläsreni tzubitio'p dxijm yättilbiujy nani bia'n lo gaii yättilga nani gula' gudajwreni. <sup>14</sup> Che bahuii rebejnğa reseen, remilagwr nani bejn Jesús, dxejc räjpreni:

—Guluiipacni, laa dee ni najc niguii ni rnii xtidx Dios nani cabääznu jiääd lo guedxliuj.

<sup>15</sup> Sas che gucbee Jesús cayujnreni xhigab jädnaazrenini te niujnreni gacni rei te guinbeeni lojreni, biriini ro'c, xtebni gubisacni neñ dajn.

### *Gusaj Jesús lo nisdoo*

(Mt. 14:22-27; Mr. 6:45-52)

<sup>16</sup> Che gojl guxhijn, bidzujn rexpejn pacni lo nisdoo. <sup>17</sup> Biu'reni neñ te barcw te tedreni lo nisdoo nez guedx Capernaum. Abicäjy lo yuj niluxh gajd Jesús gubi' lojreni te chääni. <sup>18</sup> Gusloj cayäjs nisdoo xcuent te beduxh nani cabi'. <sup>19</sup> Ni'cni che gusajreni si'cti gaii o xho'p kilómetro, bahuiireni siäddzungajxh Jesús lo barcw, lo nisdoo siädsajni. Bidxebduxhreni. <sup>20</sup> Luxh laani räjpni lojreni:

—Naräni. Na'c guidxejbtu.

<sup>21</sup> Dxejrcu cuäjbreni biu'ni neñ barcw. Dxejcti bidzungajczeni stelaad lo yuj cadro sääreni.

### *Caguuil rebejn Jesús*

<sup>22</sup> Che bara yääl, rebejn nani bia'n stelaad ro' nisdoo, bahuiireni asanä rexpejn pacni barcw bääz nani suga' ro'c, niluxh di Jesús nij, xtebsireni sääreni. <sup>23</sup> Luxh bidzungajc sgaii barcw nani birii guedx Tiberias, te lajt ni tre' gajxh cadro gudajwreni yättil che guluixh badeed Jesús xquixtios lo Dad. <sup>24</sup> Che bahuii rebejn ruti Jesús ro'c, niclaza rexpejni, biu'reni neñ rebarcw, sääreni guedx Capernaum satiilreni Jesús.

### *Jesús najc yättil xten yäl nabajn*

<sup>25</sup> Che bidxälreni Jesús stelaad ro' nisdoo, räjpreni lojni:

—Mastr, ¿guc bidzujnlu ree?

<sup>26</sup> Badzu' Jesús diidxre, räjpni lojreni:

—Rniliä, rniliäpac lojtu, caguilto narä sa'csi gudajwtu, gudxaj xque'tu, et sa'csi bahuiid-itu remilagwr nani benä. <sup>27</sup> Na'c guntu dzuun ganax par yälrajw nani rnitloj. Colejcn dzuun par yälrajw nani di nitloj, ni rniidix yäl nabajn par tejpas. Yälrajwre suniidx Xi'n Niguii, sa'csi loj rebejn baluii Xtadni, Diospac, laani najc Xi'npacni.

<sup>28</sup> Dxejcti räjpreni:

—¿Xhini'c jiennu te gac jienpacnu dzuun ni rlajz Dios?

<sup>29</sup> Räjp Jesús lojreni:

—Dee najc ni rlajz Dios guntu: chalilajztu xtidx narä, nani baxhalni.

<sup>30</sup> Räjpreni lojni:

—¿Xhi seen gunlu te guihuiinu xcäl mibeelu te cholilajznu xtiidxlu? ¿Xhi dzuun rujnlu?

<sup>31</sup> Retoxtdadnu gudajwreni yättil ni laa mana loj reyubijdz si'cni caj loj reguijtz: “Badeedni yättil ni biabj xhaguibaa gudajwreni.”

<sup>32</sup> Räjpza Jesús:

—Rniliä, rniliäpac lojtu, xhet toMoisésdi ni badeed yättil ni biabj xhaguibaa. Xtadä ni suniidx yättil nani siäädpac xhaguibaa. <sup>33</sup> Sa'csi yättil xten Dios najc bejn ni siääd xhaguibaa, niluxh laani ruedeedi yäl nabajn par tejpas loj reben guedxliuj.

<sup>34</sup> Räjpreni:

—Dad, baniidx yättilga loonu.

<sup>35</sup> Dxejcti räjp Jesús lojreni:

—Narä nacä yättil xten yäl nabajn nani riäj jiääd; chutis ni jiääd loä diruni guiliaan, niluxh chutis ni rillilajz xtidxä diruni jiojl par tejpas. <sup>36</sup> Aguniä lojtu, la'tu ditu chalilajz, luxh abahuiitu loä. <sup>37</sup> Guiraa renani abaniidx Xtadä loä, siäädni loä, niluxh chutis ni jiääd loä dina cuälazäni. <sup>38</sup> Sa'csi narä siälä xhaguibaali te gunä si'c ni rlajz Xtadä, xhet si'cdi ni rlazädi. <sup>39</sup> Dee najc ni rlajz Xtadä nani baxhal narä: na'c nit nicla tej renani baniidxni loä, te guspañsacä guiragajczeni che gal dxej lult ni riäj jiääd. <sup>40</sup> Scree rlajz nani baxhal narä: guiraa renani fi lo Xi'n Dios, näj chalilajzreni xtiidxni, xca'reni yäl nabajn par tejpas niluxh narä suspañsacäreni che gal dxej lult ni riäj jiääd.

<sup>41</sup> Rediidxre bejn gusloj casiejy rexpejn Israel xcuent Jesús sa'csi räjpni: “Narä nacä yättil ni biäjt xhaguibaa.” <sup>42</sup> Dxejcti räjpreni:

—¿La et Jesúsdi, xi'n José dee, ä? Nuure numbeenu xtadni, xnanni, ¿xhoxh rniini xhaguibaa biäjtni?

<sup>43</sup> Dxejc räjp Jesús lojreni:

—Na'c rusieinäj sa'tu. <sup>44</sup> Rut rajcädi riääd loä palga di Xtadä ni baxhal narä jädnäni loä, te guspañsacäni che gal dxej lult ni riäj jiääd. <sup>45</sup> Loj reguijtz ni bacuaa redade' ni gunii

xtidx Dios caj scree: “Sului Dios guiraareni.” Ni'cni guiraa reni rucuardiajg xtdix Xtdä, reni rseed lojni, reni'c ni jiaäd loä.

<sup>46</sup> 'Dinä guiniä yu' chu abahuii lo Dios; tejtis ni abahuii lojni: nani baxhaļ Dios, ni'ctis abahuii lojni. <sup>47</sup> Rniliä lojtu che rniä: nani chalilajg xtdixä, ni'c rajp yalnabajņ par tejpas. <sup>48</sup> Narä nacä yätxtiil nani ruedeē yalnabajņ. <sup>49</sup> Retoxtadtū gudajw mana ni bastejb Dios lo reyubijdz, dxejcti gujzareni. <sup>50</sup> Dee najc yätxtiil ni siääd xhaguibaa, te chutis ni gau yätxtiilga dini guet. <sup>51</sup> Narä nacä yätxtiilbajņ ni siääd xhaguibaa. Palga yu' chu gau yätxtiilre, sibajņni par tejpas. Yätxtiil nani runidxä narä te xca' rebeņ guedxliuj yalnabajņ najc lagajc bältiexhä.

<sup>52</sup> Dxejcti gusloj casiejy rexpejņ Israel räjpreni:

—¿Xho gac guniidx dee bältiejxhni guidauunu, ä?

<sup>53</sup> Räjį Jesús:

—Rniliä, rniliäpac lojtu, palga ditu gau bältiejxh Xi'n Dios ni gujc Niguii, palga dizatu yä xtiejnii, digacdi ga'ptu yalnabajņ. <sup>54</sup> Nani gau bältiexhä, nani yäza xtienä, ni'c rajp yalnabajņ par tejpas, niluxh suspansacäni che gaļ redxej lult. <sup>55</sup> Sa'csi bältiexhä najc te yälrausa'cpac, xtienä najcza te yälräsa'cpac. <sup>56</sup> Nani gau bältiexhä, nani yäza xtienä, ni'c yu'pac con narä, luxh narä yu'äza con laani. <sup>57</sup> Xtdä ni baxhaļ narä rajp yalnabajņ par tejpas. Narä nabaņä xcuent laani. Sigajcza nani rajw narä, sibajņzani xcuent narä. <sup>58</sup> Dee najc yätxtiil nani biääd xhaguibaali; dini gac si'c mana ni gudajw xtdadu dxejc empac gujtreni, sa'csi nani gau yätxtiilre sibajņni par tejpas.

<sup>59</sup> Recosre baluii Jesús neņ te guidobäz laļ ni guyu'ni guedx Capernaum.

*Diidx xten yalnabajņ par tejpas*

<sup>60</sup> Che biejn diajgreni si'c, xhidajļ rexpejņpacni räjp:

—Naganduxh najc rextiidxni. ¿Chu laa nani gac cuadiajgni?

<sup>61</sup> Dxejcti gucbee Jesús cagusiejyreni xcuent rediidxga, dxejc gunabdiidxni räjpni:

—¿La rusieed rediidxre la'tu, ä? <sup>62</sup> ¿Xhicha guntu paru fiitu chä'p Xi'n Dios ni gujc Niguii cadro guyu'ni galoo? <sup>63</sup> Sprit xten Dios najc ni ruedeē yalnabajņ; bältiejxhni xhet rujndini gaan. Rediidx nani guiniä lojtu najc didxlii xcuent recos xten Sprit, luxh rediidxga ruedeē yalnabajņ par tejpas. <sup>64</sup> Luxh laļtis yu' lojtu reni di chalilajg.

Sa'csi Jesús nancheeni galooli chu reni'c di chalilajg, anajņzani chuni'c guto'ni, guteedni laani ladzņaa rebeņ doļļ. <sup>65</sup> Dxejcti räjpni:

—Ni'cni rniä lojtu, nicla tej rut sajcti jiaäd loä palga di Xtdä jiaädni loä.

<sup>66</sup> Lagajc dxejc gusloj cabicaj xhidajļ rebeņ ni agujc xchej gusanäj Jesús, dirureni nisianäj Jesús. <sup>67</sup> Dxejcti räjp Jesús loj guidzubitio'p rexpejņpacni:

—¿La nāgajcza la'tu rļajztu jiuu, ä?

<sup>68</sup> Badzu' Simón Pedr diidxre, räjpni:

—Dad, ¿chuloj chonnu? Luj rajplu diidx ni ruedeē yalnabajņ par tejpas. <sup>69</sup> Nuure abiolilaaznu, anajņnu najclu Crist Xi'n Dios nani nabajņ.

<sup>70</sup> Badzu' Jesús diidxre, räjpni:

—¿La et lagajc narädi guleä guitzubitio'ptu? Luxh tejtū najc beņdxab.

<sup>71</sup> Diidxga guniini xcuent Judas Iscariote, xi'n Simón, sa'csi Judas najc ni guto'ni mase nadxaagni lo guitzubitio'p rexpejņpac Jesús.

## 7

*Di rebejtz Jesús chalilajz*

<sup>1</sup> Che gujcti recosre, cansaj Jesús nez reyuj xten Galilee, di rļajzni jia'nni nez reguedx Judea sa'csi rļajz rebeņ ro'c ju'tni. <sup>2</sup> Luxh ameer gaļ lanij xten cose'ch xten guidoguijđ, te relanij xten rexpejņ Israel. <sup>3</sup> Ni'c räjp rebejtz Jesús lojni:

—Na'c jia'nlu ree. Huij Judea te nāja rexpejņpacu fii redzunro nani rujnlu. <sup>4</sup> Sa'csi rut rujndi xtzuunni xhiga'tz palga rļajzni gabee bejņ xhi dzuun rujņni, te gumbee bejņni. Palga rujņpacu redzuunre, baluini lo guiraa rebeņ guedxliuj.

<sup>5</sup> Guniireni si'c lojni sa'csi nicla rebejtzni di chalilajg xtiidxni. <sup>6</sup> Dxejcti räjp Jesús lojreni:

—Gajd xhorä guidzujņ, niluxh par la'tu xhitis or najc hueen. <sup>7</sup> Di gacdi guidxe'ch rebeņ guedxliuj lojtu, luxh rdxe'chreni loä sa'csi narä rniliä xcuentreni: dzunguijdx najc xtzuunreni. <sup>8</sup> La'tu colchäj lanij; narä dina cha'a lanijga sa'csi gajđ xhorä gaļ.

<sup>9</sup> Che gulujx guniini si'c lojreni bia'ntini nez Galilee.

*Huij Jesús lanij xten retabernaculos*

<sup>10</sup> Dxejcti che asää rebejtzni lanij, dxejc nāja laani sääni lanij, luxh dini nusäbdiidx, si'c xhiga'tz sääni. <sup>11</sup> Dxejcti caguil rexpejņ Israelni lo lanijga, räjpreni:

—¿Concha niguiiga?

<sup>12</sup> Lo rebejn xhidaalga yu' xhidajl bejn ni cagusiejyreni xcuentni. Yu'reni räjp: "Hueen najcni", per sgaiireni räjp: "Dini gac hueen. Cagusgueeni rebeñguejdx."

<sup>13</sup> Nicla tejreni xhet casäbdiidxdiren xhini'c caniireni. Direni guinii dip sa'csi rdxejbreni rexpejn Israel nani rnibee.

<sup>14</sup> Agurojl lanij, che biu' Jesús neñ guidoro. Dxejcti gosloj caguluiini. <sup>15</sup> Dxejcti rdxelej rexpejn Israel nani rnibee, räjpreni:

—¿Xho najn dee guiraloj, niluxh dini nisieed xleii toMoisés?

<sup>16</sup> Badzu' Jesús diidxre, räjpni:

—Yälrlulii nani caluiyä et xtenädini, xten nani baxhal naräni. <sup>17</sup> Palga yu' chu rlajz gun nani rlajz Dios, sacbeeni la xten Dios najc reyälrlulii xtenä, o la lagajcsi narä rbää diidx ni caguluiä. <sup>18</sup> Nani rusule'ni diidx nani lagajc laani rbääni, ni'c rniini diidxga te guiliä'p rebejn xpala'nini, luxh nani rguuil chä'p xpala'n nani baxhalni, ni'c ni rnii didxlii, xheti yälrusguee neñ lastooni. <sup>19</sup> ¿La di toMoises nuniidx leii lojtu, ä? Niluxh nicla tejtü di gosooxtidx leiiga. ¿Xhicuent rlajztu ju'ttu narä, pes?

<sup>20</sup> Badzu' rebeñ xhidajlga diidxre, räjpreni:

—¿Xpirt bendxab yu' lastoolu! ¿Chuni'c rlajz ju'tlu?

<sup>21</sup> Badzu' Jesús diidxre lojreni, räjpni:

—Tejtis dzuun benä con xcälrmibeä, dxejc guiraatu cadxelojtu sa'csi benäni dxej ni rusilajztu. <sup>22</sup> Ni'cni baniidx toMoisés lojtu yälru'tu bee, luxh etlaadini guläxtiejnini, agac guläxtiej retoxtagdoolootuni. La'tu rusäl'tu bee rebuiux mase najcni dxej nani rusilajztu. <sup>23</sup> Mbaj pes, palga rajc rusäl'tu bee bejn te dxej nani rusilajztu didi nit xleii Moisés, ¿xhicuent rdxe'chtu löä sa'csi basicäpac te bejn te dxej nani rusilajztu, ä? <sup>24</sup> Na'c rujntu yälguxhtis si'ctis ni rlajztu. Colyejn yälguxhtis con yälguxhtis xten Dios.

### *Rusule' Jesús casiädni*

<sup>25</sup> Dxejcti gosloj gaii bejn Jerusalén cayujn yälgunabdiidx, räjpreni:

—¿La etlaadi dee ni caguilreni te ju'trenini, ä? <sup>26</sup> Ani asuga', caniini nez loj guiraa rebeñguejdx, niluxh rut rudxoindini. ¿Xhaa ahuililajz reguxhtis, regubier laani najcpacni Crist, ä? <sup>27</sup> Niluxh nuure nadoncheenu caro siäd niguiire, niluxh che jiäd Crist, rut gacbeedi caro siädni.

<sup>28</sup> Caguluii Jesús neñ guidoo che biejen diajgni rediidxre, dxejc dipduxh guniini, räjpni:

—La'tu numbeetu narä, najntu caro siälä; luxh dina niälä lagajcsi narä; nani baxhal narä guliipac nabajjni, luxh la'tu ditu gumbeeni. <sup>29</sup> Luxh narä numbeäni, sa'csi lojni birii, laani baxhalzani narä.

<sup>30</sup> Dxejc rlajzreni niniaazrenini, niluxh rut gunaazdini, sa'csi gajd xhorñi gal. <sup>31</sup> Xhidajl bejn lo rebeñ xhidajlga huililajz xtiidxni, dxejcti räjpreni:

—Cheni jiäd Crist, ¿xhixh sujnruni milagwr loj nani rujn dee, ä?

### *Ruxhal' refarisee guixhajz guiniaaz Jesús te jiäuni*

<sup>32</sup> Che biejen diajz refarisee xhi canii rebejn xcuent Jesús, laareni näjza rebixhojz nani rnibee lo rebixhojz baxhalreni guixhajz te guiniaazreni Jesús te jiäuni. <sup>33</sup> Sas räjp Jesús lojreni:

—Bale'si dxej su'ä lojtu, dxejcti guibi'ä loj nani baxhal narä. <sup>34</sup> Siguuiltu narä, niluxh ditu guidxäl narä, sa'csi cadro cha'ä digacdi jiäd'tu.

<sup>35</sup> Ni'c gunii rexpejn Israel lo sa'reni; räjpreni:

—¿Cacharo chääni ni'c di gacdi guidxäl'nuni? ¿Xhaa sijni loj rexpejn Israel nani nare'ch nez lajdx regriegos te guluini regriegos? <sup>36</sup> ¿Xhi säloj diidxre nani guniini loonu: "Siguuiltu narä, niluxh ditu guidxäl narä, sa'csi cadro cha'ä di gacdi jiäd'tu"?

### *Regueu nisanabajn*

<sup>37</sup> Lult dxe lanij, ni najc dxero, gusulii Jesús dipduxh guniini, räjpni:

—Palga yu' chu cayojl, sujiädni löä te yäni. <sup>38</sup> Nani chalilajz xtiidxä si'cni caj lo rexquijtz Dios neñ lastoolini siliejn nisanabajn.

<sup>39</sup> Rediidxre guniini xcuent Sprit Dhan nani churu jiädläjz neñ lastoo reni rililajz xtiidxni, sa'csi gajd Sprit Dhan jiäd, sa'csi gajd Jesús guibañsac lo rebengut.

### *Gucgala' rebejn*

<sup>40</sup> Lo rebeñ xhidajlga yu' reni biejen diajgreni rediidxga, dxejc räjpreni:

—Guliipacni, dade're najc laapac ni siäd, si'c ni rnii xtiidx Dios.

<sup>41</sup> Yu'zarenini räjp:

—Dade're najc Crist ni cabääznu.

Yu'za sgaii ni räjp:

—Gurniälojtu jiäd Crist nez Galilee. <sup>42</sup> Ni loj rexquijtz Dios caj riäl'pac gac Crist te rexagdoos torejii David, jiädzani guedx Belén, lagajc guejdx cadro siäd torejii David.

<sup>43</sup> Dxejcti gucgala' rebejn̄ xcuent Jesús. <sup>44</sup> Yu'reni rlaiz chááni pres luxh rut biajxdi gunaazni.

*Di reguxhtis chalilajz biáad Crist*

<sup>45</sup> Gubi' reguixhajz xten guidoo loj rebixhojzro nájza refarisee. Dxejcti gunabdiidxreni loj reguixhajz, rájpreni:

—¿Xhicuent dítu niádnáni?

<sup>46</sup> Badzu' reguixhajz diidxre, rájpreni:

—¿Gajdpac te bejn̄ guinii si'cni rniú bejn̄ga!

<sup>47</sup> Dxejc rájp refarisee:

—¿La náj la'tu abasgueeni, á? <sup>48</sup> ¿Xhixh loj regubier o loj refarisee yu' chu tej ni ahuililajz xtiidxni, á? <sup>49</sup> Reben̄ xhidajlre ni di gan xleii toMoisés, reni'c agunijtpac.

<sup>50</sup> Nicodem, nani huij lojni te guxhijn, najc te refarisee. Laani rájjni lojreni:

<sup>51</sup> —Lo xleiiu caj: digacdi guntu yálguxhtis te bejn̄ palga gajdntu gucuadiagxgaa xtiidxni, te don xhi bejn̄ni.

<sup>52</sup> Badzu'reni diidxre rájpreni lojni:

—¿La nájza luj siáadlu Galilee, á? Bilsa'c xhi caj lo xquijtz Dios, suhuiilu nicla tej niguii nani rniú xtidx Dios di jiáad nez Galilee.

*Gunaa nani biga' carálguixh con te niguii*

<sup>53</sup> Dxejc cade tejreni sii rolizjreni.

## 8

<sup>1</sup> Dxejcti huij Jesús nez dan Oliib. <sup>2</sup> Rsilru gubi'ni, bui'ni neñ guidoo. Luxh sanuutis siáad guiraa rebeñguejdx lojni. Dxejc ro'c gurejni, gusloj caguluiinireni. <sup>3</sup> Dxejcti biáad refarisee nájza reben̄ najn, biádnäreni te gunaa nani biga' carálguixh con te niguii. Basujreni galáii reni suga' ro'c. <sup>4</sup> Rájpreni loj Jesús:

—Mastr, gunaaare biganáj te niguii carálguixhrene, niluxh yu' cháálnu. <sup>5</sup> Loj lei xten Moisés caj guicuaanu guij yejc sa' gunaaga te guetni. Luj ¿xhicha naalu?

<sup>6</sup> Si'c rájpreni lojni te gaxájsi gunijtni te diidx te gac cue'creni xquejni. Niluxh Jesús basajbtisni lojni lo yuj, gusloj cagucuaani lo yuj con bicueñaani. <sup>7</sup> Dxejc sanuutisreni canabdiidxreni, huisutini, rájjni:

—Nani yu' lojtu ni xhettipac xtojlni, ni'c ganiddoo sugucuaani guij yejc gunaaare.

<sup>8</sup> Basabsac lojni lo yuj sanuutis cagucuaani con bicueñaani lo yuj. <sup>9</sup> Luxh laareni che biejn̄ diajgrenti diidxga, sa'csi yu' xtojlni, gusloj biriireni tebgajreni, ganid ni najc beñgolru, dxejcti ni najc huinru. Dxejcti bianxteb Jesús nájza gunaa ni suga' galáiiireni. <sup>10</sup> Dxejc gusulii Jesús, luxh sa'csi rutru lojdi bahuiini, xtebtis gunaaga, rájjni lojni:

—Gunaa, ¿con reni cabe'c xquejlu? ¿La rut bacuaquijdiru luj, á?

<sup>11</sup> Rájjp Gunaaga:

—Nicla tejreni, Dad.

Dxejcti rájp Jesús lojni:

—Niclaza nará dina gucuaquiáru luj. Huij, na'cru gunlu dojl.

*Jesús najc bianij xten guedxliuj*

<sup>12</sup> Gunii Jesús lo rebejn̄ stehuált, rájjni lojreni:

—Nará nacá bianij xten guedxliuj; nani jiádnajl nará dini sa lo yálnacáij, sica'ni bianij ni ruedeepac yálnabajn̄.

<sup>13</sup> Dxejcti rájp refarisee lojni:

—Luj canilú diidx lagajcsi xcuentlu. Xhet sajcdi sa' diidxga.

<sup>14</sup> Badzu' Jesús diidxre, rájjni lojreni:

—Masque lagajc nará rniá diidx xcuentá, sajc xtidxá, guliipacni, sa'csi ananá caro siälá, ananáza caro cha'á. Niluxh la'tu dítu gan caro siälá, niclaza caro cha'á. <sup>15</sup> La'tu rujntu yálguxhtis si'c najctis rexhigab xten beñ guedxliuj. Nará rut lojdi runá yálguxhtis. <sup>16</sup> Palga guná yálguxhtis, yálguxhtis xtená laaca najcni, sa'csi et xtebádi runá yálguxhtis, sa'csi nará náj Xtađá ni baxhał nará rien̄nuni. <sup>17</sup> Luxh lo xleiiu caj diidxre: “Che rniú tio'p bejn̄ tejsi diidx, didxliini, colchalilajzni.” <sup>18</sup> Nará rniilápac diidx lagajc xcuentá, dxejcti Xtađá nani baxhał nará rniilizani diidx xcuentá.

<sup>19</sup> Rájpreni loj Jesús:

—¿Caro yu' xtadlu?

Rájjp Jesús lojreni:

—Ditu gumbee nicla nará, niclaza Xtađá; paru niembeetu nará, niembeezatu Xtađá.

<sup>20</sup> Rediidxre gunii Jesús cadro re' gojn, lał ni caguluiini neñ guidoro niluxh rut gunaazdini sa'csi gajd xhojni guidzujn.

*Cadro cha'ä, la'tu digacdi jiäädtu*

<sup>21</sup> Gunisac Jesús lojreni, räjpni:

—Narä sia'ä, luxh la'tu siguiiltu narä, niluxh loj xtojltu sejtto. Cadro cha'ä di gacdi jiäädtu.

<sup>22</sup> Räjp rexpejn Israel loj resa'reni:

—¿Xhaa sugu'tni lagajc laani, ni'cni najni di gacdi chonnu cadro chääni?

<sup>23</sup> Räjp Jesús lojreni:

—La'tu najctu beñ lo yuj. Narä nacä beñ ni siääd jiaa. La'tu najctu beñ guedxliujre. Luxh narä dina gacätis beñ guedxliujre. <sup>24</sup> Ni'cni guniä lojtu, sejtto lo xtojltu sa'csi palga ditu chalilajz nacä chu nacä, sejtpectu lo xtojltu.

<sup>25</sup> Dxejcti räjpreni lojni:

—¿Chuxh najclu?

Dxejcti badzu' Jesús diidxre lojreni, räjpni:

—¿Xhini'c guniä lojtu galooli? <sup>26</sup> Xhidajl diidx rlazä guiniä, xhidajlza yälguxhtis rlazä gunä xcuenttu sa'csi ditu chalilajz, per nani baxhañ narä najc beñ guliipac; nani biejn diagä guniini, rediidxga rniä loj rebeñ guedxliuj.

<sup>27</sup> Luxh laareni direni niacbee la xcuent Dad Dios ni caniini. <sup>28</sup> Ni'cni räjp Jesús lojreni:

—Cheni guiliästu Xi'n Niguii jiaa, dxejc sabeetu laa narä ni baxhañni, luxh xhetliidi runä lagajcsi xcuentä. Si'cni baluii Dad narä, si'ctis rniä. <sup>29</sup> Nani baxhañ narä suganäjni narä. Gajd Dad gusanxteb narä, sa'csi runätis ganax redzuun nani rchagläjzni.

<sup>30</sup> Lañ ni caniini si'c, xhidajlreni huililajz xtiidxni.

*Rexi'n Dios con remos xten dojl*

<sup>31</sup> Dxejcti räjp Jesús lo rexpejn Israel nani huililajzga:

—Palga la'tu sutijptu, guzoohtu xtidxä, dxejc guliipac najctu xpenä. <sup>32</sup> Sumbeezatu nani najc didxguli, niluxh didx guliiga suslaa la'tu lo xtojltu.

<sup>33</sup> Räjpreni lojni:

—Rexagdoo toAbraham najcnu, rut chu lojdi gudo'nu si'c mos. ¿Xho mood naalu "siliaatu"?

<sup>34</sup> Räjp Jesús:

—Riniliä, rniliäpac lojtu, chutis ni rujn dojl najc mos xten dojl. <sup>35</sup> Nani najc mos, dini jia'n rolijz xlamni guideb guibajjni, niluxh nani najc xi'n lamga, ni'c sii sia'n rolijz xtdadni guideb guibajjni. <sup>36</sup> Ni'cni, palga ruslaa xi'nni la'tu lo dojl, dxejcsii apac guñaatu. <sup>37</sup> Ananä najctu xagdoo toAbraham, luxh la'tu rlanjtu ju'ttu narä sa'csi di xtidxä jiu' lo xcäriejntu. <sup>38</sup> Narä rniä nani abahuiä con Xtdä; luxh la'tu rujntu nani biejnza diajgtu lo xtadtu.

<sup>39</sup> Badzu'reni diidxre, räjpreni lojni:

—Xtdadnu najc toAbraham.

Dxejc räjp Jesús lojreni:

—Palga la'tu najcpectu xi'n toAbraham, sujntu sa' dzuun ni bejn toAbraham. <sup>40</sup> Luxh naj rlanjtu ju'ttu narä, sa'csi rniliä rediidx nani baluii Dios loä. ¡Di toAbraham niujn si'c! <sup>41</sup> La'tu rujntu xtzuum xtadtu.

Dxejc räjpreni lojni:

—Nuure dinu gac xi'n chälbejnndi; nuure tejtis xtdadnu yu', laani najc Dios.

<sup>42</sup> Dxejcti räjp Jesús:

—Paru guliini najc xtadtu Dios, ninälajztu narä sa'csi loj Dios biriä siälä ree. Xhet lagajcsi xcuentä siälädi; Dios baxhañ narä. <sup>43</sup> ¿Xhicuent ditu gacbee rediidx ni rniä lojtu? Sa'csi di rlanjtu gucuadiajgtu rextidxä. <sup>44</sup> Xtdadtu najc beñdxab. La'tu najctu xi'nni, rlanjtu guntu nani rlanjtsini guntu. Xtdadtu galooli najcni te ni rugu't, dini suu xlaad didxlii, sa'csi xheti didxlii neñ lastooni. Che rniini didx-xhii, si'c rniini sa'csi si'cpac najcni, sa'csi najcni beñ didx-xhii, najczani xtdad didx-xhii. <sup>45</sup> Niluxh narä rniä didxlii, ni'c ditu chalilajz xtidxä. <sup>46</sup> ¿Chu tejtü sajç guluii te dojl ni benä? Narä rniä didxlii. ¿Xhicuent ditu chalilajz xtidxä, ä? <sup>47</sup> Nani najc xpejn Dios, ni'c rucuardiajç xtidx Dios. Sa'csi la'tu ditu gac xpejn Dios, ni'cni ditu gucuadiajç xtidxä.

*Ansde toAbraham, agac nabajn Crist*

<sup>48</sup> Dxejcti badzu' rexpejn Israel diidxre, räjpreni lojni:

—Laaca rniinu luj najclu te bejn ni siääd Samaria, beñdxab yu' lastoolu.

<sup>49</sup> Räjp Jesús lojreni:

—Xhet beñdxabdi yu' lastoä. Nani runätis rliä'pä xpala'n Xtdä, luxh la'tu alga rbälaztu narä. <sup>50</sup> Luxh narä dina quilä chu guiliä'p xpala'nä, yu' chu rguuil guiliä'p bejn xpala'nä, niluxh laani rujjni yalguxhtis. <sup>51</sup> Rniliäpac lojtu, nani riu, nani rusooob xtidxä, dipacni guet.

<sup>52</sup> Dxejcti räjp rexpejn Israel lojni:

—Naj agucbeepacnu yu' beñdxab lastoolu. ToAbraham näjza reniguii nani gunii xtidx Dios, guiraareni agujt. Luxh luj rniilu: "Nani riu, nani ruzoob xtidxä, dipacni guet."

53 ¿Xhixh sajcrulu lo toxtadnu Abraham, ä? Ni laani gujtni, gujtza reniguii ni gunii xtidx Dios. ¿Chuxh rchalolu najclu?

54 Badzu' Jesús diidxre, räjpni lojreni:

—Palga lagajc narä rliä'pä xpala'nä, xhet sajcdi xpala'nä. Per nani rliä'p xpala'nä najc Xtadä, lagajcza Xtadä ni rniitu najc Xtioistu. 55 Niluxh la'tu ditu gumbeeni. Narä numbeäni. Paru guiniä dina gumbeäni, sacä te beñ didx-xhii si'c najctu la'tu. Niluxh dee, numbeäpacni, luxh riuä ni rniini, rusobä xtiidxni. 56 ToAbraham toxtadgoldootu, bibalajzni sa'csi nuhuiini dxej nani jiälä, niluxh bahuiini dxejc bibalazduxhni.

57 Dxejcti räjp rexpejn Israel lojni:

—Nicla gajdlu chu tiubitzuu ijz, ¿xho naalu abahuiilu lo toAbraham?

58 Räjp Jesús lojreni:

—Rniliäpac lojtu, che gajdli guibajn toAbraham, agac nabañä narä.

59 Dxejcti cua'reni guij te nucuaareni yejc Jesús, per di Jesús niga', biriini nen guidoro, gudejdni galäireni. Sä'tini.

## 9

*Basiajc Jesús te bejn ni natiä'p balojni che gojllini*

1 Che cadejd Jesús te lajt, bahuiini sobga' te bejn ni che gojlli bejnğa agajc natiä'p balojni.

2 Dxejc gunabdiidx rexpejn pacni lojni, räjpreni:

—Mastr, ¿chuni'c bejn dojl, la bejnre o la xcuzajzni, ni'c natiä'p balojni che gojlni, ä?

3 Räjp Jesús:

—Nicla laani, niclaza xcuzajzni di niujn dojl. Si'c gojlni te xcuent ni sajcdi bejnre suhuii bejn xho najc xtzuum Dios. 4 Nanab gunä xtzuum nani baxhañ narä ñaj ni najc rdxee, sa'csi cheni guidzujn guxhijñ rut gacdi gun dzuun. 5 Lañi yu'ä lo rebejn guedxliuj, nacä xpianij guedxliuj.

6 Che gulujx guniini si'c, batiobxhejnni lo yuj, bejnni bajñ con xhejnni, gudääbnini con bicuenaani lo rebaloj lotiä'pga. 7 Dxejcti räjpni:

—Huij, huitiib lojlu nen nis ni laa Siloé. Laj nisga sälojza “baxhañni”.

Dxejcti huitiibni lojni. Che gubi'ni, aruhuiini. 8 Dxejcti rexpisin lotiä'pga, ñaj renani galoo bahuiireni natiä'p lojni, räjpreni:

—¿La et laadi dee ni rbej te rutie'ni gojn, ä?

9 Yu'reni räjp:

—Laanini.

Yu'zareni räjp:

—Et laadini, rujnsi lojni si'c.

Laani räjpni:

—Laa naräni.

10 Räjpreni lojni:

—¿Xho mood arien balojlu?

11 Dxejcti räjp dade'ga nani gujc lotiä'p:

—Dade' ni laa Jesús bejn bajñ, gudääbnini baloä, dxejcti najni: “Huitiib lojlu nen te nis ni laa Siloé”, dxejcti che huitiibä loä, lagajc dxejc bien loä.

12 Dxejcti räjpreni lojni:

—¿Con dade'ga ñaj?

Räjpni bejnğa:

—Dina ganä.

*Rebeñ farisee bejn yälgunabdiidx lo dad lotiä'p nani biajc lojni*

13 Huinäreni nani gujc lotiä'pga nez loj refarisee. 14 Luxh sa'csi najcni dxej ni rusilajzreni che bejn Jesús bajñ ni gudääbni loj lotiä'pga te biajc balojni, 15 gunabdiidxsac refarisee loj dade' nani biajc balojni, xho mood arien balojni ñaj.

Laani räjpni lojreni:

—Bajñ gudääbni loä, dxejc gudibä loä, ñaj aruhuiä.

16 Dxejc yu' refarisee ni räjp:

—Di dade' ni bejn dee gac xpejn Dios, sa'csi dini jiu dxej ni rusilajz xpejn Israel.

Yu'zareni räjp:

—¿Xho gac gunni sa' remilagwrga paru najcni beñ dojl?

Ni'cni gula' sa'reni, gujcreni tio'p gala'. 17 Dxejcti gunabdidxsacreni lo ni gujc lotiä'p:

—Luj a', ¿xhi rniilu xcuent nani basiajc balojlu?

Dxejc räjp dade'ga:

—Narä rniä najcni te bejn nani rni xtidx Dios.

<sup>18</sup> Luxh rexpejn Israel naaddireni chalii lajzreni gujcpacni te lotiä'p ni abien balojni, dxejcti gurejdxreni xcuzaajn dade' ni gujc lotiä'pga. <sup>19</sup> Dxejcti gunabdiidxreni lojreni, räjpreni:

—¿Laa xi'ntu dee nani najtu cheni gojllini natiä'p lojni? ¿Xhoxh arien lojni naj?

<sup>20</sup> Badzu' rexuczajjni diidxre, räjpreni:

—Nadonnu laa xi'nnuni, luxh che gojlni natiä'p lojni. <sup>21</sup> Niluxh dinu guidon naj xho mood arien lojni, dizanu guidon chu basiajc balojni. Colguiniabdiidx lojni, anajcni bengool, lagajc laani sajc guiniini xhi gusajcni.

<sup>22</sup> Si'c gunii xcuzaajjni sa'csi rdxejbreni rexpejn Israel, sa'csi agac bia'nreni diidx sibääreni, dirureni gusaan jiu' neñ guidoo chutis te bejn ni naa Jesús najc Crist nani abiääd. <sup>23</sup> Ni'cni räjp rexuczajjni:

—Anajcni bi'n ni ayu' xcäriejnini. Lojni colguiniabdiidx.

<sup>24</sup> Dxejcti guredxsacreni nani gujc lotiä'pga, räjpreni lojni:

—Gulä'p xpala'n Gueb Dios. Nuure nadonnu beñ dojl najc dade'ga.

<sup>25</sup> Dxejcti badzu' dade'ga diidxre, räjpni:

—Dina ganä la najcni beñ dojl o la dini gac. Tejtis nanä: gucä lotiä'p, luxh naj arien balaö.

<sup>26</sup> Stehuält gunabdiidxreni, räjpreni lojni:

—¿Xho bennäjni luj? ¿Xho bejnini basiajcni balojlu?

<sup>27</sup> Badzu' dade'ga diidxre, räjpni:

—Ni aguniä guira'ti lojtu, luxh la'tu ditu jiu xtidxä. ¿Xhicient rlanjtu guinisacäni? ¿Xhixh näj la'tu rlanjtu gactu xpejnpacni, ä?

<sup>28</sup> Dxejc gudilnäjnrenini, räjpreni:

—Luj najclu xpejñni, per nuure najcnu xpejn toMoisés. <sup>29</sup> Anadonnu guninäj Dios toMoisés, niluxh dade're dinu guidon casiäädni.

<sup>30</sup> Dxejcti räjp dade' lojreni:

—Dee najc te cos ni guidxeloj bejn: la'tu ditu gan casiäädni, ñiluxh laani basiajcni balaö! <sup>31</sup> Nadoncheenu di Dios cuadiajg xtidx rebeñ dojl: palga yu' chu rajñ Dios, ni rusoozba xtiidxni, rucuaiajg Dios xtidx sa' bejnga. <sup>32</sup> Che guslojli guedxliuj gajd diajgnu jiejn xcuent te bejn nani rusiajc baloj te beñ lotiä'p nani natiä'p lojni cheni gojllini. <sup>33</sup> Palga xhet lo Diosdi siääd dade're, xhet sajcdi gunni.

<sup>34</sup> Badzu'reni diidxre räjpreni lojni:

—Luj, lo dojlpac gojllu, ¿xho jädluulu nuure?

Dxejcti guläärenini neñ guidoro, barilaagwrenini.

<sup>35</sup> Biejn diajg Jesús guläärenini neñ guidoro, che bidxälñini, räjpni lojni:

—¿La rililajzlu xtidx ni najc Xi'n Dios ni gujc Niguii, ä?

<sup>36</sup> Badzu'ni diidxre, räjpni:

—¿Chuni'c najcni, Dad, te chalilazä xtiidxni?

<sup>37</sup> Räjp Jesús:

—Abahuuulu lojni, lagajcza laani caninäjlu naj.

<sup>38</sup> Dxejcti räjpni:

—Rililazä Dad.

Dxejcti bazuxhijbni te gojñnini.

<sup>39</sup> Räjp Jesús:

—Par yäjguxhtis biälä lo guedxliujre, te fii renani di lojni jien, niluxh reni rien lojni sajcreni lotiä'p.

<sup>40</sup> Refarisee nani suganäjreni, che biejn diajgreni diidxre, räjpreni:

—¿Xhixh najczanu beñ lotiä'p, ä?

<sup>41</sup> Räjp Jesús:

—Paru najctu lotiä'p, rut gucuaquijditu xtojltu, naj sa'csi rniitu rien lojtu, sicaquijtu rextojltu.

## 10

### *Jesús najc te baxtorsa'c*

<sup>1</sup> 'Rniliä, rniliäpac lojtu, nani di jiu' ro' gurajl xte rexiil, alga richu'ni stelaad, rä'pni cuä' gurajl, ni'c najcni te gubaan. <sup>2</sup> Nani riu' nez ro' gurajl xten rexiil, laani najc xpaxtoorreni. <sup>3</sup> Che guidzujñ baxtoor, ruxhal nani rcanäj ro lä', te jiu'ni. Rexiilga numbeereni xse' baxtoor, dxejctiru laani rebejdxni rexiilga, tebgaj xiilga yu' lajni, rinäzanireni cadre naga' guixasa'c. <sup>4</sup> Che rii rexiilga neñ gurajl, sanä baxtoorgarení, luxh numbee rexiilga xse'ni, ni'c rsianäjreni baxtoorga. <sup>5</sup> Luxh dipacreni chanä te baxtoor nani direni gumbee, ruxunreni lojni sa'csi direni gumbee xse' garenca bejn.

<sup>6</sup> Bij Jesús rediidxga lojreni, niluxh direni niacbee xhi säloj ni guniini.

<sup>7</sup> Dxejcti gunisac Jesús diidx lojreni; räjpni:

—Rniliä, rniliäpac lojtu, narä nacä si'c roxlä' xcurajl rexiiil. <sup>8</sup> Guiraa reni abiääd galoo, najcreni ganax gubaan luxh di rexiiil nucuadiajg xse'ni. <sup>9</sup> Narä nacä si'c rolä' xten gurajl, nani jiu' nejzga, silaani loj xtojlni, siu'ni, siriini te guidxälmi guixasa'c gauni.

<sup>10</sup> Ni najc gubaan riäädtsini te cuanni, te ju'tni, te guxhinzani, niluxh narä siälä te ga'ptu yäl'nabansa'c, yäl'nabajn par tejpas. <sup>11</sup> Narä nacä baxtorsa'c; luxh baxtorsa'c sudeed lagajc xcäl'nabajn xcuent rexiiilni. <sup>12</sup> Niluxh te mos ni rajxh, di gac baxtoorpac, ni xhet xtendini najc rexiiil, che rhuiini siääd te cuyo't, ruxuñni, li rbälazni rexiiil. Dxejc rniaaz cuyo't rexiiil, rutie'chzani rexiiil. <sup>13</sup> Mosga ruxuñ sa'csi najcni mostis, luxh dini jiu xhi rsiajc rexiiil.

<sup>14</sup> Narä nacä baxtorsa'c; numbeä reni najcpac rexilä; rexilä numbeezareni narä <sup>15</sup> sigajc numbee Xtääd narä, sigajc numbeäza Xtääd; luxh sudeä xcäl'nabanaä xcuent rexiiilga. <sup>16</sup> Rapäza ste cuaa xiil, ni di gac xten gurajlre; näjza laareni nanab chaxiä, te gusobdiajgreni xtidxä, te guidxagsa' guiro'p cuaareni, gacreni tejtis gurajl, tejtisza baxtoor.

<sup>17</sup> Narä siguiäza xcäl'nabanaä, guetä, te dxejrcu siliässaca xcäl'nabanaä, guibansacä, ni'cni sanälajz Xtääd narä. <sup>18</sup> Rut sajcdi ju't narä, lagajc narä gudedä xcäl'nabanaä, guetä. Rapä yäl'rnibee te gudedä xcäl'nabanaä, guetä, rapäza yäl'rnibee te xcasacä xcäl'nabanaä te guibansacä, sa'csi dee najc yäl'rnibee ni baniidx Xtääd löä.

<sup>19</sup> Xcuent rediidxre gula' sa' rexpejn Israel, gujcreni tio'p gala'. <sup>20</sup> Xhidajlreni canii:

—¿Xhicuent riutuni? ¿La ditu gan te beñdxab yu' lastooni? Yejcni rajc. Xhigac rcuadiajgtu xtiidxni.

<sup>21</sup> Dxejc ste cuaareni:

—Dini gac. Di rediidxre gac xtidx te beñdxab. ¿Xhixh sajc rusiajc beñdxab baloj relotiä'p, ä?

### *Rdxe'ch rebejn loj Jesucrist*

<sup>22</sup> Lagajc neñ redxejga gujc lanij xten xquidoo rexpejn Israel guedx Jerusalén. <sup>23</sup> Najcni bäi najl. Biu' Jesús guidoro, sasajni nez neñ cordoor ni laa xten Salomón. <sup>24</sup> Gubig rexpejn Israel guideb gabi Jesús, räjpreni lojni:

—¿Gucüi gucuat'zluu chu najclu? Palga luj najclu Crist ni cabäüznu jiääd, guiniliini loonu tejpas.

<sup>25</sup> Dxejc badzu' Jesús diidxre, räjpni lojreni:

—Aguniä lojtu si'c, niluxh ditu nililajz. Redzuun nani runä xcuent xcäl'rnibee Xtääd, huenliisi rululiojreni chuni'c nacä. <sup>26</sup> La'tu ditu chalilajz sa'csi ditu gac rexilä. <sup>27</sup> Rexilä numbee xse'ä, luxh narä numbeäzareni, riädnajlzareni narä. <sup>28</sup> Narä rudedä yäl'nabajn par tejpas loj rexilä, luxh direni nitloj par tejpas. Rutza laadi nani sajcdi gudzucajreni ladzñaä. <sup>29</sup> Xtääd baniidxreni löä, laani najcni guroobru, nadipru loj guiraareni. Rut laadi nani sajcdi gudzucajreni ladzñaä Xtääd. <sup>30</sup> Narä näjza Xtääd najcnu tejsi.

<sup>31</sup> Dxejc gulässac rexpejn Israel guij, te nucuaareni yejc Jesús. <sup>32</sup> Dxejcti räjp Jesús lojreni:

—Xhidajl dzuun xten Xtääd abaluiä lojtu, ¿lo redzuunga, xhi tej dzuun rujn gucuauu guij yecä?

<sup>33</sup> Dxejcti räjp rexpejn Israel lojni:

—Xcuent redzuun ni rujnlu dinu gucuua guijlu. Sa'csi guniyajlu, ni'c nucuaanu guij yejclu. Beñ guedxliujlu, luxh najlu najclu tejsi con Dios.

<sup>34</sup> Badzu' Jesús diidxre, räjpni lojreni:

—¿La et loj xleiiditu caj rediidxre: “Narä rniä, la'tu najc redios”? <sup>35</sup> Nancheenu digacdi guidxaa xquijtz Dios. Palga gulalajni redios rebejn nani bejn yälguxhtis loj rexpejn Israel, dxejc <sup>36</sup> naj ¿xhicuent guniitu löä: “Caniyajlu Dios”, sa'csi guniä lojtu narä nacä Xi'n Dios? Ni gule Dios narä, baxhalni narä lo guedxliujre. <sup>37</sup> Palga dina gunä redzuun xten Xtääd, na'c chalilajztu rextidxä. <sup>38</sup> Luxh palga runnäni, mascä ditu chalilajz xtidxä, colchalilajz ni ruluii reyäl'milagwr nani runä, te gacbeetu par tejpas, Xtääd yunäj narä, narä yunäza laani.

<sup>39</sup> Che rlajzreni niniaazrenini stehuält, laani biriini ladzñaareni.

<sup>40</sup> Dxejcti sääni, gubisacni nez stelaad gueu Jordán, nejzga huijia'nni, cadro gusloj batiobnis Juan. <sup>41</sup> Xhidajl bejn bidzujn lojni ro'c, räjpreni:

—Di Juan niujn nicla tej yäl'milagwr luxh guiraa rediidx ni gunii Juan xcuent dade're najc didxliipac.

<sup>42</sup> Xhidalduxhrene huililajz xtiidxni ro'c.

## 11

### *Gujt Larz*

<sup>1</sup> Yu' te dade' ni cayacxhuu ni laa Larz. Rbäjzni guedx Betania, lajdxza rebisiajnni Marii näjza Mart. <sup>2</sup> Mariire, bisiajn Larz, najc nane' ni basäl setnejxh ni' Jesús, batiiazani ni'ni con xquidxejcn. <sup>3</sup> Ni'cni baxhal guiro'p bäljre diidx loj Jesús, räjpreni lojni:



—Dad, xamiigwlu nani sanälajzlu cayacxhuu.

<sup>4</sup> Che biejn diajg Jesús rediidxga, räjpni:

—Di yälracxhuure ju'tni, sa'csi yälracxhuure najc te guluilojni xcälrnibee Dios. Te guluilojza yälracxhuure xcälrnibee Xi'n Dios.

<sup>5</sup> Sanälajz Jesús Mart, bäljni, näjza Larz, <sup>6</sup> che räjpreni lojni cayacxhuu Larz, bia'nni stio'p dxej cadro yu'ni. <sup>7</sup> Dxejcti räjpni loj rexpejn'pacni:

—Colcho', chonnu stehuält región Judea.

<sup>8</sup> Räjp rexpejn'ni lojni:

—Mastr, gajd gac xchej rlajz rexpejn Israel ni rnibee nucuaa guij yejclu te nugu'treni luj, luxh naj rlajzlu chäsac lu ro'c.

<sup>9</sup> Dxejcti räjp Jesús lojreni:

—¿La xhet tzubitio'p ordi yu' lo tebdxej, ä? Palga sa bejn rdxee, dini jiajb sa'csi ruhuini lo bianij nani yu' lo guedxliujre. <sup>10</sup> Palga chasajni guxhijn, siliaro'ni, sa'csi xheti bianijga.

<sup>11</sup> Dxejcti räjp Jesús lojreni:

—Nagayejs xamigwä Larz. Cha'a te chacuänäni.

<sup>12</sup> Dxejc räjp rexpejn'pacni lojni:

—Dad, palga agudiesni, pet siajcti.

<sup>13</sup> Jesús canii lojreni agujt Larz, niluxh rexpejn'pacni bejn xhigab caniini xcuent yälrejs xten bacaltis.

<sup>14</sup> Ni'cni guniliipac Jesús räjpni lojreni:

—Agujt Larz. <sup>15</sup> Rbalazä sa'csi rutinu ro'c, te chalilajztu xtidxä. Colcho' te chohuini.

<sup>16</sup> Dxejcti Tomás ni rniizareni "cua'ch", räjpni loj resa'ni:

—Colcho' te guetnāzanuni.

*Jesús najc yälrbansac lo yälgujt*

<sup>17</sup> Che bidzujn Jesús lo guejdxga, agujc tajp dxej biga'tz Larz. <sup>18</sup> Guedx Betania tre' gajxh lo guedx Jerusalén, si'cti tio'p garol kilómetro. <sup>19</sup> Xhidajl rexpejn Israel abidzujn, siädhuireni Mart, näjza Marii, te di gac-huin lajzreni sa'csi gujt bisiajnreni. <sup>20</sup> Che guchee Mart abidzujn Jesús, biriini huichaglojni; niluxh Marii bia'n rolijzreni. <sup>21</sup> Dxejcti räjp Mart lo Jesús:

—Dad, paru suga'lu ree, di bisianä niejt. <sup>22</sup> Narä nanä suniidx Dios guiraa nani guiniablu lojni.

<sup>23</sup> Jesús räjpni lojni:

—Sibansac bisiajnlu.

<sup>24</sup> Räjp Mart lojni:

—Acananä sibansacni che guidzujn dxej ni guibansac bejn loj rebengut dxej lult che gun Dios yälguhtis.

<sup>25</sup> Dxejc räjp Jesús lojni:

—Narä nacä yälruspansac bejn loj rebengut, näjza yäl'nabajn par tejpas. Nani rililajz rextidxä, masä agujtni, sibansacni. <sup>26</sup> Chutis tej bejn ni nabajn ni chalilajz xtidxä, dini nitloj par tejpas, ¿riliiga lajzluni, ä?

<sup>27</sup> Dxejcti räjp Mart lojni:

—Rililazäni, Dad. Ahuililazä luj najclu Crist, Xi'n Dios nani bia'n diidx guxhaj Dios lo guedxliujre.

*Biin Jesús cuä' xpaä Larz*

<sup>28</sup> Che guluux gunii Mart, huitejdxni bäljni Marii, xhiga'tz räjpni lojni:

—Abidzujn Mastr. Cabejdzani luj.

<sup>29</sup> Che biejn diajg Marii rediidxga, huisugajcni, sahuini Jesús. <sup>30</sup> Gajd Jesús jiu' guejdxga, laltis suga'ni cadro bidxaagni Mart. <sup>31</sup> Rexpejn Israel nani biädcaenäj Marii, ni cahui didi gac-huin lajzni, che bahuiireni huisu Marii, sääni, näjza laareni huirinajlreni Marii, naareni pet lo baa sayoonni.

<sup>32</sup> Ni'cni che bidzujn Marii cadro suga' Jesús, bazuxhijbni lojni, räjpni:

—Dad, paru suga'lu ree, di bisianä niejt.

<sup>33</sup> Che bahuii Jesús cayoon Marii, näjza rexpejn Israel ni siädnajl Marii, guc-huin lastooni, biäd te rsliajz lastooni. <sup>34</sup> Dxejcti räjpni lojreni:

—¿Caro bacua'tztuni?

Räjpreni lojni:

—Dad, gudaa ree te filu.

<sup>35</sup> Dxejcti biin Jesús. <sup>36</sup> Ni'cni cayäjp rexpejn Israel:

—Colhuii, lacti sanälajznini.

<sup>37</sup> Yu'zareni räjp:

—Dade're basiajc beñ lotiä'p. ¿Xha di niajcti nusiajcti bejnre te di niejt, ä?

*Gubañsac Larz*

<sup>38</sup> Guc-huinduxh lastoo Jesús, gubigni lo baa. Baaga najc si'c te biliää, suga' te guiro ni rusäüureni ro'ni. <sup>39</sup> Dxejcti räjp Jesús lojreni:

—Colgudzucay guijga.

Mart, ni najc bisiajn beñgutga, räjpni lojni:

—Dad, pet acaladxuudxni, sa'csi agujc tajp dxej gujtni.

<sup>40</sup> Dxejc räjp Jesús lojni:

—¿Et rniä lojlu, palga rililajztu, suhuiilu xcälrnibee Dios, ä?

<sup>41</sup> Dxejcti badzucajreni guijga. Guläs Jesús lojni xhaguibaa, räjpni loj Xtadni:

—Xtadä, runidxä xquixtios lojlu sa'csi abiejn diajglu xtidxä. <sup>42</sup> Narä nanä guliica rucuadaiajglu xtidxä, luxh naj caniäni xcuent rebejn ni tre' ree, te chalilajzreni luj baxhalla narä.

<sup>43</sup> Che gulujx guniini rediidxga, guredxa'ni räjpni:

—jLarz! jGudaa ree!

<sup>44</sup> Dxejc birii beñgutga nen biliää. Naliib reñaaani, reni'ni, niäuu te baii lojni. Dxejcti räjp Jesús lojreni:

—Colguslaani, colgusaan jiini.

*Bachaagreni diidx xho guiniaazreni Jesús*

(Mt. 26:1-5; Mr. 14:1-2; Lc. 22:1-2)

<sup>45</sup> Xcuent dzunrore huililajz rextidx Jesús xhidajl rexpejn Israel nani huinajl Marii, che bahuiireni xhi bejn Jesús. <sup>46</sup> Yu' reni huihuui loj rexpejn Israel ni laa farisee, bijreni diidx xhi bejn Jesús. <sup>47</sup> Dxejcti refariseega, näjza rebixhojz ni rnibee, bire'reni bidxagsa'reni lo Junt Suprem, räjpzaren:

—¿Xho jiennu? Niguiire cayujn xhidajl milagwr. <sup>48</sup> Palga guisaannuni si'c, guiralii bejn sillilajz xtiidxni, sinajlrenini. Dxejcti jiääd reben roman ni rnibee, gudzucajreni xcälrnibeenu, sudzujlzareni lajdxnu.

<sup>49</sup> Dxejc Caifás, bixhojzro ni riäj! gunibeeni lo rebixhojz ijzga, räjpni lojreni:

—La'tu xhetliidi najnditu. <sup>50</sup> Ditu gun xhigab laaca guet tejtis bejn xcuent guideb guejdx, didi nitloj guideb lajdxnu.

<sup>51</sup> Niluxh Caifás dini ninii diidxre xcuentceni. Sa'csi ijzga rnibeeni lo rebixhojz, lagajc Dios badeed diidxga guniini. Ni'c gunixgaani guet Jesús xcuent nación xten rexpejn Israel.

<sup>52</sup> Luxh xhet ganaxtis xcuent nacionga, näjza te guire' guiraa rexpejn Dios nani nare'ch loj guideb guedxliujre. <sup>53</sup> Ni'cni dxejlga bachaag rebejnga diidx te don xho gunreni gugu'treni Jesús.

<sup>54</sup> Ni'cni diru Jesús nisij nez loj rexpejn Israel. Biriini región Judea, huijni te lajt gajxh nez lo reyubijdz, lo te guejdx ni laa Efraín. Ro'c biannäjni rexpejn pacni.

<sup>55</sup> Guxii dxej cayääd guidzujn lanij ni laa pascw ni rujn rexpejn Israel. Xhidalduxh rebenguejdx huij guedx Jerusalén te gusiareni lastooreni, te gac gunreni lanij xten pascw.

<sup>56</sup> Cansajreni caguuilreni Jesús; che yu'zaren nen guidoro, canabdiidx lo sa'reni, räjpreni:

—¿Xhi najtu? ¿La siäädni lanijre o laa dini jiääd, ä?

<sup>57</sup> Refarisee näjza rebixhojz ni rnibee loj rebixhojz, agunibeereni palga yu' chu najn caro yu' Jesús, chaye'tzni lojreni te guiniaazrenini.

**12***Gudäab te gunaa se't ni' Jesús*

(Mt. 26:6-13; Mr. 14:3-9)

<sup>1</sup> Che riäädx xho'p dxej gal lanij pascw, huij Jesús guedx Betania cadre rbäjz Larz nani baspañsac Jesús loj rebengut. <sup>2</sup> Ro'c bejnreni te xchej te gau Jesús. Mart bateed xchejga, näjza Larz sobganäj Jesús näjza rexpejn pacni lo mex. <sup>3</sup> Dxejcti bidzunäj Marii si'cti garol litr se't ni rlianexhduxh si'c nard. Sacduxh se'tga. Dxejcti gudääbni se'tga lo reni' Jesús, baspijdzni ni'ni con xquidxejcti. Guideb nen yu'ga gulanejxh se'tga. <sup>4</sup> Dxejcti räjp Judas Iscariot, xi'n Simón, ni najc te rexpejn pac Jesús, lagajc ni abejn xhigab guto'ni Jesús, räjpni:

<sup>5</sup> —¿Xhicuent di se'tre nido' choñ gayuu denar te nidis meelga loj rebenproob? (Chon gayuuga najc si'cti ni xca' te niguii paru gunni dzuun tzubiteb bäii.)

<sup>6</sup> Guniiini si'c, xhet sa'csi riadini reproob, per sa'csi laani najcni te gubaan, luxh laani ca'ni bols cadre ruchee meel, luxh rbääni meel lojga te rca'nini. <sup>7</sup> Ni'cni räjp Jesús lojni:

—Na'c gudxoijnluni; subasälxgaanini, che gajd guidzujn dxej nani guiga'tzä. <sup>8</sup> Dxej-yääl yu' rebenproob lojtu, luxh narä dina chuä lojtu xchej.

*Laaren i'rajzreni nugu'tzaren i' Larz*

<sup>9</sup> Dxejc che guchee xhidajl xpejn Israel yu' Jesús rolizj Larz ni gubañsac lo rebengut, bidzujnreni, xhet xcuentis Jesús. Biäädreni te fiizaren loj Larz nani baspañsacni lo rebengut.

<sup>10</sup> Dxejcti rebixhojz ni rnibee bachaagzareni diidx te ju'tzareni Larz, <sup>11</sup> sa'csi xhidajl rexpejn Israel salilajzreni xtidx Jesús sa'csi bahuiireni gubansac Larz.

*Biu' Jesús guedx Jerusalén*

(Mt. 21:1-11; Mr. 11:1-11; Lc. 19:28-40)

<sup>12</sup> Che bara yáäl, rebejn xhidajl ni bidzujn lanij biejn diajgreni asiáddzujn Jesús guedx Jerusalén, <sup>13</sup> dxejcti batiu'reni ñaa reyagzijñ, biriireni neñ guejdx, sachaglojrenini. Guredxa'reni, rájpreni lo Jesús:

—¡Colguiliá'p xpala'n Dios! ¡Chicbaa nani siáäd xcuent Dad nani najc rei lo rexpejn Israel!

<sup>14</sup> Bidxäl Jesús te burbáz, gubijbnini, si'cni caj lo reguijtz:

<sup>15</sup> Na'c guidxejbtu, bejn ni rbájz neñ guedx Sión.

¡Colhuui! Reii xtentu asiáäd, bijbni dejt te burbáz.

<sup>16</sup> Di rexpejñpacni niacbee recosga che gujcreni, niluxh che gubansacni loj rebengut, dxejc banaj lajzreni recos nani caj lo guijtz xcuentni, nájza guiraa recos ni bejn rebejn lo Jesús te guzojb rediidxga.

<sup>17</sup> Rebeñ xhidajl ni suganájni che gurejdxni Larz te biriini neñ baa che baspañsacnini lo rebengut, bijzareni diidx xcuent guiraa ni bahuiireni. <sup>18</sup> Ni'cni biädchagloj rebeñ xhidajlgani, sa'csi abiejñ diajgreni laani bejnmi milagwrre. <sup>19</sup> Ni'cni rájñ refarisee lo sa'reni:

—Aruhuitu xhet sajcdi jienñu. ¡Colhuui! Empac sanajl guideb guedxliujni.

*Riädiil regriegw Jesús*

<sup>20</sup> Yu' gaii bengriegw nadxaag lo rebejn ni biädted lanij guedx Jerusalén. <sup>21</sup> Rebejnre bidzujñ loj Felipe nani siáäd guedx Betsaida xten Galilee, gusloj gunabreni lojni, rájpreni:

—Dad, rlaaznu guihuinu lo Jesús.

<sup>22</sup> Biáäd Felipe, rájñni loj Andrés, dxejcti guiro'preni huiye'tzreni lo Jesús. <sup>23</sup> Dxejcti rájñ Jesús lojreni:

—Abidzujñ or ni chä'p xpala'n Xi'n Dios ni gujc Niguui. <sup>24</sup> Rñiliäpac lojtu, palga di te xob binij jiajb lo yuj, neñ xhurc cadro cueni, te rianxtebni, guetni, dini guiliejn. Luxh palga guetni, siliejñni, rajcza te nisro lojni, rajc xhidajl xob binij. <sup>25</sup> Nani sanälajz xcälñabajñni, sunijñtñni, luxh nani rbälaz xcälñabajñni lo guedxliujre, sica'ni yälñabajñ par tejpas. <sup>26</sup> Palga yu' chu tej ni rlajz chu loä, sujiädñajñni xnezyuä, te cadro yu'ä, ro'cza cuäáz ni ru' loä. Palga yu' chu gun xtzunä, siliä'pza Xtääd xpala'nñi.

*Rnixgaa Jesús guetni*

<sup>27</sup> Rájpzani:

—Naj cayac-huin lastoä. ¿Xhichani'cza gäpä lo Xtääd? ¿La siniä: Dad, gucnäj narä te di tedä or ni siáäd? Ni te tedäpac orga biälä lo guedxliujre. <sup>28</sup> Xtääd, bejn si'cni riäjñ gac te guiliä'p bejn xpala'nlu.

Dxejcti xhaguibaali biejn te xse' te ni rájñ:

—Agulä'pä xpala'nä, siliä'pä xpala'nä stehuält.

<sup>29</sup> Ni'cni lo rebejn ni tre' ro'c, ni biejn diajgreni se'ga, yu' reni rájñ:

—Lascanu gunii te guzii.

Guyuzareni rájñ:

—Te xangl Dios ni gunii lojni.

<sup>30</sup> Dxejc rájñ Jesús lojreni:

—Et xcuentädi gunii xse' ni gunii, xcuenttis la'tu guniini. <sup>31</sup> Naj abiääd xcälñguxhtis Dios lo guedxliuj. Naj sibicaj xcälñrñabee nani rnibee lo guedxliujre. <sup>32</sup> Naj, che guiliäsreni narä jiaa lo guedxliuj, te galä ro'c, sutie'ä guiraa bejn loä.

<sup>33</sup> Rediidxre gunii Jesús te canixgaani xho guetni. <sup>34</sup> Rájñ rebejn lojni:

—Nuure biejn diajgn bilreni lo lei, Crist ni jiääd sibajñ par tejpas. ¿Xho mood rñiilu, nanab chäs Xi'n Dios ni gujc Niguui jiaa lo guedxliuj? ¿Chuxhni'c najc Xi'n Dios ni gujc Niguui ni ruzä'tlu?

<sup>35</sup> Dxejcti rájñ Jesús lojreni:

—Steratsi yu' bianij lojtu. Colñaj lañ ni rajptu bianijga, te di guiniaaz yälñcäjy la'tu, sa'csi ni rsiaj loj nacäjy, dini gan caro chääni. <sup>36</sup> Lañ ni rajptu bianij, colñchalilajz bianijga te gactu rexi'n bianij.

Gunii Jesús rediidxga lojreni, dxejcti biunejzñ ro'c, bicuatñzlojni.

*Xhicuent di rexpejn Israel nililajz xtidx Jesús*

<sup>37</sup> Xhidajl remilagwr bejn Jesús nez loj rexpejn Israel, niluxh direni nililajz xtiidxni, gulälazreni nani baxhal Dios lojreni. <sup>38</sup> Ni'cni guzojb diidx nani gunii Isaías, ni gunii xtidx Dios galoro, rájñni:

Dad, ¿chuni'c huililajz xtiidxlu?

¿Chuloj baluñilu xcälñrñibeduxhlu, ä?

<sup>39</sup> Ni'cni di niajcdi nililajzreni, sa'csi guniiza Isaías, räjpm:

<sup>40</sup> Abascäjyni lojreni,  
abennajdmi lastooreni,  
te di rebalojreni fii,  
te di lastooreni gacbee,  
te di gusiejch lajzreni,  
te di gusiacäreni.

<sup>41</sup> Rediidxre gunii Isaías, sa'csi bahuiini xcälrdimbicha' Jesús xhaguibaa, dxejc guniini xcuentni.

<sup>42</sup> Dxejcti gaii rebejn ni rnibee huililajz xtiidxni che räjpm abaxhaļ Diosni, niluxh bidxejbreni rebejn farisee, ni'c direni nicäjpm ahuililajzreni, te di gurilaagwreni laareni, gudxojnreni jiu'reni nen guidoo. <sup>43</sup> Sa'csi rdxaglaizrurenii guiliä'p rebejn xpala'nreni luxh guxiiru rlaizreni guiliä'p Dios xpala'nreni.

*Xtidx Jesús sigubee rebejn*

<sup>44</sup> Dxejcti gudidxa' Jesús:

—Nani chalilajz xtidxä, et ganaxdi ni caniä rililajzmi, näjza xtidx Xtdä nani baxhaļ narä rililajzmi. <sup>45</sup> Nani ruhuii loä, ruhuiizani loj ni baxhaļ narä. <sup>46</sup> Narä biälä si'c bajl lo guedxliujre, te guiraa renani chalilajz xtidxä, dirurenii chu lo yälcäjpm. <sup>47</sup> Nani riendiajg xtidxä, luxh dini gusooob rediidxga, dina gunä yälguhtis lojni, sa'csi dina niälä te gunä yälguhtis rebenguedxliuj, biälä te guslaä rebejn guedxliuj lo dojl. <sup>48</sup> Nani rbälaz narä, ni di gusooob xtidxä, yu' chu gun yälguhtis xtojlmi; lagajc rediidx nani guniä gun yälguhtis xtojlmi che gaļ lult dxej. <sup>49</sup> Sa'csi narä dina niädniä lagajc xcuentä, lagajc Dad ni baxhaļ narä, lagajc laani gunibeeni xhini'c guniä, xhini'c guluiä. <sup>50</sup> Luxh nancheä gunibeeni chu yäl'nabajpm par tejpas. Ni'cni rediidx nani rniä, rniäreni si'cpacni gunii Xtdäni loä.

## 13

*Jesús gudiibni ni' rexpejnpacni*

<sup>1</sup> Che gajd gal dxe lanij ni laa pascw, najn Jesús asiädzduņgajxh xo'rni, o'r ni jiunejzmi lo guedxliujre te chääni lo Xtdäni. Luxh sa'csi agajc sanälajzmi rexpejnpacni nani yu' lo guedxliujre, sinälajznanireni par tejpas.

<sup>2</sup> Ni'cni laļ ni cayauxchejreni biu' benđxab nen lastoo Judas Iscariote, xi'n Simón, te guto'ni Jesús. <sup>3</sup> Sa'csi agucbee Jesús abateed Xtdäni guira'ti ladznaani, gucbeezeni loj Dios biriini, lo Dios guibi'zani, <sup>4</sup> ni'c huisu Jesús lo xchejga, gulääni xhablojiaani, gudojbmi te tuäii, batejbnmi xque'ni. <sup>5</sup> Dxejcti cua'ni nis nen te chaa, guslojmi gudiibni ni' rexpejnpacni, baspijzmi ni'reni con tuäiiga. <sup>6</sup> Che bidzujpm loj Simón Pedr, räjpm Pedr lojni:

—Dad, ¿xhixh luj siguiiblu ni'ä?

<sup>7</sup> Dxejc räjpm Jesús lojni:

—Nani cayunä dilu gacbeeni naj, guixee-huijdx sacbeeluni.

<sup>8</sup> Räjpm Pedr lojni:

—jDipaclu quiiib ni'ä!

Räjpm Jesús lojni:

—Palga dina quibä ni'lu, digacdiru gaclu xpenä.

<sup>9</sup> Räjpm Pedr lojni:

—Dad, na'c quiiiblu ni'ätis näjza naä näjza yecä gudiib.

<sup>10</sup> Räjpm Jesús lojni:

—Nani agojz di guiquin gagsacni; ni'tisni guidiib, sa'csi naya guidebmi; nayazatu, per xhet guiraaditu naya.

<sup>11</sup> Sa'csi anajnmni chu guto'ni, ni'cni guniini: “Xhet guiraaditu naya.”

<sup>12</sup> Ni'cni che gulujx gudiibni ni' rexpejpm, gotsacni xhajbmi, guresacni lo mex, räjpm:

—¿La najntu xhini'c benä lojtu, ä? <sup>13</sup> La'tu rniitu narä, Mastr näjza Dad. Luxh laaca rniitu sa'csi nacäni. <sup>14</sup> Mbaj, palga narä ni nacä Dad, nacäza Mastr, gudibä ni'tu, la'tu sigajcza riäj quiiibu ni' resatu. <sup>15</sup> Sa'csi abaluiä lojtu xho gacni, te chanuu guntu sigajc ni benä lojtu. <sup>16</sup> Rniliä, rniliäpac lojtu, di te mos gac benroru lo xlamni; diza te ni rij xmandaad bejn gac benroru loj nani baxhaļni. <sup>17</sup> Palga najntu recosre, chicbaazatu palga si'c guntu.

<sup>18</sup> Dina guniä diidxre lo guiraatu. Numbeä reni aguleä, niluxh nanab soob xtidx Dios ni caj lo rexquijzmi. Scree najc rediidxga: “Nani rajw xcutilä, ni'c agubireni, agulälazmi narä.” <sup>19</sup> Ni'cni agunixgaäni, che gajdmi gac, te che gacni chalilajztu nacä chu rniä nacä.

<sup>20</sup> Rniliä, rniliäpac lojtu, nani riu xtidx nani ruxhaļä, riuazani xtidxä; luxh nani riu xtidxä, riuazani xtidx nani baxhaļ narä.

*Räjpm Jesús chuni'c guto'ni*

(Mt. 26:20-25; Mr. 14:17-21; Lc. 22:21-23)

<sup>21</sup> Che gulujx gunii Jesús rediidxre, guc-huinduxh lastooni, dxejc guniliini:

—Rniliä, rniliäpac lojtu, tejtü suto' narä.

<sup>22</sup> Dxejc gusloj cadxeloj rexpejnüni lo sa'reni, di jien chuchani'c cagusa'tni. <sup>23</sup> Tej rexpejnüni nani sanälajzruni sobga' cuä'ni. <sup>24</sup> Dxejcti bejn Simón Pedr seen lojni te guiniabdiidxni loj Jesús chu xcuent caniini. <sup>25</sup> Dxejc nani sobga' cuä'ni, gubigrüni loj Jesús, gunabdiidxni lojni, räjpni:

—Dad, ¿chuni'c rusä'tlu?

<sup>26</sup> Dxejcti räjp Jesús lojni:

—Guhuadxä te la' yätxtiil. Loj nani gudedäni, ni'c najcni.

Dxejcti bahuaajdxni tla' yätxtiil, badeednini loj Judas Iscariote, xi'n Simón.

<sup>27</sup> Che gulujx gudajw Judas yätxtiilga, biu' bendxab lastooni. Dxejcti räjp Jesús lojni:

—Ni rläjzlu gunlu, bejngani.

<sup>28</sup> Nicla tej reni sobga' lo mex direni niacbee xhicuent räjpni lojni si'c. <sup>29</sup> Sa'csi Judas ca' bols meel, gairëni bejn xhigab pet guniini si'c sa'csi yu' xhi chasiini par lanij, o pet yu' xhi gudeedni loj reben ni xhet rajpdi. <sup>30</sup> Che gudajw Judas yätxtiilga, birigajcni, luxh abiu' guxhijn.

### *Didxcoob ni gunibee Jesús*

<sup>31</sup> Dxejcti che abirii Judas lojreni, räjp Jesús lojreni:

—Naj sienloj xcäl'rnibee Xi'n Dios ni gujc Niguii, luxh lojni sienloj xcäl'rnibee Dios. <sup>32</sup> Palga suluuloj Xi'n Dios ni gujc Niguii xcäl'rnibee Dios, dxejc suluulojza Dios xcäl'rnibee Xi'n Dios ni gujc Niguii, luxh siojb gunnini. <sup>33</sup> Rexi'nä nani sanälazä, diru gac xchej chunää la'tu. La'tu siguiiltu narä, per si'cni räpä lo rexpejn Israel si'cza rniä lojtu naj: Di gacdi jiäädü cadro cha'a. <sup>34</sup> Te didxcoob rnibeä guntu: Colchanälajz sa'tu. Sigajc ni sanälazä la'tu, sigajcza colchanälajz sa'tu. <sup>35</sup> Palga rinälajz sa'tu, si'c sacbee guiraa benguedxliuj najpactu rexpenä.

### *Xhini'c gun Pedr loj Jesús*

(Mt. 26:31-35; Mr. 14:27-31; Lc. 22:31-34)

<sup>36</sup> Dxejcti räjp Simón Pedr loj Jesús:

—Dad, ¿caro chäälu?

Räjp Jesús lojni:

—Cadro cha'a digacdi jiädnaajllu narä naj; niluxh sidzujn dxej jiäädü ro'c.

<sup>37</sup> Räjp Pedr lojni:

—Dad, ¿xhicuent digacdi jiälä naj? Palga rquiin guetä xcuentlu, suguetä.

<sup>38</sup> Räjp Jesús lojni:

—¿La guliilu guetlu xcuentä, ä? Rniliäpac lojlu, nicla gajd guidgäi cuedxa' choñ huält, säjblu dilu gumbee najrä.

## 14

### *Jesús najc nezyuj lo Dad*

<sup>1</sup> Dxejcti räjp Jesucrist lojreni:

—Na'c chutu yärsia'. Rililajztu xtidx Dios, colchalilajzta xtidxä. <sup>2</sup> Yu' xhidalduxh yu' cadro rbäjz Xtäädä. Palga xhet si'cni najcni, dizana niniä lojtu si'c. Sia'a chasucheä reyü' par la'tu. <sup>3</sup> Luxh palga chasucheä cadro cuääztu, che guluxäni, sibusacä, te chanäätu ro'c, te cadro yu'a, ro'cza chutu. <sup>4</sup> La'tu anajntu caro cha'a, anajnzatu nezyuj ni chäätu.

<sup>5</sup> Dxejcti räjp Tomás loj Jesús:

—Dad, dinu guidon caro chäälu, ¿xho guidonnu nezyujga, ä?

<sup>6</sup> Räjp Jesús lojni:

—Narä nacä nezyuj. Narä nacä didxliipac, nacäza yäl'nabajn. Por narätis sajc chää bejn cadro rbäjz Xtäädä. <sup>7</sup> Palga la'tu niembeetu chuni'c nacä, niembeezatu Xtäädä. Luxh najli abiembeepactuni sa'csi acahuiitu lojni.

<sup>8</sup> Räjp Felipe loj Jesús:

—Dad, basaan guihuiinu loj Xtädlu; ni'ctis rlaaznu.

<sup>9</sup> Dxejcti räjp Jesús lojni:

—Felipe, ¿la gajdlu gumbee narä, luxh lacti xchej yu'a lojtu, ä? Nani ruhüi loä, abahuiini lo Xtäädä. ¿Xhicuent rniablu filu lo Xtäädä, ä? <sup>10</sup> ¿La dilu chalilajz najrä yunää Xtäädä, luxh Xtäädä yunäjzani narä, ä? Rediidx nani rniä dina guiniäni lagajc xcuentä, sa'csi Xtäädä ni yunäj narä laani rujn lagajc rextzuunni. <sup>11</sup> Colchalilajz xtidxä, che rniä narä yunää Xtäädä, luxh Xtäädä yunäj narä. O palga ditu chalilajzni sa'csi najcni xtidxä, colchalilajzni sa'csi abahuiitu rextzuun ni runä. <sup>12</sup> Rniliäpac lojtu, nani chalilajz xtidxä, sajc gunni redzuun nani runä, luxh sujnni dzunroru sa'csi sia'a cadro yu' Xtäädä. <sup>13</sup> Luxh guiraa ni guiniablu lo Xtäädä xcuentä, narä sunäni, te guluiloä xcäl'rnibee Xtäädä. <sup>14</sup> Narä sunä xhitis ni guiniabtu por laä.

*Ria'n diidx guxhal Jesús Sprit Dxan*<sup>15</sup> Räjzani:

—Palga sanälajztu narä, susoobtu xtidxä. <sup>16</sup> Dxejc siniabä lo Xtradä, te guniidxni stee nani gacnäjtu te chunäjni la'tu par tejpas. <sup>17</sup> Nalajznu, Xpriet Dxan xten Dios, ni rnili. Di gacdi xca' reben guedxliujni, sa'csi direni fii lojni, ni claza gumbeerenini. Niluxh la'tu numbeetuni sa'csi yunäjni la'tu, yu'ni neñ lastootu. <sup>18</sup> Dina gusanbisiäbä la'tu; sibisacä jiädhuiä la'tu. <sup>19</sup> Diru gac xchej, dxejc diru reben guedxliuj fii loä, niluxh la'tu suhuiitu loä. Sa'csi nabañä, la'tu nabajzatu. <sup>20</sup> Neñ redxejga, dxejc sacbeetu yunää Xtradä, la'tu yunäjtu narä, luxh narä yunääza la'tu. <sup>21</sup> Nani numbee Xtradä, nani rusoobza xtidxä, ni'c ruluuini sanälajzpacni narä. Luxh Xtradä sinälajza nani sanälajz narä, näjza narä chanälazä bejnğa, luxh suluiiloä lagajc narä lojreni.

<sup>22</sup> Dxejcti räj Judas (xhet Iscariótedi) lojni:

—Dad, çxhini'c gunlu te guluiuloju lojtisnu, xhet näjdi loj reben guedxliujdi, ä?

<sup>23</sup> Dxejcti räj Jesús lojni:

—Nani sanälajz narä, ni'c riu xtidxä. Ni'c chanälajz Xtradä, dxejc jipläznäänuni guiro'pnu Xtradä. <sup>24</sup> Nani di chanälajz narä, dini jiu xtidxä. Luxh rediidx nani biejn diajgtu, et xtidxädini; xtidx Xtradäni ni baxhal narä.

<sup>25</sup> 'Canä guiraa rediidxre lojtu lañi yu'ä lojtu, <sup>26</sup> per Sprit Dxan xten Dios nani jädyacnäjtu, nani guxhal Xtradä xcuentä, laani suluiini lojtu guira'ti, näjza susnajni lajztu guiraa rediidx nani aguniä lojtu. <sup>27</sup> Yälrbecdxilajz rusa'nä lojtu, xcälrbecdxilazä runidxä lojtu, et si'cdini runiidx guedxliujdi najc nani runidxä lojtu. Na'c chutu yärsia', na'cza guidejbtu. <sup>28</sup> Abiejn diajgtu ni guniä lojtu: Sia'ä luxh siälsacä lojtu. Paru ninälajzpacktu narä, sibalajztu xcuentä che guniä sia'ä lo Xtradä, sa'csi Xtradä najc beñroru loä. <sup>29</sup> Scree agunixgaäni lojtu, te che soobni, dxejcru chalilajztu xtidxä.

<sup>30</sup> 'Diruna guiniduxhä lojtu, sa'csi asiääd nani rnibee loj guedxliujre, luxh digacdi guinibeeni narä; <sup>31</sup> riäj l gac recosre te gacbee reben guedxliuj sanälazä Xtradä, rusobäza xtidx Xtradä, runä nani guinibeeni. Colçhastie, colçho' jiunejznu ree.

**15***Jesús najc si'c te yaguub*<sup>1</sup> Räjzani:

—Narä nacä si'c te yaguub. Xtradä najc si'c nani rusuj yajgga. <sup>2</sup> Rebejn najc si'c reñaa yajgga. Guiraa reñaa yajgga nani xhet cajdi lojni rutiuugnini. Luxh guiraa reñaa yajgga ni caj ninejxh lojni, rusianini te xcajru ninejxh lojreni. <sup>3</sup> La'tu anajctu beñnaya xcuent rediidx nani aguniä lojtu. <sup>4</sup> Colguibannäj narä, sigajc ni nabañnä la'tu. Digacdi xcaj ninejxh lo te naa yajg palga agurujni lo yaguub. Sigajcza la'tu, palga guibicajtu loä, di gacdi guntu xtzunä.

<sup>5</sup> 'Narä nacä si'c yaguub. La'tu najctu si'c reñaa yajgga. Nani riannäj narä, naräza riannäänä, ni'c sajc runduxhni xtzunä, sa'csi che guibicajni loä, xhet sajcdi gunni. <sup>6</sup> Nani di chupac loä, sibicajni si'c reñaa yajg nani rdin sa'csi xhetru rcajdi lojni, dxejcti rbijdzni, rusäl bejnreni lo däj te checni.

<sup>7</sup> 'Palga chupactu loä, palgaza chupac xtidxä lastootu, colnab nani rlanjzistu, luxh narä sunidxäpacni. <sup>8</sup> Che gunpactu xtzun Dios, dxejc fii bejn najcpactu xpenä, siliä'p bejn xpala'n Xtradä, Dios. <sup>9</sup> Si'cpacni sanälajz Xtradä narä, sigajcza sanälazä la'tu. Colchanu lo xcälrinälazä. <sup>10</sup> Palga jjuutu rextidxä, sinuutu lo xcälrinälazä, sigajc ni abasobä xtidx Xtradä, luxh rinuä lo xcälrinälajz Xtradä.

<sup>11</sup> 'Rniä rediidxre lojtu te guibalaznäjtu narä, te si'c guibalazduxhpactu. <sup>12</sup> Dee najc diidx ni rnibeä guntu: colchanälajz sa'tu si'cni sanälazä. <sup>13</sup> Xheti te yälsanälajz ni guroobru lo yälsanälajzre, gudeed te bejn xcäl'nabajni, guetni lacuaa resa'ni. <sup>14</sup> La'tu najctu resa'ä palga gusoobtu diidx nani guinibeä guntu. <sup>15</sup> Diruna cuälää "mos" la'tu, sa'csi di remos gan xhi rujn xlamreni. Luxh narä agulälää la'tu "rexamigwä", sa'csi guira'ti rediidx ni biejn diägä lo Xtradä aguniäza rediidxga lojtu. <sup>16</sup> Et la'ditu gule narä, narä guleä la'tu. Guleä la'tu te guntu xtzun Xtradä, te na'cza nitloj dzuunga. Te guira'tiza nani guiniabtu lo Xtradä por laä, ni'cza guniidxni lojtu. <sup>17</sup> Dee rnibeä guntu: colchanälajz sa'tu.

*Rbälaz rebejn guedxliuj Jesús näjza rexejñni*

<sup>18</sup> 'Palga cuälaz reben guedxliuj la'tu, anajntu agulälazxgaareni narä. <sup>19</sup> Paru najctu ben guedxliujre, sinälajzreni la'tu. Per ditu gac ben guedxliuj, sa'csi narä guleä la'tu te jjuutu xtidx Xtradä, ni'cni rbälaz reben guedxliuj la'tu. <sup>20</sup> Colçsnaj lajztu diidx nani guniä lojtu, 'di te mos gac beñroru lo xlamni'. Palga basacsireni narä, susacsizareni la'tu. Palga rusoobreni xtidxä, susoobzarenit xtiidxtu. <sup>21</sup> Guiraa recosre sunnäjreni la'tu xcentä sa'csi direni gumbee nani baxhal narä.

<sup>22</sup> 'Paru dina niädniä lojreni direni niujn dojl xten xcälrdxechlajzreni loä, per naj di gacdi guiniireni direni gabee yu' xtojreni. <sup>23</sup> Nani rbälaz narä, rbälazzani Xtääd. <sup>24</sup> Palga dina niunä nez lojreni remilagwrro, sa' nani rutru rajcädi rujn, direni niajpp dojlga; sa'csi abahuiireni redzuunga, ni'c agulälazreni narä, näjza Xtääd. <sup>25</sup> Bejnreni si'c te guzojib diidx nani cuaj lo guijtz agujc xchero: "Gulälazreni narä, luxh xhetlidi benä."

<sup>26</sup> 'Che jiääd nani gacnä j la'tu, laani siniu xcuentä, chu nacä. Laani najc Sprit ni yu' lo Xtääd, siniini didxlii. Narä suxhaälani lojtu; lo Xtääd guiriini jiäädni lojtu. <sup>27</sup> Näjza la'tu siniitu diidx xcuentä, chu nacä, sa'csi guyu'tu loä cheni gusloäli cagusule'ä diidxga.

## 16

<sup>1</sup> 'Rediidxre rnixgää lojtu, te didi yu' xhi gun jiajbtu te gunijttu lo xtidxä. <sup>2</sup> Sidzujn dxej sibääreni la'tu dirureni gusaan jiu'tu nen guidoro. Sidzujn or chutis ju't tejtü, suchaloni cayacnäjni Dios. <sup>3</sup> Guiraa recosre sujnreni sa'csi direni gumbeepac Xtääd, niclaza narä. <sup>4</sup> Agunixgää rediidxre lojtu, te che guidzujn orga sinaj lajztu xcuent rediidx ni guniä lojtu.

### *Redzuun ni rujn Sprit Dzan xten Dios*

'Dina niiniä rediidxre lojtu che gusloä cagusule'ä diidx, sa'csi suganää la'tu. <sup>5</sup> Naj agojl guibi'ä loj nani baxhal narä, luxh nicla tejtü di guiniabdiidx: "¿Caro chäälu?" <sup>6</sup> Dxejc sa'csi aguniä recosre lojtu, ni'c cayac-huin lastootu. <sup>7</sup> Luxh rniliäpac lojtu, hueenru par la'tu cha'ä. Palga dina cha'ä, di gacdi jiääd lojtu nani racnäj. Niluxh palga cha'ä, suxhaälani lojtu. <sup>8</sup> Luxh laani, che jiäädni lo guedxliujre, susanijni xcäriejn rebejn te gabeereni xcuent dojl, näjza xcuent xcäl'nabannaya Dios, näjza xcuent yälguxhtis xten Dios. <sup>9</sup> Guluiizani xcuent dojl lojreni sa'csi direni chalilajz xtidxä. <sup>10</sup> Guluiini xcäl'nabannaya Dios lojreni sa'csi sibisacä lo Xtääd, luxh dirutu fii loä. <sup>11</sup> Guluiini xcuent yälguxhtis xten Dios lojreni sa'csi abejn Dios yälguxhtis loj bendxab nani rnihee lo guedxliujre.

<sup>12</sup> 'Yu' xhidajlru diidx rläzä guiniä lojtu, niluxh digacdi gabeetureni naj. <sup>13</sup> Che jiääd Sprit xten didxlii xten Dios, laani susanijni xcäriejntu te gabeetu guiraa redidxguli, sa'csi dini guiniä diidx xcuentcäni, siniitisi ganax rediidx nani gudeed Dios lojni te guiniini. Siniizani xcuent recos nani churu gac. <sup>14</sup> Laani siliä'pni xpala'nä sa'csi sica'ni xhixtenä, suluiniini lojtu. <sup>15</sup> Guiraa ni rajp Xtääd najc xtenä, ni'cni rniä suluini xhixtenä lojtu.

### *Xcälrac-huin lajztu sibixloj ni yälrbalajz*

<sup>16</sup> 'Sbale'si dxej, dxejc dirutu fii loä; dxejctiru sgaii dxej suhuisactu loä sa'csi narä sia'a lo Xtääd.

<sup>17</sup> Dxejcti räjp rexpejnpacni lo sa'reni:

—¿Xhini'c caniini loontu? Sbale'si dxej, dxejc dirutu fii loä, dxejctiru sgaii dxej suhuisactu loä, näjza: sa'csi sia'a lo Xtääd. <sup>18</sup> Ni'cni cayäjpreni lo sa'reni: ¿Xhi dee rniini, "sbale'si dxej"? Dinu gabee xhini'c caniini.

<sup>19</sup> Gucbee Jesús xhini'c rläjzreni guiniabdiidxreni lojni, dxejcti räjpni lojreni:

—Canabdiidx lo sa'tu xhi säloj nani guniä che guniä, sbale'si dxej, dxejc dirutu fii loä; dxejcrü sbale'si dxej, suhuisactu loä. <sup>20</sup> Rniliäpac lojtu, la'tu soontu, niluxh reben guedxliujre sibalazduxhreni. Sac-huinduxh lastootu niluxh yälrac-huinre sibixhlojni yälrbalajz. <sup>21</sup> Te gunaa che gaal xi'nni, rejdni trabajw, dxejcti che aguyu' xi'nni, riäl lajzni gudejdni trabajw, dxejc arbaa lajzni gojl xi'nni te niguii lo guedxliujre. <sup>22</sup> Ni'cni, sigajza rac-huin lastootu naj, dxejcti che jiädhuisacätu, dxejc sii sibalajztu nen lastootu, luxh rut gacdi gudzucajdi yälrbalajzga.

<sup>23</sup> Nen redxejga xhetiru xhi yälguiniabdiidxdi guntu loä. Rniliäpac lojtu, nani guiniabtu lo xtääd xcuentä, laani suntuixnini lojtu. <sup>24</sup> Naj xhet canabdiitu xcuentä. Colnabni, te xca'tuni, te guibalajztu.

### *Jesús, nani abejn gaan lo guedxliujre*

<sup>25</sup> 'Aguniä guiralaj lojtu con cuent ni ruluii, niluxh sidzujn dxej che diruna guiniä cuent ni ruluii lojtu. Siniä didxguyasi lojtu xcuent Xtääd. <sup>26</sup> Nen redxejga guiniabtu por laä. Luxh dizana guiniä siniabä narä loj Xtääd par la'tu, <sup>27</sup> sa'csi lagajza Xtääd sanälajzni la'tu, sa'csi la'tu sanälajztu narä, luxh ahuililajzattu loj Dios biriä biälä lo guedxliuj. <sup>28</sup> Biriä lo Xtääd xhaguibaa, biälä lo guedxliujre, siunezäza lo guedxliujre, sibisacä lo Xtääd xhaguibaa.

<sup>29</sup> Räjp rexpejnpacni lojni:

—Naj sii caniilu guyasi, dini gac si'c redidx-xhigat'z xten cuent ni ruluii. <sup>30</sup> Naj sii gucbeenu racheelu guira'ti rexhicos, xhetru nanabdi guiniabdiidxrunu lojlu; ni'cni ahuililajznu biriilu lo Dios ni yu' xhaguibaa.

<sup>31</sup> Räjp Jesús lojreni:

—¿La rililajzpacktu naj, ä? <sup>32</sup> Asiäddzungajxh teb or luxh ala bidzujn orga, che guire'chtu, cade tejtü xnez-xnejztu, te gusanxtebtu narä, luxh dina jianxtebä sa'csi Xtääd suganäj

narä. <sup>33</sup> Aguniä rediidxre lojtu te cuedxi lastootu lo guedxliujre xcuentä. Lo guedxliujre sidejdpactu trabajw, colgusutijp lastootu sa'csi narä abenä gaan lo guedxliujre.

## 17

### *Gunab Jesús lo Dios xcuent rexpejn pacni*

<sup>1</sup> Che gulujx guniini loj rexpejn pacni rediidxga, guläsni lojni xhaguibaa, räjpni lo Dios: —Xtadä, abidzujn or; gulä'p xpala'n xi'nlu te guiliä'pza xi'nlu xpala'nlu, <sup>2</sup> sigajc ni badeedlu lojni yälrmibee loj guiraa reben guedxliuj, te gac gudeedni yäl'nabajn par tejjas lo guiraa renani badeedlu lojni. <sup>3</sup> Redee rajp yäl'nabajn par tejjas; numbeereni luj ni najc tejtis GuebDios, näjza narä Jesucrist nani baxhallu lo guedxliujre.

<sup>4</sup> 'Narä gulä'p xpala'nlu lo guedxliujre, abaluxä dzuun nani baniidxlu gunä ree. <sup>5</sup> Naj Xtadä, gulä'p xpala'nä con luj, con bala'n, con yälrdimbicha' ni gopä galooli che gajdli guirixtiej guedxliuj.

<sup>6</sup> 'Loj rebejn nani baniidxlu loä, ni gulelu lo reben guedxliujre, loj reni'c abasule'ä, abaluiä chu najclu. Xtenpaclu najcreni, baniidxlureni loä, luxh rapdzu'tzreni xtiidxlu. <sup>7</sup> Naj agucbeereni guiraa rediidx ni guniä lojreni lojpaclu siäädni. <sup>8</sup> Sa'csi rediidx nani baniidxlu loä, aguniä rediidxga lojreni, luxh ahuililajzreni rediidxga, agucbeepacreni lojlu biriä, ahuililajzreni lujpac baxhal narä.

<sup>9</sup> 'Narä rniabä xcuentreni, dina guiniabä xcuent reben guedxliujre, ganaxtis xcuent renani abaniidxlu loä, sa'csi laareni najcreni xpejnlu. <sup>10</sup> Guiralli ni najc xtenä, najczani xtenlu. Guira'tiza ni najc xtenlu najczani xtenä. Agulä'pzareni xpala'nä.

<sup>11</sup> 'Narä diruna jia'nä lo guedxliujre, laareni sia'nruereni lo guedxliujre. Luxh narä siälä lojlu. Xtadä ni najc Dxanro, gucnäj renani baniidxlu loä con xtiidxlu, nani baniidxlu loä te gunreni tejsi xhigab sigajcni riennu nurnu tejsi xhigab. <sup>12</sup> Che guyunääreni lo guedxliujre, gucnää con xtiidxlu guiraa renani baniidxlu loä, luxh nicla tejreni di ninitloj, xtebtis nani gunijt te gusojb ni caj lo xtidx Dios.

<sup>13</sup> 'Luxh naj sibilacä lojlu. Caniä rediidxre la' ni yu'ä lo guedxliujre, sa'csi rlazä guibaa lajzreni si'c ni rbaa lazä. <sup>14</sup> Abasule'ä xtiidxlu lojreni, luxh rebejn guedxliuj rdxe'chreni lojreni sa'csi direni gac bejn guedxliujre sigajc ni dizana gacä bejn guedxliujre. <sup>15</sup> Dina guiniabä cuäälureni lo guedxliujre, rniabä gudzucajlureni loj bejndxab. <sup>16</sup> Direni gac bejn guedxliuj, sigajc ni dizana gacä narä bejn guedxliuj. <sup>17</sup> Basyareni con xtiidxlu, sa'csi xtiidxlu najc didxguliipac. <sup>18</sup> Sigajc ni baxhallu narä lo guedxliujre, sigajc ru xhala'äreni te chääreni guideb guedxliuj. <sup>19</sup> Xcuentreni rudedä lagajc narä, te näj laareni gacnayareni con xtidxguliipacu. <sup>20</sup> Dina guiniabä xcuent laatisreni, rniabäza xcuent guiraa renani churu chalilajz xtidxä ni gusule'reni. <sup>21</sup> Rlazä gun guiraareni tejsi xhigab, sigajc ni rujnlu, Xtadä, si'c runäza; te sigajc ni yu'äza con luj, sigajc chureni con nuurnu, te gacbee reben guedxliuj luj baxhallu narä. <sup>22</sup> Yälrmibee ni baniidxlu loä, lagajc yälrmibeega badedä lojreni te gunreni tejsi xhigab, si'cni riennu tejsi xhigab. <sup>23</sup> Narä cayunnääreni dzuun, luj cayunnäjlu narä dzuun, te jiennu tejsi dzuun, te gacbee rebejn guedxliuj luj baxhallu narä, luxh sanälajzlureni si'cni sanälajzalu narä.

<sup>24</sup> 'Xtadä, guiraa renani baniidxlu loä, rlazäza chureni cadre chuä xhaguibaa, te fiireni xcälrmibeä nani baniidxlu, sa'csi huinälajzlu narä galooli che gajdli guirixtiej guedxliujre. <sup>25</sup> Xtadä ni rujn cossa'ctis, di rebejn guedxliuj gumbeelu, luxh narä numbeälu, luxh redee agucbeezareni luj baxhallu narä. <sup>26</sup> Aräpä lojreni chu najclu; säpazaru lojreni te chu yäl'sanälajz sa' ni rajlpu par narä nejn lastooreni, te cuäzäza nejn lastooreni.

## 18

### *Xho gunaazreni Jesús*

(Mt. 26:47-56; Mr. 14:43-50; Lc. 22:47-53)

<sup>1</sup> Che gulujx gunii Jesús rediidxga, huinäni rexpejn pacni dejtz gueu Cedrón. Ro'c yu' xhiroob yuj cadre sojb guiraloj reyajg. Ro'c biu' Jesús näjza rexpejn pacni. <sup>2</sup> Anajn Judas, nani guto' Jesús, caro rij Jesús con rexpejn pacni sa'csi si'csi-si'c rdxaag sa'reni ro'c. <sup>3</sup> Dxejcti Judas, che biääd lojni te cuaa soldad roman, näj rebixhojz ni rniabee, näjza refarisee, huinätinireni ro'c, ca'reni balguejd näjza lintern, näjza spaad näjza lans. <sup>4</sup> Ni'cni Jesús, sa'csi anaxgaani xhini'c sacni, gubigni lojreni, räjpni lojreni:

—¿Chu rguiiltu?

<sup>5</sup> Räjpreni lojni:

—Jesús nani siääd guedx Nazare't.

Räjp Jesús lojreni:

—Laa naräni.



Näjza Judas ni bato'ni suganäjnireni. <sup>6</sup> Che gunii Jesús lojreni: “Laa naräni”, biäxhanreni, biäjbreni lo yuj. <sup>7</sup> Dxejcti gunabdidxsac Jesús lojreni:

—¿Chu rguiltu?

Dxejc räjpzarení stehuält:

—Jesús nani siäd guedx Nazare't.

<sup>8</sup> Räjp Jesús lojreni:

—Aguniä lojtu, laa naräni. Palga narä rguiltu, colgusaan jii redee.

<sup>9</sup> Guniini rediidxga te gusojb rediidx nani guniini che räjpni: “Loj guiraa ni baniidxlu, nicla tejni di ninijt.” <sup>10</sup> Dxejcti Simón Pedr, sa'csi ca'ni te spaad, guläänini, batiuugni diag ladbee xten xmos bixhojzroga. Laj mosga najc Malco. <sup>11</sup> Dxejcti räjp Jesús lo Pedr:

—Guluchee spaad xtenlu neñ xpaguinni. ¿La dina tedä trabajwduxh nani agunibee Xtaä tedä, ä?

*Jesús nez loj bixhojzro*

(Mt. 26:57-58; Mr. 14:53-54; Lc. 22:54)

<sup>12</sup> Dxejcti resoldaadga näjza comandant, näjza reguxhtis ni rnibee rexpejn Israel, gūnaazreni Jesús baliibreneni. <sup>13</sup> Dxejcti ganid huinäreneni lo Anás, sa'csi najcni xtadsueegr Caifás, luxh ijzga biäjł najc Caifás bixhojzro ni rnibee lo rebixhojz. <sup>14</sup> Caifás najc nani balijdx rexpejn Israel nanab guet te niguii xcuent rebenguejdxga.

*Cadro gunii Pedr dini gumbee Jesús*

(Mt. 26:69-70; Mr. 14:66-68; Lc. 22:55-57)

<sup>15</sup> Simón Pedr näjza stee xpejnpacni huinajł dejtž Jesús. Luxh numbee bixhojzro bejnğa, biunäjzani Jesús lo xle' bixhojzro. <sup>16</sup> Bia'nti Pedr rolä'ga. Dxejc birii xpejnpac Jesús nani numbee bixhojzroga, guniini lo nani cayajp rolä'ga, te biu' Pedr nez lo le'ga. <sup>17</sup> Dxejcti räjp mos gunaa ni rcanäj rolä', räjpni lo Pedr:

—¿La et näjdi luj najclu te xpejnpac Jesús, ä?

Räjp Pedr loj gunaaga:

—¡Xho gacäni!

<sup>18</sup> Dxejcti sa'csi cayacnalduxh, caguse'creni boo te cagucha'lajzreni. Näjza Pedr suganäjreni, cagucha'lajzni ro guibooga.

*Bixhojzro cayujñ yälgunabdiidx lo Jesús*

(Mt. 26:59-66; Mr. 14:55-64; Lc. 22:66-71)

<sup>19</sup> Dxejcti gusloj cayujñ bixhojzro yälgunabdiidx loj Jesús xcuent chuni'c najc rexpejnpacni näjza xcuent xhini'c ruluiini.

<sup>20</sup> Dxejcti räjp Jesús lojni:

—Narä xhet xhiga'tzdi guniä rextidxä, guniäni lo guiraa rebejn guedxliuj. Basule'ä diidx neñ rexquidobäztu näjza neñ guidoro cadre re' guiraa rexpejn Israel, nicla tej diidx dina ninixhiga'tzädi. <sup>21</sup> ¿Xhicuent cayujñlu yälgunabdiidxga loä? Gunabdiidx loj renani bejñ diajg xhini'c guniä lojreni. Laareni najrreni xhini'c guniä.

<sup>22</sup> Che gulujx gunii Jesús rediidxre, te rexpejn bixhojzroga huääz loj Jesús, räjpni lojni:

—¿La si'c rudzu' bejn diidx loj bixhojzro, ä?

<sup>23</sup> Dxejcti räjp Jesús lojni:

—Palga xhet laadi guniä, baluii narä xhi diidxga najc xhet laadi, niluxh palga laaca najc ni guniä, ¿xhicuent huääzlu loä?

<sup>24</sup> Dxejcti guideb naliibni baxhał Anásni lo bixhojzro lo ni laa Caifás.

*Gunisac Pedr dini gumbee Jesús*

(Mt. 26:71-75; Mr. 14:69-72; Lc. 22:58-62)

<sup>25</sup> Sugasijc Pedr ro' guiboo, cagucha'lajzni, che räjpreni lojni:

—¿La et näjdi luj najclu te xpejnpac niguiiga, ä?

Badzu'ni diidxga räjpni:

—¡Xho gacäni!

<sup>26</sup> Dxejcti te xmos bixhojzroga, sa'csi sa'ni najc mos ni batiu' Pedr diajgñi, räjpni lojni:

—¿La et lujdi ni bahuiä neñ huert con laani, ä?

<sup>27</sup> Dxejcti räjp Pedr stehuält:

—Nicla gumbeäni.

Cuantis guniini si'c, guredxagajc te guidgaii.

*Jesús nez loj Pila't*

(Mt. 27:1-2, 11-14; Mr. 15:1-5; Lc. 23:1-5)

<sup>28</sup> Dxejc birinäjreni Jesús rolijž Caifás, huinäreneni rolijž gubernadoor cadre laaza Pretorio, niluxh direni niu' ro'c sa'csi ameer guiliejn gubijdx, te di gacdxuudxreni dxejc di gacdi gahreni lani pascw. <sup>29</sup> Ni'cni birii Pila't lojreni räjpni lojreni:

—¿Xhi yälquij xten niguiire siädle'ctu loä?

<sup>30</sup> Dxejcti räjpreni lojni:

—Paru di niguiire niajc te beñ latsiaj, dinu niopnani ladznaa guejblu.

<sup>31</sup> Räjp Pila't lojreni:

—Colchanäni, colhuii xho gunnäjtuni yälguxhtis con lagajc xleitu.

Dxejc räjp rexepeñ Israel lojni:

—Di xleitu gusaan ju'tnu te beñ.

<sup>32</sup> Guniireni si'c te guzobj diidx nani gunii Jesús xcuent xho guetni.

<sup>33</sup> Ni'cni biusac Pila't neñ Pretorio, gurejdxni Jesús räjpni lojni:

—¿La luj najclu reii xten rexepeñ Israel, ä?

<sup>34</sup> Dxejcti räjp Jesús lojni:

—¿La lagajc luj rniilu si'c, ä? O ¿laa yu' chureni'c naj lojlu si'c?

<sup>35</sup> Dxejcti räjp Pila't lojni:

—¿Xhixh näj narä nacä te xpeñ Israel? Lagajc rebeñ lajdxlu näjza rebixhojz bateedlu ladznaa. ¿Xhi bejnlü?

<sup>36</sup> Dxejcti räjp Jesús lojni:

—Xcälrmibeä dini gac yälrmibee sa' ni yu' guedxliujre. Paru najc xcälrmibeä te yälrmibee sa' ni yu' guedxliujre, ala cagucuaa rexepeñ te di tedä ladznaa rexepeñ nani rmibee Israel. Näj di xcälrmibeä gac yälrmibee sa' ni yu' lo guedxliujre.

<sup>37</sup> Ni'cni räjp Pila't lojni:

—¿Reii najclu, ä?

Räjp Jesús lojni:

—Laaca najlu nacä reii. Par ni'cpac golä, par ni'cpacza biälä lo guedxliujre, partis gusule'a didxliipac. Guiraa renani najn didxlii, reni'c rucudiajgreni xtidxä.

<sup>38</sup> Räjp Pila't lojni:

—¿Xhini'c najc didxlii?

Che guniini si'c gunisacni loj rexepeñ Israel:

—Dina guidxälä nicla tej xtojñ bejnre. <sup>39</sup> Niluxh la'tu rajptu te costumbr, casob lani pascw, ruslaanu te beñ ni yu' neñ latzguiib. ¿Xhi najtu? ¿La rlanjtu guslää ni najc reii xten rexepeñ Israel, ä?

<sup>40</sup> Dxejcti guiragajcreni guredxa', räjpreni:

—¡Na'c guslaalu niguiiga! ¡Basläa Barrabás!

Niluxh Barrabás najc te gubaan.

## 19

<sup>1</sup> Ni'cni gunibee Pila't gudijnreni Jesús con duu ni yu' guechguuib lojni. <sup>2</sup> Bejn resoldaad te coronguejch, bazañrenini yejc Jesús. Dxejcti bahuajcwrenini te ladmoraad. <sup>3</sup> Dxejcti gusloj gubigreni lojni, te räjpreni lojni:

—¡Gubajn par teppas Reii xten rexepeñ Israel!

Dxejc huääzreni lojni.

<sup>4</sup> Dxejcti birisac Pila't, räjpni lojreni:

—¡Colhuii! Acabääni nez lojtu, te gacbeetu dina guidxäl nicla tej xtojñni.

<sup>5</sup> Dxejcti birii Jesús nez lojreni, yu' coronguejch yejcní, najcwzani ladmoraadga. Dxejcti räjp Pila't lojreni:

—¡Colhuii! ¡Aree niguiire!

<sup>6</sup> Ni'cni, che bahuü rebixhojzro näjza rexquixhajgreni lojni, guredxa'reni, räjpreni:

—¡Colgucuaani lo cruzj! ¡Colgucuaani lo cruzj!

Räjp Pila't lojreni:

—Lagajc la'tu colchanäni te gucuaatuni lo cruzj. Per narä dina guidxälä nicla tej xtojñni.

<sup>7</sup> Dxejcti räjp rexepeñ Israel lo Pila't:

—Nuurnu rajpnu te leiü, luxh xcuent leiiga, nanab guetni sa'csi najni najcni Xi'n Dios.

<sup>8</sup> Che bieñ diajg Pila't rediidxga, bidxejbruni, <sup>9</sup> biusacni neñ Pretorio, räjpni loj Jesús:

—¿Caro siädldu?

Per xhet räjpdi Jesús lojni.

<sup>10</sup> Dxejcti räjp Pila't lojni:

—¿La dilu guinii loä? ¿La dilu gan narä rapä yälrmibee te gucuaälu lo cruzj, rapäza yälrmibee te gusläälu, ä?

<sup>11</sup> Räjp Jesús lojni:

—Xhetliidi yälrmibee niajplu loä paru dilu nica'ni xhaguibaali. Ni'cni beñ nani bato' narä lojlu rapduxhruni dojl loj ni rajplu.

<sup>12</sup> Ni'cni gudiiil Pila't xho nuslaani Jesús, niluxh rexepeñ Israel rbedxaduxhrureni, räjpreni:

—Palga luj guslaaluni, dilu gac xamiigw reii César, sa'csi chutis ni rniij najcni reii, najcni xcontraar César.

<sup>13</sup> Che beijn diajg Pila't rediidxre, gulääni Jesús, dxejcti gurej Pila't lo yagxhiil cadro rujnni yälguxhtis, cadro laa Litóstroros con didx-griegw sälojni naga' guisa'c, con didx-hebreo laani Gabata. <sup>14</sup> Najcni dxej vispr lani pascw, si'cti läidxexj, dxejcti räjpni loj rexpejn Israel:

—Colhunii, aree xreitu.

<sup>15</sup> Ni'cni guredxa'reni räjpreni:

—¡Suguetni! ¡Suguetni! ¡Bacuaani lo cruzj!

Dxejcti räjp Pila't lojreni:

—¿La sucuaä xreitu lo cruzj, ä?

Dxejcti räjp rebixhojz ni rnibee lojni:

—Rutru reidi räjpnu, Césartis najc xreinu.

<sup>16</sup> Ni'cni bateed Pila't Jesús lojreni te chacuaarenini lo cruzj.

*Che bacuaarenini lo cruzj*

(Mt. 27:32-44; Mr. 15:21-32; Lc. 23:26-43)

<sup>17</sup> Dxejcti cua'reni Jesús, biriini ro'c guideb nuuni xcruzjni, cheni bidzujñireni te lajt ni laa lajt xten Calabeer, con didx hebreo laani Gólgota. <sup>18</sup> Ro'c bacuaarenini lo cruzj. Bacuaazareni tio'p niguii lo stio'p cruzj, tejjani te laad cuä' Jesús. <sup>19</sup> Dxejc bacuaa Pila't diidx ni cháä yejc xcruzjni; rediidxga najc scree: “Jesús, beñ Nazare't, Reii xten rexpejn Israel.” <sup>20</sup> Xhidajl bejn bil diidx ni caj yejc xcruzjni, sa'csi lajt cadro bacuaarenini lo cruzj najc gajxh ro' guejdxga, luxh didx hebreo, diidx griegw, näjza didx latin bacuaareni rediidxga. <sup>21</sup> Dxejcti räjp rebixhojzro xten rexpejn Israel loj Pila't:

—Na'c nucuaalu: “Reii xten rexpejn Israelni”, laacaru nacuaalu: “Laani najni, najcni reii xten rexpejn Israel”.

<sup>22</sup> Dxejcti räjp Pila't lojreni:

—Nani abacuaä, abacuaä. Si'c jia'nni.

<sup>23</sup> Dxejcti resoldaad, che gulujx bacuaareni Jesús lo cruzj, cua'reni rexbablojiaani bejnrenini tajp la', te cade tejreni cua'reni te la'ni. Luxh yu' stee xhajnbi ni laa tunica, nadijbni, guejnni hasta lo yuj guc-cheeni. <sup>24</sup> Ni'cni räjpreni lo sa'reni:

—Na'c guitiäjznuni; do'o guidzujtnu te daad lojni, te don chu xten gacni.

Si'c bejnreni te gusojb xtiidx Dios cadro caj scree: “Batiäjsreni xhablojiaä; yejza xhabä ni bia'n gudzujtreni daad.”

Ni'cni bejn resoldaad recosre. <sup>25</sup> Niluxh cuä' xcruzj Jesús suga' xnanni, con bäjl xnanni, ni laa Marii cháäl Cleofas, näjza Marii Magdalen. <sup>26</sup> Che bahuii Jesús loj xnanni, dxejc bahuiizani loj xpejn pacni nani sanälazduxhni, räjp Jesús loj xnanni:

—Nan, ¡bahuii, aro'c xi'nlul!

<sup>27</sup> Dxejcti räjp Jesús loj xpejn pacni nani sanälazduxhni:

—¡Bahuii, aro'c xnanlu!

Ni'cni dxejcli sinä nani najc xpejn pacni xnan Jesús rolizj pacni.

*Xho gujt Jesús*

(Mt. 27:45-56; Mr. 15:33-41; Lc. 23:44-49)

<sup>28</sup> Ni'cni, sa'csi najn Jesús alagujc guiraa recos ni nanab gac te soob rextidx Dios, räjpni:

—Cayolä nis.

<sup>29</sup> Ro'c suga' te guejs vinagr, nenga bahuajdxreni te esponj dxejc bacuaarenini lo te yajg ni laa hisopo, guläsreni esponjga batzugrenini ro'ni. <sup>30</sup> Che gulujx gu' Jesús vinagr, räjpni: —Agulujxni.

Dxejcti basajb yejcti, baslaani xaimni.

*Xhi bejn te soldaad lo Jesús*

<sup>31</sup> Dxejga najc dxe vispr xte lani pascw, che ru' mandaad par lanijga. Rexpejn Israel di rrlazjreni nia'n rebejn ga lo recruzj, sa'csi dxe sabdga najc dxej ni rusilazjreni. Ni'cni gunabreni lo Pila't guxhajni chu qui'ch ni'reni te guetreni, te jäjtreni loj recruzj. <sup>32</sup> Dxejcti bidzujñ resoldaad, gudi'chreni guiro'p ni' nani caj te laad, sigajcza bennäjreni stee ni caj ste laadga. <sup>33</sup> Che gubigreni lo Jesús, bahuüireni alagujtni, direni nigui'ch ni'ni. <sup>34</sup> Tej soldaadga baqu'i'tzni te lans ro' xcustiini, dxejc bixe' rejn näjza nis. <sup>35</sup> Lagajc narä Juan bahuiä recosga, ni'cni cania' rediidxre, luxh diidxga guliipacni. Lagajc narä nanä didxguliipac cania', te chaliiza lajztu xcuentni. <sup>36</sup> Sa'csi si'c gujc guira'ti, te guzojb xtiidx Dios cadro caj: “Nicla tej xtzujtni di guech.” <sup>37</sup> Sigajcza lo stee guijtjz caj diidxre: “Sidxelojreni loj nani bigujtz te lans.”

*Huicua'tzreni Jesús*

(Mt. 27:57-61; Mr. 15:42-47; Lc. 23:50-56)

<sup>38</sup> Che gulujx recosga, dxejcti huij José, te beñ Arimatea, nacxhiga'tzni te xpejn Jesús, sa'csi rdxejbni rexpejn Israel, ni'c huijni loj Pila't, gunabni loj Pila't te laani guiliätmi Jesús lo cruzj. Cuäjbza Pila't, dxejc biääd José gulätmi Jesús, sanätini togoalga. <sup>39</sup> Näjza Nicodem biääd dxejc, nani galoo huininä Jesús te guxhijn. Biädnäni si'cti tiuu kil te dänejxh ni najc si'c yaal ni laa mirra näjza áloes. <sup>40</sup> Dxejcti cua'reni Jesús batejbreñeni te la' lad lino, basälzareni däjga ni laa mirra con áloes, sa'csi si'c najc xcostumbr rexpejn Israel che rucua'tzreni te togoal. <sup>41</sup> Gajxh cadro cuaj Jesús lo cruzj, yu' te huert, neñ huertga yu' te bacoob si'c te biliäa, cadro nicla tej beñ gajd guiga'tz. <sup>42</sup> Sa'csi abidzujn dxej vispr lani pascw xten rexpejn Israel, luxh gajxh suga' biliääga, neñga gudixhrene Jesús; si'c biga'tztini.

## 20

### *Gubañsac Jesús loj rebengut*

(Mt. 28:1-10; Mr. 16:1-8; Lc. 24:1-12)

<sup>1</sup> Primer dxej xten xmaanga, cäyru, gajd lo guedxliuj jianij che huij Marii Magdalen lo baaga. Che bidzujñni ro' baaga, bahuiini agubicaj guij ni suga' ro' baaga. <sup>2</sup> Dxejcti ruxuñni gubi'ni te huiye'tzni lo Simón Pedr näjza lo stee xpejn pac Jesús ni sanälzaduxhni, räjpni lojreni:

— Ahuilääreni Dad neñ baa, luxh dinu guidon caro sanärenini.

<sup>3</sup> Dxejc biriguxun Pedr näjza stee bejnga, huijreni nez lo baa. <sup>4</sup> Ruxun guiro'preni. Niluxh stee bejnga ruxunduxhruñi loj Pedr. Laani ganid bidzujñni lo baaga. <sup>5</sup> Dxejcti guretänni te bahuiini neñ ba-biliääga. Bahuiini te laad naga' relajdtis nani bidejb Jesús, luxh dini niu' neñ baaga. <sup>6</sup> Dxejc bidzungajc Pedr, biugajcni neñ baaga, bahuiini naga' relajdga te laad. <sup>7</sup> Bahuiizani lajd ni guyu' yejcní, ni'c nie'tni saru, naga'ni te laad. <sup>8</sup> Dxejcti biu' stee bejnga nani bidzujñ ganid. Che bahuiini neñ baaga, hullilajzmi gubañsac Jesús. <sup>9</sup> Sa'csi gajdreñi gacbee ni caj lo reguijtz, cadro caj nanab guibañsacni loj rebengut. <sup>10</sup> Dxejc gubisac guiro'p rexpejn pacni rolizjreni.

### *Baluiloj Jesús loj Marii Magdalen*

(Mr. 16:9-11)

<sup>11</sup> Laltis suga' Marii cuä' baaga, cayoosni. Ni'cni lal ni cayoosni, basajb lojni te bahuiini neñ baaga. <sup>12</sup> Dxejcti bahuiini lo tio'p xangl Dios, najcwreni ladnolbäj, sobga'reni, tejni nez cadro gojt yej Jesús, steeni nez cadro gojt ni'ni. <sup>13</sup> Dxejcti räjpreni lojni:

— Nane', ¿xhicuent roonlu?

Räjpni lojreni:

— Sa'csi sanäreni Dad, luxh dina ganä caro huisa'nrenini.

<sup>14</sup> Che gulujx guniini si'c, gubiréni, dxejc bahuiini loj Jesús suga' ro'c, niluxh dini niembee Jesús. <sup>15</sup> Dxejc räjp Jesús lojni:

— Nane', ¿xhicuent roonlu? ¿Chu rguillu?

Marii bejn xhigab laa dade' ni rcanäj huertga, ni'c räjpni lojni:

— Dad, palga luj sanälumi, gunii caro gudixhluni te guiliäsáni te chanääni.

<sup>16</sup> Dxejcti räjp Jesús lojni:

— ¡Marii!

Dxejc gubiré Marii, räjpni neñ xtidx hebreo:

— ¡Raboni!

(Sälöj diidxga “Mastr.”)

<sup>17</sup> Dxejcti räjp Jesús lojni:

— Na'c guiniaazlu narä sa'csi gadna cha'a lo Xtaädä xhaguibaa. Huij loj rebetzä, huiye'tz lojreni, cha'a lo Xtaädä, näjza Xtadtu, loj Xtiozä näjza Xtiooztu.

<sup>18</sup> Dxejcti huij Marii Magdalen, bidzujñni loj rexpejn pacni badeedni didxcoob, räjpni:

— Abahuiä lo Dad Jesús.

Räjpzani lojreni guiraa recos ni gunii Jesús lojni.

### *Baluiloj Jesús loj rexpejn pacni*

(Mt. 28:16-20; Mr. 16:14-18; Lc. 24:36-49)

<sup>19</sup> Che gojl gudxej, najcni dumingw, primer dxej xten xmaan, abiäudzu'tz ro lä' ro' yu' cadro tre' rexpejn pacni, sa'csi rdxejbreni rexpejn Israel. Chela bidzujñ Jesús, guzujñ nez galäiireni, räjpni lojreni:

— Suchu yäl'rbedxi lastootu.

<sup>20</sup> Che guniini si'c, baluigajcni reñani lojreni näjza cuä' xcustiini. Ni'cni bibaduxhlajz rexpejn pacni che bahuiireni lo Dad Jesús. <sup>21</sup> Dxejc räjp Jesús lojreni stehuält:

— Suchu yäl'rbedxi lastootu. Si'c ni baxhañ Xtaädä narä, si'cza ruxhalä la'tu.

<sup>22</sup> Che gulujx guniini rediidxga, balejbni yejcreni, räjpni, lojreni:

—Suguibajņ Sprit Dxaņ xten Dios neņ lastootu. <sup>23</sup> Rextojļ rebejņ nani siällajztu, sibicajreni. Rextojļ rebejņ nani ditu jiällajz, siannäjreni redoļļa.

*Tomás bahuī lo Jesús ni gubaņsac*

<sup>24</sup> Tomás, ni laaza Didimo, najcni te retzubitio'p xpejņpac Jesús. Rutini che biääđ Jesús loj rexpejņpacni. <sup>25</sup> Dxejcti räjņ rexpejņpacni lojni:

—Abihuiinu loj Jesús, agubaņsacni loj rebengut.

Dxejcti laani räjņni lojreni:

—Palga dina fiä loj reņaani cadro caj seen xten reclaab, palga dina guqui'tzä bicuenaä cadro guyu' claabga, guqui'tzäza ņaa cadro bixal cuä'ni, di lazä chali gubaņsacni loj rebengut.

<sup>26</sup> Che gudejđ xhujņ dxej, tresac rexpejņpacni neņ yu', nadxaagza Tomás lojreni. Niäudzu'tz yu'ga, luxh chela gucheerēni abidzujņ Jesús, guzujņi galäiireni, räjņni lojreni:

—Suchu yälrbedxi lastootu.

<sup>27</sup> Dxejcti räjņni loj Tomás:

—Baqui'tz bicuenaalu ree loj patņaä, basälza ņaalu cuä'äre, na'c ractio'p lajzlu, huililajzpac gubaņsacä loj rebengut.

<sup>28</sup> Dxejcti räjņ Tomás lojni:

—ĵxtadä, Xtioozä!

<sup>29</sup> Dxejcti räjņ Jesús lojni:

—Sa'csi abahuīlu loä, Tomás, huililajzlu. Chicbaa renani mase direni fi, rililajzreni xtidxä.

*Xhicuent bacuaani reguijtzre*

<sup>30</sup> Xhidaldroduxhru dzuun bejņ Jesús nez loj rexpejņpacni, nani di nicaj lo guijt.

<sup>31</sup> Redzuunre nani bejņ Jesús nani cuaj lo guijtze cuajņi te chalilajztu diidxre: Jesús najc Crist, nani cabäjz rebejņ jiääđ, Xi'n Dios. Luxh che chalilajz te bejņ xtiidxni, sajņni yälñabajņ par tejpas.

## 21

*Jesús baluīlojni lo gajdz xpejņpacni*

<sup>1</sup> Dxejcti baluīloj Jesús loj rexpejņni ro' nisdoo ni laa Tiberias. Scree baluīlojni lojreni.

<sup>2</sup> Nadxaag sa' rebejņre: Simón Pedr, Tomás ni laaza Didimo, nājza Natanael, nani siääđ Caná xten Galilee, rexi'n Zebedeo, nājza stio'p rexpejņpacni. <sup>3</sup> Dxejcti räjņ Simón Pedr loj resa'ni:

—Chanazä bājļ.

Räjņreni lojni:

—Nājza nuure chonnu.

Dxejcti sääreni, huä'preni neņ te barcw. Guideb guxhijņga xhet bājļdi gunaazreni. <sup>4</sup> Che acayanij loj guedxliuj, suga' Jesús ro' nisdoo, di rexpejņni niembeeni. <sup>5</sup> Ni'cni räjņ Jesús lojreni:

—Rexi'nä, ĺla xhet bājļdi rajptu, ä?

Räjņreni lojni:

—Xhet rajpdinu.

<sup>6</sup> Dxejcti räjņni lojreni:

—Colgusäl xquijxhtu ladbee xten barcwga, te ro'c siniaaztuni.

Dxejcti bacuaareni guijxhga ladbee xten barcwga, dxejcti ameer diniajcdi nibääreni guijxhga ro'c sa'csi gudxadotzu'tzni bājļ. <sup>7</sup> Dxejcti bejņ nani sanälazduxh Jesús, räjņ loj Pedr:

—Laa Dad Jesús.

Che biejņ diajg Simón Pedr laa Dad Jesús, gotgajcni xhablojiaani sa'csi ladxhagjiättis najcwni sa'csi canaazni bājļ, dxejcti gutiäjsni lo nisdoo. <sup>8</sup> Sgaii rexpejņpacni biädñäreni rebarcwga sa'csi ameer guidzujņreni ro' nisdoo, si'cti tegayuu metrtis cayäädx. Siädñazareni guijxh guidxa rebājļ. <sup>9</sup> Che bidzujņreni ro' nisdoo, bahuīireni re' guiboo, ro'c dzuub te bājļ nājza yätxtiil cague'. <sup>10</sup> Dxejcti räjņ Jesús lojreni:

—Coltanä gaii bājļ nani entis gunaaztu.

<sup>11</sup> Dxejcti huij Simón Pedr, gulääni guijxhga, guidxani bälro. Guyu' si'cti te gayuu garol con choņ bājļ neņ guijxhga, niluxh dini niräsyä' mase guyu' xhidalduxh bājļ neņni. <sup>12</sup> Dxejcti räjņ Jesús lojreni:

—Coltaa te gauxharejntu.

Nicla tej rexpejņpacni dini niabdiidx lojni: “ĺChu luj?” sa'csi anajņreni laa Jesúsni. <sup>13</sup> Dxejcti cua' Jesús yätxtiil, badeedni lojreni, sigajcza rebājļ.

<sup>14</sup> Dee najc ni riojņ huält baluīlojni loj rexpejņpacni, che gubaņsacni loj rebengut.

*Jesús rninäj Simón Pedr*

<sup>15</sup> Che gulujx gudajwreni, räjp Jesús loj Simón Pedr:  
—Simón xi'n Jonás, ¿la sanälajzrulu narä loj chu stee, ä?

Räjpni lojni:

—O'n, Dad, luj najnlu sanälazä luj.

Räjp Jesús lojni:

—Gojp rexilä'ä.

<sup>16</sup> Räpsacni lojni ni rojp huält:

—Simón, xi'n Jonás, ¿la sanälajzlu narä, ä?

Räjpni lojni:

—O'n, Dad. Luj najnlu sanälazä luj.

Räjpni lojni:

—Gojp rexilä.

<sup>17</sup> Räpsacni lojni ni riojn huält:

—Simón xi'n Jonás, ¿la sanälajzlu narä?

Guc-huin lastoo Simón Pedr sa'csi gunabdiidx Jesús lojni choñ huält: “¿La sanälajzlu narä?” Dxejcti räjp Simón lojni:

—Dad, luj najnlu guira'ti. Luj najnlu sanälazä luj.

Räjp Jesús lojni:

—Gojp rexilä. <sup>18</sup> Rniliäpac lojlu, che gujclu bi'nru, lagajc luj rajcwlu xhajblu, rijlu cadrotis rlajzlu. Che anajclu bengool, susgaatislu naalu te gushuajcw ste'ca bejn xhajblu, te chanäreni luj cadro di rlajzlu.

<sup>19</sup> Luxh diidxga gunii Jesús te cagusule'ni xho gugu'treni Pedr te guiliä'pni xpala'n Dios. Che gulujx guniini si'c, räjpni loj Pedr:

—Gudanajl narä.

<sup>20</sup> Che gubiré Pedr, bahuini loj stee xpejnni, nani sanälajzru Jesús, siädnaajni dejtreni. Lagajc bejnre ni gurej cuä' Jesús lo lult xchej, ni räjpza loj Jesús: “Dad, ¿chuni'c najc nani guto'lu?” <sup>21</sup> Ni'cni, che bahuii Pedr lojni, räjpni loj Jesús:

—Dad, deea', ¿xhi gun dee?

<sup>22</sup> Dxejcti räjp Jesús lojni:

—Palga rlazä jia'nni che guibisacäli loj guedxliujre, ¿xhixh najcni? Basaanni. Luj gudanajl narä.

<sup>23</sup> Ni'cni bire'ch diidx lagajc loj resa'ni, di bejnga guet. Di Jesús niäjb lojni dini guet, alga räjpni: “palga rlazä jia'nni loj guedxliujre che guibisacäli lo guedxliujre, ¿xhixh najcni?”

<sup>24</sup> Luxh bejnga najc narä, xpejn Jesús nani bahuiloj guiraa recosre, nani bacuaazareni. Anadonnu didxliipac najc recos nani rniini.

<sup>25</sup> Yu'ru xhidalduxh dzuun ni bejn Jesús. Palga gucuaanu guiralii redzuun ni bejn Jesús, nicla lo guedxliujre di gal chu regujtz cadro xcajni.

## Redzuun Rexpejn Dios

*Siääd Sprit Dxiän xten Dios te cuääzni neñ lastootu*

<sup>1</sup> Xamigwä Teófilo, abacuaä lojlu xcuent guiraa recos nani bejn Jesucrist näjza nani baluui Jesucrist, che guslojlini, <sup>2</sup> hasta dxejli ni huäjsni xhaguibaa. Gunibexgaani xhini'c gun renani guleni gac xpejn'pacni. Sprit Dxiän xten Dios baluui Jesucrist xhi guiniini lojreni. <sup>3</sup> Gudejd Jesucrist trabajwduxh, dxejcti gujtni. Dxejc gubansacni lo rebengut, baluulojni lo rexpejn'pacni. Tiuu dxej baluulojni loj rexpejn'pacni balti huält te gacbeereni agubansacni. Gunizani lojreni xcuent xcälrnibee Dios.

<sup>4</sup> Che gudejd tiuu dxejga, batojp Jesucrist rexpejn'pacni, gunibeeni na'c guiriireni guedx Jerusalén, cuääzreni jääd Sprit Dxiän xten Dios nani aguniipac Dios jääd. Räjpmi:

—Dee abiejn diajgtu guniä lojtu. <sup>5</sup> Juan batiobnis con nis, luxh naj guxii dxej cayääd dxejcru siääd Sprit Dxiän xten Dios te cuääzni neñ lastootu. Si'c guirobnistu —räjpmi.

*Huäjs Jesucrist siini xhaguibaa*

<sup>6</sup> Lagajc dxejc che abidojpreni loj Jesucrist, gunabdiidxreni lojni:

—¿La naj gudedsaclu yälrnibee lo rexpejn Israel, ä?

<sup>7</sup> Dxejcti räjp Jesucrist loj rexpejn'pacni:

—Di riälj gacheetu xcuent redxej näjza retiemp nani abasobxgaa Dios con xcälrnibeeni.

<sup>8</sup> La'tu sica'tu yälrnibee che abiääd Sprit Dxiän xten Dios neñ lastootu. Dxejc chatie'chtu xtidxä näjza rextzunä neñ guedx Jerusalén, neñ guiraa reguedx Judea, neñ guiraa reguedx Samaria, näjza neñ guideb guedxliuj —räjpmi.

<sup>9</sup> Gulujxtis gunii Jesucrist rediidxga, luxh lałni cahuii rebejn lojni huäjsni xhaguibaa, sa'csi gurejdx Diosni. Dxejc biääd te za, biu'ni neñ zaga. Ro'cti diru rebejn nuhuui lojni.

<sup>10</sup> Lałni cadxelodxi rebejn xhaguibaa cadro gunitloj Jesucrist, tiop angl xten Dios ni najcw ladnol suga' gajxh cadro suga'reni. <sup>11</sup> Dxejc räjp reangl loj rebejn:

—¿Xhi rajctu beñ Galilee? ¿Xhicuent cadxelojtu xhaguibaa? Abahuiitu xho huäjs Jesucrist siini xhaguibaa. Lagajc si'c guibisacni —räjpmi.

*Gulereni Matías ni najc apostcoob*

<sup>12</sup> Dxejc birii rebejn yejc dajne' ni laa Dan Oliib, siireni guedx Jerusalén. Dan Oliib suga' gajxh Jerusalén. Gusajrenini si'cni rniü leii sajce sareni dxej ni rusilajzreni. <sup>13</sup> Che biu'reni Jerusalén, bidzujpreni ro' yu' cadro rbäzlaareni. Yu'ga najc jiaa yejc stee yu'. Ro'c rbäzlaa Pedr näjza Jacoob, Juan, Andrés, Felipe, Tomás, Bartolomé, Mateo, Jacoob xi'n Alfeo, Simón nani laaza Zelote, näjza Judas bejtz Jacoob. <sup>14</sup> Ro'c yu' guiraareni näjza regunaa näjza Marii xnan Jesucrist näjza rebetzhuin Jesucrist. Cabejdx, canabreni loj Dios; tejsi najc xhigab xten guiraareni.

<sup>15</sup> Nadxagsa' te gayuu gajl bejn. Dxejcti huisulii Pedr galäiireni, räjpmi loj rebejn:

<sup>16</sup> —Caniä lojtu, resa'ä, nanabpac soob xtidx Sprit Dxiän xten Dios ni bacuaa toDavid lo guijt xcuent Judas, nani bato' Jesucrist loj renani gunaazni. <sup>17</sup> Gujc Judas sa'nu, bejnzani lagajc dzuun ni biennu. <sup>18</sup> Cua' Judas meel ni badeedreni lojni che bato'ni Jesucrist. Che gulujx bejnii dzungujdx ni bejnii, badedsacni meel lojreni. Gusiireni te la' yuj. Dxejcti lagajc Judas basäl duu guejnni, guzäbnajlni lo bej, gujtni. Gusaguijni, dxejcti biräjs xque'ni birii guiraa reziini. <sup>19</sup> Che biejn diajg rebejn Jerusalén si'c, gulälajreni yujre Acéldama, ni säloj yurejn. <sup>20</sup> Neñ guijt ni laa Salmos abacuaa toDavid rediidxre:

Sujianxteb rolijzni;

na'c cuääzru bejn rolijzni;

näjza:

Suxca'za ste'ca niguii xtzuumni.

<sup>21</sup> Naj nanab cuenu stee niguii —räjpmi Pedr—. Nanab gacni tej ni gusanäj nuunu guideb redxej ni gyunäj Jesucrist nuunu, <sup>22</sup> dxejli ni gusloj batiobnis Juan hasta dxej ni huäjs Jesucrist xhaguibaa. Te gacnäj niguiire nuunu gusule'nu diidx gubansacpac Jesucrist lo rebengut.

<sup>23</sup> Dxejc gulääreni tiop niguii lojreni, tejni laa José Barsabás ni rbälajreni Justo, steeni laa Matías. <sup>24</sup> Gurejdx, gunabreni lo Dios, räjpmi:

—Dad, Dios, ni racbee lastoo guiraa rebejn, baluui loonu con ni najc niguii ni agulelu loj guiro'p niguiire, <sup>25</sup> te jiu'ni lo dzuun näjza lo yälapost ni basa'n Judas cheni sääni garenca nejz —räjpmi.

<sup>26</sup> Dxejcti gudzujtreni daad te gulereni lo guiro'preni. Che biajb daad, gulereni Matías. Dxejc bigabnäjä Matías stzubitteeb reapost te gujcreni tzubito'p apost.

## 2

*Biääd Sprit Dxan xten Dios*

<sup>1</sup> Che bidzujn dxej ni rajc lanij xten Pentecostés, tre' guiraareni tejsi lajt neñ te yu', <sup>2</sup> chela gusloj cayubej xhaguibaa si'c te beroduxh, bachajni guideb neñ yu' cadre suga'reni. <sup>3</sup> Dxejc bahuiireni astoo carechxteb xhidajl bale' casanij rebajlga yejc tejsa reni sojb ro'c. <sup>4</sup> Biu'ti Sprit Dxan xten Dios neñ lastoo guiragajczeni. Dxejc gusloj caniireni garen-garen didxsaj si'ctisni badeed Sprit Dxan xten Dios guiniireni.

<sup>5</sup> Neñ redxejga, xhidajl rexpejn Israel ni sasanäjpac xtidx Dios bidzujn guedx Jerusalén. Xhidajl lajt biriireni siäädreni. <sup>6</sup> Che biejn diajgzeni guyubej beduxhga, bidojp reben xhidaalga, bachaag sa'reni. Rdxeloduxh reben xhidaalga sa'csi cayejn diajgzeni canii reapost xtidxsajpac cade tejreni. <sup>7</sup> Cadxelojreni räjpreni:

—Bahuiilaare! ¿La et beñ Galileedi renani canii, ä? <sup>8</sup> ¿Xhoxh riejn diajgnu caniireni xtiidxpacnu si'ctis ni rniinu laadxnu, ä? <sup>9</sup> Najcnu beñ nación Partia, beñ nación Media, beñ región Elam, beñ Mesopotamia, beñ Judea, beñ estad Capadocia, beñ región Ponto, näjza beñ Asia. <sup>10</sup> Najczanu beñ distrit Frigia, beñ estad Panfilia, beñ nación Egipto, näjza bejn ni siääd stelaad Cirene, te estad neñ Africa. Loj rebejn ni siääd Roma yu' reni najc xpejn Israel, yu'za reni bazuxhijb lo Dios sa'csi rililajzreni si'cni rililajz rexpejn Israel. <sup>11</sup> Yu'za beñ Creta. Yu'za beñ nación Arabia. Guiragajcnu riejn diajgnu caniireni xtiidxpacnu si'ctis ni rniinu laadxnu. Caniireni loonu xcuent recosroduxh ni cayujn Dios.

<sup>12</sup> Bidxeloduxh reben xhidaalga, dijiejn xhi xhigab gunreni. Räjpreni lo sa'reni:

—¿Xhi säloj dee?

<sup>13</sup> Dxejcti guyu' rebejn ni baxhiznäjreni, räjpreni:

—Agusojz redee.

*Gunii Pedr loj rebejn*

<sup>14</sup> Dxejcti gusulii Pedr näjza tzubiteeb sa'ni, guredxa'ni guniini lo reben xhidaalga: —Guejbtu, rexpejn Israel, nani rbäjz distrit Judea näjza guedx Jerusalén. Colcuadiajg diidx nani guiniä. <sup>15</sup> Xhet sojzdinu si'cni cayujntu xhigab. Rsilru naj, entis gojl rcagaa. <sup>16</sup> Dxejc scree gunii Joel che guniini xtidx Dios agujc xchero. <sup>17</sup> Räjp Dios: Sidzujn dxej che guxhalä Xsprit Dxanä cuääzni neñ lastoo guiraa rebejn. Rexingaantu näjza rexindxa'ptu sinii xtidxä xcuent recos ni gajd gac.

Rexi'ntu sinixcal,

rextadgoldootu suluiloj bacal recos nani guluiä lojreni.

<sup>18</sup> Guxhalä Xsprit Dxanä loj guiraa reni siädnajl narä.

Siniireni rediidx ni gudedä lojreni xcuent recos nani gajd gac.

<sup>19</sup> Suluia lojtu balti senro xhaguibaa näjza lo guedxliuj.

Resenro ni gac najc rejn con guiboo, luxh guxh sire' si'c te za.

<sup>20</sup> Sicäjy loj gubijdx, sajc bäii si'c rejn.

Sajc guiraa recosre,

dxejcru sidzujn dxeduxh che jäälsacä narä, Dios.

<sup>21</sup> Dxejc guiraa rebejn nani cueedx guiniab gacnäj Diosreni, reni'c siliaa lo dojl.

<sup>22</sup> Räjp Pedr lojreni:

—Rexpejn Israel, colcuadiajg xtidxä. Dios baluii Jesucrist, beñ Nazare't, lojtu por recosro, remilagwr, reseñ nani bejn ni nez lojtu. Lagajc Dios badeed yälrnibee loj Jesucrist te bejn ni redzunroga. La'tu nancheetu dee. <sup>23</sup> Galooli ananchee Dios xhi guntu loj Jesucrist Xi'nni. Basaanza Dios bateedtu Jesucrist ladznäa rebenguidx te bacuaareni Jesucrist lo cruz te bagu'trenini. <sup>24</sup> Baspañsac Dios Jesucrist, baslaa Diosni ladznäa yälgujt, sa'csi di niajcdi nica' yälgujtni par tejpas, sa'csi laani rnibee lo yälgujt. <sup>25</sup> Che gubansac Jesucrist, guzojb diidx ni bacuaa David lo guijtz xcuent Jesucrist. Räjp David lo Dios:

Guira dxej ruhuia lojtu, Dios.

Suga'lu xladbeä cayacnäjlu narä te di guidxejb lastoä.

<sup>26</sup> Ni'cni bibalajz lastoä, guniäza lojlu lacti rbaa lazä.

Rbalazä sa'csi suhuilu narä che guetä.

<sup>27</sup> Dizalu gusaan jia'n xaimä neñ baa.

Dizalu gusaan gudx tiejxh xi'nlun nani sanälajzlu.

<sup>28</sup> Abaluuilu loä xho guibanä par tejpas.

Sibalazduxhä sa'csi guibanää lu,

si'c räjp David xcuent Jesucrist.

<sup>29</sup> Räjp Pedr:

—Guyasi guiniä lojtu agujc xchero gujt David. Aguyutzu'tzni neñ baa. Sajc guihuini baa cadre biga'tz David. <sup>30</sup> Gunii David xtidx Dios. Che nabajnl David bia'n diidx gudeed Dios te xajni ni guirilaj Crist, luxh laani gacni reii si'cni guj David. <sup>31</sup> Sa'csi baluixgaa



Dios recosre lo David, ni'c räjp David sibansac Crist lo rebengut sa'csi di Dios gusaan jia'n xaimni nen baa, dizani gusaan gudx tiejxhni. <sup>32</sup> Guläs Dios Jesucrist lo rebengut. Nuure bahuiloonuni, najcnu testiigw gubansacni lo rebengut. <sup>33</sup> Gurejdx Dios Jesucrist. Naj nabajn Jesucrist xhaguibaa, nabejni xladbee Dios ro'c canibeeni. Badeed Dios Xsprit Dxanni loj Jesucrist si'cni bia'n diidx. Naj abaxhal Jesucrist Sprit Dxan lo guedxliuj. Jesucrist cayujn guira'ti nani cahuiitu, nani cayejn diajgtu nadxej. <sup>34</sup> Di David nij xhaguibaa, sa'csi lagajc David räjp:

Gunii Dios lo Dad nani rnibee loä: "Gurej xladbeä

<sup>35</sup> che guidzujnli dxej gudzugä guiraa reni rdxe'ch lojlu te gacbeereni luj rnibeelu guira'ti." <sup>36</sup> Rniliäpac lojtu —räjp Pedr—. La'tu bacuaatu Jesús lo cruzj. Ni'cni, colgacbee, guiraatu xpen Israel, abejn Dios gac Jesúsre Dad nani rnibee loonu.

<sup>37</sup> Che biejn diajgrenti laareni bacuaareni Jesús lo cruzj, guc-huinduxh lajzreni. Räjpreni lo Pedr näjza lo reapost ni suga' ro'c:

—Aiilu, resa'nu, çxhini'c jiennu naj?

<sup>38</sup> Dxejcti räjp lojreni:

—Colgusiech lajztu, colguibrobnisza, sa'csi ni'c najc te seen rlaiztu chanajltu Jesucrist, te si'c jia xtojltu. Dxejc suniidx Dios Sprit Dxan cuäaz nen lastootu. <sup>39</sup> Si'c rlaiz Dios guniidx Xsprit Dxanni lojtu näjza loj rexi'ntu, näjza lo rebejn ni rbäjz zijtru, näjza loj guiragajc rebejn nani cueedxni —si'c gunii Pedr lo rexpejn Israel.

<sup>40</sup> Dxejcru gunii Pedr xhidajlru diidx, balijdxni rebejn:

—Colguirii loj reben latsiaj ni re' lo guedxliuj naj, te laatu lo dojl.

<sup>41</sup> Xhidajlreni huililajz rediidxga. Dxejcti gurobnisreni sa'csi huililajzreni xtidx Dios. Lagajc dxejga huililajz si'cti choñ miñ bejn. <sup>42</sup> Sanuutis rusoobreni diidx ni baluui reapost, bibalazduxhreni sa'csi bidxaag sa'reni con rexpejn Jesucrist, gudaunäj sa'reni si'c gudaunäj Jesucrist rexpejnpacni, bidojpreni tejsi lajt te guniireni lo Dios.

### *Xho gubajn rexpejn Jesucrist galoo*

<sup>43</sup> Bidxeloduxh guiraa rebejn luxh bejn reapost redzunro, remilagwr. <sup>44</sup> Bichaag sa' renani huililajz xtidx Dios. Bachagsa'reni xhixtenreni te tejsi gojpreni guiraa xhixtenreni. <sup>45</sup> Bato'reni xhixtenreni, dxejcti badeedreni meel lo sa'reni si'ctis ni caquuin chutis tejreni. <sup>46</sup> Guixee-guixee bidojpreni nen guidoro xten Israel. Tejsi najc rexhigabreni. Gudaunäj sa'reni rolizj cadetejreni, guiraareni bibalaznäduxh sa'reni. <sup>47</sup> Gulä'preni xpala'n Dios. Guiraa rebejn gunii rexpejn Jesucrist najc beñsa'c. Guixee-guixee batie' Dios xhidajlru bejn nani rililajz xtiidxni, badzucajni rextojlreni, dxejc bachaagreni lo rexpejn Jesucrist.

## 3

### *Biajc niguii nani racxhuu ni'ni*

<sup>1</sup> Guyu' te dxej säa Pedr näjza Juan nez loj guidoro si'cti rcachoñ gudxej. <sup>2</sup> Guyu' te niguii nani racxhuu ni'ni, digacdi sani che gojllini. Guixee-guixee rile'c bejn niguiiga ro' puertroga xten guidoro. Puertroga laa Sacrü. Ro'c rbejni rniabni gojn lojreni riu' guidoo. <sup>3</sup> Che bahuiini agojl jiu' Pedr näjza Juan nen guidoroga, gunabni te gojn lojreni. <sup>4</sup> Dxejcti bahuii Pedr näjza Juan lojni. Räjp Pedr lojni:

—jBahuii loonu!

<sup>5</sup> Che biejn diajg niguiiga xtidx Pedr, bahuiini lojreni sa'csi naani sudeedreni meel lojni.

<sup>6</sup> Räjp Pedr lojni:

—Xhetliidi meeldi rapä, nani rapätis sunidxä lojlu. Xcuent xcälrnibee Jesucrist, ben Nazare't, rniä lojlu: jGusulii! jGusaj! —räjpmi.

<sup>7</sup> Dxejcti gunaaz Pedr naani, guläsni. Biligajc ni'ni, gusutijp ni'ni. <sup>8</sup> Huisuyäjni, gusajni. Biunäjni Pedr näjza Juan nen guidoro. Rsiajni, rtiäsni, calä'pni xpala'n Dios. <sup>9</sup> Bahuii xhidajl bejn lojni nen guidoro, rsiajni, calä'pznai xpala'n Dios. <sup>10</sup> Biembeereni laa niguii ni rbej ro' puerthro xten guidoro, rniabni gojn. Guiraareni bidxeloduxhreni bahuiireni xhi gusajc niguii ni gucxhuu ni'ni.

### *Baluui Pedr xtidx Dios nen cordoor xten guidoro*

<sup>11</sup> Ro' guidoroga yu' te cordoor ni laa Cordoor xten Salomón. Ro'c suga' Pedr näjza Juan, natztu'tz niguiiga naareni. Ruxun guiraa rebejn bidzujn nen cordoorga. Bidxelojreni sa'csi arsiaj niguii ni gucxhuu ni'ni. <sup>12</sup> Che bahuii Pedr lo rebejn räjpni lojreni:

—çXhicuent rdxeloej guejbtu, rexpejn Israel? Pet naatu nuure basiajcnu ni' niguiire. Xhet nuudire basiajcnu ni'ni. Xcuent xcälrnibee Jesucrist biajc ni' niguiire. <sup>13</sup> Xtiooznu, ni najc Xtiooz toxtadgoldoonu Abram, toxtadgoldoonu Isaac, näjza toxtadgoldoonu Jacob, lagajc Diosga abadeed yälrnibee loj Xi'nni Jesús. Niluxh la'tu bateedtuni ladzña reguxhtis. Che rlaiz Pila't ni rnibee nusläa Jesucrist, ditu nicäjb niriini, alga guniyajtuni nez loj Pila't. <sup>14</sup> Niluxh la'tu baro'ntu Xi'n Dxan xten Dios nani rujn ganax dzunsa'c. Alga gunabtu birii

te niguii nani bagu't bejn. <sup>15</sup> Jesucrist ruedeed yäl'nabajn, luxh la'tu gunabtu bacuaareni Jesucrist lo crujz. Gulässac Dios Jesucrist lo rebengut. Bahuiloonu nabajn Jesucrist, najcnu testiigw gubansac Jesucrist lo rebengut. <sup>16</sup> Cahuiitu loj niguiire nani gucxhuu ni'ni, luxh rumbeetuni. Xcäl'rnibee Jesucrist abasiajc niguiire, sa'csi huililajzni. Sa'csi huililajznu xtidx Jesucrist, ni'c biajčni te najčni si'cni rhuutuni naj.

<sup>17</sup> 'Rexpejn Israel, narä nanä di'tu niacbee, diza rexcuxhtistu niacbee laa Xindxan xten Dios ni bacuaatu lo crujz. <sup>18</sup> Scree gujc te guzobj xtidx Dios ni cuaj lo guijtj agujc xchero. Diidxre bacuaa reniguii ni gunii xtidx Dios, Crist xten Dios sidejd trabajwduxh. <sup>19</sup> Ni'cni colsiechajztu, colguibi' loj Dios te guibicaj xtojltu. Dxejc susiälyuj Dios lastootu, sujnni gac nacoob guira'ti, si'cni bia'n diidx gacni. <sup>20</sup> Lojtu suxhalza Dios Jesucrist nani rnibee, nani aguleni galooli. <sup>21</sup> Naj nungäj'l jia'n Jesucrist xhaguibaa dxejli guscoob Dios guiralii recos si'cni bia'n diidx gac, si'cni gunii Dios lo reniguii nani gunii xtiidxni lo retoxtadgoldootu agujc xchero. <sup>22</sup> Scree gunii toMoisés lo retoxtadgoldootu, räjpni: "Xtadnu Dios suxhal te niguii sa' narä nani cueni lo resa'tu. Siniini xtidx Dios. Colgusbodiajg guiralii diidx nani guiniini lojtu. <sup>23</sup> Renani di gusoob rextiidxni, sinitlojreni, direni gac rexpejn Dios."

<sup>24</sup> Räjpza Pedr:

—Sigajcza agunii guiralii reniguii nani gunii xtidx Dios. Si'c agunixgaa toSamuel, näjza guiraa reniguii ni siäd'najni, xcuent recos ni cayajc neñ redxejre. <sup>25</sup> La'tu najc xajg reniguii ni gunii xtidx Dios. La'tu biannäjtu diidx nani gunii Dios loj retoxtadgoldootu. Bia'n diidx, räjp Dios loj toxtadgoldootu Abram: "Jädjiajl te xajglu ni guspalduxh reben guedxliuj, sa'csi suslaanireni lo dojl." <sup>26</sup> Dxejcti ganiddoo lojtu baxhal Dios Jesucrist te guibaa lajztu che gusiejch lajztu, te na'cru guntu dojl —räjp Pedr.

## 4

### *Baluu Pedr näj Juan xtidx Dios loj reguxhtis*

<sup>1</sup> Lał ni caniireni lo rebejn, ro'c bidzujñ rebixhojz xten Israel näjza nani rnibee lo resoldaad xten guidoro näjza resaduceos. <sup>2</sup> Bidxe'chduxhrene sa'csi cagulijdxrene rebejn, cayäjpreni:

—Sibansac rebejn lo rebengut sa'csi gubansac Jesucrist lo rebengut.

<sup>3</sup> Gunaaz reguxhtisreni, biäuren sa'csi agudxej luxh abiäu jusgaad. Neñ latzguuib bararani yääl. <sup>4</sup> Xhidajl reni biejn diajg xtiidxrene huililajz xtidx Dios. Si'cti gaii mil niguii huililajz xtidx Dios.

<sup>5</sup> Che bara yääl, bachaag sa' guiraa rebengool, renani rnibee guedx Jerusalén, näjza rebejn ni ruluii lei, <sup>6</sup> näjza Anäs ni rnibee guiraa rebixhojz, näjza xpagojzni ni laa Caifäs, näjza Juan, näjza Alejandro, näjza guiraa reniguii ni najc sa' rebixhozro ni rnibee. <sup>7</sup> Gunibeereni biääd Pedr näjza Juan gusuj galäiireni te gunabdiidxrene lojreni:

—¿Chu xcäl'rnibee rajptu? ¿Chu laj basä'ttu te basiajctu niguiire?

<sup>8</sup> Dxejcti sa'csi cayu Pedr diidx ni canii Sprit Dxan xten Dios neñ lastooni, räjpni lojreni:

—Caniä lo guejbtu, reguxhtis näjza rebengool xten rexppejn Israel, <sup>9</sup> palga canabdiidxtu xhicutent gucnäjnu niguii nani gucxhuu ni'ni, palga canabdiidxtu xho basiajctnu niguiiga, <sup>10</sup> gusule'nu xcuent dee te gacheetu te gacheeza guiraa rexppejn Israel. Xtidx Jesucrist najc yäl'rnibeduxh. Diidxga abasiajc ni' niguiire, xhet rajcdini suga'ni nez lojtu. La'tu abacuaatu Jesucrist lo crujz, niluxh Dios guläsni lo rebengut. <sup>11</sup> Di'tu ninälajz xtidx Jesucrist. Laani najc si'c te guj nani rbäcajt che runcheetu te yu'. Per Dios abejn najc Jesucrist si'c guj nani maazru nacsä'c, nani guyu' squiin xte yu'. <sup>12</sup> Xtehtis abejn ruslaa bejn lo dojl, ruti stee bejn lo guedxliuj nani baxhal Dios te guslaani bejn lo dojl —si'c räjp Pedr.

<sup>13</sup> Che biejn diajgreni xtidx Pedr, bidxelojreni sa'csi di Pedr näjza Juan guidxejb, dizareni guitujy. Dxejcti räjp rebixhojz ni sajcru lo sa'reni:

—Direni ganduxh guijtj, bejntisreni.

Dxejcti gubeereni gusanäj redee Jesucrist, lojni bisieedreni. <sup>14</sup> Bahuiiza rebixhojz lo niguii ni abiajc ni'ni, suganäjni guiro'preni. Ro'cti xhetru gujcdi gunii rebixhojz sa'csi laaca bejnreni. <sup>15</sup> Dxejcti gunibee rebixhojz birii guidxojnreni telaad te bij rebixhojz diidx ensilaareni. <sup>16</sup> Räjpreni lo sa'reni:

—¿Xhi jiennäanu reniguiire? Guiraa reben Jerusalén anajn xcuent dzunroduxhre ni cayujnreni. Digacdi gucuatzlaaznuni. <sup>17</sup> Per te di guire'ch xtidx Jesucrist ste'ca guejdx, do'o gulijdxnu guidxojnreni te na'c guiniirureni xtidx Jesucrist ste'ca guejdx.

<sup>18</sup> Huixisac rebixhojzreni. Dxejcti räjpreni lojreni:

—Na'c guluirutu xtidx Jesucrist, na'cru guiniitu xtiidxni.

<sup>19</sup> Dxejc gunii Pedr näjza Juan, räjpreni lojreni:

—¿Colguinii loonu chu xtiidx sajcru guicuadiaagnu? ¿Xtiidx la'tu, o xtiidx Dios? <sup>20</sup> Digacdi gusāunu ro'nu. Nanabpac gusule'nu diidx xcuent recos nani abahuiinu nājza rediidx ni abiejn diajgnu.

<sup>21</sup> Balidxsac rebixhojzreni te na'cru guiniireni xtiidx Jesucrist. Dxejc baslaa rebixhojz guiro'preni, sa'csi xhetru niajcdi niujnreni lo Pedr nājza Juan, sa'csi canii rebejn bejnreni te dzunsa'c. Xhidajl rebejn gulā'pza xpala'n Dios sa'csi bahuiireni xhini'c gujc ro'c. <sup>22</sup> Sa'csi niguii ni basiajcren xcuent yālmilagwr agudejndi tiuu ijz.

#### *Guredx-gunab rexpejn Jesucrist lo Dios*

<sup>23</sup> Che baslaa rebixhojz guiro'preni, gubi'reni lo sa'reni ni najc rexpejn Jesucrist. Bijreni diidx guiraa ni gunii reguxhtis xten rebixhojz nājza rebengool lojreni. <sup>24</sup> Che biejn diajg rexpejn Jesucrist xtiidxreni, tejtis xhigab bejnreni guredx-gunabreni lo Dios, rājpreni:

—Xtadnu Dios, nani benchee xhaguibaa nājza guedxliuj nājza nisdoo nājza guira'ti ni yu' lojreni, nenreni, <sup>25</sup> nani bejn basoo toDavid xtiidx Sprit Dxan te bacuaani xtiidxlu, rājpni: ¿Xhicuent guyuduxh rebejn guedxliuj yārsia'?

¿Xhicuent bejn rexpejn Israel xhigab ni xhet sajcdi?

<sup>26</sup> Bidxagsa' re'reii lo guedxliuj nājza reguxhtis xten reguejdx te gudxojnreni xtzun Dios nājza xten Dad Crist nani baxhal Dios, si'c gunii toDavid.

<sup>27</sup> 'Aguzojb diidxre, sa'csi lo guejdxre bidxagsa' Herodes nājza Poncio Pila't nājza rexpejn Israel nājza rebenzijt nani di gac xpejn Israel. Bidxehnājreni Xi'nlu nani najc Crist ni baxhallu. <sup>28</sup> Naj abejnreni dzunguijdx si'cni galooli guniilu gac. <sup>29</sup> Naj Guejblu Xtiosnu, bahuii xho cagusacsireni nuure, gucnāj nuure te gutiplaaznu, te na'c guidxeebnu guiniinu xtiidxlu, sa'csi najcnu rexpejnu. <sup>30</sup> Baniidx xcāl'rni beelu loonu te guisiajcnu rebejn, te jienzanu redzunro, remilajgwr con xcāl'rni bee Xi'ndxanlu Jesucrist.

<sup>31</sup> Che gulujx gurejxreni lo Dios, gusloj canibsejz yu' cadro tre'reni, cayac si'c te xu. Dxejcti biāād Sprit Dxan xten Dios basutijpruni lastooreni. Dxejc dirureni nidxejb guiniireni xtiidx Dios.

#### *Rudeedreni xhixtenreni lo sa'reni*

<sup>32</sup> Guiraa renani huililajz xtiidx Dios, tejsi xhigab bejnreni. Rut chu tejdireni bejn guinibexteb xhixtenni: bachaagreni sa' rexhixtenreni te xca' guiraareni nani rquiireni. <sup>33</sup> Gucnāj Dios reapost, gusutzu'tzreni bijreni diidx bahuilojreni loj Jesucrist che gubansacni lo rebengut. Gucnāj Dios guiraa rexpejn Jesucrist, luxh gopduxh rebejn guejdx respe'treni. <sup>34</sup> Ni'cla tejreni di niāādx xhixtenni sa'csi renani gojp xyujni, rōlijzni, bato'renini, dxejcti biāādnāreni xcuentni, <sup>35</sup> badeedreni meelga lo reapost. Dxejcti gudis reapost meelga lo guiraa renani rquiinni. <sup>36</sup> Guyu' te niguii ni laa José. Lajdxni najc Chipre, ni re' lo nisdoo. Najcni sa' rexfamii levita. Reapost gulālajni Bernabé (ni sāloj xtiidxreni bejn ni rbedcxi lajz sa'ni). <sup>37</sup> Scree gulālajrenini sa'csi bato'ni te la' yuj xtenni, dxejcti badeedni meel ni cua'ni lo reapost.

## 5

#### *Ananías nāj chāālni rujn dojl*

<sup>1</sup> Guyu' stee niguii ni laa Ananías. Chāālni laa Safira. Bato'reni te la' yuj. <sup>2</sup> Niguiire biannājni gala' meel, dxejc sgala' meelga badeedni lo reapost si'c guiraa xcuent yujga luxh chāālni nanchee xhi cayujjni. <sup>3</sup> Dxejcti rājp Pedr lojni:

—Ananías, ¿Xhicuent ruooblu xtiidx Satanás ni rnibee lo rebendxab, ā? ¿Xhicuent rlaizlu gusgueelu Sprit Dxan xten Dios? Biannājlu gaii meel ni cua'lu che bato'lu te la' yuj. <sup>4</sup> Che gajdlu guto' yujga, xtenluni. Che bato'lu yujga, ¿la xhet xtendilu meel ni cua'lu? ¿Xhicuent bejnlū xhigab nen lastoolu gunlu dee? Loj Dios guniilu didx-xhii, xhet loodinu.

<sup>5</sup> Che biejn diajg Ananías xtiidx Pedr, biajbni lo yuj, gujtni. Bidxebduxh rebejn che biejn diajgreni xhi gusajcni. <sup>6</sup> Sas gubig gaii bi'n batejbreni Ananías nen lajd. Dxejcti sanārenini huicua'tzrenini nen baa.

<sup>7</sup> Pet agujc choṅ or gujtni chela bidzujn chāāl Ananías. Dini gan agujt chāālni. <sup>8</sup> Rājp Pedr lojni:

—Gunii, ¿la bato'tu xyujtu si'cni naj chāāllu huijni, ā?

Rājp Safira lojni:

—O'n, si'c huijni.

<sup>9</sup> Dxejcti rājp Pedr lojni:

—¿Xhicuent bejnlū tejsi xhigabguijdx con chāāllu? ¿Xhicuent rlaiztu gusgueetu Sprit Dxan xten Dios? Ro lā' siāād renani huicua'tz chāāllu. Naj nājza luṅ chacua'tzreni nen baa.

<sup>10</sup> Si'ctis bjaib Safira, gutgajczani. Dxejcti bidzujñ rebi'n, bahuiireni agujtni. Dxejcti guläsrenini, biriireni huicuatgajczeni cuä' baa cadro biga'tz chäälni. <sup>11</sup> Bidxebduxh guiraa rexpejn Jesucrist, näjza guiraa rebejn nani biejn diajgni recosre.

*Bejn reapost xhidajl redzunro, remilagwr*

<sup>12</sup> Xhidajl redzunro, remilagwr bejn reapost nez loj rebenguejdx. Nadxaag sa' rexpejn Jesucrist, caguchaagreni diidx neñ cordoor ni laa Salomón. <sup>13</sup> Guyu' xhidajl bejn ni di nuchaag lo rexpejn Jesucrist sa'csi bidxebreni guchaagreni lojreni. Rebenguejdxga guläpduxhrene xpala'n rexpejn Jesucrist. <sup>14</sup> Neñ redxejga xhidalduxh rebejn huililajz xtidx Jesucrist, niguii sigajc gunaa. <sup>15</sup> Dxejcti gulääreni lo nezyuj rebejn nani cayacxhuu. Siädnä rebejn benracxhuu naga' lo da', te gaxäjsi ted xpalaa Pedr yejcreni che ted Pedr ro'c, te si'c jiajcreni. <sup>16</sup> Guedx Jerusalén bidzujñ xhidajl rebejn ni siäd ste'ca guejdx. Biädnäreni rebejn ni cayacxhuu näjza balti bejn ni yu' bendxab neñ lastooreni. Con xcälriabee Jesucrist basiajc reapost reben racxhuu, gulääzaren rebendxab neñ lastoo balti bejn.

*Gudejd reapost trabajw*

<sup>17</sup> Dxejcti bidxechlajz bixhojz ni rnibee, näjza reniguii ni laa saducee, sa'csi calä'p rebenguejdx xpala'n reapost sa'csi basiajcreni reben racxhuu. <sup>18</sup> Gunaazreni reapost. Basäurenini neñ latzguuib. <sup>19</sup> Niluxh yääga, biäd te angl xten Dios, baxhalni ro' latzguuibga. Dxejcti gulääni reapost neñ latzguuib. Räjpmi lojreni:

<sup>20</sup> — Colchäj guidoro. Ro'c colguinii lo rebejn xho gac guibannäjreni Dios par tejpas.

<sup>21</sup> Che biejn diajgreni si'c, rsildooru biu'reni neñ guidoro, ro'c baluiireni xtidx Dios lo rebejn.

Dxejc bixhojz nani rnibee, näjza rebengool, bachagsa'reni gurejdxreni guiraa reguxhtis xten guidoo, näjza guiraa reguxhtis xten rexpejn Israel. Dxejcti gunibeereni jäädnä reguixhajg reapost nani biäu neñ ladtguuib. <sup>22</sup> Che bidzujñ reguixhajg latzguuib, bahuii reguixhajg neñ latzguuibga, niluxh rut yu'di neñ latzguuib. Che gubi'reni biädnäreni diidx, räjpmi loj reguxhtis:

<sup>23</sup> — Che bidzunnu latzguuib, niäudzu'tz ro' latzguuib luxh resoldaad ni cayajp ro' latzguuib suga' guiro'p laad. Che baxhalnu ro' latzguuib, rut yu'di neñ latzguuib.

<sup>24</sup> Che biejn diajg bixhojz ni rnibee, näjza capitán nani rnibee resoldaad xten guidoro, näjza rebixhojz, ben tio'p lajzreni, räjpmi lo sa'reni:

— ¿Xhini'c gujc? ¿Xhoni gac naj? — räjpmi.

<sup>25</sup> Dxejcti bidzujñ te niguii, räjpmi lojreni:

— Reniguii ni basäutu neñ latzguuib, areni suga' neñ guidoro, luxh caguluiireni rebejn — räjpmi.

<sup>26</sup> Dxejcti sanä capitán xten resoldaad rexcuxhtis guidoro te biädnäreni reapost, luxh direni nusacsí reapost sa'csi rdxebreni nucuaaren guij yejcreni. <sup>27</sup> Che bidzunnajreni reapost, räjpmi suuren nez loj reguxhtis xten Israel, sas gunii bixhojz ni rnibee, <sup>28</sup> räjpmi loj reapost:

— ¿Et agunibeenu lojtu na'cru guiniitu xtidx Jesucrist? Xhoxh naj cagutie'chtu rediidxga lo guiraa rebejn neñ guedx Jerusalén. La'tu rlaiztu cuaquijtu nuure bagu'tnu Jesucrist.

<sup>29</sup> Dxejc räjpmi Pedr näjza reapost lojreni:

— Nanabpac gusoobnu xtidx Dios, lacuaa gusoobnu xtidx bejn. <sup>30</sup> Bagu'ttu Jesucrist che bacuaatuni lo crujz. Niluxh Xtios xtadgoldoonu guläsni lo rebengut. <sup>31</sup> Naj agule'c Diosni xladbeeni cadro rnibeeni, abadeedza Dios yälriabee loj Jesucrist te guslaani nuure, te si'c rlaizni guibicaj xtojl guiraa rexpejn Israel nani gusiechlajzreni. <sup>32</sup> Bahuiiloonu xhi bejn Dios. Ni'c cagusule'nu. Nadoncheenu Sprit Dhan xten Dios cayacnaj nuure te gusule'nu rediidxre. Badeed Dios Sprit Dhan xtenni lo guiraa renani susoob xtiidxni.

<sup>33</sup> Che biejn diajg reguxhtis rediidxga, bidxebduxhrene, rlaizreni nugu'treni reapost.

<sup>34</sup> Dxejcti huisulii te niguii ni laa Gamaliel, nani najc te farisee nani ruluii leii xten Israel, rebejn rapduxh respe't dade'ga. Gunibee Gamaliel guiri reapost neñ yu'ga.

<sup>35</sup> Dxejcti räjpmi Gamaliel lo rebixhojz:

— Guejbtu rexpejn Israel, colyensa'c xhigab xhini'c rlaiztu gunnäjtu reniguiire. <sup>36</sup> Colzaa laiztu gajd gac xchej guyu' tej ni laa Teudas, räjpmi rnibeduxhni. Dxejc huinajl tajp gayuu bejpmi. Che bagu'trenini, bire'ch guiraa rexpejpmi, xhetru bejndireni. <sup>37</sup> Neñ ijz ni guyu' cens, biriiza Judas ni siäd Galilee. Dxejc gurejdxni xhidajl bejn ni huinajlmi. Bagu'tza bejpmi, dxejcti bire'chza guiraa reni huinajlmi. <sup>38</sup> Naj rmiä, colguibicaj, colgusaan reniguiire, rexpejn Jesús. Palga guejbcaren cayujnreni dzuunre, xtebcani sinidojmi. <sup>39</sup> Palga xtzuum Dios ni cayujnreni, digacdi guscuääznu dzuunga, sa'csi guidijnu guidxe'ch Gueb Dios loonu.

<sup>40</sup> Bichagljaz rebixhojz xtiidx Gamaliel. Gurejdxreni reapost, dxejcti gudijnni reapost, gunibeereni loj reapost na'cru guiniireni xtidx Jesús. Dxejc baslaarenini. <sup>41</sup> Biriitreni nez

loj rebixhojz. Cabaduxh lajzreni sa'csi gujc gudejdreni trabajw xcuent Jesucrist. <sup>42</sup> Guixe-guixee laltis baluiireni xtidx Jesucrist neŋ guidoro nǎja rolizj bejn. Cagusule'reni diidx lo rexpen Israel:

—Jesús najc Crist nani cabääztu jiaäd.

## 6

*Gulereni reniguii ni gudeed yäxtiil lo rexpejn Jesucrist*

<sup>1</sup> Neŋ redxejga, xhidallo gujc rexpejn Jesucrist. Niluxh gusloj camojm rexpejn Jesucrist nani rnii didx griegw. Rǎjpreni:

—Xhet laadi cayujn rebejn ni rnii didx hebreo. Rebiuud nani rnii didx hebreo rca'ru loj rexpiuudnu. Rebiuud ni rnii didx hebreo rca'ru xhi gaureni che rguisreni xhi gau rebiuud guixe-guixee.

<sup>2</sup> Dxejcti batie' guitzubitio'p reapost guiraa rexpejn Jesucrist, rǎjpreni lo guiraareni:

—Et laadi gusaannu guluiinu xtidx Dios te quisnu xhi gau rebiuud. <sup>3</sup> Ni'c nanab cuetu lo resa'tu gajtzniguii nani najntu najc beŋsa'c, nani rbǎjz Sprit Dxan xten Dios neŋ lastooreni, nani yu' xcǎriejnreni. Reniguiire quis xhi gaureni. <sup>4</sup> Te si'c sajc chanuutis guiniabnu lo Dios, guiluiizanu xtidx Dios lo rebejn.

<sup>5</sup> Guiralii rebejnǎga bidxaglajzreni diidxga. Dxejcti gulereni Esteban, te niguii ni rilalajzpac xtidx Dios, rbǎjzsa Sprit Dxan xten Dios neŋ lastooni. Gulezareni Felipe, Prócoro, Nicanor, Timón, Parmenas; gulezareni Nicolás nani siääd guedx Antioquía. Nicolás najc te proselite, nalajznu, dini gac xpejn Israel, per basoobni xleii toMoisés che gajdni chalilajz xtidx Jesucrist. <sup>6</sup> Sas biädñä rexpejn Jesús guigajtz niguiiga lo reapost. Dxejcti guredx-gunab reapost lo Dios xcuent reniguiiga, batzuubreni ñaareni yejc reniguiiga si'c te seen abiu'reni lo xtzuunreni.

<sup>7</sup> Birechduxh xtidx Dios. Xhidajl beŋ Jerusalén huililajz xtidx Dios, nǎjza xhidajl bixhojz.

*Gunaazreni Esteban sanärenini lo rebixhojz nani rnibee*

<sup>8</sup> Gucnäduh Dios Esteban, bejni redzunro, remilagwr nez lo rebejn. <sup>9</sup> Dxejc reben guidoo ni laa Libertados gusloj cadilñaj Esteban. Lojreni nadxaag beŋ Cirene, nǎjza beŋ Alejandria, nǎjza gaii beŋ Cilicia, nǎjza sgaii bejn ni siääd reguedx Asia. <sup>10</sup> Reniguiire di ni ajcđi nuzejceni diidx lo Esteban, sa'csi nasiñduxhni, luxh cayacnǎj Sprit Dxan xten Diosni. <sup>11</sup> Dxejcti baquilreni sgaii niguii ni di gac xpejn Jesús, te rǎjpreni:

—Biejn diaagnu caniyaj Esteban toMoisés nǎjza Dios.

<sup>12</sup> Scree gujc bache'chreni rebejn nǎjza rebejn ni ruluii leii nǎjza rebengool. Dxejcti bachagsa'reni, gunaazreni Esteban. Huinärenini lo reguxhtis xten Israel. <sup>13</sup> Dxejcti biädñäreni reniguii nani baquilreni te guniireni didx-xhii. Rǎjpre reniguiire:

—Entis rniyaj Esteban leii xten toMoisés nǎjza guidodxanre. <sup>14</sup> Abiejnza diaagnu gunii Esteban: “Jesús nazareno sutzujl guidoro, suchaazani leii nani baniidx toMoisés loonu.”

<sup>15</sup> Dxejcti guiraa rebejn ni sobga' ro'c bahuiireni lo Esteban, bahuiireni rujn lojni si'c rujn loj te angl xten Dios.

## 7

*Diidx ni basule' Esteban lo rebixhojz*

<sup>1</sup> Dxejcti rǎjp te bixhojz nani rnibee lo Esteban:

—¿La gulii si'c guniilu, ä?

<sup>2</sup> Rǎjp Esteban lojreni:

—Colgucuaadiajg rextidxǎ, guejbtu dad, nǎjza resa'ä. Xtioznu ni sacduxh, ni rnibee, baluiloj lo toxtadgoldoonu Abram che gulǎjzni Mesopotamia, che gajdni chalǎjz neŋ guedx Harán.

<sup>3</sup> Rǎjp Dios loj toAbram: “Birii lajdxtu, basa'n guiraa resa'lu. Huij cadrotis guluiä lojlu.”

<sup>4</sup> —rǎjp Esteban—. Dxejcti birii toAbram lajdx reCaldeos. Huilǎjzni guedx Harán. Che gujt xtadni, biädñä Dios toAbram nez ree, cadre rbǎäznu ñaj. <sup>5</sup> Di Dios nuzalajz nicla tla' yuj cadre suu te ni' toAbram. Niluxh rǎjp Dios sudeedni yujga lo rexaj toAbram, jianñajreni yujga che guet toAbram. Niluxh nicla gajd xi'n toAbram chu dxejc. <sup>6</sup> Stee huält rǎjp Dios lo toAbram: “Rexi'nlu, rexagdoolu, silǎjzreni si'c benzijt. Ladxbejn gacreni mos, ro'c susacsí bejnreni si'cti tajp gayuu ijz.”

<sup>7</sup> Rǎjp Dios: “Narä sunä castiigw rebejn ni gusacsíreni che najceni mos. Narä cuää rexagdoolu ro'c, te ree guzuxhijbreni loä neŋ guejdxre”, si'c rǎjp Dios <sup>8</sup> —rǎjpa Esteban—. Dxejcti si'c bia'n Dios diidx con toAbram, gunibee Dios gutiuug Abram lagajc laani, te chuni bee; ni'c najc te seen xten diidx ni bia'n Dios con Abram. Guyu' te xi'n toAbram, ni laa Isaac. Che guyu'ni xhujñ dxej, basǎlza toAbram beegani si'c te seenza. Sigajcza bennǎj Isaac xi'nni Jacob. Sigajcza bennǎj Jacob guitzubitio'p rexi'nni nani najc rexpengdoo xpen Israel.

<sup>9</sup> Rǎjp Esteban:

—Guitzubiteh rexi'n Jacoob guyu' te yälrudxojn lo bejtzreni José. Dxejc bato'reni José lo te beñ Egipto. Dxejc Dios goptzu'tz José. <sup>10</sup> Che gudejd José trabajwduxh, gucnäj Diosni. Badeed Dios yäl'nasınduxh lojni. Bejn Dios bichagljajz reii Faraón José. Badeed reii Faraón gujčni gubernadoor xten Egipto. Gunibeeza José guira'ti xhixten reiiga.

<sup>11</sup> Räjpa Esteban:

—Che bidzujñ dxej gujc te gubijn, guiraa neñ reguedx Egipto näjza guiraa neñ reguedx Canaán, trabajwduxh cadejd guiraa rebejn. Xhet guyu'di xhi niajw retoxtdagoldoonu. <sup>12</sup> Che biejn diajg xtadgoldoonu Jacoob yu' xhi gaureni neñ reguejdx xten Egipto, ro'c baxhalni rexi'nni, bica'reni xhi gaureni te huält. <sup>13</sup> Che huijreni stehuält, dxejc bazäbdiidx José lojreni laani najc bejtzreni. Biembeza Faraón resa' José. <sup>14</sup> Dxejcti baxhal José diidx jääd xtadni Jacoob, näjza guiraa resa'ni, cuääzreni Egipto. Najc rebejnga si'cti gayonbitzubigaii bejn. <sup>15</sup> Si'c gujc te huij Jacob guedx Egipto. Ro'c guläjzni, ro'c gujtni. Ro'c gujtzta retoxtdagoldoonu. <sup>16</sup> Dxejcti huiinäreni rextzujtreni loj Siquem te biga'tzsacreni neñ baa nani gusii toxtadgolnu Abram lo rexi'n Hamor neñ guedx Siquem.

<sup>17</sup> Räj Esteban:

—Che bidzujgajxh dxej, si'c diidx ni bia'n Dios con toxtadgoldoonu Abram, bidalduxh rexpengoldoonu neñ guedx Egipto. <sup>18</sup> Dxejcti guyu' te xreii Egipto ni di gan guiraa redzunas'c nani bejn toxtadgoldoonu José. <sup>19</sup> Reiiga basgueeni rexpengoldoonu, basacsñireni, trabajwduxh bateedni rexpengoldoonu. Gunibee reiiga basäl'reni guiraa rebäz niguii te di laareni, te guetreni. <sup>20</sup> Neñ redxeggia, gojl Moisés. Che gujc Moisés báz, te báz daani, saru rujn lojni, huiñälajz Diosni. Gulaañi choñ bäii rolizjni. <sup>21</sup> Dxejc huisäl'renini, te guzobj xtidx Faraón. Dxejc lagajc xindxa'p Faraón bidxäl'ni Moisés, cua'nini baslaanini si'c xi'nni. <sup>22</sup> Bisieed Moisés guiraa ni najn rebeñ Egipto. Gunisa'cni diidx, bensa'cni dzuun.

<sup>23</sup> Räj Esteban:

—Che guyu'ni tiuu ijz, banaj lajzni resa'ni ni najc xpejn Israel, huijni cadre rbäjzreni. <sup>24</sup> Dxejc bahuini casacsí te beñ Egipto te beñ sa'ni. Sas bagu'tni beñ Egipto. <sup>25</sup> Bejn Moisés xhigab pet sacbee resa'ni cayacnäj Diosni te guslaani rexpeljñi. Luxh di resa'ni niacbee si'c. <sup>26</sup> Che bara yääl, bahuini Moisés cadil'näj sa'reni tiop xpen Israel. Räj Moisés lojreni: “Colcuedxi, Dad. Lagajc sa'tu cadil'näjtu. ¿Xhicuent rdijltu?” si'c gunii Moisés, te na'cru til'näj sa'reni. <sup>27</sup> Dxejcti nani cayunñälajzga, balanaani Moisés, räjpnii loj Moisés: “¿Chu baniidx yäl'nibee lojlu te jäädnibeelu nuure?” <sup>28</sup> ¿La rlaizlu ju'tlu narä si'c bagu'tlu beñ Egipto nani?” —räjpnii—. <sup>29</sup> Che biejn diajg Moisés rediidxga, baxunni, huijni zijt. Huiñäzsjicni guedx Madián. Ro'c bachñaani, guyu' tiop xingaañi.

<sup>30</sup> Räjpa Esteban:

—Che gudejd tiuu ijz, bidzujñ te dxej cansajni nez lo reyubijdz ni naga' guideb gabi dajn ni laa Sinai. Ro'c bahuini te bajl neñ te yaguejch. Neñ bajlga baluiloj angl xten Dios lo Moisés. <sup>31</sup> Bidxeloduxh Moisés che bahuini si'c. Dxejcti gubigni te rlaizni nuhuisa'cni yajgga. Dxejc biejn diajgni gunii Dios, räjpnii lo Moisés: <sup>32</sup> “Narä nacä Xtios rextadgoldoolu, narä nacä Dios xten Abram, näjza xten Isaac näjza xten Jacoob.” Dxejcti gucez Moisés sa'csi bidxebduxhni, diruni nuhuisa'c yajgga. <sup>33</sup> Dxejcti räjjo lojni: “Gulää xcura'chlu. Yuj cadre suga'lu najc dxan, sa'csi narä yu'a ree. <sup>34</sup> Abahuiä xho cagusacsí rebeñ Egipto rexpennä. Abiejn diagä xho roonreni. Naj abiälä te guslaä rexpennä. Gudaa naj, suxhalälü chäälü Egipto.”

<sup>35</sup> Räj Esteban:

—Dios badeed yäl'nibee lo Moisés nani baze' retoxtdagoldoonu che räjpreni: “¿Chu baniidx yäl'nibee lojlu te jäädnibeelu nuure?” Baxhal Dios Moisés te guinibeeni xpejn Dios, gucnäjza Dios Moisés baslääni rexpeljñi neñ naciön Egipto si'c gunii angl xten Dios che baluilojni lo Moisés neñ yaguejchga. <sup>36</sup> Gulää Moisés rebejnga. Ganiddoo bejn Moisés redzunro, yäl'rdxeloj neñ naciön Egipto näjza ro' nisdoo ni laa niso dnxaa. Tiuu ijz cuansaj retoxtdagoldoonu neñ yubijdzroga, ro'c bejnza Moisés redzunro, remilagwr. <sup>37</sup> Lagajc Moisésre gunii xtidx Dios che räjpnii loj rexpeljñ Israel: “Sibe Dios lo rexajgtu te niguii ni najc sigac narä. Siniini xtidx Dios. Colgusoob xtiidxni.” <sup>38</sup> Lagajc Moisés guyunäj rebejn neñ yubidzro. Xangl Dios guninäj Moisés neñ dajn xten Sinai. Dxejcti badeed Moisés rediidx ni gunibee Dios lo retoxtdagoldoonu. Laareni basa'nreni diidxga loonu.

<sup>39</sup> Räj Esteban:

—Niluxh di retoxtdagoldoonu nusoob rextidx Moisés. Di rlaizreni guinibee Moisésreni. Canaduxhlajzreni naciön Egipto. <sup>40</sup> Che säa Moisés dajn Sinai, räjpreni loj Aarón bejtz Moisés: “Benchee banäjb gac xtiooznu, te nidreni loonu, te chanajlnurenii. Chu gan con Moisésre ni baluui nezuj che gulääni nuure guejdx reEgipto.” <sup>41</sup> Sas bencheereni te banäjb ni najc si'c te gonbáz. Dxejcti bagu'treni guidxaa te badeedreni rejnga lo banäjb te bazuxhijbreni lojni. Bibalazduxhreni sa'csi abencheereni banäjbga. <sup>42</sup> Dxejcti gubicaj Dios

loj rexpejn Israel sa'csi bejnreni si'c. Basaan Dios gojnreni gubijdx, näjza bäii, näjza rebal xhaguibaa. Gujčni si'čni caj lo guijtž ni bejn reniguii nani bacuaa rextidx Dios. Räjƿ Dios: La'tu beñ Israel, cheni cuansajtu tiuu ijz nez lo reyubijdz, ¿la par narä bagu'ttu guidxaa, ä?

¿La loä baniidxtu xtiejnreni, ä?

<sup>43</sup> Xho gacni si'c, räjƿ Dios.

Cuansanäjtu te yu' najcw guijd cadro chu te banäjb.

Nenga guyu' banäjb ni laa Moloc, nani najtu najc xtiostu.

Gojnžatu balbäze' xten xtiostu ni laa Remfán.

Redios ni bencheetistu reni'c gojntu.

Ni'čni sibää la'tu ree guxhałä la'tu stelaad guedx Babilonia.

<sup>44</sup> Guniiru Esteban, räjƿni lojreni:

—Neñ reyubijdz gojp rextotadgoldoonu te yu' najcwni guijd. Gujčni xquidooreni. Ro'c guninäjnreni Dios. Benchee rextotadgoldoonu yu' najcw guijdga si'čni gunibee Dios che baluiini lo Moisés xhoni gacni. <sup>45</sup> Che gujt Moisés, Josué gunibee lacuaa toMoisés, huinäni rextotadgoldoonu naciõñ Canaán. Batzujlreni yuro ni najcw guijd te näj ni'c huinäreni Canaán. Gulää Dios rebejn ni guläjz neñ reguedx Canaán. Dxejcti bia'n rextotadgoldoonu neñ reguejdxga. Bazuxhijbreni lo Dios neñ yuguijd ni najc xquidooreni che gojlli xtiemp reii David. <sup>46</sup> Huinäłajz Dios David. Räjƿ David lo Dios: “Rlazä gunä te guidoo par guejblu, Dios xten nuure, rexpejn Israel.” <sup>47</sup> Dxejcti di Dios nusoob xtidx David. Alga Salomón, xi'n David, ni'c benchee xquidoro Dios. <sup>48</sup> Naj di Dios guiquini te yu' nani runchee bejn. Scree bacuaa te niguii nani gunii xtidx Dios. Räjƿ Dios:

<sup>49</sup> Si'c najc te yagxhilsa'c cadro rnibee reii, si'c najc xhaguibaa cadro rbeä.

Si'c te bancw cadro rsuij ni' reii, si'c najc guedxliuj nani bencheä.

Dina guiquinä guncheetu te xyu'ä.

Dina guiquinä te lajt cadro gusilazä, räjƿ Dios.

<sup>50</sup> ¿La et naädi benchee guiraa nani ruhuiitu?, räjƿ Dios.

<sup>51</sup> Räjƿ Esteban lojreni:

—Te beñ nadduxh najctu. Ditu jiu xtidx Dios. Niäu lastootu, niäuza diajgtu. Di'tu chanälajz xtzuum Sprit Dxan xten Dios, dizani cuääz neñ lastootu. Si'c beñ rextotadgoldootu, si'cza rujntu. <sup>52</sup> Basacsí rextotadgoldootu guiralii reniguii nani gunii xtidx Dios. Nicla tejni direni niu. Bagu't rextotadgoldootu guiraa reniguii nani gunii siääd te niguidxan xten Dios. Naj abiääd niguidxanga, Jesucrist laani, luxh la'tu huinäñtuni lo guxhtis te gunibeetu gujtni. <sup>53</sup> La'tu biannäjtu leii nani gunii reangl xten Dios loj Moisés, luxh la'tu ditu nucuadijg rediidxga.

### *Bagu'treni Esteban*

<sup>54</sup> Che biejn diajgreni rextidx Esteban, bidxe'chduxhreni, rauya'läjreni sa'csi rdxe'chreni lo Esteban. <sup>55</sup> Rbäjž Sprit Dxan xten Dios neñ lastoo Esteban, ni'čni bahuitzu'tzni xhaguibaa, ro'c bahuiini yälrdimbichasejz xten Dios. Bahuiizani suga' Jesucrist xladbee Dios.

<sup>56</sup> Räjƿ Esteban lojreni:

—Colhuilaa. Narä cahuiä xhaguibaa cadro yu' Dios, ruhuiäza loj Xi'n Dios nani gujc Niguii; ani suga' xladbee Dios.

<sup>57</sup> Guredxaduxhreni basäuzareni diajgreni. Dxejcti baxunreni bixa'treni yejc Esteban.

<sup>58</sup> Dxejc gudobyujrenini, gulääreni Esteban neñ guejdxga. Ro'c bacuaareni gui yejc Esteban. Che cagucuaareni gui yejčni, guläyalreni xhajbreni; te niguii ni laa Saulo biannäj xhajbreni. <sup>59</sup> Lał ni cagucuaareni gui yejčni, gunii Esteban loj Jesucrist räjƿni:

—Guejblu, Dad Jesucrist, cua' narä.

<sup>60</sup> Dxejcti biajb Esteban, bazuxhijbni, guredxa'ni räjƿni:

—Dad Jesucrist, na'c gudzuublu dojlre yejc rebejnre, na'c gucuaquijlreni.

Gulujxsi guniini si'c, gujtni.

## 8

### *Saulo basacsí rexpejn Jesucrist*

<sup>1</sup> Rbaduxh lajz Saulo bagu'treni Esteban.

Lagajc dxejga gosloj gudejd rexpejn Jesucrist trabajwduxh neñ guedx Jerusalén. Dxejcti bire'ch rexpejn Jesucrist. Biunejzreni ro'c sääreni nez guiraa reguedx Judea näjza nez guiraa reguedx Samaria. Xtebtis reapost bia'n Jerusalén, direni nire'ch.

<sup>2</sup> Reniguii nani sanälajz Dios huicua'tz Esteban. Cayonduxhreni sa'csi riareni gujt Esteban. <sup>3</sup> Biäädza Saulo, guixe-guixee basacsíni rebejn nani huililajz xtidx Dios. Biu'ni rolizreni, gunaazni reniguii näjza regunaa te basäunireni neñ latzguibi.

### *Basule' rexpejn Jesucrist xtidx Dios nez región Samaria*

<sup>4</sup> Che bire'ch rebejn nani huililajz xtidx Dios, basule'reni xtidx Dios nez cadrotis sääreni.

<sup>5</sup> Tej rebejnğa laa Felipe. Siini nez te guedx Samaria. Ro'c basule'ni xtidx Dios. Räjjni:

—Jesús najc Crist nani cabäjztu jιάäd.

<sup>6</sup> Ro'c bachagsa' rebejn bacuadiajgreni rextidx Felipe, bahuiizareni redzunro, remilagwr nani bejn Felipe. <sup>7</sup> Gaii bejn yu' bendxab neñ lastooreni. Che gunibee Felipe guirri rebendxab lastoo rebejnğa, guredxa' rebendxabga, dxejcti biriireni neñ lastoo rebejnğa. Yu'za xhidajl bejn nani digacdiru guiniib, yu'za reni rajc ni'reni, naareni. Con xcälrnibee Jesucrist basiajc Felipe guiraa rebejnğa. <sup>8</sup> Sa'csi gujc si'c, bibalazduxh guiraa rebejn neñ guejdxga.

<sup>9</sup> Guyu' te niguii ni laa Simón neñ guejdxga. Bisieedni bejnni xhidajl redzuun yälbidxaa, basgueeni rebenguejdxga. Bidxeloduxh rebenguejdx lojni. Räjjni lo rebejn rutru chu stee bejn ni najc maazru benro lojni. <sup>10</sup> Luxh guiraa rebejn, rebiuux, rebengool, rebenrajp, rebenprob bacuadiajgreni xtidx bidxaaga, räjpreni:

—Laani rajpni yälrnibee xten Dios.

<sup>11</sup> Xchero basgueeni rebejn, bidxelojreni rextzunyaälbidxaani. Guiraa rebejn huililajz xtidxni. <sup>12</sup> Dxejcti baluii Felipe xcuent xcälrnibee Dios, näjza xcuent Jesucrist. Xhidajl rebenguejdxga huililajz rediidx nani gunii Felipe. Dxejcti birobnisreni, niguii näjza gunaa. <sup>13</sup> Nägajcza Simón huililajzga dxejc gurobnisani. Dxejc guyunäj Simón Felipe. Che bahuii Simón lo redzunro, remilagwr nani cayujn Felipe, bidxeloduxh Simón.

<sup>14</sup> Che biejn diajg reapost ni yu' guedx Jerusalén huililajz reben Samaria xtidx Dios, baxhal'reni Pedr näjza Juan ro'c. <sup>15</sup> Che bidzujn guiro'preni guejdxga, gunabreni lo Dios xcuent rebejn ni huililajzga te gudeed Dios Sprit Dxaan xtenni lojni, <sup>16</sup> sa'csi gajd Sprit Dxaan xten Dios jιάädläjz neñ lastooreni. Che huililajzreni, gurobnistisreni te gucbee rebejn chuni'c najc rexpejn Jesucrist. <sup>17</sup> Dxejc batzuub Pedr näjza Juan naareni yejc tejga renani ahuililajz xtidx Dios, dxejc badeed Dios Sprit Dxaan xtenni biädäläjzni neñ lastooreni.

<sup>18</sup> Che bahuii Simón biädäläjz Sprit Dxaan xten Dios lastoo rebejn ni batzuub reapost naani yejcreni, räjz Simón nudeedni meel loj reapost, <sup>19</sup> räjpreni lojni:

—Colguniidx yälrnibee loä te si'cza gudzubä naä yejc rebejn, te jiu' Sprit Dxaan xten Dios neñ lastooreni.

<sup>20</sup> Dxejcti räjpreni Pedr lojni:

—Junitloj xmeellu con luj! Xho gunlu xhigab siilu Sprit Dxaan xten Dios nani rudedxlia' Dios. <sup>21</sup> Digacdi gunlu dzuun ni riennu, sa'csi xhet laadi najc lastoolu nez loj Dios; yu' dojl neñ lastoolu. <sup>22</sup> Basie'ch lajzlu, badzucaj rexhigab guijdx xtenlu. Guredx-gunab lo Dios, top susiäjil lajz Dios xtojllu ni bejnlu neñ lastoolu. <sup>23</sup> Naj narä nanä ruguilazduxhlu, luxh runduxhlu xhigabguijdx.

<sup>24</sup> Dxejcti räjpreni Simón lo guiro'preni:

—Colnab loj Dios xcuentä te na'c sacä si'cni caniitu.

<sup>25</sup> Che gulujxti bijreni diidx xcuent ni bahuijoren bejn Jesucrist, che gulujx basule'reni xtidx Jesucrist loj reben Samaria, gubisacreni Jerusalén.

*Felipe näjza te dade' ni siääd nación Etiopía*

<sup>26</sup> Dxejcti biääd te xangl Dios, räjpreni lo Felipe:

—Huij lo nezyuj ni rii guedx Jerusalén, ni rij nez guedx Gaza. Nezyujga rdejđ lo reyubijđz.

<sup>27</sup> Sä'ti Felipe. Che bidzujn ni lo nezyujga, bidxaagni te dade' ni siääd nación Etiopía. Najcni te eunuco, najczani xcuxhtis reina Candace. Laani rgucheeni guiraa xmeel reinaga. Biääd dade'ga guedx Jerusalén te sagajni Dios. <sup>28</sup> Siädbisacni lajdxni. Sobga'ni neñ te gare't saruduxh, cayolni xtidx Isaías, nani bacuaa xtidx Dios agujc xchero. <sup>29</sup> Dxejcti räjpreni angl xten Dios lo Felipe:

—Gubig cuä' gare'tga, guninäj dade'ga.

<sup>30</sup> Che gubig Felipe cuä' gare'tga, biejn diajgni cayol dade'ga rextidx Isaías. Dxejcti räjpreni Felipe lojni:

—¿La racbeelu ni caj lo guijtz nani cayollu, ä?

<sup>31</sup> Dxejcti räjpreni dade'ga lojni:

—¿Xho gacbeäni palga rut gusule'dini loä?

Sas räjpreni dade'ga lo Felipe chä'pni neñ gare'tga.

<sup>32</sup> Cadro cayol dade'ga neñ guijtz ni caj xtidx Dios rnii scree:

Di xiil cuedxa' che rinä bejnni cadro guetni;

dxitis raa xiil che ruhuajrenini.

Si'c te xiil najc niguiire,

xhet rniidini mase rusacsíduxhrenini.

<sup>33</sup> Basacsíduxhrenini.

Reguxhtis ni niujn yälguxhtisni xhet laliidi bejnreni.



Xhet si'cti nunyäjł gunreni.

¿Xho guiniinu yu' xpejnni?

Ni abagu'trenini. Diruni guibajn lo guedxliuj.

<sup>34</sup> Dxejcti gunabdiidx beñ Etiopía, rájpi lo Felipe:

—Gunilaa loä, chuni'c ruzä't niguui nani bacuaa reguijtzre, ¿la ruzä'tni lagajc laani o la ruzä'tni ste'ca bejn, ä?

<sup>35</sup> Gusloj basule' Felipe rediidx nani abil' dade'ga. Dxejcti basule'ni rediidx xcuent Jesucrist. <sup>36</sup> Lał ni sääreni lo nezyuj, bidzujñreni te lajt cadre yu' nis. Dxejc rájp dade'ga lo Felipe:

—¡Bahuii, ree yu' nis! ¿Xhi rudxojn tiobnisä?

<sup>37</sup> Dxejc rájp Felipe lojni:

—Palga rililajzlu xtidx Dios neñ lastoolu, sajc tiobnislú.

Dxejc rájp dade'ga lo Felipe:

—Rililazä Jesús najc Crist Xi'n Dios.

<sup>38</sup> Dxejc gunibee dade'ga gusudxi gare't, sas biäjt guiro'preni, biu'reni neñ nis, ro'c batiobnis Felipe dade'ga. <sup>39</sup> Che biriireni neñ nis, huinä Sprit Dxañ xten Dios Felipe ste'ca lajt. Dxejc diru dade'ga nuhuii lo Felipe. Sä'ti dade'ga lajdxni, cabalazduxhni. <sup>40</sup> Dxejcti chela gucbee Felipe abidzujñni guedx Azoto. Baluizani xtidx Dios neñ guiraa reguejdx che bidzujñlini guedx Cesarea.

## 9

*Huililajz Saulo rextidx Jesucrist*

(Hch. 22:6-16; 26:12-18)

<sup>1</sup> Lałtis cagusacsí Saulo rexpejn Jesucrist. Rlajzni ju'tni guiraareni, ni'c huijni lo bixhojz nani rnibee, <sup>2</sup> gunabni gac te guijtz chanäni lo reguidoog neñ guedx Damasco te palga guidxälmi reni najc xpejn Jesucrist neñ reguidooga, niguui sigac gunaa, guliibnireni, jiädñänireni guedx Jerusalén te jiäureni. <sup>3</sup> Lał sasajni lo nezyuj, asiäddzungajxhni guedx Damasco, basaniya' te bal xhaguibaa, basanijni guideb gabi cadre siädsaj Saulo. <sup>4</sup> Dxejc białbni lo yuj, biejn diajgni te xse' bejn nani canii lojni:

—Saulo, Saulo, ¿xhicuent rusacsílu narä, nájza rexpeña?

<sup>5</sup> Rájpi Saulo lojni:

—¿Chuluj Dad?

Rájpi lo Saulo:

—Narä nacä Jesucrist, nani cagusacsíduxhlu. Niluxh lagajc luj cadejdlu trabajw si'c rajc te gon ni rucuanii' yejc caru'ch.

<sup>6</sup> Bidxebduxh Saulo, racsejsni rájpi:

—Dad, ¿xhini'c rlajzlu gunä?

Dxejc rájp Jesús lo Saulo:

—Huistie, biu' guedx Damasco. Ro'c suluii te niguui xhini'c gunlu.

<sup>7</sup> Rebejn ni siädñä Saulo sugadxireni, bidxebbreni sa'csi biejn diajgreni te xse' bejn, luxh rut lojdi bahüireni. <sup>8</sup> Che huistie Saulo lo yuj, baxhalni lojni, niluxh di lojni jien. Dxejc gunaazreni ñaani, sanärenini guedx Damasco. <sup>9</sup> Ro'c guyu'ni choñ dxej, natiä'p balojni, dini niä', dizani niajw.

<sup>10</sup> Guedx Damasco rbäjz te xpejn Jesucrist ni laa Ananías. Baluuloj Jesucrist loj Ananías lo te balał, rájp Jesucrist lojni:

—Ananías.

Dxejc rájp Ananías lojni:

—Anaree Dad.

<sup>11</sup> Rájpi Jesucrist lojni:

—Huistie te chäälú lo nezyuj ni laa Ladbee cad rbäjz Judas. Ro'c guiniabdiidxlu con te niguui ni laa Saulo, beñ Tarso. Cabejdx, canabni loä naj. <sup>12</sup> Lo balał abahuini siäd te niguui ni laa Ananías te gutzuubni ñaani yejcti te fiini stehuält.

<sup>13</sup> Dxejcti rájp Ananías lojni:

—Dad, abiejñ diagä xho basacsí niguuiga rexpejnlu neñ guedx Jerusalén. <sup>14</sup> Luxh rebixhojz ni rnibee abadeed guijtz lojni te guiniaazni ree guiraa rebejn nani rbedx-rniab lojlu, chanänireni jiäureni.

<sup>15</sup> Dxejcti rájp Jesucrist lojni:

—Huij, narä aguleäni te gunni xtzunä. Suluiini xtidxä loj rebenzajt nani digac xpen Israel, nájza loj reni rnibee renacion, nájza loj rexpejn Israel. <sup>16</sup> Narä suluiä lo Saulo trabajwduxh ni tedni te jiädñajni narä.

<sup>17</sup> Dxejcti sää Ananías, bidzujñni ro yu' cadre rbázlaa Saulo. Batzuubni ñani yejc Saulo. Dxejcti rájp Ananías loj Saulo:

—Betzá Saulo, Jesucrist ni rníbee, nani baluiloj lojlu lo nezyuj cheni siäädlu, lagajc laani baxhalñi narä te fiilu stehuält, te jiädläjzsa Sprit Dxaan xten Dios neñ lastoolu.

<sup>18</sup> Lagajc dxejc bitejb si'c xmelbäjł yec baloj Saulo, biacgajc balojni, bahuisa'cni stehuält. Dxejc huistieni, gurobnisgajcni. <sup>19</sup> Dxejc gudajwñi, guc nadaanni stehuält. Xchej guyunäj Saulo rexpejn Jesucrist neñ guedx Damasco.

*Gusloj basule' Saulo xtidx Dios neñ guedx Damasco*

<sup>20</sup> Dxejcti gusloj basule' Saulo xtidx Dios neñ reguidoo xten rexpejn Israel, rájñni:

—Jesucrist najc Xi'n Dios nani gujc Niguii.

<sup>21</sup> Che biejn diajgreni xtiidxni, bidxelojreni, rájp lo sa'reni:

—Ła xhet laadi niguiire ni rusäu rexpejn Jesucrist neñ latzguuib guedx Jerusalén, ä? Lagajcza dee bidzujñ ree te guliibni rexpejn Jesucrist te chanänireni guedx Jerusalén lo rebixhojz.

<sup>22</sup> Dxejcti gusutzu'tz Saulo guniini xtidx Dios. Basacajñni rexpejn Israel nani rbäjz Damasco sa'csi basule'pacni Jesús najc Crist nani rníbee.

*Baxuñ Saulo guedx Damasco*

<sup>23</sup> Che gudejd xhidajł dxej, bachagsa' rexpejn Israel te nugu'treni Saulo. <sup>24</sup> Dxejcti gucbee Saulo xhi xhigab bejnreni. Dxej, yääl cabäjzreni Saulo ro' guiraa renezyuj ni rdzujñ guejdxga te ju'treni. <sup>25</sup> Dxejcti che gojł te yääl basäl rexpejn Jesucrist Saulo neñ te dximro, basiäjtreni dxijmga nez ro' te padeer ni dejd gabi guejdxga. Basiäjtrenini nez dejt padeerga, te si'c baxuñni guejdxga.

*Bidzujñ Saulo guedx Jerusalén*

<sup>26</sup> Che bidzujñ Saulo guedx Jerusalén, rłajzni nuchaagni loj reni rililajz xtidx Jesucrist, niluxh guiraa reni bidxejbrenini sa'csi direni gan ahuililajzni xtidx Dios. <sup>27</sup> Dxejcti huinä Bernabeni lo reapost, bijni diidx xcuent Saulo. Rájř Bernabé lojreni:

—Baluiloj Jesucrist lo Saulo loj nezyuj. Guninäj Xtioznu Saulo loj nezyuj, ni'cni gusutzu'tz Saulo basule'ni xtidx Jesucrist guedx Damasco.

<sup>28</sup> Dxejc bia'n Saulo guedx Jerusalén, bidxaagni lo rexpejn Jesucrist. <sup>29</sup> Dxejcti gusutzu'tz Saulo gusloj bijni xtidx Jesucrist lo rebejn. Dxejcti gudilñäj Saulo rexpejn Israel nani rñii didx griegw. Laareni rdxecheduxhreni, rłajzreni nugu'treni Saulo sa'csi direni nichagłajz xtidx Jesucrist. <sup>30</sup> Che gucbee rexpejn Jesucrist si'c, huinäreni Saulo guedx Cesarea, ro'c gulääreni Saulo, baxhalñreni guedx Tarso.

<sup>31</sup> Dxejc guredxi lajz guiraa renani huililajz xtidx Dios neñ reguedx Judea, neñ reguedx Galilee, nájza neñ reguedx Samaria, sa'csi diru Saulo nusacsí rexpejn Jesucrist, luxh guc xhidajłrreni. Basoobreni xtidx Jesucrist, bisieedrurenı rextiidxni, gucnájza Sprit Dxaan xten Diosreni.

*Biajc Eneas*

<sup>32</sup> Che gusloj sahuui Pedr guiraa renani huililajz xtidx Dios, huihuizani rexpejn Jesucrist nani yu' guedx Lida. <sup>33</sup> Ro'c bidxälñi te niguii ni laa Eneas. Agujc xhujn ijz naga' niguiiga cayacxhuuni. Abixu'ñ tiejxhni, digacdiru guiliini.

<sup>34</sup> Dxejcti rájp Pedr lo Eneas:

—Eneas, cagusiajc Jesucrist guejblu. Huistie, guläs xta'lu.

Lagajc dxejc biajçni, huistietini.

<sup>35</sup> Guiraa rebejn ni rbäjz guedx Lida, nájza rebenı ni rbäjz guedx Sarón, bahuiireni abiajc niguii ni cayacxhuu. Dxejc xhidajłreni neñ reguejdxga huililajz xtidx Dios.

*Gubansac Dorcas*

<sup>36</sup> Neñ guedx Jope yu' te gunaa ni laa Tabita; rñiizarenini Dorcas con xtidx griegw. Gunaaga huililajz xtidx Dios, rudeedzani xhi rquiin rebenıproob, najczani huenduxh loj chutis bejn. <sup>37</sup> Gucxhuu gunaaga, dxejc gujtni. Che gulujx bahuajz rebejn togoolga, huitixhrenini neñ te yu' ni najc jiaa yejc sa'ni. <sup>38</sup> Sa'csi gajxh guedx Jope tre' guedx Lida, luxh biejn diajg rexpejn Jesucrist ro'c yu' Pedr, baxhalñreni tiop dade' saxii Pedr. Rájř redade'ga loj Pedr:

—Bejn huen salu chonnu Jope nanajga.

<sup>39</sup> Dxejc sanägajc Pedr redade'ga. Che bidzujñreni, huinäreni Pedr neñ yu' cadre naga' togunaaga. Ro'c cayonduxh guiraa regunabiuud, baluiireni lo Pedr guiraa rexhajbreni nani benchee Dorcas, ni badeed Dorcas lojreni che nabajñni. <sup>40</sup> Dxejcti gunibee Pedr birii guirarenı neñ yu'. Dxejc bazuxhijbni, guredx-gunabni loj Dios. Dxejc gubiréni bahuiini loj togoolga, rájřni:

—Tabita, huistie.

Dxejcti baxhal gunaaga balojni; che bahuiini loj Pedr, gurejni. <sup>41</sup> Dxejc gunaaz Pedr naani, basuliinini, dxejcti gurejdx Pedr regunabiuud nájza sgaii reni najc rexpejn Jesucrist. Baluiini gunaaga lojreni te bahuilojreni agubansacni. <sup>42</sup> Gucbegajc reben guedx Jope xhini'c gujc, dxejcti xhidajl rebejnğa huillilajz xtidx Jesucrist. <sup>43</sup> Xchejza guyu' Pedr ro'c, gulájzni rolizj dade' ni laa Simón, nani ruscoodz guijd.

## 10

### *Pedr con Cornel*

<sup>1</sup> Guedx Cesarea guyu' te niguii ni laa Cornel. Rnibeeni te gayuu resoldaad lo te cuaa ni laa Italiano. Cornel najc benzijt, dini gac ben Israel. <sup>2</sup> Bensacduxh najc Cornel, nájza guiraa resa'ni, sacruduxh rusoobreni xtidx Dios. Rudeedni gojn lo reben proob xten Israel. Guixeguixee rbejdx, rniabni lo Dios. <sup>3</sup> Te dxej, si'cti rchachon gudxej, si'c lo bacal bahuiini loj xangl Dios, rájpnı loj Cornel:

—¿Conlu Cornel?

<sup>4</sup> Che bahuii Cornel xangl Dios, bidxejbni, bidxelojni, rájpnı lojni:

—¿Xhini'c, Dad?

Dxejcti rájpnı angl xten Dios lojni:

—Che rniilu lo Dios, riejn diajg Dios xtiidxlu, che rudeedlu meel lo reben proob, ruhuii Dios ni rujnlu, ni'cni rnalajz Dios luj. <sup>5</sup> Naj baxhal tiop niguii cháa guedx Jope te chaxiireni Simón Pedr. <sup>6</sup> Rbájzni rolizj te dade' ni laa Simón nani ruscoodz guijd. Rolizj Simón sojb gajxh ro' nisdoo. Simón Pedr gusule' xhini'c nanab gunlu.

<sup>7</sup> Che sii angl xten Dios, gule Cornel tiop mos xtenni nájza te xsoldaadni nani sanälajz Dios.

<sup>8</sup> Dxejc bij Cornel diidx lojreni xcuent ni gusajcni, dxejc baxhalni redade'ga guedx Jope.

<sup>9</sup> Che bara yääl, sääreni lo nezyuj. Asiäddzungajxhreni guedx Jope, pet si'cti läidxejni. Lagajc orga huä'p Pedr yecyu' te guininájni Guejb Dios. <sup>10</sup> Calanduxh Pedr, rlajzni gauni. Lał ni cayujnreni xhi gauxhuejni, gusloj canixcalni. <sup>11</sup> Bahuiini bixal xhaguibaa, bahuizani biäjt te bariadro nani naliib guidap xi'ni. Siädjiätchäiini gajxh nez loj Pedr. <sup>12</sup> Nen bariaadga yu' guiraa reman ni yu' lo guedxliuj nani rsianáj guidap ni'ni, nájza renani rxeeb si'c bäl, nájza renani rutajt. <sup>13</sup> Gunii Dios lo Pedr, rájpnı lojni:

—Pedr, huisu te ju'tlu man gaulu.

<sup>14</sup> Dxejc rájpnı Pedr lojni:

—Na'c Dad. Nunc gauä sa' remandxuudxga, abia'a dina gauä reman nani rnii xleilu najc mandxuudx.

<sup>15</sup> Gunisac Dios loj Pedr, rájpnı:

—Na'cru guiniilu nacdXuudx reman nani abasia.

<sup>16</sup> Che xhic chon huält gujc si'c, huä'psac bariaadga xhaguibaa. <sup>17</sup> Lał ni cayujn Pedr xhigab xhichani'c säloj nani bahuiini, bidzujn reniguii ni baxhal Cornel ro' yu'ga, sa'csi agunabdiidxreni caro rbájz Simón nani ruscoodz guijd.

<sup>18</sup> Che bidzujnreni rolä'ga canabdiidxreni la ro'c rbájz te dade' ni laa Simón Pedr. <sup>19</sup> Lał ni cayujn Pedr xhigab xcuent ni bahuiini, gunii Sprit Dxan xten Dios lojni, rájpnı:

—Bahuii, chon dade' caguillu. <sup>20</sup> Biäjt yejc yu're te jinälurenı. Na'c gunlu xhi stee xhigab, sa'csi lagajc narä baxhalärenı lojlu.

<sup>21</sup> Dxejcti biäjt Pedr jiaaga, bidzujnıni cadro suga' redade'ga, rájpnı lojreni:

—Narä nacä ni caguillu. ¿Xhi siäädıtu?

<sup>22</sup> Rájpnı reniguiiga lo Pedr:

—Cornel, nani rnibee te gayuu soldaad, te bensac'c, te bejn ni rajn Dios, te bejn ni sanälajz rexpejn Israel, laani baxhal nuure lojlu, sa'csi rájpnı angl xten Dios lojni, jiopxiinu luj te jiejn diajgnu xtiidxlu.

<sup>23</sup> Dxejcti gurejdx Pedr rebejnğa, biu'reni nen yu'. Ro'c bia'nreni te guxhijn. Che bara yääl, Pedr nájza sgaii ben Jope ni najc xpejn Jesucrist, sanä redade' ni baxhal Cornel.

<sup>24</sup> Che bara yääl, bidzujnreni guedx Cesarea. Abatojp Cornel resa'ni nájza rexamigwnı rolizjni. Cabájzreni guidzujn Pedr. <sup>25</sup> Che bidzujn Pedr ro yu', huichagloj Cornelni, bazuxhijnıni lo Pedr. <sup>26</sup> Dxejc gunaaz Pedr naani, gulásnini, rájpnı lojni:

—Huisulii, sa'csi narä nacä te niguiitis sigajc najclu.

<sup>27</sup> Cayuiireni diidx, biu'reni nen yu'. Che biu'ni bahuii Pedr nadxagsa' rebejn nen yu'.

<sup>28</sup> Rájpnı Pedr lojreni:

—Anajntu xhi caj lo leii xten rexpejn Israel: digacdi guchaag te xpejn Israel loj benzijt nani digac xpejn Israel, digacdiza jiu'ni rolizjreni. Niluxh agunii Dios loä lo te bacal, te gacbeä digacdiru jiuä releiire. Abaluii Dios narä sajç guchagsa'ä chutis bejn. <sup>29</sup> Ni'cni, che gurejdxıtu narä biälğacä. Naj rniabdiidxä, ¿xhicuent gurejdxıtu narä?

<sup>30</sup> Dxejcti rájpnı Cornel loj Pedr:

—Gudajp dxej si'cti rcachon gudxej, cabedx-canabä lo Dios rolizä chela baluiloj te niguii najcw te ladmol ni rdimbicha'. <sup>31</sup> Najni loä: “Cornel, che rbedx-rniablu lo Dios, reijn diajg Dios xtiidxlu, che rudeedlu meel lo reben proob, racbee Dios, di lajzni jääl luj. <sup>32</sup> Ni'cni naj baxhał tiop dade' chää guedx Jope te chaxiireni Simón Pedr nani rbázlaa rolizj Simón ni ruscoodz guijd. Rolizjni sojb gajxh ro' nisdoö. Che guidzujñni, laani gusule'ni xtidx Dios lojtu.” <sup>33</sup> Dxejc baxhałä chu biädxilu. Xquixtiostelu biädulu. Naj anadxagsa'nu ree nez loj Dios te jiejn diajgnu rextidx Dios ni baniidxni lojlu guiniilu loonu.

*Basule' Pedr xtidx Dios rolizj Cornel*

<sup>34</sup> Dxejcti räjp Pedr lojreni:

—Naj gucheliä tblej rinälajz Dios guiraa bejn; rebenzijt sigajc rexpejn Israel. <sup>35</sup> Niluxh rinälajz Dios chutis bejn guedxliuj nani ruzuxhijb lojni, nani rusoob rextiidxni, nani laaca nabajn. <sup>36</sup> Badeed Dios xtiidxni loj rexpejn Israel, basule' Dios biädä Jesucrist te gac chanälaaznu Dios te cuedxilajznu, sa'csi Jesucrist rnibee guideb guedxliuj. <sup>37</sup> Che gulujx baluii Juan ni rutiobnis xcuent yälrobnis, dxejc gusloj basule' Jesucrist xtidx Dios nez reguedx Galilee. La'tu najntu xho bire'ch xtidx Jesucrist guideb nez nen reguedx Judea. <sup>38</sup> Nancheetu xho badeed Dios yälrnibee loj Jesucrist, bejn Nazare't. Badeedza Dios Sprit Dhan xtenni te cuääzni nejn lastooni. Nancheetu xho bejnni redzunro, remilagwr, basiajçni rebejn nani caguteed bendxab trabajwduxh. Redzunroga bejnni sa'csi bennäj Diosni dzuun. <sup>39</sup> Bahuiloonu guiraa redzuun ni bejn Jesucrist nen reguedx Israel näjza guedx Jerusalén. Bacuaa rexpejn Israel Jesucrist lo crujz, ro'c gujtni. <sup>40</sup> Dxejcti che biojn dxej, guläs Dios Jesucrist lo rebençut, gubansacni, badeed Dios yälrnibee lojni te gujc biädlluiloj Jesucrist loonu. <sup>41</sup> Di Jesucrist nuluiloj loj chutis bejn. Lojtis renani agule Dios gutie'ch diidx gubansac Jesucrist lo rebençut, loj reni'c baluilojni. Nuure nadxagnu loj reni gule Dios. Bidaunänuni, bidunnäänuni che gubansacni lo rebençut. <sup>42</sup> Baxhałni nuure chatie'chnu diidx loj guiraa rebejn, chosule'pacnu Dios gule Jesucrist te gacni juejz xte rebenbajn näjza xte rebençut. <sup>43</sup> Galooli bacuaa renani gunii xtidx Dios lo guijt, räjpreni: “Guiraa rebejn ni chalilajz xtidx Jesucrist sudzucaj Dios xtojreni.”

*Biädälajz Sprit Dhan xten Dios nen lastoo rebenzijt*

<sup>44</sup> Lał ni canii Pedr rediidxga, biädälajz Sprit Dhan xten Dios nen lastoo renani huililajz xtiidxni. <sup>45</sup> Bidxeloj guiraa rexpejn Israel nani huinä Pedr sa'csi biädälajz Sprit Dhan xten Dios nen lastoo renani najc benzijt. <sup>46</sup> Gucbeereni biu' Sprit Dhan xten Dios lastoo rebenzijt sa'csi bejn Sprit Dhan guniireni stee didxsaj nani gajdreni guisieed, calä'pzareni xpala'n Dios. <sup>47</sup> Dxejcti räjp Pedr lo rexamiigwni:

—Chu laa ni gudxojn yälrobnis lo rebejnre, ni sigajc biädälajz Sprit Dhan xten Dios nen lastoonu, abiädälajzni nen lastoo rebejnre.

<sup>48</sup> Dxejcti gunibee Pedr gurobnisreni te gacbee bejn najcreni xpejn Jesucrist. Dxejcti gunabreni loj Pedr jia'nni ro'c tiop-çhon dxej.

## 11

*Basule' Pedr xho biädälajz Sprit Dhan xten Dios lastoo rebenzijt lo rexpejn Jesucrist nen guedx Jerusalén*

<sup>1</sup> Reapost, näjza renani huililajz xtidx Jesucrist nen reguedx Judea, biejn diajgreni huililajz rebenzijt ni digac xpejn Israel xtidx Dios. <sup>2</sup> Che bidzujñ Pedr guedx Jerusalén, rexpejn Israel nani rlaiz chu guiraa rexpejn Jesucrist bee si'cni bejn toAbram, gudilnäjreni Pedr. <sup>3</sup> Räjpreni lo Pedr:

—¿Xhicuent biu'lu rolizj benzijt nani xhet yu'di bee si'c nuure? ¿Xhicuent gudaunäljuren, ä?

<sup>4</sup> Dxejcti basule' Pedr diidx xho gujc huigni loj rebenzijt:

<sup>5</sup>—Yu'ä guedx Jope. Cabedx-canabä lo Dios, dxejc si'c gunixcalä, bahuiä bixal xhaguibaa, siädjiäjt te bariadro, naliib guidap xi'ni. Siädjiätçhäiini nez loä. <sup>6</sup> Che bahuisa'cä, nenga yu' guiraloj reman ni yu' lo guedxliuj nani rsianäj guidap ni'ni, renani rbäjz nejn dajn, renani rxeeb si'c bäl, näjza renani rutaj. <sup>7</sup> Dxejcti biejn diajg naj Dios loä: “Pedr, huisu. Bagu't man gaulu.” <sup>8</sup> Dxejcti räpä: “Digacinni Dad. Niçla te j gadna gaulä te man nani rni leii xtenlu najc mandxuudx.” <sup>9</sup> Dxejc gunisac Dios loä: “Na'cru guiniilu nacdxuudx recos nani abasia Dios.” <sup>10</sup> Che gujc çhon huält gunii Dios si'c, huä'psac bariaadga xhaguibaa. <sup>11</sup> Lagajc orga bidzujñ çhon dade' ro yu' çadro yu'ä. Guedx Cesarea biriireni, biädxiiireni narä. <sup>12</sup> Dxejc gunii Sprit Dhan xten Dios loä: “Huinä reniguiire. Na'c çon tiop lajzlu.” Dxejcti huinää xho'p bejn Jope, dade' nani rililajz xtidx Jesucrist. Che bidzunnu guedx Cesarea, biu'nu rolizj Cornel. <sup>13</sup> Basule' Cornel diidx loonu xho baluiloj te angl xten Dios lojni lagajc rolizjni. Räjp angl xten Dios lojni: “Baxhał tiop dade' chää guedx Jope te chaxiireni Simón ni rniireni Pedr. <sup>14</sup> Laani siniini xtidx Jesucrist te gacbeelu con resa'lu xhini'c nanab gunlu te gusläa

Dios la'tu lo rextojltu.”<sup>15</sup> Che gusloj cagusule'ä xtidx Dios lojreni, biu' Sprit Dhan xten Dios neñ lastooreni si'c biu'ni lastoonu galooli.<sup>16</sup> Dxejcti banaj lazä rextidx Dad Jesucrist che najni: “Juan abatiobnis con nistis, biädla narä suxhalä Sprit Dhan xten Dios te cuääzni nen lastootu.”

<sup>17</sup> Dxejc räjpza Pedr:

—Palga badeed Dios Sprit Dhan xtenni lojreni si'c baniidxni Sprit Dhan xtenni loonu che huililajznu xtidx Jesucrist, ¿chu narä? te niäpä lo Dios: “Na'c gudeedlu Sprit Dhan xtenlu lojreni.”

<sup>18</sup> Che biejn diaj rebeñ Jerusalén rediidxga, biäuu ro'reni, dirureni nidiñäj Pedr. Alga gulä'preni xpala'n Dios, räjpreni:

—Näza rebenzajt nani digac rexpejn Israel abasaan Dios gusiechlazreni te guibannäjreni Dios par tejpas.

*Rexpejn Jesucrist ni yu' guedx Antioquía*

<sup>19</sup> Che gujt Esteban bire'ch renani huililajz rextidx Jesucrist. Bire'chreni lo yuj Chipre ni re' lo nisdoo, lo reguedx Fenicia, näjza lo guedx Antioquía sa'csi cadejdreni trabajwduxh. Basule'reni rextidx Jesucrist lojtis rexpejn Israel.<sup>20</sup> Lojreni nadxaag gaii beñ Chipre, näjza gaii beñ Cirene. Redee bidzujñ guedx Antioquía. Ro'c gusloj caniireni lo beñzajt nani rnii didx griegw. Basule'reni lo rebenzajtga guiraa xcuent Jesucrist.<sup>21</sup> Gucnäj Diosreni caniireni xtiidxni. Xhidajl rebejnga huililajz xtidx Jesucrist, basoobreni xtiidxni.

<sup>22</sup> Che biejn diaj rexpejn Jesucrist ni yu' guedx Jerusalén rililajzreni, baxhalreni Bernabé guedx Antioquía.<sup>23</sup> Che bidzujñ Bernabé guedx Antioquía, bibalazduxhni che bahuiini xho cayunnäj Dios rebejnga. Dxejcti balijdx Bernabéreni; gutijp lajzreni gusoobreni xtiidxtis Jesucrist.<sup>24</sup> Beñsa'c najc Bernabé. Rililazduxhni xtidx Jesucrist. Racnäjdugh Sprit Dhan xten Diosni. Xhidajl rebejn huililajz xtidx Jesucrist guedjdxga.

<sup>25</sup> Che birii Bernabé guejdxga, huijni guedx Tarso satiilni Saulo.<sup>26</sup> Che bidxälni Saulo, huinänini guedx Antioquía. Ro'c bia'nreni tebijz, bachagsa'reni renani huililajz te baluiireni xtidx Jesucrist lo xhidaldugh bejn. Ganid benguejdxga gulälaj “Cristianos” renani rililajz xtidx Jesucrist.

<sup>27</sup> Neñ redxejga birii gaii dade' nani rnii xtidx Dios. Guedx Jerusalén biriireni, bidzujñreni guedx Antioquía.<sup>28</sup> Huisullii te dade'ga ni laa Agabo. Gucnäj Sprit Dhan xten Diosni te guniini siääd te gubijn guideb guedxliuj. Luxh gujc gubijnga neñ rejiz ni gunibee reii Claudio ni sajru.<sup>29</sup> Dxejcti rexpejn Jesucrist ni rbäjz guedx Antioquía bejn xhigab cade tejreni gudeed meel chää lo rexpejn Jesucrist ni rbäjz neñ reguedx Judea.<sup>30</sup> Batojpreni meel, baxhalrenini lo rebeñgool ni rnibee rexpejn Jesucrist ro'c. Saulo näjza Bernabé huinä meelga che huijreni Judea.

## 12

*Gujt Jacob, biäu Pedr nen latzguuib*

<sup>1</sup> Neñ redxejga, trabajwduxh bateed reii Herodes gaii rexpejn Jesucrist.<sup>2</sup> Gunibeeni gujt Jacob betz Juan, biru' guejnii.<sup>3</sup> Che bahuii Herodes bibalazduxh rexpejn Israel sa'csi bagu'tni Jacob, gunibeeni gunazgajcreni Pedr. Dee gujc neñ redxe lanij che rajwreni yätxtiil ni di saguij.<sup>4</sup> Che gunaazreni Pedr, biäuni neñ latzguuib. Gunibee Herodes biääd tajp cuaa soldaad cuanäjreni ro' latzguuib. Tapgaj soldaad cuanäj ro' latzguuibga cade xho'p or. Bejn Herodes xhigab cuääni Pedr te guetni nez loj rexpejn Israel che ted lanij.<sup>5</sup> Yu'ti Pedr neñ latzguuib, dxejcti durtis cabejdx, canab rexpejn Jesucrist lo Dios xcuent Pedr.

*Gulää Dios Pedr nen latzguuib*

<sup>6</sup> Bidzujnti dxe bispr dxej ni rlaiz Herodes nibää Pedr nez loj rexpejn Israel. Yäälga nagayejs Pedr galäii tiop soldaad. Caden naliib guiro'p naa Pedr. Stiop soldaad canäj ro' latzguuib.<sup>7</sup> Chela baluiloj te angl xten Dios, bianij te bajl nani basanij neñ latzguuib. Dxejcti gunaazni xhajcw Pedr, basniibnini te gubajñni. Räjpni lo Pedr:

—Basquejnga, huistie.

Dxejcti bixec recaden, bitejbreni naa Pedr.<sup>8</sup> Räjp xangl Dios lo Pedr:

—Gojt xhajblu, baläj xcura'chlu.

Si'c bejn Pedr, dxejc räjp xangl Dios lo Pedr:

—Gojt xhablajzlu, gudanajl narä —räjpni.

<sup>9</sup> Biriitini latzguuib sanajlni angl xten Dios. Niluxh dini gun xhigab guliipac nani bejn xangl Dios. Bejnii xhigab pet canixca'ni.<sup>10</sup> Gudejdreni nez loj te soldaad, gudedgajcreni nezloj steeni, dxejc bidzujñreni ro' puertguuib xten latzguuib nani caj lo nezyuj ni rdejñ galäii guejdxga. Xtebca bixal puertroga, biriireni gusajreni tebezyuj. Dxejcti te squiin gunitloj xangl Dios. Xtebtis Pedr sasaj lo nezyuj.<sup>11</sup> Dxejc si'cni gubajñ Pedr, bejnii xhigab:

—Naj sii nanä baxhal Dios te xanglni baslaa narä ladznaa Herodes te digacdi gun rexpejn Israe! nani r!ajzreni gunnäreni narä.

<sup>12</sup> Che gucbee Pedr xhi gusajcni, huijni rolizj Marii, xnan Juan ni rniireni Marcw. Ro'c nadxagsa' xhidajl rexpejn Jesucrist, cabedx-canabreni lo Dios xcuent Pedr. <sup>13</sup> Cagusejz Pedr rolä', dxejc gubig te dxa'p ni laa Rode, bacuadiajgni ro lä'. <sup>14</sup> Che biembe Rode xse' Pedr, sa'csi bibalazduxhni, biallajzni nuxhalni ro lä'. Alga baxuñni biusacni neñ yu', räjpni lojreni:

—Pedr suga' ro lä'.

<sup>15</sup> Dxejcti räjpreni lo Rode:

—Yejclu cayajc.

Dxejcti duurtis gunii dxape'ga suga' Pedr ro lä'. Dxejcti räjpreni loj Rode:

—Xho gacni Pedr. Pet biejn diajglu gunii xangl Dios ni rcanäj Pedr.

<sup>16</sup> Dxejcti lañtis cagusejz Pedr ro lä'. Che baxhalreni ro lä' bidxeloduxhreni bahuiireni lo Pedr. <sup>17</sup> Dxejcti bazääb Pedr naani te na'cru jieyreni. Dxejc bij Pedr diidx xho baxhal Dios ro' latzguiib. Dxejc räjpni:

—Co!chaye'tz lo Jacoob näjza lo rexpejn Jesucrist guiraa ni gusacä nayääl.

Dxejcti birii Pedr ro'c, huijni ste'ca lajt.

<sup>18</sup> Che bara yääl, rsildooru, bieiduxh resoldaad sa'csi direni gan xho gujc birii Pedr neñ latzguiib. <sup>19</sup> Gunibee Herodes huitilreni Pedr, gunabdiidxzani lo resoldaad xho gujc birii Pedr. dxejc gunibeeni gujt resoldaad ni cuanäj latzguiib che birii Pedr. Dxejcti birii Herodes reguedx Judea, xchej huijia'nni guedx Cesarea.

### *Gujt Herodes*

<sup>20</sup> Bachechduxh reben Tiro näjza reben Sidón Herodes, ni'cni diruni gusaan guto' rebejn nez cadro rnibeeni xhi gau reben Tiro näjza reben Sidón. Ni'c biääd xhidajlreni te guiniabreni jääl lajzni, te na'cru guidxe'ch Herodes lojreni. Benxgaareni xamiigwreni Blasto, mos ni yu' lo reii Herodes, mos ni sajcro lo guiraa rexmos Herodes. Guninäj Blasto Herodes xcuentreni te na'cru guidxechnäj Herodes rebejnä. <sup>21</sup> Basoobtini te dxej te guininäjnreni. Dxejga gojt Herodes xhajib reini, gurejni lo xyacxhil reini. Dxejcti gusloj caniini didxa'c loj rebejnä. <sup>22</sup> Guredxa' rebejn räjpreni lojni:

—Huenduxh najc diidxre. Guejblu najc te dios, xhet xtiidxdi niguii najc diidxre.

<sup>23</sup> Lagajc dxejc biääd te angl xten Dios, bejni gusloj cayacxhuu Herodes, gudajw rebisiujg Herodes, gujtnei sa'csi basaanni gunii rebejn najcni te dios, sa'csi dini niliä'p xpala'n Dios.

<sup>24</sup> Xhidajl bejn biejn diajgni xtidx Dios, huililajzreni xtidx Dios.

<sup>25</sup> Che gulujx badeed Bernabé näjza Saulo meel ni batojp reben Antioquia lo rebengool, biriireni guedx Jerusalén. Sanäreni Juan ni rniireni Marcw lo guedx Antioquia.

## 13

### *Gule Sprit Dxan xten Dios Bernabé näjza Saulo*

<sup>1</sup> Lo rexpejn Jesucrist ni rdxaag sa' guedx Antioquia guyu' gaii niguii ni gunii xtidx Dios, näjza gaii niguii ni rusule' xtidx Dios loj guiraa rexpejn Jesucrist. Loj redee nadxaag Bernabé, näj Simón ni rniireni Negr; näj Lucio, beñ Cirene; näj Manaén ni gulanäj reii Herodes gujcn si'c bejzni; näjza Saulo. <sup>2</sup> Bidzujñ te dxej cagucua'nreni la! ni cabedx-canabreni lo Dios, dxejc räjp Sprit Dxan xten Dios lojreni:

—Co!cue Bernabé näjza Saulo te gunreni dzuun ni r!azä gunreni.

<sup>3</sup> Che gulujx bacua'nreni, che gulujzxa guredx-gunabreni lo Dios, batzuubreni naareni yejc guiro'preni, te si'c baxhalreni Bernabé näjza Saulo te guluiireni xtidx Dios ste'ca lajt.

### *Guuro'preni baluii xtidx Dios lo reben Chipre*

<sup>4</sup> Baxhal Sprit Dxan xten Dios Saulo näjza Bernabé guedx Seleucia. Ro'c biu'reni nen barcw, sääreni nez yuj ni tre' galäi nisdoo, ni laa Chipre. <sup>5</sup> Che bidzujñreni Chipre, biu'reni guedx Salamina. Ro'c basule'reni xtidx Dios neñ guiraa rexquidoo rexpejn Israel. Näj Marcw gucnäjreni. <sup>6</sup> Che cuansajreni guideb yuj Chipre, bidzujñreni guedx Pafos. Ro'c bidxaagreni te niguii ni laa Barjesús. Najcni te bidxaa, najczani te xpejn Israel. Cagusgueeni rebejn guejdxga, räjpni xtidx Dios caniini, niluxh dini gac xtidx Dios. <sup>7</sup> Bidxaare nu'ch lo rexpejn Sergio Paulo, nani najc gubernadoor xten Chipre. Nasinduxh Sergio Paulo. Gurejdxni Bernabé näjza Saulo, sa'csi r!ajzni jiejn diajgni xtidx Dios. <sup>8</sup> Dxejcti Barjesús, ni laaza Elimas, bidxagdijlñ guuro'preni sa'csi di r!ajzni chalilajz Sergio Paulo xtidx Dios. <sup>9</sup> Saulo, nani laaza Pabl, bahuitzu'tz loj Barjesús. Batijp Sprit Dxan xten Dios lastoo Pabl, räjpni loj Barjesús:

<sup>10</sup> —Rusgueduxhlu rebejn, najclu beñlatsiaj, beñguidxduxhlu, najclu xi'n Satanás, beñdxab ni rnibee. Rdxechnäjzalu guiraa recossa'c xten Dios. ¿Guc cuääz guxhiidlu xtidxlii Jesucrist

te di challilajz bejn xtidx Jesucrist? <sup>11</sup> Naj siääd xcastiugw Dios yejclu. Xhidajl dxej sicäjy lojlu, xhetliidi filu —räjp Pabl.

Gujcsi räjpni si'c, bicägajc lojni. Dxejtiru cuansajni caguuilni chu guiniaaz naani guluiini canejz chääni. <sup>12</sup> Che bahuii Sergio Paulo xhi gusajcni, huililajzni xtidx Dios, sa'csi bidxeloduxhni xcuent xcäl'rlului Dios.

*Bidzujn Pabl näjza Bernabé guedx Antioquia xten distrit Pisidia*

<sup>13</sup> Che baluux Pabl näjza resa'ni xtzunreni guedx Pafos, biu'reni neñ barcw, gudejdreni lo nisdoo, sääreni guedx Perge neñ estad Panfilia. Che bidzujnreni guejdxga, gubisac Juan, ni rniireni Marcw, Jerusalén. <sup>14</sup> Dxejcti birinäj Pabl resa'ni guedx Perge, sääreni guedx Antioquia neñ distrit Pisidia. Dxejcti te dxe sabd, dxejcti ni rusilajz rexpejn Israel, biu'reni neñ xquidoo rexpejn Israel, ro'c gurejreni. <sup>15</sup> Che gulujx bil' te dade' reguijtz xten Dios ni laa lei'i näjza reprofe't, baxhal' reguxhtis xten guidoo chu huigajjreni, räjpreni lo Pabl näjza Bernabé:

—La'tu sa'nu, palga rajptu te diidx ni gulijdx rebejnre, colguiniini.

<sup>16</sup> Dxejcti huijulii Pabl, guläsni naani bejnne seen lo rebejn te cuadijgreni xtiidxni. Räjp Pabl lojreni:

—Col'cuadijg, la'tu rexpejn Israel, guiraatu ni rajn Dios. <sup>17</sup> Galooli gule Xtios rexpejn Israel retoxtadgoldoonu. Luxh che guläjzreni naciön Egipto, bidalduxh retoxtadgoldoonu. Gucnäjdwxh Diosreni bejnne remilagwr, te guläänireni guedx Egipto. <sup>18</sup> Tiuu ijj guläjzreni lo reyubijdz. Xhidajl huält direni nusoox xtidx Dios, niluxh empac gucnäjza Diosreni. <sup>19</sup> Guyu' gajtz naciön guläjz neñ reyuj ni laa Canaán. Dios bejn gunitloj reguejdxre, te gudisni reyujga loj retoxtadgoldoonu. <sup>20</sup> Dxejcti badeed Dios reniguii ni gujc juejz, gunibeereni rebejn. Tajp gayugarol ijj gunibeereni rexpejn Israel. Samuel nani gunii xtidx Dios gujc lult juejz. <sup>21</sup> Dxejcti gunab rexpejn Israel te reii lo Dios te gunibee reiiga lojreni. Badeedti Dios Saül xi'n Cis, sa' toBenjamín. Gunibeeni tiuu ijj. <sup>22</sup> Che badzucaj Dios Saül, badeedni gunibee toreei David. Räjp Dios: “Aguceä David xi'n Isaí rujn tejsi xhigab con narä. Susoobni xtidxä sujnni guiralii ni rlazä gac.”

<sup>23</sup> Räjpza Pabl:

—Galooli bia'n diidx lo rexagdo David guxhal' Dios te bejn ni gudzucaj xtojlnu, ni guslaa nuure lo dojl. Naj aguzojb diidxga. Jesucrist najc bejnnga, rudzucajni xtojlnu, ruslaani nuure lo dojl. <sup>24</sup> Che gusloj cagulijdx Juan rebejn, baluiini nanabpac gusiechljajz rexpejn Israel, tiobnisreni te jia xtojlnu. <sup>25</sup> Niluxh guxii riäädx guluux Juan dzuun ni badeed Dios gunni che räjpni lo rebejn: “¿Chu rujntu xhigab nacä narä? Dina gacä Crist nani bia'n diidx guxhal' Dios. Colhuii, detzä siääd tej ni sacduxhru loä; nicla gac surloä te cuää xcura'chni.”

<sup>26</sup> Räjpza Pabl:

—Rniä lojtu sa'ä, rexagdo toAbram, näjza lo chutis ni rajn Dios, loonu baxhal' Dios xtiidxni ni rusule' xho rudzucaj Jesucrist xtojlnu, xho ruslaani nuunu lo dojl. <sup>27</sup> Rebejn Jerusalén, näjza renani rniibeereni, direni niembee Jesucrist nani rniibee, dizareni niacbee diidx xcuent Dios nani bacuaa reniguii ni gunii xtidx Dios agujc xchero, luxh rolreni xtidx Diosga gasob sabd. Niluxh che bagu'treni Jesucrist, guzobj xtidx Dios ni caj lo guijtzga. <sup>28</sup> Balijdxreni Pila't ju'tni Jesucrist, luxh xhet bejndini te guetni. <sup>29</sup> Che bagujc guiraa ni caj lo guijtz xcuent Jesucrist, gulätreni Jesucrist lo cruiz, bacua'tzrenini neñ baa cuä' te guilaj. <sup>30</sup> Dxejcti guläs Dios Jesucrist lo rebengut. <sup>31</sup> Balti huält baluuloj Jesucrist lo rexamigwni nani biädnajlri nez rexyuj Galilee, renani biädnajlzani nez guedx Jerusalén. Bahuilojreni gubansac Jesucrist lo rebengut, te naj rusule'reni diidx xcuent Jesucrist.

<sup>32</sup> Naj siopnänu xtidx Diosre lojtu te guibalajztu. Agujc xchero bia'n Dios diidxre con retoxtadgoldoonu. <sup>33</sup> Guläs Dios Jesucrist te huile' diidxga par nuure, rexagdooreni. Agujc xchero gunii Dios te diidx ni caj neñ Salmo ni bacuaa toDavid. Lo Salmo ni rojp räjp Dios: “Luj najclu xi'nä. Nadxej guleälu te gunibeelu.”

<sup>34</sup> Räjpza Pabl:

—Dxejcru stee lajt caj xcuent ni guläs Diosni lo rebengut te nuncru guetni. Scree bacuaa te niguii, räjp Dios: “Sunidxä recossa'c lojlu si'c ni bia'nä diidx con toDavid.” <sup>35</sup> Ni'cni bacuaaza toDavid neñ stee Salmo ni gunii Dios, guniini: “Dipaclu gusaan gudx tiejxh Xi'nlu nani sanälajzlu.” <sup>36</sup> Che gulujx gunibee toDavid lo retoxtadgoldoonu, si'cni badeed Dios gunni, dxejcti gujtni. Biga'tznäjni retoxtadgoldoonu. Niluxh guyujdx tiejxh toDavid. <sup>37</sup> Niluxh guläs Dios Jesucrist lo rebengut, ni'c di tiejxhni niujdx. <sup>38</sup> Ni'cni colyabee, la'tu resa'ä, Jesucristre, bejn ni cania' xcuenti, laani rudzucajni rextojlnu. <sup>39</sup> Chutis ni rililajz xtidx Jesucrist ruslaa Jesucristni loj guiraa rextojlnu nani digacdi guibicaj mascä ruseobni guiralii ni caj lo lei'i xten toMoisés. <sup>40</sup> Col'susiñ te na'c sajctu recos ni caj lo guijtz ni bacuaa te niguii nani bacuaa xtidx Dios:

<sup>41</sup> Col'huilaa, la'tu ni ruxhznäj xtidxä colguidxeloj,

colnitloj, sa'csi naj ni nabajntu sunä te dzunro, te milagwr nez lojtu, niluxh dipac lajztu chalii, mascä jiaäd chu gusule'pacni lojtu.

<sup>42</sup> Gulujxti xtidx Pabl, biunejz rebejn. Che birinäj Pabl Bernabé biädni rebejnre lojreni, räjpreni:

—Jiädsactu ste xmaan te gusule'rutu rediidxre loonu.

<sup>43</sup> Che care'ch rebejnğa, xhidajl rexpejn Israel, näjza xhidajl rebenzjzt nani rusooob xtidx Dios si'c rujn rexpejn Israel, birinajlreni Pabl näjza Bernabé. Dxejc balijdxreni rebejn ni siädnajlreni, räjpreni lojreni chanuutis chalilajzreni didxlii xcuent Jesucrist.

<sup>44</sup> Che gojliti stee sabd, dxej ni rusilajz rexpejn Israel, xhidalduxh rebenguejdx bire' te gucuadajgreni guinii Pabl xtidx Dios. <sup>45</sup> Che bahuii rexpejn Israel guiraa rebejn ni bire', bidxechlajzreni, gucnadareni. Dxejc gusloj cadxagdijl rexpejn Israel Pabl. Che rniini te diidx, laareni rniireni "didxxhiini". Caniyazareni Pabl näjza Bernabé, caguereni lojreni. <sup>46</sup> Luxh di Pabl niclaza Bernabé nidxejb. Gusutijptisreni, räjpreni lo rebejn:

—Nungäjł ganid lojtu guiniinu xtidx Dios, sa'csi la'tu najctu rexpejn Israel. Niluxh ditu chalilajz xtidx Dios, lagajc la'tu caniitu digacdi guibañajtu Dios par tejpas. Ni'c sibiré loonu, te guiniinu xtidx Dios lo rebenzjzt ni digac xpejn Israel. <sup>47</sup> Sa'csi si'c agunibee Xtiosnu. Scree caj xtidx Dios lo guijtz:

Suxhalätu te guluiilu rextidxä lo rebenzjzt ni digac xpejn Israel, te chalilajz rebejnğa xtidxä, te laareni lo xtojłreni, cadrotis yu'reni lo guedxliuj, räjp Dios.

<sup>48</sup> Che biejn diajg rebenzjzt rediidxre, bibalazduxhreni, gulä'preni xpala'n xtidx Dios. Renani gule Dios galooli huililajz xtidx Dios. Xhidajl najczeni. <sup>49</sup> Bire'ch xtidx Dios guideb nez reguejdxga. <sup>50</sup> Dxejc rexpejn Israel balijdx regunaa ni sajcrü, näjza reniguii ni sajcrü nen guedx Antioquia, te bidxechnäjreni Pabl näjza Bernabé, barilaagwreni Pabl näjza Bernabé te biunejzreni guedx Antioquia. <sup>51</sup> Dxejcti Pabl näjza Bernabé gubijb guxhuj ni'reni si'c te seen te gachee rebejn xhet laadi bejnreni. Sä'tireni guedx Iconio. <sup>52</sup> Baspaa Dios lajz rexpejn Jesucrist guedx Antioquia xten Pisidia. Bazutijpza Sprit Dvan xten Dios lastooreni.

## 14

### *Guyu' Pabl näj Bernabé guedx Iconio*

<sup>1</sup> Che bidzujn Pabl näjza Bernabé guedx Iconio, biu'reni xquidoo rexpejn Israel. Basule'reni xtidx Dios lo rexpejn Israel näjza lo rebenzjzt. Xhidajl rebejnğa huililajz xtidx Dios. <sup>2</sup> Niluxh sgaii rexpejn Israel nani di chalilajz xtidx Jesucrist balijdx rebenzjzt te bidxechnäjreni rebejn nani huililajz xtidx Jesucrist. <sup>3</sup> Ni'cni bia'n Pabl näjza Bernabé lo guejdxga balti dxej. Gusutzu'tz guiro'preni guniireni xtidx Jesucrist. Badeed Dios bejnreni redzunro, remilagwr xcuent xcälrnibee Dios te bahuii bejn cayacnäj Diosreni. <sup>4</sup> Guyu' tiop cuaa bejn nen guejdxga. Gala' guejdxga huililajz xtidx Dios nani gunii Pabl näjza Bernabé, <sup>5</sup> dxejc sgala' guejdxga bacuadajg xtidx rexpejn Israel. Dxejc bire' te cuaa rexpejn Israel, näjza benzjzt, näjza reguxhtis, rłajzreni nidxagdijłreni reapost, rłajzarenı nucuareni guij yejc Pabl näjza Bernabé. <sup>6</sup> Dxejc gucbeereni xhi rłajzreni gunreni, ni'c baxunreni ro'c huijreni nez reguedx Licaonia, ro'c bidzujnreni guedx Listra, guedx Derbe, näjza reguejdx ni re' nejzga. <sup>7</sup> Che bidzujnreni ro'c, cadrotis huijreni basule'reni xtidx Dios.

<sup>8</sup> Guedx Listra guyu' te niguii ni digacdi sa, che gojlłni racxhuu ni'ni. <sup>9</sup> Cagucuadajg niguiiga xtidx Pabl. Che bahuii Pabl lojni, gucbee Pabl rililajz niguiiga xtidx Dios, rililajzani sajc gusıajc Diosni. <sup>10</sup> Dxejcti dip gunii Pabl lojni, räjpni:

—łHuisulii!

Dxejcti huisuyälłni, gusajni. <sup>11</sup> Che bahuii rexpejn Licaonia xhi bejn Pabl, lagajc xtiidxreni guniireni, räjpreni lo sa'reni:

—łRedios abiädłuilol loonu si'c niguii!

<sup>12</sup> Gulälajreni Bernabé Júpiter, si'c laa tej rextiosreni. Dxejcti Pabl gulälajreni Mercurio, si'c laa stee rextiosreni, sa'csi laani rniiruni lo guiro'preni. <sup>13</sup> Dxejcti te bixhojz xten xquidoo Júpiter cua' tiop gon najł guii guejnreni. Biädnäni regonga ro' xquidoo Júpiter ni suga' ro' guejdxga. Rebejn näjza bixhojz rłajzreni nugu'treni regon te gaņreni Bernabé näjza Pabl si'c rajnreni rextiosreni. <sup>14</sup> Che biejn diajg reapost xhi cayajc, batiäjsreni tla' xhajbreni si'c te seen direni guichagłajz xhi cayujn rebejnğa. Ruxunreni bidzujnreni lo rebejn, räjpreni lo rebejn:

<sup>15</sup> —Colcuadajg xtiidxnu. łXhicuent cayujn guejbtu recosre? Ni lagajc sabejntu najcnu, lagajc beņ guedxliuj najcnu. Rusule'nu xtidx Dios lojtu te lacuaa ruzuxhıjbtu lo redios ni runchee bejn, guzuxhıjbtu lo Gueb Dios ni nabajn par tejpas, ni benchee xhaguıbaa näjza



guedxliuj, nájza nisdoo, nájza guiralii ni yu' lojreni, neñreni, <sup>16</sup> Galoo basaan Diosga gun reben guedxliuj si'ctis ni rlanjreni. <sup>17</sup> Huen najc Dios, rudeedni nisguij, rudeedni rajc xhi rajw rebejn, rdxaj xque'reni, rbaa lajzreni. Ni'cni riembeepacnu yu' Dios.

<sup>18</sup> Xhidajl diidx guniireni te cháii bejnreni gaan guredxi rebejn, sa'csi rlanjpac rebejn nugu'treni regon.

<sup>19</sup> Dxejcti bidzujn gaii xpejn Israel siäädreni guedx Antioquia nájza guedx Iconio. Baqu-ilreni reben Listra te gucuaareni guij yejc Pabl. Bacuaareni guij yejc Pabl, gudobxhaxharenini guläärenini ro' guejdxga, sa'csi naareni agujtni. <sup>20</sup> Dxejc lał ni suga' rexpejn Jesucrist guideb gabi cadro naga' Pabl, huistieni, biusacni guejdxga. Che bara yääl, huináni Bernabé sääreni guedx Derbe.

<sup>21</sup> Che bidzujnreni guejdxga, basule'reni rextidx Dios lo rebejnğa. Xhidajlreni huililajz xtidx Dios. Dxejc gubi'reni, biu'reni guedx Listra, nájza guedx Iconio, nájza guedx Antioquia. <sup>22</sup> Balijdxreni rebejn nani huililajz xtidx Dios, gucnäjreni rebejnğa te batiplajz rebejnğa, räjpreni lo rexpejn Jesucrist:

—Colšnjaj lajztu xtidx Dios. Susacsi rebejn la'tu, sidejdtu trabajw te jiu'tu cadro rnibee Dios.

<sup>23</sup> Dxejcti gule reapost gaii dade' ni najc bengool te fiireni rexquidoo xpejn Jesucrist. Che gulujx bacua'nreni, lał ni guredx-gunabreni lo Dios, basadiidxreni rebejn, räjpreni: "Gacnäj Jesucrist la'tu ni huililajz xtiidxni."

### *Gubisac guiro'preni guedx Antioquia xten Siria*

<sup>24</sup> Che gudejd Pabl nájza Bernabé distrit Pisidia, bidzujnreni estad Panfilia. <sup>25</sup> Basule'reni xtidx Dios lo reben Perge, dxejcti biriireni ro'c sääreni guedx Atalia. <sup>26</sup> Che bidzujnreni guejdxga, biu'reni neñ barcw, gudejdreni lo nisdoo te bidzujnreni stee guejdx ni laaza Antioquia. Ni'c najc guejdx ni biriireni che sääreni. Lo guejdxre yu' rexpejn Jesucrist ni gunab lo Dios xcuentreni, gacnäj Diosreni, baxhalreni Pabl nájza Bernabé chasule'reni xtidx Dios neñ guiraa reguejdx. Naj abaluux Pabl nájza Bernabé dzuunga. <sup>27</sup> Che bidzujnreni guejdxga, bachagsa' rexpejn Jesucrist. Dxejcti bijreni diidx lo rebejnğa guira'ti ni bennäj Dios laareni, nájza xho badeed Dios huililajz rebenzijt nani digac rexpen Israel. <sup>28</sup> Xchej biannäjreni rexpejn Jesucrist ro'c.

## 15

### *Bidxagsa'zareni neñ guedx Jerusalén*

<sup>1</sup> Neñ redxejga bidzujn gaii dade' ni siääd nez Judea, caguluiireni rexpejn Jesucrist, räjpreni lojreni:

—Palga ditu gusäl bee si'c gunibee toMoisés, di Dios guslaatu lo xtojltu.

<sup>2</sup> Che biejn diajg Pabl nájza Bernabé rediidxga, bidxagdijlreni redade'ga. Dxejc gule rexpejn Jesucrist Pabl nájza Bernabé nájza sgaii rexpejn Jesucrist cháäreni guedx Jerusalén te guinänäjreni reapost nájza rebengool te guidon xho gac xcuent beega.

<sup>3</sup> Huisunejz rexpejn Jesucrist ni najc ben Antioquia Pabl nájza rebejn ni sanäjreni, sääreni guedx Jerusalén. Gudejdreni reguedx Fenicia, nájza reguedx Samaria. Cadrotis gudejdreni bijreni diidx lo rexpejn Jesucrist ahuililajz rebenzijt xtidx Dios. Bibalazduxh rexpejn Jesucrist che biejn diajgreni rediidxga.

<sup>4</sup> Che bidzujnreni guedx Jerusalén, huichagloj rexpejn Jesucristreni. Dxejcti bij Pabl nájza Bernabé diidx lo reapost, lo rebengool nani rnibee rexpejn Jesucrist, nájza lo rexpejn Jesucrist, guiraa redzunro nani cayunnäj Diosreni. <sup>5</sup> Dxejc huisulii gaii refarisee ni ahuililajz xtidx Dios, räjpreni lojreni:

—Che chalilajz rebenzijt xtidx Dios, nanab chureni bee, nanabza gusoobreni leii xten toMoisés.

<sup>6</sup> Dxejcti bachagsa' reapost nájza rebengool nani rnibee rexpejn Jesucrist, te don xho gunreni. <sup>7</sup> Huisulii Pedr, räjpni lojreni:

—Guejbtu, resa'ä, anajntu xho bejn Dios gubalti iij. Gule Dios narä lo guiraanu te gusule'ä xtidx Dios loj rebenzijt, te chalilajzreni xtidx Dios. <sup>8</sup> Luxh Dios, nani numbechee lastoo guiralii bejn, badeed seen huililajzpac rebenzijt xtiidxni. Badeed Dios Sprit Dxaan xtenni lojreni si'c te seen te gacbee bejn najczeni xpejn. Sigac baniidxni Sprit Dxaan xtenni loonu galoo, si'cza badeednini lo rebenzijt. <sup>9</sup> Sigajc rinälajz Dios nuunu, sigajcza rinälajzni rebenzijt. Che huililajz rebenzijt xtiidxni, basia Dios lastooreni. <sup>10</sup> Naj çXhicuent rusieedtu Dios, ä? Di najcdi nisianäj retoxtadnu releiiga, digacdiza chosanäjnu releiiga naj. ÇXhicuent rlanjztu chasanäj rebenzijt releiiga? <sup>11</sup> Xhet si'cti gacni sa'csi Dios ruslaa nuure lo xtojlnu che rililajznu xtidx Jesucrist, luxh si'cza ruslaani rebenzijt lo dojl che rililajzreni xtidx Jesucrist —räjp Pedr.

<sup>12</sup> Che gulujx gunii Pedr, dxitis gurej rebejn, bacuadiajgreni xtidx Bernabé, xtidx Pabl. Guiro'preni bijreni diidx xho cayujn Dios redzunro, remilagwr nez lo rebenzajt.

<sup>13</sup> Che gulujx gunii guiro'preni, xhet guniidi rebejn. Jacobbtis räjp lojreni:

—Sa'ä, colcuadiajg xtidxä. <sup>14</sup> Agunii Simón ni rniireni Pedr lojtu xho ganiddoo baxhal Dios laani lo rebenzajt te gurejdx Dios rexpejn ni nadxaag lo rebenzajt. <sup>15</sup> Luxh si'cza caj lo guijt. Agujc xcheroduxh bacuaa reniguii nani gunii xtidx Dios, che räjni:

<sup>16</sup> Sidzujn dxej ni guibisachä.

Sunä guzuxhijb guiraa rebejn nez loä si'c bazuxhijb rexpejn Israel che gubajnto David.

Si'c gunä,

<sup>17</sup> te jiadgajnt rebejn narä te gacä Xtiosreni,

näja guiraa rebenzajt nani najc rexpenä jiadgajnt narä,

<sup>18</sup> si'c räjp Dios nani galooli baluiloj guiraa redzuunre.

<sup>19</sup> Dxejcti räjp Jacob lojreni:

—Dee najc xhigab ni runä. Na'cru gusieednu rebenzajt ni cagusiechljazreni, renani salilajz xtidx Dios. <sup>20</sup> Gucuaanu te guijt, jie'tznu lo rebenzajt: Na'c gaureni xhi cos ni basuj bejn loj rebanäjb, sa'csi dinu chalilajz xcuent rebanäjb. Na'cza guesnäjreni bejn ni di gac chäälni, na'cza gaureni bääl nani gurerejn, na'cza gaureni rejn. <sup>21</sup> Dee gucuaanu te di guche'chreni xpejn Israel sa'csi nen guiraa reguejdx galooli yu' rexpejn Israel nani rol leii xten toMoisés gasob sabd —räjp Jacob.

<sup>22</sup> Che biejn diajg reapost näja rebengool nani rnibee, näja guiraa rexpejn Jesucrist xtidx Jacob, bichagljazreni xtiidxni. Dxejcti gulereni tiop sa'reni chanä Pabl näja Bernabé guedx Antioquia. Gulereni Judas ni rniireni Barsabás näja Silas. Guiro'preni najc bejn ni sajru loj rexpejn Jesucrist. <sup>23</sup> Dxejcti bejnreni guijt huinäreni. Bacuaareni rediidxre:

“Nuure reapost, näja rebengool ni rnibee, näja rexpejn xquidoo Jesucristi ruxhalnu xtixtios lojtu, resa'nu nani rbäyz guedx Antioquia näja estad Siria näja estad Cilicia. <sup>24</sup> Rucuaanu guijtze sa'csi biejn diaagnu birii gaii resa'nu ree biädsieedreni la'tu con xtiidxreni, cayu'tu yärsia' sa'csi najreni lojtu nanab chutu bee si'c gunibee toMoisés, guibajnzatu si'c rniü lei xten toMoisés. Xhet nuudinu gunibeenu jiadniireni si'c. <sup>25</sup> Ni'cni biennu xhigab guxhalnu lojtu tiop dade' ni gulenu loj resa'nu te chanäreni Bernabé näja Pabl, nani sanälaaznu. <sup>26</sup> Agajc balti huält rljazreni nugu'treni Bernabé näja Pabl, luxh direni guidxejb gusule'reni xtidx Jesucrist. <sup>27</sup> Naj ruxhalnu Judas näja Silas lojtu. Laareni susule'za guiraa rediidxre lojtu. <sup>28</sup> Tejsi najc xhigabnu con Sprit Dxan xten Dios. Di rlaaznu gutaalrunu leii ni chasanäjtu. Releitiis nani nanab rusoobnu rucuaanu lojtu. <sup>29</sup> Na'c gautu xhicos ni basuj bejn lo rebanäjb, sa'csi dirunu chalilaaz xcuent rebanäjb. Na'cru gautu rejn, na'cza gautu bääl nani gurerejn, na'cza guesnäjtu nani digac chäältu. Palga gusoobtu recosre, laaca cayujntu. Sacrü guibajntu. Sujiannäjtu Dios.”

<sup>30</sup> Dxejcti basadiidx rexpejn Jesucrist Judas näja Silas huinäreni Pabl näja Bernabé guedx Antioquia. Che bidzujntreni ro'c batojpreni guiraa rebejn nani huililajz xtidx Dios te bilreni guijtza lojreni. <sup>31</sup> Che biejn diajg rexpenzjt Jesucrist diidx ni caj lo guijtza, bibalazduxhreni sa'csi gulecdxi diidxga lastooreni. <sup>32</sup> Dxejcti basule' Judas näja Silas xtidx Dios lojreni, sa'csi rudeed Dios xtiidxni loj guiro'preni. Xhidajl diidx guniireni te balijdxreni rexpejn Jesucrist. Lacti gulecdxi rediidx ni guniireni lastoo guiraa rexpejn Jesucrist. <sup>33</sup> Ro'c bia'nreni xchej, dxejcru cuäjb rexpejn Jesucrist gubi'reni te gudeedreni xtixtios loj reni baxhalreni.

<sup>34</sup> Dxej Silas bejn xhigab jia'nni ro'c. <sup>35</sup> Luxh Pabl näja Bernabé bia'n guedx Antioquia. Guiro'preni baluii, basule'reni xtidx Dios loj rebejn. Guyu'za sgaii dade' ni gucnäjreni.

*Huihuisac Pabl rexpejn Jesucrist nen guiraa reguejdx*

<sup>36</sup> Che gudejd xhidajl dxej, räjp Pabl lo Bernabé:

—Do'o guibi' lo guiraa reguejdx cadro basule'nu rextidx Dios te chohuiinu don xho yu' rexpejn Jesucrist.

<sup>37</sup> Niluxh Bernabé rljaz chanäreni Juan ni laa Marcw. <sup>38</sup> Naaddi Pabl chääni, sa'csi birii Marcw lojreni che guyu'reni nez Panfilia, diruni nisianäj Pabl näja Bernabé. <sup>39</sup> Dxej gudildiidxreni. Gubicajtireni lo sa'reni. Ni'c sanä Bernabé Marcw, biu'reni nen barcw, sääreni Chipre ni re' galäii nisdoo. <sup>40</sup> Dxejcti Pabl gule Silas te sanänini. Badeed rexpejn Jesucrist xtixtios lojreni, räjpreni gacnäz Diosreni. <sup>41</sup> La'l ni sasajreni gudejdreni guiraa reguedx Siria näja guiraa reguedx Cilicia, ro'c gucnäjreni guiraa rexpejn Jesucrist, basule'rurenä xtidx Jesucrist lojreni.

<sup>1</sup> Bidzun̄sac Pabl n̄jza Silas reguedx Derbe n̄jza Listra. Ro'c bidxaagreni te xpeñ Jesucrist ni laa Timoteu. Xnanni najc beñ Israel ni huililajz xtidx Jesucrist. Xtadni najc beñ griegw. <sup>2</sup> Didxa'sa'ctis rnīi rexpeñ Jesucrist ni yu' Listra n̄jza Iconio xcuent Timoteu. <sup>3</sup> Rlajz Pabl chanāni Timoteu. Dxejcti basāl Pabl bee Timoteu te gujnci si'c xpeñ Israel, te xhet naadi rexpeñ Israel, sa'csi guiraareni nanchee xtad Timoteu najc beñ griegw. <sup>4</sup> Che bidzujn̄reni cade tej reguejdx, basule'reni xtidx reapost n̄jza rebengool nani rnibee xpeñ Jesucrist guedx Jeurusalēn, te gusoob rexpeñ Jesucrist diidx ni bacuaareni lo guijt. <sup>5</sup> Bazutijp xtidx Dios lastoo renani huililajz xtidx Jesucrist. Guixe-guixee xhidajlru beñ huililajz xtidx Dios xcuent Jesucrist.

*Lo te bacal gunii te niguii lo Pabl*

<sup>6</sup> Che gudejdr̄eni distrit Frigia, n̄jza estad Galacia, di Sprit Dxan xten Dios nusaan nusule'reni xtidx Jesucrist neñ reguedx Asia. <sup>7</sup> Bidzujnt̄ireni gajxh estad Misia. Dxejc rlajzreni nijreni estad Bitinia, niluxh di Sprit Dxan xten Dios nusaan nijreni ro'c. <sup>8</sup> Ni'c gudejdt̄ireni stelaad estad Misia, bidzujn̄reni guedx Troas. <sup>9</sup> Te yāal si'c lo te bacal bahuii Pabl suga' te beñ Macedonia. Canabd̄uxh niguiiga lo Pabl, rājpni:

—Gudaa ladxā, estad Macedonia, te gacnājlu nuunu.

<sup>10</sup> Che bara yāal ni gunixcał Pabl, gudilgajcnu te barcw te chonnu estad Macedonia, sa'csi gucbeenu Dios najc nani caguxhał nuure te guluiini xtiidxni lo rebeñ Macedonia. Narā, Lucas, ni cagucuaā rediidxre, gusanāā Pabl n̄jza Silas.

*Che guyu' Pabl con Silas guedx Filipos*

<sup>11</sup> Biu'tinu neñ barcw ro' guedx Troas. Bidzun̄nu Samotracia, te yuj ni re' neñ nisdoo. Che bara yāal bidzun̄nu guedx Neāpolis. Ro'c biriinu neñ barcw, <sup>12</sup> bionnu guedx Filipos, guejdx nani sajrcu lo estad Macedonia. Guedx romanni. Ro'c bia'nnu tiop choñ dxej. <sup>13</sup> Che gojł sabd, dxej ni rusilajz rexpeñ Israel, biriinu guejdxga bionnu ro' te gueuu, sa'csi biennu xhigab ro'c jiāād rexpeñ Israel te guininājreni Dios. Ro'c gurejnu, guniinu lo renane' nani bire' ro'c. <sup>14</sup> Lojreni nadxaag te nane' ni laa Lidia, te benzijt ni digac xpeñ Israel. Guedx Tiatira siāādni. Ruto'ni ladmuraad ni sacduxh. Rajn̄ gunaaga Dios si'c rajn̄ rexpeñ Israelni. Bacuadiajgni xtidx Jesucrist ni cagusule' Pabl. Gucln̄j Dios nane'ga te huililajzni xtiidxni. <sup>15</sup> Birobnisni, n̄jza guiraa reni rbājz rolizjni. Dxejc guniini loonu:

—Palga ruhuiitu guliā rililazā xtidx Dios, coltaa rolizā te ro'c cuāāztu.

Lacti gunab nane'ga nuunu, ni'c huijia'nnu rolizjni.

<sup>16</sup> Te dxej cheni sionnu cadro rrināj beñ Dios, bidxaagru te dxa'p nani yu' te beñdxab neñ lastooni. Rājp rexpaxhuaanni melduxh sa'csi rusule' dxa'pga recos ni gajd gac. <sup>17</sup> Birinajl dxa'pga Pabl n̄jza nuure. Rbedxa' dxape'ga, rājpni:

—Reniguiire najc xmos Dios nani rnibee guideb guedxliuj. Ruluiireni loonu xho ļaanu lo xtojlnu —rājp dxape're.

<sup>18</sup> Balti dxej birinajl dxape'ga nuure, entis caniini rediidxga lo rebeñ. Lacti basieed dxape'ga Pabl, ni'c gubirēni, rājpni lo beñdxab ni yu' neñ lastoo dxape'ga:

—Xcuent xcāl̄rnibee Jesucrist rniā lojlu: “Birii neñ lastoo dxape'ga.”

Lagajc dxejc birii beñdxab neñ lastoo dxape'ga.

<sup>19</sup> Che bahuii rexpaxhuaan dxape'ga diru dxape'ga gun gaan melro, gunaazreni Pabl n̄jza Silas. Dxejcti gudobxhaxh̄reni guiro'preni nez roguii cadro suga' reguxhtis. <sup>20</sup> Che bidzun̄nājreni Pabl n̄jza Silas lo reguxhtis, rājp rexpaxhuaanni lo reguxhtis:

—Reniguiire najc xpeñ Israel. Cayujn̄reni biey lo guejdxre. <sup>21</sup> Caguluiireni garenca leii nani digacd̄i gusoobnu sa'csi najcnu beñ roman.

<sup>22</sup> Dxejcti bidxechnāj rebeñ Pabl n̄jza Silas. Gunibee rejuejz gulāāreni xhāj Pabl, n̄jza xhāj Silas, te batiāj̄reni baar guideb tiejxh guiro'preni. <sup>23</sup> Che gulujx gudinduxh̄reni Pabl n̄jza Silas, biāuren̄ neñ latzguiib. Dxejcti rājp reguxhtis lo reguixhajg:

—Colgadzuz'tzreni, di gusaantu guiriireni.

<sup>24</sup> Basāl guixhajgreni neñ latzguiib. Guyu' ni'reni neñ te barāj̄d ni sojb gueed te di guxun̄reni.

<sup>25</sup> Garolyāal gunināj Pabl n̄jza Silas Dios, gusloj cayol̄reni dij ni rliā'p xpala'n Dios. Biejn̄ diajg guiraa rebeñ ni yu' neñ latzguiib cayol̄reni. <sup>26</sup> Chela gujc te xuduxh, basniib guideb latzguiibga. Bixal guiraa repuert, birucya' guiraa recaden, bixal ro' rebarāj̄d cadro naaz ni'reni. <sup>27</sup> Che gubaj̄n̄ guixhajg ni canāj latzguiib, bahuiini naxhal latzguiib, gulāāni spaad xtenni, te rlajzni nugu'tni lagajc laani, sa'csi naani abadxun̄ reni niāu neñ latzguiib. <sup>28</sup> Dxejc guredxa' Pabl, rājpni lo guixhajgga:

—Na'c gunlu si'c. Bahuii, guiraliinu suga'nu ree.

<sup>29</sup> Dxejc gunibee guixhajg biāād te bajl te biu'ni neñ latzguiib. Racsejsni biāādni bazuxhijbni nez loj Pabl n̄jza nez loj Silas. <sup>30</sup> Dxejcti gulāā guixhajgreni neñ latzguiib. Gunabdiidxni rājpni lojreni:

—¡Colguinii, dade! ¿Xhini'c nanab gunä te guslaa Dios narä lo dojl?

<sup>31</sup> Räjþ Pabl näjza Silas lo guixhajc:

—Huillilajztis xtidx Dios xcuent Jesucrist, luj näjza guiraa reni yu' rolizlu, te guslaa Diostu lo dojl.

<sup>32</sup> Basule' Pabl näjza Silas rextidx Dios lojni näjza loj guiraa rebejn ni yu' rolizjni. <sup>33</sup> Lagajc dxejc, garol yääl, huinä guixhajgreni gudiibni dejtzeni cadro batiuug baarreni. Dxejcti batiobnisreni guixhajc näjza guiraa reni yu' rolizjni. <sup>34</sup> Dxejc huinä guixhajgreni rolizjni, ro'c badeedni xhi gudajwreni. Laani näjza guiraa reni yu' rolizjni bibalazduxhreni sa'csi huillilajzreni xtidx Dios.

<sup>35</sup> Che bara yääl, baxhal reguxhtis stiop guixhajc räjþni lo guixhajc nani cuanäj latzguuib: —Baslaa reniguiiga.

<sup>36</sup> Dxejcti huiye'tz guixhajgga lo Pabl, räjþni:

—Anaj reguxhtis guslaätu. Naj colchäj, gacnäjä Dios la'tu, saru cháätu.

<sup>37</sup> Niluxh räjþ Pabl loj reguixhajc:

—Nuure najczanu beþ roman. Batiäjreni baar detznu nez loj guiraa rebejn. Nicla niniabdiidxreni la yu' xhi dojl biennu. Basäuren nuure neþ latzguuib. Leii xten roman di gusaan gac rebeþ roman si'c. Luxh naj rlaztreni guslaareni nuure xhiga'tz. ¡Dinu guirii si'c! Lagajc laareni sujiädslääreni nuunu.

<sup>38</sup> Che huiye'tz reguixhajc diidxga lo reguxhtis, bidxebduxhreni che biejn diajgreni beþ roman najc Pabl näjza Silas. <sup>39</sup> Dxejcti biääd reguxhtis, gulääreni Pabl näjza Silas, gunabreni jäjllajzreni. Gunabduxhreni lo Pabl näjza Silas; räjþreni:

—Coljiunejz guejdxre.

<sup>40</sup> Che biriireni neþ latzguuib, huijreni rolizj Lidia. Baliidxreni rexpejn Jesucrist, gulecdxireni lajz rexpejn Jesucrist. Dxejc biunejzreni guejdxga.

## 17

### *Cadxecludxh guiraa reben Tesalónica*

<sup>1</sup> Che gudejzreni reguedx Anfípolis, näjza guedx Apolonia, bidzujþreni guedx Tesalónica cadro yu' te xquidoo rexpejn Israel. <sup>2</sup> Ro'c basule' Pabl xtidx Dios si'c ni rujnpacni. Choþ sabd, dxejc ni rusilajz rexpejn Israel, basule'ni xtidx Dios lojreni. <sup>3</sup> Basule' Pabl xtidx Dios ni caj lo guijtz ni bacuaa reniguii ni gunii xtidx Dios galooli. Caj lo guijtzga: “Nanab ted Crist trabajwduxh, guetni, niluxh sibaþsacni lo rebeþgut.”

Dxejc räjþ Pabl lojreni:

—Ruiä lojtu diidx xcuent Jesús; lagajc Jesúsre najc Crist —räjþni.

<sup>4</sup> Yu' rexpejn Israel huillilajz xtidx Dios, gusanäjreni Pabl näjza Silas. Näjza xhidalduxh beþ griegw nani rajþ Dios näjza xhidajl reguna griegw ni sajrcu huillilajz xtiidxni. <sup>5</sup> Luxh yu' rexpejn Israel ni di chalilajz, ni bidxecludxh. Batie'reni gaii beþploj, beþlatsiaj, beþnreni bieyþ nez galäii. Biu'reni rolizj Jasón caguuilreni Pabl näjza Silas te cuääreni guiro'preni nez lo rebejn. <sup>6</sup> Niluxh che direni nidxäl Pabl näjza Silas, alga Jasón gulääreni näjza gaii renani rililajz xtidx Dios, sanääreni redee lo reguxhtis, cabedxa'reni:

—Reniguiire ni abejn bieiduxh guideþ guedxliuj abidzujþreni laadxnu, <sup>7</sup> luxh badeed Jasón rolizjni jia'nreni. Direni gusoob leii xten César, najreni yu' stee rei ni laa Jesús.

<sup>8</sup> Che biejn diaj reguxhtis näjza rebejn diidxre, guyu'reni yärsia'. <sup>9</sup> Cua' reguxhtis meel lo Jasón näjza lo reexamigwni. Räjþ reguxhtis sudedsacreni meelga che jii Pabl näjza Silas, jiunejzreni lo guejdxga. Dxejcti baslaareni Jasón näjza reexamigwni.

### *Che guyu' Pabl con Silas guedx Berea*

<sup>10</sup> Che biu' guxhijn, baxhalgajc rexpejn Jesucrist Pabl näjza Silas ste guejdx ni laa Berea. Che bidzujþreni guejdxga, biugajczeni xquidoo rexpejn Israel. <sup>11</sup> Huenru najc rebeþ Berea loj rebeþ Tesalónica, sa'csi rbaali lajzreni bacuadijgreni xtidx Pabl ni guniini xcuent Jesucrist. Guixe-guixee bilreni guijtz cadro caj xtidx Dios te gucheereni la gulii rextidx Pabl. <sup>12</sup> Xhidajl rexpejn Israel näjza xhidajl beþ griegw ni sajrcu, gunaa sigajc niguii, huillilajz xtidx Dios. <sup>13</sup> Che guchee rexpejn Israel ni rbäjz guedx Tesalónica caguluii Pabl xtidx Dios guedx Berea, biäädreni guedx Berea. Che bidzujþreni lo guejdxga beþnreni bieyþ ro'c. <sup>14</sup> Dxejcti baxhal rexpejn Jesucrist Pabl, huijni ro' nisdoo. Niluxh Silas näjza Timoteu bia'n guedx Berea. <sup>15</sup> Dxejcti rebejn ni guzanäj Pabl huinäni guedx Atenas. Ro'c räjþ Pabl lo rebejn ni biädnäni guedeereni diidx lo Silas näjza Timoteu jädgajczeni lojni. Dxejcti rebejn ni sanä Pabl gubisac guedx Berea.

### *Guyu' Pabl guedx Atenas*

<sup>16</sup> Lañ ni guläjz Pabl guedx Atenas, guyuduxhni yärsia' sa'csi bahuiini rajþ guiraa rebejn rebanäjþ nani runchee lagajc bejn. <sup>17</sup> Ni'c neþ xquidooreni gudiläidx Pabl rexpejn Israel näjza rebenzijt ni rajþ Dios si'c rajþ rexpejn Israelni. Guixe-guixee gudiläidxni chutis bejn

ni re' lo guii. <sup>18</sup>Dxejcti biääd gaii bejn lojni. Yu' reni rolduxh guijtZ ni bacuaa epicúreos, yu'za renani rolduxh guijtZ ni bacuaa estoicos, gudildiixreni Pabl. Yu' reni räjp lo sa'reni:

—¿Xhicha guinii bejnre loonu? Entis naxhal ro'ni.

Yu'zaren räjp lo sa'reni:

—Pet calä'pni xpala'n tiop dioscoob.

Si'c guniireni sa'csi biejn diajgreni bazä't Pabl “Jesús” näjza “Resurreccion”, ni säloj yälgubansac lo rebengut. <sup>19</sup>Dxejcti gunaaazreni Pabl sanärenini nez dajn ni laa Areópago. Ro'c yu' si'c te jusgaad. Räjpreni lo Pabl:

—Rlaaznu gacbeenu xhi diidx ruluiilu, <sup>20</sup>sa'csi ruyjlu diidx nani dinu jiacbee. Ni'cni bejn huen, basule' diidxre loonu te gacbeenu xhi sälojreni —räjpreni.

<sup>21</sup>Reben Atenas näjza rebenzijZ ni yu' ro'c ruteedreni redxej rniireni didxcoob lo sa'reni, o rucuardiajgreni didxcoob. Ni'cpac rchagljazreni.

<sup>22</sup>Galäii Areópago huisulii Pabl, räjpni lojreni:

—Colcuadiajg guejbtu, bejn Atenas. Abahuiä xho randuxhtu xhidajl banäjb. <sup>23</sup>Che siädsää lo guejdxre, bahuiä lo rexpanäjbtu. Bahuiäza loj te piään cadro caj rediidxre: “Dios ni dinu jiembee.” Narä ranä Diosga. Rumbaä Diosga nani rajntu mase ditu gumbeeni. Susule'ä xtiidxni lojtu.

<sup>24</sup>Räjp Pabl:

—Diosre benchee guedxliuj näjza guiralii ni yu' lo guedxliuj, sa'csi rnibeeni xhaguibaa näjza guedxliuj. Di Diosre cuääZ lo piään niclaza nen reguidoo ni runchee bejn. <sup>25</sup>Diza Diosre guiquiin chu gacnäjni sa'csi lagajc Diosre rudeed yäl'nabajn, yäl'nadaan, näjza guiralii nani rquiin reben guedxliuj.

<sup>26</sup>Räjp Pabl:

—Guiralii reben guedxliuj najc rexagdo tejsi gunaa näjza tejsi niguii. Desde galooli gunibee Diosga bal ijz chu renacion, näjza cati gunibee renacionga. <sup>27</sup>Benchee Dios guiraa reben guedxliuj te quuilreni Dios te chalilajzreni xtiidxni. Luxh suga' Dios gajxh cadetejnu, <sup>28</sup>sa'csi Dios rujn nabajnnu lo guedxliuj, runiidxni rsiaanu lo guedxliuj, runiidxzani rdajlru xcäl'nabannu lo guedxliuj. Laaca bacuaa rexpennajntu: “Najcnu xi'n Dios, sa'csi benchee Diosnu.” <sup>29</sup>Ni'cni, sa'csi najcnu xi'n Dios, di nungäjl jiennu xhigab najc Dios si'c rebanäjb ni nac-chee pla't, o guij, o yajg si'ctis ni runchee bejn rexpanäjbtu. <sup>30</sup>Nen redxej ni di bejn niembee Dios, diza Dios niujn castiigwreni. Niluxh naj gunibee Dios gusiechljaz guiraa rebejn, <sup>31</sup>sa'csi abasoobni te dxej cheni gac Jesús juejz lo guiraa reben guedxliuj. Agule Diosni gacni juejz, sa'csi rumbechee Jesucrist chu najc benguijdx, chuzä najc bensä'c. Rniliu Jesucrist rediidx ni najc guliitis. Guläs Dios Jesucrist, baspañsacnini lo rebengut, te gacbeenu rajp Jesucrist yäl'rnibee lo guiraa recos.

<sup>32</sup>Che biejn diajg rebejnga gubansac Jesucrist lo rebengut yu' reni baxhiznäj xtiidxni. Yu'za reni räjp:

—Sucuadiajgrunu xcuent ni rusule'lu.

<sup>33</sup>Dxejcti birii Pabl lojreni. <sup>34</sup>Yu'za reni huinajlmi, huililajzreni xtidx Dios. Lojreni nadxaag te dade' ni laa Dionisio ni najc te juejz lo Areópago; näjza te nane' ni laa Dámaris. Guyu'za sgaai bejn ni huililajz.

## 18

### *Guyu' Pabl guedx Corinto*

<sup>1</sup>Biriiti Pabl guedx Atenas, huijni guedx Corinto. <sup>2</sup>Ro'c bidxaagni te dade' ni najc ben Israel, ni laani Aquila. Ponto najc lajdxni. Biädgajni ro'c, biriini Roma, sa'csi gunibee rei Claudio guirii guiraa rexejn Israel guedx Roma. Birinäj Aquila Priscila chäälni. Biriireni Italia, biäädreni guedx Corinto. Bihuii Pablreni, <sup>3</sup>sa'csi lagajc dzuun ni rujnreni rujnzani. Tejsi lajt guläzreni te bejn jionreni tejsi dzuun. Runcheereni yuguijd. <sup>4</sup>Gasob sabd, dxej ni rusilajz rexejn Israel, basule' Pabl xtidx Dios nen xquidoo rexejn Israel. Rlajzni chalilajz rexejn Israel näjza bejn griegw ni digac xpejn Israel diidx ni rniini xcuent Jesucrist.

<sup>5</sup>Dxejcti birii Silas näjza Timoteu Macedonia. Che bidzujnreni guedx Corinto, gusloj rusule'tis Pabl xtidx Dios guixe-guixee, guniliini lo rexejn Israel:

—Jesús najc Crist ni runloj rexejntu guxhał Dios.

<sup>6</sup>Dxejcti bidxechnäj rexejn Israelni, guniyajzaren xtiidxni. Dxejcti gubijb Pabl xhajbni si'c te seen diruni juren, caguro'nnireni. Räjpxani lo rexejn Israel:

—Lagajc la'tu rajptu dojl nittu lo Dios. Xhet dojldi rapä narä. Aguniä xtidx Jesucrist lojtu. Naj lo rebejn nani di gac bejn Israel gusule'ä xtidx Jesucrist —räjpxni.

<sup>7</sup>Dxejcti biriini lojreni, huijni rolijz Justo, te bejn ni rajn Dios si'c rajn rexejn Israelni. Rolijzni sojb cuä' xquidoo rexejn Israel. <sup>8</sup>Crisp, ni rnibee xquidoo Israel, huililajz xtidx

Jesucrist. Huililajzza guiraa reni rbäjz rolijzni. Xhidajlza beñ Corinto huililajz xtidz Jesucrist, dxejcti birobnisreni. <sup>9</sup> Gohl te yääl gunii Dios lo te bacal, räjpni lo Pabl:

—Na'c guidxeyblu. Guniitis, na'c gusäulu ro'lu, <sup>10</sup> sa'csi narä suganää luj. Rut gacdi gun latsajlu. Aguleä xhidalduxh bejn lo guejdxre te gacreni xpenä —räjp Dios.

<sup>11</sup> Ni'c bia'n Pabl ro'c tebizgarol. Baluüini xtidz Dios lojreni.

<sup>12</sup> Che gujc Galíon gubernadoor xten Acaya, tejsi xhigab bejn rexpejn Israel bidojpreni te gunaazreni Pabl. Sanäreni Pabl jusgaad cadro yu' Galíon. <sup>13</sup> Räjpreni lo Galíon:

—Niguiire caguluii rebejn ganreni Dios garenca mood, xhet si'cti ni caj lo xleinu —räjpreni.

<sup>14</sup> Agojl ninii Pabl, che räjp Galíon lo rexpejn Israel:

—Palga gulanni o bagu'tni te bejn, dxejc yu' xtojlni te gucuadiagä xtiidxtu. <sup>15</sup> Per la'tu cadxe'chtu xcuent diidx, xcuent laj bejn, xcuent ni caj lo leii xtentu. Gubernadoor narä, xho gucuadiagä diidxga. Lagajc la'tu colchahuüi xho guntu yälguxhtis —räjp Pabl.

<sup>16</sup> Gunibee Galíon barilaagw resoldaad rexpejn Israel. <sup>17</sup> Dxejc gunaaz reGriegw Sóstenes nani rnibee xquidoo rexpejn Israel. Batiäjlni baar dejtz Sóstenes nez ro' jusgaad xten Galíon. Niluxh nicla niu Galíonreni.

### *Chon huält huihuüi Pabl rexpejn Jesucrist*

<sup>18</sup> Bia'nti Pabl Corinto xchej. Dxejc badeed Pabl xtiixtos lo rebejn nani huililajz xtidz Jesucrist, biriini ro'c. Sanäni Priscila näjza Aquila, biu'reni neñ barcw te süireni nez estad Siria. Dxejc ganid gudejdreni guedx Cencrea, cadro bahuaj Pabl yejcni si'c te seen yu' xhi diidx bia'nni con Dios. <sup>19</sup> Che bidzujnreni guedx Éfeso, basa'n Pabl Priscila näjza Aquila ro'c. Biu' Pabl xquidoo rexpejn Israel, ro'c bachaagni diidx con rexpejn Israel. <sup>20</sup> Dxejcti che gunabreni jia'n Pabl ro'c xchej, naaddini jia'nni. <sup>21</sup> Badeedni xtiixtos, räjpni lojreni:

—Nungäjlpac chatedä laniro guedx Jerusalén. Siälsacä ree palga gusaan Dios jiälä.

Biusacni neñ barcw, biriini guedx Éfeso. <sup>22</sup> Che bidzujnni guedx Cesarea, biriini neñ barcw, huijni guedx Jerusalén. Che bidzujnni, guniini xchan lo reapost näjza lo rexpejn Jesucrist. Dxejc huijni guedx Antioquía xten Siria. <sup>23</sup> Che gudejd balti dxej, biriini guejdxga, gudejndi guideb estad Galacia näjza guideb distrit Frigia. Neñ cade tej reguejdxga, balijdxni rexpejn Jesucrist te gutijpru lajzreni.

### *Baluüi Apolos xtidz Dios neñ guedx Éfeso*

<sup>24</sup> Neñ redxejga, te dade' ni laa Apolos bidzujn guedx Éfeso. Najcni xpejn Israel, gojlni guedx Alejandría xten Egipto. Lacti rajc rnisa'cni, nanduxhzani xtidz Dios. <sup>25</sup> Nanduxhni xtidz Dios xcuent Jesucrist. Laaca basule'ni xtidz Dios, guideb xcäl'nabajnni rinälajzni Dios. Niluxh xcuent Jesucrist najtisi ni yälrobnis xten Juan. <sup>26</sup> Nicla nidxejb Apolos gusloj caniini neñ guidoo xten rexpejn Israel. Che bejn diajg Priscila näjza Aquila xtiidxni, huiärenini rolijzreni. Ro'c basule'rureni xtidz Dios nani gajdni gan. <sup>27</sup> Dxejc, sa'csi abejn Apolos xhigab chääni reguejdx ni tre' nez Acaya, bacuaa rexpejn Jesucrist guijtz lo rexpejn Jesucrist ni yu' neñ reguejdxga te gacnäjreni Apolos. Gucnäduxh Apolos rebejn nani badeed Dios huililajz xtidz Dios neñ reguejdxga, <sup>28</sup> sa'csi guniüi Apolos nez loj guiraa rebejn xhet laadi rni rexpejn Israel. Di niajcdi nuzejc rexpejn Israel diidx lo Apolos sa'csi ganax con xtidz Dios ni bacuaa reniguii ni gunii xtidz Dios galoo basule'ni: “Jesús najc Crist nani cayunlojtu guxhał Dios.”

## 19

### *Guyu' Pabl guedx Éfeso*

<sup>1</sup> Lał ni guyu' Apolos guedx Corinto, huij Pabl xhidajl reguejdx neñ región Asia, dxejcti bidzujnni guedx Éfeso cadro bidxaagni gai bejn nani huililajz xtidz Dios. <sup>2</sup> Gunabdiidx Pabl lojreni:

—Che huililajztu xtidz Dios, ¿la biädlajz Sprit Dxan xten Dios neñ lastootu, ä?

Räjpreni lojni:

—Nicla gajd diajgnu jiejn la yu' te Sprit Dxan xten Dios.

<sup>3</sup> Räjp Pabl lojreni:

—¿Xho birobnistu, pues?

Räjpreni lojni:

—Birobnisnu si'cni baluüi Juan tiobnis bejn.

<sup>4</sup> Dxejcti räjp Pabl lojreni:

—Guliica bastiobnis Juan che basiejch lajz rebejn xtojlni. Räjprza Juan lo rebejn: “Colchalilajz xtidz bejn ni siääd detzä.” Bejn ni basä'tni najc Jesucrist —räjp Pabl.

<sup>5</sup> Che bejn diajgreni rextidz Pabl birobnisreni te gacbee rebejn najcneni xpejn Jesucrist.

<sup>6</sup> Che batzuub Pabl naani yejcneni, biu' Sprit Dxan xten Dios neñ lastooreni. Dxejc gusloj

caniireni garen-garen didxsaj. Guslojza caniireni diidx ni badeed Dios lojreni. <sup>7</sup> Si'c tzubitio'p dade' gusajc si'c.

<sup>8</sup> Si'c chon bäii, guixe-guixee gunii Pabl rextidx Dios, basule'ni xcuent xcälrmibee Dios loj rebejn nen xquidoo rexpejn Israel. Dini nidxejb guniini loj rebejn.

<sup>9</sup> Dxejc guyu' reni gucnajd, dirureni nililajz xtidx Dios. Che gusloj caniyajreni xtidx Dios lo rebejn, biunejz Pabl ro'c sanäni rexpejnni ni rililajz xtidx Jesucrist. Sanä Pablreni te bidxagsa' reni ro scueel xten mastr Tiranno. Ro'c bidxagsa' reni te guixe-guixee basule' Pabl xtidx Dios lojreni. <sup>10</sup> Tiop ijz bejn Pabl si'c, ni'c guiraa rebejn ni rbäjz Asia biejn diajgreni xtidx Dios. Rexpejn Israel sigajc reben griegw biejn diajgreni xtidx Dios. <sup>11</sup> Gucnäj Dios Pabl bejnni xhidajl dzunro, remilagwr. <sup>12</sup> Ni'cni biääd bejn ca'reni baii, ca'reni tla' lajd te guxheebreni relajdga lo Pabl. Dxejcti rinäreni relajdga lo rebejn ni racxhuu, luxh riacgajc rebejn ni racxhuuga, rigajcza rebendxab lastoo renani yu' bendxab.

<sup>13</sup> Dxejcti guyu' gaii ben Israel nani entis rcansaj, direni cuääz tejsi guejdx. Najcreni bejn ni rbää bendxab lastoo rebejn. Bejn redee xhigabcoob, naareni cuääreni bendxab xcuent laj Jesucrist, ni'cni räjpreni lo renani yu' bendxab nen lastooni:

—Xcuent xcälrmibee Jesucrist nani ruluii Pabl rnibeenu guiriilu nen lastoo bejnga —räjpreni.

<sup>14</sup> Guyu' gajdz xi'n Esceva, te ben Israel, nani sajru lo rebixhojz. Rujn redee dzuun rbääreni rebendxab nen lastoo rebejn. <sup>15</sup> Che gunii rexi'n Esceva loj bendxabga si'c, räjp bendxab ni yu' nen lastoo bejnga lojreni:

—Rumbeä Jesucrist, rumbeäza Pabl. ¿La'tu, chu la'tu? Dina gumbeä la'tu.

<sup>16</sup> Dxejcti bixa't niguii nani yu' bendxab nen lastooni yejc rexi'n Esceva, gudinduxhniireni, basälta'nireni, batiäjsni xhajbreni. Dxejcti baxunreni biriireni nen yu'ga, bidxälgujdxzareneni biräsyä' xhajbreni. <sup>17</sup> Dxejcti guiraa reben Éfeso, rexpejn Israel sigajc ben griegw, gucbee xho bennäj bendxab reniguiiga. Bidxebduxh rebejnğa, luxh huä'p xpala'n Jesucrist.

<sup>18</sup> Xhidalduxh reni huililajz xtidx Dios biääd lo rexpejn Jesucrist. Cacäjpreni guiraa recos xhet laadi nani rujnreni. <sup>19</sup> Xhidajl reni najc bidxaa biädnä reguijtz cadro caj yälnajn xten rebidxaa. Dxejcti base'creni reguijtzga nez loj guiraa rebejn. Bejnreni cuent lacti meel saj reguijtzga. Sajcreni tiubitzuu mil melpla't. <sup>20</sup> Xhidalduxh rebejn huililajz xtidx Dios. Batijp Dios lastoo rexpejnni. Gulä'p guiraareneni xpala'n Dios.

<sup>21</sup> Che guljz recosre, bejn Pabl xhigab chääni guedx Jerusalén, niluxh tedxgaani reguejdx ni re' nez Macedonia näjza Acaya, bejnzani xhigab, naani:

—Che ahua'a j Jerusalén, nanabza cha'a guedx Roma.

<sup>22</sup> Ni'cni baxhaļ Pabl Timoteu näjza Erasto, tio'p renani racnäjni, huijreni Macedonia, luxh laani bia'nni Asia.

### *Bidxebduxh reben Éfeso*

<sup>23</sup> Nen redxejga, guyuduxh rebejn yärsia' sa'csi baluii Pabl xtidx Dios. Direni nichaglazj care'ch xtidx Dios. <sup>24</sup> Te dade' ni laa Demetrio runchee ni'ch pla't xten banäjb ni laa Diana, ni najc banäjb xten guejdxga. Demetrio näjza guiraa replateer ni rujn ni'ch xten Diana runduxhreni gaan meel ro'c. <sup>25</sup> Gurejdx Demetrio guiraa replateer ni rujn reni'chga, räjpni lojreni:

—Colcuadiajg, la'tu resa'ä: najntu rbäänu melro lo dzuun ni riennu. <sup>26</sup> Abahuütu niguiire ni laa Pabl. Abiejnza diajgtu xtiidxni. Räjpni lo rebejn: “Xhet diosdi najc reni racchee con naa bejn.” Guedx Éfeso näjza guideb nación Asia cagusiejchni lajz bejn, xhidalduxh bejn salilajz xtiidxni. <sup>27</sup> Ni'c ries nitloj xtzuunnu palga diru bejn sii ni'ch ni riencheenu. Luxh rieszä diru bejn jäädgajn Diana nen xquidoro Diana. Naj reben Asia, näjza guiraa reben guedxliuj randuxh Diana, banäjb ni sajru, niluxh palga diru rebejn gan Diana, pet sinitlojni —räjpni.

<sup>28</sup> Che biejn diajg replateer xtiidxni, bidxe'chduxhreni, guredxa'reni räjpreni:

—Sacduxh Diana xtios reben Éfeso.

<sup>29</sup> Guideb guejdx guyu' bieyj. Dxejcti ruxunreni bidxagsa'reni lo yuj cadro rajc rexjuntreni. Gunaazreni Gayo näjza Aristarco, ben Macedonia ni rinajl Pabl. <sup>30</sup> Rlajz Pabl niu'ni cadro bidxagsa' rebejn, niluxh di rexpejn Jesucrist nusaanni. <sup>31</sup> Gaii guxhtis ni rnibee Asia, sa'csi najcreni xamijgw Pabl, baxhaļreni diidx lo Pabl, räjpreni:

—Na'c chäälu cadro nadxagsa' rebejnğa —räjpreni.

<sup>32</sup> Lo rebejn ni re'ga, yu' reni rbedxa' tej diidx, sgaiireni rbedxa' garenca diidx. Te bieiduxh cayajc. Xhidalduxh rebejnğa nicla gan xhicuent bidxagsa'reni. <sup>33</sup> Dxejcti gulää rexpejn Israel te dade' ni laa Alejandro lo reben xhidaalga, te guiniini lo rebejn. Dxejcti basääbni naani lo rebejn te gac dxi rebejn. Rlajz Alejandro guiniini xcuent rexpejn Israel loj guiraa rebejn, te di guidxe'chreni lo rexpejn Israel. <sup>34</sup> Niluxh che gucbee rebejn najc Alejandro ben Israel, tiop or guredxaduxhreni, räjpreni:

—Sacduhx Diana xtios reben Éfeso.

<sup>35</sup> Dxejcti biäd secretaar xten guejdxga lo rebejn, gunibeeni guc dxi rebejn, te räjpni lojreni:

—Colcuadijg, la'tu ben Éfeso, caguidxäjil te ben guedxliuj ni di gacbee reben guedx Éfeso rajnpac Diana, nani xhaguibaali bitejb lo guedxliuj. <sup>36</sup> Sa'csi rediidxre najc guli, nungäjil cuedxitu, na'c guntu recos guijdxre. <sup>37</sup> ¿Xhicuent gunaazu renigui ni siädnaü tee? Direni gac gubaan ni rbajt recos guidoo, dizareni niniyaj xtiosnu. <sup>38</sup> Naj palga rlanj Demetrio näjza rebejn ni najc plateer chale'c quej, naxhal jusgaad, suga' reguxhtis. Ro'c suchale'creni xquejreni. <sup>39</sup> Niluxh palga yu' xhi stee, nanab gac te junt xte rebenguejdx si'c ni caj lo xleiinu. <sup>40</sup> Ries jii xquejnu lo gubier, naareni bidojpu te guidxagdilu gubier. ¿Dxejca'? ¿Xhi jie'tznu xcuent ni bidxagsa'nu ree?

Dxejcti räjpni:

—Agojl, coljiujejz.

<sup>41</sup> Che gunii secretaar si'c, bire'ch rebejn, biunejzreni ro'c.

## 20

*Huihuisac Pabl rexpejn Jesucrist ni yu' Macedonia näjza Grecia*

<sup>1</sup> Che bire'ch rebejn, gurejdx Pabl rexpejn Jesucrist biäd lojni, te baliidxnireni. Badeedni xtixtios lojreni. Sä'tini nez reguedx Macedonia. <sup>2</sup> Guiraa reguejdxga cadro gudejdni, baliidxni rexpejn Jesucrist, basule'runi xtidx Dios lojreni. Dxejcti sääni reguedx Grecia. <sup>3</sup> Che bidzujni Grecia, bia'nni ro'c chon bäii. Dxejcti niu' Pabl neñ barcw te nijni reguejdx Siria. Niluxh che biejn diajgni cabäz-xhiga'tz rexpejn Israelni te guiniaazrenini, gunaazni nezuyj, gubi'ni nez Macedonia. <sup>4</sup> Huinäni Sópater, xi'n Prios, te ben guedx Barea; näj Aristarco näjza Secondo, ben guedx Tesalónica; näj Gayo, ben guedx Derbe; näj Timoteu; näj Tíquico näjza Tróximo, ben Asia. <sup>5</sup> Guiraa redee gunijd loonu, huiläjzreni nuure guedx Troas. <sup>6</sup> Guedx Filipos bidxaag Pabl narä, Lucas. Ro'c gudejdnu lanij xten rexpejn Israel che rajwreni yäxtiil ni di saguij. Biriitinu guejdxga, biu'nu neñ barcw te sonnu nez guedx Troas. Gaii dxej gusaanu neñ barcw, dxejcti bidzujnu guedx Troas. Ro'c bia'nnu gajdz dxej.

*Baluu Pabl xhidalduxh xtidx Dios lo rexpejn Jesucrist guedx Troas*

<sup>7</sup> Che gojl dumingw, primer dxej xman, bidxagsa'nu te bidaunu yäxtiil si'c gudaunäj Jesucrist rexpejnpacni galoo che gajdni guet. Abejn Pabl xhigab guira yääl giriini guejdxga. Che biu' guxhijj, gusloj caguseduxh Pabl xtidx Dios, huinuuni si'cti garolyäälli. <sup>8</sup> Yu' cadro bidxagsa'nu najc jiaa yejc stiop yu'. Xhidalduxh balgandee cagasanij ro'c. <sup>9</sup> Sobga' te bi'n ni laa Eutico ro' te bentaan. Lañ ni caguseduxh Pabl xtidx Dios lo rebejn, gunaaz bacal bi'nga, gudiejsni, bitejbni lo yuj desde yu' ni riojn pis. Che huiläsrenini, agujtni. <sup>10</sup> Dxejcti biäj Pabl lo yuj cadro bitejb bi'nga. Bazuxhijb Pabl cadro naga' bi'nga, gudääznini. Dxejcti räjp Pabl lojreni:

—Na'c chutu yärsia'. Agubansacni. Baspajñ Diosni.

<sup>11</sup> Dxejcti huäpsac Pabl lo yujiaaga. Ro'c bidaunu yäxtiil si'c gudaunäj Jesucrist rexpejnpacni galoo che gajdni guet. Gunii Pabl lojreni xchejru, che bianijli lo guedxliuj. Dxejcti biunejzni. <sup>12</sup> Xhetliiduru rajcädi bi'nga nani gubansac, nani guläs Pabl. Bibalazduxhrenei, huisa'nrenini rolizjni.

*Biu'nu neñ barcw, bionnu guedx Mileto*

<sup>13</sup> Gunijdnu lo Pabl. Biu'nu neñ barcw, sonnu guedx Asón, te ro'c guidxaagnu Pabl, sa'csi abejn Pabl xhigab ni'ni jini guejdxga, ro'cli jiu'ni neñ barcw. <sup>14</sup> Che bidxaag Pabl nuunu guedx Asón, biu'ni neñ barcw, sonnu lo nisdoo te bidzujnu guedx Mitilene. <sup>15</sup> Neñ barcw biriinu ro'c. Che bara yääl, gudejdnu yuj ni re' lo nisdoo ni laa Quío. Che bara stee yääl, bidzujnu guedx Samos. Guedx Trogilio basilaaznu. Che bara stee yääl, bidzujnu guedx Mileto. <sup>16</sup> Di rlanj Pabl jiu'nu guedx Éfeso, diza rlanjni chunu Asia xchej, sa'csi riojb lajzni guidzujnu guedx Jerusalén te ro'c tedni redxe lanij ni laa Pentecoste.

*Guedx Mileto guninäj Pabl reni rnibee xpejn Jesucrist ni yu' guedx Éfeso*

<sup>17</sup> Che guyu'nu guedx Mileto, baxhal Pabl diidx lo rexpejn Jesucrist ni yu' guedx Éfeso, gurejdxni reni rnibee. <sup>18</sup> Che bidzujnreni lo guejdxga, räjp Pabl lojreni:

—Lagajc la'tu najntu xho nabanä nez lojtu, dxejli ni bidzunä, nabannää Dios. <sup>19</sup> La'tu najntu xho runä xtuunu Jesucrist guixe-guixee, guideb xcälñadipä. Dina niliä'p ä xpala'nä. Najntu xho ronä che di bejn chalilajz xtidx Jesucrist. Che rlanj rexpejn Israel nugu't narä, gudedä trabajwduxh. <sup>20</sup> La'tu najntu xho baluiä lojtu guiralii rextidx Dios ni najc huen par la'tu. Che nadxagsa'tu baluiä xtidx Dios lojtu, näjza rolizj cade teju huiluiä xtidx Dios lojtu. <sup>21</sup> Basule'ä xtidx Dios lo rexpejn Israel näjza lo rebenzijñ ni di gac xpejn Israel. Räpä lojreni nanab gusiechlazjreni, gusa'nreni xtojñreni, nanab chalilajzreni xtidx Jesucrist te gudzucaj



Dios xtojłreni. <sup>22</sup> Naj cadedä te laad guejdx xtentu, sia'ä guejdx Jerusalén, sa'csi caguxhal Sprit Dxan xten Dios narä cha'ä guejdx Jerusalén. Dina ganä xhi sacä ro'c. <sup>23</sup> Niluxh nanä cade te reguejdx cadro rdedä rnüi Sprit Dxan xten Dios loä sidedä trabajwduxh, siaüä nen latzguuib guejdx Jerusalén. <sup>24</sup> Niluxh dina guidxebä, dizana chanälazduxhä xcäl'nabanätis, te guluxä dzuun nani baniidx Jesucrist gunä. Lo dzuun ni baniidx Jesucrist nanab chaye'tzä lo guiraa rebejn sibicaj xtojłreni palga chalilajzreni xtidx Dios xcuent Jesucrist —räjp Pabl.

<sup>25</sup> Räjpzani:

—Naj agucbeä dirutu fisac loä, la'tu nani basule'ä xcäl'mibee Dios lojtu. <sup>26</sup> Rniliäpac lojtu, xhet dojldi rapä palga yu' te bejn ni di chalilajz xtidx Dios, ni di Dios gudzucaj xtojłni. <sup>27</sup> Xhetliidi biäädxdä loj rextidx Dios ni basule'ä lojtu. Dina nucua'tzä nicla tej xtiidxni xcuent xho rłajz Dios guibanu. <sup>28</sup> Colga'p lagajc la'tu si'c ra'p baxhtoor xiił, si'c colga'p guiraa rebejn nani rililajz xtidx Dios sa'csi Sprit Dxan xten Dios abaniidx dzuunga guntu, ni'cni abixe' xtiejn Jesucrist lo crujz te gac gudzucaj Dios xtojłreni. <sup>29</sup> Anancheä che rutdiru narä, siädä bejn nani rłajz chalilajztu ste'ca diidx, na'c chalilajztu niclaza jiutu rebejnga. Rusgueetisreni la'tu. Sutie'chreni la'tu lo sa'tu si'c rutie'ch cuyo't rexiil. <sup>30</sup> Su'za lagajc sa'tu ni guinii didx-xhii lojtu te gunreni gusaan rexpejn Jesucrist xtidx Dios, te chanajłreni redee ni rusguee. <sup>31</sup> Colhüii te di gusgueereni la'tu. Di jiäl-lajztu choñ ijz, dxej yääl basule'ä xtidx Dios, ronäli balidxätu, sa'csi sanälazätu.

<sup>32</sup> Räjpzä Pabl:

—Asia'are, rusa'nätu ladzñaä Dios, gacnäj Dios la'tu. Sutijp xtidx Dios lastootu, te xca'tu guiraa ni bia'n diidx guniidx Dios lojtu, näjza loj guiraa ni abejn Dios bensa'c, nani najc xpejłni. <sup>33</sup> Dina niniabä meel, niclaza xhabä che baluiä xtidx Jesucrist lojtu. <sup>34</sup> Anajntu lagajc narä benä dzuun con ñaä te bio' xhi gudaunää rexamigwä. <sup>35</sup> Si'c benä te filojtu xho guntu dzuun te gacnäjtu sa'tu ni xhet rajpdi, te guinaj lajztu xtidx Jesucrist che najni: “Huenru guideednu lo bejn quela xcaxlia'nu xhi cos” —räjłni.

<sup>36</sup> Che gulujx gunii Pabl rediidxga, bazuxhibnäjni rebejnga, guredx-gunabni lo Dios. <sup>37</sup> Dxejcti ronduxh guiraa reni gudäözreni guejn Pabl, bachagro'renini. <sup>38</sup> Guc-huinduxh lajzreni dxejc sa'csi räjp Pabl dirureni fisac lojni. Dxejcti huisa'nrenini lo barcw.

## 21

### *Huij Pabl guejdx Jerusalén*

<sup>1</sup> Che basa'ntinu rexpejn Jesucrist ro'c, biu'nu nen barcw, sionnu te lii nejz lo yuj ni laa Cos, ni tre' lo nisdoo. Che bara yääl, bidzunu lo xyuj Rodas ni tre'za lo nisdoo. Ro'c biriinu sionnu nen barcw nez guejdx Pátara. <sup>2</sup> Che bidzunu ro' guejdxga, bidxälnu te barcw ni sää nez reguedx Fenicia. Dxejc biu'nu nen barcwga te chonnu ro'c. <sup>3</sup> Bahuiinu lo yuj Chipre ni tre' lo nisdoo, xladbäjcwnu tre' yujga, bideednu te laad. Siontinu nez Siria, ro'c bidzunu guejdx Tiro cadro gule'creni cargw ni nuu barcwga. <sup>4</sup> Ro'c bidxälnu rexpejn Jesucrist. Biannäreni gajdz dxej. Baluii Sprit Dxan xten Diosreni te guniireni lo Pabl, räjłreni:

—Na'c chäälü guejdx Jerusalén.

<sup>5</sup> Che baza' gajdz dxej, biunejznu guejdxga. Dxejc guzaj reniguii, regunaa, näjza rexi'nreni biriinu guejdxga. Ro' nisdoo bazuxhibnu te guredx-gunabnu lo Dios.

<sup>6</sup> Che abazadiidxnu sa'nu, nuure biu'nu nen barcw, biädla laareni gubisacreni rolizreni.

<sup>7</sup> Biriitinu guejdx Tiro. Che bidzunu ro' guejdx Tolemaida, gulujx xpiajnu biäjtnu nen barcw. Dxejc biohuiinu rexpejn Jesucrist ni yu' guejdxga, biannäreni tejtis yääl. <sup>8</sup> Che bara yääl, biriinu guejdxga, sonnu guejdx Cesarea. Che bidzunu guejdxga, bionnu roliz Felipe, te dade' ni rusule' xtidx Dios lo bejn. Felipe guj te j lo gajdz niguii nani gudis xhi gudajw rexpen Jesucrist nani xhet rajpdi guejdx Jerusalén. Rolizni huijja'nnu. <sup>9</sup> Yu' tajp xindxapxteb Felipe. Dios badeed diidx guniireni lo bejn. <sup>10</sup> Xhidajł dxej guläjznu roliz Felipe. Lał ni dxunnu ro'c, bidzujł te niguii ni laa Agabo, biriini nez Judea. Ruzanij Dios xcäriejłni te guiniini xtidx Dios.

<sup>11</sup> Che bidzujłni loonu, cua' Agabo xsindoor Pabl, baliibni lagajc reni'ni näjza reñaani, najni loonu:

—Anaj Sprit Dxan xten Dios: “Scree suliiib rexpejn Israel ni yu' guejdx Jerusalén niguii ni najc xteni sindoorre te gutedrenini ladzñaä rebenzijt.”

<sup>12</sup> Che biejn diaagnu rediidxga, nuure näjza reben ro'c, gunabduxhnu lo Pabl na'c chääni guejdx Jerusalén. <sup>13</sup> Dxejc naj Pabl loonu:

—¿Xhicuent roontu? ¿Xhicuent runhuiintu lazä? Xhet najcdi jiäüä nen latzguuib, xhet najcdi palga nungälä guetä guejdx Jerusalén xcuent Jesucrist —räjp Pabl.

<sup>14</sup> Che naaddi Pabl gusiechlajzni, xhetru guniidinu lojni. Räjptisnu lojni:

—Sugac nani rłajztis Dios.

<sup>15</sup> Che guedej redxejga, bilucheenu rehxixtenu, biriinu guejdxga, sontinu guedx Jerusalén. <sup>16</sup> Gaii rexpejn Jesucrist ni najc beñ Cesarea huisa'n nuure guedx Jerusalén. Ro'c huinäreni nuure rolizj te dade' ni laa Mnasón, beñ Chipre, yuj ni tre' lo nisdo. Laani galooli huililajzni xtidx Dios. Huijja'nnu rolizjni, ro'c gulääznu.

*Huihui Pabl Jacobo*

<sup>17</sup> Che bidzunnu guedx Jerusalén, bibalazdux rexpejn Jesucrist sa'csi siopnu ro'c. <sup>18</sup> Che bara yääl huinānu Pabl lo Jacobo näjza lo renani rnibee guidoo xten rexpejn Jesucrist. <sup>19</sup> Dxejg gudääz Pablreni, bijni diidx xcuent tebgaj redzuun nani badeed Dios bejnni che guyunājni rebenzijt nani di gac xpejn Israel, te biejn diajgreni xtidx Dios. <sup>20</sup> Che biejn diajgreni xtidx Pabl, gulä'preni xpala'n Dios, räjpzarenini lo Pabl:

—Guejblu, sa'nu, anajnu lacti xhidalduxh xpejn Israel yu' nani rililajz xtidx Jesucrist luxh rapdaduxhrene lei xten toMoisés. <sup>21</sup> Abiejn diajg rebejnre xcuentlu. Abiejn diajgreni garenca ruluiilu guiraa rexpejn Israel nani rbäjz neñ reguejdx xten rebenzijt, rulijdxlureni na'c gusälreni bee rexi'nreni, na'cza chazanājrrureni rexcostumbrnu. <sup>22</sup> ¿Xhini'c jiennu? Siejn diajgreni abidzujnu ree, dxejc suchagsa'reni te jiaädreni lojlu. <sup>23</sup> Naj gunlu nani guiniinu lojlu. Yu' tajp resa'nu reni basa'nreni diidx lo Dios. <sup>24</sup> Huinäreni, näjza luj bejn si'ctis gunreni si'c ni caj lo lei xten toMoisés, te gaclu naya nez lo Dios. Luj quixlu guiraa ni banijtreni, te che abasa'tu guiraa ni nanab gac sajc guigaj yejctu si'c te seen te gachee guiraa rebejn abasoobtu lei. Dxejcti gan guiraa rebejn didx-xhii najc rediidx ni biejn diajgreni xcuentlu. Te gacheereni laaca rusoooblu xleii toMoisés. <sup>25</sup> Biädla rebenzijt nani huililajz xtidx Jesucrist, xhet najc di, sa'csi abacuaanu lojreni, rie'tznu lojreni: na'c gautu recos nani gule'c bejn si'c gojn loj banāj, na'c gautu rejn, niclaza bääł nani gurerejn, na'c guesnäjtu nani di gac chäältu.

*Gunaaz rexpejn Israel Pabl*

<sup>26</sup> Che bara yääl, huinā Pabl guidap niguiiga, bejnreni si'c caj lo xleii toMoisés, biu'reni neñ xquidoo rexpejn Israel te huiye'tzreni lo bixhojz neñ guidoo xhi dxej jiaädnä tehgarenini te man te ju't rebixhojz remanga lo Dios.

<sup>27</sup> Si'c nanab gunreni gajdz dxej. Che ameer guiza' redxejga, bahuii rexpejn Israel ni siääd Asia lo Pabl neñ guidoroga. Gunaazreni Pabl, dxejcti gusloj cayujnreni biejn, <sup>28</sup> guredxa'reni räjpreni:

—¡Coltaa xpejn Israel! ¡Coltaa te gacnäjtu nuure! ¡Bahuilaa! Niguiire najc nani rniyaj rexpejn Israel cadrotis rijni. Rulijdxni bejn te di chazanājrrureni xleii toMoisés, riye'tzni lo bejn xhet sajcdi xquidoronure. Colhuilaa xho siädnäni ree beñ griegw, beñzijt ni di gac xpejn Israel, te gunduudxni xquidoronu —räjpreni.

<sup>29</sup> Si'c caniiireni sa'csi te huält bahuiireni sanā Pabl Trófirmos lo nezyuj. Trófirmos najc te beñzijt ni siääd guedx Efeso. Naj cayujnreni xhigab laa niguiiga ni siädnä Pabl neñ xquidoro rexpejn Israel.

<sup>30</sup> Guideb guejdxga guyu' yärsia', bire' beñguixhuj, bixa'treni yejcti Pabl, gunaazrenini, gudobxhaxhrene Pabl, gulägajcnenini neñ guidoroga. Biägajc repuertro xten guidoro. <sup>31</sup> Lał ni cayujnreni xhigab ju'trenini, yu' chu huiye'tz lo nani rnibee resoldaad ni caya'p guejdxga, räjpreni:

—Cayajc te bieiduxh neñ guejdxre.

<sup>32</sup> Guredxgajc comandant resoldaad näjza gaii capitán, ruxunreni bidzujnreni cadre tre' rebejn. Che bahuii rebejn lo comandant näjza resoldaad, guläjz caguijnreni Pabl. <sup>33</sup> Dxejcti gubig comandant lo Pabl, gunibeeni baliib resoldaad naa Pabl con tiop cadenguiib. Dxejcti gunabdiidxni lo Pabl, räjpni:

—¿Chu luj? ¿Xhini'c bejnlu?

<sup>34</sup> Lo reben xhidaalga yu' rexpejn Israel ni guredxa' tej diidx, yu'za reni guredxa' ste'ca diidx. Di comandant niujn gan niacbeeni xhicuent cayajc biejn sa'csi cabedxa' guiraa rebejn. Dxejc gunibeeni chanā resoldaad Pabl cadre rbäjzreni. <sup>35</sup> Che bidzunāj resoldaad Pabl ro' scaleer ni caj ro'c, biireni Pabl te bejnreni gan biunājreni Pabl, sa'csi nialazduxh rebejn rlanjreni nugu'treni Pabl.

<sup>36</sup> Siädnañl guiraa rebejn Pabl, rbedxa'reni:

—Colgugu'tni.

—Che agojł jiu' Pabl neñ yuro xten resoldaad, räjpni lo comandant con diidx griegw:

—Rlazā guiniā tiop diidx lo guejblu.

Räjp comandant lo Pabl:

—¡An rniilu xtidxsaä! <sup>38</sup> An dilu gac niguii ni siääd naciōñ Egipto, nani gudilñäj gubier, nani huinā lo reyubijdz tajp mil niguii nani rugu't bejn.

<sup>39</sup> Dxejc räjp Pabl lojni:

—Narä nacä te beŋ Israel, te beŋ Tarso xten Cilicia. Sacduxh guejdxga lo reguedx Cilicia. Canabä gun guejblu te hueen, gusaan guejblu guiniä lo rebejn.

<sup>40</sup> Dxejc cuäjb comandant guinii Pabl lo rebejn. Lal ni suga'ni lo scaleer basäab Pabl naani lo rebejn te gucdxireni. Che aguredxi rebejn, gusloj Pabl canii lojreni didxsaj hebreo, räjpni:

## 22

<sup>1</sup> —Guejbtu bengool, guejbtu resa'ä, näjza la'tu dade'. Gucua diajgtu rextidä —räjpni.

<sup>2</sup> Che biejn diajgreti caniini didx hebreo, dxidujru guzuj rebejn. Räjp Pabl lojreni:

<sup>3</sup> —Narä nacä te xpejn Israel. Guedx Tarso xten Cilicia golä. Reepac gulaä. Lo Gamaliel bisiedä guijt. Baluisa'cni narä guiragajc releii xten retoxtadgoldoonu. Guideb xtipä basobä ni gunibee Dios. Gucä si'cpac ni najctu naj. <sup>4</sup> Dxejcti bidxechduxhä loj renani huililaj xtidx Jesucrist, bagu'tazareni. Balibä xhidajl bejn, niguii näjza gunaa, con cadenguuib. Basäuäreni neŋ latzguuib. <sup>5</sup> Bixhojz ni sajru näjza guiraa rebengool ni sajru neŋ xquidootu, saj guinii xhini'c benä. Laareni baniidxreni guijt loä. Ni'c huinää lo rexpejn Israel ni yu' guedx Damasco, cadre hua'a te niniazä rebejn nani huililaj xtidx Jesucrist. Benä xhigab jädnääreni guedx Jerusalén te jäüreni neŋ latzguuib, te gusacsireni rebejn ga.

*Gunii Pabl xho huililajzni xtidx Jesucrist  
(Hch. 9:1-19; 26:12-18)*

<sup>6</sup> Räjpzani:

—Dxejc hua'a guedx Damasco. Läidxejti ameer guidzunä guejdxga, chela bazanij te balro guideb gabi narä. Xhaguibaali siääd bajlga. <sup>7</sup> Biabrloä lo yuj, dxejc biejn diagä te se' ni canii loä, najni: “Saulo, Saulo, xhicient rusacsilu narä näjza rexpenä?” najni. <sup>8</sup> Dxejcti räpä lojni: “xChuluj, Dad?” Najni loä: “Narä nacä Jesucrist ni siääd Nasare't, nani cagusacsiduxhlu.” <sup>9</sup> Rebejn ni sanää bahuioloj bajlga, bidxebreni, niluxh di diajgreti niejn xse' nani gunii loä. <sup>10</sup> Räpä lojni: “Dad, xhini'c gunä?” Dxejcti najni loä: “Huistie, huij guedx Damasco. Ro'c sinii te dade' lojlu guiraa ni guinibea gunlu.” <sup>11</sup> Bastujxh bajlga loä, diru loä nien, ni'cni gunaaz resa'ä naä, sontinu guedx Damasco.

<sup>12</sup> Räjp Pabl:

—Guejdxga guläz te niguii ni laa Ananias. Rusoobni guiraa releii xten toMoisés. Guiraa rexpejn Israel rni nadalajz lo dade'ga. Biääd Ananias loä. <sup>13</sup> Cuä'ä guzujni najni loä: “iSaulo, betzä, bahuisac!” Lagajc dxejc biajc loä, bahuiä lojni. <sup>14</sup> Naj Ananias loä: “Xtios retoxtadgoldoonu agulelu. Gule Dios luj te jiejn diajglu rediidx ni rlanjzi gunlu, te filojlu Jesucrist, Xindxan Dios, te jiejnza diajglu rextiidxpac Jesucrist. <sup>15</sup> Loj guiraa bejn susule'lu guiraa ni bahuiilu näjza nani biejn diajglu. <sup>16</sup> xHicient sojbtislu ro'c? Basquejn, huistie te tiobnisl. Huililaj xtidx Jesucrist, gurejdx lo Dios te gudzucajni rextojllu.”

*Gunii Pabl xhicient baluini xtidx Dios lo rebenzjz*

<sup>17</sup> Che gubi'ä guedx Jerusalén, biu'ä neŋ guidoro xten rexpejn Israel te guredx-gunabä lo Dios. Lal ni cabedx-canabä lo Dios, astoo gunixcalä, <sup>18</sup> dxejc bahuiä lo Jesucrist. Najni loä: “Basquejn, birii guedx Jerusalén sa'csi di rebejn chalilajz xtidxä ni gusule'lu lojreni.” <sup>19</sup> Narä räpäza lojni: “Dad, anajnreni xho biu'ä guiraa reguidoo, gunazä guiraa rebejn nani huililaj xtiidxlu, gudinduxhäre, basäuäreni neŋ latzguuib. <sup>20</sup> Che bacuaareni guij yejc Esteban nani gunii xtiidxlu, ro'c guzuä, cuäbä bejnreni si'c. Go'pä xhajb xten renani bagu't Esteban laŋ ni bacuaareni guij.” <sup>21</sup> Dxejcti naj Jesucrist loä: “Huij. Suxhalä luj zitduxh. Chäällo lo guiraa rebenzjz ni di gac xpejn Israel.”

*Bia'n Pabl neŋ rolizro xten resoldaad*

<sup>22</sup> Bacuadiajg guiraa rebejn laŋ ni gunii Pabl rediidxga, dxejcti guredxa'reni, räjpreni:

—Colgu't niguiiga. Di nunyäj guibajnrni.

<sup>23</sup> Sanuutis cabedxa'reni. Gulääreni xcamangwreni, cacuaazareni yuyol jiaa. <sup>24</sup> Dxejcti gunibee comandant lo resoldaad, räjpni:

—Colchanä Pabl neŋ yuro xtenu. Ro'c colquuin Pabl te guiniini didxgulii, te gacbeenu xhicient rbedxaduxh rebejn lojni.

<sup>25</sup> Sanätireni Pabl. Entis baliibreni ni', naa Pabl con duguijd te niguijnrenini che gunabdiidx Pabl lo capitán, räjpni:

—xLa rajc rguijntu te beŋ roman che gajdtu gacbee xhi dojl bejnini, ä? Et si'cti caj lo xleilu.

<sup>26</sup> Che biejn diajg capitán xtiidxni, bidxebjni, huijni lo comandant, räjpni lojni:

—Colnati xhi gunnäjlu dade're, sa'csi najcni beŋ roman.

<sup>27</sup> Biädguxuŋ comandant lo Pabl, räjpni:

—xLa gulii najclu beŋ roman, ä?

Räjp Pabl lojni:

—Guliini.

<sup>28</sup> Dxejcti räjp comandant:

—Narä badedä xhiroob meel te nacä beṇ roman.

Dxejcti räjp Pabl lojni:

—Narä che gołäli nacä beṇ roman.

<sup>29</sup> Che biejn diajg resoldaad nani niguijn Pabl si'c, baslağajcreni reduguijd ni naliib ni', naani. Che biejnza diajg comandant najc Pabl beṇ roman, bidxejbni sa'csi gunibeeni biliib Pabl.

*Basule' Pabl diidx xcuentni lo rebixhojz nani rnibee rexpejn Israel*

<sup>30</sup> Che bara yääl, rlağz comandant gacbeeni xhicuent rlağz rexpejn Israel ju't Pabl. Ni'c gunibeeni jiaäd rebixhojz ni sajcru näjza reguxhtis xten guidoro. Dxejcti biädñani Pabl, bazujnini nez loğ guiraa rebejn ni bire' ro'c.

## 23

<sup>1</sup> Rdxelodzu'tz Pabl lo rebejn ni tre' ro'c laḷ ni räjpni lojreni:

—Narä gusule'ä tiop diidx lo guejbtu, beṇ Israel, sa'ä. Guideb ni nabaṇä ruzobä xtidx Dios. Di lastoä guidxejb nez lo Dios —räjp Pabl.

<sup>2</sup> Che biejn diajg Ananías, bixhojz ni sajcru, xtidx Pabl, bidxechduxhni, gunibeeni lo renani suga' gajxh lo Pabl ca'preni ro' Pabl.

<sup>3</sup> Räjp Pabl lo Ananías:

—Sigajcza ca'p Dios ro'lu, benguijdx. Ro'c sobga'lu te gunlu yälguxhtis si'cni caj lo lei. ¿Xhicuent rujnlu nani rnii leiiga di nungäjḷ gun bejn? ¿Xhicuent gunibeelu guda'preni ro'ä? —räjp Pabl.

<sup>4</sup> Reni suga' cuä' Pabl räjp lo Pabl:

—¿La dilu gacbee laa bixhojz ni sajcru xten Dios? Na'c guiniyajluni.

<sup>5</sup> Dxejcti räjp Pabl lojreni:

—Rexamigwä, dina niacbeä caniä lo bixhojz ni sajcru, sa'csi nanä agunii Dios: “Na'c guiniyajlu reni rnibee xpejnlu.” Si'c caj lo guijtzi ni bacuaa reni gunii xtidx Dios.

<sup>6</sup> Gucbee Pabl tiop cuaa najc reni tre' ro'c. Yu' reni najc beṇ saducee, yu'za reni najc beṇ farisee. Dxejc guredxa' Pabl räjpni lojreni:

—Sa'ä, narä nacä te beṇ farisee, xi'nza te beṇ farisee narä. Rililazä sibansac bejn lo rebengut, ni'c cabe'creni xquejä ree.

<sup>7</sup> Entis guniini si'c lojreni, chela gusloj caniireni lo sa'reni. Tiop cuaa gujcreni, gala' refarisee, sgala' resaducee. <sup>8</sup> Di lağz resaducee chalii sibansac rebengut, dizareni chalilajz yu' rexangl Dios, dizareni chalilajz yu' aim xten bejn. Niluxh refarisee rililajz guiraa rediidxga. <sup>9</sup> Guyu' te bieiro. Dxejcti huisulii gaii farisee nani najn lei, gusloj caniduxhrenei, räjpreni:

—Di niguiire gac benguijdx. Palga gunii te angl xten Dios o te togool lojni, alga Dios tiḷnäjnu, dxejc sidxechñäj Diosnu.

<sup>10</sup> Che gusloj cabedxaduxhrenei lo sa'reni, bidxejb comandant, andi ju'treni Pabl, caxha'treni vejcti. Dxejcti gunibeeni biäjt resoldaad cadre suga' Pabl. Guideb xtijpreni gulääreni Pabl galäii rebejnğa huinäsaçreni neṇ yuro xtenreni.

<sup>11</sup> Che biu' guxhijn, baluiloj Jesucrist lo Pabl, guzujni cuä'ni, räjpni lojni:

—Batijp lağzlu, na'c guidxejbḷu, Pabl. Si'cni basule'lu xtidxä guedx Jerusalén, sigajcza nanab gusule'lu xtidxä guedx Roma.

*Rexpejn Israel bejn xhigab nugu'treni Pabl*

<sup>12</sup> Che bara yääl, bachagsa' gaii xpejn Israel, bejnreni xhigab nugu'treni Pabl. Räjpreni lo sa'reni:

—Na'c guidaunu, na'cza guidaunu nis che guigu'tlinu Pabl —räjpreni.

<sup>13</sup> Si'cti tiuu niguii bia'n diidxga. <sup>14</sup> Bidzujnreni lo rebixhojz näjza rebengool, räjpreni lojreni:

—Abia'nnu diidx, xhet guidaudinu, xhetza guidaudinu palga dinu guigutxga Pabl —räjpreni—. <sup>15</sup> Naj la'tu näjza guiraa rebengool ni rnibee rexpejn Israel, colguxhaḷ diidx lo comandant te guixee jiaädñani Pabl lojtu. Colyejn si'c ni rlağztu jiejnru diajgtu diidx xcuent Pabl. Che jiaädñä comandant Pabl ree, nuure sugu'tnuini lo nezyuj che gajdni guidzujn ree —räjp reniguiğa.

<sup>16</sup> Niluxh biejn diajg xi'n bisiajn Pabl cabäzchiga'tz reniguiğa te ju'treni Pabl, huijni royuro xten resoldaad. Che bidzujnni, biu'ni räjpni lo Pabl rediidx ni biejn diajgni. <sup>17</sup> Dxejcti gurejdx Pabl te capitán, räjpni lojni:

—Huinälaa bi'nre lo comandant te gäbni te diidx lojni.

<sup>18</sup> Huinäti capitán bi'nga lo comandant, räjpni lo comandant:

—Pabl, nani niäu neñ yuro xten resoldaad, gunab loä jiadnälää bi'nre lo guebju te guiniini te diidx lo guebju —räjpmi.

<sup>19</sup> Dxejc gunaaz comandant ñaa bi'nre, huinänini te laad cadro rut jiejni diajgni xti-idxreni, dxejc räjpni lojni:

—¿Xhini'c rlanjlu guiniilu loä?

<sup>20</sup> Dxejc bazejcmi diidx, räjpni loj comandant:

—Abia'n te cuaa xpejn Israel diidx siniabreni lo guebju jiadnä guebju Pabl ro jusgaad guixee. Sujnsireni si'c ni rlanj jiejnru diajgremi diidx xcuent Pabl. <sup>21</sup> Na'c chalilaj guebju xtiidxreni. Tiu niguii sibäzxhiga'tz cuä' nezyuj te ju'treni Pabl. Abia'nreni diidx direni gau, dizareni yä palga direni jutxgaa Pabl. Naj cabäjtisireni guxhal guebju diidx sinä guebju Pabl ro jusgaad.

<sup>22</sup> Che biejn diajg comandant diidxga, basaanni sii bi'nga rolizjni, räpxgaani lojni:

—Rut loj dipac gäblu guniilu diidxre loä.

*Huij Pabl lo Pels ni najc gubernadoor*

<sup>23</sup> Dxejcti gurejdx comandant tiop capitán, räjpni lojreni:

—Colgutojp tiop gayuu soldaad, chää guedx Cesarea näjza gayonbitzoo soldaad ni bijb cabaii, näjza tiop gayuu soldaad ni ca' spaad. Rcagaa guxhijn guiriireni ree. <sup>24</sup> Colquuil tiop cabaii cuib Pabl te xhet gacdi Pabl cheni chanätuni lo gubernadoor Pels —räjpmi.

<sup>25</sup> Dxejcti bejn comandant te guijt chanäreni lo gubernadoor.

<sup>26</sup> Loj guijtza rmi scree: “Gubernador Pels, nani sacduhx. Narä, Claudio Lisias, ruxhalä xtiixtis lo guebju. <sup>27</sup> Rediidxre rucuaä lo guebju. Gunaaz rexpejn Israel niguiire, luxh paru dina nidzunga'cä con resoldaad, nugu'trenini. Che gucbeä najcni beñ roman, guläänuni ro'c. <sup>28</sup> Rlazä niacbeä xhi quej rbe'creni, ni'c huanääni lo junt xten rexpejn Israel ni rnibee guidoro. <sup>29</sup> Dxejc gucbeä requej ni rbe'creni najc ganax xcuent leii xtenreni, niluxh xhet bejndini te nungäj l guetni, niclazä nanab jäuni neñ latzguuib. <sup>30</sup> Che baxhalreni diidx loä cabäzxhiga'tz rexpejn Israelni te ju'treni dade're, baxhalga'cäni lo guebju. Agunibeäza jädle'c rexpejn Israelre xquejreni lo guebju. Ni'ctis rniä lo guebju”, si'c caj lo guijt ni bejn comandant.

<sup>31</sup> Che biu' guxhijn, huixii resoldaad Pabl sanärenini guedx Antipatris si'cni gunibee comandant gunreni. <sup>32</sup> Che bara yääl, gubi' resoldaad nani guzaj ni'reni. Resoldaad ni bijb cabaii gusanäj Pabl guedx Cesarea. <sup>33</sup> Che bidzujñ redee Cesarea, badeedreni xquijt comandant lo gubernadoor, huinäzarenini Pabl lojni te biembeeni. <sup>34</sup> Che gulux bilni guijtza, gunabdiidxni lo Pabl:

—¿Caro siäädlu?

Che gucbeeni siääd Pabl Cilicia, <sup>35</sup> räjpni lo Pabl:

—Guidzujñi rexpejn Israel ni cadxchnäj luj, sucuadiaggacä xtiidxlu —räjp gubernadoor.

Gunibeeni ga'p resoldaadni neñ yuro xten Herodes.

## 24

*Gunii Pabl xtiidxni lo Pels*

<sup>1</sup> Gudejdti gaii dxej, dxejc bidzujñ Ananías, bixhojz ni sajcro, näjza gaii rebengool xten guidoro, näjza te dade' ni laa Tértulo ni gunii xcuentreni. Gusloj cabe'cni xquej Pabl lo gubernadoor. <sup>2</sup> Che biädäreni Pabl, gusloj Tértulo cabe'c xquej Pabl lo gubernadoor. Räjpni lo gubernadoor:

—Xquixtioste guebju dxiduxh nabañnu. Cayacnäduhx guebju laadxnu con redzun-sacduhx ni cayujñ guebju. <sup>3</sup> Xquixtiosduhx guebju, gubernadoor Pels, xcuent guiraa redzunsac'c ni rujñ guebju guira nejz. <sup>4</sup> Luxh na'cru gusieednu guebju, gucuadiaglaa guebju tiop diidx. <sup>5</sup> Agucbeenu xho najc niguiire. Benguidxduxhni. Cadrotis rijni rujñni biey lo rexpejn Israel. Laani rnibee te cuaa ni laa nasaren, nalajznu rebejn nani rililaj xtidx Jesucrist ni biäd guedx Nasare't. <sup>6</sup> Rlanjlini nuxhijñi xquidoronu, ni'c gunaaznuni. Niennu te junt te lagajc nuure niennu yälguxhtisni si'cni caj lo xquijtzn. <sup>7</sup> Niluxh bidzujñ comandant Lisias näjza resoldaad. Diptis badzucajreni niguiiga ladzñaanu. <sup>8</sup> Laani gunibeeni lo guebju jiaäd reni rbe'c xquejni. Naj lagajc guebju sajç guiniabdiidx lojni te gacbee guebju guli guiraa requej nani rbe'cnu xcuentni —räjp Tértulo.

<sup>9</sup> Dxejcti guiraa rexpejn Israel ni suga' ro'c räjp guliica xtidx Tértulo. <sup>10</sup> Dxejcti bejn gubernadoor seen lo Pabl te guiniini. Baze'c Pabl diidx, räjpni lojni:

—Rbaaliza lazä guze'cä diidx lo guebju, sa'csi anana agujc xchero lacti huen rujñ guebju yälguxhtis nación Israelre —räjp Pabl—. <sup>11</sup> Gutzbitio'p dxejtis bidzujñ guedx Jerusalén te saganä Dios. Najñ rebejn xhi dxej biu'ä Jerusalén, guyasi guniidxreni diidx. <sup>12</sup> Nicla tej dina nichagdiñ bejn neñ guidoro. Nicla tej dina niunä biey neñ reguidobaz, ro

nezyuj. <sup>13</sup> Agule'creni quej xtenä lo guebju, niluxh nicla tej redzuunga dina niunä. Di gacdi guluipacreni lo guebju gului najc xtiidxreni. <sup>14</sup> Rniliäpac lo guebju: Rañä Xtiös rextotadgoldoonu. Jesucrist baluii xho gañsa'cnu Dios. Rililazä rextiidxni. Xhidalduxh rexpejn Israel rniyaj xho basule' Jesucrist gan bejn Dios. Ruzobä guiraali releii xten toMoisés. Rililazä guiraa rextidx Dios ni bacuaa reni gunii xtidx Dios. <sup>15</sup> Rililazä xtidx Dios si'c rililajza rebejnre xtidx Dios. Si'c ni najnreni, si'cza nanä sidzujn te dxej che guibañsac rebeñgut, rebeñguijdx sigajc rebeñsa'c. <sup>16</sup> Ni'cni racbeä laaca nabanä guiraa dxej, di lastoä guidxieb, nicla nez loj bejn niclaza nez loj Dios, sa'csi rut rajcdi guiliäs dixhii xcuentä.

<sup>17</sup> Räjpp Pabl:

—Agujc xchej yu'ä zijt, lajdx garenca bejn, naj gubinää meel ni baxhaļ reben nejzga te gudedäni lo rebejn ni xhet rajpdi. Biädnaäza gojn xtenä gudedäni lo Dios. <sup>18</sup> Ni'c sanää guidoro. Ro'c bidxäjl rexpejn Israel ni siääd Asia narä. Agucnayaä si'c ni rnibee xleiiinu. Xhet benxhidajldi suganää, xhetza bieyjdi cayunä. <sup>19</sup> ¿Con rebejnğa naj? Te cue'creni quej lo guebju palga yu' xhini'c rdxechnäjreni narä. <sup>20</sup> O guiniiza redee palga yu' xhini'c et laadi benä che suga'ä nez loj junt xten guiraa rebixhojz ni rnibee näjza rebeñgool lo guedx Jerusalén —räjpp Pabl—. <sup>21</sup> Tejtis diidx guniä che suga'ä galäiireni, guredxa'a räpä lojreni: sa'csi rililazä sibañsac guiraa rebejn lo rebeñgut, ni'c biädnaü narä lo rebejnre —si'c guniä lojreni.

<sup>22</sup> Che biejn diajg Pels xtidx Pabl näjza sa'csi najne'ni xcuent diidx nani baluii Jesucrist, basoobni stee dxej guidxagsac sa'reni räjppi lojreni:

—Che jiaädli comandant Lisias dxejc gunä yalguxhtis —räjpp Pels.

<sup>23</sup> Dxejcti gule Pels te capitán ni rnibee te gayuu resoldaad ga'p Pabl. Niluxh räjppi lojni gusaanni gun Pabl nani rlaajtisni gunni. Na'cza gudxojnni jiaäd rexamigwni te fiireni lojni.

<sup>24</sup> Che gudejd balti dxej, gubi' Pels, biädnaäni chäälni Drusila. Drusila najc ben Israel. Dxejc gurejdx Pels Pabl te gusule'ru Pabl xtidx Jesucrist. <sup>25</sup> Gunii Pabl xho nanab guibañsa'c bejn nez loj Dios si'c ni gunibee Dios guibajn bejn. Nanabza gacbee bejn na'c gun bejn cos guijdx, sa'csi sidzujn dxej gac Dios juejz loj guiraa rebejn te fiini xhi bejnreni. Racsesli Pels tant bidxebni biejn diajgni diidxga. Räjppi lo Pabl:

—Huij naj. Sibedxsacälu che latä stee —räjpp Pels.

<sup>26</sup> Naa Pels sudeed Pabl meel lojni te guslaanini, ni'c masru guet-guejt gurejdxnini te guninäjnini. <sup>27</sup> Si'c gudejd tiop ijz. Dxejc birii Pels gubernadoor. Dxejcti biu' Porcio Festo, gujçni gubernadorcoob. Niluxh Pels rlaiz chanälajz rexpejn Israelni, ni'c basa'nni niäusjç Pabl.

## 25

### *Gunii Pabl xtiidxni lo Festo*

<sup>1</sup> Che biu' Festo gujçni gubernadorcoob xten reguejdxga, bia'nni guedx Cesarea çon dxej. Dxejc biriini ro'c sääni guedx Jerusalén. <sup>2</sup> Che bidzujni guejdxga, rebixhojz nani rnibee näjza reniguii ni sajçru lo rexpejn Israel biääd lo Festo. Gusloj cabe'creni xquej Pabl lojni. Gunabduxhreni lo Festo <sup>3</sup> sa'csi rlaizreni gunni te huen laareni, guinibeeni jiaädnaäni Pabl guedx Jerusalén. Si'c gunabreni, sa'csi abenxgaareni xhigab cuäzxhiga'tzreni te ju'treni Pabl lo nezyuj.

<sup>4</sup> Dxejcti räjpp Festo lojreni:

—Suniaü Pabl guedx Cesarea. Di gaçlaa guibi'ä guedx Cesarea. <sup>5</sup> Suchää reniguii ni sajçru lo sa'tu guedx Cesarea, te ro'c cue'creni xquej Pabl loä, don la yu' xhi dzunguijdx bejnii —räjppi.

<sup>6</sup> Che gudejd si'cti tzuu dxej, gubi' Festo guedx Cesarea. Che bara yääl, gurejni lo yagxhil xten gubernadoor, gunibeeni biääd Pabl lojni. <sup>7</sup> Che bidzujn Pabl lojni, biääd rexpejn Israel nani biääd guedx Jerusalén ro'c. Guzujreni guideb gabi Pabl. Gule'creni xhidalduxh xquej Pabl, luxh di niajçdi nuluiireni gulipac xtiidxreni.

<sup>8</sup> Dxejcti räjpp Pabl lojreni:

—Nicla tej latsiaj dina niunä, dina niunä latsiaj loj leii xtenu, dizana niunä latsiaj lo guidoro ni sojb guedx Jerusalén, dizana niunä latsiaj loj xgubier César.

<sup>9</sup> Dxejcti Festo, sa'csi rlaizni guiliäsnii xpala'nii loj rexpejn Israel, räjppi lo Pabl:

—¿La sisiajlu guedx Jerusalén te cue'c rexpejn Israel xquejlu ro'c nezloä, ä?

<sup>10</sup> Dxejcti räjpp Pabl lojni:

—Naj suga'a loj guebju, ni gule reiü César. Guejblu rnibee guiraa reguejdxre. Ree nungäjļ cue'creni xquejä lo guebju, xhet guedx Jerusalendi. Ananchee guejblu xhet latsiajdi benä lo rexpejn Israel. <sup>11</sup> Palga nacä te beñguijdx, o palga yu' xhi latsiaj benä te nungäjļ guetä, xho dina xcäbä guetä. Palga xhet latsiajdi benä nani canii rexpejn Israel benä, dxejc rutliidi sajc gutede narä ladzñaareni. Suchale'creni xquejä lo César nani najc reiü xten reben roman —räjpp Pabl.

<sup>12</sup> Che guninäj Festo rexuxhtis xten xquidoro rexpejn Israel, räjpni lo Pabl:  
—Luj gunablu chäälulo loj reii César. Mbaj. Sijlu lo reii César —räjp Festo.

*Huixiireni Pabl huinärenini lo reii Agripa*

<sup>13</sup> Che gudejd balti dxej, bidzujn reii Agripa näjza chäälni Berenice guedx Cesarea. Biädhuiireni gubernadoor Festo. <sup>14</sup> Che guyu'reni ro'c xchej, bij Festo diidx lo Agripa xcuent Pabl. Räjp Festo lojni:

—Ree niäusijc te niguii ni laa Pabl ni basa'n Pels. <sup>15</sup> Che guyu'ä guedx Jerusalén, rebixhojz ni rnibee näjza rebengool xten rexpejn Israel gule'c xquejni loä. Rlajzreni guinibeä guetni. <sup>16</sup> Rápä lojreni: “Di leii xten nación roman gusaan guet te bejn palga di bejn jädxgaa te guiniireni nez lojpacni xhi bejn niguiiga, te guzejcza niguiiga diidx xcuent requej, te guiniini la guliireni.” <sup>17</sup> Ni'cni che biääd rexpejn Israelga lo guejdxre, che bara yääl guregacä lo yagxhil xten gubernadoor. Dxejc guinibeä huixiireni Pabl guzuj nez loä. <sup>18</sup> Benä xhigab pet yu' xhi cosro bejnini. Luxh che gusloj cabe'creni xquejni, gucbegacä xhet latsiarodi bejn Pabl. <sup>19</sup> Alga cadiñäjrenini xcuent xleiireni, xcostumbrreni. Guniizareni xcuent te niguii ni laa Jesucrist. Agujtni, niluxh canii Pabl gubansacni lo rebengut. <sup>20</sup> Guxii nanä xcuent sa' diidxre, ni'cni gunabdidxä lo Pabl top sicäjbni chanääni guedx Jerusalén te ro'c cue'c rexpejn Israel xquejni. <sup>21</sup> Dxejc che gunii Pabl lojpac reii César chale'c rexpejn Israel xquejni, ni'c guinibeä jäusijcni laj ni gac guxhaläni lo César —räjp Festo.

<sup>22</sup> Dxejcti räjp Agripa lo Festo:

—Narä rlazäza jiejn diagä xtidx niguiiga —räjp Agripa.

Dxejcti räjp Festo lojni:

—Guixee gucuaadijglu xtiidxni —räjpni.

<sup>23</sup> Che bara yääl, biääd Agripa näjza Berenice, luxh sucheduxhrene. Näjza recapitán ni sajcro näjza rebejn ni sajcro lo guejdxga biu'reni neñ yuro xten Festo. Dxejc guinibee Festo biääd Pabl. <sup>24</sup> Dxejcti räjp Festo lo guiraa reni re' neñ yuro:

—Reii Agripa näjza guiraa rebejn ni tre' ree, colcuadijg. Colhuii lo niguiire. Reni rnibee xpejn Israel guedx Jerusalén näjza guejdxre agule'c xquejni loä, canabduxhrene guetni. <sup>25</sup> Niluxh narä rchaloä xhet bejndini te nungäjil guinibeä guetni. Luxh lagajc laani gunabni chääni te gac César juejz lojni, ni'c runä xhigab guxhaläni lojni. <sup>26</sup> Naj dina ganä xhini'c gucuaä lo guijt te guxhaläni lo César ni rnibee narä. Ni'c biädnää niguiire nez lo guiraatu, ganid nez loj guejblu, reii Agripa, filaa guejblu te gaxäjsi che aguiiniini xtiidxni lo guiraanu, sidxälä xhi diidx gucuaä lo guijt ni chää lo César. <sup>27</sup> Narä runä xhigab di nungäjil guxhalä niguiire ni niäu latzguiib lo César palga di gacdi gusule'ä xhi quej xcuentni cabe'c rexpejn Israel loä.

## 26

*Gunii Pabl rextiidxni lo reii Agripa*

<sup>1</sup> Dxejcti räjp Agripa lo Pabl:

—Gunilaa xtiidxlu loonu.

Dxejcti guläs Pabl naani, gusloj cagusule'ni diidx lojreni. Räjpni:

<sup>2</sup> —Reii Agripa, rbalazduxhä sa'csi sajc gusule'ä diidx lo guejblu, sa'csi naj suze'cä diidx xcuent guiraa requej ni gule'c rexpejn Israel. <sup>3</sup> Sa'csi guejblu nanduxh xcuent guiraa releii xten rexpejn Israel. Najnza guejblu xhicuent rdxagdijl sa'reni. Ni'c rniabduxhä na'c jieed guejblu gucuaadijglaa guejblu guiraa rextidxä.

<sup>4</sup> Räjpza Pabl:

—Guiraa rexpejn Israel nanchee xho nacä che gucäli biuux guedx Jerusalén. Galooli najc guedx Jerusalén ladxä. <sup>5</sup> Galooliza numbeereni narä, malaii guicäjpreni gucä te farisee nani bazobduxhru xleiniu si'cni rililajznu. <sup>6</sup> Naj suga'a ree, rlajzreni jääuä sa'csi rililazä diidx nani bia'n Dios con retoxtadgoldoonu. <sup>7</sup> Guitzubitiop cuaa rexpejn Israel huililajz siliäs Dios guiraa rebengut te guibansacreni. Ni'cni bazuxhijbreni lo Dios dxej-yääl. Naj rniliä lo guejblu reii Agripa, sa'csi rililazä siliäs Dios guiraa rebengut te guibansacreni, ni'cni rlajzreni gusaureni narä. <sup>8</sup> Palga abejn Dios xhigab guiliäsni guiraa rebengut te guibansacreni, xhicuent di lajzto chalii xtidx Dios?

<sup>9</sup> Räjpza Pabl:

—Narä benäza xhigab galoo nanabpac guidxe'chä loj rexpejn Jesucrist ni siääd Nazare't, ni'c batedäreni trabajwduxh basäuäreni neñ latzguiib. <sup>10</sup> Guiraa recosre benäza guedx Jerusalén. Baniidx rebixhojz ni rnibee guijt loä te basäuä rexpejn Jesucrist neñ latzguiib. Che biäureni neñ latzguiib, narä gule'cä xquejreni te guttreni. <sup>11</sup> Balti huält basacsiduxhäreni lagajc neñ reguidobäz te niniyajreni Jesucrist. Luxh basacsiduxhäreni, hua'a guideb nez reguedxzijt te ro'c hiasaciä rexpejn Jesucrist.

(Hch. 9:1-19; 22:6-16)

<sup>12</sup> Räjppa Pabl:

—Ni'c sa'a nez guedx Damasco, ca'a guijtż ni baniidx rebixhojż ni rnibee. <sup>13</sup> Rniliä lo guejblu, reii, si'cti läidxej, bahuiä te bajl ni siääd xhaguibaali. Rsanijruni loj gubijdx. Basanijni guideb gabi cadro suga'a näjza reni sanää. <sup>14</sup> Che biabroonu lo yuj, biejn diagä xse' te ni canii loä con didx hebreo: "Saulo, Saulo, çxhicient rusacsilu narä näjza rexpenä? Che rusacsilu narä, lagajc luj rdejdlu trabajw, si'c te gon ni rucuanu' yejc garu'ch." <sup>15</sup> Dxejcti räpä lojni: "¿Chu luj Dad?" Dxejc najni loä: "Narä nacä Jesucrist nani cagusacsíduxhlu. <sup>16</sup> Huistie, gusulii. Narä baluiloä lojlu sa'csi rlazä gaclu te xpenä. Aguleälu te gusule'lu lo rebejñ guiraa ni bahuiilu nadxej, näjza guiraa recos ni churu guluiä lojlu. <sup>17</sup> Naj suxhajälu loj rexpejñ Israel näjza lo rebenzijt nani di gac xpejñ Israel. Che gusacsí rexpejñ Israel näjza rebenzijt luj, sacnäduxhälu, te di ju'treni luj. <sup>18</sup> Gacnää lastooreni te che jiejn diajgreni xtidxä, chalilajzrenini, diru xcäriejnreni gac nayääl, sianij xcäriejnreni. Dxejc dirureni gusoob xtidx Benđxab ni rnibee rebendxab, sa'csi susoobreni xtidx Dios. Che chalilajzreni rextidxä, sudzucaj Dios xtojreni. Dxejcti suchaag Diosreni loj renani anajc beñnaya sa'csi basoobreni xtidx Dios, huililajzreni xtidxä."

<sup>19</sup> Räjppa Pabl:

—Ni'cni rniliä lo guejblu, reii Agripa, cayunä si'cni naj Jesucrist loä gunä che baluilojni loä. <sup>20</sup> Gunixgaä xtiidxni lo reben Damasco. Räpä lojreni: "Colgusiechlazj, colgusoob xtidx Dios. Colyujn dzunsa'c te gacbee rebejñ abasiechlazjtu, arusoobtu xtidx Dios." Si'cza guniä lo reben Jerusalén, näjza lo rebejñ ni yu' reguedx Judea, näjza lo rebenzijt ni di gac xpejñ Israel. <sup>21</sup> Sa'csi benä si'c, gunaaz rexpejñ Israel narä neñ gudoro, rlazjreni nugu'treni narä. <sup>22</sup> Naj racnäj Dios narä, naj sanuutis cagusule'ä rediidxga lo guiraatis bejn. Loj rebejñ ni xhet rajpd sigajc loj rebejñ ni rapduxh. Rusule'ätis nani caj lo guijtż nani bacuaa to Moisés näjza guiraa reniguii nani gunii xtidx Dios. Laareni galooli guniireni xcuent xhini'c gac ñaj. <sup>23</sup> Najreni sidejd Crist trabajwduxh, sugu'trenini. Niluxh sa'csi ganiddoo laani guibansacni lo rebengut, ganiddooza laani suluiini loj rexpejñ Israel näjza loj guiraa rebenzijt guliipac xtidx Dios, sibansac bejn lo rebengut, si'c ni guniini galooli.

*Di Agripa nililajz xtidx Jesucrist*

<sup>24</sup> Lał ni canii Pabl rediidxga lojreni, dip gunii Festo, räjpni lo Pabl:

—Pabl, yejclu cayajc. Pet sa'csi nanduxhlu guijtż ni'c cayajc yejclu.

<sup>25</sup> Dxejcti räjp Pabl lojni:

—Rniliä lo guejblu dad gubernador Festo, xhet rajcdi yecä. Ganax didxlii caniä. <sup>26</sup> Ree suga' reii Agripa. Laani nancheeni guiraa rediidxre, ni'c guyasi caniä rediidxre lojni, dizana guidxebä sa'csi anajni guli guiraa ni gujc, sa'csi xhet xhiga'tzdi gujcreni. <sup>27</sup> Guejblu reii Agripa, çla rililajz guejblu xtidx reniguii nani bacuaa xtidx Dios, ä? Nancheä rililajz guejblu diidxga —räjp Pabl.

<sup>28</sup> Dxejcti räjp Agripa lo Pabl:

—Tuche'nsi riäädx gunlu gan chalilazä xtidx Jesucrist te gacä xpen Dios.

<sup>29</sup> Räjppa Pabl lojni:

—Xhet najcdi palga guxii o xhidajl cayäädx, narä canabä guniidx Dios chalilajz guejblu xtiidxni si'c rililazä xtiidxni, nägajcza guiraa reni cacuadiajg xtidxä te gactu si'c nacä, niluxh xhet näjdi resa' cadenre —räjp Pabl.

<sup>30</sup> Dxejcti huisu Agripa, Festo, Berenice, näjza rebejñ ni sobganäjreni. <sup>31</sup> Che gubigreni stelaad, räjpreni lo sa'reni:

—Niguiire xhet bejndini te guetni, xhetza bejndini te jiäuni.

<sup>32</sup> Dxejcti räjp Agripa lo Festo:

—Paru dini niniab chääni lo César, sajc nuslaanuni.

## 27

*Birii Pabl sää nez guedx Roma*

<sup>1</sup> Basoobtiren dxej ni niu'nu neñ barcw te chonnu Italia. Dxejc bateedreni Pabl näjza sgaii bejn nani niäuzo lo capitán ni laa Julio. Rnibee Julio te gayuu soldaad, najcreni te cuaa ni laa Augusto. <sup>2</sup> Näjza te dade' ni laa Aristarco guzaj, siäädni guedx Tesalónica xten Macedonia. Biu'nu neñ barcw ro' guedx Cesarea. Barcwga siääd guedx Adramitio. Biriitinu, najc xhigab teednu nez reguejdx nani yu' ro' nisdoo lo reyuj xten Asia. <sup>3</sup> Che bara yääl guläjz barcw ro' guedx Sidón. Huenduxh gujc Julio con Pabl, basaanni bihuii Pabl rexamigwini ni yu' guejdxga te bahuiireni Pabl, badeedreni xhi rquiinni. <sup>4</sup> Che säasac barcw lo nisdoo, bideednu stelaad Chipre, yuj ni tre' lo nisdoo, sa'csi sääb te beduxh, ni'c naga' Chipre xladbäigwnu, te guxiiru rda' bej loonu. <sup>5</sup> Che sonnu neñ barcw, bideednu xnisdoo reguedx Cilicia näjza xnisdoo reguedx Panfilia, te bidzunnu ro' guedx Mira xten Licia. <sup>6</sup> Ro'c bidxäjł capitán xten resoldaad stee barcw ni siääd guedx Alejandria. Agojł chää barcwga



Italia. Bateedtini guiraanu lo barcwga. <sup>7</sup> Balti dxej chäigaj sonnu lo nisdoo. Trabajwduxh bidzunu lo nisdoo ro' guedx Gnido, sa'csi entis cabi' beduxh nez cadro sonnu. Ni'c trabajwduxh bideednu xladbäigw yuj Creta ni tre' lo nisdoo xladbeenu. Gudejdnu guedx Salmón. <sup>8</sup> Dxejcti chäiduxh sonnu neñ barcw lo nisdoo nez cuä' yu Creta; si'ctis gujc bidzunu te lajt ro' nisdoo ni laa Buenos Puertos cadro guxii säab bej. Gajxh ro'c tre' guedx Lasea. <sup>9</sup> Agujc balti dxej cayacaalanu, luxh agudejdza dxej ni rucua'n rexpelj Israel, guxii riäädx chaa ijz. Rebäire di bejn chää neñ barcw sa'csi yuduxh riesgw lo nisdoo, ni'c balijdx Pabl rebejn, <sup>10</sup> räjpni lojreni:

—Rexamigwä, runxgaä bis guejbtu, palga chonnu neñ barcw chanuunu xnejznu, sajc te liädxduxh. Sinitloj cargw, sibijxh barcw, luxh silo' xhidajl bejn, —räjpni.

<sup>11</sup> Niluxh di capitán xten resoldaad niu xtidx Pabl. Biuruni xtidx nani rusaj barcw näjza xtidx baxhuaan xten barcw. <sup>12</sup> Luxh sa'csi lajtga dini gajc huen tedreni rebäi nalduxh, bejnreni xhigab hueenru guiriinu ro'c te chonnu guedx Fenice ni tre'za lo yu Creta, sa'csi di bej guibiduxh ro'c. Hueenru ro'c guilääznu ted rebäinajl, räjpreni.

<sup>13</sup> Ni'c che gusloj cabi' te bebäz nez lad sur, naareni pet xhet najcdi guiriinu lo nisdoo con barcw. Dxejc baslaareni barcw, sontinu ro' nisdoo gajxh cuä' Creta. <sup>14</sup> Niluxh di niaclaa gusloj te nisguipeduxh birii nez redajn xten Creta. <sup>15</sup> Gunaaz bejga barcw, diru gacdi gusajrenini. Basa'ntireni sanä bejga barcw cadrotis rlažni. <sup>16</sup> Siädgobiuj barcw te canuu. Che bidzunu stelaad te yuje' ni tre' lo nisdoo ni laa Clauda, guxiiru cabi' beduxhga. Dxejcli bejnreni gaan guläsreni canuu neñ barcw. <sup>17</sup> Che basälnu canuu neñ barcw, cua'reni gaii duro te baliibreni barcwro, bateedreni gaii duu xque' barcw te na'c guibiłni. Cadxejbreni te di chachu' barcw lo yujxh ni laa Sirte ni yu' nen nisdoo. Ni'c guläjreni ladro ni rniaaz bej te rusajni barcw, gudixhreni lajdga neñ barcw. Sanäti beduxhga barcw cadrotis rlažni. <sup>18</sup> Che bara yääl caguscuä' beduxh barcw lo nisdoo. Sas basälreni che'n cargw lo nisdoo te bicharu barcw. <sup>19</sup> Ni riojn dxej, lagajc laareni basälreni lo nisdoo guiraa xtrast barcw. <sup>20</sup> Che agujc balti dxej niäu lo guibijdx, diza rebale' nien xhaguibaa sa'csi lajtis cayajb nisguipeduxhga, biennu xhigab guiraanu sejtnu. <sup>21</sup> Xchero rut rlaždi gau. Dxejc gusuj Pabl galäii rebejn räjpni lojreni:

—Rexamigwä, paru nucudaiajg guejbtu xtidxä, na'c niriitu xyuj Creta, di liädxre niajc, dikanu nidejd trabajwduxhre. <sup>22</sup> Niluxh colcuedcxi lastootu. Niclatej bejn ni siäd lo barcw di guet. Barcwrtis sinitloj. <sup>23</sup> Nacä te xpejn Dios, runä xhitis ni rnibeeni gunä. Nayääl biädsuj te xangl Dios cuä'ä, <sup>24</sup> najni loä: “Na'c guidxejblu Pabl. Nanabpac chääl lo reii César. ĽBahuilaa! Abasalajz Dioslu reni siädnälu; nicla tej reni yu' neñ barcwre di guet”, najni loä. <sup>25</sup> Ni'cni canäi lo guejbtu, na'c guidxejbtu. Narä rililazä xtidx Dios. Rililazä siojobj xtidx Dios si'c ni naj xangl Dios loä. <sup>26</sup> Niluxh yu' cadro chalaj barcw lo yujxh neñ nisdoo gajxh lo te yuje' ni tre' neñ nisdoo —räjp Pabl.

<sup>27</sup> Si'cti tiop xman balanaa beduxhga barcw nezre, nezrec lo nisdoo ni laa Adria. Pet garol yääl ni bejn reniguii ni ruzaj barcw xhigab abidzujn barcw gajxh lo yuj, <sup>28</sup> ni'c bastejbreni te guiib lo duu xhajn nisdoo, te barexhreni ro'c, dxejc gucbeereni najc nisdoo jäät si'cti galbitzubixho'p metr. Che guzaj barcw stelabäze', bastebsacreni guiib con duu xajn nisdoo, dxejc gucbeereni ro'c najc nisdoo jäät si'cti galbigajdz metr. <sup>29</sup> Dxejc bidxejbreni te di chalaj barcw yejc reguij. Bacuaatireni tajp guibro si'c guench ni naliib te caden te ru'reni neñ yujxh te ruscuääzreni barcw, te jia'nni tejsi lajt. Dxejc rlažreni malaii jianijga lo guedxliuj. <sup>30</sup> Dxejcti gulät remos canuu lo nisdoo cayujnsireni si'cni chastejbreni stee guench guiib lo nisdoo, niluxh rlažreni guxun'reni guidon la sajc guidzujn'reni ro' nisdoo. <sup>31</sup> Dxejcti räjp Pabl lo capitán näjza lo resoldaad:

—Palga di redee jia'n neñ barcw, di gacdi guslaatu xcäl'nabajntu —räjpni.

<sup>32</sup> Dxejcti batiugya' resoldaad duu ni naaz canuu te bitejbni lo nisdoo, sanäti nisdoo canuuga. <sup>33</sup> Che gusloj cayanj, gunibee Pabl, räjpni lojreni:

—Nadxej rajc tiop xman gajdtu gues, gajdzatu gau. <sup>34</sup> Naj coltajw te gac guixoobtu lo nisdoo. Na'c guntu xhigab guettu, nicla tej xquidxejcti di nitloj.

<sup>35</sup> Che gulujx gunii Pabl si'c, cua'ni yäxtiil, badeedni xquixtios lo Dios nez loj guiraareni. Dxejc gula'nini, gusloj cayajwnini. <sup>36</sup> Dxejc bibaa-lajzreni, näjza laareni gusloj cayajwreni. <sup>37</sup> Nuunu najcnu tiop gayuu gayonbitzubixho'p bejn ni yu' neñ barcwga. <sup>38</sup> Che agujc gudajwreni, basälreni triuu lo nisdoo te bicharu barcw.

<sup>39</sup> Che bianisac, direni niembee yujga, niluxh bahuiireni cadro rdzujn te gueubäz ro' nisdoo cadro yu' xhiroob yujxh ro' nidooga. Rlažreni nusu'reni barcw ro'c. <sup>40</sup> Dxejcti baslaareni guidap guench guiib ni naaz barcw, bia'nreni guideb caden neñ nisdoo, bax-heczareni yajg ni ruzaj barcw, guläszareni ladro nez delant barcw te balanaa bej barcw. Badzur'reni barcw sääreni nez ro' nisdoo. <sup>41</sup> Sas biu'reni te lajt cadro rdxagsa' tiop cuaa nis. Ro'c huilaj yejc barcw neñ yujxh neñ nisdoo, digacdiru guiniibni. Dxejcti gusloj cabijl dejtz barcw sa'csi sanuutis cagujjn nisdoo detz barcw. <sup>42</sup> Dxejcti rlaž resoldaad nugu't repres te

di guixoobreni lo nis guxuṇreni. <sup>43</sup> Niluxh di rlaḡ capitán xten resoldaad guet Pabl, ni'c dini nusaan nugu't resoldaad repres. Gunibee capitán ganiddoo renani rajc rxoob lo nis guitiäjs lo nisdoo te guidzujṇreni lo yujxh. <sup>44</sup> Dxejcti birinajl rebejn ni digacdi guixoob lo nis, naazreni barajd o te la' yajg ni gula' detz barcw. Si'c gujc bidzujṇ guiragajc rebejn lo yujxh ro' nisdoo. Nadaanreni bidzujṇreni lo yujxhga.

## 28

### *Bidzujṇ Pabl lo yuj ni laa Malta ni re' lo nisdoo*

<sup>1</sup> Che bidzujṇnu lo yuj ni tre' lo nisdoo, biembeenu yujga najc ni laa Malta. <sup>2</sup> Gucnäḡ rebejn ro'c nuure, gule'creni guiboo bahuiireni nuure sa'csi cayacnalduxh, cayajbza nisguij. <sup>3</sup> Ca' Pabl te dääz yajg, sale'cnini lo guiboo, chela biriyäl te bäl nialajz neṇ yajgga. Saa gudauya'ni naa Pabl. <sup>4</sup> Che bahuii rebeṇ Malta li najl bäl nialajzga cayauya' naa Pabl, gusloj cayäjbreni lo sa'reni:

—Pet rugu'tni bejn ni'c mase bejnni gaan lo nisdoo siguijxni xtojlni, sejtni naj.

<sup>5</sup> Gubijb Pabl naani dxejcti bitejb bälga lo guiboo. Xhet gujcdi naa Pabl. <sup>6</sup> Dxejc rebeṇ ro'c cabäḡz fiireni la sisiäguij naa Pabl o laa sejtni. Xchero bidxelojreni. Che bahuiireni xhet gujcdini, gusloj bejnreni ste'ca xhigab, räjpreni lo sa'reni:

—Pet dios najcni.

<sup>7</sup> Gajxh ro'c naga' xyuj te dade' ni laa Publio ni najc xcubernadoor Malta. Biojia'nnu rolizni chon dxej. Huenduxh gujc dade'ga, baniidxni guiraa ni biquiinnu. <sup>8</sup> Naga' xtdad Publio cayacxhuuni, yu'ni xliaa, cayajczani yobrejn. Huihuii Pabl. Guredx-gunab Pabl lo Dios, dxejc batzuub Pabl naani yejcn, basiacgajcnini. <sup>9</sup> Che gucbee rebeṇguejdxga abasiajcn beṇ racxhuuga, bidzujṇnäjreni beṇ racxhuu lo Pabl, basiajc Pabl guiraareni. <sup>10</sup> Ni'c banidx-xliareni xhidalduxh xhicos, luxh che biriinu ro'c, baniidxreni guiralii recos ni biquiinnu neṇ barcw.

### *Bidzujṇ Pabl guedx Roma*

<sup>11</sup> Agujc chon bäii yu'nu ro'c che biu'nu neṇ te barcw ni siääd Alejandría. Lagajc ro'c bateed barcwga rebänajl che rsiäb beduxh. Yejc barcwga caj tiop figuur xten tiop biuux ni laa Cástor näjza Pólux, rexingancua'ch dios ni laa Zeus. <sup>12</sup> Biriinu Malta sonnu neṇ barcw nez guedx Siracusa. Ro'c bia'nnu chon dxej. <sup>13</sup> Dxejcti biusacnu neṇ barcw, sonnu lo nisdoo cheni bidzujṇlinu guejdx ni laa Regio. Che bara yääl, gubi' te bej birii lad sur. Biusacnu neṇ barcw. Bara yääl bidzujṇnu guedx Puteoli. <sup>14</sup> Ro'c bidxaagnu gaii xpejn Jesucrist. Najreni loonu:

—Coljiannäḡ nuunu —najreni.

Bia'nnu ro'c gajdz dxej. Dxejc biriinu guejdxga, ni'nu sonnu nez guedx Roma. <sup>15</sup> Che gucbee rexpejn Jesucrist ni yu' guedx Roma siopsaanu nez Roma, biäädreni guedx Foro de Apio näjza stee guejdx ni laa Tres Tabernas, ro'c bidxaagreni nuure. Che bahuii Pabl lojreni, guzutijp lastooni, badeedni xquixtis lo Dios. <sup>16</sup> Che biu'nu guedx Roma, bateed capitán repres ladznaa comandant, niluxh basaanni cualaa Pabl te yu' cadro cuääzni. Tejtis soldaad biannäḡ Pabl.

### *Baluii Pabl xtidx Dios lo rebeṇ Roma*

<sup>17</sup> Che gudejd chon dxej, gurejdx Pabl reni rnibee lo rexpejn Israel. Che bidxaag sa'reni cadro yu' Pabl, räjpni lojreni:

—Guejbtu rexamigwä, resa'ä, xhetliidi nani xhet laadi benä lo rexpejn Israel, dizana nibälazä xleii toMoisés. Niluxh basäureni narä neṇ latzguiib guedx Jerusalén, dxejcti bateedreni narä ladznaa roman. <sup>18</sup> Che biejn diajgreni xtidxä, rlaḡ reguxhtis roman nuslaa narä sa'csi xhet benädi te nugu'treni narä. <sup>19</sup> Niluxh naaddi rexpejn Israel guslaareni narä, gunabätis lojpac reii César jiädle'creni quej ni cabex'creni xcuentä. Niluxh narä xhet xquejdi rexpejn Israel cue'cä. <sup>20</sup> Ni'cni guredxä la'tu te fiä lojtu, te guininää la'tu, sa'csi rililazä lagajc si'c rililajz xpejn Israel sibansac rebengut, ni'c nalibä cadenre.

<sup>21</sup> Dxejcti räjpreni lojni:

—Nicla tej guijtḡ gajd reguxhtis xten reguedx Judea guxhal loonu xcuentlu, gajdza rexpejnnu ni bidzujṇ ree jiädsa'n diidx xhet laadi bejnlu. <sup>22</sup> Rlaḡznu jiejn diajgno xtiidxlu, don xhi naalu, sa'csi racbeenu xhidajl lajt rniyajreni redidxcoob xten Jesucrist —räjpreni.

<sup>23</sup> Guletireni te dxej guidxagsa'reni. Che bidzujṇ dxejga, bidxagsa' xhidalduxh bejn neṇ yu' cadro rbäjz Pabl. Guideb dxej basule' Pabl xtidx Dios lojreni. Basule'ni xho rnibee Dios lojreni. Con rediidx ni caj lo xleii toMoisés näjza diidx ni bacuaa reniguii nani gunii xtidx Dios basule'ni Jesús najc Crist nani galooli cabäjz rebeṇ Israel jiäd. <sup>24</sup> Yu' reni huililajz xtidx Pabl, yu'za reni di nililajz xtiidxni. <sup>25</sup> Sa'csi di niajcdi niujnreni tejsi xhigab gusloj siireni. Ganiddoo räjp Pabl lojreni:

—Guliica naj toIsaías che badeed Sprit Dxaan xten Dios rediidxre guniini, räjpni lo rextadgoldoonu:

<sup>26</sup> Huij, gunii lo rebejnre, scree gojz lojreni:

Siejn diajgtu xtidxä, niluxh ditu gacbeeni.

Suhuiitu nani runä luxh ditu gumbee xhini'c ruhuiitu.

<sup>27</sup> Agucnajd lastoo rebejnre sa'csi di rlajzreni chalilajzreni xtidxä.

Direni cuadiajg xtidxä sa'csi di rlajzreni jiejn diajgreni diidx ni guliipac.

Rusäuzareni balojreni te di fiireni, te di lajzreni chalii.

Ni'cni direni gusiechlajzreni te gusaan gunreni dojl te gudzucaj Dios xtojreni.

<sup>28</sup> Räjp Pabl lojreni:

—Colgacbee. Najli sisiule' xtidx Dios lo rebenzijt ni di gac xpejn Israel te gusiejch lajzreni, te gudzucaj Dios xtojreni. Rniliäpac lojtu, sililajzreni rextidx Dios.

<sup>29</sup> Che gulujx gunii Pabl rediidxga lojreni, ensilaareni gusloj cadxagdijl sa'reni laḷ ni sääreni.

<sup>30</sup> Tiop ijz guläjz Pabl guejdxga neḅ yu' ni cualaani. Biuni guiralii rebejn ni biääd rolizni.

<sup>31</sup> Lo guiraa rebejnnga basule'ni xho rnibee Dios lojreni. Bijzani diidx xcuent redzuun nani bejn Jesucrist. Di lastooni nidxejb, rutza badxojnndi guniini.

## Guijtz Nani Bacuaa Pabl Lo Rebeņ Roman

### *Rucuaa Pabl lo rebeņ guidoo neņ guedx Roma*

<sup>1</sup> Narā, Pabl, nacā te xmos Jesucrist, laani gule narā te gusule'ā xtidx Dios loj rebeņ.

<sup>2</sup> Agujc xchero bia'n Dios diidx loj renani basule' xtiidxni, suniidxni diidxre loonu, luxh diidx ni bia'n Dios caj lo guijtz xten reprof'e'tga. <sup>3</sup> Rediidx ni rusule'ā najc xcuent Jesucrist, Xi'n Dios, ni najc xagdoo toreei David xcuent tiejxhni. <sup>4</sup> Xcuent Xsprit Dxaan Dad Jesucrist, najcni Xi'npac Dios. Badeed Dios yāl̄rnibee lojni, ni'cni gubaņsacni lo rebengut. <sup>5</sup> Laani gucnājni narā, guleni narā te gusule'ā xtiidxni te guzobdiajgtu, te chalilajz rebeņ ni rej guideb guedxliuj xtiidxni. <sup>6</sup> Luxh nadxaagtu loj rebeņ ni guleni te chalilajzreni xtiidxni.

<sup>7</sup> Ruxhalā guijtzre lojtu ni yu' guedx Roma, guiraatu ni sanāljaz Dios ni bibeetu gactu beņdxan. Gacnāj Dios ni najc Xtdadnu nājza Dad Jesucrist la'tu, guscuecdxireni lajztu.

### *Rlajz Pabl chāā guedx Roma*

<sup>8</sup> Ganidtoo rudedā xquixtios loj Dios con laj Jesucrist xcuent guiraatu, sa'csi guideb guedxliuj ruyj beņ diidx xcuent xcāl̄rililajztu. <sup>9</sup> Lagajc Dios anajn xho rniabā guet-guejt xcuent la'tu lojni. Narā runā xtuuzn Dios guideb lastoā, rusule'ā diidx xcuent Xi'nni Jesucrist. <sup>10</sup> Sanuutis canabā lojni, top sajz jād̄huiā lojtu si'cni rlazā gunā agujc xchejli. <sup>11</sup> Sa'csi rlazduxhā fiā lojtu, te gacnāātu, te gulidxā la'tu xhi te xtidx Dios te sudzu'tzrutu lo xtiidxni. <sup>12</sup> Nalajznu, te gustioobnu lajz sa'nu xcāl̄rililajz xtidx Dios xten sa'nu.

<sup>13</sup> Rebetzā rlazā gacheetu balti huālt benā xhigab jād̄huiā lojtu, luxh gajd gacdi jialā. Rlazā jād̄huiā lojtu te chalilajz xhidajlru beņ xtidx Dios sigajcni salilajzreni guralajz cadro hua'a loj rebeņ ni di gac xpeņ Israel. <sup>14</sup> Nungāj̄lpac gusule'ā xtidx Dios loj rebeņ nani rni garen-garen didxsaj, sigajc loj rebeņ griegw, loj renani nayāā, sigajc loj rebeņ najn. <sup>15</sup> Rbaali lazā suga'a naj, te gusule' xtidx Dios nājza lojtu ni yu' guedx Roma.

### *Xcāl̄rnibee xtidx Dios*

<sup>16</sup> Sa'csi dina guituiā xcuent xtidx Dios, sa'csi najcni yāl̄rnibee xten Dios te guslaani lo dojl chutis beņ nani rlazz chalilajz xtiidxni, ganidtoo reni najc rexpeņ Israel, dxejcti nājza rebeņ ni di gac xpeņ Israel. <sup>17</sup> Sa'csi xtidx Dios rusule' xho nanab chalilajz te beņ te gacni te beņsa'c nez lo Dios sa'csi huililajzni xtiidxni. Lo xtidx Dios caj scree: "Palga rililajz te beņ xtidx Dios, najcni te beņnaya nez lo Dios, nabannājni Dios xcuent xcāl̄rililajzni."

### *Rextojl beņ*

<sup>18</sup> Xcāl̄rdxe'ch Dios nani yu' xhaguibaa siaj̄bni yejc rebeņ nani gun dojl, nani rlazz gun cosguijdx, nani di gusaan guiseed sabej̄reni didxgulii. <sup>19</sup> Sa'csi anancheereni nani sajz gan beņ xcuent Dios, ni'cni najnreni rajpreni dojl, sa'csi ruluipac Dios na'c gunreni dojl. <sup>20</sup> Cheni birixtiejli guedxliuj, recos nani di gacdi fii beņ xcuent Dios, si'c xcāl̄rnibeeni ni najc par tejpas, si'c xtujxh xtenni, huenliisi ruzereni sa'csi ruluilojreni recos ni ruzen nani benchee Dios. Guiraa reni'c ruluiloj najcni Gueb Dios ni rajp yāl̄rnibee par tejpas, ni'c di gacdi guiniireni loj Dios direni niembee xhini'c rlazz Dios gunreni. <sup>21</sup> Ni'cni, mase biembereni Dios, direni niliā'p xpala'nni te ganreni Gueb Dios, dizareni nudeed xquixtios lojni. Alga gualajz gujcreni, bicāȳj xcāriej̄nreni, naareni hueen najc gunreni si'ctis ni jiaj̄b yejcreni, si'cni rsia' lajzreni neņ lastooreni. <sup>22</sup> Caniireni nanduxhrenei, per direni gan, nayāāreni. <sup>23</sup> Gulālazreni xcāl̄rdimbicha' Dios ni najc tejsi par tejpas, te bazuxhij̄breni nez loj rebanāj̄b ni benchee naareni, ni najc guiraa ni rujn lojni si'c rujn lo te niguii ni rnitloj, nājza guiraa ni najc si'c reman ni rutajt, nājza guiraa ni najc si'c reman ni yu' tajp ni'ni, nājza ni najc si'c rebāj̄l.

<sup>24</sup> Ni'cni gulālaz Diosreni, basaanni gunreni si'ctis ni rlazzreni. Bejnreni dojl con resa'reni. <sup>25</sup> Sa'csi ahuililajzreni didx-xhii lacuaa nililajzreni xtidxlii Dios, ruzuxhij̄bzareni nez loj recos ni benchee Dios, lacuaa guzuxhij̄breni loj Dios nani benchee guiraa rexhicos, Dios nacle' par tejpas. Sugacni si'c.

<sup>26</sup> Ni'cni gulālaz Diosreni, subia'nreni lo xcāl̄latsiaj̄reni, lo yāl̄xtujy xtenreni. Diru regunaa guesnāj̄ niguii, lagajc sagunaareni resnāj̄reni. <sup>27</sup> Sigajcza reniguii gulālaz regunaa, rujnreni dojl con lagajc saniguiireni. Luxh lagajc laareni siguij̄xreni latsiaj̄ ni rujnreni.

<sup>28</sup> Luxh sa'csi di rlazzreni juren Dios, basaanti Dios suyu' cosguij̄dxtis xcāriej̄nreni, te chanuutisreni lo xcāl̄latsiaj̄reni, rujnreni recos ni xhet laadi. <sup>29</sup> Guidxareni dojl, nājza cosguij̄dx, nāj̄ yāl̄ruguilajz xhixten sa'reni; rugu'treni beņ, rujnreni yāl̄rsiāblajz, rucuanāj̄reni resa'reni, rusgueereni sa'reni, rdxechnāj̄reni sa'reni, rniizareni didxhii. <sup>30</sup> Rniyaj sa'reni, rdxe'chreni lo Dios, gualajzreni, dipacreni guitujy, rliā'preni lagajc xpala'nreni, entis latsiacoob rbāxtiej̄reni, gualajzreni lo xczuzajnreni, <sup>31</sup> nadduxhrenei, xheti xcāriej̄nreni, xhet

sajcdi xtiidxreni ni ria'nreni lo sabejnreni, direni chanälajz sa'reni si'cni nungäj] gacni, dizareni gulasajz sa'reni. <sup>32</sup> Luxh mase agucbeereni gun Dios yälguxhtis lojreni, najnzareni nungäj] guetpac renani rujn recosre, nicla jiureni, rujnreni guiraa recosguijdxre, luxh rbaali lajzreni richunäjreni rebejn ni rujnza recosguijdxga.

## 2

### *Dios rujn yälguxhtis con didxguliipac*

<sup>1</sup> Ni'cni, ¿canejz cháätu, la'tu benguedxliuj? Chutis luj ni rgubeelu sabejnlu, lagajc si'c cubeezareni luj, lagajc xcuent ni'c sajclu yälguxhtis, sa'csi luj rgubeelu sabejnlu, lagajcza luj rujnlu lagajc dojlga. <sup>2</sup> Nancheenu sujn Dios yälguxhtissa'c loj renani rujn sa' dojlga. <sup>3</sup> Ben guedxliuj ni rgubee loj renani rujn dojl, luxh sigajcza rujnlu, ¿la rujnlu xhigab sidedcaj gun Dios yälguxhtis lojlu xcuent xtojllu, ä? <sup>4</sup> O ¿la rbälazlu ni rujn Dios, najcni huenduxh, lacti guroob najc xcäl'rulasajzni, rapduxhzani pasens? ¿La dilu gan dee najc ni gacnäjlz gusiechlazjzlu te guibicajlu lo dojl, ä? <sup>5</sup> Luxh sa'csi nadduxhlu, di lastoolu guigoodz te gusiechlazjzlu, cacugatjzlu yälguxhtis ni gaclu che guidzujn dxej ni gun Dios yälguxhtis loj reben guedxliuj, <sup>6</sup> siguijx Dios loj tejgatu xcuent dzuun nani bejn tejgatu. <sup>7</sup> Loj rebejn nani rlanjztsireni guibaŋsa'c, ni gusoob xtiidxni, sudeed Dios yäl'nabajñ par tejpas sa'csi gudilireni xhaniduj näjza go'preni xpala'nreni loj Dios, rlanjzreni guibajñreni loj Dios par tejpas. <sup>8</sup> Luxh sidxe'ch Dios, sidxe'chduxhni loj renani sanälajz lagajc laareni, nani di jiu xtiidxguliini, alga rusoobreni reyäl'latsaj, redidxguijdx. <sup>9</sup> Guiraa reben guedxliuj ni rujn dojl sidejd trabajwduxh näjza sac-huin lastooreni; ganid rexpeñ Israel, dxejcti näjza reben griegw. <sup>10</sup> Loj guiraa rebejn nani rujn cos-hueen, sudeed Dios xhaniduj, näjza bala'n, näjza yäl'rbedcxi lastooreni, ganid rexpeñ Israel, dxejcti näjza reben griegw.

<sup>11</sup> Sa'csi tebloj najc guiraasi rebejn nez loj Dios. <sup>12</sup> Guiraa rebejn nani bejn dojl, luxh direni niembee xleii Dios, sinitlojreni sin leiiga; guiraa reni biembee xleii Dios, lagajc con leiiga sujn Dios yälguxhtisireni xcuent xtoj]reni. <sup>13</sup> Xhet ganaxdi renani rucua diajgtsis xleii Moisés najc bennaya nez loj Dios; rebejn ni rusoobpac rexleii to Moisés, reni'c najc bennaya loj Dios. <sup>14</sup> Yu' xhidal bejn ni di gumbee xleii to Moisés, dizareni gac rexpeñ Israel, rujnreni recos ni caj lo leii. Najnreni xhini'c najc cos sa'c. Ni'cni lagajc xcäriejnreni najc si'c leii par laareni. <sup>15</sup> Recossa'c ni rujnreni rululoj nezyusa'c ni yu' lastooreni. Xcäriejnreni rululoj xhini'c loj guiraa nani rujnreni najc cos sa'c, xhini'c najc dojl. <sup>16</sup> Guiraa recosre sajz che guidzujn dxej ni gun Dios yälguxhtis guiraa rexhigabxhiga'tz ni yu' lastoo rebejn. Jesucrist gac juejz lojreni, dxejz sisiojb guiraa rediidx ni cagusule'ä lojtu.

### *Rexpeñ Israel näj xleii to Moisés*

<sup>17</sup> Luj ni laalu xpeñ Israel, ni rniilu sanäpaclu xleii to Moisés, rmiduxhlu najclu xpeñ Dios, <sup>18</sup> rniilu nancheezalu xhini'c rlanjz Dios gunlu, anajnzalu xhini'c najc hueenru sa'csi bisiedsa'c paclu leii. <sup>19</sup> Rchalolu sajz guluilu nezyusa'c lo rebejn nani najc si'c lotiä'p, sajz guzanijlu xcäriejn reni nacäy xcäriejnreni. <sup>20</sup> Rchalolu najclu mastr lo renani nayääl, najczalu mastr lo rebuiux, sa'csi nansa'clu leii, luxh lojni caj guiraa yäl'najñ näjza guiraa didxguliipac. <sup>21</sup> Ni'cni rniä lojlu, luj ni caguseed xtee bejn, ¿xhicuent dilu guseed lagajc luj? Luj ni rusule'lu diidx ni cuan bejn, ¿xhicuent rbajnlu? <sup>22</sup> Luj nani rniilu na'c guesnäjni te ni di gac cháäl'ni, ¿la resnäjlz nani di gac cháällu, ä? Rdx'e'chlu xcuent rebanäjb, ¿xhicuent rbäälz xhicos neñ xquidoo rebanäjb, ä? <sup>23</sup> Luj rlanjzlu chá'p xpala'nlu sa'csi najnlu leii, ¿la rusanxtujylo Dios sa'csi dilu gusoob xtidx leiiga, ä? <sup>24</sup> Bahuii xho rebejn nani di gac xpeñ Israel rniyajreni Dios sa'csi la'tu ditu gusoob xtiidxni, rujntu dojl, sigajc ni caj lo xtidx Dios.

<sup>25</sup> Palga la'tu chutu bee si'cni caj lo leiiga, palga gusoobtu guiraa diidx ni caj lo leii, laaca. Luxh palga ditu gusoob guiraliipac xtidx leiiga, xlia'si guyu'tu bee, sa'csi rujntu dojl. <sup>26</sup> Ni'cni palga te bejn ni di chu beega, luxh rusoobni guiraliipac xtidx leiiga, ¿la di gacdi guchaagni cuent najcni si'c te nani yu' beega, ä? <sup>27</sup> Bejn nani di chu beega, luxh rililajzni guiraliipac xtidx leiiga, sujnni yälguxhtis la'tu sa'csi mase yu'tu beega, luxh nanduxhtu leiiga, ditu gusoob xtidx leiiga, alga rujntu dojl. <sup>28</sup> Sa'csi xhet guiraadi rebejn ni yu' beega najc rexpeñ Israel, luxh di beega ni ru' bejn gun gusoobpac bejn xtidx leiiga. <sup>29</sup> Najcpac te xpeñ Israel nani najcni neñ lastooni, nani yu' bee lastooni, rusoobpacni xtidx Dios xcuent Sprit xtenni, dini gunni sa'csi najctisni costumbr. Dios ni siliä'p xpala'nni, xhet bejndi.

## 3

<sup>1</sup> ¿Xhini'c sacnäj te bejn najcni te rexpeñ Israel, ä? O ¿xhi sajz chuni beega? <sup>2</sup> ¡Empac sacduxhni! Ganidtoo, sa'csi loj rexpeñ Israel badeed Dios xtiidxni. <sup>3</sup> Mase yu' renani di nililajz diidxga, ¿la ni'cni xhet sajcdi diidx ni bia'n Dios loj rexpejñni, ä? <sup>4</sup> ¡Xho gacni si'c! Diostis najc guliipac, guiralii bejn rusguee. Scree caj lo xtidx Dios: Lagajc xtiidxlu suluii laaca rujnlu,

te che gaclu yälguxhtis,  
nicla tej xtojllu di guidxälj.

<sup>5</sup> Palga xcälätsiajnu rulüüiru najc Dios huenduxh, ¿xhini'c guiniinu dxejc? Palga gun Dios yälguxhtis nurnu, dxejc tednu trabajwduxh, ¿la rujnni latsiaj loonu, ä? (Caniä si'c te beñ guedxliuj naj.) <sup>6</sup> ¡Xho gacni si'c! Paru najcni si'c, ¿xho mood gun Dios yälguxhtis loj rebejn guedxliuj?

<sup>7</sup> Paru redidx-xhii ni rniä riliä'pru xpala'n Dios näjza xtidxliini, ¿xhicuent gunni yälguxhtis narä si'c te bendojl? <sup>8</sup> Yu'za bejn ni canii didx-xhii, najreni cayäjpnu lo rebejn: "Colyejn cosguijdx te guilulojni recoshuen." Per rebejn ni canii si'c sidzujñ dxej gacreni yälguxhtis.

*Guiraanu najcnu bendojl*

<sup>9</sup> ¿Dxejca'? ¿La najcnu beñhuenduxhru lojreni, ä? Dini gac; tebloj abile'cnu yälquij xten rexpén Israel con rebejn ni di gac xpen Israel, sa'csi guiraareni yu'reni lo dojl. <sup>10</sup> Si'cni caj lo guijtz:

Ruti te bens'a'c, nicla tejni.

<sup>11</sup> Ruti te bejn ni racbee,

ruti chu tej nani rguuil Dios.

<sup>12</sup> Guiragajcreni abirii lo xnejz Dios,

teblojsi xhet sajcdireni.

Ruti chu tej ni rujñ cossa'c, nicla tejni.

<sup>13</sup> Ro'reni rii ganax didxguijdx,

najcni si'c te baa ni naxal,

rusgueerene con lujdxreni,

didxlatsiaj rii ro'reni najcni si'c benen ni yu' ro' te bäñnialajz.

<sup>14</sup> Ro'reni entis cague,

entis canii didxrdxe'ch lo sa'reni.

<sup>15</sup> Ni'reni ruxunli saxhe' xtiejn sa'reni.

<sup>16</sup> Cadrotis rijreni rujñreni latsiaj,

ruteedrene sa'reni trabajw.

<sup>17</sup> Direni gumbée nezyuj ni ruscuecdxilajz.

<sup>18</sup> Niclaza guidxelojreni Dios.

<sup>19</sup> Racheenu najc rediidx nani caj lo xleii Dios par rebejn ni rnibee leii lojreni, te jiäuu ro' guiralii rebejn, te guiraa rebeñ guedxliuj gacheerene yu' xtojlneni nez loj Dios. <sup>20</sup> Sa'csi mase gusoob bejn guira'ti didx ni caj lo leii, di leiiga gudzucaj xtojlni bejnğa, sa'csi leiiga najc nani guluii dojl ni yu' nen lastooni.

*Ruslaa Dios lo dojl xcuent yärrililajz xtiidxni*

<sup>21</sup> Naj ruluii Dios stee mood guibicaj xtojlnu, nani di gac mood ni caj lo xleii toMoisés. Luxh galooli gusloj canii Dios xcuent nezyujre, cajni lo reguijtz xten leii näjza lo reguijtz ni bejn rebejn nani gunii xtidx Dios galoo. <sup>22</sup> Stee mood najc scree: Chutis ni chalilajz xtidx Jesucrist, sajc naya lastooni nez loj Dios; si'c sajc garaliiza nani salilajz, sa'csi tebloj najcnu nez lojni. <sup>23</sup> Sa'csi guiralii rebejn guedxliuj abanijt lo Dios, direni guiga' guidzujñreni lo xnezyuj Dios. <sup>24</sup> Niluxh balaslajz Dios nuunu, banidxxlia'ni loonu yäl'nabannaya nez loj Dios sa'csi Jesucristis gudijx yälguxhtis xten dojl che baxhe'ni xtiejn ni lo cruz te badzucajni xtojlnu. <sup>25</sup> Baxhañ Dios xi'nni, Jesucrist, te cuajni lo cruz nez loj rebejn te si'c gudijxni guiraa rextojlni chutis bejn ni rililajz xtidx Dios xcuent xtiejn Jesucrist. Si'c bejn Dios te guluiini xho guibannaya bejn lojni. Galoo gojptis Dios pasens rebejn, dini niujñ yälguxhtis rextojlneni, <sup>26</sup> sa'csi acanajñ Dios guc gunni yälguxhtis redojlğa, te si'c guiluiini xcäl'nayani nez loj guiraa rebejn, te Diospac gunnaya nez lojni chutis ni rililajz xtidx Jesucrist.

<sup>27</sup> Ni'cni ¿con yäl'naro? ¿Con yäl'binaan? ¡Xhet sajcdini! ¿Xhi leii rudzucaj xtojlnu? ¿La leii najc ni rnii jienu dzunsa'c, ä? ¡Dini gac si'c! Yu' tejtis leii ni rudzucaj dojl, nani rnii chalilajztis bejn xtidx Jesucrist. <sup>28</sup> Dxejc sajc guiniä lojtu chutis bejn sajc gac naya nez loj Dios sa'csi rililajzni xtidx Jesucrist, xhet sa'csi rujñni redzunsa'c ni caj lo leii.

<sup>29</sup> ¿La najc Dios Xtiooztis rexpén Israel, ä? ¿La dini gac näjza Dios xten rebejn ni di gac xpen Israel? ¡Xho dini gac! Najcni Dios xten guiop cuaa bejn. <sup>30</sup> Ruti chu stee Dios, tejtis Dios yu'. Ruslaani lo dojl rebejn ni guyu' bee sa'csi huililajzreni xtiidxni, sigajcza ruslaani lo dojl rebejn ni xhet beedi guyu' sa'csi huililajzaren xtiidxni. <sup>31</sup> ¿La rudzucajnu leii sa'csi rililajznu, ä? Ajndi. ¡Xho gacni si'c! Alga basoobnu xtidx leiiga che huililajznu xtidx Jesucrist.

<sup>1</sup> ¿Xhini'c sajc guiniinu xcuent toxtadgoldoonu, Abram? <sup>2</sup> Paru niajc toAbram beɲnaya nez loj Dios por redzuun ni bejn, pet sajc guibalazduxhni, per xhet nez lojdi Dios. <sup>3</sup> ¿Xhini'c caj lo xtidx Dios? Caj rediidxre:

Huililajz toAbram xtidx Dios,  
ni'c bachaag Dios cuent najcni te beɲnaya nez lojni.

<sup>4</sup> Meel nani rca' te bejn ni rujn te dzuun, meelga najc ni riäjł xca'ni, xhet rcaxlia'dinini. <sup>5</sup> Luxh nani rililajzti xtidx Dios ni rusłaa bejn lo dojl, lacuaa naani yu' xhi dzuun sajc gunni te guibicaj xtojłni, bejnga najc te beɲnaya nez loj Dios, sa'csi huililajzni xtiidxni. <sup>6</sup> Sigajcza naj toDavid, chichaa bejn nani ruchaag Dios cuent najcni te beɲnaya luxh di niqiuin niujnri redzuun ni caj lo leii. Räjłni:

<sup>7</sup> Chichaa renani abasłaa Dios lo xtojłreni,  
renani abiäu loj xtojłreni.

<sup>8</sup> Chichaa bejn nani ðiru Dios gun cuent xtojłni.

<sup>9</sup> ¿La sajc guiniini chichaa rebjntis nani guyu' bee, ä? ¿La et nädiza renani di niu' bee, ä? Sa'csi rniinu: "ToAbram gujc te beɲnaya nez loj Dios sa'csi huililajzni xtidx Dios." <sup>10</sup> Guc bidxaag cuent najcni te beɲnaya nez loj Dios ¿che gajdni chu bee, ä? O ¿Laa che guyu'ni bee? Bidxaagpac xcuentni che gajdni chu bee. <sup>11</sup> Dxejcti guyu'ni bee si'c te seen xten yälñaya sa'csi huililajzni xtidx Dios che gajłłni chu bee te gacni xtd guiraa renani rililajz lał ni xhet beedi yu' reni, te näjza laareni guidxaag cuent najcreni beɲnaya nez loj Dios, <sup>12</sup> te gaczani xtd guiraa renani yu' bee ni huililajzta xtidx Dios si'c huililajz toAbram cheni gajdni chu bee.

#### *Diidx ni bia'n Dios rsiojb xcuent yälřililajz*

<sup>13</sup> Bia'n Dios diidx loj toAbram näjza loj rexagdooni, xca'ni guedxliujre si'c yälñasa'c xtenti. Xhet sa'csi gusoobni xtidx leii xca'nini, sica'nini sa'csi najc toAbram te beɲnaya nez loj Dios sa'csi huililajzni xtidx Dios. <sup>14</sup> Sa'csi paru renani rusoob xtidx leiiga najc nani xca' yälñasa'cga, xlia'si challajz bejn xtidx Jesucrist, luxh xhetza sajcdi diidx nani bia'n Dios loj toAbram. <sup>15</sup> Che yu' te leii, luxh yu' chu di gusoobni, dxejrdx'e'ch Dios loj bejn. Cadro xheti leii, xhetiza xtojłreni.

<sup>16</sup> Ni'cni balasłajz Dios nuunu, te sudzu'tz diidx ni bia'n'ni loj toAbram, te guiraa rexagdooni ni rililajz sica' yälñasa'c, xhet xtebtis renani sasanäj xleii toMoisés, nägajcza renani rililajz xtidx Dios si'c huililajz toAbram, nani najc xtd guiraanu nani chalilajz xtidx Dios. <sup>17</sup> Si'cza caj lo xtidx Dios, caj rediidxre: "Abenä gaclu xtd xhidal renaciön." Si'c bia'n Dios diidx loj toAbram, Gueb Dios nani gudeed yälñabajł loj rebengut, nani rni xcuent recos nani gajd gac ascanu ala najcni.

<sup>18</sup> Anajn toAbram naganduxh soob diidx ni bia'n Dios con laani, luxh laani empac huililajzni, ni'c gujcnı xtd xhidajł naciön, te gusojb xtidx Dios ni guniini che räjłni: "Scree gac xhidajł rexagdoolu." <sup>19</sup> Di toAbram nunijł xcälřililajzni, mase ayu'ni tegayuu ijz, najnri najcni bengool, luxh sigajcza Sara abengool ðiru xi'nreni chu. <sup>20</sup> Dini niun-tio'p lajzni xcuent rediidx nani bia'n Dios con laani, alga gusutijpruni huililajzni xtiidxni, gulä'pni xpala'n Dios, badeedni xquixtis lojni. <sup>21</sup> Anajnri rajp Dios yälřnıbee te gunni guiralii nani bia'n diidx gunni. <sup>22</sup> Ni'c bachaag Dios cuent najcni te beɲnaya nez lojni sa'csi huililajzni xtidx Dios.

<sup>23</sup> Xhet xtebtisdi xcuent toAbram cuaj rediidxre: "Bidxaag cuent najcni te beɲnaya nez loj Dios sa'csi huililajzni xtidx Dios", <sup>24</sup> näjza xcuentnu cuajni, sa'csi che chalilaaznu xtiidx nani baspañsac Xtd Jesucrist loj rebengut, sidxaag cuent najcnu beɲnaya nez loj Dios. <sup>25</sup> Bacuaareni Jesucrist lo cruz te gudijxni rextojłnu nez loj Dios, luxh gubañsacni lo rebengut, te gac gacnu beɲnaya nez loj Dios.

## 5

### *Xhi rsiajc bejn che najcreni beɲnaya nez loj Dios*

<sup>1</sup> Ni'cni che rililajznu xtidx Dios rudzucaj Jesucrist xtojłnu rajcnu beɲnaya nez loj Dios, ni'cni ruscuedcxini lajznu. <sup>2</sup> Sa'csi gujt Jesucrist, sa'csi gubañsacni lo rebengut xcuent nuurnu, che rililajznu xtidx Dios xcuent Jesucrist, rulasłajz Dios nuurnu, ni'cni rbalajznu, rajpnu yälñabajł, su'pacnu lo xcälřdimbicha' Dios. <sup>3</sup> Luxh xhet ni'ctis, sajcza guibalaaznu che tednu trabajw, sa'csi najnri trabajwga sujł jia'pnu pasens. <sup>4</sup> Luxh che rajpnu pasens rajcnu te benguyajłru; che anajczanu benguyajł, rililazsa'crunu. <sup>5</sup> Luxh yälřrililazsa'cnu dini gusanxujy, sa'csi yälřanälajz ni rajp Dios ruchaaj lastoonu sa'csi neñ lastoonu rbäjz Xsprit Dxan xten Dios ni baniidxni loonu.

<sup>6</sup> Lał ni xhetiidi sajcdi jienu lagajc xcuentnu te guibicaj xtojłnu, che basa' dxej biäd Jesucrist te gujtni lo cruz xcuent rebendojl. <sup>7</sup> Guliipacni, naganduxh guidxälni te bejn ni xcäjł guet lacuaa te bejn ni laaca rujnri. Per sidxäjł te bejn ni xcäjł guet lacuaa te beñsa'c.

<sup>8</sup> Luxh Dios baluiloj xcälrinälajzni xcuent nuurnu sa'csi laj ni yugajcnu lo dojl, gujt Jesucrist lo cruzj xcuentnu. <sup>9</sup> Aticaxh naj ni najcnu bennaya nez loj Dios sa'csi baxhe'ni xtejnne te gubicaj xtojlnu, naj sidedcaj gacnu xcälguhtis Dios. <sup>10</sup> Palga laj ni rdxe'chnu lo Dios, basiäjlni lajzni xcuentnu sa'csi gujt Xi'nni lo cruzj, naj ni abiäjlni lajzni, suslaani nuure lo dojl sa'csi gubansac Xi'nni loj rebengut. <sup>11</sup> Luxh xhet ni'ctis, sibalaznäjnu Dios xcuent Dad Jesucrist, sa'csi xcuentni ara'pnu yälrbexdi lajzni nez loj Dios.

#### *Adän con Dad Jesucrist*

<sup>12</sup> Ni'cni, xcuent tejtis niguii biu' dojl lo guedxliuj, luxh xcuent dojl biäädza yälgujt, gudejdti yälgujt loj guiraa rebejn, sa'csi guiraa rebejn bejnreni dojl. <sup>13</sup> Cheni gajd xleii toMoisés chu lo guedxliujre, alabejn rebejn dojl, per di niajcdi nucuaquijni rebejn sa'csi xheti leii. <sup>14</sup> Luxh empac gujt rebejn nen redxer ni gubajn toAdän hasta redxer ni gubajn toMoisés, mase direni niujn lagajc dojl nani bejn toAdän; luxh ruluiloj yu' chu stee bejn nungäjlni jiaäd.

<sup>15</sup> Luxh nani runidx-xlia' Dios dini gac si'c najc xtojlni toAdän. Dini gac si'c sa'csi palga xcuent dojl ni bejn toAdän, gujt xhidalduxh bejn, cuantimaaz najsunidx-xlia' Dios yälñabajn par tejpas loonu por xcälrulasajz Dios, nägajc por xcälrulasajz Dad nani laa Jesucrist. <sup>16</sup> Luxh nani runidx-xlia' Dios loonu dini gac si'c yälrunijnt ni biääd loonu xcuent dojl ni bejn toAdän; sa'csi xcuent tejtis dojlga biääd yälguxhtis xten Dios, sa'csi guiraliiza rebejn guedxliujre yu' lo dojl, per xcuent nani banidx-xlia' Dios, nalajznu, gujt Xi'nni Jesucrist lo cruzj, ni'c gujc sa'csi yuduxhtej dojl, te xcuent ni bejn Jesucrist sajz gac bejn bennaya nez loj Dios. <sup>17</sup> Palga xcuent dojl ni bejn tejsi bejnnga gunibee yälgujt lo guiraa bejn, cuantimaaz lo yälñabajn par tejpas sinibee guiraa reni rca' xcälrulasajz Jesucrist näjza renani rca'xlia' lojni yälracnaya nez loj Dios.

<sup>18</sup> Ni'cni sigajc ni biääd yälguxhtis lo guiraa rebejn guedxliuj xcuent dojl ni bejn tejsi niguii, sigajcza sa'csi basoob stee niguii xtidx Dios, xhidal bejn gujc bennaya nez loj Dios, cua'reni yälñabajn par tejpas. <sup>19</sup> Nalajznu sigajc ni banijnt xhidalduxh bejn nez loj Dios xcuent tejn niguii ni di nusooob xtidx Dios, sigajcza xhidalduxh bejn sajz bennaya nez loj Dios xcuent tejn niguii ni basoob xtiidx Dios. <sup>20</sup> Ni'cni badeed Dios xleii toMoisés, te guzenru dojl. Niluxh cadro guyuduxh dojl, ro'c nanabza chuduxhru xcälrulasajzduxh Dios, <sup>21</sup> te sigajc ni gunibee dojl guyu' yälgujt, sigajcza guinibeeru xcälrulasajz Dios te jia'cnu bennaya nez loj Dios, te xca'nu yälñabajn par tejpas xcuent Xi'nni, Dad Jesucrist.

## 6

#### *Agujtnu lo dojl per nabannäjnu Jesucrist*

<sup>1</sup> ĽXhini'c guiniinu, naj? ĽLa sajz guidxunrunu lo dojl te tioobru xcälrulasajz Dios, ä? <sup>2</sup> ĽGurniälöjtu gacni si'c! Nuurnu najcnu si'c te bengut lo dojl sa'csi rililajznu xtidx Dios; Ľxhoxh gac guibajnrnu lo dojl? <sup>3</sup> ĽLa ditu gan, che gurobnisnu con laj Jesucrist, najcni si'c ni näjza nuurnu gujtnu si'c ni gujt Jesucrist? <sup>4</sup> Sa'csi che gurobnisnu bigatznäjnumi si'c lo yälgujt, te sigajcni huäjs Jesucrist lo yälgujt xcuent xcälrñibee Dios, sigajcza näj nuurnu sajz guidxunnu lo te yälñabancoob.

<sup>5</sup> Sa'csi palga gujcnu tejsi con laani lo xcälgujtni che birobnisnu, sigajcza sajcnu tejsi con laani lo yälñabansac lo rebengut. <sup>6</sup> Ni'cni xcärienbiejwnu cuaj lo cruzj con laani, te badzucajni rextojlnu, te di gacdiru guinibee dojl loonu. <sup>7</sup> Sa'csi nani agujt, di gacdiru guinibee dojl lojni. <sup>8</sup> Palga nuurnu agujtnu con Jesucrist, rililaaznu sibansaczanu con laani. <sup>9</sup> Sa'csi nadonpacnu gubansac Jesucrist loj rebengut, ni'c diruni guet, diru yälgujt ga'p yälrñibee lojni. <sup>10</sup> Che gujt Jesucrist, gujtni xcuent dojl, luxh diru gacdi guinibee dojl laani par tejpas; naj ni gubansacni, nabajnni nez loj Dios. <sup>11</sup> Ni'cni la'tu colguchaag cuent najctu si'c te bengut lo dojl, luxh nez loj Dios, colguchaag cuent nabannäjtu Jesucrist.

<sup>12</sup> Ni'cni na'c gusaantu guinibee dojl tiejxhtu te guntu si'ctis ni rlaiz tiejxhtu. <sup>13</sup> Na'cruza gusaantu jiajb guideb lagaa tiejxhtu lo dojl te guntu cosguijdx. Maazru hueen colgudeed tiejxhtu lo Dios si'c te bejn nani gubansac lo rebengut, näjza colgudeed guideb lagaa tiejxhtu te guntu recoshueen si'c ni rlaiz Dios guntu. <sup>14</sup> Sa'csi diru dojl guinibee lojtu, sa'csi dirutu chu loj xleii toMoisés, sa'csi yu'tu lo xcälrulasajz Dios.

#### *La'tu najc si'c remos*

<sup>15</sup> ĽXho gacni naj? ĽLa sajz jienrunu dojl naj ni dirunu chu lo leii sa'csi yu'nu lo xcälrulasajz Dios, ä? ĽXho gacni si'c! <sup>16</sup> La'tu nansa'ctu palga yu'tu si'c te mos loj te lam te gusobdiajgtu xtiidxni, najpactu xmos bejn nani rusooobtu xtiidxni. Ni'cni, palga gusoobtu xtidx dojl, ni'c najc xlamtu, ni'c siädnä yälgujt lojtu. Palga gusoobtu xtidx Dios, ni'c najc xlamtu. Dxejc sajctu bennaya nez loj Dios. <sup>17</sup> Xquixtios lo Dios, galoo gujctu xmos dojl, per naj guideb lastootu basobdiajgtu xtidxcoob Dios, huililajztu xtiidxni ni basule'nu lojtu. <sup>18</sup> Luxh agulaatu lo dojl, biädjiajctu xmos Dios lo dzunsa'c. <sup>19</sup> Narä cagusule'ä diidx con sa' didx



guyasire sa'csi gajdту gachesa'c xho najc xnezyuj Dios. Che gujctу xmos dojl, guideb lagaatu bejntu dojl, bejntu latsiaj, luxh ni'c satajltis latsiaj ni bejntu. Naj ni najctу xmos Dios lo dzunsa'c, guideb lagaatu colyeynrу dzunsa'c, te si'c sidajlrу dzunsa'c ni guntu sa'csi najctу bennaya nez loj Dios.

<sup>20</sup> Sa'csi che gujctу xmos dojl, di rextidx Dios guinibee la'tu. <sup>21</sup> Naja', xhini'c bejntu gaan che gujctу xmos dojl, bejntu recos ni rtuinajtu naj? Ni xnezyuj recosga rdzujn loj yalgujttis. <sup>22</sup> Per naj, sa'csi agulaatu lo dojl, abiu'tu najctу xmos Dios, sujntu sajctу bennaya nez loj Dios, luxh xnezyuj recoscoobre rdzujn lo yalnabannaj Dios par tejpas. <sup>23</sup> Xcalrajx xten dojl najc yalgujt, per nani runidx-xlia' Dios najc xcálnabannaj Dios par tejpas xcuent ni bejn Jesucrist xtdanu.

## 7

### *Yalrului ni rudeed yalguchnaa*

<sup>1</sup> Cania lojtu ni najn xleii toMoisés. ¿La ditu gan, resa'a, xleii toMoisés rnibee loj te bejn guideb nabajjni lo guedxlije? <sup>2</sup> Najcni si'c te gunaa nani bachnaa te niguii. Nanabpac cuáznajni cháalni guideb nabajjni. Si'c rnibee leiiga. Palga guet cháalni, diru gacdi guinibee leiiga lojni xcuent cháalni. <sup>3</sup> Ni'cni, laj ni nabajn cháal gunaaga, palga cuáznaj gunaaga ste'ca niguii, cayujjni dojl sirilajni gunaguijdx. Palga agujt cháal gunaaga, agulaani lo leiiga, sajc guchnaani stee niguii, xhet dojldi cayujjni, dizani guirilaj gunaguijdx.

<sup>4</sup> Ni'cni la'tu, rebetzá, sigajcza agulaatu lo leiiga, sa'csi najcni si'cni gujctу si'c bengut lo leii che gujt Jesucrist lo cruzj, te naj sajc jiu'tu lo ste'ca bejn, loj lagajc Jesucrist nani gubansac loj rebengut te sajc jiennu redzunsa'c ni rlanj Dios jiennu. <sup>5</sup> Sa'csi laj ni gubajnnu lo yalnababiejwga, lagajc rediidx nani rni leiiga di gacdi gun bejn, lagajc recosga rlanj gun tiejxhnu, luxh si'c sozaatisnu lo xnezyuj yalgujt. <sup>6</sup> Naj abiriinu lo leiiga, sa'csi agujtnu lo leiiga nani gunibee loonu galoo. Naj con xpritcoob ni yu' neñ lastoonu yu'nu lo Dios, xhet con xcárienbiejwdi ni gojpnу che nanab gusoobpacnu leii.

### *Redojl nani yu' tiexhá*

<sup>7</sup> ¿Xhixhni'c guiniinu naj? ¿La dojl najc leii, á? ¡Xho gacni si'c! Palga dina niembeá xhi caj lo leiiga, dizana niacheá cayuná dojl. Dina niacheá cayuná dojl che rlazá xca'a xhixten ste'ca bejn palga dina niolá lo leii rediidxre: "Na'c chuguij lajzlu rehxixten bejn." <sup>8</sup> Ni'cni lagajc diidx ni caj lo leiiga bejn guyuguij lazá rehxixten bejn sa'csi nancheá najcni dojl. Paru xheti leii, xhetiza dojl, agujtni. <sup>9</sup> Galoo gubaná xhet leiidi naná, luxh che biáad diidx ni rnibee leii, gubeá xhini'c najc dojl, dxejc banitá lo Dios, si'c ni gutá. <sup>10</sup> Luxh baxhal Dios leiiga loonu te jiuáni, te xca'a yalnabajn, luxh alga bazepni bená dojl, banitá nez loj Dios, gutáti dxejc. <sup>11</sup> Con leiiga, basguee dojl nará, bejnni nará si'c te bengut nez loj Dios.

<sup>12</sup> Ni'cni, leii najc dxan, nájza rediidx ni caj lo leiiga najc dxan; hueen najcni, didxgulii najcni. <sup>13</sup> ¿Dxejca'? ¿La nani najc te coshuen huiná nará lo yalgujt, á? ¡Xho gacni si'c! Dojl najc ni huiná nará lo yalgujt. Te si'c xcuent leiiga ni nasa'c, jienlojni dojlpac najc dojl sa'csi bagu'tni nará con te coshuen, te lagajc rediidx ni caj lo leiiga jienloj lacti latsiaj najc dojl.

<sup>14</sup> Sa'csi nadonnu leiiga najc xtidx Dios, luxh nará nacá te beñ guedxliujre, nacá xmospac dojl. <sup>15</sup> Sa'csi dina gacheá xhini'c runá. Dina guná recos nani rlazá guná, alga cayuná latsiaj nani dipacna rlazá guná. <sup>16</sup> Naj palga nará runá latsiaj nani dipacna rlazá guná, lagajcza ni'c ruluii hueenca najc leii. <sup>17</sup> Naj, diruni gac nará ni cayujn latsiaj, sa'csi yu' dojl neñ lastoá, ni'c ni cayujn runá latsiaj. <sup>18</sup> Sa'csi nará naná neñ lastoá, nalajznu lo tiexhá, xhetliidi cossa'cди yu'; sa'csi rlazá guná cossa'c, per dina gacdipá te gunápac recossa'cga. <sup>19</sup> Sa'csi dina guná redzunsa'c nani rlazá guná, alga latsiaj nani diru rlazá guná, ni'c runá. <sup>20</sup> Ni'cni palga runá latsiaj nani diru rlazá guná, xhet narádi runáni, dojl ni yu' tiexhá, ni'c ni cayujn runá latsiaj.

<sup>21</sup> Ni'cni nará, nani rlazá guná redzunsa'c, rdxälá leiire: yu'pa dojl tiexhá. <sup>22</sup> Sa'csi neñ lastoá, rlazápac gusobá diidx xten xleii Dios. <sup>23</sup> Luxh ruhuiá garenca leii yu' guideb lagaa tiexhá, ruchagdijlni leii ni yu' xcáriená, ruteedzani nará ladznaa xleii dojl nani yu' guideb lagaa tiexhá.

<sup>24</sup> ¡Proobza nará! ¿Chuni'c guslaa tiexhá ni nungájl guet xcuent dojl? <sup>25</sup> ¡Xquixtios loj Dios sa'csi Dad Jesucrist sajc guslaa nuurnu lo dojl! Ni'cni con xcáriená rusobá xtiidx Dios, yu'á lo xleii Dios, niluxh tiexhá rlanj gusoob xtiidx dojl, chuni lo xleii dojl.

## 8

### *Yalnabajn ni najc xcuent Sprit Dxan xten Dios*

<sup>1</sup> Ni'cni naj rut rajcди rbe'c xcálquij renani ahuililajz xtidx Jesucrist, renani diru jiu gunreni latsiaj ni rlanj gun tiejxhreni, alga riurureni rujnreni ni rnibee Sprit Dxan xten Dios ni rbájz neñ lastooreni. <sup>2</sup> Sa'csi leii xten Sprit Dxan xten Dios ni rudeed yalnabajn

xcuent Jesucrist, abaslaani narä lo yälrnibee xten xleii dojl näjza yälgujt. <sup>3</sup> Sa'csi nani di niajcdi niujn leibiejw, sa'csi dini niajc nadip lo rebenguedxliuj te gacreni bennaya nez loj Dios, ni'c bejn Dios che baxha'ni Xi'nni Jesucrist, si'c te bej guedxliujre xcuent dojl, te bejnii yälguxhtis lo dojl ni rnibee tiejxh bejn. <sup>4</sup> Te si'c gac xcälguhtis xten leibiejw lo tiejxh nuurnu, renani dirunu gusoob nani r'rajz gun tiejxhnu, sa'csi naj rbaj'nnu si'c ni rnibee Sprit D'xan xten Dios ni yu' neñ lastoonu.

<sup>5</sup> Sa'csi renani rusoobtis nani r'rajz gun tiejxh'reni, rujntis'reni xhigab xcuent redojlga, luxh renani rusoob xtid'x Sprit D'xan xten Dios rujntis'reni xhigab xcuent nani r'rajz Dios gun'reni. <sup>6</sup> Sa'csi renani yu'tis yejcreni nani r'rajz gun tiejxh'reni, sejt'reni, sinij't'reni; luxh renani yu'tis yejcreni nani r'rajz Sprit D'xan Dios, reni'c sibe'd'x'i lajz'reni, sica'reni yäl'nabaj' lo Dios par te'jpas. <sup>7</sup> Te xcäriej'n nani riutis ni r'rajz gun tiejxh bejn r'd'x'e'ch Dios loj'ni sa'csi dini gusoob xleii Dios, luxh nicla gac gun'nini. <sup>8</sup> Renani nabaj'tis te gun'reni latsiaj ni r'rajz gun tiejxh'reni di Dios guibalaz'nä'reni.

<sup>9</sup> Luxh la'tu dirutu gun si'ctis ni r'rajz gun tiejxhtu, ni'cni rujntu si'c ni r'rajz Sprit D'xan xten Dios guntu, palga rbä'j'ni neñ lastootu. Palga yu' chu te'jtu ni di Sprit D'xan cuääz neñ lastooni, di ni'c gac xpe'j'ni. <sup>10</sup> Palga rbä'j'z Jesucrist neñ lastootu, agujt tiejxhtu xcuent dojl, xp'rittu nabaj' sa'csi anajctu bennaya nez loj Dios. <sup>11</sup> Luxh palga neñ lastootu rbä'j'z Sprit xten nani baspa'ncac Jesucrist loj rebengut, lagajc nani baspa'ncac Jesucrist lo rebengut suspa'ncac tie'xhnu ni nabaj' lo guedxliujre xcuent Xp'ritni nani yu' neñ lastoonu.

<sup>12</sup> Ni'cni rebetzä, najcnu bejn ni cuaj di'n, xhet lojdi tie'xhnu te jiennu si'c ni r'rajz gun tie'xhnu. <sup>13</sup> Sa'csi palga cayujntu si'c ni r'rajz'tis gun tiejxhtu, sejt'pactu. Palga nabaj'ntu xcuent Sprit D'xan xten Dios ni rbä'j'z neñ lastootu, sibälaztu latsiaj ni r'rajz gun tiejxhtu, sibannä'jtu Dios par te'jpas.

<sup>14</sup> Sa'csi guiraa renani ruluii Sprit D'xan xten Dios guiraa reni'c najc rexi'n Dios. <sup>15</sup> Naj ditu nica' te sprit xten te mos te chusactu lo yäl'r'd'x'e'j'b, alga gac'au'tu sprit xten ni najc si'c te bisia'j'b ni cua' bejn si'c xi'npacni, naj najcnu xi'nni, ni'cni sajc gäbnu loj'ni: "Guejblu, Xta'dä." <sup>16</sup> Sa'csi lagajc Sprit D'xan xten Dios ruluii loj xp'ritnu, najc'p'acnu xi'n Dios. <sup>17</sup> Luxh palga najcnu rexi'nni, sica'zanu yäl'nasa'c lo Dios, tejsi yäl'nasa'c con Dad Jesucrist, palga guliini tednu lagajc trabajw ni gudej'dni xcuent xti'd'x'ni, te tejsiza siliä'p xp'ala'nnu con laani.

<sup>18</sup> Sa'csi narä runä xhigab retrabajw ni cadej'dnu neñ redx'e'j're, digacdi gun tebl'ooun'reni con yäl'r'dim'bicha' nani churu guihuiinu. <sup>19</sup> Sa'csi guiraa recos nani benchee Dios lo guedxliujre, cabä'j'z'reni, yuduxh'reni gaan fiireni dxej che guluiloj Dios chuni'c najc rexi'nni. <sup>20</sup> Guiraa recos ni gulecxtiej Dios lo guedxliujre, xlia'si gujcreni, xhet sa'csi si'c r'rajz'di recosga, per sa'csi si'c bejn Dios, ni cabä'j'z'tis <sup>21</sup> gusa'p'acni guiraa recos ni benchee lo guedxliujre lo xcäl'rnibee yälgujt, yäl'rnitloj, te dxej sajc jiu'ni lo yäl'r'bed'xi xten xcäl'r'dim'bicha' xten rexi'n Dios. <sup>22</sup> Guiraa recos ni gulecxtiej Dios lo guedxliujre entis roon'reni, guira dxej r'dej'd'reni trabajw, si'c r'dej'd te gunaa trabajw che rajl xi'nni. <sup>23</sup> Luxh xhet nani tre'tis lo guedxliujdi, näjza nuunu ni yu' Sprit D'xan xten Dios neñ lastoonu, roonzanu cabä'ä'znu dxej cheni xca' Dios nuure si'c rexi'nni, cheni guscoobzani tie'xhnu. <sup>24</sup> Sa'csi xcäl'r'ililaaznu ni rbä'ä'znu, ni'c bejn gulaanu luxh yäl'r'bä'j'z ni guyasi rien, di ni'c gac yäl'r'bä'j'z, sa'csi çchu laa ni cuääz xcuent te cos ni ala bahuini? <sup>25</sup> Palga cabä'ä'znu xcuent te cos ni gaj'dnu guihuii, rbaali laaznu, rsiudzu'tznu rbä'j'znu guihuiinu gacni.

<sup>26</sup> Sigaj'za racnä'j Sprit D'xan xten Dios nuure cadro xheti yäl'r'utijp laaznu sa'csi nicla guidonnu xho mood riä'j'l guiniab bejn lo Dios. Luxh lagajc Sprit D'xan ni yu' lastoonu r'niabni lo Dios xcuent nuure con yäl'r'bed'x'neñ nani nicla gaj'd bejn gäb con diid'x xho najcni. <sup>27</sup> Dios, nani rula'tz lastoonu, nanchee xh'ini'c r'niab Sprit D'xan xtenni xcuent nuurnu, sa'csi r'niabni si'c'p'ac ni r'rajz Dios guiniabnu xcuent rexej'npac Dios.

### *Siennu gaanpac loj guira'ti*

<sup>28</sup> Nadoncheenu guira'ti ni rsiajc rebejn ni sanälajz Dios, reni agule Dios te gun'reni xtz'uunni rsiajcrenini te gun Dios gac recosga par xcäl'nasa'creni. <sup>29</sup> Sa'csi renani biembee Dios galooli, reni'c gule Dios cheni gaj'dli guirix'tiej guedxliujre, te gacreni si'c ni najc Xi'nni; te gacza Xi'nni ganid loj guiraa ni najc famil xten Dios. <sup>30</sup> Renani guleni galooli, reni'c gurej'dxni; renani gurej'dxni, bejnzani najcreni bennaya nez loj Dios; renani bejnii najcreni bennaya nez loj Dios, gulä'p'zani xp'ala'n'reni.

<sup>31</sup> çXhixh'ni'c guiniinu xcuent dee? Palga yu' Dios xlaadnu, çchuxh ni'c najc ni gun gaan loonu? <sup>32</sup> Dios nani di nudxo'j'n Xi'nni, nani cuä'j'b cuaj Xi'nni lo crujz te guj'tni, te gudij'xni xcuent xto'j'l'nu, çxho dini guniidx loonu xcuent Xi'nni guira'ti nani r'quiinu, ä? <sup>33</sup> çChuni'c sajc cue'c xhi xcäl'quij reni agule Dios nez lo Dios, ä? Ni lagajc Dios najc nani r'ni najcnu bennaya nez loj'ni. <sup>34</sup> çChuni'c najc nani cue'c xhi xcäl'quijnu nez lo Dios? Jesucrist najc nani gujt por nuure, luxh et ni'ctis. Laani guba'ncaczani loj rebengujt, luxh naj sobga'ni xladbee Dios cadro rnibeeni; laazani cabej'dx canabni lo Dios xcuentnu. <sup>35</sup> çChuni'c sajc gudzucaj

nuurnu lo yäl'sanälajz xten Jesucrist: trabajw, o yäl'xliajs, o yäl'rusacsí, o yäl'rliaan, o yäl'xhabääl, o yäl'rdejejb, o te spaad, ä? Nicla tejni. <sup>36</sup> Si'c ni caj lo guijtjz ni caj xtidx Dios: Xcuentlu, sa'csi najcnu xpejnlu caye'tnu guixe-guixee.

Ruchaagreni cuent najcnu si'c xiiil ni aguro' te ju't bejnni.

<sup>37</sup> Luxh loj guiraa recosre, sujnpacnu gaan xcuent nani sanälajz nuure, sa'csi sacnäjpacni nuure. <sup>38</sup> Sa'csi anancheä nicla yäl'guijt, nicla rexangl Dios, niclaza renani rnübee, nicla recos ni yu' naj, niclaza recos nani churu gac, niclaza yäl'milaagwr, <sup>39</sup> nicla jiaroduxh, niclaza jäjtpac, niclaza xhitis cos ni guc-chee, nicla tej redee di gacdi gudzucaj nuurnu lo xcäl'sanälajz Dios, yäl'sanälajz ni rajpza Dad, Jesucrist.

## 9

### *Dios agule reben Israel*

<sup>1</sup> Caniä didxguliipac lojtu sa'csi rililazä xtidx Jesucrist. Dina guiniä didx-xhii. Sprit Dxan xten Dios caculii xcarienä laaca rniä; <sup>2</sup> cayac-huinduxh lastoä, sanuutis yäl'xliajs. <sup>3</sup> Sa'csi narä rlaazä malaii sajz lagajc narä nitlöä lo Dios te sajz gacnää resa'ä lo guedxliujre, rexpejn Israel. <sup>4</sup> Sa'csi laareni najc xagdoö toIsrael, luxh laareni nungäj'l gaceni si'c xi'npac Dios. Gubannäj Diosreni. Bia'n Dios didx con laareni. Basa'n Dios xleii Moisés lojreni. Bazuxhijbreni nez lo Dios nen guidoo. Sica'reni reyäl'nasa'c xten Dios palga jiureni xtiidxni. <sup>5</sup> Laareni najc rexagdoö xten toxtadgooldoon ni gubajn agujc xhero. Jesucrist gujcaza xagdoö xten toIsrael che gojlni si'c te bejn guedxliuj. Laani najczani Dios loj guiraanu. Suchä'p xpala'nni par tejpas. Sugacni si'c.

<sup>6</sup> Luxh dini gac si'cni abanijt xtidx Dios nani bia'nni loj toIsrael. Sa'csi xhet guiraadi rebejn ni najc xagdoö toIsrael najc xpejn'pac Israel. <sup>7</sup> Diza guiraa reni najc rexagdoö toAbram gac xi'nguliipacni sa'csi räjp Dios lo toAbram: "Rexagdoölo nani guigab najc reni gac xagdoö Isaac." <sup>8</sup> Ni'cni xhet guiraadi rexagdoö toAbram najc rexi'n Dios, xtebtis renani chalilajz xtiidxni, reni'c najc xi'nni. <sup>9</sup> Sa'csi bia'n Dios diidx loj toAbram: "Stebijz, lagajc bäiire guibisacä, te dxejc chu te xi'n Sara."

<sup>10</sup> Xhet diidxtisga gunii Dios. Guniiizani lo toRebeca, che nuxi'nni cua'ch, xi'n chääl'ni, toxtadgoolnu Isaac. <sup>11</sup> Ni'cni ansde gaal rexi'nni, ansde niujnreni te dzunsa'c o te dzunguijdx, te soobpac xtidx Dios xcuent chuni'c cueni lo guiro'p rebäzre, xhet sa'csi bejndireni dzunsa'c, per sa'csi agule Diosni, <sup>12</sup> ni'c räjp Dios lo toRebeca: "Xingangaloolu gac xmos xinhuinlu." <sup>13</sup> Si'cza caj lo guijtjz rediidxre: "Sanälazä Jacoob, niluxh bidxechnää Esaü."

<sup>14</sup> Xhini'c guiniinu naj? Xhet laadi rujn Dios, ä? Xho gacni si'c! <sup>15</sup> Sa'csi räjp Dios loj toMoisés: "Sulaslazä chutis bejn nani rlaazä gulaslazä, sacnää chutis bejn nani rlaazä gacnää." <sup>16</sup> Ni'cni dini gac xcuent ni rlaajz rebejn gac, dizani gac xcuent nani rujn rebejn. Rajctisni si'c rlaajz Dios nani rulaslazajz bejn. <sup>17</sup> Ni'cni caj lo guijtjz xten Dios che gunii Dios xcuent Faraón: "Narä benä gujclu reii xten Egipto te guluiloj xcäl'rnibeä, te guiliä'p bejn xpala'nä guideb guedxliujre." <sup>18</sup> Rulaslazajzni rebejn nani rlaajztisni, runnadipzani lastoo bejn nani rlaajztisni.

<sup>19</sup> Naj la'tu siniitu loä: "Xhicient rucuaquijni bejn? Xchuni'c sajz sudzu'tz nez loj nani rlaajzni gac, ä?" <sup>20</sup> Xchuxh luj, bejn guedxliuj, te jieinäjlu Dios? Xhixh säjb te gues loj nani bencheeni: "Xhicient bejnlu narä scree?" <sup>21</sup> Gurniälöjlu. Bejn nani runchee guejs, ä la di gacdi gunni si'ctisni rlaajzni con bajnga, ä? Xla di gacdi guncheeni te guessa'c nägajza te guesyuj ni xhet sirbdi con lagajc bajnga?

<sup>22</sup> Xhiru najc, palga Dios rlaajzni guluilojni xho rujjni yäl'guxhtis, näjza rlaajzni guluilojni xcäl'rnibeeni, gopnäjni pasens renani nungäj'l gac yäl'guxhtis, te nitlojzaren, ä? <sup>23</sup> Bejnni si'c te guluilojni lacti sajz xcäl'rindibicha'ni loj renani galooli guleni chü lojni lo xcäl'rindibicha'ni. <sup>24</sup> Lagajz nuurnu najcnu reni aguleni; xhet xtebtis loj rexpen Israel guleni nuurnu, näjza loj rebejn ni di gac rexpen Israel guleni nuurnu. <sup>25</sup> Cajza lo guijtjz ni bacuaa Oseas: Renani di gac xpenä, reni'c cuälää "xpenä".

Luxh nani dina ninälazä, sinälazäni.

<sup>26</sup> Dxejcti lagajc cadro räjpreni lojreni:

"Ditu gac rexpenä",

lagajc ro'c säjpreni lojreni:

"La'tu najctu xi'n Dios ni nabajn par tejpas."

<sup>27</sup> Cajza lo guijtjz ni bacuaa Isaías: "Mase najc xhidajl rexpen Israel si'c najc yujxh ni tre' ro' nisdoo, guxii gac reni laa lo dojl." <sup>28</sup> Sa'csi susoobpac Dad, Dios xtiidxni xcuent xcäl'guxhtis reben guedxliuj, luxh siojzba gunnini." <sup>29</sup> Guniiza Isaías, xcuent nani churu gac, bacuaani: Palga di Dios ni yu' xhaguibaa nusa'n gaii xagdoö reben tiemp, najcnu si'c gujc Sodoma näjza Gomorra, reguejdx ni gunitloj.

*Xtidx Dios näj rexpen Israel*

<sup>30</sup> ¿Xhini'c sajc guiniinu ñaj? Rebejn nani di gac xpen Israel, direni niguuil xho gacreni bennaya nez loj Dios, niluxh agucreni bennaya nez loj Dios sa'csi huililajzreni xtidx Jesucrist. <sup>31</sup> Luxh rexpən Israel, mase sanuutisreni lo xleii Moisés ni ruluii xho gac bejn bennaya nez loj Dios, banijtreni, direni niujn gaan nusoobreni guideb leiga. <sup>32</sup> ¿Xhicuent gujčni si'c? Sa'csi direni nililajz xtidx Dios, alga rlajzreni guntisreni dzuun xten leii, naareni si'c gacreni bennaya nez lo Dios. Ni'cni rlajz ni'reni lo guij ni rutienta' bejn, nalajznu direni nililajz xtidx Dios xcuent Jesucrist. <sup>33</sup> Si'cza bacuaa Isaiás, rájpn: Aguleä te bejn lo guedx Sión ni gac si'c te guij cadro rtiäjł ni' bejn, te guij ni rusälta' bejn.

Chutis tej nani chalilajz xtiidxni, dini jianxtujy.

## 10

<sup>1</sup> Rebetzä, rladzuxhä chalilajz rexpənä xtidx Dios. Rniabduxhä lo Dios te guslaanireni lo xtojłreni. <sup>2</sup> Narä rniäpac nancheä ruzuxhijb rexpən Israel lo Dios, niluxh direni gumbesa'c xhini'c rlajz Dios gunreni. <sup>3</sup> Sa'csi direni niacbee xcuent xho rajc te bejn te bennaya nez loj Dios, ni'c rlajzreni gunreni dzuun si'c ni caj lo leii te gacreni bennaya nez loj Dios, ni'cza direni nusoob xtidx Dios te gacreni bennaya nez lojni. <sup>4</sup> AbasooB Jesucrist xtidx Leii, ni'cni che chalilajz bejn xtidx Jesucrist, anajceni bennaya nez loj Dios.

<sup>5</sup> ToMoisés bacuaa rediidxre: "Chutis ni rlajz gac bennaya nez loj Dios sa'csi rusoobni xtidx leii, nanab gusobsa'cpacni diidxga guideb nabajłni lo guedxliujre." <sup>6</sup> Xcälñayareni nez loj Dios sa'csi rililajzreni xtidx Jesucrist, rniü scree: "Na'c guiniitu nen lastootu, ¿chuni'c chä'p xhaguibaa?" nalajznu, te jiädñäsacni Jesucrist loj guedxliuj. <sup>7</sup> Na'cza gäbni: "¿Chuni'c jäjt gabijł?" (nalajznu te chaxiini Jesucrist loj rebengut). <sup>8</sup> ¿Xhini'c rniüni ñaj? Rniüni: "Diidxga suga' gajxh ro'tu, nen lastootu." Nalajznu, diidx xcuent yälřililaaaz nani cagusule'nu lojtu. <sup>9</sup> Rniünu lojtu, palga guiniitu con ro'tu, Jesucrist najc Dad loonu, palga chalilajztu baspanšac Dios Jesucrist loj rebengut, suslaani la'tu lo dojl. <sup>10</sup> Sa'csi con lastooni rililajz biniet xtiidxni, ni'c rajcni bennaya nez loj Dios; luxh che rcäjzpa biniet con ro'ni, Jesucrist rñibee loonu, ruslaa Diosni lo dojl.

<sup>11</sup> Sa'csi rniü xtidx Dios scree: "Chutis ni rililajz xtidx Dad Jesucrist, dini jianxtujy." <sup>12</sup> Sa'csi guiraa rebejn najc tebloj nez lojni, rexpejn Israel sigajc rebenzijt, sa'csi lagajc laani najcni Dad lo guiraaareni, rulaslazduxhni guiraa renani rbedx-rniab lojni. <sup>13</sup> Lo xtidx Dios caj rediidxre: "Chutis ni rbedx-rniab lo Dad, siljaani lo xtojłni palga rililajzni xtidx Dios." <sup>14</sup> ¿Xho gac guiniabreni lo Dad, palga direni chalilajz xtiidxni? ¿Xho gacza chalilajzreni xtiidxni, palga gajd diajgreni jiejn xtiidxni? ¿Luxh xho jiejn diajgreni xtiidxni palga rut rusule'di diidxga lojreni, ä? <sup>15</sup> Luxh ¿xhoza gusule'reni diidxga palga rut guxhalđireni? Si'cni caj lo guijtz: "Chipza saru najc ni' renani riädñä diidx xcuent cossa'c, yälřbedcxi lajz rebejn."

<sup>16</sup> Xhet guiraađireni rusoob xtiidxni, sa'csi guniiza toIsaiás: "Dad, ¿chuni'c chalilajz xtiidxnu?" <sup>17</sup> Rililajz bejn xtidx Dios che rucuađiajgreni diidxga; rucuađiajgzareni che yu' chu rusule' xtidx Jesucrist.

<sup>18</sup> Naj arniä: Gajdpac diajgreni jiejn xtiidxni, o ¿la babiejn diajgreni, ä? Pues abiejn diajgreni, sa'csi lo xtidx Dios caj scree:

Abire'ch xse'reni guideb guedxliuj,

abidzujzxa rextiidxreni lo guiraa reguejdx ni tre' lo guedxliujre.

<sup>19</sup> Rniäza: Dipac rexpən Israel niacbee, o ¿la gucbeereni, ä? Galooli gunii toMoisés rediidxre:

Sunä gudxojuu xcuent rebejn ni di gac te guejdx, con te guejdx nani di gacbee suche'chä la'tu.

<sup>20</sup> Diza toIsaiás nidxejb guniini rediidxre:

Renani di niguuil narä, bidxäjł narä,

baluiloäza loj renani di niniabdiidx narä.

<sup>21</sup> Guniiiza toIsaiás xcuent rexpən Israel:

Desde galooli, dxej-yääl basgää ñää lo rebejnğa te niureni xtidxä,

luxh najceni bejn ni di gusoob diidx, rutzu'reni didxnaj.

## 11

### *Rexpən Israel nani gułaa lo dojl*

<sup>1</sup> Arniä: ¿La agulälaz Dios rexpən Israel, ä? ¿Xho gacni si'c! Ni lagajc narä nacä te xpen Israel, te xagdo toAbram, nadxagä lo resa' toBenjamín. <sup>2</sup> Di Dios nibälaz rexpeljłni, xpen Israel nani guleni galooli che gajdli guirixtiej guedxliuj. O ¿la dilu gacbee xhi caj lo xtidx Dios cadro rniü xcuent Eliás, xho gunabduxh Eliás didxnaj lo Dios xcuent rexpən Israel, ä? Rájpn scree: <sup>3</sup> "Dad, abagu'treni guiraa reniguui nani gunii xtiidxlu, abatzujłreni

rexquidoolu, xtebtis narä bia'nä, luxh naj rrlajzreni ju'treni narä.”<sup>4</sup> Luxh, çxhini'c räjp Dios lojni? Räjpni: “Abaluheä gajdz mil bejn nani gajd guzuxhijb nez loj Baal.”<sup>5</sup> Si'cza naj, abia'n te chinae' rexpem Israel nani agule Dios xcuent xcäl'rulaslajzni. <sup>6</sup> Dxejc palga ruslaani nuure lo dojl xcuent xcäl'rulaslajzni diruni gac sa'csi yu' xhi dzuun bienu te nuslaani nuure lo dojl. Paru si'c najcni diru xcäl'rulaslajz Dios gac yäl'rulaslajz.

<sup>7</sup> ÇDxejca'? Di rexpem Israel nidxäl nani caguüilreni, luxh rebejn nani agule Dios, ni'c bidxälni, luxh ste cuaareni, aguyalajzreni. <sup>8</sup> Gujcnj si'c caj lo xtidz Dios:

Bascäy Dios xcäriejnreni, näjza balojni di jien,  
lo dxe najli di diajgreni jiejn.

<sup>9</sup> Guniiza toDavid, scree caj lo xtidz Dios:

Sugun xmex lanijreni jiajbreni,

te gac guiga'reni,

sugacni si'c guij ni rulani' bejn, te gacreni yäl'guxhtis.

<sup>10</sup> Suguscäy Dios balojreni te na'c fisa'creni,

sujie't dejtzreni, sutedreni trabajwduxh par tejpas.

*Yäl'ruslaa lo dojl xten bejn ni di gac xpen Israel*

<sup>11</sup> Naj rniabdidxä: çLa biajb rexpem Israel te gunijtreni par tejpas, ä? çXho gacni si'c! Sa'csi biajb rexpem Israel, ni'cni gojl biääd yäl'ruslaa lo dojl lo bejn ni di gac xpen Israel, te si'c guisiäblajz lajz rexpem Israel laareni lo dojl. <sup>12</sup> Palga xcuent dojl ni bejn xpen Israel gojp reben guedxliuj xcäl'nasa'c Dios, palga xcuent yäl'runjit xten rexpem Israel guyu' xcäl'nasa'c Dios par rebejn ni di gac xpen Israel, aticaxh chu xcäl'nasa'creni che gusoob xpen Israel xtidz Dios.

<sup>13</sup> Naj caniä lojtu ni najc bejn ni di gac xpejn Israel. Gule Dios narä te gusule'ä xtiidxni lojtu, ni'cni caläpä xpala'n xtzunä, <sup>14</sup> te don xho gunä te guisiäblajz reben ladxä ni najc xpen Israel, te si'c chalilajzreni xtidz Jesucrist. <sup>15</sup> Palga gulecdxireni lajz reben guedxliuj con Dios sa'csi gulälaz rexpem Israel xtidz Jesucrist, aticaxh che chalilajz rexpem Israel rextidz Jesucrist, sibansac renani najc si'c bengut. <sup>16</sup> Palga tla' cojb najc hueen, guideb cojbga najc hueen. Sigajcza najc te yajg; palga xlobaani najc hueen, guidebni najc hueen.

<sup>17</sup> Rexpem Israel najceni si'c te yajg oliib; palga gutiuugreni te naa yajgga, dxejc ro'c guquiidreni naa ste'ca yajg te guibajjni con xtiejn yajg oliibga. <sup>18</sup> Ni'cni, na'c gactu guyalajz lo renaapac yajgga. Colgusnaj lajztu, xhet la'ditu ni rudeed yäl'nabajn lo xlobaa yajgga, lobaaga ni rniüidx yäl'nabajn lojtu.

<sup>19</sup> Dxejc colguinii: “Batiuugreni naapac yajgre, te gujc biguidä cuä' yajgga.” <sup>20</sup> Guliipacni, biru' naapac yajgga sa'csi direni nililajz xtidz Dios luxh la'tu biguidtu cuä' yajgga sa'csi huililajztu xtiidxni. Na'c gactu guyalajz, colguidxieb, <sup>21</sup> sa'csi palga di Dios nutedbia renaa yajgga, diza Dios gutedbia la'tu. <sup>22</sup> Bahuii çlacti hueen najc Dios! Luxh lacti niälajzani; con renani banij najcni niälajz, luxh lacti rulaslajz Dios la'tu palga chanuu jiutu xtiidxni. Palga ditu jiu xtiidxni, näjza la'tu sudzucaj Dios. <sup>23</sup> Luxh sigajcza reni bidin, palga di chanuu cuälazreni xtiidxni saje suquidsac Diosreni lo yajgga. <sup>24</sup> Luxh la'tu najctu benzijt, najctu si'c naa te yagoliib ni xtebca gulejn nen dajn. Luxh batiuugni la'tu te baquiidni la'tu lo te yagoliib ni najc yagsa'c ni rcaduxh oliib lojni, mase xhet si'cti najc olibguixhga, çaticaxh rexpem Israel ni banij najc si'c naapac xten yagolibsacga ni bidin, palga chalilajzpacreni xtidz Dios, suquidsac Diosreni loj yajg ni najc xtenpacreni!

*Che laapac rexpem Israel lo dojl*

<sup>25</sup> Rebetzä, rlazä gacheetu xcuent te diidx nagajn, te di naatu nanduxhtu. Dee najc didx nagajnga: yu' rexpem Israel ni guc najd lastooreni te direni nililajz xtidz Dios, hasta guisa' redxer ni chalilajz rebenzijt xtidz Dios. <sup>26</sup> Dxejcti si'laapac guiraa rexpem Israel lo dojl che chalilajzreni xtidz Dios, sa'csi si'c caj lo xtidz Dios, cadro caj rediidxre:

Nani ruslaa sajc bejn guedx Siön,

luxh sudzucajni xtoj renani najc xagdoo toJacoob.

<sup>27</sup> Dee najc diidx ni bia'nä con laareni,

che gudzucaä xtojreni.

<sup>28</sup> Naj, najceni xcontraar Dios sa'csi rdxe'chreni xcuent xtidz Jesucrist, te chalilajztu; niluxh Dios sanälajzreni sa'csi si'c abia'nni diidx con retoxtadgoldooreni. <sup>29</sup> Sa'csi rut rajcdi rudzucaj nicla yäl'nasa'c ni rudeed Dios, niclaza yäl'rbejdx xten Dios. <sup>30</sup> La'tu galoo ditu nusoob xtidz Dios. Naj rulaslajz Dios la'tu sa'csi gulälaz rexpem Israel xtiidxni. <sup>31</sup> Sigajcza naj direni gusoob xtidz Dios, niluxh si'c najcni te gulaslajz Diosreni sa'csi balaslajzani la'tu. <sup>32</sup> Dios basaan biajb guiraanu lo dojl, te si'c sajc gulaslajz Dios guiraanu.

<sup>33</sup> çLacti guroob najc yäl'nasa'c xten xcäl'najn, xcäl'rabebe xten Dios! Nicla tej bejn guedxliuj di gachee guiraa rexcäl'guxhtisni, rudliidiza najn rexnezyujni. <sup>34</sup> Si'c caj lo guijt: “çChuni'c gucbee xcäriejn Dios? çChuni'cza abaluüini? Rutliidi. <sup>35</sup> O çchuni'c badedxgaa te xhi cos lojni,

te quixsacnini lojni, ä? Rutliidi.” <sup>36</sup> Sa'csi loj Dios siääd guira'ti, luxh laani bencheeni guira'ti par lagajcza laani. Suguiliä'pnu xpala'nni par tejpas. Sugacni si'c.

## 12

### *Yäl'nabajn rliä'p xpala'n Dios*

<sup>1</sup> Ni'cni rulidxä la'tu rebetzä, sa'csi rulaslajz Dios nuure, colgudeed xcäl'nabajntu lo Dios te gac guiba'nsa'ctu si'cni rlanj Dios. Dee najc yäl'rajnpac Dios si'c ni nungäjl gan'tu Dios. <sup>2</sup> Na'c rujntu lagajc xhigab ni rujn reben guedxliuj, colguscoob rexhigabtu te guidxaapac xmoodtu te si'c guluii Dios xhini'c rlanjni guntu, nalajznu xhini'c najc hueen, xhini'c rdxagljaz Dios, xhini'cza najc laapac.

<sup>3</sup> Sa'csi balaslajz Dios narä, ni'c rusule'ä xtiidxni loj tejgatu, rniä lojtu, na'c guiliä'ptu lagajc xpala'ntu, naatu sajcrutu loj sa'tu. Colyejn xhigabsa'c, te laaca gac xhigabtu, si'cni baniidx Dios lo tejgatu xho chalilajztu xtiidxni. <sup>4</sup> Sa'csi sigajc najc tiejxhnu, yu' xhidäl la'ni, luxh tejgareni rujn xtzuum-xtzuumreni, <sup>5</sup> sigajcza nuure nani rililajz xtidx Jesucrist, najcnu xhidajl, najcnu si'c tejsi tiejxh lo Jesucrist, mase tejganu rujn xtzun-xtzuumnu, tejsi najcnu.

<sup>6</sup> Luxh sa'csi tejganu rajpnu garen-garen dzuun xcuent yäl'rulaslajz ni baniidx Dios loonu, sujienno rextzuumnu screeza: nani rajc rniü xtidx Jesucrist, suguinini, si'c ni najc xcäl'rililajzni; <sup>7</sup> nani rajc racnäjä sa'ni, sugacnäjäni; nani rajc ruluii xtidx Dios, suguluiini; <sup>8</sup> nani rajc gulijdx resa'ni, sugulijdxnirenäni, nani rajc rudedxlia' xhixtenni lo sa'ni, saru sugudeedni xhixtenni; nani rajc rnibee lo sa'ni, suguinibeeni con yäl'nadolajz; nani rajc rulaslajz resa'ni, sugulaslajzni con yäl'rbalajz.

### *Xho nanab guiba'nnu lo xnezyuj Dios*

<sup>9</sup> Colchanälajzpac resa'tu, na'c gunsitu si'cni rinälajztureni. Colcuälaz redzunguijdx, colyejntis redzunsac. <sup>10</sup> Colchanälajz resa'tu si'c rinälajz bejn rebejzni. Colguiliä'p xpala'nreni.

<sup>11</sup> Colyejn dzunsac, na'c cuedxitu. Colyejn xtzuum Jesucrist con guideb xtijptu, guideb xcäriejntu.

<sup>12</sup> Colguibalajz sa'csi ahuililajztu xtiidxni. Colcuedcxilajztu che tedtu trabajw. Colcuedx-colnabtis lo Dios guideb nabajntu.

<sup>13</sup> Colgacnäjä rebejn nani rililajz xtidx Dios; sacru colnii loj ni riädhuitu.

<sup>14</sup> Colguiniä didxsa'c xcuent renani rusacsä la'tu, na'c gudzubdeturenäni.

<sup>15</sup> Colguibalaznäjä renani rbalajz, colyonnäjä renani roon.

<sup>16</sup> Colyejn tejtis xhigab con resa'tu, na'c gactu guyalajz, colguchaag loj rebenä nolajz. Na'c guchalotu najctu beñnanduxh.

<sup>17</sup> Na'c gudzu'tu dzunguijdx loj renani rujn dzunguijdx lojtu. Colyejn recossa'c nez loj guirasi bejn. <sup>18</sup> Cadrotis sajcnäni, dxitis colguiba'nnäjä guiraa rebejn. <sup>19</sup> Rebetzä, na'c guntu xhigab lagajc la'tu gudeedtu xten renani rujn dojl lojtu, sa'csi lagajc Dios gun yäl'guxhtis lojreni, ni'cni caj lo xquijtznä scree: “Narä gunä yäl'guxhtis, narä quixä lojreni si'c naj Dad, Dios.” <sup>20</sup> Näjza: “Palga calaan nani rdxe'ch lojtu, colgudeed xhi gauni, palga cayojlni, colgudeedza xhi yäni, te si'c jianxtiujni.” <sup>21</sup> Na'c gusaantu gun redzunguijdx gaan lojtu, colyejn gaan lo dzunguijdx con recossa'c ni rujntu.

## 13

<sup>1</sup> Guiraatu nanab jiuu xtidx renani rnibee lojtu. Sa'csi xheti te yäl'rnibee nani di Dios nudeed, luxh guiraa reyäl'rnibee ni yu' lo guedxliujre, lagajc Dios gule'creni. <sup>2</sup> Ni'cni renani di gusoob xtidx renani rnibee, xtidx Dios cabälazni. Luxh renani rujn si'c, lagajc laareni xcaqijreni dojl, sujn Dios yäl'guxhtis lojreni. <sup>3</sup> Renani rnibee di guchejb renani riu xtiidxreni, ruchejbreni renani najc bejn guijdx ni di jiu xtiidxreni. Palga di rlanjtu guidxejbtu reguxhtis, bejntis dzunsac, dxejcti guiliä'preni xpala'ntu sa'csi rujntu dzunsac. <sup>4</sup> Reguxhtis rujnreni lojtu xtzuum Dios te guiba'nsa'ctu. Palga guntu dzunguijdx, colguidxejb, xhet xliä'di ca'ni spaad, sa'csi najcreni nani rujn xtzuum Dios te gunreni yäl'guxhtis, te quixpac renani rujn dojl. <sup>5</sup> Ni'cni nanab jiuu rextiidxreni, xhet ganaxtis sa'csi rujnreni yäl'guxhtis lojtu, näjza te ga'ptu te xcäriejnsa'c, te xcäriennaya. <sup>6</sup> Ni'cni colquijx lojreni nani riäjäl xca'reni sa'csi renani rnibee najc xmos Dios, luxh ni'cpac najc xtzuumreni.

<sup>7</sup> Colgudeed lo guiraa bejn nani riäjäl xca'reni. Colquix loj renani nazääbtu; colquijx impuest loj ni riäjäl xca'ni; colchanälajz renani riäjäl chanälajztu; colguiliä'p xpala'n renani riäjäl chä'p xpala'reni. <sup>8</sup> Na'c xcajlu di'n loj nicla tej bejn, di'ntis xten yäl'rinälajz sa'ni, sa'csi nani rinälajz xpisipni, bejnğa abasoob xleii Dios. <sup>9</sup> Sa'csi lo xleii Dios caj scree: “Na'c guesnäjlu bejn ni di gac chäällu, na'c ju'tlu, na'c cuanlu, na'c gusgueelu, na'c chuguij lajzlu xhixten resa'lu.” Luxh palga yu' xhi stee leii rsa'ni con leii ni rni: “Chanälajzlu resa'lu si'c sanälajzlu lagajc

luj.”<sup>10</sup> Nani rajp yälsanälajz, dini gun latsiaj lo resa'ni. Ni'cni yälsanälajz rusooob releii ni caj lo xtidx Dios.

<sup>11</sup> Colyejn guiraa redee, sa'csi anajntu xho najc redxej ni nabajnnu naj, anajntu alagojl or guibajnnu lo bacal sa'csi abidzungajxhru dxej che laanu nen dojl lo dxej che huililajznu. <sup>12</sup> Aguxhünduxh, asiädgajxh bianij. Ni'cni cuääz jiennu redzuun giidx ni rajc lo xcäy, te jientisnu redzunsac ni rajc rdxee, lo bianij. <sup>13</sup> Guibansa'cnu si'c riäjl guibajn rebejn rdxee, na'c guibanu lo yäl'rä', niclaza lo yäl'biejy, na'c guidiesnäjnu bejn ni di gac chäälnu, na'c ga'pnu rebis, na'c guidxagdilu resa'nu, na'c chuguij lajznu xhixten resa'nu. <sup>14</sup> Ni'cni colca' xcäl'rnibee Jesucrist te na'c guntu redojl ni rlajz gun tiejxhtu.

## 14

### *Na'c guiniyajtu rebejtztu*

<sup>1</sup> Colnii didxdoo lo rebejn nani di gumbesa'c xtidx Dios, na'c tilnäjturenii. <sup>2</sup> Sa'csi yu' reni rililajz nani sajc gaurenii guira'ti xhi cos, niluxh nani gajd sutijp lo yäl'rililajz, ganaxtis berduur rajwni. <sup>3</sup> Nani rajw guira'ti, na'c guidxechnäjni nani di gau guira'ti; luxh nani di gau guira'ti, na'cza guiniyajni nani rajw sa'csi Dios aguleza bejnga. <sup>4</sup> Zchuxh luj te guiniyajlu lo xmos te bejn, ä? Sugäb lagajc xlamni lojni la laaca rujnni o la xhet laadi rujnni. Luxh sujnni laaca sa'csi Dad Jesucrist sujn sutijp lastooni.

<sup>5</sup> Tej bejn naa sajcru tej dxej lo stee dxej, dxejc ste'ca bejn rchalo guiraa redxej najc tebloj. Xhet najcdi, teja bejn sugunpac lagajc xhigabni. <sup>6</sup> Nani rapda te dxej, rujnnini te guiliä'pni xpala'n Dios, luxh nani di gunni, rliä'pzani xpala'n Dios sa'csi dini gapda te dxej. Luxh nani rajw guira'ti, rajwni te rliä'pni xpala'n Dios, sa'csi rudeedzani xquixtios lo Dios; nani di gau guira'ti, nez lo Dios dini gau, rliä'pzani xpala'n Dios, rudeedzani xquixtios lo Dios.

<sup>7</sup> Sa'csi nicla tejnu dinu guibajn xcuentcanu, nicla tejzanu dinu guet xcuentcanu. <sup>8</sup> Palga nabaannu, nabaannu xcuent Dad Jesucrist; palga guetnu, rejtzanu xcuent Dad, Jesucrist. Ni'cni palga nabaannu, o palga guetnu, lahtis najcnu rexpem Dad, Jesucrist. <sup>9</sup> Ni'cni gujt Jesucrist, ni'cni gubansaczani, te sajc gacni Dad xten rebengut, näjza Dad xten rebejn nani nabajn.

<sup>10</sup> Dxejc luj, zchicuent cubeelu bejtzlu, ä? O zchicuent rdxe'chlu rhuilu lojni, ä? Ni guiragajcnu tednu nez loj Jesucrist cadro cueni te gunni yälguxhtis loonu. <sup>11</sup> Sa'csi scree caj lo xtidx Dios:

Si'ctis ni nabanä, rniliäpac lojtu, räjp Dad Dios,  
guiraa rebejn guedxliuj suzuxhijbreni loä,  
luxh guiragajc ro'reni sicäjp narä nacä Dad Dios.

<sup>12</sup> Ni'cni guiraanu, tejanu sudeednu cuent loj Dios xcuent nani biennu.

### *Na'c guzällu bejtzlu*

<sup>13</sup> Ni'cni na'cru cubeenu sa'nu. Maazru hueen jiennu xhigab nen lastoonu xhetliidi jiennu ni gun jiajb resa'nu lo dojl. <sup>14</sup> Narä nanä, racbeäpac guira'ti najc hueen. Jesucrist Xtdadnu baluui narä si'c. Luxh palga yu' chu tej ni rchalo dini gac hueen, par laatisni dini gac hueen. <sup>15</sup> Palga la'tu guntu gac-huun lajz te sa'tu sa'csi yu' xhi rajwtu, dirutu chasanäj xnezyuj yälsanälajz. Na'c gunlu gunijt te sa'lu xcuent nani rajwlu, sa'csi agujt Jesucrist xcuentni. <sup>16</sup> Ni'cni na'c gusaanlu guiniyajreni nani najc te cos hueen par luj. <sup>17</sup> Sa'csi xcäl'rnibee Dios dini gac xcuent yäl'rajw, niclaza xcuent yäl'rä'; xcäl'rnibee Dios najc xcuent te yäl'nabannya nez loj Dios, näjza yäl'rbedxilajz con yäl'rbalajz xcuent Sprit Dxan xten Dios. <sup>18</sup> Sa'csi nani rujn si'c lo xtzuum Jesucrist, bejnga rchaglajz Dios, luxh rebejn guedxliuj rniiza didxsa'c xcuent sa' bejnga.

<sup>19</sup> Ni'cni chanuutis guidiilnu recos nani rujn chu yäl'rbedxilajz, näjza nani rujn racnäjnu resa'nu te tiobrurenii loj xnezyuj Dios. <sup>20</sup> Na'c guntu nit xtzuum Dios xcuent ni rajwtu. Guliicani guira'ti ni rajw bejn najc naya, niluxh palga gautu te cos nani gun jiajb bejtzlu nen dojl, ni'c najc xhet laadi. <sup>21</sup> Hueen najc na'c gautu bääl, na'cza yätu bin, na'cza guntu jiajb sa'lu nen dojl. <sup>22</sup> Nani rililajztu, ni'c colyajp xcuentcatu nez loj Dios. Chicbaa nani di cubee lagajc laani xcuent recos nani rniini laaca najcni. <sup>23</sup> Luxh palga guntio'p lajz te bejn xcuent nani rajwni, sigubeeni lagajc laani, sa'csi dini gau xcuent yäl'rililajz, sa'csi xhitis ni di gac xcuent yäl'rililajz, lagajc ni'c najc dojl.

## 15

### *Huinälajz sa'lu*

<sup>1</sup> Nuurnu ni agusutijpnu lo yäl'rililajz nanab gacnäjnu resa'nu nani gajd chalilazsa'c. Di gacdi guibanisnu xcuentcanu. <sup>2</sup> Tejanu nanab chonälaaznu resa'nu lo xcäl'nabansa'cni te gacnäjnu chalilajzrurenii. <sup>3</sup> Sa'csi nicla Jesucrist dini nibajn xcuentcani, luxh si'cni caj loj xtidx Dios: “Redidxyaj ni guniyajreni lojlu bialjbreni yecä.” <sup>4</sup> Guiraa rediidx ni cuaj lo

guijtz galooli, cuajreni te guluiireni nuurnu te ga'pnu yäl'sutijp näjza yäl'rustioblajz te gacza guibääznu lo xtidx Dios. <sup>5</sup> Dios rusutijp lajznu, Dios rutioob lastoonu. Rniabä loj Diosga gacnäjni guntu tejtis xhigab xten Jesucrist con resa'tu. <sup>6</sup> Te dxejcti tejtis gac xse'tu guiliä'ptu xpala'n Dios, Xtdad Jesucrist.

*Gusule' xtidx Dios loj rebenzjizt*

<sup>7</sup> Ni'cni colca' resa'tu, renani ahuililajz xtidx Dios sigajc cua' Jesucrist nuure te guiliä'pnu xpala'n Dios. <sup>8</sup> Sa'csi narä rniä lojtu, biääd Jesucrist te gujcti si'c te mos loj rexpen Israel te baluini xcuent didxgulii xten Dios te gusojb rediidx nani bia'n Dios loj retoxtdagdoonu, <sup>9</sup> näjza par rebenzjizt, te guiliä'preni xpala'n Dios sa'csi baluilojni xcäl'rulasajz Dios lojreni, si'c ni caj lo xtidx Dios:

Ni'cni siliä'pä xpala'nlu nez loj rebenzjizt,  
soläza dij lojlu.

<sup>10</sup> Dxejcti stee lajt rniini:

La'tu benzjizt, colguibalaznäj rexpenä rexepejn Israel.

<sup>11</sup> Stee lajt cajza:

Guiraatu, rebenzjizt, colguiliä'p xpala'n Dad,  
suguiiliä'pza guiraliie rebejn xpala'nni.

<sup>12</sup> Stee huält guniiza Isaias scree:

Siricaj te xagdoo toIsai,

näjza te ni chäs te guinibeeni loj rebenzjizt,

laani cabäjz rebenzjizt.

<sup>13</sup> Naj rniabä lo Dios ni rudeed yäl'rbäzljajz, te laani gacnäj guibalajztu, cuedcxilajztu, sa'csi salilajztu, te tioobru yäl'rbäzljajz ni rajptu sa'csi Sprit Dxi xten Dios yu' neñ lastootu, luxh laani rajpni yäl'rnibee.

<sup>14</sup> Luxh xcuent la'tu rebetzä, anancheä naba'nsa'ctu nasinduxhtu, arajcza rulijdxtu sa'tu, <sup>15</sup> luxh loj guijtzre bacuaä gaii didxnaj xcuent tiop-choñ cos, te gusnä lajztu. Runä si'c xcuent yäl'rulasajz ni baniidx Dios loä <sup>16</sup> te gacä xpen Jesucrist ni rusule' diidx loj rebenzjizt. Ni'cni cagusulesa'cä xtidx Dios lojreni, te xca' Dios rebenzjizt si'c te gojn ni rudedä, sa'csi agujczeni beñnaya sa'csi rbäjz Sprit Dxi xten neñ lastooreni.

<sup>17</sup> Ni'cni xcuent Jesucrist abidxälä xhicuent guiniduxhä didxro xcuent recos ni najc xten Dios. <sup>18</sup> Sa'csi dina guiniä diidx xcuent xhi stee cos, ganaxtis xcuent xho gucnäj Jesucrist narä, luxh xcuent ni'c basoob rebenzjizt diidx, huililajzreni xtiidxni sa'csi biejn diajgreni xtiidxni, bahuiizareni rextzuunni, <sup>19</sup> con yäl'milaagwr xten redzunro, resenro, ni gujct con xcäl'rnibee Sprit Dxi xten Dios. Ni'cni lo guedx Jerusaléni, näjza guideb gabi ro'c, lo guedx Ilirico, guiraa nejzga abasule'ä xtidx Jesucrist. <sup>20</sup> Si'cza guyu'ä ganduxh gusule'ä xtidx Dios xhet cadro ahusule'direni xtidx Jesucrist, alga ganax cadro gajdreni gumbee Jesucrist, te na'c gunä dzuun cadro gusloj cayujn ste'ca bejn dzuun. <sup>21</sup> Te gacni si'cni caj lo guijtz:

Renani rutliidi bij diidx xcuentni, suhuiipacreni lojni,

luxh renani gajdpac diajgreni jiejn xtiidxni, sacbecheereni xtiidxni.

*Rujn Pabl xhigab chääni guedx Roma*

<sup>22</sup> Ni'cni balti huält badxojn Dios narä jädhuiä lojtu. <sup>23</sup> Luxh naj sa'csi abaluxä xtzunä guideb nezree, näjza sa'csi agujc balti iiz rladuxhä jädhuiä lojtu. <sup>24</sup> Naj che cha'a España siädhuiäpac lojtu. Che tedä, jädhuiäpac contu te ganid guibalaznää la'tu, dxejcti gacnäjtu narä te cha'a España. <sup>25</sup> Naj sia'a guedx Jerusalén te chanää xcoobr rexepejn Dios ni yu' ree loj rebejn ro'c. <sup>26</sup> Sa'csi rebejn Macedonia näjza reben Acaya rlanjpacreni guxhalreni te coobr loj rebenproob ni yu' lo reni huililajz xtidx Dios neñ guedx Jerusalén. <sup>27</sup> Bejnreni xhigab hueen guuren si'c, luxh guli'careni, sa'csi yu' xhi nazääbreni lojreni sa'csi rebejn Jerusalén najc reni baxhal xtidx Jesucrist lojreni, naj laaca rujnreni cayacnäjreni reben Jerusalén con xhixtenreni. <sup>28</sup> Ni'cni che chasa'nä meel lojreni dxejc tedä lajdxtu, jädhuiä contu, dxejc cha'ä España. <sup>29</sup> Luxh ananä che jäälä lojtu, li guidxa lastoä xcäl'nasa'cä xtidx Jesucrist guidzunä lojtu.

<sup>30</sup> Rebetzä, rniabduxhä lojtu xcuent xtidx Dad Jesucrist näjza xcuent xcäl'rinälajz Sprit Dxi xten Dios, colguidxagsa'tu, te colganäj colcuedx-guiniabtu lo Dios xcuentä. <sup>31</sup> Colnab lo Dios te guslaani narä loj reben Judea nani di gusoob xtiidxni te saru gun reben dxan ni yu' Jerusalén te xca'reni ni chanää lojreni. <sup>32</sup> Te cabaa lazä guidzunä lojtu, sa'csi rlanjpac Dios jäälä lojtu, te lañi yu'ä lojtu siäl'yua, susilazäza con la'tu. <sup>33</sup> Dios ni rbedcxilajz bejn gacnäj guiraatu. Sugacni si'c.



<sup>1</sup> Colgacnäj bisiajnno Febe. Nane're bejn dzunduxh neñ guidoo ni tre' Cencrea. <sup>2</sup> Colca'ni xcuent Dad, Jesucrist, si'cni riäjil gun bejn gacnäj renani rililajzpac xtidx Dios. Colyacnäjni lo xhitis nani guiquiinni, sa'csi laani gucnäduxhni xhidal rebejn, nägajcza narä gucnäjni.

<sup>3</sup> Ruxhalä xtixtios lo Priscila näjza lo Aquila, ni racnäj narä lo xtzuun Jesucrist. <sup>4</sup> Laareni nicäjpreni nejtreni xcuentä, ni'c rudedä xquixtios lojreni, luxh xhet narätis, näjza guiraa rebejn ni yu' lo rexquidoo rebenzajt. <sup>5</sup> Ruxhalä xtixtios loj resa'ä ni rdxagsa'reni rolizj Priscila näjza Aquila. Ruxhalä xtixtios loj Epeneto, ni sanälazduxhä, ni gujc benganid ni huililajz xtidx Jesucrist neñ guedx Acaya. <sup>6</sup> Ruxhalä xtixtios lo Marii nani benduxh dzuun lojtu. <sup>7</sup> Ruxhalä xtixtios loj rebeñ ladxä ni laa Andrónico näjza Junias; laareni guyunäj narä neñ latzguib, najcreni beñro loj reapost. Ganid laareni huililajz xtidx Jesucrist, dxejcti huililazä.

<sup>8</sup> Ruxhalä xtixtios loj Amplias, ni sanälazä xcuent Jesucrist. <sup>9</sup> Ruxhalä xtixtios loj Urbano, ni runnäj nuurnu xtzuun Jesucrist. Ruxhaläza xtixtios loj Estaquis, ni sanälazä. <sup>10</sup> Ruxhaläza xtixtios loj Apeles, ni abadeed balti seen rililajzpacni xtidx Jesucrist. Ruxhaläza xtixtios loj guiraa ni tre' rolizj Aristóbulo. <sup>11</sup> Ruxhaläza xtixtios lo Herodión beñ ladxä, näjza loj resa' Narciso nani ahuililajz xtidx Jesucrist. <sup>12</sup> Ruxhaläza xtixtios loj nan Trifena näjza nan Trifosa, guiro'preni cayujn xtzuun Jesucrist. Ruxhaläza xtixtios loj nan Pérsida, sanälazäni, abenduxhni xtzuun Jesucrist. <sup>13</sup> Ruxhaläza xtixtios lo Rufo nani agule Dios, näjza lo xnanni, sa'csi gujcnä si'c xnanäza. <sup>14</sup> Ruxhaläza xtixtios loj Asíncrito, näjza lo Flegonte, näjza lo Hermas, näjza lo Patrobas, näjza lo Hermes, näjza lo rebetzä ni yunäjreni. <sup>15</sup> Ruxhaläza xtixtios loj Filólogo, näjza lo Julia, näjza lo Nereo con bisiajnni, näjza lo Olimpas näjza guiraa rexpen Dios nani yunäjreni ro'c.

<sup>16</sup> Colye'tz xchan loj resa'tu. Guiraa rexquidoo Jesucrist ruxhalä xtixtios lojtu.

<sup>17</sup> Rebetzä, rniabduxhä lojtu ga'ptu cuidaad xcuent renani rujn bieje te guilia' sa' bejn, nani rlanj guntu guiraloj nani najc garenca loj yäl'ruluii ni bisieedtu, colguibicaj lojreni, <sup>18</sup> sa'csi sa' rebejnga direni gun xtzuun Jesucrist. Laareni rlanjztisreni gunreni si'c rlanj tiejxhrene; rniireni didxdoo, diidx ni rgudxguel diajg bejn te rusgueereni lastoo rebejn nani di susin. <sup>19</sup> Guiranejz abire'ch diidx xcuent xho rusobsacpactu xtidx Jesucrist, ni'cni rbaa lazä, ni'cni rlazä gactu nasin'duxh xcuent recoshueen, luxh si'c báz xhet ganditu xcuent recosguijdx. <sup>20</sup> Luxh Dios nani ruscuecdxilajz bejn siojb guta'cwni bendxab xhan ni'tu. Gacnäj Dad Jesucrist la'tu.

<sup>21</sup> Timoteu nani racnäj narä lo dzuun, ruxhalä xtixtios lojtu. Lucio, Jasón, näjza Sosípater, beñ ladxä, ruxhaläza xtixtios lojtu.

<sup>22</sup> Najrä Tercio, ni cagucuaä guijtzre xcuent Pabl, ruxhaläza xtixtios lojtu xcuent Jesucrist.

<sup>23</sup> Ruxhaläza Gayo xtixtios lojtu. Rbääznu rolizjni, luxh rudeedzani rolizjni guidxagsa' rebeñ guidoo. Ruxhaläza Erasto, ni najc tesoreer xten guejdxre, xtixtios lojtu, sigajcza bejtznu ni laa Cuarto.

<sup>24</sup> Gacnäj Dad Jesucrist la'tu. Sugacni si'c.

#### *Rediidx lult xten Pabl*

<sup>25</sup> Colguiliä'p xpala'n nani sajz gusudzu'tz la'tu loj xtiidxni nani basule'ä, näjza loj xtidx Jesucrist xcuent rexhigab ni naga'tz galooli, <sup>26</sup> naj abaluiloj rediidxga lojtu; näjza xcuent ni bacuaa reprofet galooli; si'c najc diidx ni bia'n Gueb Dios ni nabajn par tejpas loj rexpejnni, agusule'ni loj guiraa rebeñ guedxliuj, te gusoobreni diidx sa'csi rililajzreni xtiidxni, <sup>27</sup> colguiliä'p xpala'n ni najc tejtis Dios ni nanduxh. Suguliä'pnu xpala'n Dios xcuent Jesucrist. Guiliä'pnu xpala'n Dios par tejpas. Sugacni si'c.

## Guijtz Ganid Ni Bacuaa Pabl Lo Guidoo Xten Guedx Corinto

*Bacuaa Pabl te guijtz lo guidoo xten guedx Corinto*

<sup>1</sup> Narä Pabl nacä apost xten Jesucrist sa'csi agule Dios narä te gusule'ä xtiidxni. Narä näjza Sóstenes ni najc bejtznu lo xtidx Dios rucuaanu guijtzre lojtu <sup>2</sup> ni ahuililajz xtidx Dios, ni yu'nen guidoo xten guedx Corinto. La'tu agule Jesucrist, abasiani lastootu sa'csi ahuililajztu xtiidxni. La'tu näjza guiraa rebejn ni ahuililajz rextidx Jesucrist loj guideb guedxliuj, najctu xpejn Dios, ni najc Dad xten guiraanu. <sup>3</sup> Rniabnu lo Dios ni najc xtdnu näjza lo Dad Jesucrist, gacnäjreni la'tu, gusuecdxireni lajztu.

*Abaniidx Dios xhidajl dzunsa'c xcuent Jesucrist*

<sup>4</sup> Rudedätis xquixtios lo Dios xcuentu, xcuent yäl'ulaslajz xten Dios ni cua'tu xcuent Jesucrist, <sup>5</sup> te xcuentni acua'zatu guiraa dzunsa'c, te gusule'tu xtiidxni, näjza te gacbesa'ctu xtiidxni; <sup>6</sup> sigajcza con xcäl'nabansa'ctu baluuitu huililajzpacktu xtidx Dios xcuent Crist. <sup>7</sup> Ni'cni xhetliidi cayäädxditu loj redzunsa'c ni runiidx Dios, la'l ni ganduxh yu'tu cabäjztu guibisac Jesucrist lo guedxliuj. <sup>8</sup> Laani susutijpni lajztu dxejli ni guibisac Dad Jesucrist loj guedxliuj, te rutliidi gac cue'c xhi te quej xcuenttu. <sup>9</sup> Rusoobpac Dios xtiidxni. Laani gurejdxni la'tu te jiu'tu lo xnejz Xi'nni Jesucrist ni najc Dad xtennu, te sanäjtuni.

*Rlia' sa'reni nen guidoo*

<sup>10</sup> Rudixä la'tu, rebetzä, xcuent Xtd Jesucristnu, colyejn tejsi xhigab te na'c la' sa'tu, saru guibañnäjtu sa'tu, colyejn tejsi xhigab, colga'p tejsi xcäriejn. <sup>11</sup> Sa'csi agucheä xcuenttu, betzä ni huililajz xtidx Dios. Tej resa' Cloé biädsan diidx loä xcuenttu, yu' yäl'dijl lojtu. <sup>12</sup> Rlazä guiniä scree lojtu sa'csi yu'reni rni: "Narä nacä te rexpejn Pabl", näjza: "Narä nacä te rexpejn Apolos"; näjza: "Narä nacä te rexpejn Pedr", yu'zaren rni: "Narä nacä xpejn Crist." <sup>13</sup> ¿La rujntu xhigab nala' sa' Crist, ä? ¿La cuaj Pabl lo cruzj xcuent xtojltu, ä? o ¿La gurobnistu con laj Pabl, ä? <sup>14</sup> Rudedä xquixtios lo Dios dina nutiobnisä nicla tejt, xtebtis Crispo näjza Gayo, <sup>15</sup> te rut naadi con laä batiobnisäreni. <sup>16</sup> Abanaj lazä batiobnisä resa' Estéfanas. Di lazä guinaj la yu' chu stee bationnisä. <sup>17</sup> Di Crist nuxhal narä te gatiobnisä. Baxhalni narä te gusule'ä rextiidxni xcuent xho gun bejn te laareni lo dojl, xhet con didxnanduxhdi, te di gudzucaä loj dzunroduxh ni bejn Jesucrist che gujtni lo cruzj.

*Crist najc xcäl'milaagwr näjza xcäl'najn Dios*

<sup>18</sup> Rediidx ni rniinu xcuent Jesucrist xcuent xho gujtni lo cruzj te guslaani rebejn lo dojl najcni te diidx ni xhet sajcdi lo rebejn ni canijt sa'csi direni chalilajz xtiidxni. Luxh loj rebejn ni ruslaa Dios lo dojl najc rediidxga xcäl'milaagwr Dios. <sup>19</sup> Scree caj loj rexquijtz Dios: Narä sutzulä yäl'nasiñ xten rebennajn, sudzucaäza xcäl'nadxällajz, xhigab rebejn ni nadxällazduhx.

<sup>20</sup> ¿Con bejn ni nanduxh? ¿Con bejn ni rucuaa, ni najc mastr? ¿Con bejn ni ruchagduxh diidx xcuent recos guedxliujre, ä? ¿La et abejndi Dios najc guiraa yäl'nasiñ xten guedxliuj si'c nayällajz nez loj Dios, ä? <sup>21</sup> Ni'cni loj xcäl'nasiñ Dios, di rebejn guedxliuj niembee Dios con xcäl'nasiñ guedxliujre, ni'c bichagljaz Dios con yäl'rusele' diidx ni rniireni nayällajz, con ni'c baslaani lo dojl rebejn ni huililajz xtiidxni xcuent Crist.

<sup>22</sup> Rexpejn Israel rlaizpacreni fiireni remilaagwr; rebejn griegw rguuil yäl'nanduxh. <sup>23</sup> Niluxh nuurnu rusule'nu diidx xcuent xho cuaj Jesucrist lo cruzj, niluxh loj rexpejn Israel najc diidxre si'c te guiro ni chalani' bejn, luxh loj rebenzajt xhet sajcdi rediidxre. <sup>24</sup> Niluxh loj rebejn ni gule Dios chalilajz rediidxre, rexpejn Israel sigajc loj rebenzajt, rediidxre najczani yäl'milaagwr najczani yäl'nasiñ xten Dios. <sup>25</sup> Sa'csi xcäl'nayääl xten Dios si'c rchalo rebejn ni'c najc nasinduxhru loj xcäl'nasiñ xten reben guedxliuj; luxh xcäl'rnijaz xten Dios sacduxhruni loj guiraa xcäl'nadaan reben guedxliuj. <sup>26</sup> Colhuui la'tu, betzä ni ahuililajz xtidx Dios, xho gule Dios la'tu, colyejn xhigab guxiitu najctu ben nasiñ loj reben guedxliuj, guxiiza rajptu yäl'nibee, guxiizatu najctu bejn ni agoj guiga'tu bensa'c. <sup>27</sup> Niluxh agule Dios rebejn ni xhet nanduxhdi te gusanxtujyni rebejn ni nanduxh, aguleza Dios rebejn ni guxii rnibee te gusanxtujyni rebejn ni rnibeduxh. <sup>28</sup> Agule Dios rebejn ni di guiga' benro, näjza rebejn ni rut riidi, reni rut najcdi, te gusanxtujyni rebejn nani najc guiraa reni'c. <sup>29</sup> Te nicla tej bejn digacdi guiliä'p lagajc xpala'nni nez loj Dios. <sup>30</sup> Lagajc Dios abachaag la'tu loj Dad Jesucrist; baxhalzani Jesucrist loonu te basanijni xcäriejnnu te ga'pnu yäl'nasiñ xten Dios, te guibansa'cnu nez loj Dios, te gacnaya lastoonu, näjza te quixni rextojlnu. <sup>31</sup> Si'c bejn Dios te soob xtiidxni cadro caj scree:  
Ni rlaiz guiniä didxro, suguiliä'pni xpala'n dzuun ni bejn Jesucrist.

## 2

### *Rediidx xcuent Crist ni cuaj lo cruuj*

<sup>1</sup> Ni'cni cheni biädsule'ä xtidxlii Dios lojtu, rebetzä, dina niädniä didxnajn lojtu, niclaza didxnagajn, xhet si'cti basule'ä xtidx Dios xcuent Crist. <sup>2</sup> Cheni guyu'ä lojtu, benä xhigab dina niädniä xhi stee diidx lojtu, biädsule'ätis diidx xcuent Dad Jesucrist, ni cuaj lo cruuj. <sup>3</sup> Bidzunä lojtu guideb rdxagä, guideb rcdaditä sa'csi cadxbedduxhä. <sup>4</sup> Cheni basule'ä diidx lojtu, dina niniä didxro xten yälñasin xten guedxliuj, alga guniä xtiidx yälñasin xten Sprit Dxan xten Dios näjza xcäl'rñibee Dios, <sup>5</sup> te di gac xcäl'rñililajztu xcuent yälñasin xten guedxliujre, te gac xcäl'rñililajztu xcuent yäl'rñibee xten Dios.

### *Rumbee bejn Dios xcuent ni ruluii Sprit Dxan xten Dios*

<sup>6</sup> Rniizanu lo sa'nu ni aguyajl lo xtidx Dios rediidx xten yälñasin xten Dios, per te yälñasin ni di gac xcälñasindi guedxliuj, niclaza xten reni rñibee lo guedxliujre, sa'csi sidzujñ dxej sinitlojreni. <sup>7</sup> Niluxh che rñiinu yälñasin xten Dios, rñiinu diidx ni rut racbextebdi, xcuent xho gac guidzunnu cadro yu' Dios xhaguibaa. Cheni gajdli gac guedxliuj, rapcheeni yälñasinxhiga'tz xtenni. Baluiniini loonu te guibannäänuni lo xcäl'rñimbicha' xtenni. <sup>8</sup> Nicla tej reni rñibee lo guedxliujre gajd gacbee recosre niluxh paru niacbeereni, direni nucuaa lo cruuj Dad Jesucrist nani rajp xcäl'rñimbichaduxh. <sup>9</sup> Najñi si'cni caj lo rextidx Dios cadro rñii:

Recos ni gajdpac baloj bejn fii,

nani gajdpacza diajg bejn jiejn;

nani gajdpacza jiu' lo xhigab bejn, guiraa recosga abaluchee Dios par rebejn ni chanälajzni.

<sup>10</sup> Niluxh abaluii Diosreni loonu con Sprit Dxan xten Dios, sa'csi laani basule'nireni loonu. Sprit Dxan xten Dios racbesa'c guiraa rexhigab, näjza recos xhiga'tz xten Dios.

<sup>11</sup> Loj reben guedxliuj çchuni'c racbee rexhigab ni rujñ bejn? Lagajc sprit xten bejn ni yu' nejni racbee xhi xhigab cayujñni. Sigajcza rut racbeedi rexhigab xten Dios; Sprit Dxantis xten Dios racbeeni. <sup>12</sup> Luxh nuurnu dinu nica' yälñajn xten guedxliuj, alga cua'nu Sprit Dxan ni sääd lo Dios te gabeenu rexhicos ni abasalajz Dios loonu. <sup>13</sup> Nuurnu rniizanu xcuent recosga, xhet diidxdi ni ruluii xcälñajn guedxliujre, diidxtis ni baluii Sprit Dxan xten Dios loonu. Si'c ruluiinu rediidxga loj rebejn ni rbäjz Sprit Dxan xten Dios neñ lastooreni.

<sup>14</sup> Niluxh reni di chalilajz xtidx Dios, direni gacbee rexhigab xten Sprit Dxan xten Dios, sa'csi laareni xhigabyäältis rchaloreni xcälñasin Dios. Di gacdiza gabeereni rexhigabga, sa'csi Sprit Dxan xten Diostis rajc ruluii lo bejn rexhigab xtenni. <sup>15</sup> Rebejn ni ahuililajz xtidx Dios, rula'tzreni guira'ti ni ruluii Sprit Dxan xten Dios lojreni. Luxh rebejn ni ahuililajz rutliidi rula'tzdireni. <sup>16</sup> Sa'csi scree caj lo xtidx Dios: "çChuni'c agucbee xho najc xhigab xten Dios te gac guluiini Gueb Dios, ä?" Nicla tej bejn. Niluxh nuurnu rajpnu lo xcäriejnñu xhigab xten Crist, nalajznu racbeenu rextiidxni.

## 3

### *Reni rujñ dzuun lo Dios*

<sup>1</sup> Rebetzä, di niäjcdi niniä redidxnagajn lojtu si'c ni rñiä loj rebejn ni rajp yälñasin xten Sprit Dxan xten Dios, basule'ä ganaxtis didx guyasi lojtu, sa'csi najctu beñ guedxliuj o biuxbäz ni guxii racbeeni xcuent Crist. <sup>2</sup> Basule'ä ganax didxguyasi lojtu si'c rudeed bejn le'ch lo te biuxbäz lacuaa gauni bääl. Dina niniä lojtu guiraa rextidx Dios ni nanab gacbeetu, sa'csi gajd gacdi gacbeetuni, niclaza naj gajd gacdi gacbeetuni. <sup>3</sup> Sa'csi nabansijctu si'c nabajn reben guedxliuj lahtis runembiidtu, rdxechlajztu lo sa'tu, çla ditu gacbee nacsijctu si'c beñ guedxliuj, ä? çLa lahtis nabajñtu si'c nabajn reben guedxliuj ni di gumbee xtidx Dios, ä? <sup>4</sup> Sa'csi cheni rñii tejni: "Narä nacä te xpejn Pabl", dxejcti steeni rñii: "Narä nacä te xpejn Apolos", çla xhet cayujnditu sigajctis ni rujñ rebejn guedxliuj, ä?

<sup>5</sup> çChuni'c najc Pabl? çChuni'c najc Apolos? Nuurnu najctisnu xmos Dios ni basule' xtidx Dios lojtu te huililajztu, luxh cade tejnu riennu dzuun ni rñiidx Dios jiennu. <sup>6</sup> Ganid basule'ä xtidx Dios lojtu, dxejc biääd Apolos te gucnäjzani gucbeerutu xtidx Dios, niluxh lagajc Dios najc ni cagasani çcäriejntu te gacbesa'ctu xtiidxni. <sup>7</sup> Ni'cni nicla ni rusulexgaa diidx, niclaza nani racnäj racbeeru bejn rediidxga xhet sajcdireni; Diostis sajc nani rusani çcäriejn rebejn. <sup>8</sup> Nuurnu najcnu si'c rexmos ni rujñ dzuun lo yuj. Tejsi najc nani rbe'c binij näjza nani rga' nis, niluxh Dios rguijx tejanu dzuun nani riennu. <sup>9</sup> Nuurnu najcnu si'c remos ni runnäj Dios dzuun. La'tu najctu si'c yuj cadro cayajc xtzun Dios, si'c te yu' ni cayunchee Dios. <sup>10</sup> Narä nacä si'c te mastr albañil. Baniidx Dios dzuun loä, gucnäjni narä te casuä reguij lo yujre, te naj ste'ca bejn quixh basuu yejñi. Niluxh tejsa ni chanuu gun dzuun lojga, suga'pni cuidaad xho guiliäsni padeerga. <sup>11</sup> Sa'csi di gacdi gusujreni garenca cimient loj nani najc-xгаа, ni najc Jesucrist. <sup>12</sup> Naj palga guiliäs bejn te padeer yejç cimientga con oor, con pla't, con guij ni sacduxh, o con baräjñ, guixhtriuu, o balag biquii,

13 sidzujn dxej sien xho najc dzuun ni bejn teja bejn. Sa'csi siääd fis guiboo ni guluiloj dzuunga, sa'csi lagajc guibooga guluiloj dzuunga, xho najcni. 14 Palga yu' reni bejn te yusa'c yejc cimientga, luxh dini chec lo guibooga, sudeed Dios lo bejnğa ni riälj xca' ni sa'csi bejnni yusa'c. 15 Niluxh palga chec ni bejnni yejc cimientga xhet xca' dini, xcäl'nabajntisni di nit, luxh xtzuunni sejc.

16 ¿La ditu gan la'tu najctu xquidoo Dios, luxh neñ lastootu rbäjz Sprit Dxan xten Dios, ä? 17 Palga yu' chu gutiexhäť xquidoo Dios, sunitloj Diosni par tejpas, sa'csi xquidoo Dios najc dxan, luxh la'tu najctu guidooga.

18 Nicla tejtı na'c gusgueetu lagajc la'tu. Palga yu' chu rujn xhigab nanduxhni xcuent yäl'nasiñ xten guedxliujre, nanabpac gacni si'c te bejn ni xhet najndi te xca'ni yäl'nasiñ xten Dios te guliipac gacni te beñnajn, te beñ nasin. 19 Sa'csi yäl'nasiñ xten guedxliuj xhet sajcdi nez loj Dios. Lo rexquijtz Dios caj scree: "Dios rujn rga' reni rajp yäl'nasiñ xten guedxliuj lagajc xcuent xcäl'rusgueereni ni rujn lagajc xcäl'nadxällajzreni." 20 Ste'ca lajt caj scree: "Nanchee Dios xho najc xhigab ni rujn rebejn ni rajp xcäl'nasiñ guedxliujre, luxh xhetliidi sajcnı nez loj Dios." 21 Ni'cni na'c guiliä'p bejn xpala'n te bejn guedxliuj. Sa'csi loj tejgatu abaniidx Dios guira'ti rexhicos najc xtengatu, 22 palga najcni Pabl, o Apolos, o Pedr, o guedxliuj, o yäl'nabajn, o yäl'gujt, o recos ni yu' naj, o recos ni churu gac, guiraareni najc xtentu. 23 La'tu najctu xten Crist, luxh Crist najc Xi'n Dios.

## 4

### *Xtzuun reapost*

1 Ni'cni la'tu nanab fiitu loonu si'c rexmos Dad Jesucrist ni rajp rexhigabxhiga'tz xten Dios te gusule'nureni lojtu. 2 Mbaj pues, te bejn ni cahuii te dzuun nanab gusoobreni diidx, gunreni te dzunsa'c. 3 Niluxh guxiı runä xhigab gula'tztu narä, o gula'tz chutis guxhtis lo guedxliujre narä; nicla lagajc narä dina gunduxhä xhigab xho nacä nez loj Dios. 4 Entis rbedxı xcärienä, per xhet xcuent ni'cdi sajc guiniä xheti xtolä, Dad Jesucrist najc nani rula'tz narä, xhuilojni xho nacä. 5 Ni'cni la'tu na'c gucaquijtu bejn che gajd guidzujn dxej; colcuäjz jiaäd Jesucrist dxejc laani sibääni lo bianij guiralii ni naga'tz lo nacäjz, luxh sululojzani xhi xhigab yu' neñ lastoo teja rebejn, dxejc lo tejanu sudeed Dios ni nungäjł xca'nu.

6 Rebetzä, xcäl'nasa'ctu caniä rediidxre lojtu. Caniä xcuent Apolos näjza narä, si'c te yäl'ruluii te fiitu xho riennu te na'cza guntu recos ni xhet caj di lo rexquijtz Dios, te na'cza guiliä'ptu xpala'n tejtı lo resa'tu, lał ni cabälaztu steeni. 7 Sa'csi ¿chuni'c rniı najclu bensa'cru lo ste'ca bejn?, o ¿xhini'c rajplu ni di Dios nuniidx lojlu? Luxh palga cuaxlia'luni, ¿xhicuent lagajc luj rliä'plu xpala'ntu, lascanu rut baniidxdi lojlu recos ni rajplu?

8 Rujntu xhigab rajptu xhidajł cos, naatu najctu ricwduxh, rchalotu najctu reii, dirutu guiquiın nuurnu. Malaii guliı najcpactu reii te näjzanu guinibenäjnu la'tu. 9 Niluxh runä xhigab gule Dios reapost si'c rebejn ni xhet sajcdi. Najcnu si'c rebejn ni gunibeereni guet. Nez loj reben guedxliuj näjza nez loj rexangł Dios najcnu si'c reben ni rdedlojtis bejn lojreni. 10 Nuurnu najcnu beñnayääl xcuent Crist, niluxh la'tu rchalotu racheduxhtı rextidx Crist. Nuurnu najcnu bejn ni xhet nadipdi, niluxh la'tu najc bendanduxh. Rliä'p rebejn xpala'ntu, ni'c rbälazreni nuurnu. 11 Cadeednu trabajwduxh naj, rliaannu, riojlnu, xho rniaj xhajnı, rdijnäj rebejn nuurnu, luxh xheti roliznu. 12 Rdxaagnu riennu dzuun lagajc naanu te guidxälnu xhi guidaanu. Che rguereni loonu, rniabnu lo Dios xcuentreni. Che rusacsı rebejn nuurnu, rientisnu huant. 13 Che rniyajreni nuurnu, rulidxnäänureni didxdoo. Rujnreni xhigab najcnu si'c guijxh xten guedxliujre, ruhuiireni loonu si'cni xhet sajcdinu.

14 Dina gucauä rediidxre te gusanxtuiyätu. Rucuaä rediidxre te gulidxätu si'c rexi'nä ni sanälazä. 15 Palga ga'ptu tzuu mil bejn ni guluıitu rediidx xten Crist, ruti stee xtadtu; narä gucä xtadtu, ganid narä basule'ä rextidx Dios lojtu. 16 Ni'cni rulidxä la'tu, coljejn si'cni ruhuiitu runä.

17 Ni'cni baxhalä Timoteu lojtu, najcni si'c xi'nä ni sanälazä, ni rusooob diidx xcuent Crist. Laani susnajni lajztu xho mood nabañä lo yäl'nabajn xten Jesucrist, sigajcni ruluiä neñ reguidoo guiraasi lajt. 18 Yu'tu ni acayajc guyalajz, naatu pet dina guibisacä lojtu. 19 Cabäzä jiađhuiätu, palga si'c rrajz Dios, dxejc sacbeä chuni'c najc rebejn ni cayajc guyalajz, fiä xhipacni rujnreni, xhet tıidixtisreni gacbeä. 20 Sa'csi xcäl'rnibee Dios xhet ganaxtis xcuent diidx najcni, näjza dzuun ni rujnreni ruluiloj xcäl'rnibee Sprit Dxan xten Dios ni rajpreni. 21 ¿Xho rlajjzatu guidzunä lojtu, ä? ¿La sidzunä si'c te dad ni ca' te baar te quinätu o la guidzunnä yäl'rinälajz näjza yäl'nadolajz te gulidxätu, ä?

## 5

*Xho nanab gunnäjtı te bejn ni rujn falt lo sa'ni*

<sup>1</sup> Agucebä yu' tejtü ni ahuuilajz xtidx Dios, cua'ni si'c chäälni te gunaa ni gujc chäälni xtidx. Dee najc te dojdüxh nani nicla reni di chalilajz xtidx Dios direni gun. <sup>2</sup> Luxh la'tu gujctü guyalajz lacuaa niac-huin lastootu; te bejn nani bejn dojlga, riäjil nibäätuni nez lojtu. <sup>3</sup> Mase ruti narä ro'c, lastoä suganäj la'tu. Alabenä xhigab xhini'c jiennäjnu bejnga ni bejn dojdüxhga, sigajc ni niunä parü suga'ä ro'c. <sup>4</sup> Con laj Dad Jesucrist, che abidxagsa'tu, luxh alastoä suganäj la'tu, con xcälrmibee Dad Jesucrist, <sup>5</sup> abenä xhigab gutednu bejnga ladznaa bejndxab te ted tiejxhni trabajw, niluxh sprit xtenu laani neñ dxej ni jiädsac Dad Jesucrist lo guedxliujre.

<sup>6</sup> Di guchaag guiliä'ptu xpala'ntu xcuent dzuun ni rujntu. ¿La ditu gan te dojl najc si'c tudx'e'n cojb ni ruslaj, rusaguijni cojb cadro ru'chni, ä? <sup>7</sup> Colgudzucaj cobyujxhga, te guibajntu te yäl'nabannayacoob si'c te cobyä, sa'ni racchee yätxtiil ni xheti levaduur yejcnü par lanij xten pascw. Arajptu yäl'nabannaya sa'csi agujt Jesucrist sigajc gujt te xile' lo lanij pascw te badzucajni rextoljnu. <sup>8</sup> Si'c nanab jiennu lanij xten pascw con yätxtiil ni xheti levaduur yejcnü, nalajznu con yäl'guliipac neñ lastoону, xhet yätxtiildi ni yu' cobyujxhga yejcnü, nalajznu na'c gunlu latsiaj.

<sup>9</sup> Lo stee guijtz abacuaä lojtu, na'c guchaagtu rebeñ ni runnä cosguijdx bejn ni di gac chäälni. <sup>10</sup> Niluxh xhet caniaä: xcuent rebeñ guedxliuj ni rujn cosguijdx con bejn ni di gac chäälni, niclaza xcuentü rebeñ ni rchaglazte meel, niclaza rebeñ ni najc gubaan, niclaza rebeñ ni riu rebanäj. Paru si'c gacni, nanab jiunejztu guedxliujre. <sup>11</sup> Niluxh narä bacuaä guijtzga lojtu te na'c guchagsa'tu te bejn nani rni ahuuilajzni xtidx Dios, luxh rujnrüni cosguijdx con bejn ni di gac chäälni, o rchaglaztejni meel, o riuni rebanäj, o rniyaj sa'ni, o rsiojzni, o rsiojeeni bejn te rca'ni xhi xtenu. Rniäza lojtu, nicla gaunäjtu sa' bejnga. <sup>12-13</sup> Sa'csi narä di gacdi gunä yäl'guxhtis loj rebeñ ni gajd chalilajz xtidx Dios. Gunti Dios yäl'guxhtis lojreni. La'tu nungäjil guntu yäl'guxhtis loj rebeñ ni ahuuilajz xtidx Dios. Ni'cni colgudzucaj bejndojlga lojtu.

## 6

### *Na'c chäätu loj rebendojl te gunreni yäl'guxhtis lojtu*

<sup>1</sup> Palga tejtü ni ahuuilajz xtidx Dios rlajz cue'c xquej stee sa'tu, ¿xhicuent chale'ctu xquejni loj rebendojl te gunreni yäl'guxhtis lojtu? ¿Xhicuent ditu guiniab yäl'guxhtis loj rebeñ ni ahuuilajz xtidx Dios, ä? <sup>2</sup> ¿La ditu gan, rebeñ ni ahuuilajz xtidx Dios sujñ yäl'guxhtis lo rebeñ guedxliuj, ä? Palga la'tu sujntu yäl'guxhtis lo rebeñ guedxliuj, ¿la di gacdi guntu yäl'guxhtis lo sa'tu lo recosbäz lacuaa chäätu loj rebendojl te gunreni xcäl'guxhtisreni lojtu, ä? <sup>3</sup> ¿La ditu gan sienzanu yäl'guxhtis lo rexangl Dios, ä? ¿Aticaxh jiennu yäl'guxhtis loj recos bäze' xten sa'nu lo yäl'nabajñre! <sup>4</sup> Palga la'tu cadilñäj sa'tu xcuent recos xten guedxliujre, ¿xho mood chäälu loj rebendojl ni rut najc di loj xquidootu, te naareni lojtu xhini'c guntu, ä? <sup>5</sup> Rniä rediidxga lojtu te guitujytu. ¿La ruti nicla tej beñnasin loj guiraatu ni sajc gun yäl'guxhtis lo resa'tu, ä? <sup>6</sup> ¿Xhicuent rile'c te bejn ni rililajz xtidx Dios xquej bejtzni ni rililajz, luxh rijreni nez loj reguxhtis ni di chalilajz xtidx Dios?

<sup>7</sup> Mbaj naj, guliipacni alabanijtü sa'csi yu' yäl'rdilñäj sa'tu; colgutijp lajztu rebeñ ni rujn dojl lojtu. Maazru huen colgusaan sucua'reni xhixtentu. <sup>8</sup> Per dee, alga lagajc la'tu runnijttu loj lagajc resa'tu, luxh rca'tu xhixten lagajc resa'tu.

<sup>9</sup> O ¿la ditu gan rebeñ dojl dipacreni jiu' lo xcäl'rmibee Dios, ä? Na'c gusaantu gusgeereni la'tu, nicla te resa' dee di jiu' lo xcäl'rmibee Dios: guiraa reni richagtoo regunaa; guiraa reni rajñ rebanäj; reni resnä bejn ni di gac chäälni; reniguii ni rungunaa; reni najc birääx; <sup>10</sup> reni najc gubaan; reni rsäblajz xhixten bejn; reni rsiojz; reni rniyaj; reni rusguee bejn te rca'reni xmeel bejn. Nicla tej sa' redee di jiu' lo xcäl'rmibee Dios. <sup>11</sup> Yu'zatu ni gujc si'c galoo, niluxh naj abasia Dios lastootu, naj anajctü beñnaya nez loj Dios sa'csi abiäl'lajz Dios xtojltu xcuent Jesucrist, näjza xcuent Sprit Dxan xtenu. La'tu anajctü rexpejni.

### *Tiejxhnu najc xquidoo Dios*

<sup>12</sup> Guliini sajc gunä xhitis ni rlazä gunä, niluxh xhet guiraadini najc hueen par narä. Narä sajc gunä si'ctis ni rlazä, niluxh dina gusanä guinibee nicla tej xhi cos narä. <sup>13</sup> Guliini najc yäl'rajw par xque'ni, luxh xque'ni najc par yäl'rajw, niluxh sidzujñ dxej sunitloj Dios guiro'preni. Per tiejxhnu di gac par jiennu cosguijdx con bejn ni di gac chäälnu. Tiejxhnu najc par Dios, luxh Dios najza par tiejxhnu. <sup>14</sup> Luxh naj lagajc Dios guläs Dad Jesucrist lo rebeñgut, siliäsani nuurnu con xcäl'rmibeduxhni.

<sup>15</sup> ¿La ditu gan tejtatu najc si'c te la' tiejxh Crist sa'csi ahuuilajztu rextiidxni, ä? Palga tiejxhnu najc xten Crist, ¿la sajc gudeednuni loj te gunadxab, ä? ¿Gurniälojlu jiennu si'c! <sup>16</sup> ¿La ditu gan cheni guchaagni te gunadxab rajcni tejtis tiejxh con laani, ä? Loj rexquijtz Dios caj: "Guiro'preni sajc si'c tejtis bejn." <sup>17</sup> Niluxh nani ruedeed lastooni lo Dios anajczani tejtis con laani sa'csi rbäjz Sprit Dxan xten Dios neñ lastooni.

<sup>18</sup> Colguibicaj lo dojl ni rujn bejn con nani di gac chäälni. Xhitis stee dojl ni rujn bejn najcni lo jiaa tiejxhni, niluxh dojl ni runnäjni bejn ni di gac chäälni najc dojl lagajc nen tiejxhni. <sup>19</sup> O çla ditu gacbee tiejxhtu najc xquidoo Sprit Dxan ni abaniidx Dios te cuääzni nen lastoonu, ä? Ni'cni di gacdi guinibeetu lagajc la'tu. <sup>20</sup> Agudijx Jesucrist xtojlnu con xtiejnni lo cruzj, ni'cni nanab jiennu dzunsa'c nani guiliä'p xpala'n Dios con tiejxhnu näjza Xpritnu.

## 7

### *Yäl'rulijdx xcuent yäl'ruchnaa*

<sup>1</sup> Naj gudzu'ä diidx lojtu xcuent ni gunabdiidxtu cheni bacuaatu guijtjz loä. Guliini hueen najcni na'c guchnaa te niguii. <sup>2</sup> Niluxh sa'csi yu' xhidajl reni richunäj chutis gunaa, suga'p teja reniguii chäälpacni; sigajcza suga'p teja regunaa chäälpacni. <sup>3</sup> Nanab niguii guchaagni chäälni che rlanj chäälni, sigajcza gunaa nanab guchaagni chäälni che ni si'c rlanj chäälni. <sup>4</sup> Di gunaa guinibee lagajc tiejxhni, sa'csi chäälni rnibee tiejxhni. Sigajcza di niguii guinibee lagajc tiejxhni, sa'csi chäälni rnibee tiejxhni. <sup>5</sup> Na'c gusuni' tejtju lo chäälni. Maazru huen coljia'n diidx na'c guchagsa'tu te xcheje' te cuedx-guiniabtu lo Dios. Che luxx cuedx-guiniabtu lo Dios, guchagsacs'a'tu te na'c guquül beñdxabtu chunäjtu ste'ca bejn.

<sup>6</sup> Rniä rediidxre lojtu te ni rlanj guchnaa sajç guchnaani, niluxh dina guiniä lojtu, nanabpac guchnaatu. <sup>7</sup> Narä rlazä maläii sajç gac guiraa bejn si'c ni nacä. Dios abadeed loj teja bejn xho mood guibajnni. Yu'reni sajç guibajñ tej mood, yu'zarenì sajç guibajñ garenca mood.

<sup>8</sup> Loj reben xteb näjza loj regunabiud rniä, hueen najc na'c guchnaareni, gacreni si'c narä. <sup>9</sup> Niluxh palga di gacdi cue'cdxi lajzreni, suguchnaareni. Maazru huen guchnaareni te na'c guntisreni xhigab rlanjzreni guchaagreni te niguii o te gunaa.

<sup>10</sup> Loj rebejn ni abachnaa, rniä rediidx ni basa'n Dad Jesucrist loonu: "Na'c guro'n gunaa chäälni." <sup>11</sup> Niluxh palga guro'n te gunaa chäälni, na'c guchnasacni, o maazru hueen gusiäjlni diidx guibisacni lo chäälni. Sigajcza te niguii na'c guro'nni chäälni.

<sup>12</sup> Naj rediidx ni guiniä najc xhigab xtenä, xhet diidxdi ni basa'n Jesucrist loonu. Scree rulidxä la'tu. Palga yu' te niguii ni rililajz xtidx Dios, luxh chäälni di chalilajz xtidx Dios, luxh rlanj gunaaga cuäznäjni niguiiga, na'c guro'n niguiigani. <sup>13</sup> Palga yu' te gunaa ni rililajz xtidx Dios, luxh di chäälni chalilajz xtidx Dios, niluxh rlanjzni cuäznäjni gunaaga, na'c guro'n gunaaga chäälni. <sup>14</sup> Palga yu' te niguii ni di chalilajz xtidx Dios, luxh chäälni rililajz xtiidxni, palga hueen nabanäj sa'reni, hueen najc yäl'ruchnaaga nez loj Dios. Sigajcza palga yu' te gunaa ni di chalilajz xtidx Dios luxh chäälni rililajz xtiidxni, palga hueen nabanäjsa'reni, hueen najc yäl'ruchnaaga nez loj Dios. Palga ðini gac si'c, di Dios gunle' rexi'nreni, per naj abenle' Dios rexi'nreni. <sup>15</sup> Palga chääł te gunaa o chääł te niguii ni di chalilajz xtidx Dios luxh rlanjzni guilia' sa'ni con chäälni ni ahuililajz xtidx Dios, sujiizani. Nani rililajz xtidx Dios ðiruni ga'p por cuäznäjni chäälni ni di chalilajz xtidx Dios, niluxh gurejdx Dios nuurnu te cuedcxini lajznu. <sup>16</sup> Sa'csi çxho najnlu, gunaa, la suslaa Dios chäällu lo dojl xcuentlu, ä? O çxho najnlu, niguii, la suslaa Dios chäällu lo dojl xcuentlu, ä?

<sup>17</sup> Si'ctis ni baniidx Jesucrist lo tejanu, si'ctis ni gule Dios tejanu, si'c suguibajnnu. Si'cza rulidxä gunrenini nen guiraa reguidoo. <sup>18</sup> Palga tej niguii rililajz xtidx Dios, luxh yu'ni bee tiejxhni, xhet najcdini. Palga stee niguii chalilajz xtidx Dios, luxh xheti bee tiejxhni, xhet najcdizani. Sujia'nni si'cni najcni. <sup>19</sup> Xhet najcdi la yu'ni bee o xhet beedi yu'ni. Tejtis ni nanab gunni, gusoobni rediidx ni gunibee Dios. <sup>20</sup> Tejani jia'ni si'cni najcni cheni gurejdx Diosni. <sup>21</sup> Palga najclu te mos ni guziireni te gunlu dzuun, dxejç huililajzlu xtidx Dios, na'c chulu yärsia' xcuent ni'c. Palga sajç gudzu'lu meel lo xlamu, badzu'zani te gaclu te bejn ni rut rnibeedi. <sup>22</sup> Sa'csi nani najc te mos ni guziireni te gunni dzuun che huililajzni xtidx Dios, ðiruni gac te mos ni bio' nez loj Jesucrist, niluxh te bejn ni rut rnibeedi che rililajzni xtidx Dios, anajcni mos ni guzii Dios, najcni xmos Dios. <sup>23</sup> Guzii Cristtu con xtiejnni, ni'c na'c gusaantu guinibee bejn la'tu te gac guntu xtzun Dios. <sup>24</sup> Rebetzä, colchanuu gactu si'ctis ni najctu che gurejdx Dios la'tu, palga najctu mos ni guziireni, o te bejn ni rut rnibeedi.

<sup>25</sup> Redxa'p ni gajd guchnaa, di Jesucrist ninibee xhini'c nanab gunreni. Gule Dios narä te gusule'ä xtiidxni. Naj gulidxäreni sa'csi nanä xtidx Dios, luxh racnäjzani narä. <sup>26</sup> Runä xhigab hueen najc palga di reniguii guchnaa sa'csi siääd yäl'naganduxh lo guedxliujre. <sup>27</sup> Çla alabachnaalu, ä? Na'c guro'nlu chäällu. Çla alabaro'nlu chäällu, ä? Na'c chaxiilu chäällu. <sup>28</sup> Palga guchnaalu, xhet dojl di rujnlu. Palga guchnaa te dxa'p, dizani gun dojl. Niluxh reni ruchnaa sidejdreni trabajw lo yäl'nabajñre. Ni'cni rniä na'c guchnaatu sa'csi di rlazä tedtu trabajw.

<sup>29</sup> Rebetzä, rlazä guiniä lojtu rediidxre: Guxiiru dxej guibajnnu lo guedxliujre, ni'cni reni abachnaa na'c gunreni xhigab xtenis yäl'ruchnaa, te gac gunreni xtzun Dios. <sup>30</sup> Luxh

reni cayoon, nanab gunreni si'cni xhet cayoondireni; reni rbalajzreni, nanab gunreni si'cni xhet cabaadi lajzreni; reni rzii xhicos, nanab gunreni si'cni xhet rajpdireni; <sup>31</sup> nájza reni rujn recos lo guedxliujre, nanab gunreni si'cni dini gunni, sa'csi recos ni rhuuinu lo guedxliujre, alacanitlojreni.

<sup>32</sup> Nará rlazá na'c chutu yársia'. Rebejn ni gajd guchnaa, riureni rextzuun Dios, nájza xho guspaareni lajz Dios. <sup>33</sup> Renani abachnaa riureni recos guedxliujre te guspaani lajz cháälni, <sup>34</sup> tiop najc xhigabni xcuent recos nani gunni. Sigajcza najc te gunaa ni abachnaa con tejni gajd guchnaa. Sa'csi te gunaa ni gajd guchnaa riuri rextzuun Dios te gacreni gunadxan nez loj Dios con tiejxhrenei nájza con lastooreni. Niluxh regunaa ni abachnaa riureni recos guedxliujre, nájza xho guspaani lajz cháälreni.

<sup>35</sup> Rniä rediidxre par xcäl'nasa'ctu, xhet gudxonädi la'tu, te gunrutu redzunsac, te chanälazsa'ctu Dios.

<sup>36</sup> Palga yu' chu te niguii lojtu ni rujn xhigab, maazru hueen guchnaa xindxa'pni sa'csi acayajcni gunagool, dini gun dojl, sajz gudeednini guchnaani. <sup>37</sup> Palga steeni dini gun xhigab si'c nanab gunni, sajz gunni si'ctis ni rlazjni palga abejnpacni xhigab neñ lastooni di xindxa'pni guchnaa, hueenza najc si'c. <sup>38</sup> Ni'cni nani rudeed xindxa'pni guchnaa, hueen rujni, sigajcza nani dini gudeed xindxa'pni guchnaa, laacaza rujni.

<sup>39</sup> Te gunaa ni abachnaa, rajpni por guibannäjni cháälni guideb nabajn cháälni. Palga guet cháälni, jianxtebni stehuält, dxejc sajz guchnaani chutis niguii ni rlazjni, palga najcni tej ni ahuililajz xtidx Dios. <sup>40</sup> Nará rchaloä maazru guibaa lajzni palga dini guchnaa. Si'c najc xhigab ni runä, luxh riliipac lazä cayacnäj Sprit Dxaan xten Dios narä.

## 8

### *Yälrajw ni ruzujreni lo rebanäjb*

<sup>1</sup> Rniä lojtu xcuent reyälrajw ni ruzujreni lo rebanäjb. Guliini guiraanu rajpnu yäl'najn xcuent recosga. Niluxh yäl'najn rujn rajc bejn guyalajz. Luxh yäl'rinälajz sa'ni, ni'c rujn racnäjnu resa'nu. <sup>2</sup> Palga yu' chuni'c rujn xhigab nanduxhni, rusgueeni lastooni sa'csi cayäädxru gacbeeni si'c ni nanab gacbeeni. <sup>3</sup> Palga yu' chu sanälajz Dios, Dios anumbee bejnga.

<sup>4</sup> Ni'cni, xcuent reyälrajw ni risujreni loj rebanäjb, anancheenu xhet sajcdi rebanäjb ni yu' lo guedxliuj, ruti stee Dios; tejtis ni najc Gueb Dios. <sup>5</sup> Masque yu' reni rniireni najc "dios" xhaguibaa o loj guedxliuj, luxh yu'za xhidajl "dios" nájza xhidajl lam ni rnibee, <sup>6</sup> per nuurnu nadonnu yu' tejtis Gueb Dios, Dad nani benchee guiraa recos, luxh lojtisni nabajjnu. Rajpnu tejtis Dad ni rnibee loonu, ni'c najc Jesucrist. Xcuent xcäl'rnibeeni guchee guiraa recos loj guedxliuj, luxh nuurnu nabajjnu xcuent Jesucrist.

<sup>7</sup> Niluxh xhet guira'ti bejn najn yu' tejtis Dios. Yu' rebejn ni ahuililajz xtidx Dios abia'reni rajjreni rebanäjb, luxh rajwzaren i reyälrajw lascanu guzujni loj banäjb sa'csi nacäyru xcäriejnreni, ni'cni et laadi ria'n lastooreni, rxhünza xcäriejnreni. <sup>8</sup> Xhet xcuent xhi rdaudinu sajz guiba'ncruno lo xnejz Dios. Xhet najcdi palga guidaunu o palga dinu guidau. <sup>9</sup> Colnatiro xhi rujntu te na'c guntu jiajb te bejn lo dojl nani gajd chalilazsa'c xtidx Dios. <sup>10</sup> Palga te bejn ni gajd chalilazsa'c xtidx Dios fini cayajwlu reyälrajw ni guzuj lo rebanäjb, luxh luj najclu te bejnajn, sa'csi dee gajd gachesa'c rextidx Dios, ¿la di lajzni gac nadip te nájza laani chatajwni yälrajw ni guzuj lo rebanäjb? <sup>11</sup> Niluxh luj, xhet dojldi cayujnlu, per bejtzlu ni gajd chalilazsa'c xtidx Dios, sixijjni, luxh najcni bejtzlu sa'csi nájza par laani gujt Dad Jesucrist lo cruzj. <sup>12</sup> Si'cza che rujnlu dojl lo bejtzlu, runnajlu lajzreni sa'csi gajd xcäriejnreni jiansa'c, luxh si'c cayujnzalu dojl lagajc lo Crist. <sup>13</sup> Ni'cni, palga narä runä riabsac betzá lo dojl xcuent ni rauä, hueenru dirunä gauä yälrajw ni gun jiajb betzá lo dojl stehuält.

## 9

### *Xhi sajz gun te apost*

<sup>1</sup> ¿La dina gacä te bejn ni rut lojdi yu'ä? ¿La xhet apostdi narä? Ni abahuiä lo Dad Jesucrist, abasule'ä rextiidxni lojtu, ni'c huililajztu xtiidxni. La'tu najctu xtzunä ni runä lo Dios. <sup>2</sup> Yu' reni di gumbeeni narä si'c te apost, niluxh la'tu abiembesa'ctu narä sa'csi ahuililajztu rextidx Jesucrist ni abasule'ä lojtu. Ni'c ruluiloj guliipac nacä te apost.

<sup>3</sup> Diidx ni rniä scree loj reni di chalilajz nacä apost najc scree: <sup>4</sup> ¿La di riälj xca'ä guiraa ni rniuidxtu gauä nájza ni rniuidxtu yä'ä? <sup>5</sup> ¿La digacdiza gapä te chälä ni ahuililajz xtidx Dios dxejc chanääzani sigajc rujn guiraa reapost, nájza rebetzhuin xten Dad Jesucrist nájza Pedr? <sup>6</sup> O ¿la xtebtis Bernabé nájza narä di gacdi cuääz jienu dzuun te guidaunu laj rusule'nu xtidx Dios? <sup>7</sup> ¿Chuni'c rajc soldaad luxh lagajc laani siini xhi gauni? O ¿chuni'c rusuj yaguub luxh dini gau ninejxh ni rcaj lojga, ä? O ¿chuni'c rajp gaii dxib, luxh dini yä

le'ch ni ruedeedreni, ä? <sup>8</sup> Na'c guntu xhigab lagajc xcuentä caniä rediidxre lojtu, sa'csi näj loj xleii toMoisés caj diidx xcuent recosre. <sup>9</sup> Loj reguijtz xten xleii toMoisés caj rediidxre: "Na'c gusällu guijxh ro' gon che cayo'tni yejc triuu." ¿La guniitis Dios rediidxre sa'csi riuni regon, ä? <sup>10</sup> ¡Dini gac! Xcäl'nasa'cnu guniini rediidxga, sa'csi bejn ni rujn dzuun lo niaa näjza nani rusia triuu riälj gunlojni xca'ni te yäl'nasa'c ni rajc lo xnaiani. <sup>11</sup> La'tu najtu si'c te yuj cadro gule'cnu binj sa'csi basule'nu rextidx Dios lojtu, ¿la rujntu xhidixre dzunro najc gacnäjtu nuurnu tudxene', ä? <sup>12</sup> Palga racnäjtu ste'ca bejn ni ruluiitu, nungäjrlu gacnäjtu nuurnu.

Niluxh gajdnu guinii si'c lojtu sa'csi di rlajzdinu guidxoonnu chalilazsa'ctu rextidx Dios, ni'c chotipnu lajznu guiraa retrabajw ni cadeednu. <sup>13</sup> La'tu najtu reni rujn dzuun neñ guidoro rajwreni rebääl ni risa'nreni lo Dios, sigajcza reni rujn dzuun lo dxan cadro risa'nreni xpääl reguidxaa lo Dios, näjza laareni rajwreni rebäälga. <sup>14</sup> Si'cza gunibee Dad Jesucrist loj reni gusule' xtidx Dios, xca'reni xhi gaireni lagajc loj reni rililajz xtiidxni. <sup>15</sup> Niluxh gajdpacna gunä si'c, xhetza caca'ädi. Dizana gucuaä rediidxre lojtu naj te guniidxtu xhi xca'a. Hueenru guetä te na'c gudzucay te bejn yäl'rbalajz ni rapä xcuent dzuun ni runä lo Dios.

<sup>16</sup> Narä dina gapä xhicuent guiliä'pä xpala'nä che rusule'ä xtidx Dios. Sa'csi si'c nanabpac gunä, sa'csi probe'za narä palga dina gusule'ä xtidx Dios. <sup>17</sup> Palga gunä dzuunre sa'csi rdxaglazäpac gunäni yu' xhi guniidx Dios loä. Mase runäni con yäl'rigaan, empac Dios agule narä te gusule'ä xtiidxni. <sup>18</sup> ¿Xhini'c najc xcuent ni xca'ä, ä? Che gusule'ä xtidx Dios lo chutis bejn, ligaj gusule'äni, te di gusule'ä xtiidxni te guniidx rebejn xhi guniidxreni xcuent xtzunä, mase si'c riälj gunreni.

<sup>19</sup> Rut xmosdi nacä, luxh lagajc narä benä xhigab gacä si'c te mos te gunä gaan chalilajz xhidajl bejn xtidx Dios. <sup>20</sup> Cheni yu'ä loj rexpejn Israel, runä si'cni rujnreni te gunä gaan chalilajzreni rextidx Dios. Che rlazäza guiniä loj reni nabajw loj xleii toMoisés, dxejc runä si'c rujnreni te gunä gaan chalilajzreni rextidx Dios, niluxh diruna guibanä lo leiiga. <sup>21</sup> Stee lajt cadro rlazä gunä gaan reni di guibajw lo xleii toMoisés, runä si'c rujnzareni, mase empac nabanä lo xleii Dios sa'csi rusobä diidxni basa'n Crist. <sup>22</sup> Cheni yu'ä loj reni guxii rililajz xtidx Dios, racäza si'c ni najczeni te gunä gaan chalilazsa'czeni. Narä runä sigajc rujnreni, te si'c gunä gaan chalilajz xhidajlreni xtidx Dios. <sup>23</sup> Runä guira'ti xcuent xtidx Dios ni ruslaa bejn lo dojl, te xca'zanu, narä näjza rebejn ni ahuililajz xtidxä, yäl'nabajw par tejpas.

<sup>24</sup> Anajntu che ru' te lanj, che ruxun reniguii, guiraareni ruxun, niluxh tejtis ni rca' ni ruzalajzreni. Colguxunza nez lo Dios te gunzatu gaan. <sup>25</sup> Guiraa reni rlajz guxun rapdareni tiejxhzeni te ga'p tiejxhzeni yäl'nadip, yäl'nadaan. Luxh laareni ruxunreni si'c te gunreni gaan te cos ni di gaclaa agunitlojni. Niluxh nuurnu ruxunnu te guniidx Dios loonu nani dipac nitloj. <sup>26</sup> Narä dina guxunä si'cni dina ganä caro cha'ä, dizana gucuaä si'c te bejn ni rucuanä te balaa, o cayäätisni lo bej. <sup>27</sup> Niluxh narä runä rajc tiexhä si'c xmosä te na'c gunni si'ctis ni rlajzni, te gunni nani rlajz Dios te di cheni abasule'ä xtidx Dios loj xhidajl bejn, gusanxtujuj tiexhä narä.

## 10

### *Yäl'rlujdx lo xcuent rebanäj*

<sup>1</sup> Rebetzä, di rlazä jiäl'lajztu ni gusajc retoxtadgoldoonu. Gusajreni xpalaa te za gudejdzareni galäii nisdoo ni laa Nisdo Xniaa. <sup>2</sup> Gudejdreni xpalaa te za näjza gudejdreni galäii nisdoo; ni'c najc si'c te yäl'robnis sa'csi sanajlreni toMoisés. <sup>3</sup> Sigajcza guiraareni gudajw tejtis yäl'rajw ni baxhal Dios xhaguibaali. <sup>4</sup> Guiraazareni gu' nis ni badeed Dios, Dios bejn birii nisga cuä' te guilaj. Luxh Xpirt Crist gusanäjreni cadrotis sääreni nez lo reyubidzroga. Luxh con xcäl'ribeeni birii nis loj gulajga, Crist najc si'c guilaj ni huinäreni. <sup>5</sup> Dios bidxehnäj xhidajlreni, ni'c xhidajlreni gujt nez lo reyubidzga.

<sup>6</sup> Guiraa rediidxga najc te yäl'rlujdx loonu, te na'c guichagajznu jiennu lagajc redojl ni bejn retoxtadgoldoonu. <sup>7</sup> Na'cza gan'tu rebanäj si'c ni bejn baltireni; acaj lo rexquijtz Dios xcuentreni: "Rebejn ni guyaa lajz gurejreni te gu'reni, gudajwreni, dxejctiru huisurenä te gusloj caguijtreni." <sup>8</sup> Na'c chunäjnu stee bejn di gac chääl'tu si'c bejnreni, ni'cni gujt galbichoñ mil'reni tejtis dxej. <sup>9</sup> Na'cza guche'chnu Dios con rextol'nu si'c bejn balti rebejnga, ni'cni gujtreni sa'csi gudauya' bäl'reni. <sup>10</sup> Na'cza chamojmtu xcuent ni rujn Dios si'c ni bejn rebejnga xcuent ni bejn Dios, ni'cni baxhal Dios angl xten yäl'gujt bagu't xhidajlreni.

<sup>11</sup> Guiraa redee gusajc retoxtadgoldoonu te rulijdxni nuurnu, cuajzareni lo guijtz te guluii rediidxga nuurnu xho riälj jiennu, nuurnu ni nabajdnu neñ redxej naj. <sup>12</sup> Ni'cni chutis ni rujn xhigab naba'ca'cni nez loj Dios, sudzu'tzni te di jiabsacni. <sup>13</sup> Xheti te trabajw ni cadejdtu nani gajd ted chutis bejn. Niluxh di Dios cuälaztu, dini gusaan tedrutu



dzunduxh nani digacdi guntu huant, suniidx Dios yäl'nadip yäl'nadaan lojtu te che tedtu trabajw sidxäl'tu xho guibicajtu lo dzunduxhga, te gutiplajztu.

<sup>14</sup> Ni'cni rniä lojtu, rebetzä nani sanälazä, col'bicaj lo yäl'rajn xten rebanäjb. <sup>15</sup> Rniä lojtu si'c lo te beñ nasiñ, te beñajñ: colgulatzsa'c rextidxä don la laaca najcreni. <sup>16</sup> Che rdaunu xchej xten Dad Jesucrist najcni te seen nabanäñänu Jesucrist. Che rdunnu neñ co'p, maalajznu gudijx Dad Jesucrist xtiejñni xcuent xtojñnu lo cruzj. Che rdaunu yätxtiil, sälojni anajcnu tejtis xcuent tiejxñni ni badeedni cuaj lo cruzj xcuentnu. <sup>17</sup> Sa'csi yu' tejtis yätxtiil, mase najcnu xhidajl, najcnu si'c tejsi tiejxh sa'csi tejsi yätxtiil rdaunu che rauxchejnu xchej xten Dad Jesucrist.

<sup>18</sup> ¡Bahuii xho rujn rexpejn Israel! Rajwreni xpääl reguidxaa ni rile'creni lo Dios lo dxan neñ guidoo, ni'c najcreni tejsi con guiraa rebejn nani rujn sigajc rujnreni. <sup>19</sup> ¿Xhixñni'c rlazä guiniä, naj? ¿La caniä yu' xhi sajç gojn nani gule'c bejn lo banäjb, ä? O ¿la yu' xhi sajç banäjbga, ä? <sup>20</sup> Xhet sajçdireni. Narä caniä lojtu dee: Recos nani rbe'c rebenzijt lo rebanäjb, lo rebenðxab cabec'reneni, et lojdi Dios. Luxh narä dina rlazä gactu tejsi con rebejn nani rbe'c lo rebenðxab, te di chachunäjzatu rebenðxab. <sup>21</sup> Sa'csi digacdi yätu co'p ni rusnaj laaznu ni bejn Dad Jesucrist lo cruzj nägajcza co'p nani rudeedreni lo rebenðxab. Digacdzna guidaunu xchej xten Dad Jesucrist nägajcza xchej ni rudeedreni lo rebenðxab. <sup>22</sup> O ¿la rlanjznu guche'chnu Dad Jesucrist, ä? ¿Xhixh maazru nadipnu lojni, ä? ¡Gurniä lojtu!

### *Colyejn guira'ti te chä'p xpala'n Dios*

<sup>23</sup> Guliicani, sajç jiennu xhitis ni rlanjznu jiennu, niluxh xhet guira'ti ni rlanjznu jiennu najc hueen par nuurnu. Guira'ti najc laaca, niluxh yu' reni di gacnäj gustioobnu lo xcäl'rililajz Dios. <sup>24</sup> Na'c guntu xhigab quiiiltistu lagajc xcäl'nasa'ctu; maazru hueen quiiilzatu xcäl'nasa'c xpisin'tu. <sup>25</sup> Col'tajw xhitis bääl ni rdo' lo guii, na'c guiniabdiidxtu caro siäädni te di gacnaj xcäriejntu. <sup>26</sup> Lo xtidx Dios caj rediidxre: "Sa'csi guideb guedxliuj näjza guiraa ni tre' lo guedxliuj najc xten Dios."

<sup>27</sup> Palga jäädgajñ te bejn ni di chalilajz xtidx Dios luj jäädtaunäjñnu luxh acuäjblu chäälu, huijza, gudajw xhitis ni cue'cni nez lojlu, na'c guiniabdiidxlu te di gacnaj xcäriejñnu. <sup>28</sup> Palga yu' chu naa lojlu: "Dee najc bääl ni bile'cnu lo rebanäjb", na'c gauluni, didi gunni gunijñt dade'ga ni gunii si'c lojtu te di gacnajza xcäriejñ chutis. <sup>29</sup> Dina guiniä xcäriejñnu, didi gunnajni xcäriejñ stee dade'ga; mbaj naj, ¿xhicuent riäjñ gula'tzreni narä sa'csi rajc runä guira'ti porsu racnaj xcäriejñ ste'ca bejn, ä? <sup>30</sup> Palga rudedä xquixtios lo Dios nani runiidx xhi rauä, ¿xhicuent rniyajreni narä ni rauä, luxh abadedä xquixtios lo Dios? <sup>31</sup> Ni'cni palga gautu, o palga yätu o xhitis ni rujntu, colyujñ guira'ti te chä'p xpala'n Dios. <sup>32</sup> Na'c guche'chtu nicla rexpejn Israel niclaza rebenzijt, niclaza rexpejn xquidoo Dios. <sup>33</sup> Sigajcza runä narä, runä guira'ti ni ruspaalajz rebejn, dina quilä xcäl'nasa'cätis, alga rguilä xcäl'nasa'c xhidalduxh bejn, te laareni lo dojl sa'csi ahuililajzreni xtidx Dios.

## 11

<sup>1</sup> Colyejn si'cni runä narä, sigajcza narä runä si'cni rujn Jesucrist.

### *Xho riäjñ gun regunaa neñ xquidoo Dios*

<sup>2</sup> Rliä'pä xpala'ntu sa'csi lo guira'ti rnaj lajztu narä, rnajza lajztu rediidx nani baluiä lojtu, sudzu'tztu rusoohtu rediidx sigajcni baluiä'reni lojtu. <sup>3</sup> Narä rlazä gacbepectu Jesucrist najc nani rnibee lo niguii, dxejctiru niguii rnibee gunaa si'c rnibee Dios Jesucrist. <sup>4</sup> Chutis te niguii ni yu' xhumbreel yejçni lañni cabedx-canabni lo Dios o lañni caguluiini xtidx Dios, laani rusanxtujyñi yejçni. <sup>5</sup> Palga yu' te gunaa ni dini gusäu xpäiini yejçni che cabedx-canabni loj Dios o che caniiini xtidx Dios, rusanxtujyñi yejçni sa'csi najcni sigajc najc te gunaa ni abigaj yejçni. <sup>6</sup> Palga di te gunaa gusäu xpäiini yejçni suguigaj yejçni. Palga najcni te xtujy guigaj yejçni, sugusäuni xpäiini yejçni. <sup>7</sup> Di guchaag gusäu te niguii yejçni sa'csi najcreni si'c xtuxh Dios, näjza xcäl'rindibicha' Dios. Niluxh regunaa najc si'c xcäl'rindibicha' niguii. <sup>8</sup> Sa'csi di niguii nixitiej cuä' gunaa; gunaa najc ni birixtiej cuä' niguii. <sup>9</sup> Xhetza xcuent gunaadi guc-chee niguii; gunaa najc ni guc-chee xcuent niguii. <sup>10</sup> Ni'cni nanab jääu yejç gunaa neñ guidoo si'c te seen lo rexangl Dios yu' chu rnibeereni. <sup>11</sup> Niluxh nez lo Dios nicla niguii niclaza gunaa digacdi guibañ xtebreñi. <sup>12</sup> Sigajc galoo birixtiej gunaa cuä' niguii, sigajcza naj gunaa najc nani ruu báz; luxh Diostis najc nani runchee guira'ti rebejn.

<sup>13</sup> Colyejn lagajc xhigabtu naj, ¿la laaca najcni cuedx-guiniab te gunaa lo Dios lañ ni xhet niäudi yejçni, ä? <sup>14</sup> Loj reben guedxliuj guiraa reniguii rgaj yejçreni, sa'csi najcni te xtujy guigaduxh xquidxejçreni. <sup>15</sup> Niluxh regunaa hueen najc rga' xquidxejçreni te rusäuni yejçni. <sup>16</sup> Palga yu' chu tildiix xcuent rediidx nani caniä lojtu, nanab gacbeeni si'ctis riennu, si'ctisza rujnreni neñ guiraa rexquidoo Dios.

### *Xho ruxhñreni xchej Dad Jesucrist*

<sup>17</sup> Rediidxre ni cagucuaä lojtu, direni guiliä'p xpala'ntu, sa'csi che rdxagsa'tu neñ xquidoo Dios, lacuaa laaca cuetu, xhet laadi rujntu. <sup>18</sup> Rnixgää dee: Abiejn diagä che re'tu lo xquidoo Dios, rlia'tu lo sa'tu rajctu tiop cuaa; luxh rillica lazä rediidxre. <sup>19</sup> Pet naatu nanab guntu si'c te gacheetu churenic sanälajzpac Dios, churenic sajru lo xtzuum Dios. <sup>20</sup> Ni'cni che rdxagsa'tu, dini gac te cuetu lo xmex xchej Dad Jesucrist, <sup>21</sup> sa'csi che agule'ceni xchej lo mex, tejsa bejn rlanj xcaxgaa xhi gauni, dxejc yu' reni agudxadoo xque'reni, agusojzaren, la'ni yu' stee cuaa bejn calaan, gajdreni gau. <sup>22</sup> ¿Xho mood? ¿La xheti roljiztu cadro gac gautu, yätu, ä? O ¿la rbälazlu xquidoo Dios, ni'c rusanxtujylo rebejn ni xhet räjpdi, ä? ¿Xhini'c guiniä lojtu naj? ¿La naatu guiliä'p xpala'ntu xcuent nani rujntu, ä? ¿Gurniälojtu guiliä'p xpala'ntu!

*Xchej Dad Jesucrist*

(Mt. 26:26-29; Mr. 14:22-25; Lc. 22:14-20)

<sup>23</sup> Baluiloj Dad Jesucrist loä lagajc nani baluiä lojtu xcuent xho bejnni guxhijn che gudaunäjni rexpeljni te xchej xten pascw, guxhijn ni gudo'ni. Cua'ni yätxtiil, <sup>24</sup> dxejc che abadeedni xquixtio lo Dios, gula'ni yätxtiilga, räjpni lojreni: “Colgajw, dee najc tiexhä ni gudedä guet xcuenttu. Scree guntu te guinalajzta narä.” <sup>25</sup> Si'cza bennäjni co'p che gulujx gudajwreni, räjpni lojreni: “Ni yu' neñ co'pre najc si'c xtienä; che ju'treni narä, sixe' xtienä xcuenttu, si'c te seen xten didxcoob ni gusa'n Dios loj rebejn ni aguleni. Scree guntu te guinalajzta narä.” <sup>26</sup> Che gautu yätxtiilga, che yätu neñ co'p'ga, ruluulosactu xhi bejn Jesucrist che gudijxni xcuent rextojlno lo cruzj; si'cza coluyjn dxejli ni guibisacni lo guedxliujre.

*Xho riäjlgac xchej Dad Jesucrist*

<sup>27</sup> Ni'cni rniä lojtu, chutis tejtü ni rajw yätxtiil, ni rä'za co'p xten xchej Dad Jesucrist, palga dini gusoob xtidx Dios, rujnini dojl, najcni si'cni lagajc laani bagu't Jesucrist, baxhe'zani xtejnini. <sup>28</sup> Niluxh sugula'tz tejtaju lagajc lastooni don la yu' xhi dojl bejnini, dxejcti sajg gauni yätxtiil, yäni co'p xten xchej Dad Jesucrist, sa'csi abaxhobdojlni. <sup>29</sup> Chutis bejn ni gau, ni yä xchej Dad Jesucrist, luxh dini gula'tz lagajc lastooni xhicuent gauni, yäni xchej Dad Jesucrist, lagajc laani rujnini jiajb xcälnej Dios yejcn. <sup>30</sup> Ni'cni lacti resa'tu racxhuu, xhet nadaanreni, luxh yu'zaren agujt. <sup>31</sup> Ni'cni nanab fiinu xho najcnu, guiniabnu lo Dios gudzucajni rextojlno te didi tednu trabajw. <sup>32</sup> Niluxh che rdejndu trabajw, rdejdnuni te na'c tednu trabajwduxh si'c ted reben guedxliuj che gacreni yäl'guxhtis xten Dios.

<sup>33</sup> Ni'cni rniä lojtu, rebetzä, che guire'tu te gautu xchej, colcuäjz resa'tu. <sup>34</sup> Palga yu' chu tejtü ni calaan, sugauni lagajc rolizjni, te di gun Dios yäl'guxhtis lojtu. Guiraa rexhistee cos, che jialä ro'c fiä don xho gacsac'ni.

## 12

*Dzuun ni ruedeed Sprit Dxan xten Dios lo tejsa ni rililajz*

<sup>1</sup> Rebetzä, rlazä gacheetu xcuent dzuun ni ruedeed Sprit Dxan xten Dios lo tejsanu.

<sup>2</sup> La'tu najntu che gajdtu challilajz xtidx Dios, rajntu chutis banäjnb ni di gachee, ni naatis bejn gantu. <sup>3</sup> Ni'cni rlazä gacheetu naj, nicla tejtü ni yu' Xsprit Dxan Dios neñ lastooni sajg guini: “Xhet sajcdi Jesucrist.” Luxh rut rajcdi rni: “Jesucrist najc Dadbid baxhuaannu”, palga di Xprit Dxan Dios cuää neñ lastooni.

<sup>4</sup> Mbaj naj. Yu' xhidajl dzuun ni ruedeed Dios loj rebejn ni huililajz xtiidxni, niluxh tejsi najc Xsprit Dxan Dios ni rujn dzuunga neñ lastoo guiragajcnu. <sup>5</sup> Yu'za balti cuaa dzuun nani riennu, niluxh tejsi najc Xtadbid baxhuaannu. <sup>6</sup> Yu' xhidajl mood rajc dzuun, niluxh tejsi Dios rujn dzuunga lastoo guiralii bejn. <sup>7</sup> Tejsa bejn rululoj garen-garen xtzuum Sprit Dxan xten Dios, niluxh guira'ti redzuunga najc te gacnäjnri guiraanu. <sup>8</sup> Lo tej bejn ruedeed Sprit Dxan yäl'nasiñ, lo steeni ruedeed lagajc Sprit Dxanga yäl'naj. <sup>9</sup> Lagajcza Sprit Dxanga ruedeedzani yäl'rililajzro lo tejni, dxejc lo steeni ruedeedza lagajc Sprit Dxanga yäl'rnibee te rusiajcn yäl'racxhuu. <sup>10</sup> Loj stee bejn ruedeedzani yäl'rnibee te gunni milaagw, loj stee bejn ruedeedni yäl'rnibee te sajg guinixgaani xcuent recos ni churu gac; lo steeni ruedeedni yäl'nasiñ te gumbeeni chu najc Sprit guliipac, näjsa chu najc sprit ni rusguee. Lo stee bejn ruedeedzani guiniini garen-garen redidxsaj; loj stee bejn ruedeedzani yäl'racbee te rajc rniini loonu xhini'c gunii bejn ni rniini garen-garen redidxsaj. <sup>11</sup> Niluxh tejsi najc Sprit nani rujn guiraa redzuunre, racnäjni rujn tejsanu xtzuumni si'ctis ni rlanjzni.

*Guiraanu najcnu te la' tejsi tiejxh*

<sup>12</sup> Sigajc ni najc tiejxhnu tejsi, mase yu' xhidajl la' xtenni, tejsareni te la' tejsi tiejxh, sigajcza najc rebejn nani huililajz xtidx Jesucrist. <sup>13</sup> Guiraanu, mase najcnu rexpelj Israel o beñ griegw, mase najcnu mos o mastr, gurobnisnu con laj Sprit Dxan che huililajznu xtidx Dios, te gujcnu si'c tejsi tiejxh, luxh tejsi Sprit Dxan xten Dios biädäljz neñ lastoonu.

<sup>14</sup> Sa'csi tiejxhnu dini gac tejsi la', najcni balti la'. <sup>15</sup> Paru naa ni'nu: "Sa'csi dina gacä te naa, ni'cni dina gacä te la' tiejxhre." ¿Xhixh porsni ni'c dini gac tla' tiejxhga, ä? ¡Gurniälojlu! <sup>16</sup> Palga diajgnu naa: "Dina gacä te baloj, ni'cni dina gacä te la' tiejxhre." ¿Xhixh porsni ni'c dini gac tla' tiejxhga, ä? ¡Gurniälojlu! <sup>17</sup> Palga guideb tiejxhni niajc te baloj, ¿xhi cojn niejn diajgni? Palga guideb tiejxhni niajc te diajgni, ¿xhi cojn chuxhi'ni? <sup>18</sup> Mbaj naj, ni'c basoob Dios guiraa rela' te guc-chee tiejxhnu si'ctis ni rlajzni gacni. <sup>19</sup> Paru niajc guidebni si'c tejtis la'ni, ¿xho niajcpacni te tiejxhni dxejc? <sup>20</sup> Niluxh naj ensilaani yu' xhidajl la' te najcni tejsi tiejxhni.

<sup>21</sup> Te balojnu di gac gäbni lo naanu: "Dina guiquinälu", niclaza bituuejnci di gac gäbni lo ni'ni: "Dina guiquinälu." <sup>22</sup> Chucala lapacreni rquinnru nani ruzeñ lascanu xhet sajcdireni. <sup>23</sup> Luxh retla'ga nani rchalonu guxii sajcreni, reni'c maazru saj. Luxh reni rtuinänu, niguii sigajc gunaa, reni'c riapdarunu. <sup>24</sup> Biätla sgaai la' tiejxhnu nani rlui saruru, reni'c di guiquin gapdanuni. Niluxh abenchee Dios tiejxhnu si'c, te gapdaru bejn retla' nani lascanu guxiiru saj. <sup>25</sup> Bejnii si'c te di chu yäldrjil lo retla' tiejxhnu, te guiraa retla'ga gacnä j sa'reni. <sup>26</sup> Ni'cni che et laadi yu' te la' tiejxhnu guidebni ru' et laadi. Sigajcza che guiliä'pnu xpala'n te la' tiejxhnu, guideb tiejxhnu rbalajz.

<sup>27</sup> Ni'cni guiraanu najcnu si'c tiejxh Jesucrist. Tejganu najc te la' tiejxhni. <sup>28</sup> Luxh abadee Dios yälrnibee lo tejganu lo xquidooi te gunnu xtzuanu-xtzuunni. Ganidtoo guleni reapest; ni rojga guleni rebejn ni rniü xtidx Dios; ni riojnga, guleni rebejn ni ruseed; dxecti guleni reni rujn remilagwr, reni rusiajc benracxhuu, reni racnä j, reni rniü garen-garen redidxsaj. <sup>29</sup> Et guiraadi rexpejn Jesucrist najc apost. Et guiraadizareni rniireni xtidx Dios. Et guiraadireni rajc ruseed. Et guiraadizareni rajc rujn remilagwr. <sup>30</sup> Et guiraadireni rajc rusiajc rebenracxhuu. Etza guiraadireni rajc rniü garen-garen didxsaj, et guiraadireni rajc rniü xhi sälo j redidxsajga. <sup>31</sup> Nanab guideb lastootu rlajztu guniidx Dios reyälrnibee ni najc maazru hueen lojtu. Niluxh narä guluüä lojtu te nezyuj ni najc hueenru lo j guiraareni.

## 13

### *Yälsanälajz*

<sup>1</sup> Palga guiniä guiraloj xtidxsaj rebejn, o xtidx rexangl Dios, luxh dina chanälazä rebejn, rubejtis xtidxä si'c te tamboor o te platii. <sup>2</sup> Palga sajc guiniä xtidx Dios xcuent recos ni churu gac, luxh racbesa'cä guiraa recos xhiga'tz xten Dios, näjza guiralii yäl'nasiñ xten guedxliujre, palga rapä yälrililazduxh te gac gäpä lo redajnre, "colguibicaj", luxh rbicajreni, niluxh xhet sanälazädi rebejn, rut nacädi. <sup>3</sup> Palga gudedä guiraa rexhixtenä nani rapä te gau rebejn ni xhet rajpdi; palga gudedä tiexhä te checni, luxh xhet sanälazädi rebejn, xlia'si gunä guiraa redzuunga.

<sup>4</sup> Rebejn ni rajp yälsanälajz cabäjzreni, najczareni beñsa'c, direni säblajz xhi xten sa'reni, direni guschä'p lagajc xpala'nreni, direni gac guyalajz. <sup>5</sup> Direni gun recos ni di guchaag, dini quiiil xcäl'nasa'ctisni, dini guidxe'ch, dini jiu redojl ni rujn bejn lojni. <sup>6</sup> Nani rajp yälsanälajz dini guibalajz che rujn stee bejn dojl, alga rbaa lajzni che laaca rujn bejn. <sup>7</sup> Nani rajp yälsanälajz rujn huant xhitis cos, rililajzni hueen xcuent xhitis cos, sanuutis cabäjzni, rajc rdejndi xhitis trabajw.

<sup>8</sup> Yälsanälajz dipacni nitlo j. ¿La rniireni xtidx Dios xcuent recos ni churu gac, ä? Sidzujn dxej sibäjz rediidxga. ¿La rajc rniü bejn garen-garen redidxsaj, ä? Sidzujn dxej siacdx redidxsajga. ¿La yu' yäl'naj? Sidzujn dxej sinitlojpacni. <sup>9</sup> Sa'csi naj guxilii racbeenu, guxilii xtidx Dios xcuent recos ni churu gac rajc rniinu, <sup>10</sup> niluxh che jiädsac Jesucrist ni rajp guiralii yäl'naj, sinitlo j xcäl'nandxucnu.

<sup>11</sup> Che gucä biuux, guiniä si'c biuux, benäza xhigab si'c biuux, niluxh che bidzunä lo yäl'bengol, gunitlo j rexhigab biuux ni benä galoo. <sup>12</sup> Sa'csi naj rhuinu si'c lo j te guihuajn ni nacä j, luxh che guibanänu Dios xhaguibaa, suhuisa'cnu si'c rniü ruhuü bejn che suga'ni lo j sa'ni cahuuini. Naj racbeenu re'cti rec, niluxh dxejc sacbesa'cnu si'c'pacni numbee Dios nuure. <sup>13</sup> Niluxh naj ria'n yälrililajz näjza yälrbäzajz, näjza yälsanälajz. Lo guidxon redee, sajcrü yälrinälajz.

## 14

### *Renani rniü rediidx*

<sup>1</sup> Ganidtoo colquiiil yälrinälajz, colnabza lo Dios te guniidxruni xhi stee dzuun, niluxh coluejnru te xca'tu yälrnibesa'c te gusule'tu xtidx Dios. <sup>2</sup> Che rniü te bejn garenca diidx ni di rebejn gacbee, rniüni lo Diostis, et lojdi rebejn, sa'csi rut racbeedi xtidxni, mase caniiini cosro, cosxhiga'tz nani ruluii Sprit Dxan xten Dios guiniini. <sup>3</sup> Niluxh bejn ni rusule' xtidx Dios, rustioobni xcäl'rililajz bejn ni rulijdxni, ruspaani lajz nani rac-huin lajzni. <sup>4</sup> Che rniü te

bejn garenca didxsaj ni rut racheedi, lastootisni rustioobni, niluxh bejn nani rusule' xtidx Dios xcuent recos ni churu gac, laani rustiobruni lastoo guiraa rebeñguidoo.

<sup>5</sup> Narä rlazä maläii rajc rnii guiraatu garen-garen diidx, niluxh hueenru gac gusule'tu xtidx Dios. Maazru sajc nani rajc rusule' xtidx Dios loj nani rnii garenca diidx palga di gacdi gusule'ni lo rebejn xhini'c caniiini. <sup>6</sup> Mhaj naj betzä, che jiälä lojtu, palga guiniä garenca diidx lojtu, çxho gacnäjni la'tu? Hueenru guiniliä xcuent te cos ni abaluiloj Dios loä, o xcuent te yäl'najn, o xcuent te xtidx Dios, o xcuent te yäl'ruluui.

<sup>7</sup> Ni ruhuiinu xho najcza reinstrument ni rol bejn si'c te bizej, o te harp; palga di bejn golsa'creni, çxho jiennu gacbeenu xhi dij cayolreni, ä? <sup>8</sup> Sigajcza lo guerr; palga direni gol cornet dippac, çxho gacheereni agojl chatijlreni, ä? <sup>9</sup> Sigajcza la'tu, palga ditu guinisac'c didxsaj nani rachee bejn, çxho gunreni gacheereni xhini'c caniiilu, ä? Xlia'si guiniilu, lo bejtis sää xtiidxlu. <sup>10</sup> Yu' xhidalduxh didxsaj lo guedxliuj, luxh xheti tejni nani xheti xnejzni. <sup>11</sup> Niluxh palga dina gacheä didxsaj ni rniireni loä, nacä si'c te benzijit loj nani canii loä, sigajcza sajc nani caninäj narä. <sup>12</sup> Ni'cni la'tu ni rlazztu xca'tu yäl'rnibee xten Sprit Dxan te guntu xhi redzuun, colgüejs, col'nab lojni xhidajl dzuun te gacnäjtu tiobru xcäl'riliilajz rexpex guidoo.

<sup>13</sup> Ni'cni palga yu' te bejn ni rnii garenca didxsaj, suguiniabni loj Dios yäl'rnibee te gac gusule'ni diidx ni rniini lo rebejn. <sup>14</sup> Palga cuedx-guiniabä lo Dios con te didxsaj ni dina gacheä, lastoätis ni calä'p xpala'n Dios, niluxh xcärienä xhet cayacheedini. <sup>15</sup> Çxho ricajni dxejc? Siniab xspritä näjza xcärienä lo Dios; sol xspritä näjza xcärienä dij. <sup>16</sup> Palga dini gac si'c, xsprittislu calä'p xpala'n Dios con ste'ca didxsaj, niluxh bejn nani cacuadijag di gacdi gacnäjnili guiliä'pni xpala'n Dios, sa'csi dini gachee xhini'c rniilu. <sup>17</sup> Hueencaza calä'plu xpala'n Dios, per stee bejnga dini tiob loj yäl'riliilajz. <sup>18</sup> Rudeäd xquixtios lo Dios maazru rajc rniä garen-garen diidx loj guiragajctu. <sup>19</sup> Niluxh neñ guidoo maazru rlazä guiniä con xcärienä gaiitis diidx nani gacheetu, nani guluii la'tu, loj tzuu mił diidx nani guiniä con xspritä ni ditu gachee.

<sup>20</sup> Rebetzä, na'c rujntu xhigab si'cni rujn rebiuux, xcuenttis cosguijdx nanab gacnayatu si'c biuxbäz, per colyejn xhigab si'c te beñgool. <sup>21</sup> Scree caj lo xleii toMoisés: "Mase guiniä lo rebejn con garenca diidx näjza xtidx benzijit, nicla si'c direni gucuadijag xtidxä", naj Dad baxhuaannu. <sup>22</sup> Ni'cni regaren-garen didxsaj najc si'c te seen lo renani gajd chalilajz xtidx Dios, et lojdi rebejn ni arililajz xtidx Dios. Niluxh yäl'rusule' xtidx Dios xcuent recos ni churu gac, ni'c najc te seen loj renani ahuililajz xtidx Dios, xhet lojdi renani gajd chalilajz xtidx Dios. <sup>23</sup> Palga re'tu neñ guidoo dxejcti caniiitu garen-garen diidx ni rut racheedi, dxejc guidzujñ tej ni di gan xtidx Dios, siniini guiraatu rajc yejctu. <sup>24</sup> Palga re'tu neñ guidoo, dxejcti guiraatu cagusule'tu xtidx ni baniidx Dios lojtu, che jiu' tej ni di gan xtidx Dios, sacbeeni xhini'c caniiitu, sacbeeni yu' xtojlni, <sup>25</sup> sienloj rexhigab xhiga'tz ni yu' neñ lastooni, dxejcti siabrojni suzuxhijbni lo Dios, siniabni lo Dios, siniizani guliipacni suga' Dios galäiitu.

#### *Colyejn guira'ti xnez-xnejzni*

<sup>26</sup> Çxho ricajni naj, betzä? Che guire'tu neñ guidoo suxca' tejjatu tebgaj te salm, te xtidx Dios ni guluuini, te diidx ni baluiloj Dios lojni, te diidx con garenca diidx, nägajcza te ni gusule' xhi säloj diidxga. Colyejn guiraa ni rujntu te tiob xcäl'riliilajz renani ahuililajz xtidx Dios. <sup>27</sup> Palga yu' renani rnii con garenca diidx, suguiniä tio'p-choñ bejn, niluxh tebgajreni, dxejcti sugusule' steeni xhi säloj ni rnii tejjareni. <sup>28</sup> Palga rut rajcdi gusule' rediidxga, na'c guiniireni con garenca diidx neñ guidoo, suguinixtebreni lo Dios. <sup>29</sup> Si'cza renani rusule' diidx ni rudeed Dios lojreni, suguiniä tio'p-choñ bejn, niluxh tebgajreni, te cuadijag stiop xchonreni donnu la laaca caniireni. <sup>30</sup> Palga guluiloj Dios te cos loj te bejn ni sobga' cacuadijag, sucuedxisijcni, dxejcru suguiniini. <sup>31</sup> Sa'csi guiraatu sajc gusule'tu tebgajtu didx ni baniidx Dios lojtu te gac guisieedtu, te tiob lastoo guiraatu lo yäl'riliilajz. <sup>32</sup> Rudeed Sprit Dxan xten Dios yäl'najn loj reni rusule' diidx ni rudeed Dios lojreni te acanajnreni che riäjł guiniireni o che riäjł cuedxireni, <sup>33</sup> sa'csi Dios najc te Dios ni rujn guira'ti xnejz-xnejzni, dini gun bieji, niluxh rbecdxnii lastoo bejn neñ guiraa reguidoo xten rebejn ni ahuililajzpac xtiidxni. <sup>34</sup> Sucuedxi regunaa neñ reguidoo, sa'csi di gacdi gusule' te gunaa xtidx Dios. Nanab gunreni si'c caj lo leił gunreni, gucuadijagreni xtidx Dios ni rusule' reniguii lojreni. <sup>35</sup> Palga rlazzreni gacheeruren, suguiniädiidxreni loj chäälni che guibi'reni rolizreni, sa'csi sianxujy gunaaga palga guiniini neñ guidoo.

<sup>36</sup> Colgachee et la'ditu guläxtiejditu rextidx Dios, luxh etza xtebtis lojtu biäädni. <sup>37</sup> Palga yu' tejtutu ni rchalo rajc rniini diidx ni rudeed Dios lojni, o palga rchaloni abadeed Xprit Dxan xten Dios te dzunro lojni, sugacheepacni dee: guiraa rediidx ni cagucuaä lojtu, rucuaäni sa'csi si'c gunibee Jesucrist gucuaäni. <sup>38</sup> Palga yu' chu tejtutu ni di chalilajz rapä xcäl'rnibee Jesucrist, rutza jiudi xtiidxni.

<sup>39</sup> Ni'cni, rebetzä, col'yejnru te gusule'tu diidx ni runiidx Dios lojtu, na'c gudxoju'tu renani rniiza garenca didxsaj. <sup>40</sup> Luxh guira'ti nani rujntu, col'yensa'cni, xnejz-xnejzni.

## 15

### *Gubansac Jesucrist lo rebengut*

<sup>1</sup> Naj rniä lojtu betzä, col'gusnaj lajztu xtidx Dios ni basule'ä lojtu, nani huililajztu, loj nani sutijptu, <sup>2</sup> näjza col'gusnaj lajztu diidx xcuent ni badzucaj Dios xtojltu che huililajztu, palga sanuu sutijptu lojni, te di xlia'si huililajztu diidxga.

<sup>3</sup> Lojtu ganiddoo basule'ä rediidx ni sajru ni bisiedä, basule'ä xho gujt Jesucrist lo cruzj, bixe' xtiejnri te badzucajni rextojl'nu, sigajc ni caj lo xtidx Dios gac. <sup>4</sup> Basule'äza xho biga'tzni, dxejc ni rion dxej guläs Diosni, gubansacni si'cni caj lo xtidx Dios gacni. <sup>5</sup> Cheni gubansacni, baluilojni lo Pedr, dxejctiru loj guitzubito'p rexejnpacni, <sup>6</sup> dxejcti baluilojni lo gabixh gaii gayuu bejn ni tre' tejsi lajt. Xhidajlreni nabansijc, niluxh yu'za reni agujt. <sup>7</sup> Dxejcti baluilojni lo Jacoob, dxejctiru loj guiraa reapost.

<sup>8</sup> Dxejcti lultpac baluilojzani loä, luxh alagudejd ruluilojni lo rexejpn'ni dxejc. <sup>9</sup> Narä guxiiru sacä loj guiraa reapost, niclaza nungäj'l cuälajreni narä apost sa'csi basacsä rexejpn' xquidoo Dios. <sup>10</sup> Balaslazduxh Dios narä, ni'c narä nacä si'c ni nacä naj. Luxh et xlia'di balaslajzni narä. Narä benäru dzuun loj guiraareni, niluxh xhet narädi ni benä dzuun, sa'csi xcäl'rulasajz Dios cayacnäj narä. <sup>11</sup> ¿Xhiru najcni palga naräni o palga laareni? Empac cagusule'nu xtidx Dios, luxh la'tu salilajztu xtiidxni.

### *Xho guibansac rebengut*

<sup>12</sup> Mbaj naj, palga nuurnu cagusule'nu diidx xcuent ni gubansac Crist loj rebengut, ¿xhicuent yu'tu ni rniü, xheti yäl'rbañsac loj rebengut? <sup>13</sup> Palga xheti yäl'rbañsac lo rebengut, dxejc nicla Crist di nibansac lo rebengut. <sup>14</sup> Luxh palga di Crist nibansac loj rebengut, ¡xlia'si najc diidx nani basule'nu! ¡Xlia'si za najc xcäl'r'ililajztu! <sup>15</sup> Luxh et ni'ctis. Abiga'nu sa'csi rusgueenu rniinu haspansac Dios Jesucrist loj rebengut, luxh dini nuspansacni loj rebengut, palga guliini di bejn guibansac loj rebengut. <sup>16</sup> Niluxh palga di rebengut chäs, niclaza Crist di nibansa'c lo rebengut. <sup>17</sup> Luxh palga di Jesucrist nibansac loj rebengut, xhet sajcdi xcäl'r'ililajztu, sanuutistu loj xtojltu. <sup>18</sup> Sigajcza agunijt rebengut nani huililajz xtidx Jesucrist. <sup>19</sup> Palga naj ni nabajntisnu loj guedxliujre cabääznu Jesucrist, lo guiraa reben guedxliuj nuurnu najcnu rebejn ni riälj jiaduxh'tej guiraa reni ruhuii loonu.

<sup>20</sup> ¡Per dini gac si'c! Guliipacni gubansac Jesucrist loj rebengut. Laani guc ganiddoo loj guiraa rebengut ni gubansac, luxh laani dini niejt par tejpas. <sup>21</sup> Sigajcni biääd yäl'gujt loonu xcuent tejtis niguii, sigajcza biääd yäl'rbañsac lo rebengut loonu xcuent tejtis niguii. <sup>22</sup> Sigajc xcuent te niguii ni laa Adán biääd yäl'gujt, sigajcza xcuent Jesucrist biääd yäl'rbañsac loj rebengut. <sup>23</sup> Tejganu xcuent-xcuentnu; Jesucrist gujc ganiddoo, dxejcti guiraa reni najc rexejpn'ni che jiädsacni lo guedxliujre, guiraareni suspansacni. <sup>24</sup> Che agujc ni'c, dxejcti siääd dxe lult che gudedzacni yäl'rnibee lo Dios Xtadni, che abadzujl'ni guiraa reyäl'rnibee, guiraa reyäl'guxhtis, guiraa reyäl'milagwr. <sup>25</sup> Nungäj'l'pac guinibee Jesucrist cheni gunli Dios gaan loj guiraa reni rdxe'ch lojni, quixhni'reni detz ni'ni. <sup>26</sup> Lu't ni rdxe'ch lojni ni gunitojni najc yäl'gujt. <sup>27</sup> Lo xquijtz Dios caj: "Agudixhni guira'ti detz ni'ni te guinibeenireni." Che rniüni si'c huenliisi gacbee bejn di gaadi guinibee Jesucrist Dios, sa'csi Dios badeed lojni xhini'c guinibeeni. <sup>28</sup> Che acanibee Jesucrist guiraali recos, dxejcti sudeedni guideb yäl'rnibee loj Xtadni Dios, te xtebtis Dios guinibee guira'tipac.

<sup>29</sup> Palga rujntu xhigab di bejn guibansac loj rebengut, ¿xhi gun rebejn nani robnis xcuent rebengut? Palga di bejn guibansac lo rebengut, ¿xhicuent rutiobnisreni la'tu xcuent rebengut?

<sup>30</sup> ¿Xhicuentza rdxunnu lo casionduxh guira'ti or? <sup>31</sup> Rniiläpac lojtu, rebetzä, caläpä xpala'ntu xcuent Jesucrist Xtadni ni cayun xtzuunni lojtu. Ni'cni guniä lojtu, guira dxej rguiilreni narä te ju'treni narä. <sup>32</sup> Palga benä xhigab si'c te niguii guedxliuj che bacuanää reniguii ni najc si'c man nialajz lo guedx Éfeso, ¿xhi gaan benä? Palga di bejn guibansac loj rebengut, do'o jien si'c ni caj lo guijtz: "Do'o guidau, do'o guidun, sa'csi guixee empac sejt'nu."

<sup>33</sup> Na'c gusaantu gusgueereni la'tu, palga sachaa'glu lo beñgujdx näjza luj sajclü beñguijdx. <sup>34</sup> Basanij xcäriejnl'u si'cni nanab gunlu. Bascuääz dojl'ni rujnl'u sa'csi yu' baltu bejn ni dipac gumbee Dios. Te guitujy'tu ni'c rniä diidxre lojtu.

### *Xho guibansac rebengut*

<sup>35</sup> Naj yu' reni rniabdiidx: "¿Xho rbañsac bejn loj rebengut? ¿Xhoza gac tiejxh'reni?" <sup>36</sup> ¡Chip nayäällu! Che rbe'clu te binij, di gäj'l guiliejn palga di xhobga guet, nalajznu, palga dini guechduu. <sup>37</sup> Luxh che rbe'clu, dilu cue'c gäj'lga si'cni r'lajzlu gacni, alga rbe'clu xhob o

triuu o ste'ca binij, <sup>38</sup> niluxh Dios rujn rliejnni, rustioobni gäjlgä, lo tejša gäjł rudeedni xpälajgni o tiejšxni, si'ctis ni rłajzni. <sup>39</sup> Xhet guiraadi retiejxhrenei najc tebloj. Yu' bääł xten bejn, yu'za bääł xten reguidxaa, yu'za bääł xten reman xhaguibaa, yu'za bääł xten rebäjł. <sup>40</sup> Sigajcza yu' tiejšx rebajł xhaguibaa, tiejšx rexten guedxliujre. Niluxh yälrdimbicha' xten rebajł xhaguibaa najc tej, dxejc yälrdimbicha' guedxliuj najc ste'ca. <sup>41</sup> Bicha' xte gubijdx najc garen lo xten bejii, sigajcza xpicha' rebal xhaguibaa najc garen-garenza lo sa'reni. <sup>42</sup> Sigajcza yälrbansac loj rebengut; che guet bejn rga'tz tiejšxni luxh rujdaxni, rnitlojni. Luxh che guibañsacni loj rebengut, garenca gac tiejšxni, diruni gudx, anabajñni par tejšpas. <sup>43</sup> Che rga'tzni, rujn bejn xhigab xhetru gacnäjdi tiejšxga, niluxh che guibañsacni, lacti sacru, lacti sajc tiejšxga. Che rga'tzni, xhetru sajcdi gunni, luxh che guibañsacni, anadpduxhni. <sup>44</sup> Che rga'tz tiejšxnu, najcni xten guedxliujre, luxh che chäsni najcni te tiexhcoob ni runiidx Dios. Ni'cni yu' te tiejšxni ni siääd lo guedxliuj, yu'za te tiejšxni ni siääd xhaguibaa.

<sup>45</sup> Si'cza caj lo xtidx Dios: "Nigui galooga ni laa Adán, bejn Dios gujçni te beñ nabajñ." Niluxh Adán ni biääd lult, Jesucrist najc Sprit ni runiidx yälñabancoob loonu. <sup>46</sup> Ganid najc yälñabajñ xten guedxliujre, dxejtiru yu' te yälñabancoob xhaguibaali. <sup>47</sup> Sigajcza niguii galooga najc beñ guedxliujre, niluxh ni rojp niguii ni biääd najc beñ xhaguibaali. <sup>48</sup> Benchee Dios Adán con yuj, najcni beñ guedxliuj. Xhaguibaali biääd Jesucrist, najcni beñ xhaguibaa. <sup>49</sup> Sigajcni najcnu si'c beñ guedxliujre, sigajcza sajçnu sigajc najc bejn ni yu' xhaguibaa.

<sup>50</sup> Naj guiniä rediidxre lojtu betzä, di gac ted tiejšxnu ni najc bääł näjza rejn xhaguibaa cadro yu' Dios. Tiejšxneure nani sinitloj di gacdiža xca'ni stee tiejšx ni najc par tejšpas. <sup>51</sup> Colhuui! Rlazäža gacbeetu te didx-xhiga'tz; xhet guiraadinu guet, niluxh sidxaa guiraa retiejxhnu <sup>52</sup> tera't bälzule', si'c cheni rdinya' guzii, che jiel lult trompe't, dxejc sibansac rebengut, säjsreni guideb tiexhcoobreni ni najc par tejšpas. Luxh näjza tiejšxnu sidxaa. <sup>53</sup> Sa'csi tiejšxnu ni najc xten guedxliuj nanab guidxaani te ga'pnu tiejšxnu ni najc xten xhaguibaa, sa'csi tiejšxnu ni najc xten guedxliuj rejtni, niluxh tiejšxnu ni najc xten xhaguibaa di gacdi guetni, najcni par tejšpas. <sup>54</sup> Niluxh che tiejšxnu ni najc xten guedxliuj abidxaa te ga'pnu tiejšxnu ni najc xten xhaguibaa, näjza che tiejšxnu ni sajç guet abidxaa te ga'pnu tiejšxnu ni di gacdi guet, ni najc par tejšpas, dxejc sisiojb xtidx Dios ni caj scree: "Yälgujt agunitloj sa'csi bejn Jesucrist gaan lojni. <sup>55</sup> Yälgujt, çxho gac gunlu gaan naj, ä? Yälgujt, çCon xcälñayanlu naj, ä?" <sup>56</sup> Xcälñayan xten yälgujt najc dojl. Xcälñabee dojl najc leii. <sup>57</sup> Niluxh rdeednu xquixtios lo Dios, nani runiidx te yälñabee loonu te jiennu gaan lo yälgujt xcuent Dad Jesucrist.

<sup>58</sup> Ni'cni rebetzä ni sanälazduxhä, colçhanuutis, colçsudzu'tz lo xtidx Dios, na'c guidxajgtu guntu xtzuunni, sa'csi anancheetu xhet xlia'di najc dzuun ni runiidx Dios riennu.

## 16

### *Meel ni guire' par rexejñ Dios*

<sup>1</sup> Xcuent meel nani guire' par rebetznu, colçejñni sigajcni räpä gun rebeñ rexquidoo Galacia. <sup>2</sup> Casob dumingw, nalajznu ganid dxej xmaan, tejšatu colçuaä te meel yejç nani rujntu gaan neñ te xmaan, colçuccheeni, te na'c gutie'tu meel che jialä. <sup>3</sup> Te che guidzuna, guxhalä meelga, näjza tiop-choñ guijtç chanä chutis bejn ni cuetu chasa'ni guedx Jerusalén. <sup>4</sup> Palga laaca cha'aza, sajçza chänäreni narä.

### *Xhigab ni bejn Pabl chääni biaj*

<sup>5</sup> Guidzuna lojtu che agudedä reguedx Macedonia, sa'csi sidedä nejzga galoo ni jialä ro'c. <sup>6</sup> Dxejcti pet siannäa la'tu, pet sacläa, sidedä guiraa rebäi najl ro'c, te gacnäjtu narä che cha'a cadrotis cha'a. <sup>7</sup> Sa'csi di rlazä jiädhuiätu te ladejtzsi, rlazä jiannäa la'tu xchejpac, palga gusaan Dad Jesucrist gunä si'c. <sup>8</sup> Niluxh sia'nä guedx Éfeso, te ro'c tedä lanij ni rusnaj lajç bejn che biääd Sprit Dxan xten Dios. <sup>9</sup> Sa'csi ro'c yu' xhidajł bejn nani rłajç guisieed xtidx Dios, niluxh ro'c yu'za xhidajł reni rdxe'ch loä.

<sup>10</sup> Palga guidzujñ Timoteu lojtu, saru colçhuini, te na'c chuni yärsia' lał ni yunäjni la'tu, sa'csi cayujñni xtzuun Dios sigajç runä narä. <sup>11</sup> Na'c gusaantu chu tej ni cuälazni, colçcuedxdi lajzni, dxejc colçusunejzni, te jiädhuiini narä ree, sa'csi ree cabääznu laani con rebetznu.

<sup>12</sup> Niluxh xcuent bejznu Apolos, räpäža lojni niäädpacni lojtu con rebetznu, niluxh di rłajçpacni niäädni naj. Per siäädcani dxejtsi ni gac jiäädni.

### *Rextixtios lult ni ruxhalmi*

<sup>13</sup> Colçusin, colçsudzu'tz lo yälrlilajç xten Dios, colçejñ dzuun si'c niguii, colçajç bendaan. <sup>14</sup> Xhitis ni rujntu colçejñni con yälrlilajç.

<sup>15</sup> La'tu rebetzä, anajntu xcuent rexfamil Estéfanas, nani ganid huililajç xtidx Dios nez reguedx Acaya, najntu xho racnäduxhrenei rebetznu nani huililajç xtidx Dios ro'c. Naj

rniabduxbhä lojtu, <sup>16</sup> colgusoob xtidx rebejnğa, näjza xtidx guiraa rebejn ni racnäj rexpejn Dios, ni rujnza xtzuum Dios. <sup>17</sup> Rbalazä bidzujn Estéfanas, näjza Fortunato, näjza Acaico, sa'csi laareni bejnreni par narä nani di niajcdi niujntu sa'csi rutitu. <sup>18</sup> Gulecdxireni lazä näjza lajztu, ni'cni, icoljju sa' rebejnğa!

<sup>19</sup> Reben xquidoo Dios nez reguedx Asia ruxhał xtixtios lojtu. Aquila näjza chäälni Priscila näjza rebejn ni re' rolijzreni ruxhałzarenı xtixtios lojtu. <sup>20</sup> Guiraa rebejtznu ruxhał xtixtios lojtu. Colguinii tejgatu lo sa'tu: "Xchan, gacnäj Dios la'tu."

<sup>21</sup> Narä Pabl, ruxhałä xtixtios lojtu, lagajc narä benä reletrre.

<sup>22</sup> Palga yu' chu tejtu ni di chanälajz Dad Jesucrist, sunitlojni. ¡Dad Jesucrist, guda!

<sup>23</sup> Gacnäj xcälrlulaslajz Jesucrist guiraatu. <sup>24</sup> Yälrlinälajz ni rapä xcuent Jesucrist suchunäjni la'tu. Sugacni si'c.

## Stee Guijtz Ni Bacuaa Pabl Lo Guidoo Xten Guedx Corinto

*Ni rojp guijtz ni bacuaa Pabl lo guidoo xten guedx Corinto*

<sup>1</sup> Narä Pabl nacä apost xten Jesucrist sa'csi si'c rlazj Dios te gusule'ä xtiidxni. Narä näjza Timoteu, ni najc bejtznu lo xtidx Dios, rucuaanu guijszre lojtu rexpejn xquidoo Dios ni yu' guedx Corinto, näjza loj guiraa rexpejn Dios ni rbäjz nez guiraa reguedx Acaya. <sup>2</sup> Rniabnu lo Dios ni najc Xtradnu näjza lo Dad Jesucrist, gacnäjreni la'tu, guscuedcxireni lajztu.

*Trabajw ni gudejd Pabl*

<sup>3</sup> Guiliä'pnu xpala'n Dios Xtrad Jesucrist, nani rulaslazj nuurnu, nani rustoolajz nuunu. <sup>4</sup> Che rdejdnu trabajw, rbecdxini laaznu te rajcza rbecdxinu lajz renani cadejd trabajw con lagajc yälrbecdxilajz ni baniidx Dios loonu. <sup>5</sup> Sigajc ni rdedduxhnu trabajwduxh ni gudejd Jesucrist sa'csi rusule'nu xtiidxni, sigajcza rbecdxiduxh Jesucrist laaznu. <sup>6</sup> Palga rdeednu trabajw, najcni te gustolajz la'tu, te laatu lo dojl. Palga ruscuedcxni Dios lajznu, si'c rujnni te cuedxilajztu te guntu huant che tedtu lagajc trabajw ni cadejdzanu. <sup>7</sup> Rinudzu'tz yälrunloj ni rajpnu xcuent la'tu, sa'csi nadonnu palga rdejdtu lagajc trabajw ni cadejdnun, suscuedcxni Dios lajztu sigajcni ruscuedcxini laaznu.

<sup>8</sup> Rebetzä, rlazä gacbeepactu lacti trabajwduxh bideednu nez reguedx Asia, tudxe'nsi dinu nien huant, sa'csi gudedcäj trabajwga, acasislinu. Trabawduxhtejni, benä xhigab sujnni gaan, sugu'tni nuurnu. <sup>9</sup> Gulicanu, labiennu xhigab sejt pacnu. Niluxh dee gusajcnu te bisieednu na'c chaliilajznu lagajc nuurnu, alga chaliilajznu Dios nani rus-pansac rebengut. <sup>10</sup> Sa'csi Dios basläa nuure lo yälgujtga, luxh sinuutis gusläani nuurnu lo yälgujt. Salilazduxhnu Diosre susläaruni nuurnu, <sup>11</sup> sa'csi cayacnäjtu nuurnu, cabedx-canabtu lo Dios xcuentnu. Dxejcti palga xhidajl bejn cabedx-canab lo Dios xcuentnu, xhidajlzareni sudeed xquixtios lo Dios xcuentnu xcuent xcälrulaslazj Dios ni baniidxni loonu.

*Xhicuent di Pabl nij guedx Corinto*

<sup>12</sup> Dee najc nani ruspaä laaznu: rbedxi xcäriejnnu, ni'c ruluui loonu laaca nabajnnu, con yälndolajz riennu si'cni rnihee Dios; xhet sa'csi rajpnu xcälnajn reben guedxliujdi, alga sa'csi racnäj Dios nuure. Si'cpac nabajnnu lo guedxliujre, luxh maazru che yu'nu lojtu. <sup>13</sup> Cacuaanu lojtu rediidx ni sajc gojtu, ni sajc gacbeetu, luxh cabäzä sacbesa'ctu guiragajc rediidx ni gucuaä, <sup>14</sup> lagajc si'cni agucbeetu mase gaii xtiidxnu, cabäzä guibaa lajztu xcuent nuurnu, sigajcni guibaa lajznu xcuent la'tu nen dxej ni jääd Dad Jesucrist.

<sup>15</sup> Ni'cni ganiddoo benä xhigab niädhuiä la'tu te nibalajztu tio'p huält. <sup>16</sup> Nalajznu, benä xhigab nidedä ro'c che sa'a reguedx Macedonia, dxejcti stehuält cheni guibi'ä Macedonia, niädhuisacä la'tu ro'c te niacnäjtu narä te nia'a Judea. <sup>17</sup> ¿Xhaa dina niunsa'cä xhigab che benä xhigabre? ¿La rchalotu runä xhigabä si'c te bejn guedxliuj nani runtiop lajzni, nani tejsi diidx rniini "sia'ä" nägajcza "dina cha'a", ä? <sup>18</sup> Dios guluii lojtu guliica rniä lojtu, dinu guinii tejsi diidx "sia'ä" nägajc "dina cha'a". <sup>19</sup> Xi'n Dios, Jesucrist nani bisule'nu lojtu narä näjza Silvan, näjza Timoteu dini guntio'p lajzni, dini guinii tejsi diidx "sunäni" näj "dina gunäni", niluxh laani guiraa xtiidxni najc "sunäpacni". <sup>20</sup> Si'cza guiraa rediidx ni bia'n Dios loonu xcuent Jesucrist najczeni "sunäpacni"; näjza xcuent laani najczeni "sugacni si'c" par nuurnu, te chä'p xpala'n Dios xcuent nuurnu. <sup>21</sup> Dios cagusudzu'tza nuure näjza la'tu lo xtidx Jesucrist, agulezani nuurnu te jiennu xtzuunni. <sup>22</sup> Abacuaazani xseenni loonu, ni'cni baniidxni Sprit Dxiannu xteni te cuääzni nen lastoonu.

<sup>23</sup> Rbedxä loj Dios gacbeeni xhi yu' lastoä, guliipacni te diruna gutalä xcälnajtu, ni'c dina niälsacä guedx Corinto. <sup>24</sup> Di rlazjnu guinibeenu xho chaliilajztu, alga rlazjnu gacnäänutu lo dzuun te guibaa lajztu; guliipac agusudzu'tztu lo xcälrililajztu.

## 2

<sup>1</sup> Niluxh lagajc xcuent xcälnasa'cä benä xhigab dina jädhuisacä la'tu che cayac-huin lazä. <sup>2</sup> Sa'csi palga narä siädyenä gac-huin lajztu, ¿chuni'c gun guibaa lazä? La'tistu, nani benä gac-huin lajzni. <sup>3</sup> Ni'cni lagajc xcuent ni'c bacuaä lojtu, te che jäälä lojtu, di rebejn gunhuin lazä nani riälj guspaa lazä. Luxh nancheä palga narä guibaa lazä, nägajc la'tu sibaaza lajztu. <sup>4</sup> Che bacuaä guijszre lojtu, lacti xhigabduxh benä, binduxhä; xhet te gac-huindi lajztu, alga te gacbeetu yälšanälazduxh ni sanälazä la'tu.

*Yälrusiälj lajz ni yu' par nani bejn falt*



<sup>5</sup> Palga yu' chu tej ni cayujn cayac-huin lazá, xhet xtebtis lazá cayunhuinni nájza lajztu cayunhuinni guxii diidx guiniä sa'csi di rlazá guntu xhigabduxh. <sup>6</sup> Alabasacsiduxh xhidajl bejn dade'ga, na'cru gusacsítuni naj. <sup>7</sup> Naj colsiäjł lajztu xcuent xtojłni, colcuedcxi lajzni didi gac-huinduxhtej lajzni. <sup>8</sup> Ni'cni rniabä lojtu, colchanälajz bejnre si'c ni huinälajztuni galoo. <sup>9</sup> Bacuaxgaäza lojtu te gacbeä laa susoobtu xtidxä. <sup>10</sup> Naj renani jäjł lajztu xtojłni, náj narä siäjł lazáni. Sigajcza narä, nani basiäjł lazá, palga yu' xhi basiäjł lazá, benäni xcuent xcäl'nasa'ctu, nez loj Jesucrist, <sup>11</sup> te di gun beñdxab gaan nuure, sa'csi anajnnu xho najc latsiaj ni rujn beñdxab.

*Guyu' Pablyärsia' che bidzujni guedx Troas*

<sup>12</sup> Che bidzunä guedx Troas, te gusule'ä xtidx Jesucrist, bejn Dad Jesucrist rutliidi badxojndi narä, <sup>13</sup> niluxh guyuduxhä yärsia' sa'csi dina nidxälä Tito, bejtznu. Ni'cni basadidxgacäreni, sa'äti nez reguedx Macedonia.

*Jesucrist rujn riennu gaan*

<sup>14</sup> Xquixtios lo Dios nani con Jesucrist racnäj nuurnu te dipacnu gunijt, empac rujntisnu gaan, luxh con nuurnu guiraa nejz ruluulojni xhi saru najc gumbeepac bejn xtidx Dios. <sup>15</sup> Sa'csi najczanu si'c te guxh xten yalnejxh xten Jesucrist lo Dios nez loj renani chalilajz xtidx Dios nájza nez loj rebejn nani canijt sa'csi naadireni chalilajzreni xtiidxni. <sup>16</sup> Loj reni di chalilajz xtiidxni, najcnu si'c te guxh ni rugu't, loj renani rililajz xtiidxni, najcnu si'c guxh xten yalnejxh ni rudeed yäl'nabañcoob. ¿Chu laa ni racbee sa' recosga? <sup>17</sup> Sa'csi dinu gac si'c najc xhidajl bejn nani rusule' xtidx Dios te gunreni gaan meel. Nuure rusulesa'cnu xtidx Dios sa'csi rinälazpacnu Jesucrist luxh si'c ni gunibee Dios, si'c rusule'nu, rusule'nu diidx con xcälracnäj Jesucrist nez loj Dios ni cahuii xhini'c riennu.

### 3

*Diidx nacoob ni basa'n Dios loonu*

<sup>1</sup> Che rniinu rediidxga, ¿la rchalotu canisacnu didxsa'c lagajc xcuentnu, ä? Yu'reni ca' guijtz ni rniü najczeni beñsa'c. ¿La rlazaztu guiluiinu lojtu sa' guijtzga, o guiniabnu guntu sa' guijtzga xca'nu, ä? <sup>2</sup> La'tu najc si'c xquijtznu ni rniü xho najcnu. Lastoopacnu acuajtu. Guiraa rebejn rajc rhuii xho huililajztu xtidx Dios sa'csi basule'nu xtiidxni lojtu. <sup>3</sup> Huenliisi rluiloj najctu si'c xquijtz Jesucrist, luxh nuurnu bizule'nu xtiidxni lojtu. Xhet con tintdi cuaj rediidxga, xhet lojdiza guij cuaj diidxga, Sprit Dxan xten Dios ni nabajñ bacuaa rextidx Diosga, bacuaanireni lastootu.

<sup>4</sup> Nadoncheenu redee, ni'cni xcuent Crist dinu guidxejb nez loj Dios. <sup>5</sup> Di gacdi jien xtebnu xhitis dzuun ni riennu, riennuni sa'csi laa Dios ni racnäj nuurnu. <sup>6</sup> Laani runiidx yäl'nadaan loonu. Nuurnu najcnu mos xten xtidxcoobni ni bia'nni con nuurnu. Luxh didxcoobga dini gac si'c xleii toMoisés ni bacuaa'reni lo guij, sa'csi xleii biädnä dojl, dxejc gujtnu. Niluxh didxcoobga ni rusule'nu biädnä Sprit Dxan xten Diosni, luxh runiidxni yäl'nabañcoob loonu. <sup>7</sup> Leiü baluii yu' xtojł bejn, riäjł guetreni. Xhidajl seen guyu' che bacuaa Dios rediidxga lo guij. Luxh di niajcdi nuhuii rexpejn Israel loj Moisés, bidxejbreni sa'csi rdimbicha' lojni, luxh sanuu cayuii yälrdimbicha'ga. <sup>8</sup> Palga si'c gujc che biäd leiü, aticaxh naj su'ru xcälrdimbicha' xleii Sprit Dxan xten Dios, ni najc rediidxcoob nani abasule'nu. <sup>9</sup> Palga xleii toMoisés ni baluiloj yälgujt xcuent dojl biädnä yälrdimbicha', aticaxh naj yu' xcälrdimbicha' xtidxcoob Dios ni rudzucaj dojl. <sup>10</sup> Naj dirunu fii xcälrdimbicha' xleii toMoisés sa'csi xtidxcoob Dios rdimbicha'ru par tejpas. <sup>11</sup> Palga yälrdimbicha' nani biüi bianisesduxhni tera't, stee yälrdimbicha're ni najc par tejpas sidimbichasesuxhni.

<sup>12</sup> Luxh ni'c runiidx yälbecdxi lajznu, dipacnu guidxejb che rusule'nu xtidxcoob Dios. <sup>13</sup> Dinu gac si'c toMoisés, ni basäu tla' lajd lojni te di fii rexpejn Israel cayuii yälrdimbicha' ni guyu' lojni. <sup>14</sup> Niluxh bicäjy xcäriejnreni; lo dxej najli che riel xleii toMoisés, najcni si'cni yu' xhi lajd rusäu lastooreni, rudxojn gacbeereni, te di chalilajzreni, xtidx Jesucristtis rajc rudzucaj lajdga. <sup>15</sup> Lo dxe najli che rołreni xleii toMoisés, najcni si'cni ruscäjy te lajd xcäriejnreni. <sup>16</sup> Lo xtidx Dios rniü scree: "Niluxh che gusiechlajz te bejn, gudzurëni nez loj Dad, sibicaj lajdga", nalajznu sacbeeni xtidx Dios. <sup>17</sup> Dad Jesucrist najc Sprit luxh cadro yu' Sprit xten Dios badzucaj Diosni lo xleii toMoisés. <sup>18</sup> Niluxh nuure dinu gusäu lajd lojni, didi guscäjyini xcäriejnnu. Nuure najcnu si'c te guihujn cadro rdimbicha' xtuxh Dad Jesucrist, luxh chäi-chäi cadxaanu cayajcnu si'c najcni nájza caca'nu xcälrdimbicha' Jesucrist, sa'csi si'c cayujn Sprit Dxan xtëni.

### 4

<sup>1</sup> Ni'cni sa'csi agule Dios nuure te gusule'nu xtiidxni, sa'csi balaslazczani nuure, dipacnu jäxhan. <sup>2</sup> Ni'cni rbälaznu recos ni rajc xhiga'tz, sa'csi rusanxtujyreni. Dizanu gusguee, dizanu guchaa xtidx Dios, niluxh rniinuni si'cpacni najcni, te si'c ruhuii guiraa bejn

rsiaapacnu lo xnezyuj Dios. <sup>3</sup> Niluxh palga yu' chu dipac gacbee rextidx Dios nani rusule'nu, najctisreni rebejn nani ala canitloj par tejpas, <sup>4</sup>sa'csi abascäy bendxab ni rnibee guedxliujre xcäriejnreni, si'cni rujnni lo rebejn nani di chalilajz xtidx Jesucrist, te na'c fiireni xcälrdimbicha' xtidx Dios ni rniü xcuent xhanij xten Jesucrist, ni najc xtujxh Dios. <sup>5</sup>Che rusule'nu xtidx Jesucrist, dinu guiliä'p lagajc xpala'nnu, rliä'pnu ganaxtis xpala'n Dad Jesucrist. Nuure najcnu xmostu xcuent Jesucrist. <sup>6</sup>Che benchee Dios guedxliuj, guniini: "Lo xcäy suguirii te bajl ni gusanij." Lagajc Diosga abasanij lastoonu te baniidxni bajl ni najc yälriembee xcälrdimbicha' Dios nez loj Jesucrist.

*Xho guibanu con yälirilajz*

<sup>7</sup> Nuurnu najcnu si'c te guesyuj, xhet sajcdinu, niluxh guidxanu te yälñasaduxh, ni najc xtidx Dios xcuent Jesucrist, te guiluiloj xcälñasa'c xten xcälñabee Dios lacuaa xhisi te yälñadipbáz xtenu. <sup>8</sup>Rdeednu trabajw guira nejz, niluxh dinu gunijt yälrunloj. Mase di jhen xho jiennu, dinu chu yärsia'. <sup>9</sup>Rusacsireni nuure, niluxh di Dios cuälaznu, rguijnreni nuure, dizareni ju't nuure. <sup>10</sup>Cadrotis rionnu rusacsireni nuure si'c basacsireni Jesucrist, te si'c neñ tiejxhnu guluilojzani yälñabansac loj rebengut xten Jesucrist. <sup>11</sup>Cadrotis rionnu rrlajzreni ju'treni nuure sa'csi rusule'nu xtidx Jesucrist te si'c za neñ tiejxhnu guluilojzani xcälñabajn Jesucrist loj reben guedxliujre. <sup>12</sup>Ni'cni rujn yälgujt dzuun loonu, per yälñabajn cayujn dzuun lojtu.

<sup>13</sup>Sa'csi rajpnu lagajc xsprit xten yälirilajzga, sigajc ni caj lo xtidx Dios: "Huillilazä ni'cni basule'ä diidx." Sigajc za nuure, huillilaznu xtidx Dios, ni'cni rusule'nuni. <sup>14</sup>Sa'csi nadonnu lagajc nani baspañsac Jesucrist loj rebengut, lagajc za laani gun guibanu con Jesucrist te gunni sunäjnu la'tu nez lojni. <sup>15</sup>Rsiajcnu guiraa ni rsiajcnu te xcuentsi la'tu guedeeru bejn xquixtios lo Dios, te guiliä'pruzareni xpala'nni xcuent yälñulasajz ni sanuutis care'ch lo xhidajl bejn.

<sup>16</sup>Ni'cni dinu gunijt yälrunloj, per mase tiejxhre acayujxh, guixe-guixee cagustioob Dios spritnu. <sup>17</sup>Retrabajw ni cadeednu lo yälñabajnre rdedgajczeni, niluxh rujnreni ga'pnu te yälrdimbichaduxh ni gajdnu guidon, ni najc par tejpas. <sup>18</sup>Dinu fiitis renani ruzeñ lo guedxliujre sa'csi sinitloj reni'c, alga cayenloonu renani di guzeñ, sa'csi renani di guzeñ najczeni par tejpas.

## 5

<sup>1</sup>Aracheenu tiejxhnu najc si'c te yu' xten xaimnu lo guedxliujre, sidzujn dxej sinitlojni, nalajznu sejt tiejxhnu, suniidx Dios te tiejxhnu xten xhaguibaa nani di nitloj, nalajznu dini guet par tejpas. <sup>2</sup>Guilicani, lałni dxunnu neñ tiejxhre, rbedxneñnu rdeednu trabajw, ni'cni rrlajznu maläii agojl guidxaa tiejxh guedxliujre te xca'nu te tiexhcoob ni siääd xhaguibaa. <sup>3</sup>Te si'c che acua'nuni, diruni gac si'cni suxhabääl xaimnu, sa'csi abicoob tiexhnu. <sup>4</sup>Lałni dxunnu neñ tiejxhre rbedxneñnu, rdeednu trabajw, sa'csi di rlaaznu suxhabääl xaimnu, rrlajznu gacwnu tiexhcoobnu, te tiejxhre nani cayejt, sidebnäjni tiexhcoob ni siääd xhaguibaa. <sup>5</sup>Nani benchee nuure parpac dee najc Dios, lagajc nani runiidx Sprit Dxan xtenu loonu si'c te seen sujnpacnini.

<sup>6</sup>Ni'cni dinu guidxeeb, sa'csi nadonnu lałni nabajnnu lo guedxliujre, di gacdi guibajnnu xhaguibaa loj Dadga. <sup>7</sup>Sa'csi nabajnnu xcuent nani rililajznu, xhet xcuentdi nani rajc rhuinu. <sup>8</sup>Ni'cni rniä nabajnnu dinu guidxeeb, rchaloonu hueenru guisa'nnu tiejxhnu lo guedxliujnure, te choläznänu Jesucrist xhaguibaa. <sup>9</sup>Ni'cni tejtis najc xhigabnu, palga lo guedxliujre o xhaguibaa, rrlajztisnu jiennu renani gun guibaa lajzni. <sup>10</sup>Sa'csi guiraanu riäl suunu nez loj yagxhiil cadro gun Jesucrist yälgujxtis, te tejanu guica'nu xcuent nani biennu lo guedxliuj, palga dzunsa'cni, o palga dzunguijdxni.

*Diidx xcuent yälrbecdxii lajzni*

<sup>11</sup>Luxh sa'csi rdexjbnü (nalajznu rucuaadiaagnu xtidx) Dad Jesucrist, ruliidxnu rebejn te chalilajzreni xtiidxni. Luxh Dios najn xho nabajnnu; maläii näza lo xcäriejntu guluiloj xho nabajnnu. <sup>12</sup>Dinu guiliä'p lagajc xpala'nnu lojtu stehuält, rniinu reidiidxga lojtu te guibalajztu xcuentnu, te ga'ptu xhi diidx gusejctu lo rebejn ni rchagljajzti ruhuii xho rien bejn, direni gacbee xhi yu' neñ lastooreni. <sup>13</sup>Palga najcnu si'c bejn ni rajc yejcreni, si'c najcnu par Dios, palga najcnu si'c bejn ni nasa'c xcäriejnnu, najcnumi par la'tu. <sup>14</sup>Sa'csi sanälazduxh Jesucrist nuure, ni'c rusoobtisnu xtiidxni, sa'csi nancheenu gujt tejtis par guiraanu, ni'c najcni si'cni agujt guiraanu nez loj Dios. <sup>15</sup>Luxh Jesucrist gujt xcuent guiraa rebejn, te renani rililajz xtiidxni, na'cru guibajnnu xcuenttis laareni, alga guibajnpacreni xcuenttis Jesucrist nani gujt, nani gubansac xcuent laareni. <sup>16</sup>Ni'cni nuure dinu fii lo bejn si'cni najczeni lo guedxliujre. Galoo biembeenu Jesucrist si'cni gujcnü che gubajnni lo guedxliuj, niluxh naj et si'cti riembeenu. <sup>17</sup>Ni'cni chutis bejn, palga rililajzni xtidx

Jesucrist, sujnnini te beŋcoob, diruni guichaglazj gunruni nani rajc lo guedxliuj, alga guichaglazjni gunni xtzun Dios.

<sup>18</sup> Guiraa dee siääd lo Dios, nani basiäjł lajzni xcuent Jesucrist, dxejcti baniidxni loonu rediidx xcuent xcälrusiäjł lajzni te gusule'nu rediidxga, <sup>19</sup> nalajznu, nanab gusule'nu diidxre: Dios guyunäj Jesucrist, cagusiäjłlajzni con reben guedxliuj, te xca'nireni, sa'csi diruni gudzuub xtojł reni ahuililajz xtiidxni lo xcuentreni. Dxejc gule Dios nuure te gusule'nu rediidxpacre lo rebejn. <sup>20</sup> Ni'cni sio'pnu te guiniinu xtidx Jesucrist, najcni ascanu lagajc Dios canabduxh lojtu che rniabduxhnu lojtu, colgusiäjł lajztu, colyajc tejsi con Dios. <sup>21</sup> Di Jesucrist niujn nicla tej dojl, niluxh sa'csi sanälajz Dios nuunu, xcuentnu bejn Dios gujc Jesucrist si'c te beŋdojl che gule'cni guiraa rextojł guedxliuj yejc Jesucrist che cuajni lo cruzj. Si'c gujcti te sajc ga'pnu xcäl'naya, xcäl'nasa'c Dios xcuent Jesucrist.

## 6

<sup>1</sup> Ni'cni rniabnu lojtu, jia'cnu tejsi lo xtzun Dios, na'c cuälaztu xcälracnäj Dios; palga guntu si'c, xlia'si cua'tuni. <sup>2</sup> Sa'csi loj xtidx Dios caj scree:

Dxej nani riäjł gunäni, bacuadiagä xtiidxtu,  
dxej che gubicaj xtojłtu gucnää la'tu.

¡Coljiejn! Naj najc te tiempsa'c,

coljiejnza, naj najc dxej ni guibicaj xtojłtu.

<sup>3</sup> Na'c jiennu nicla tej ni gun guidxe'ch lajz bejn, didi guiniireni xhet laadi najc xcälrusule'nu. <sup>4</sup> Niluxh lo guira'ti dzuun ni riennu, gululojnu lo rebejn najcnu xmos Dios; gacnu nadolajz; jiennu huant che rusacsireni nuure; che rdejdnu trabajw; che di jien xho jiennu; <sup>5</sup> che rguijnreni nuure; che rusäureni nuure neŋ latzguiib; che rdejdnu lo bieiduxh; che rdajł xtzunuunu; che re'ch bacał yääl; che rucua'nnu; <sup>6</sup> gululojza najcnu xmos Dios xcuent xcäl'nabaŋsa'cnu lo Dios; näjza xcäl'nansa'c xtidx Diosnu; näjza yälrajc nadolajz; sa'csi laaca riennu lo sa'nu; näjza sa'csi rbäjz Sprit Dxan xten Dios neŋ lastoonu; näjza xcuent yälrinälajzpac bejn; <sup>7</sup> näjza xcuent didxguliipac; näjza lo xcäl'rnibeduxh Dios; ca'zanu si'c te madxed xcäl'naya Dios, ca'nuni guropŋaanu, ladbee, näjza ladbäjgw. <sup>8</sup> Rululojzanu najcnu xmos Dios palga chä'p xpala'nnu, o palgaza jianxtujynu; palga guiniireni didxa'c xcuentnu, o palgaza guiniyajreni nuunu; palga naareni najcnu beŋrusguee, mase najcnu bejn ni rniididxlii. <sup>9</sup> Palga rut rłajzdı gumbee nuunu, o palga guira'ti bejn numbee nuunu; acayejtnu, niluxh bahuii, anu anabajn; rusaan Dios rguijnreni nuure, niluxh dinu guet; <sup>10</sup> najcnu si'c bejn ni yu' xliajs, niluxh rbalaznu; najcnu si'c bejn ni xhet rajpdı, luxh riennu gapduxh bejn; najcnu si'c bejn ni xhet rajpdı, niluxh rajpnu guiraloj.

<sup>11</sup> Lojtu, beŋ Corinto, aguniliinu lojtu guiragajc rediidx ni yu' neŋ lastoonu. <sup>12</sup> Xhetliidi diidxdı bacua'tznu lojtu, niluxh pet cacuatız lajztu diidx ni nanab guiniitu loonu. <sup>13</sup> Naj narä rulidxä la'tu si'c rulijdx te Dad rexi'nni: ¡Colguiniı loonu rediidx ni yu' neŋ lastootu!

### *Najcnu si'c xquidoo Dios ni nabajn*

<sup>14</sup> Na'c guchaagtu lo rebejn nani di chalilajz xtidx Dios, sa'csi di gacdi gunteblojtu dzuun sa'csi tejni rłajz gun dzunsa'c, steeni rłajz gunni dzunguijdx, ¿xho gac sanäj bajł xcäjy, ä? <sup>15</sup> O ¿xho gac sanäj Jesucrist beŋdxab ni laa Satanás, ä? O ¿xho gac sanäj te bejn nani rililajz xtidx Dios te bejn ni di chalilajz xtidx Dios, ä? <sup>16</sup> ¿Xhixh tebloj najc xquidoo Dios con rebanäjb, ä? Ni nuunu najcnu xquidoo Dios ni nabajn, lagajc si'cni gunii Dios galoo:

Cuäzä neŋ lastooreni, sisanääzarenı.

Narä sacä Xtiosreni, laareni sajcreni rexpenä.

<sup>17</sup> Ni'cni colrrii galäiireni, colguibicaj lojreni, te laad colcuääz, si'c naj Dios:

Te gac xca'ätu, na'c fałtu recosdxuudx.

<sup>18</sup> Dxejc la'tu sajctu rexinganä, rexindxä'pä,

luxh narä gacä xtadtı,

si'c naj Gueb Dios ni rajp guiralii yäl'rnibee.

## 7

<sup>1</sup> Ni'cni, la'tu ni sanälazä, sa'csi abia'n Dios diidxre loonu, do'o guisia xcäriejnnu, lastoonu näjza tiejxhnu, do'o cuäcäj guiraa rexhigabguijdx, guiraa redojl, te gac sanu lo rexnezyudxan Dios con xcäl'rdxejb Dios.

### *Xho basiejch lajz reben Corinto*

<sup>2</sup> ¡Colchanälajz nuunu neŋ lastootu! Xhet latsiajdi biennu lojtu. Rut baxhiŋdinu. Rutza basgueedinu. <sup>3</sup> Dina guiniä rediidxre te cue'cä xquejtu; ni aguniä lojtu galooli, la'tu yu'tu neŋ lastoonu palga tejsi guetnu, o palga tejsi guibajnrunu. <sup>4</sup> La'tu nadip lazä, rniduxhä didxa'c xcuentnu lo bejn, rbedxi lastoä, rbalazduxhä loj guiraa retrabajw ni cadeednu.

<sup>5</sup> Ni'cni che guyu'nu reguedx Macedonia, di niajcdi nusilajznu sa'csi guiralajt cadejdnu trabajw, xcuent yälrdijl ni guyu' guideb gabinu, xcuentza yälrdxejb ni guyu' lastoonu. <sup>6</sup> Niluxh Dios ni racnäy rebejn ni rac-huin lajzreni, gucnäy nuure, sa'csi che bidzujn Tito guredxi lastoä. <sup>7</sup> Luxh xhet sa'csi bidzujntis Tito, näjza sa'csi gulecdxitu lastoo Tito, näjza sa'csi biädnäni diidx xho yu'tu, xho rlaiztu fiitu narä, xho yu' xliajs lastootu xcuent xtojltu, xho rlazduhtu guntu si'cni guniä lojtu, ni'cni bibalasduxhäru.

<sup>8</sup> Acananä guc-huin lajztu che bihtu guijtzt ni bacuaä lojtu, niluxh di lazä niac-huin mase che baxhaläni guc-huin lazä, sa'csi naj nanä mase bejn guijtztga guc-huin lajztu, xhet xchejdi guc-huin lajztu. <sup>9</sup> Niluxh naj rbalazä, et sa'csi guc-huindi lajztu, alga sa'csi guc-huin lajztu te basiejch lajztu xcuent xtojltu, sa'csi guc-huin lajztu si'cni rlaiz Dios, te di yu' xhi gunijttu xcuent nuunu. <sup>10</sup> Sa'csi yälrac-huin ni ruxhal Dios loonu rujn rusiejch lajznu, te ruslaa Dios nuurnu lo dojl ni'cni rbaalazä che bejn ni si'c. Niluxh yälrac-huin xten guedxliuj dini gun gusiejch lajz rebejn rextojlreni, alga rujn ni nitloj bejn tejas. <sup>11</sup> La'tu bejntu huant xliajs ni baxhal Dios si'cni rchaglaiz Dios gac. Naj jcolhuii gan! jLacti xhi cossa'c bejn ni par la'tu! Bejn ni bahuisa'cpactu xhini'c gujc, te gac gusulegajctu xcuentni; dxejc bejn ni bidxe'chtu, näjza bejn ni bidxejbtu, ni'cni basaantu dojlga, dxejcti bejn ni rlaizpactu nuhuiitu loä, bejn zani guyu'tu yärsia' xcuentä, bejn zani rlaiztu guntu yälguxhtis bejn nani bejn dojlga. Guiraa redee baluiloj et la'ditu bejn dojl. <sup>12</sup> Ni'cni, che bacuaä guijtztga, dina nucuaäni loj bejn ni bejn dojlga, niluxh bacuaä guijtztga lojtu te guiluiloj xcäl'sia'tu ni rajptu xcuent narä nez loj Dios. <sup>13</sup> Ni'cni aguredxi xcäriejnnu.

Naj aguredxi xcärienä, bibalazduxhäru xcuent xcäl'rbalajz Tito, sa'csi bicoob, bisilajz xpriti xcuent guiraatu. <sup>14</sup> Sa'csi palga yu' xhi didxsa'c ni räpä lojni xcuenttu, ditu nusaxtuyj narä nez lojni. Niluxh sigajcni guiniinu ganax didxguli, sigajcza najc guiraa redidxsa'c xcuenttu ni guniä loj Tito, guliipacni. <sup>15</sup> Ni'cni maazru sanälajz ni la'tu, che rnaiz lajz ni xho basoohtu diidx, xho bejntu cua'tuni che bidzujn nu, racejslitu cadxejbtu. <sup>16</sup> Naj rbaalazä sa'csi loj guira'ti la'tu nadip lazä.

## 8

### *Saru rudeedreni meel*

<sup>1</sup> Naj bejtznu, rlaiznu guiniinu lojtu xho badeed Dios xcäl'rulasajz ni lo rebejn Macedonia ni huililajz xtidx Dios. <sup>2</sup> Mase gudedduxhreni trabajw, bibalajzreni, mase xhetliidi gojpreni, badeedreni meel si'c te bejn ni rajp. <sup>3</sup> Narä canilä lojtu, badeedreni xmeelreni si'cni gojpreni, luxh badeedrueni loj ni naa bejn sajg gudeedreni. <sup>4</sup> Gunabduxhazreni loonu guisaannu gudeedreni xmeelreni te gacnäjreni rexpejn Dios. <sup>5</sup> Niluxh direni niujn si'cni biennu xhigab gunreni. Ganiddoo badeedreni lagajc laareni loj Dad Jesucrist, näjza loonu si'cni rnibee Dios gac. <sup>6</sup> Sa'csi batie' rexpejn Macedonia meel, ni'c naj räpä loj Tito chanuupacni gutie'ni meel lojtu si'cni gunii Tito lojtu galoo. <sup>7</sup> Rujntu xhidajl dzunsa'c. Rililazsa'ctu xtidx Dios; rnisa'ctu xtidx Dios; rajptu yäl'najn; rchaglaizpactu guntu dzuun; rinälajztu nuunu, ni'cni na'c gusaantu tedcaj gunzatu dzunsa'cre, nalajznu, gudeedtu meel.

<sup>8</sup> Dina guniä lojtu colyujn pacni; narä rlazätis gacheetu xho rbaalajz reni rudeed meel te gululoj don la guli sanälajzpaczatu rexpejn Dios. <sup>9</sup> Sa'csi la'tu anumbecheetu rulasajz Dad Jesucrist, te mase najcni ri'cw, rajpni guiraa xhixten Dios, xcuent u gajcni si'c te bejn ni xhet rajpdi, te xcuentni ga'ptu guiraa rexhixten Dios xhaguibaa.

<sup>10</sup> Narä siniä lojtu xhi xhigab runä, par lagajc xcäl'nasa'ctu. Gudebijzli ganiid la'tu guslojtu bejntu dzunsa'cre, luxh rbaali lajztu rlaizpactu guntuni. <sup>11</sup> Naj colchanuu, colguluux dzuunga si'cni guslojtu cayujntuni. Naj te luux dzuunga colgudeed si'cni rajptu. <sup>12</sup> Sa'csi palga rlaizduxh te bejn gudeed lo Dios, laaca najc gudeedni si'ctis ni rajppacni. Di Dios guiniab gudeed bejn nani dini ga'p. <sup>13</sup> Dina guniä gudeedtejt te tedtu trabajw te gapduxh stee bejn, alga te gacteblojtistu. <sup>14</sup> Nani rajprulu naj ni'c colgudee te gusalojtu ni cayäädxreni, te stee dxej nani rajpreni laareni sajg suniidxzaren i te gusalojreni nani cayäädxtu te si'c gacni tebloj. <sup>15</sup> Sa'csi lo xtidx Dios caj scree: "Te bejn nani batopduxh yäl'nasa'c, xhet bia'ndiru, dxejcti nani guxii batojp yäl'nasa'c, xhet biäädxdii."

### *Tito näjza rexcompanieerni*

<sup>16</sup> Xquixtios lo Dios nani rudeed lo Tito lagajc yärsia' ni räpä narä par la'tu. <sup>17</sup> Sa'csi cuäjbn i gunni nani gunabä lojni gunni. Luxh sa'csi rlazduxh pacni gunni xtzuun Dios, naj lagajc laani bejn ni xhigab jiadhuimi lojtu te luux dzuunre.

<sup>18</sup> Caguxhalnu xtee bejtznu chanä Tito. Guiraa rebejn guidoo rniididxsa'c hueen xcuent bejnre sa'csi laaca rusule'ni xtidx Dios. <sup>19</sup> Ni'ctis aguleza rebejn guidooni te chunäjni narä te gacnäjni narä lo xtzuun Dios nani cayennu te guiliä'pni xpala'n Gueb Dad Jesucrist, te gululojza lacti rlaizpacni jiennu xtzuunni. <sup>20</sup> Ni'cni rlazä jiapdaduxhnu te di chu tej ni

guiniyaj nuure xcuent melrore ni chosa'nnu lo rexpejn Dios. <sup>21</sup> Sa'csi narä riuduxhä runä nani najc laaca, et ganax nez lojdi Jesucrist, näjza loj rebejn.

<sup>22</sup> Con guiro'p redee, caguxhalzanu stee bejtznu, nani agujc balti huält bihuiinu xho rujnni, te bahuiipacnu rlanjpacni gunga'cni xhidajl dzuun, luxh naj rlanjzruni gunga'cni redzuunga sa'csi nadip lajzni la'tu. <sup>23</sup> Palga yu' chu guiniabdiidx xcuent Tito, coljejtz lojni laani najc nani cayunnäj narä dzuun lojtu. Dxejcti xcuent stio'p bejtznu, laareni najcreni xquixhajg reguidoo, rliä'pzareni xpala'n Jesucrist. <sup>24</sup> Ni'c na'c guidxvejbtu che yu'tu lo rebejn reguidoo guluiipactu loj rebejnga xho sanälajztu, näjza redzuun ni rujntu ni'c rniinu ganax didxsa'c xcuenttu.

## 9

### *Meel par rebejtznu*

<sup>1</sup> Ni'cni dina gucuäaru lojtu xcuent dzuunre, nalajznu, yälracnäj rexpejn Dios, <sup>2</sup> sa'csi anancheä rlanjpactu guntuni, luxh xcuentpac ni'c agulä'pä xpala'ntu loj rebejn Macedonia, räpä lojreni la'tu, reben Acaya, gudebijzli batie'tu meel, luxh sa'csi bejntu si'c, xhidajlza reben Macedonia biniib te badeedzareni meel. <sup>3</sup> Ni'cni abaxhalä rebejtznu lojtu, te di xlia'si gulä'pä xpala'ntu xcuent dzuunre, te acabäjzlitu gudeedtu xmeeltu, sigajc ni agunixgaa lojtu. <sup>4</sup> Didä che jiadnää reben Macedonia jiphuiinu la'tu, xhet rajpditu, dxejc jianxtuyä narä, näjza la'tu. <sup>5</sup> Ni'cni benä xhigab, nanabpac jiadxgaa rebejtznu, jiadhuiireni la'tu, te fiireni don xho gac xcuent meelro ni galooli bia'n diidx gudeedtu, te abatiexgaatu nani gusalajztu sa'csi rlanjpactu gudeedtuni, xhet sa'csi rniinu riäjlpac gudeedtuni.

<sup>6</sup> Rniliä lojtu, nani guxii rbe'c, guxiiza yälناس'c guiliäsni, niluxh nani rbe'c xhidajl binij, xhidajlza yälناس'c guiliäsni. <sup>7</sup> Tejgatu colhuui don lacti sajg gudeedni, dxejc si'c sugudeedni si'cti ni rlanjzni, na'c gun tiopdi lajzni, etza sa'csi riäjlpac gudeednini, sa'csi Dios sanälajz bejn ni rbaali lajzni ruedeedni meel lojni. <sup>8</sup> Luxh Dios sajg guniidxru xcälracnäjni lojtu, te si'c guixe-guixee sajplu xhidajl guiraloj rexhixtenlu, te ga'plu xhitis ni rquiinlu loj guira'ti xtzunsa'clu. <sup>9</sup> Sa'csi lo xtidx Dios caj scree: Abadeduxhni loj reben ni xhet rajpdi luxh redzunsa'c ni rujnni, najcreni par tejjas.

<sup>10</sup> Dios nani ruedeed binij ni rbe'c nani rujn dzuun loniaa, laani suniidxzani yätxtiil te guidaunu, lagajc Diosga suniidx, sutajlza binij cue'ctu, lagajc laani sustioobnini te gacduxh yälناس'c xten xtzunsa'ctu. <sup>11</sup> Te si'c ga'ptu lacti yälناس'c te gac gudeedzatu xhiroob. Luxh xcuent xtzuunnu, meel ni ruxhaltu loj rexpejn Dios sujn gudedduxhrene xquixtios lo Dios. <sup>12</sup> Sa'csi che racnäjtü rebejtznu, dinu guideed ganaxtis ni rquiinreni, rujnzanu ruedeedruren xquixtios lo Dios. <sup>13</sup> Che racnäjtü sa'tu si'c, rululojtu lacti rusobtu xtidx Dios si'cni ahuililajztuni, ni'cni siliä'preni xpala'n Dios xcuent xcälracnäjtü, nalajznu xcuent meel ni badeedtu lojreni, näjza loj guiraareni. <sup>14</sup> Dxejcti laareni sibedx-siniabzareni lo Dios xcuenttu, sinälazduxhrene la'tu sa'csi runidxduxh Dios xcälracnäjni lojtu. <sup>15</sup> jXquixtiosi Dios sa'csi baniidxni yälناس'cduxhrej loonu!

## 10

### *Yälrnibee ni rajp Pabl sa'csi najcni apost*

<sup>1</sup> Lagajc narä, Pabl, rniabduxhä lojtu, con guiraa didxdoo, guiraa didxsa'c xten Crist, (narä ni nac bennadolajz che biälä lojtu, niluxh che suga'a zijt lojtu, dxejc nacä bennialajz). <sup>2</sup> Narä canabä lojtu, colguiba'nsa'c te che jiadhuia lojtu, dina gacä nialajz dizana guiniä redidxnaj ni abenä xhigab guiniä loj gaii bejn nani rnii nabanä si'c te benguedxliuj. <sup>3</sup> Gullicani najcnu benguedxliuj, niluxh dinu gucuanäj sa'nu guiib nani rca' ben guedxliuj che rcuaareni. <sup>4</sup> Sa'csi reguiib ni rca'nu te guidi'sa'nu direni gac sa' guiib ni rca' ben guedxliuj. Nuunu rucuaanu con xcälrnibee Dios te riennu gaan loj guiraa rexälrnibee guedxliujre. <sup>5</sup> Ni'cni cagutzujlnu guiraa rexhigabguijdxreni, näjza nani rchaloreni najc xhigabro nani rlanjzreni guiniyajreni yälrumbee Dios, luxh caca'nu guiralii rexhigabnu cagutednureni ladznaa Jesucrist te gusoobnu rextidx Jesucrist. <sup>6</sup> Cabääztisnu te gunnu yälguxhtis loj chutis bejn ni dini gusoob xtidx Dios, che abasoob guiragajctu xtidx Dios.

<sup>7</sup> La'tu cahuiitu redzuun ni rien. Palga yu' chu tejtü ni rchaloni najcni xpejn Crist, sugunsa'cni xhigab, fiini xho najc lastooni, dxejcti sugacbeepacni sigajcni ahuililajzni xtidx Jesucrist, sigajcza nuure ahuililajznanuni. <sup>8</sup> Sa'csi mase guiliä'pärü xpala'nä xcuent yälrnibee ni rapä, ni baniidx Dios te gustiobä xcälrililajztu, et te guxhinädi la'tu, niäla si'c dina guituiä. <sup>9</sup> Dina rlazä guchalotu rlazä guchebä la'tu con rexquitzä. <sup>10</sup> Sa'csi rniireni: "Lo rexquitzzäni caj didxnagajn, didxnialajz, niluxh che suga'ni laapacni, xheti xcäl'siudzu'tzni, luxh xho rnij diidx ni rniini." <sup>11</sup> Luxh ni rii si'c, sugacbeepacni dee: si'cni najcnu con rextidxnu che rucuaanu lojtu che yu'nu zijt, sigajcza najcnu che suganäpacnu la'tu.

<sup>12</sup> Dinu gun xhigab najcnu tebloj loj rebejn ni runnaro lagajc laareni. Niluxh reni'c rchaloreni si'c sa'csi ruhuiireni xho najcreni cu'a' stee lagajc sa'reni. Che rujnreni si'c, nayääl xcäriejnreni. <sup>13</sup> Nuure dinu gunnarrotej lagajc nuurnu, niluxh riennu si'cni nungäj] jiennu, xcuent yälrmibee ni baniidx Dios loonu te jiennu dzuun cadro yu'litu. <sup>14</sup> Ni'cni dinu nidedcaj xcälrmibeenu che bio'pnu lojtu, sa'csi baniidx Dios yälrmibee loonu ganidoo nuunu gusule'nu xtidx Jesucrist lojtu. <sup>15</sup> Dinu niennaro lagajc nuurnu xcuent xtzuum ste'ca bejn, ascanu lagajc nuunu biennuni. Cabääznu tioobru xcälrmilajztu, te gac jienrunu dzuun lojtu, si'ctis gal] jiennuni. <sup>16</sup> Te gacza gusule'nu xtidx Jesucrist ste'ca lajt ni ria'n zijtru lo guejdx cadro yu'tu, na'cza gunnaronu lagajc nuunu xcuent dzuun ni bejn ste'ca bejn.

<sup>17</sup> Sa'csi nani rrajz gacnaro, suguiliä'pni xpala'n Dad Jesucrist. <sup>18</sup> Sa'csi et nani rliä'p lagajc xpala'ndini ni ria'n hueen nez loj Dios, niluxh bejn ni rliä'p Jesucrist xpala'nni, ni'cni rbalaznä] Dios.

## 11

### *Pabl näjza rebejn ni rniisi najcreni apost*

<sup>1</sup> Maläi chanunäsijctu narä la] ni guiniä gaii didxnyäle', niluxh asanunäjtu narä. <sup>2</sup> Randzu'ä la'tu con yälrandzu' ni baniidx Dios, sa'csi abia'n diidx gutedä la'tu ladznaa Jesucrist te xca'ni la'tu. Rlazä gactu bejnaya chäätu lojni, si'c te dxa'p che ruchnaani te bi'n, rut bahualdini. <sup>3</sup> Niluxh rdxebä didi gusguee bendxab la'tu si'c ni basguee bäl] Eva con xcälmadxälajzni. Didi gunni guichaa xhigabtu, guibicajtu lo xtidx Jesucrist luxh naj laaca rajnpactu Jesucrist, guideb lastootu. <sup>4</sup> Sa'csi la'tu cagutipduxh lajztu che riädni ste'ca bejn lojtu xtidx stee Jesús nani digac nani bisule'nu lojtu; o che naareni xca'tu stee sprit ni digac nani acua'tu; o che naareni chalilajztu ste'ca diidx nani najc garenca lo xtidx Dios ni ahuililajztu. <sup>5</sup> Narä runä xhigab dina gacä bejn ni guxiuru sajz loj guiraa reapost.

<sup>6</sup> Mase di gacdi guinisa'cä, xhet yälnajndiza cayädxä; niluxh ni'c huenliisi rluiolj guiraa rediidx ni abaluä lojtu, guiraa redzuun ni abenä ro'c.

<sup>7</sup> ¿La benä te dojl guyu'ä lojtu si'c te bejn nadolajz, te gactu bejnroru, sa'csi xhetliidi cua'ädi xcuent ni basule'ä xtidx Dios lojtu? <sup>8</sup> Cua'ä meel ni baniidx garenca guidoo loä che guyu'ä lojtu, te benä xtzun Dios lojtu. <sup>9</sup> Che guyu'ä lojtu guyu' xhi biquinä, niluxh xhet cua'ädi lojtu, dina nutalä xtzuumtu. Sa'csi che biäd rebejtznu ni siäd Macedonia, baniidxreni guiraa ni biquinä. Loj guiraa redee dina nutalä xtzuumtu, luxh si'c sinuu gunä. <sup>10</sup> Guidubendxi duxlii xten Jesucrist ni yu' ne] lastoä, rniiliä rut sajcdi gudzucaj xcuent xho yuä lojtu, ni'cni care'ch didxroga lo guiraa reguedx Acaya. <sup>11</sup> ¿Xhicuent rniä si'c? ¿Laa sa'csi dina chanälazä la'tu, ä? ¿Xho gacni si'c! ¿Dios anajn lacti sanälazä la'tu! <sup>12</sup> Niluxh nani rungacä, lagajc ni'c sinuu gunä, te gudxonä renani rrajz gacnaro, renani rrajz naa rebejn najcreni si'cpac najcnu, niluxh direni gac. <sup>13</sup> Direni gac apost, laareni rusgueereni, rujsireni si'c ni najcreni apost xten Jesucrist, luxh rut najcdireni. <sup>14</sup> Luxh xho dini gac si'c, ni lagajc bendxab ni laa Satanäs rululilj si'c te xangl Dios ni rdimbicha' te rusgueeni bejn. <sup>15</sup> Ni'cni na'c guidxelojtu palga näjza rexmos bendxab riäd, rujsireni si'c bejn ni rujn dzunsa'c, niluxh sinitlojreni par tejpas xcuent ni rujnreni.

### *Rdej Pabl trabajw sa'csi najcni te apost*

<sup>16</sup> Rnisacä lojtu, na'c guntu xhigab yecä cayajc, niluxh palga si'c rujntu xhigab, colgusaanza guiniä si'c te ni rajc yejcnj te guiniäza didxro lagajc xcuentä. <sup>17</sup> Diidx ni rniä dina guiniäni xcuent xcälrmibee Dios, alga rniäni si'c te ni rajc yejcnj, lala redixro ni rniä xcuent lagajc narä. <sup>18</sup> Sa'csi lacti bejn yu' ni rniä didxro xcuent redzuun ni rujnreni lo guejdxliure, sigajcza siniä didxro xcuent lagajc narä. <sup>19</sup> Ni la'tu, sa'csi nasinduxhtu, sanunäjtu rebejn ni rajc yejcreni. <sup>20</sup> La'tu sanunäjtu chutis ni rmibee lojtu si'c te lam, o rusguee la'tu te rbajnreni xhi xtentu, o rujniä runxliä'tu xtzuumni o rliä'preni lagajc xpala'reni, o rga'preni lojtu. <sup>21</sup> Mase rtuiyä guiniäni, dipac niacjdi siniä diidx lojtu te niacä si'c najc rebejnga. Niluxh loj xhitis nani runnaroreni, (canisicä si'c te bejnayääl) narä sajcru gunnaroä.

<sup>22</sup> ¿La najcreni xpejn hebreos? Sigajcza narä. ¿La najcreni xpejn Israel? Sigajcza narä. ¿La najcreni xajg toAbram? Sigajcza narä. <sup>23</sup> ¿La najcreni xmos Jesucrist? Narä nacäruni lojreni. Naj rniä si'c te bejn ni rajc yejcnj. Abenäru dzuun lojreni, agudicjnrreni narä loj ni gudijnreni laareni, abasäurureni narä ne] latzguuib, nicla gac guigab bal huält gudijnreni narä; baltiza huält ameer nietä. <sup>24</sup> Gaii huält gudijn rexpejn Israel narä, teja huält batiäljreni duguij detzä galbitzubigaa huält. <sup>25</sup> Chon huält bahuajewreni narä garo't; stee huält bacuaareni guij yecä; chon huält biäaz barcw cadro sa'ä loj nisdoo; teb dxej, teb yääl guyu'ä lo nisdoo. <sup>26</sup> Huaduxhä bias, lacti bixun riesgw xcuentä lo gueuu, xcuent regubaan, xcuent rebenladxä, xcuentza rebenzajt. Bixunza riesgw ne] reguedxro, näjza nez lo reyubidz, näjza lo nisdoo, näjza xcuent rebejn ni rusguee, rniisireni najcreni bejtznu lo xtidx Jesucrist. <sup>27</sup> Abenduxhä dzuun, agudedduxhä trabajw, balti yääl dina niesä, balti

huält gulanä, biolä, balti huält xheti xhi niauä; agudedäza yäl'nalduxh; guyu' huält xhetiza xhabä.

<sup>28</sup> Luxh xhet loj redeetis rdedä trabajw; guixe-guixee di lastoä cuedxi xcuent yärsia' ni ru'ä xcuent reben guidoo ni huililajz xtidx Dios. <sup>29</sup> Che rdxajg tejtu, näjza narä rdxagä. Palga tejtu riabj lo dojl, narä ruduxhä yärsia' xcuentni. <sup>30</sup> Palga nanab gunnaröä lagajc narä, sunäni xcuent rediidx nani rululioj xcälrdxagä. <sup>31</sup> Dios ni najc Xtd Jesucrist, nani riälj guiliä'p xpala'nni par tejpas, ananchee dina gusgueä la'tu. <sup>32</sup> Che guyu'ä guedx Damasco, gubernadoor nani guyu' ro'c, najcni xpejn reii Aretas, gunibee gojp rexcuxhtisni guejdxga te niniäazreni narä te nisäureni narä nen latzguuib. <sup>33</sup> Niluxh basiäjtreni narä nen te dximro nez ro' te padeer ni rdejd gabi guejdxga, te si'c gulaä ladzñaareni.

## 12

### *Dios baluiloj lo bacal*

<sup>1</sup> Mase riälj guiniäni, xhet gunädi gaan guiniä didxro lagajc xcuentä ni'cni rlazä chanuu diidx, guiniä xcuent rebecal näjza xcuent nani baluiloj Dios loä. <sup>2</sup> Numbeä te niguii ni ahuililajz xtidx Jesucrist. Gutzudaj ijz huijni guibaa ni riojnga, dina ganä laa guideb tiejxhni huijni, o la ganax xspritni huij, Diostis najn. <sup>3</sup> Diostis najn la guideb tiejxhni, o ganax xpritni, niluxh nanä xho huij niguiiga, <sup>4</sup> guläs Diosni cadro yu'pac Dios, luxh ro'c biejn diajgni didx-xhiga'tz, didxroduxhetej, nani di gacdi guinii ben guedxliuj. <sup>5</sup> Xcuent sa' niguiiga sajc guiniä didxro, didxsa'c, niluxh xcuent lagajc narä, di gacdi guiniäni; siniätis diidx ni rululioj xcälrdxagä. <sup>6</sup> Mase rlazä guiniä didxro, didxsa'c xcuent lagajc narä, dini gac didxnayääl, sa'csi guliicazani. Niluxh dina guiniäni te di guntu xhigab nacä benroru loj ni rhuiitu runä o nani riejn diajgtu rniä.

<sup>7</sup> Baluiloj Dios xhidalduxh cosroduxh loä, niluxh te na'c gacä bennarö, basaan Dios gusloj guyugujdx tiexhä, si'c te guejch huääz tiexhä, ni baxhal bendxab xten Satanäs te gusacsini narä te di gacä te bennarö. <sup>8</sup> Choñ huält agunabä lo Jesucrist xcuent ni'c, te guibicajni. <sup>9</sup> Niluxh laani najni loä: "Yälracnäj ni gunidxä salduxh lu, sa'csi ruzeñsa'cru xcälmilagwrä che xheti yälrutiplajz te bejn." Ni'cni hueenru guiniä didxro sa'csi xhet yälrutiplazädi rapä, te guzeñ xcälrnibee Jesucrist lastoä. <sup>10</sup> Ni'cni rbedxilazä xheti xcälrutiplazä, rbedxizalazä rniyajreni narä, näjza che caquinä guiralöj, näjza che rdedä trabajw xcuent Jesucrist, sa'csi che xheti xcälrutiplazä, dxejc runiidx Dios yäl'nadap, yäl'nadaan loä.

### *Yu' Pabyl yärsia' xcuent guidoo ni yu' Corinto*

<sup>11</sup> Agucä si'c te bennayääl, lagajc la'tu bejntu nacä si'c. La'tu riälj niniitu didxro, didxsa'c xcuentä, sa'csi gajdpac biädxädi, nadxagä loj reapost ni sajrcu mase rut nacädi. <sup>12</sup> Redzuun ni benä la'l ni guyu'ä lojtu, benäni si'c te ni najcpac apost, huinuutis benäni guideb nadolajz näjza reseen, näjza remilagwr. <sup>13</sup> Xhi benä lojtu te naatu runä xhigab guxiiru sajctu loj guiraa reguidoo? Nani benätis najc dee: dina nutalä xtzuuuntu, nalajznu dina niniabä niacnäjtu narä si'c gucnäj narä reguidoo ni yu' garenca lajt. jColsiälj lajztu narä dojlre!

<sup>14</sup> Naj cayunä xhigab jiädhuiätu, naj gacni choñ huält siälä. Di quilä xhixtentu, alga lagajc la'tu rguilä. Di rlazä gutalä xhixtentu. Di riälj cuchee rebiuux meel par xuczajreni. Reguzajn ni riälj cuchee meel par rexi'nreni. <sup>15</sup> Xhet najcädi gunitä guiraa nani rapä, näjza lagajc narä sujiuxä, te laa xaimitu lo dojl. Palga chanälazäru la'tu, çla guxiiru chanälajztu narä, ä?

<sup>16</sup> Niluxh mase si'c najcni, di narä nutalä xtzuuuntu. Empac yu'reni canii basgueä la'tu sa'csi nadxällazä. <sup>17</sup> çXhixh naatu cua'ä xhi xtentu sa'csi baxhalä rebejtznu lojtu, ä? <sup>18</sup> Che baxhalä Tito, räpä lojni chanäani stee bejtznu te jiädhuiireni la'tu. çXhixh cua'ni xhi xtentu, ä? Xhixh et tejsi xhigab biennu, tebloj biennu dzuun guiro'pnu che guyu'nu lojtu.

<sup>19</sup> La'ni cayoltu guiraa rediidxre, cayujntu xhigab canabnu jiajl lajztu, niluxh xhet si'cdini. Caniinu rediidxre nez loj Dios, caniizanu con xcälracnäj Jesucrist te si'c tioobrutu lo xtidx Dios, rebetzä nani rinälazä. <sup>20</sup> Sa'csi rdxebä andi che jiädhuiätu fiä ditu gac si'cni rlazä gactu, dxejctiru la'tu suhuiizatu dizana gacä si'cni rlazä gacä. Rdxebä andi yu'tu ni cadijl, ni ruguij lajzni xhixtent sa'ni, ni cadxe'ch lo sa'ni, ni cala' lo sa'ni, ni caniyaj sa'ni, ni cagutajl diidx lo sa'ni; ni cayunnaro lagajc laani, ni cayujnza bieje. <sup>21</sup> Rdxebä andi che jiädhuiätu stehuält, gusanxtujy Dios narä xcuenttu. Rdxebäza sonduxhä xcuent xhidajltu nani abanijt, bejntu dojl galoo, luxh gajdtu gusiechajztu xcuent xtojltu. Yu'tu ni di guibanäyaya, resnäjtü bejn ni di gac chäältu, yu'za balti dojl rujntu.

## 13

### *Lult yäl'rulijdx xten Pabl*

<sup>1</sup> Naj gac choñ huält siädhuiä la'tu. Guira'ti quej nanab cue'creni con xtidx tio'p o choñ bejn ni najnpac xhi dojl bejn tejjani. <sup>2</sup> Mase ruti narä ro'c, arnixgaä lojtu lagajc diidx

ni guniä che guyu'ä lojtu ni barojp biälä lojtu, luxh rniä loj renani abejn dojl, näjza loj guiraatu, palga jiälsacä, diruna gulaslazätu nicla tejtü, <sup>3</sup>sa'csi rlanjtu fiipactu la guliü runiidx Jesucrist yäl'rnibee loä te guiniä xtiidxni. Luxh Jesucrist dini guisisni xcuenttu, niluxh laani rustioobruni xtiidxni nen lastootu. <sup>4</sup>Guliicani che cuajni lo crujz, gucni si'c te bejn nani casis, niluxh naj nabajjñni sa'csi rapduxhni xcäl'rnibee Dios. Näjza nuure rsia'cnu si'c te bejn nani casisnä j laani niluxh nabaññajnu laani xcuent xcäl'rnibee Dios ni baniidzxa Dios xcuenttu.

<sup>5</sup>Colñinäj lastootu lagajc la'tu, col'huii la guliipac ahuililajztu xtidx Dios; col'huisa'c xho najc lastootu. ¿La ditu gachee rbäjz Jesucrist nen lastootu, ä? Palga rutini, rusqueetu lastootu, ditu nililajztu xtidx Dios. <sup>6</sup>Narä rlazä gacheetu, dinu nusguee lastoonu, ahuililajzpacnu xtidx Dios. <sup>7</sup>Rniabä loj Dios na'c guntu cosguijdx, xhet te guiniidi bejn didxsa'c xcuentnu, alga te la'tu guntu recossa'c, mase guiniireni et laadi cayunä narä. <sup>8</sup>Sa'csi xhetliidi rajcdi riennu te nitloj didxguliü, xcäl'rnibeenu najc te gusule'nu didxlii. <sup>9</sup>Ni'cni rbaa lajznu che casisnu, niluxh la'tu nadip, nadaantu; rbejdx-rniabzanu lo Dios guiza' xcäl'riliilajztu lo xtidx Dios. <sup>10</sup>Rucuaä reguijzre lojtu che gajdna jiälä, te che jiälä na'c tilnäätu si'cpacni nungäj j tilnäätu xcuent yäl'rnibee ni baniidx Dad Jesucrist loä, te gac tioobrutu lo xtidx Dios, xhet te nitditu.

<sup>11</sup>Ni'cni rbejznu, colguibalajz, col'huii guisa' xcäl'riliilajztu, col'cuecdxi lajztu, col'yennäj sa'tu tejsi xhigab, dxitis gubajñ. Dios xten yäl'rinälajz näjza yäl'rbecdxi lajz chunäj la'tu. <sup>12</sup>Colñii: "Xchan" lo resa'tu. <sup>13</sup>Guiraa rebejznu nani ahuililajz ruxhal xtiixtiot lojtu.

<sup>14</sup>Yäl'racnä j xten Dad Jesucrist, näjza yäl'rinälajz xten Dios, näjza yäl'racnä j xten Sprit Dxi chunä nen lastootu. Sugacni si'c.



## Te Guijtz Lo Reben Gálatas

*Pabl rucuaa guijtz loj reben guidoo nez región Galacia*

<sup>1</sup> Narä, Pabl, nacä apost xten Jesucrist. Xhet rebejn di baxhal narä, xhetza bejn di gule narä. Lagajc Jesucrist näjza Xtadni Dios ni yu' xhaguibaa, nani guläs Jesucrist loj rebengut, laareni agulereni narä. <sup>2</sup> Narä, näjza guiraa resa'nu nani yunäj narä, rucuaanu guijtzre lo reben guidoo ni yu' nez reguedx Galacia. <sup>3</sup> Xca' guejbtu xcälracnäj Dios con xcälrbexdilajz xten Dios xtadni näjza xten Dad Jesucrist. <sup>4</sup> Lagajc laani cuäjbn gujtni te guslaani nuure lo dojl xten guedxliuj guijdxre, si'cni gunibee Xtadnu, Gueb-Dios. <sup>5</sup> Chä'p xpala'n Dios par tejpas. Sugacni si'c.

*Xhetdi xhi stee didxcoob ni sajc guslaa nuure*

<sup>6</sup> Rdxeloduxhä lacti riojb cabälaztu Dios ni gurejdx la'tu con xcälrinälajz Crist, luxh naj cagusoobtu ste'ca diidx. <sup>7</sup> Xhetdi stee diidx ni sajc guslaa nuure lo dojl. Yu'reni rlajz gusiejchreni lajztu con ste'ca diidx, rlajzreni guchaareni xtidx Jesucrist. <sup>8</sup> Niluxh palga jääd chu jäädliui lojtu ste'ca diidx ni ruslaa bejn lo dojl, niluxh di diidxga gac si'c najc diidx nani abaluiinu lojtu, bejn ga agubibdeni, chutis najcnu, mase naräni, mase te xangl Dios ni jääd xhaguibaali. <sup>9</sup> Si'c ni guniä lojtu, si'c rnisacä lojtu naj: Pal yu' chu jäädliui lojtu ste'ca diidx ni ruslaa bejn lo dojl, luxh di diidxga gac si'c najc diidx nani abaluiinu lojtu, bejn ga agubibdeni.

<sup>10</sup> ¿Xhi naatu? ¿La rlazä guinisa'c bejn xcuentä o la rlazä guinisa'c Dios xcuentä, ä? ¿La rlazä guspaä lajz bejn, ä? Paru rlazä guspaä lajz bejn, digacdi gacä xmos Jesucrist.

*Xtzun Pabl*

<sup>11</sup> Colyacbee sa'ä, diidx ni ruslaa bejn lo dojl nani abasule'ä lojtu di diidxga gac xhigab ben guedxliuj. <sup>12</sup> Xhet lojdi bejn guedxliujdi cua'äni, rutza baluidini loä, niluxh lagajc Jesucrist baniidx xtiidxni loä.

<sup>13</sup> Anajntu xho gucä, xho gubanä galoo che rusobätis rexleii to Moisés. Dxejc basacsiduxhä reben guidoo ni huillilajz xtidx Jesucrist, si'c benä te rlazä nitlojreni. <sup>14</sup> Loj reni rusoob xleii to Moisés narä cagusböaru xtiidxni, nanduxhäru loj guiraareni. Loj rebejn nani sadxagä ladxä, maaazru sanälazä xcostumbr retoxtadgoldoä. <sup>15</sup> Dios gule narä, guleni narä cheni nuuli xnanä narä, gurejdxni narä sa'csi sanälajzni narä. <sup>16</sup> Dxejc bibalajz Dios baluilojni Xi'nni Jesucrist loä te guiniä xtiidxni xcuent xho ruslaani bejn lo dojl loj reni di gac xpejn Israel. Che gujc si'c rut lojdi huiye'tzä. <sup>17</sup> Niclaza nia'ä guedx Jerusalén loj reni ganid gujc apost loä. Alga hua'a nez reguedx Arabia, dxejcti gubisacä guedx Damasco.

<sup>18</sup> Che agudejd si'cti choj ijz, dxejcru hua'a guedx Jerusalén te biembeä Pedr, dxejc biannäni tzun-gubijdx. <sup>19</sup> Niluxh dina nuhuiä loj chu stee apost ro'c. Lojtis Jacoob, betzhuin Jesucrist bahuiä. <sup>20</sup> Rniliä nez lo Dios, dina guiniä didx-xhii, rediidx ni cacuaä najc guliipac.

<sup>21</sup> Dxejcti hua'a reguejdx xten Siria näjza Cilicia. <sup>22</sup> Resa'nu ni yu' nen xquidoo Crist guideb nez reguedx Judea, direni gumbee narä. <sup>23</sup> Riejntis diajgrenti: "Bejn nani basacsiduxh nuure agujc xchej, abejnga caguluini xcuent lagajc xcälrililajz nani galoo rlajzni nunitlojni." <sup>24</sup> Dxejc rliä'preni xpala'n Dios sa'csi huillilazäza xtiidxni.

## 2

*Bidxaag Pabl loj reapost*

<sup>1</sup> Che agudejd tzudaj ijz, dxejcru hua'a guedx Jerusalén con Bernabé, näjza Tito huinänu. <sup>2</sup> Gunii Dios loä, gunibeeni cha'a ro'c te gusule'ä xho huillilajz rebejn ni di gac xpejn Israel xtidx xcuent Jesucrist ni ruslaa lo dojl. Niluxh lojtis reni rnibee guidoo basule'ä diidx, te di xlia'si benä dzuun, o te di xlia'si gunäru dzuun. <sup>3</sup> Sanää Tito, te bejn griegw ni di gac xpejn Israel. Nicla lojni direni näjb chuni bee si'c caj lo leii xten Moisés. <sup>4</sup> Niluxh gaii bejn ni rujnsi si'cni najczeni sa'nu, bidxaagreni loonu te gula'tzreni xho rajnu Dios. Rdx'e'chreni sa'csi nuunu, rexpejn Jesucrist, dinu jienru si'c ni bejn retoxtadgoldoону. Laareni rlajzreni guxhiidreni nurnu, rlajzreni gusoobnu rextiidxreni. <sup>5</sup> Dipacnu nicäjb nucuadajgnu xtiidxreni, sa'csi rlaaznu chanuu chalilajztu xtidx Jesucrist nani ruslaa bejn lo dojl.

<sup>6</sup> Niluxh reni sajc, nalajznu reni rnibee reben guidoo ro'c, xhet te didxcoobdi guniireni loä. (Luxh par narä xhet najc di mase bejsajczeni, sa'csi Dios runtebloj guiraa bejn.) <sup>7</sup> Luxh bahuiireni abaniidx Dios xtidx Jesucrist loä, luxh rusule'äni loj rebenzajt te guibicaj xtojreni, sigajcni rusule' Pedr xtidx Jesucrist loj rexpen Israel nani rujnpac si'c ni caj lo

leii. <sup>8</sup> Lagajc Dios nani badeed bejn Pedr dzuun xte apost loj rexpejn Israel, lagajcza Diosre baniidx gunä dzuun, te gacä apost loj rebenzijt nani di gac xpejn Israel.

<sup>9</sup> Ni'cni Jacob, Pedr, näjza Juan nani najc beñroru nen guidoo xten Jesucrist, gucbeereni laa Dios ni cayacnä j narä. Dxejc baniidxreni naareni loä näj lo Bernabé si'c te seen rbalajzreni, te chonnu guiro'pnu loj rebenzijt. Niluxh laareni chanuureni gusule'reni loj rexpejn Israel. <sup>10</sup> Gunabtisreni loonu gacnäjnu rebejn ni xhet rajpdi, luxh ni'cza rlazä gunä.

*Pabl gudilnä j Pedr lo guedx Antioquia*

<sup>11</sup> Che biääd Pedr lo guedx Antioquia, gudilnääni, sa'csi abejjni dojl xhet laadi cayujnni. <sup>12</sup> Galoo gudaunäjni rebenzijt, luxh che bidzujn gaii xpejn Israel ni baxha j Jacob, dxejcti gubicajni lo rebenzijt, diruni niaunäjreni sa'csi bidxejbni rexpejn Israel ni ru' bee ni bidzujn ro'c. <sup>13</sup> Dxejcti sigajcza bejn guiraa rexpejn Israel ni nadxaag Pedr, gujcreni sigajc Pedr, runtio'p lajzreni, naareni gusguereeni. Näjli Bernabé bejn si'c. <sup>14</sup> Luxh che bahuiä direni gun si'cpacni najc xtidx Jesucrist, dxejc räpä loj Pedr nez loj guiraa reben guidoo: "Palga luj najclu te xpejn Israel, luxh nabajnlü si'c rebenzijt ni digac xpejn Israel, xhet si'cdi ni caj loj leii, ¿xhicuent rlazlu guinibeelu guibajñ rebenzijt si'c rexpejn Israel nani rusooob xleii to Moisés?"

*Nungäj l chalilajz rexpejn Israel, sigajc guiraa bejn, te guibicaj xtojñreni*

<sup>15</sup> Nuure najcnu rexpejn Israel cheni gojllinu; dinu gac beñdojl si'c najc rebenzijt. <sup>16</sup> Anadonnu rut chu tejtü bejn sajç guibicaj xtojñni che gunni si'cni caj lo leii, sa'csi nanab chalilajznu xtidx Jesucrist. Ni'cni biolilaaznu xtidx Jesucrist te jia xtojñnu sa'csi rililajznu, xhet sa'csi riennu si'cni caj loj leii. Di gacdi jia xtojñ bejn xcuent yälrusoob xleii to Moisés.

<sup>17</sup> Palga la j ni rlaznu jia xtojñnu xcuent xcälirilajz xtidx Jesucrist, ruhuiinu cayenrunu dojl, la sajç guiniinu: Jesucrist ruluü rienrunu dojl, ¿ä? ¿Xho gacni si'c! <sup>18</sup> Palga rlazä guncsä redzuun nani abaro'nä, lagajc narä rapä dojl nacä beñ dojl. <sup>19</sup> Niluxh xcuent leii, anacä si'c bengut: digacdiru guinibee leii narä sa'csi naj nabanä lo xhez Dios. Luxh lagajc leii bejn nacä si'c bengut che gucbeä di gacdi gusobä guiraa ni caj lo leiiga. <sup>20</sup> Najcni si'cni gutnää Crist lo crujz. Naj xhet narädi ni nabanä, laa Crist ni nabajñ nen lastoä. Yälñabajñ ni nabanä naj lo guedxliujre nabanä sa'csi rililazä xtidx Xi'n Dios nani rinälajz narä luxh gujnti te gudijxni xtolä. <sup>21</sup> Dina cuälazä xcälirulaslajz Dios. Paru sajç gudzucaj leii xtojñ bejn te gacreni beñnaya nez loj Dios, dxejc xlia'si gujt Jesucrist.

### 3

*Yälirilajz rusia dojl*

<sup>1</sup> ¿Chipsa nayäälteu beñ Galacia! ¿Chu bascäjyru te di cuadijgtu xtidx Jesucrist? Ni nez lojpactu bisule'nu diidx xho cuaj Jesucrist lo crujz. <sup>2</sup> Tejtis diidx rlazä guiniitu loä. ¿La cua'tu Sprit Dxan xten Dios sa'csi bejntu si'cni caj lo leii, ä? o ¿la sa'csi huililajztu diidx ni biejn diajgtu? <sup>3</sup> Chipsa nayäälteu. Acua'tu Sprit Dxan xten Dios dxejcti naj rlazjtu guntu ni riajbtis yejctu guntu. <sup>4</sup> ¿La xlia'si gudejdtu trabajw? Chugan la gulli xlia'sini. <sup>5</sup> Che runiidx Dios Sprit Dxan xtenni lojtu, che rujnni milaagwr nez lojtu, ¿xho rujnnini? Dini gunni sa'csi rujntu si'cni caj lo leii, rujnnini sa'csi rililajztu xtiidxni ni riejn diajgtu.

<sup>6</sup> Huililajz toxtadgdoonu Abram xtidx Dios, ni'cni cua' Diosni si'c te bejn nani naya lastooni. <sup>7</sup> Ni'cni colyacbee dee: renani rililajz xtiidx Dios najc xi'n to Abram. <sup>8</sup> Galooli najn Dios xcuent yälirilajz susia Dios lastoo rebenzijt, ni'c räjpni lo Abram: "Guiralii reben guedxliuj sacle' xcuentlu." Diidxre cuaj lo guijtç ni gujç galooli, cadro caj xtidx Dios. <sup>9</sup> Ni'cni reni rililajz naj agucnä j Diosreni sigajc gucnäjni to Abram nani huililajz.

<sup>10</sup> Guiraa reni rlazj guibajñreni gunreni si'cni caj lo leii, agubibdereni sa'csi scree caj lo leii: "Guiraa reni digunpac si'cni caj lo reguijtz xten leii, sucuibdereni." <sup>11</sup> Niluxh huenliisi rien rut nayadi nez loj Dios xcuent leii, sa'csi dee najc xtidx Dios: palga rililajz te bejn xtidx Dios, najcni te bennaya nez lo Dios, nabannäjni Dios xcuent xcälirililajzni. <sup>12</sup> Leii dini naa chalilajz bejn te xca'ni yälñabajñ. Scree caj lo leii: "Nani gunpac si'cni caj loj reguijtz xten leii, ni'c nanab guibajñ lojpac leiiga."

<sup>13</sup> Jesucrist badzucaj nuure loj yälribbe xten leii. Laani gubibdeni xcuentnu sa'csi xtidx Dios naj: "Anabibde te bejn ni najl loj te yajç." <sup>14</sup> Scree gusajc Jesucrist te gusojb diidx ni räjp Dios loj to Abram, sacnä jni guiraa rebenzijt; näjza te guiraanu ni chalilajznu xtidx Jesucrist xca'nu Sprit Dxan xten Dios.

*Leii nä j diidx ni bia'n Dios loj to Abram*

<sup>15</sup> Betzä, naj gusä'tä te diidx xcuent beñ guedxliuj. Cheni rujñ bejn te guijtç te jia'n diidx lo stee bejn, mase bejntis najceni, che abacuaani lajni lo guijtçga, rut sajcdi gudzucaj guijtçga. Rutza sajcdi gucuaru diidx lojni che anajcni. <sup>16</sup> Luxh anajnnu badeed Dios xtiidxni loj to Abram näjza loj xagdooni. Dini ninii "rexagdooni" si'c loj xhidajlreni, guiniini

lo tejtis xagdooni, luxh laani najc Jesucrist. <sup>17</sup> Diidx ni rlazá guiniá najc scree: Diidx nani bia'npac Dios loj toAbram gunii Diosni che cayáádx tajp gayuu galbitzúu ijz gudeedni leii lo Moisés te laani gudeednini loj rexpejn Israel. Niluxh di leiiga nuchaa diidx ni bia'n Dios loj toAbram, la'tis sajcní. <sup>18</sup> Paru naquuin leii te xca' bejn erens, dxejc xhet erensdi cua' Abram lo Dios. Niluxh basa'n Dios erens lojpac Abram sa'csi bia'nni diidx lojni galooli.

<sup>19</sup> ¿Xhicuent badeed Dios leii loj Moisés? Badeed Dios leii sa'csi benduxh rexpejn Israel dojl, te gacbeereni xho najc xtojlréni, la'l ni jáád nani najc xagdoo toAbram. Sa'csi bia'n Dios diidx con laani sigajc con toAbram. Rexangl Dios badeed leii loj toMoisés, te laani gujc si'c te bejn ni rusiájl diidx. <sup>20</sup> Te ni rusiájl diidx xhet par tejtis bejndi najcni, niluxh Dios tejtis najc.

#### *Xcuent leii*

<sup>21</sup> ¿La garena najc xleii Moisés lo diidx ni basa'n Dios loj toAbram, á? ¿Xho gacni si'c! Paru nica'nu te leii ni rajc rudeed yálnabajn, dxejc sii xcuent leiiga nica' bejn yálnabannaya. <sup>22</sup> Niluxh loj reguijtz xten Dios caj diidx ni rnií: Guiraa bejn niáuu neñ dojl, te reni chalilajz xtidx Dios si'c huililajz toAbram, reni'c xca' xcárlirilajz diidx xcuent Jesucrist si'cni bia'n Dios diidx loj toAbram.

<sup>23</sup> Che gajd xcárlirilajz xcuent Jesucrist jáád, dxejc basáuu leii nuure neñ dojl, cabájtisnu guiricaj xcárlirilajz xcuent xtidx Dios. <sup>24</sup> Ni'cni anajc leii si'c xmastrnu te guluuini nuure nezujy nez lo Dad Jesucrist te gusiani xtojlnu con yárlirilajz xtiidxni. <sup>25</sup> Niluxh naj sa'csi arajjnu yárlirilajz xcuent xtiidxni, dirunu guiquuin te mastr, nalajznu leii.

<sup>26</sup> Guiraatu najctu xi'n Dios xcuent yárlirilajz xtidx Jesucrist, <sup>27</sup> sa'csi guiraatu ni gurob-nistu loj xtidx Jesucrist, najctu rexpejn Jesucrist. <sup>28</sup> Naj rituru rexpen Israel niclaza rebenzajt, niclaza mos, niclaza bejntis, niclaza niguii, niclaza gunaa, sa'csi guiraanu najcnu tebloj nez lo Jesucrist. <sup>29</sup> Palga najcnu xpejn Jesucrist, dxejc guliipac najcnu xi'n toAbram, dxejc sica'nu yálnasa'c ni abia'n diidx gudeed Dios loj Abram.

## 4

<sup>1</sup> Mbaj naj. Nani xca' yálnasa'c, che najcni biuux, najcni sigajc te mos, mase xtenni gac guiraa xhixten xtdadni. <sup>2</sup> Yu' chu te bejn ruhuiini, yu'za chu rnibee xhixtenni cheni agurooblini, cheni guidzujn dxej xca'ni ni gudeed xtdadni. <sup>3</sup> Sigajcza nuure che gacnu si'c biuux guyu'nu gacnu mos loj releií, rnibeeni xhini'c digacdi jiennu lo guedxliuj. <sup>4</sup> Niluxh che bisa' dxej ni basoob Dios, baxha'l Dios Xi'npacni. Xi'n te gunaa gojlni, loj rexpejn Israelza biádjiajlni, basoobni leii xten toMoisés. <sup>5</sup> Si'c gujc te xcasacni reni rusoobpac leii, te xca'ni nuure gacnu si'c te xpsiájbni.

<sup>6</sup> Luxh sa'csi anajctu xi'nni, ni'c baxha'l Dios Sprit xten Xi'nni te cuáázni neñ lastoonu. Laani rniini lo Dios xcuentnu: "Guejblu, Xtdadnu." <sup>7</sup> Ni'c dirunu gac mos, sa'csi anajcnu xi'nni. Luxh palga najcnu xi'nni, suniidxza Dios yálnasa'c loonu xcuent Dad Jesucrist.

#### *Rulijdxni na'c gacsac bejn mos*

<sup>8</sup> Che gajdtu gumbee Dios najctu mos xten rebanájb ni rajntu si'c Dios luxh dipacreni gac Dios. <sup>9</sup> Luxh naj anumbeetu Dios o naj anumbee Dios la'tu, xho chachusactu loj redzuun ni guyu'tu galoo che gujctu mos xten rebanájb. <sup>10</sup> Cayutistu redxej, rebáii, retiemp, reijz. <sup>11</sup> Naj rdxebá andi xlia'si gudedá trabajw baluiátu.

<sup>12</sup> Rniabduxhá lojtu betzá, colyajc si'c nará, sa'csi nará ahuuilazá xtidx Jesucrist sigajc la'tu. Xhetza xhi dzunguijdxdi bejntu loá che guyu'á lojtu. <sup>13</sup> La'tu anajntu galoo che basule'á diidx xcuent Jesucrist lojtu, benáni sa'csi racxhuu tiexhá. <sup>14</sup> Dizatu nuze' niclaza nibálajztu nará xcuent yárlracxhuu ni rajc tiexhá, alga si'c te xangl Dios, si'c lagajc Jesucrist cua'tu nará. <sup>15</sup> ¿Con yárlbalajz xtentu ni gojptu dxejc? Niluxh rniá lojtu, paru niajc nibáátu balojtu, nuniidxtuni loá dxejc, si'c niujntu. <sup>16</sup> Naj ¿la rdxe'chtu loá sa'csi caniá didxlii lojtu, á?

<sup>17</sup> Naj yu' gaii bejn nani rujnsi si'cni sanáreni leii rujnsireni si'cni rinálajzreni la'tu. Niluxh rrlajzreni gudzucajreni la'tu te gusaantu xtidxá, te chanajltu laareni, te jiutu xtiidxreni. <sup>18</sup> Laaca chanálajz bejn sa'ni, niluxh na'c gusgeeni, na'cza che suganáási la'tu chanálajztu nará. <sup>19</sup> Rexi'ná, xcuent la'tu cadedá trabajwduxh si'c te gunaa ni rajl xpázni, luxh sinuu sidedá trabajw cheni arbájpacni Jesucrist neñ lastootu. <sup>20</sup> Maláii gac jáälá lojtu lagajc naj te gac guiniá xhi stee diidx. Niluxh najc zijt yu'á, dina gacbeá xhi xhigab guná xcuenttu.

#### *Diidx xcuent Agar naj Sara*

<sup>21</sup> Colguinií loá, la'tu ni rrlajz gun si'cni caj lo leii, ¿la ditu gacbee, la di diajgtu jiejn xhini'c caj lo leii, á? <sup>22</sup> ¿Coljiejn! Scree caj loj leii: guyu' tio'p xi'n toAbram. Tejni najc xi'n gunaa ni najc xmos Sara. Steeni najc xi'n cháálpacni. <sup>23</sup> Niluxh xi'n xmosni gojl sa'csi lagajc laani bejnni xhigab si'c chu xi'nni. Luxh xi'n cháálpacni gojl sa'csi si'c bia'n Dios diidx loj Abram. <sup>24</sup> Diidx xcuent regunaare najc si'c diidx ni ruluii. Regunaare najc si'c tio'p diidx ni bia'n

Dios. Agar najc mos, mosga najc si'c diidx ni bia'n Dios con Moisés lo dan Sinaí. Rexi'n mosga guyu' te gacreni mos lo leii. <sup>25</sup> Agar najc si'c dan Sinaí nez lo reguejdx xten Arabia. Luxh guedx Jerusalén najc si'c dan Sinaí, sa'csi naj ro'c najc cadre re' rexpex Israel con rexi'nreni, sanäreni leii. <sup>26</sup> Niluxh di guedx Jerusalén ni yu' guibaa gac si'c mos, luxh nuurnu najcnu xi'nni. <sup>27</sup> Scree caj loj xtidx Dios:

Bibalajz, luj gunaa ni gajd xi'nlu chu, guredxa', bibalajz,

luj ni gajdlu ted trabajw ni rdejđ gunaa che rajl xi'nni.

Sa'csi su'ru xi'n gunaa nani gulälajz cháälñi quela xi'n gunaa ni gudiesnäj cháäl stee gunaaga.

<sup>28</sup> Mbjaj naj, rebetzä, nuure, sigajc Isaac, najcnu xi'n toAbram nani chu si'cni bia'n Dios diidx loj toAbram. <sup>29</sup> Che gojl xi'n gunaa ni najc mos, ni gojl sa'csi lagajc laani bejn xhigabga, bidxagdijlñi xi'n cháälpac Abram nani gojl xcuent diidx ni bia'n Dios loj Abram. Sigajcza najcni naj. <sup>30</sup> ¿Xhi caj lo reguijtz? "Barilaagw gunamos näj xi'nni, te di xca' xi'n gunamos yälñasa'c xtenlu si'c ni xca' xi'n gunaa nani najc cháälpaclu." <sup>31</sup> Naj nuure, betzä, dinu gac si'c xi'n gunamos te chunu lo leii. Nuurnu najcnu si'c xi'n gunaa nani najc cháälpac toAbram.

## 5

### *Colguzutijp lajztu lo yälirilajz xtidx Dios*

<sup>1</sup> Colgusutijp lajztu lo xtidx Dios nani baniidx Jesucrist loonu sa'csi guliipac gulää Jesucrist nuure ladzñaa leii, badzucajni xtojlnu che huililajznu xtiidxni, ni'cni na'cru gusiejch lajztu te gacsactu mos ladzñaa leii.

<sup>2</sup> Narä Pabl rniä lojtu, palga la'tu chutu bee si'cni caj lo leii, dxejc xlia'si chalilajztu xtidx Jesucrist. <sup>3</sup> Rniäza stehüält, guiraa bejn nani rlaizpac chu bee, nanab gunni si'cpac ni caj lo leii. <sup>4</sup> Palga rlaiztu guntu redzuun ni caj lo leii te guibicaj xtojltu, dxejc agubicajtu lo Jesucrist, agubicajzatu lo xcälracnäj Dios. <sup>5</sup> Niluxh nuure xcuentpac Sprit Dñan xten Dios rililajznu gudijx Jesucrist xtojlnu lo cruzj, cayenloonu jädsacni te guniidxni yälñansa'c par tejpas loonu. <sup>6</sup> Sa'csi loj reñi rililajz xtidx Jesucrist xhet sajcdi chu bejn bee, xhetza sajcdi na'c chu bejn bee, nani sajc najc chalilajz bejn xtidx Dios. Yälirilajzga rujn guibañsa'cnu te chonälajznu resa'nu.

<sup>7</sup> La'tu laaca sasajtu. ¿Chu badxojn gusoobtu xtiidxlii Dios? <sup>8</sup> Xhet Diosdi ni guletu badxojnditu. <sup>9</sup> Anajntu tudxe'nsi cobgulaj rusaguujni yätxtiil; si'c te cobgulajga najc te niguii ni caguluiitu xtidx leii. <sup>10</sup> Rialilazä xtidx Dad Jesucrist, ni'c nadiplazä la'tu; ananá ditu chalilajz stee diidx. Niluxh bejn ni cagusgueetu susacsi Diosni, chutis najcni.

<sup>11</sup> Narä rebetzä, paru narä caguluiä chutu bee, si'c ruluii rexpelj Israel, ¿xhi xcuent rusacsi rexpelj Israel narä? Paru si'c caguluiä, dirutu chalilajz gudijx Jesucrist xtojlnu lo cruzj. Luxh si'cpacza rlaizreni. <sup>12</sup> Rebejn nani cagusgueetu caniireni chutu bee, jmalaiiza gutiuugreni tejpas lagajc tiejxhreni!

<sup>13</sup> La'tu rebetzä, agurejdx Diostu loj xtiidxni te chalilajztu Jesucrist ni rusläa bejn lo dojl. Colhuixgaa na'c xca'tistu rediidxga dxejcti guntu si'ctis ni rlaiz tiejxhtu, si'ctis ni rlaizba yejctu. Colgacnäj sa'tu con yälrinälajz, tejni sigajc steeni. <sup>14</sup> Sa'csi guiraa diidx ni caj lo leii con tejtis diidxre rsiojbni: "Chanälajztu sa'tu sigajc rinälajztu lagajc la'tu." <sup>15</sup> Palga rdijltu, rauya'tu sa'tu, rajwtu sa'tu, jcolñatiro! Andi lagajc la'tu gunijttu sa'tu.

### *Nani rchagljaz rebejn näj yälñabajñ ni rudeed xtidx Dios*

<sup>16</sup> Rniä lojtu, colguibajn si'c ruluii xtidx Dios näjza Sprit Dñan xtenni, te si'c na'c guibajntu si'ctis ni rlaiz tiejxhtu, si'c ni najctis xhigabtu. <sup>17</sup> Sa'csi ni najc xhigab xten bejn rdxe'ch loj xhigab Sprit Dñan xten Dios. Sigajcza xhigab xten Dios dini gac tebloj con xhigab xte bejn. Rudxojntu loj sa'tu, ni'cni digacdi guntu dzuun ni rlaiztu guntu. <sup>18</sup> Luxh palga cagulijdx Sprit Dñan la'tu, dxejc dirutu quiquini guntu si'c ni caj lo leii.

<sup>19</sup> Guyasi jiembee bejn xhireni'c najc redzuun ni rujn rebejn nani di gumbee xtidx Dios. Dee najc redzuunga: yälrusguee cháäl bejn, yälrusguee cháäl sa'reni, yälrusguee sa'ni che ruchaag sa' te dxa'p con te bi'n loj redolgujdx, guiraa redolgujdx ni rujn niguii con gunaa, <sup>20</sup> yälrajñ rebanäj, yälbidxaa ni rujñ daan bejn, yälrdxechljaz loj sa'ni, yälrchagdijl sa'ni, yälñayedx lo sa'ni, yälrdxecha', yälriu lagajctis laani, yälrlia' lo sa'ni, yälrchaag lo te cuaa bejn. Najza sa' dzunguijdxre rujñreni: <sup>21</sup> yälrdxe'ch laiz, yälrgu't sa'ni, yälrsiojz, yälrauxha't, näjza guiraa dojl sa' reede. Sigajc ni balidxä la'tu xhi dxejga rulidxä la'tu naj. Nani rujñ sa' redojlre direni jiu' loj xcälñabee Dios xhaguibaa.

<sup>22</sup> Niluxh xtzuum Sprit Dñan xten Dios najc yälrinälajz sa'ni, yälrbalajz lastooni, yälrbexdi laizni, yälrbexdi laiz sa'ni, yälñajc beñsa'c lo chutis bejn, yälñagodzljaz, yälirilajz, <sup>23</sup> yälñadolajz, yälñabee lastooni lo ni rlaiz gun tiejxhni. Xheti te leii ni rudxojn gun bejn sa' redzuunre. <sup>24</sup> Niluxh renani ahuililajz xtidx Jesucrist, abatio'ñreni guiraa redolgujdx ni rlaiz gun

tiejxhreni. <sup>25</sup> Palga rbäjz Sprit Dxan neñ lastoonu, do'o guibajñ si'c rnibee Sprit Dxan guibajñnu.

<sup>26</sup> Na'c guiliä'pnu lagajc xpala'nnu, na'c guidxech lajznu lo sa'nu, na'c gunembiidnu sa'nu.

## 6

### *Colgacnäj sa'tu*

<sup>1</sup> Sa'ä, palga chu tejtü ni abiajb neñ dojl, lagajc la'tu nani aracheetu xtidx Dios colgulijdx bejnga, colgacnäjni te guiriini neñ dojl. Colñii lojni nadolajz, nasinlajztu lagajc la'tu didi che guidon nägajcza la'tu jiajbtu neñ dojl. <sup>2</sup> Colhuii xhi rquiin resa'tu, colgacnäjreni te si'c gusoobtu guiraa rediidx ni najc leii xten Jesucrist.

<sup>3</sup> Sa'csi nani rujn xhigab sacduxhni, yu'za chu najcni, niluxh rut najcdini, rusgueeni lagajcsi laani. <sup>4</sup> Tejgatu colcubee xho najc xtzuuntu te fiitu la laaca najcni, dxejcti sajç guiliä'ptu lagajc xpala'ntu. Dxejc ditu guiquiin chu stee bejn guiliä'p xpala'ntu. <sup>5</sup> Sa'csi teja bejn susule'ni diidx lo Dios xhini'c bejni.

<sup>6</sup> Nani casieed xtidx Dios nanab gacnäj bejn nani ruluini, gudeedni tudxe'n xhixtenni loj nani ruluini.

<sup>7</sup> Na'c gusgueelu lagajc luj. Dios digacdi guigueeni, ni'c guira'ti dzuun ni rujn bejn lagajcza ni'c xca' bejn. <sup>8</sup> Paru te bejn gun dzuun xcuenttis tiejxhni, dxejc che guidzujn dxej xca'ni yálnasa'c, sinitloj tiejxhni, dizani jiu' loj xcälrnibee Dios. Palga te bejn gun dzuun xcuent Sprit ni badeed Dios lojni, che gal yálnasa'c, sica'ni yálnabajn par tejpas. <sup>9</sup> Ni'cni na'c guidxajgnu jiennu dzunsa'c te che guidzujn dxej ni xca'ni yálnasa'c, xca'zanu te yálnasa'cro. <sup>10</sup> Ni'cni nanab lañ ni sajçni, gacnäjnu chutis bejn, ganiddoo resa'nu ni ahuililajz.

### *Yälrulijdx näjza xtixtios*

<sup>11</sup> Colhuilaa lacti reletrduxh cacuaä lojtu con ñaäpac. <sup>12</sup> Guiraa reni rdxaglazj gun ni rlaajtis tiejxhni, laa reni'c ni rlaiz chutu bee, tedi tedreni trabajw xcuent ni cuaj Jesucrist lo cruzj. <sup>13</sup> Lagajc reni ru' bee direni gun si'cni çaj lo leii, niluxh rlaizreni chutu bee te guibaa lajzreni sa'csi bejnreni gaan guyu' beega tiejxhtu. <sup>14</sup> Luxh narä dilazä guibaa lo sa' recosga; rbaatis lazä sa'csi gujt Jesucrist, cuajni lo cruzj, te gudijxni rextojlnu. Ni'cni par narä xhetru xhi cos-guijdxdi yu' lo guedxliujre, diruna guichaglazä gunä redolguijdx xten guedxliujre. <sup>15</sup> Che ahuililajz te bejn xtidx Jesucrist, xhetru sajçdi chu bejn bee, xhetza sajçdi na'c chu bejn bee. Nani sajçtis najc gacni si'c te beñcoob lo xtidx Jesucrist. <sup>16</sup> Guiraa renani nabajn si'cni ruluini xtidx Jesucrist sibedxi lajzreni xcälruulaslazj Dios. Näjza rexpex Israel nani ahuililajz xtidx Jesucrist sibedxi lajzreni.

<sup>17</sup> Na'cru guche'chtu narä sa'csi redib ni yu' tiexhä najc si'c te seen narä anacä te xmos Jesucrist.

<sup>18</sup> Rebetzä, gacnäj Dad Jesucrist guiragajctu con Sprit Dxan xtenni. Sugacni si'c.

## Te Guijtz Lo Reben Efesios

*Bacuaa Pabl lo reben guidoo nen guedx Éfeso*

<sup>1</sup> Narä, Pabl, nacä apost xten Jesucrist sa'csi si'c rlanjz Dios. Cacuaä guijtzre loj rebejn nani huililajz xtiidxni, loj reni rujn si'c pac rniini nen guedx Éfeso. <sup>2</sup> Xca'tu yälracnäj, yälrbexdi lajz xten Xtradn Dios, näjza xten Dad Jesucrist.

*Rusule' Pabl xtidz Jesucrist*

<sup>3</sup> Rliä'pnu xpala'n Dios, Dad näj Xtrad Jesucrist. Dios racnäj nuure, xcuent Crist runiidxni guiraa reyälracnäj xca' lastoonu, astoo yu'lanu xhaguibaa. <sup>4</sup> Laani gule nuure, che gajdli guirixtiej guedxliujre, te gacnu xpejnni, te guibanayanu nez lojni con yälrinälajz. <sup>5</sup> Sigajcza anungäj xca'ni nuure te gacnu si'c xi'npacni sa'csi abiaäd Jesucrist te guslaani nuure nen dojl, si'c ni gunibee Dios sa'csi balaslajzni nuure. <sup>6</sup> Gucnäj Dios nuure te guiliä'pnu xpala'n Dios, sa'csi lagajc laani acua'ni nuure, abejnni nuure tejsi con xi'nni ni sanälajzni. <sup>7</sup> Laani baslaani nuure nen dojl xcuent xtiejnni, laani badzucajni xtojlnu xcuent xcälruslaslajzni <sup>8</sup> nani banidxduxhni loonu. Guideb yäl'najn, guideb xcäriejn <sup>9</sup> basule'ni loonu xhigab xhiga'tzni xcuent redzuun ni rlanjzni gunni, xhigabza ni bejnni galooli. <sup>10</sup> Luxh sidzujn dxej sisiojbpac xhigab ni bejn Dios. Che guidzujn dxejga sutojpdios guiraali, sudeedni guinibee Jesucrist guira'ti ni yu' xhaguibaa, sigajc recos ni yu' lo guedxliuj.

<sup>11</sup> Rajpnu te xcäl'nasa'c Jesucrist, sa'csi galooli bejn Dios xhigab guniidxni yäl'nasa'cga. Lagajc Dios benchee guira'ti ni yu', luxh rujn pacni nani abejnni xhigab najc laaca gunni <sup>12</sup> te guiliä'p bejn xpala'n xcäl'nibeeni xcuentnu, nani ganiddoo biolilaznu xtidz Jesucrist. <sup>13</sup> Näjza la'tu, che biejn diajgtu redidx guli, rediidx ni ruslaa bejn lo dojl, dxejc huililajztu xtidz Jesucrist, dxejc gujczatu tejsi con laani. Dxejc cua'tu Sprit Dxan xten Dios, ni'c najc si'c seen ahuililajztu, si'cni bia'n Dios diidx. <sup>14</sup> Baniidx Dios Sprit Dxan xtenni te cuääzni nen lastoonu, te ni'c najc seen xca'nu yäl'nasa'c nani guniidx Dios che abaluuxni xtzuunni, nalajznu guslaani guiraa rexejnni te guiliä'preni xpala'nni lo xcäl'nibeeni.

*Rniab Pabl gudeed Dios yäl'najn loj renani ahuililajz*

<sup>15</sup> Ni'cni näjza narä, sa'csi abiejn diagä xho rililajztu xtidz Dad Jesucrist näjza xho sanälajztu guiraa rexejn Jesucrist, <sup>16</sup> dina gusanä gudedä xquixtios lo Dios xcuent la'tu. Rnaduxh lazä la'tu che rniabä lo Dios. <sup>17</sup> Rniabä lo Xtios Dad Jesucrist, xtradni ni rnibee xhaguibaa, guniidxni lojtu te yäl'nanduxh, te yäl'rululoj recos xhiga'tz te gacbeduxhrutu xcuent Gueb Dios. <sup>18</sup> Rniabäza lo Dios jianij xcäriejntu te gacbeetu xhini'c najc speranz xten yäl'racrejdxtu lo xtiidxni, te gacbeetu lacti saru, lacti sajz yäl'nasa'c ni gudeed Dios lo Jesucrist näjza loj rexejnni, <sup>19</sup> te gacbeezatu lacti gurobduxh najc yäl'nibee nani rajpni nez loonu nani ahuililajz xtiidxni. Guiraa redee rului lacti nadip najc yäl'nibee xten Dios. <sup>20</sup> Lagajc yäl'nibeere bejn dzuun par Jesucrist. Con yäl'nibeere baspajn Dios Jesucrist lo rebejntu, te gurejni xladbee Dios cadro rnibeeni xhaguibaa. <sup>21</sup> Maazru sajcn lo chutis gubier, lo chutis yäl'nibee, lo xhitis yäl'nadip, lo chutis ni rnibee; maazru sajcn lo chutis nani abibee te guinibee, sigajc naj, sigajc nen redxer ni churu jääd. <sup>22</sup> Niluxh badeed Dios guira'tini ladznaa Jesucrist, laazani bejn bibee Jesucrist gunibeeni lo guiraa xhixten xquidooni. <sup>23</sup> Reben guidooore najc si'c tiejxh xten Jesucrist, luxh sigajc rudeed Dios guiralii loj Jesucrist, sigajcza rudeed Jesucrist guiralii loj rebejn ni najc xquidooni.

## 2

*Ruslaa Dios nurnu sa'csi rinälajzni nurnu*

<sup>1</sup> Laani baniidxni yäl'nabajn lojtu che najctu si'c bengut nez loj Dios sa'csi rujntu dojl. <sup>2</sup> Galoo gubajntu lo dojl, entis lo xnez guedxliujre guzajtu, biutu xtidz bendxab nani rnibee guedxliujre. Sprit xtenni rujn dzuun nen lastoo xexi'nni nani di gucuadijg xtidz Dios. <sup>3</sup> Luxh galoo, näj nuure nadxaagnu lojreni, biennu si'c ni rlanjz tiejxhnu. Dxejc biennu si'ctisni rlanjz tiejxhnu, si'ctisni bياج xhigabnu. Nungäj guidxe'ch Dios loonu, sigajc bidxe'chni loj guiraa reben guedxliuj. <sup>4</sup> Niluxh balaslajz Dios nuure. Con xcäl'sanälazduxhni huinälajzni nuure. <sup>5</sup> Mase anajcnu bengut lo dojl, laani baniidxni yäl'nabajn loonu. Rajpnu yäl'nabajnre con Jesucrist. Sa'csi balaslajzni nuure baslaani nuure nen dojl. <sup>6</sup> Baspansacni nuure con Jesucrist; sigajcza bejnni cuenäjnu Jesucrist xhaguibaa, <sup>7</sup> te nen redxer ni churu jääd, guluuloj lacti sajz xcäl'nasa'c xten yäl'rulaslajzni, ni'c sanälajzni nuure, najcni huenduxh loonu por Jesucrist. <sup>8</sup> Sa'csi rulaslajz Dios nuure, ni'c baslaani nuure nen dojl che huililajznu xtiidxni. Luxh et sa'csi yu' xhi biennu; dee najc nani banidx-xlia' Dios loonu. <sup>9</sup> Xhet xcuent xhi dzunsa'cdi ni biennu, te di chu tejtu gac nayedxlajzdi. <sup>10</sup> Dios najc

ni benchee nuure. Sigajcza con Jesucrist bejn ni gacnu bejn ni rujn dzunsa'c nani galooli agunibee Dios jienpacnu.

*Yälrbedxilajz ni rajpnu por Jesucrist*

<sup>11</sup> Ni'c colsnaj lajztu xho gujctu galoo. Ditu niaj rexpejn Israel. Rniireni la'tu 'benzjijt' sa'csi ditu chu bee si'c ru' rexpejn Israel. Sa'csi lagajc con naareni rusälreni bee. <sup>12</sup> Dxejc suga'tu ditu gumbee Jesucrist. Zijt yu'tu loj rexpejn Israel, najctu benzjijt. Nicla gumbeetu rediidx ni bia'n Dios loj rexpejn Israel. Ditu niunloj gusläa Dios la'tu lo dojl, dizatu niembee Gueb Dios lo guedxliujre. <sup>13</sup> Niluxh naj ayu'tu lo Jesucrist, la'tu ni guyu' zijt lo Dios galoo. Naj agubigtu lo Dios sa'csi abia xtojltu con xtiejn Jesucrist. <sup>14</sup> Jesucrist najc ni rbedcxi lajznu. Laani bejn gujc rexpejn Israel tejsi con rebenzjijt. Laani badzucajni redzuun xten leii te gujc rexpejn Israel tejsi con rebenzjijt. <sup>15</sup> Lagajc con tiejxh Jesucrist ni gojl lo cruiz banijtni redzuun xten leii nani bejn bidxe'ch rexpejn Israel lo rebenzjijt. Lagajc laani bejni bidxagsa'reni te gujcreni tejsi che huililajzreni xtiidxni, gujcreni te beñcoob. Dxejc guledcxini lajznireni. <sup>16</sup> Con yälgujt ni gujtni lo cruiz badzu'ni guiro'preni lo Dios te gujcreni tejsi. Si'c guläjz rdxechnäj sa'reni.

<sup>17</sup> Cajza lo guijtz rediidxre:

Biädäni te basule'ni xho ga'p rebejn yälrbedxi lajz rebejn ni suga' zijt lo Dios näjza reni suga' gajxh lo Dios.

<sup>18</sup> Laani bejn sajc jiu' guiro'p cuaa bejn lo Dios con tejsi xhigab, näjza tejsi Sprit. <sup>19</sup> Ni'cni dirutu gac benzjijt, bejn ni rut numbeedi. Anajctu tejsi con rexpejni, najczatu sa' rexpejn Dios. <sup>20</sup> La'tu najctu si'c te yuro. La'tu najctu si'c padeer xten yu'ga. Reapost näjza reprof'e't najc si'c cheni birixtiej yu'ga. Jesucrist najc si'c guiro ni gusu squiin yu'ga, guij ni sajcru, sa'csi Jesucrist rnibee. <sup>21</sup> Cayunsa'c Dios yu'ga, cayajc yu'ga con la'tu, caroobni te gacni xquidodxan Jesucrist. <sup>22</sup> Sigajcza la'tu näjza rexpejn Israel ni huililajz najctu tejsi con Jesucrist. Cagustioobtu guidooga te neñni cuääz Sprit Dxan xten Dios.

### 3

*Pabl nungäj l chanä xtidx Dios lo rebenzjijt*

<sup>1</sup> Ni'cni yu'ä neñ latzguuib, narä, Pabl sa'csi cagusule'ä Jesucrist, te jiädnää xtiidxni lojtu, najctu benzjijt. <sup>2</sup> Pet abiejn diajgtu lacti hueen najc Dios baniidxni dzuunre loä, jiädnää xtiidxni lojtu. <sup>3</sup> Dios baluiini xhigab-xhiga'tzni loä (si'cni bacuaä lojtu galoo). <sup>4</sup> Che gojtu guijtza, sacbeetu cati ananä rexhigabxhiga'tz xten Jesucrist. <sup>5</sup> Xhigab-xhiga'tzre di bejn niembee galoo, niluxh naj Sprit Dxan xten Dios abaluiinini loj reapost näjza loj reprof'e't. <sup>6</sup> Dee najc xhigab-xhiga'tzga: por rediidx xcuent Jesucrist ni rusläa bejn neñ dojl rujn Dios gac reni najc benzjijt tejsi con reni najc xpejn Israel, guidxaag sa'reni, gacreni tejsi bejn. Guiro'preni xca' yäl'nasa'c si'c bia'n Dios diidx.

<sup>7</sup> Narä nacä te apost xten dzuun ni baniidxni, por xcäl'rulasajz Dios ni cuaxlia'ä. Dios baniidx dzuunre loä con xcäl'rnibeduxhni. <sup>8</sup> Luxh masä guxiiru sacä lo guiraa rexpejni, loä baniidxni xcäl'racnäjni te lo rebenzjijt gusule'ä xtiidxni, nalajznu redidxcoob xcuent xcäl'nasa'c Jesucrist, <sup>9</sup> te gusule'ä lo guiraa bejn rexhigabxhiga'tz nani bacua'tz Dios lojnu galooli. Dios benchee guiralii ni yu'. <sup>10</sup> Si'c gujct te najjien guiralii yäl'nanduxh xten Dios. Reni najc xpejnpacni neñ xquidooni guluui yäl'najnre lo rexangl Dios, loj reni rnibee xhaguibaa. <sup>11</sup> Galooli bejn Dios xhigabre par tejpas, ni'cni biädä xtdadnu Jesucrist te guzojb xhigab ni bejn Dios. <sup>12</sup> Con Jesucrist dinu guidxexb guibignu, guiniabnu lo Dios sa'csi ahuililajznu xtiidxni. <sup>13</sup> Na'c gac-huin lajztu sa'csi cadedä trabajw xcuenttu. Colguibalajz; dee najc xcäl'nasa'ctu.

*Xcäl'sanälajz Jesucrist*

<sup>14</sup> Ni'cni ruzuxhibä nez loj Xtdad Dad Jesucrist <sup>15</sup> nani badeed lajni lo guiraa reni yu' xhaguibaa näjza reni yu' lo guedxliuj, <sup>16</sup> rniabä loj Dad xhaguibaa gutijni lastootu con yäl'rnibee xcuent Sprit Dxan xtenni, sa'csi yuduxh xcäl'nasa'cni lo xcäl'rdimbicha'ni xhaguibaa. <sup>17</sup> Rniabäza lo Dios te jiädälajz Jesucrist neñ lastootu sa'csi ahuililajztu. Te che agusudzu'tztu, agusutijptu lo yäl'rinälajz <sup>18</sup> dxejc sajc gacheetu sigajc guiraa rexpejnpacni lacti gulajg, lactiza siool, lacti jäät, lactiza jaa najc yäl'sanälajz xten Jesucrist. <sup>19</sup> Te gumbeezatu xcäl'sanälajz Jesucrist ni najc gurobduxtej, digacdi guichalonuni. Te chaza lastootu, näjza xcäriejntu con guiraa rexcäl'nasa'c Dios.

<sup>20</sup> Dios rnibeduxh. Sajc gunidxduxhruni loj xhitis ni rniabnu lojni, loj recos ni riennu xhigab. Con Sprit Dxan ni rujn dzuun neñ lastoonu suniidxni reyäl'nasa'c. <sup>21</sup> Loj Diosre coldeed xquixtios. Colguiliä'p xpala'nini neñ guidoo xcuent Dad Jesucrist guira dxej, par tejpas. Sugacni si'c.

## 4

*Por Sprit Dxan nadxaag sa'nu*

<sup>1</sup> Narä yu'ä lojtis Jesucrist te rsule'ätis xtiidxni. Ni'cni rniabä lojtu, guibajntu si'cni nungäj, si'cni bejnzatu xhigab cheni gurejdxni la'tu. <sup>2</sup> Colguibajn con yälmalasajz, näjza yälmalolajz, colcuedcxi lajztu. Colyujn huant resa'tu con yälmalälajz sa'ni. <sup>3</sup> Colhuii te guidxaag sa'tu gactu tejsi con Sprit Dxan ni ruscuedcxilajztu. <sup>4</sup> Si'c tejsi tiejxh najcnu loj Jesucrist, tejsiza najc xhigabnu con laani, tejsiza najc yälrunloj ni rajptu xcuent diidx nani gurejdxtu. <sup>5</sup> Rajptu tejsi Dad, tejsi yälmalälajz, tejsi yälmalrobnis, <sup>6</sup> tejsi Dios, tejsi Xtaad guiraanu nani rniabee guira'ti lo guiraanu.

<sup>7</sup> Lo tejganu abaniidxni dzuun si'ctis bejn Jesucrist xhigab guniidxni lo tejganu. <sup>8</sup> Ni'cni caj lo reguijtz:

Che huä'pni xhaguibaa, cadro rnibeeni, abejjni gaan loj guiraa yälmalabee, dxejcti badeedni dzuun lo rexpejñi lo guedxliuj.

<sup>9</sup> Xhi säloj cadro caj, "huä'pni"? Dee säloj ganid biäjtni maazru jäät lo guedxliuj. <sup>10</sup> Lagajc nani biäjtgä, lagajc laani huä'pni jiaaru lo guiraa rexhaguibaa te sajz guinibeeni guibaa näjza guedxliuj. <sup>11</sup> Lagajc laani badeedni xtzuum tejgareni. Yu'reni badeedni gac apost, yu'reni badeedni gac profet, gaireni badeedni gusule' xho rusläa xtiidxni bejn lo dojl, sgaireni badeedni gac si'c ni ga'p reben guidoo, sgaireni badeedni guluii rexpejñi. <sup>12</sup> Guiraa redee badeedni te guluiireni rexpejñ Jesucrist, te gunreni dzuun te gustajlreni rebejn ni gac xquidoo Jesucrist. <sup>13</sup> Nungäj, gac dzuunre che guidzujñli dxej ni nadxaag-sa'nu guiraanu loj yälmalälajz, che guidzujñli dxej riembesa'cnu Xi'n Dios, dxejx anajcnu benguyajl lo xtiidxni, si'c te ni aguroob loj xcalmalabee Jesucrist. <sup>14</sup> Dirunu gac si'c rebiiux ni tera'tsi rusiejch lajzni, rucuaadijgreni xtidx chutis bejn, mase xhitis diidx ruluuini. Dxejx rijajbreni lo redidx-xhii xten bejn nani rusguee, nani cabäjztis gusguee bejn. <sup>15</sup> Maazru hueen chonuunu loj redidxlii xten Jesucrist con yälmalälajz te tioobnu lo guiraa recos xten nani rniabee, lagajc Jesucrist. <sup>16</sup> Loj Jesucrist nazdzu'tz guiraa rexpejñi, te si'cni nazdzu'tzsa'reni sääreni, najczeni tejsi loj tiejxh Jesucrist, racnä sa'reni segun xhi dzuun rujn tejgareni, casieedruren te cayajc xhidajlrü rebejnga con yälmalälajz.

*Te yälmalancoob con Jesucrist*

<sup>17</sup> Laa ni'cni rniä rniabäza con laj Dad Jesucrist na'cru guibajntu si'c nabajn rebejn nani di gumbee Dios. Laareni rujn si'ctis ni rijaj yejcreni. <sup>18</sup> Nayäl xcäriejñreni, direni ga'p xcalmalabajn Dios sa'csi nadduxh lastooreni. <sup>19</sup> Redee che gucnajd xcäriejñreni gusloj bejnreni guiralaj yälmalälajz, guiraa redojl ni di nungäj, gunreni. <sup>20</sup> Niluxh la'tu xhet si'c di bisieedtu loj Jesucrist. <sup>21</sup> Palga abiejn diajgtu xtiidxni, niluxh abaluuini lojtu didxlii ni siädnä Jesucrist, <sup>22</sup> colgusaan yälmalabanyujxh ni gojptu: Lo yälmalabanyujxhga rujn bejn si'ctis ni rlanjni. Dxejcti si'c runijtni la'tu lo Dios. <sup>23</sup> Colgusiejch lajztu, colgusia xcäriejntu, <sup>24</sup> te gactu bejcoob nani bejn Dios, colchanuu te yälmalabansa'c, te yälmalabanya xten xtidxliini.

<sup>25</sup> Colguuro'n diidx-xhii, colnii didxlii lo resa'tu sa'csi tejsi najcnu guiraanu.

<sup>26</sup> Che guidxe'chtu, na'c guntu dojl. Na'c gusaantu chu xcalrdxe'chtu guideb dxej che chääzli gubijdx. <sup>27</sup> Na'c gusaantu jiu' bejdxab nen lastootu.

<sup>28</sup> Nani rilajn, na'cru cuanni. Laaca gunni dzuun con ñaani te gunni te dzunsa'c nani gudeed meel lojni te gac gacnäjzani rebejn nani xhet rajpdi.

<sup>29</sup> Na'c gusaantu gurii nicla tej didxguijdx ro'tu. Colnii ganax didxsa'c te gacnäjni guisieed reni rucuaadijg xtiidxtu. <sup>30</sup> Na'c guntu gac-huin lajz Sprit Dxan xten Dios. Laani najc te seen xten Dios najctu xpejñ Dios, ni'c rbäjzni nen lastootu che guidzujñli dxej ni chäätu lo Dios.

<sup>31</sup> Colguuro'n yälmalabandxuudx xtentu, näj yälrdxe'ch, näj yälrdxagdijl sa'ni, näj yälrbexa', näj yälrgue. Colguibicaj lo guiraa redojlga, na'c gactu benguijdx. <sup>32</sup> Nungäj gactu huen loj resa'tu, colgulasajz resa'tu, colsiäj, lajztu con resa'tu ni rujn dojl lojtu si'c rsiäj, Dios lajzni rextoljtu xcuent Dad Jesucrist.

## 5

*Xho nanab guibajn rexi'n Dios*

<sup>1</sup> Colguibajn si'c nabajn Dios, sa'csi najctu xi'nni nani sanälajzni. <sup>2</sup> Colchasanäj yälmalälajz sigajcni huinälajz Jesucrist nuure cheni badeedni lagajc laani lo Dios, cuajni lo crujz, gujtni. Laani gujcn si'c gojn, gujczani yälrbibyaal ni bidxaglaiz Dios.

<sup>3</sup> Nicla gusa'ttu yälrusguee chäääl bejn, nicla redol dxuudx, niclaza yälmalälajz xhixtentisni. Nicla gusa'ttuni lo sa'tu, sa'csi xhet si'c di nungäj, gun bejn ni naban-naya. <sup>4</sup> Sigajcza colcuälaz diidx ni rujn xtuuj, näjza didxnajd, näjza didxnaj nani digac laaca. Colgudeedtis xquixtios lo Dios. <sup>5</sup> La'tu anajntu nicla tej ni rusguee chälbejn, nicla tej bejdxuudx, nicla tej ni sanälajz xhixtentisni, nicla renani rajñ rebanäj, nicla tej reni'c di xca' yälmasa'c loj



Jesucrist, dizareni jiu' lo xcäl'rnibee Jesucrist, xcäl'rnibee Dios. <sup>6</sup> Na'c gusaantu gusguee bejn la'tu con diidx ni xhet sajcdi sa'csi xcuent redzuunga riääd xcäl'rdxe'ch Dios loj rebejn ni di gusoob xtiidxni. <sup>7</sup> Na'c guntu sigajc rujnreni.

<sup>8</sup> Galoo nacäyjtis xcäriejntu gubajntu, luxh naj abasanij Jesucrist xcäriejntu. Colguibajn si'c nungäj'l guibajn nani abianij xcäriejnni. <sup>9</sup> Sa'csi nani abianij xcäriejnni rujn dzunsa'c, rniini didxgulii. <sup>10</sup> Colguisied xhini sa'c rhagljaz Dios. <sup>11</sup> Na'c guntu redzunduudx nani rujn reni nacäy xcäriejnreni, coltilnäj reni rujn sa' dzunguijdxga. <sup>12</sup> Sa'csi te xtujyli najc jieinu diidx xcuent xtzunreni ni runxhiga'tzreni. <sup>13</sup> Niluxh guiraa sa' redzuunre ni rdil'näjnu, huenliisi sien xhi najczeni, suzen'i lo xpianij Jesucrist. Sa'csi guira'ti ni ruzeñ najc nianij. <sup>14</sup> Ni'cni caj loj regujtz, räjp Dios: Gubajn, huistie luj ni rejslu. jHuistie lo dojl, luj ni naga'lu lo dojl si'c bengut, te gusanij Jesucrist xcäriejnlu!

<sup>15</sup> Colhuii, colsin, na'c guibajntu si'c te bejn nani di gacbee, colguibajn si'c bejn nani yu' xcäriejnni. <sup>16</sup> Coltedsa'c redxje sa'csi neñ redxje ganax cosguijdx rujn bejn. <sup>17</sup> Ni'cni na'c guibajntu si'c rebejn nani di gacbee, colvacnasiñ, te gacbeetu xhini'c najc ni rlajz Dad xhaguibaa guntu. <sup>18</sup> Lacuaa yätu nejp nani runijt bejn, colgapchee Sprit Dxan xten Dios neñ lastootu. <sup>19</sup> Colnii loj resa'tu rediidx nani gunii rebejn tiemp goolá'preni xpala'n Dios, colyelza redij xten Dios, con reyäl'rie'l colguiliä'p xpala'n Dios neñ lastootu. <sup>20</sup> Di jiäl' lajztu gudeedtu xquixtios lo Dios xtdadnu con laj Dad Jesucrist.

### *Xho guibannäj sa' rexejn Jesucrist*

<sup>21</sup> Sa'csi rajntu Jesucrist, colgusoob xtidx sa'tu. <sup>22</sup> Lojtu, regunaa ni abachnaa, rniä scree: Colgusoob xtidx chääl'tu si'c rusoobzatu xtidx Dad Jesucrist. <sup>23</sup> Sa'csi niguii rnibee gunaa si'cni rnibee Jesucrist xquidooi, niluxh laazani ruslaani rexejn guidooi lo redojl, najczeni si'c tiejxhni. <sup>24</sup> Ni'cni, sigajc rusoob reben guidooga nani rnibee Jesucrist gunreni, sigajcza nungäj'l gusoob regunaa ni abachnaa nani guinibeetis chääl'reni gunreni.

<sup>25</sup> Lojtu, reniguii ni abachnaa rniä scree: Colchanälajz chääl'tu sigajc ni huinälajz Jesucrist rexejn guidooi, badeedni lagajc tiejxhni loj Dios cheni cuajni lo cruzj por laareni <sup>26</sup> te basiani xtoj'l rexejn guidooi, te gujcreni te beñcoob, abidiib lastooreni con xtiidxni si'c rdiib te cos con nis <sup>27</sup> te che xca'ni rexejn guidooi, najczeni te guidoo ni sajcru, te guidoo nani xheti xtoj'lni, te guidoo nani sugadzu'tz, te guidoo xhet xhi riäädxdi, najcni te guidoya, xheti xhi xtoj'ldini. <sup>28</sup> Sigajcza, te niguii nani abachnaa nungäj'l chanälajz chääl'ni sigajc sanälajzni lagajc tiejxhni. Nani sanälajz chääl'ni sanälajz lagajc laani. <sup>29</sup> Ruti chu te bejn ni rbälaz tiejxhni; alga rajpni tiejxhni ruyaxni tiejxhni sigajc rajp Jesucrist rexejn guidooi. <sup>30</sup> Najczanu tejsi loj tiejxh Jesucrist, loj xpääl'ni, loj rextzujtni. <sup>31</sup> "Ni'cni che guchnaa te niguii rusa'nni xtdadni, xnanni, te xca'ni gunaa, te gac guiro'preni si'c tejsi bääl, si'c tejsi bejn." <sup>32</sup> Dee najc te diidx xhiga'tzduxh; li te "¿chuj?" najcni. Niluxh narä rniä xcuent Jesucrist con rexejn guidooi. <sup>33</sup> Niluxh nanabpac chanälajz teygatu chääl'tu sigajc sanälajztu tiejxhtu. Dxejcti gunaa ga'pzani xpala'n chääl'ni.

## 6

<sup>1</sup> Lojtu biuux, rniä scree: Colgucuaiajz xtidx Jesucrist, colgusoob xtidx xtdadu sa'csi ni'c sajz nez loj Dios. <sup>2</sup> Colga'p xpala'n xtdadu, xnantu, sa'csi ni'c najc didx galoo xten lei'i nani runiidx xhi xca'tu palga gusoobtu diidxga; <sup>3</sup> "Te saruduxh guibajntu xchero lo guedxliujre."

<sup>4</sup> La'tu, Dad ni najc guzajn, na'c guntu guidxe'ch rexi'ntu lojtu. Colguslaareni con yäl'naj, colgulijdxreni con xtidx Jesucrist.

<sup>5</sup> La'tu ni najc mos, colgusoob xtidx xlamtu lo guedxliujre, colcuadiajz xtiidxni, xhet xhi steedi xhigabdi guntu neñ lastootu. Colyejn xtzuunni si'cni najc xtzun Jesucrist. <sup>6</sup> Colyejn xtzuunni, niluxh xhet che suga'tsreni, cahuiireni, parsi jiansa'ctu lojreni. Maazru hueen guntu dzuun si'c xmos Jesucrist; colyejn guira'ti si'cni rujntu xtzunpactu; si'cni rlajz Dios. <sup>7</sup> Colyujn xtzuunni guideb lastootu si'c xmos Jesucrist, et si'cni xmos beñ guedxliuj. <sup>8</sup> Anajntu dzunsa'c ni gun teygatu, lagajcza xcuent ni'c xca'tu loj Dad Jesucrist, mase najctu mos o mase rutlojdi yu'tu.

<sup>9</sup> Lojtu, relam, rniä scree: Sigajcza colyujn lojreni. Colgusaan yäl'rusacsi, sa'csi anajntu yu' xlamtu xhaguibaa, luxh tebloj najc guiraa rebejn nez lojni.

### *Nani gacw rexejn Jesucrist lo guerr*

<sup>10</sup> Didx lult ni rniä, sa'ä, najc scree: Colsutijp lo xcäl'racnäj Jesucrist, colsudzu'tz lo xcäl'nadip xcäl'rnibeeni. <sup>11</sup> Colgajcw xhabguib xten Dios te gac sudzu'tzto lo reyäl'rusguee xten beñdxab. <sup>12</sup> Sa'csi xhet beñ guedxliujtis cadil'näjnu. Cadil'näjzanu reguxhtis xte yäl'cäjy, näjza reyäl'rnibee, rebejn nani rnibee loj reyäl'cäjy, näjza rexangl beñdxab nani

rnibee bej xten guedxliujre. <sup>13</sup> Ni'cni colca' guideb lad-guiib xten Dios nani runiidxni loonu te gac sudzu'tznu neñ dxej ni guideednu trabajwduxh, te che agudejdní, laltis sisiudzu'tznu. <sup>14</sup> Colsudzu'tz pues. Xque'tu colguliib sindoor-guiib ni najc xtidx Jesucrist, colgajcw gamangw-guiib ni najc rextzunsac xten Dios ni rujntu. <sup>15</sup> Colcuua gurach-guiib ni'tu (ni'c najc xtidx Jesucrist ni ruscuecdxi lajztu). <sup>16</sup> Colca' escud-guiib ni najc yálrililajz te con yálrililajz xtidx Dios di bendxab gun gaan gusguee la'tu con rextidx-xhiini. <sup>17</sup> Colca' yálruslaa xten Dios lo dojl si'c te xhumbrel-guiib chu yejctu; colca'za lans xten Sprit Dxa xten Dios ni najc xtidx Dios. <sup>18</sup> Colnab lo Dios guiraa dxej; colnab lojni con Sprit Dxa xtenni; colsusintis; na'c jieedtu guiniabtu lo Dios xcuent guiraa xpejní. <sup>19</sup> Colnabza lo Dios por narä te guiidx Dios diidx cheni gal guiniä, te na'c guidxebä guiniä che guluiä didx-xhiga'tz xten yálruslaa bejn lo dojl. <sup>20</sup> Xcuent rediidxga ni yu'ä neñ latzguiib, caduä con caden. Ni'cni colnab lo Dios te na'c guidxebä guiniä rediidxga si'cpacni säbyäjl guiniäni.

*Lult xtixtios*

<sup>21</sup> Niluxh te gacbeetu xho sasaj rextzunä, nägajcza xho yu'ä narä, Tíquico, sa'nu ni sanälajznu, ni runsa'cza xtzun Dad Jesucrist, siäd lojtu te gusule'ni diidx. <sup>22</sup> Laapacni ruxhalä lojtu, te gacbeetu xho yu'nu, te si'c guscuecdxini lajztu.

<sup>23</sup> Rniabä yálrbedxilajz par resa'nu, näjza yálrililajz con yálsanälajz xten Dios Xtdnu näjza xten Dad Jesucrist. <sup>24</sup> Gacnäj Dios guiraa reni di gusguee, reni sanälajzpac Dad Jesucrist. Sugacni si'c.

## Te Guijtz Lo Reben Filipos

*Latzguiib yu' Pabl bacuaani loj rebenguidoo xten guedx Filipos*

<sup>1</sup> Pabl nájza Timoteu, nani najc rexnos Jesucrist, rucuaanu guijtzre lo guiraa rexpejn Jesucrist nani rbájz guedx Filipos, loj rebejn nani ruluii xtidx Dios nen reguidoo nájza loj rediaconos. <sup>2</sup> Gacnáj Dios la'tu con yälrbedx-lajz xten Xtadnu nájza xten Dad Jesucrist.

*Rniab Pabl lo Dios xcuent rebejn nani rililajz*

<sup>3</sup> Che rnaj lazä la'tu, rudedä xquixtios lo Dios. <sup>4</sup> Che rniabä lo Dios, rbaa lazä rniabä lo Dios xcuent la'tu, <sup>5</sup> sa'csi abidxaag sa'nu lo xtidx Jesucrist che guslojli huililajzta hasta najli. <sup>6</sup> Anancheä Dios nani gusloj cayunsa'c dzuun nen lastootu, lagajc laani suluxsa'c dzuunga dxejli ni jiääd Jesucrist. <sup>7</sup> ¿Xhiru xhigab nungäjil gunä? Ni rapä la'tu nen lastoä sa'csi cayacnájtu narä nen latzguiib luxh rsiudzu'tzta riye'tzta lo bejn, guli najc rediidx nani rusule'ä xcuent Jesucrist nájza la'tu rusule'tu rediidxga. <sup>8</sup> Dios nanchee xho rbannäätu, xho sanälazä guiraatu lo xcäl'sanälajz Jesucrist. <sup>9</sup> Rniabä lo Dios te tioobru xcäl'rinälajzta náj xcäl'najntu nágajc churu xcäriejn guiraatu, <sup>10</sup> te cuetu nani najc dzunsa'c te si'c guiban nayatu, te na'c ga'ptu nicla tej dojl cheni jiääd Jesucrist. <sup>11</sup> Te guidxa lastootu yäl'nasa'c xten te yäl'nabansa'c ni runiidx Jesucrist, te guspaa lajzta Dios, guliä'ptu xpala'nni.

*Jesucrist najc xcäl'nabanä*

<sup>12</sup> Rlazä gacheetu betzä: guiraa nani gusacä ni'c cayacnáj guire'chru xtidx Jesucrist. <sup>13</sup> Ni'c guiraa rebejn, renani yu' jusgaad sigajc renani yu' garena lajt, anajnreni niäüä latzguiib xcuent Crist. <sup>14</sup> Xhidajlru resa'nu cheni gucbeereni yu'ä latzguiib, gusudzu'tzru lajzreni, direni nidxejb, guniirureni xtidx Dios.

<sup>15</sup> Guliica yu' reni rusule' xtidx Jesucrist sa'csi rdxe'ch lajzreni, rdxe'chzaren loä. Yu'za reni rusule' xtidx Jesucrist sa'csi laaca najc xhigabreni. <sup>16</sup> Yu'reni rusule' xtidx Jesucrist sa'csi rdxe'chreni, xhet sa'csi laaca najc xhigabreni, alga rujnreni xhigab gustioobruren trabajw nani tedä nen latzguiib. <sup>17</sup> Niluxh yu' reni rusule' rediidxga sa'csi sanälajzreni Jesucrist. Anajnreni yu'ä latzguiibre te gusule'äru guliipac najc xtidx Jesucrist. <sup>18</sup> Niluxh xhiru najcni? Palga rujnsireni laaca o palga guluipac laaca najc xhigabreni rusule'reni xtidx Crist; rbaa lazä sa'csi care'ch xtiidxni niluxh sibaaru lazä. <sup>19</sup> Ananä laaca guiriä loj guiraa recosre sa'csi canabtu lo Dios xcuentä. Luxh xcäl'racnäj Sprit xten Jesucrist <sup>20</sup> rujn runloä, rbäzäza dina jianxtuiä. Ni'cni dina guidxebä guiniä, si'cni runäpac, sigajcza runä naj te gac guiliä'pä xpala'n Jesucrist con tiexhä palga guibanä o palga guetä. <sup>21</sup> Sa'csi palga guibanä, su'ä lo Jesucrist; luxh palga guetä sunäru gaan. <sup>22</sup> Palga guibanäru lo guedxliujre, sajcrü gunä xtzuum Dad Jesucrist, ni'cni dina gacheä xhinc cueä xca'ä. <sup>23</sup> Nagajn najcni par narä cueä lo guiro'preni. Te lajt runä xhigab: malaii guetä te cha'a cadro yu' Jesucrist sa'csi ni'c najc huenuru par narä. <sup>24</sup> Niluxh stee lajt nancheä nungäjil guibanäru lo guedxliujre xcuent la'tu. <sup>25</sup> Niluxh narä racheäpac siannääru la'tu, su'äru lojtu te chanuurutu lo xtidx Jesucrist, te guibalajzta lo yäl'rililajz, <sup>26</sup> te guibalajzrutu xcuentä loj Jesucrist che guibisacä lojtu stehuält.

<sup>27</sup> Colhuiitis guibajntu si'cpac ni rni xtidx Jesucrist, te palga jiädhuiäto o palga ruti narä, jiejn diägä sugadzu'tzta, rujntu tejsi xhigab, nadxaag sa'tu rujntu tejsi dzuun con yäl'rililajz xten xtidx Jesucrist. <sup>28</sup> Na'c guidxejbdiu renani rdxe'ch lojtu. Laaren huenniisi rusen agunijtreni ni'c rdxe'chreni, ni'cni la'tu huenniisi rusen agulaatu nen dojl si'c baniidx Dios, ni'cni ditu guidxe'ch. <sup>29</sup> Sa'csi lojtu abaniidx Jesucrist chalalajzta xtiidxni. Niluxh xhet ni'ctis; nágajcza tedtu trabajw xcuent laani. <sup>30</sup> Cadejdta lagajc trabajw ni cahuiitu gudedä luxh naj riejn diajgtu cadedsicä trabajwga.

## 2

*Xcäl'nalasajz nájza xcäl'gurobduxh Jesucrist*

<sup>1</sup> ¿La ruspaa Jesucrist lajzta? ¿La racnäj xcäl'rinälajzta la'tu? ¿La yu' Sprit Dxan xtenni con la'tu? ¿La yu' xcäl'sanälajzni náj xcäl'rulasajzni lastootu? <sup>2</sup> Palga yu'ni, colguspaa lazä, colyejn tejsi xhigab con narä, colga'p lagajc yäl'sanälajzga, colguidxaag sa'tu, colyejn tejsi xhigab. <sup>3</sup> Na'c guntu nicla tej dzuun sa'csi cayutu lagajc la'tu, na'cza guntu dzuun te chä'p xpala'ntu. Colyejn xtzuumtu con yäl'nalasajz, colhuii loj sa'tu si'c benroru lojtu. <sup>4</sup> Na'c jiu chu tejtü lagajctis xhixtenni, coljiu tejtatu xhixten sa'ni.

<sup>5</sup> Colga'p lagajc sa' xhigab nani gojpa Jesucrist <sup>6</sup> nani mase najcni sigajc Dios, dini niniazdzu'tz xcäl'rnibee Dios, <sup>7</sup> alga basa'nni te laad yäl'rnibee nani rajpni con Xtadni Dios te gujnci mos cheni gojlni lo guedxliujre. Gujnci si'ctis te bejn. <sup>8</sup> Che gujnci si'ctis ben

guedxliuj, gujnci beŋ nadolajz, beŋ nasobdiidx. Basoobni xtidx Dios, gujtni lo cruzj, luxh yälrejt lo cruzj najc te yälrtuiduxh. <sup>9</sup> Ni'cni baspaŋsac Diosni, gule'cni Crist te lajt ni najc jjaarū, badeedza Dios sajcrū lajni lo laj guiraa relaj ni rusä't bejn. <sup>10</sup> Luxh che jiejn diajgreni laj Jesucrist, suzuxhijb guiraa reni yu' xhaguibaa, guiraa reni yu' lo guedxliuj, näjza guiraa reni yu' nez neŋ yuj. <sup>11</sup> Te guiraa reni gacbeepac, guiniizarenī: "Jesucrist najc Dad", te si'c chä'pduxh xpala'n Xtdnu Dios.

### *Rexpejn Jesucrist najc si'c bajl ni rusanij lo guedxliuj*

<sup>12</sup> Ni'cni, resa'ä ni sanälazä, sigajcni rusoohtu xtidxä cheni suganää la'tu, sigajcza colgusoob xtidxä naj ni yu'ä zijt, colhuui tejgatu xho gac laatu neŋ dojl, colyajc bejn ni rusooob diidx chē yälrdxejb. <sup>13</sup> Sa'csi Dios najc ni rujn dzuun neŋ lastootu te rajc rujntu xhigabsa'c, dxejc racnäzani la'tu te rajc rujntu si'cni rälrajni.

<sup>14</sup> Loj guira'ti ni rujntu, na'c gusmojmntu, na'cza gun tiop lajztu, <sup>15</sup> te rut gucuaquijditu, te gactu bejn ni ruchaag chutis bejn, gactu xi'n Dios, bejn nani xhet xtojldini yu' laj ni tre'tu loj rebenguijdx ni rujn redzundxuudx. Nez lojreni gactu si'c te bajl ni rdimbicha' si'c rebalxhaguibaa che nacäy, <sup>16</sup> sa'csi arapdzu'tztu xtidx yäl'nabajn ni runiidx Crist nen lastootu te guspaatu lazä dxejc cheni jiaäd Jesucrist, sa'csi xhet xlia'di gujc xtzunä, xhetza xlia'di cayunä dzuun naj. <sup>17</sup> Mase lagajc xtienä guixe' te guiza' te gojn ni xca' Dios xcuent xcälirililajztu, rbaa lazä, sibalaznääza la'tu. <sup>18</sup> Sigajcza colguibaa lajztu, colguibalaznäjä narä.

### *Timoteu con Epafrodito*

<sup>19</sup> Nez loj Dad Jesucrist cayunlöä guxhalgacä Timoteu lojtu te näjza narä guibaa lazä che agucebä xho yu'tu nejzga. <sup>20</sup> Sa'csi rutru rapädi nani rujn tejsi xhigab, tej ni guliipac gun dzuun, jiu pacni la'tu. <sup>21</sup> Guiraa rebejnre rujntis xtzuuncareni, direni jiu gunreni xtzuun Jesucrist. <sup>22</sup> Niluxh la'tu anajntu xho rujn Timoteu; si'c racnäjä te bi'n xtdadni, si'cza racnäjni narä lo xtidx Jesucrist. <sup>23</sup> Ni'cni rlazä guxhaläni te jiaädhuiini la'tu, fixgaäsi don xho sasaj xcuentä ree. <sup>24</sup> Cabäzäza nez lo Dad Jesucrist don la näjza narä sajll jiaädhuiigacätu.

<sup>25</sup> Niluxh rchaloä nanabpac guxhalä bejtznu Epafrodito ni najc sa'ä loj dzuun, loj retrabajw ni cadejdnu. Lagajc la'tu baxhaltuni te jiu ni narä, fiini xhini'c rquinä. <sup>26</sup> Laani rlazduxhni fiini lojtu, lacti cayu'ni yärsia' sa'csi gucbeetu gucxhuuni. <sup>27</sup> Guliica gucxhuuni cuentro, ameer niejtni, niluxh Dios balaslajzni laani, luxh xhet laatisni, balaslajzzani narä te di nidedäru loj yäl'nahuinlajz ni yu'ä ree. <sup>28</sup> Ni'cni rlazä guxhalgacäni te guibalajztu che fisactu lojni, näjza te na'cru gac-huinlazä xcuent la'tu. <sup>29</sup> Colca'ni con yäl'rbalajz si'c bejtztu lo xtidx Dios, sigajcza colyejn reni najc sigajc laani. <sup>30</sup> Xcuent xtzuun Jesucrist ameer niejtni, dini niu xcäl'nabajtisni te bejn ni redzuun nani di niajcdi niujntu lagajc la'tu xcuentä.

## 3

### *Te yäl'nabansa'c pac*

<sup>1</sup> Naj rebetzä, colguibalajz nez lo Dad Jesucrist. Xhet najcdi gucuasacä lagajc rediidx nani abacuaä lojtu, sa'csi sacnäjni la'tu. <sup>2</sup> Colnati renani najc si'c bä'cw. Colnatiza rebejn nani rujn dzun gujdx. Colnatiza reni ru' bee tiejxhtisreni luxh xlia'si rujnreni si'c. <sup>3</sup> Renani guliipac yu' bee najc nuure nani ahuililajz xtidx Dios, rienzanu xtzuunni si'cni rälrajni sa'csi ayu' Sprit Dxan xtenni neŋ lastoonu. Rbalaaznu sa'csi najcnu xpejn Dad Jesucrist, xhet xcuentdi redzuun ni rujn tiejxhnu. <sup>4</sup> Narä sajzca guibalazä xcuent ni rujn tiexhä. Palga yu' chu tej ni rbalajz, narä rbalazäru <sup>5</sup> sa'csi guyu'ä bee che guyu'ä xhujn gubijdx; narä nacä te rexpejn Israel; narä nacä tej rexpejn toBenjamín, nacä te hebreo, luxh xtdadä najc te beŋ hebreo; xcuent leii nacä te farisee. <sup>6</sup> Basobduxhä guiralii rextidx Dios ni caj lo leii ni'cni basacsiduxhä rexpex Jesucrist; xcuent yäl'nabansa'c xten leii, xhetliidi xtolä yu'; basobdzu'tzä xtidx leii. <sup>7</sup> Niluxh naj rediidx nani galoo benä xhigab sacduxh, naj xhet sajcdini sa'csi sanälazä Jesucrist. <sup>8</sup> Niluxh maazru runä: runä xhigab xhet sajcdi guiraa nani rapä, sa'csi maazru sacduxh yäl'riembee Jesucrist ni najc Dad xtenä. Xcuent Jesucrist gulälazä guira'ti, guira'ti najc si'c guixbiujy nez löä te gunä gaan Jesucrist, <sup>9</sup> te chu'ä lojni, xhet xcuentdi xcäl'nabansa'cä ni najc xcuent leii, alga xcuent yäl'nabansa'c ni najc xcuent xcälirililajz Jesucrist, yäl'nabansa'c ni najc xten Dios xcuent yäl'ririlajz. <sup>10</sup> Ni'cni rlazä gumbeäru Jesucrist loj yäl'rnibee ni rajpni sa'csi huistie gubansa'cni sacni loj rebengut, te gumbeäru retrabajwduxh ni gudejdnī, te ganä xho gunä ni rälrajz Dios si'c gucbee Jesucrist, bejnzani ni rälrajz Dios che gujtni. <sup>11</sup> Te gac guidzunä lo yäl'guibansa'c loj rebengut te xca'ä yäl'nabajn par tejpas lo Dios.

<sup>12</sup> Dizana guiniä "abenä gaan" o "anacä beŋsa'c", alga sanuätis te gunä gaan yäl'nabajn nani cua'ä lo Jesucrist. <sup>13</sup> La'tu rebetzä, dipacna gunä cuent alabenä gaan, niluxh tejtis nani runä, riallazä nani agudejd, rusgaä nää si'cni guiniazä nani churu gac. <sup>14</sup> Si'cni sanuutis ruxuŋ bejn te gunni gaan xhi guzalajzni, si'cza sanuutis cayunä dzuun nani

baniidx Jesucrist loä, te che abenä gaan dzuunga sica'ä ni guzalajzni, nalajznu sibejdx Dios narä cha'a loj Jesucrist.

<sup>15</sup> Guiraanu nani ahuuilajznu, nanab jiennu lagajc xhigabga, niluxh palga la'tu guntu ste'ca xhigab, rchaloä lagajc Dios suluilojni lojtu xcuent ni et laadi cayujntu.

<sup>16</sup> Naj, cadrotis abidzunnu lo nani abiembeenu, sigajca nanab guibañsijcnu, chanuutis gusoobnu rediidxga; nungäjł guibajznu loj rediidxre, jiennu tejsi xhigab.

<sup>17</sup> Rebetzä, coltanajł narä, colyejn si'c runä narä, colhuiiza rebejn nani nabajł si'c nabañä.

<sup>18</sup> Xhidajł huält aguniä lojtu, naj ronäli rnisacä lojtu, yu' xhidajł reni rdxe'ch lojtu, rniyarenjreni nani bejn Jesucrist che gudijxni xtojłnu lo cruzj. <sup>19</sup> Redee che luux xnezyujreni sinitlojreni, sa'csi xtioozreni najc yälrausa'c; luxh rbaali lajzreni rujnreni dzun xtujj; luxh riutisreni xcäl'nasa'c guedxliujre. <sup>20</sup> Niluxh nuure, xhaguibaali najc laadxnu, luxh ro'cli cabääznu jiaäd nani ruslaanu nen dojł, nalaaznu lagajc Dad Jesucrist. <sup>21</sup> Laani suchaani tiexhnu ni rajpnu lo guedxliujre, te gac tiexhnu sigajc najc tiejxhni lo xcäl'rnibeeni. Sujnni dee con yäl'rnibeduxh ni rajpni te rnibeeni loj guirali'ti, guiraa nejz.

## 4

### *Colguibalajztis xcuent Dad Jesucrist*

<sup>1</sup> Ni'cni rniä lojtu, rebetzä nani sanälazä, lojtu ni rlazä fisacä, lojtu ni ruspaalazä, lojtu ni najc yäl'nasa'c xtenä, colsudzu'tz loj txidx Jesucrist.

<sup>2</sup> Rniabduxhä lo Evodia näjza lo Síntique, rulidxäreni gunreni tejsi xhigab xcuent Dad Jesucrist. <sup>3</sup> Sigajca rniabä lojtu betzä, ni runnäj narä dzuun, gucnäj regunaare ni bennäj narä dzuun, bideednu trabajw xcuent txidx Jesucrist. Gucnäjza Clemente näjza guiraa reni bennäj narä dzuun; alajreni caj nen reguijtz xten yäl'nabajł par tejpas.

<sup>4</sup> Colguibalaznäjti Dad Jesucrist; stehuält rniä: colguibalajz. <sup>5</sup> Sugacbee guiraa rebejn xho najc xcäl'nabajłntu lo txidx Dios. Asiäddzungajxh dxej xten Dad Jesucrist.

<sup>6</sup> Na'c guidxejbtu, colnabts lo Dad guira'ti, colgudeedza xquixtios lojni lał ni cabedxcanabtu lojni. <sup>7</sup> Dios guniidx xcäl'rbedxilazduxhni, nicla guntu xhigab lacti najc yäl'rbedxilajzga. Yäl'rbedxilajzga ga'p lastootu näjza xcäriejntu loj Dad Jesucrist.

### *Colyejn xhigabsa'c*

<sup>8</sup> Mbaj naj, deetis guiniä lojtu rebetzä, sa'tis rediidxre gusaantu chu loj rexhigabtu: guiraa ni najc guliipac; guiraa rediidx ni nanab guiliä'pni xpala'nni, guira'ti nani nacsa'c; guira'ti nani naya; guira'ti nani najc saru; guira'ti nani rapsa'c xpala'n lajni; näj palga yu' xhi dzuun ni nacsa'cpac, o palga yu' xhi te diidx ni sajc guiliä'p xpala'nni, xcuent guiraa reni'c colyejn xhigab. <sup>9</sup> Nani bisieedtu, nani cua'tu, nani biejn diajgtu, nani bahuiitu benä, ni'c guntu te Dios ni rbedcxilajz, laani jiannäjni la'tu.

### *Gojn xten refilipenses ni xca' Pabl*

<sup>10</sup> Rbaduxh lazä nez loj Dad Jesucrist sa'csi banasac lajztu gacnäjtu narä. Guliini; galooli rrajztu niacnäjtu narä, luxh di niacjdini. <sup>11</sup> Dinä guiniä si'c sa'csi yu' xhi cayädxä, sa'csi abisiedä guibaali lazä loj xhitis ni rapä. <sup>12</sup> Sajc guibañä che guxii rapä; sajc guibañä che xhidal rapä; abisiedä guibañä xhotis: sajc gauduxhä, sajca guilianä; sajc gapä xhidajł xhixtenä, sajca tedä trabajw. <sup>13</sup> Guira'tini sajc gunä sa'csi Jesucrist racnäj narä. <sup>14</sup> Niluxh xhet najcdi; laaca dzuun bejntu che bejntu xhigab gacnäjtu narä lał ni cadedä trabajw.

<sup>15</sup> Gacbee guejbtu, dad filipenses, che gusloj caguluiä txidx Jesucrist lojtu, cheni birinä reguedx Macedonia, nicla tej guidoo di niacnäj narä, la'tistu gucnäj narä. <sup>16</sup> Cheni yu'äli guedx Tesalónica, baxhałtu meel loä tej-tio'p huält. <sup>17</sup> Niluxh narä di rlazä xca'tis xhixtentu ni guniidxtu, nani rlazä najc tioobru xcäl'nasa'ctu nez lo Dios xcuent dzuun ni rujntu ruxhałtu meel loä. <sup>18</sup> Naj acua'ä guiraa ni baxhałtu, arapä xhidajł, arapduxhä sa'csi acua'ä nani biädnä Epafradito baxhałtu loä, te gojn ni rlianejxh si'c guxhyaal, te dzunsa'c ni rchagajz Dios. <sup>19</sup> Dios xtenä guniidx lojtu guiraa nani riäädxcä'tu, si'ctisni rajpni reyäl'nasa'cduxh xhaguibaa con Dad Jesucrist. <sup>20</sup> Colguiliä'p xpala'n Dios xtadnu guixee guixee par tejpas. Si'c gacni.

### *Lult txixtios*

<sup>21</sup> Coldeed txixtios lo guiraa rebejn ni abia lastooni nez loj Dad Jesucrist. Rebejznu ni yu' ree näj narä ruxhałnu txixtios lojtu. <sup>22</sup> Guiraa rebenree ni abia lastooni nez loj Dad Jesucrist ruxhał txixtios, niluxh ruxhałru resa' César txixtios lojtu.

<sup>23</sup> Suga'p xcäl'racnäj Dad Jesucrist lastootu. Sugacni si'c.

## Te Guijtz Lo Rebeņ Colosas

### *Bacuaa Pabl loj rebeņ guidoo ni yu' guedx Colosas*

<sup>1</sup> Narā, Pabl nacā te apost xten Jesucrist. Dios gule narā. Narā nāja bejtznu Timoteu <sup>2</sup> cagucuaanu reguijtzre loj rebeņ Colosas nani nabaņnaya rujnreni si'cpacni rļajz Dios, nāja reni najc bejtznu lo xtidx Jesucrist. Xca'tu yālracnāj nāja yālrbedxilajz xten Dios xtdadnu.

### *Rniab Pabl gudeed Dios yālnajņ xtenni*

<sup>3</sup> Rdeednu xquixtios lo Dios xtdad Dad Jesucrist rniabnu lojni xcuenttu guixe-guixee. <sup>4</sup> Abieņ diajgņ xho rililajztu xtidx Dad Jesucrist, nāja xho sanāļajztu rebeņ ni ahuililajz xtidx Jesucrist, <sup>5</sup> sa'csi cabājztu xca'tu reyālnasa'c ni yuchee xhaguibaa par la'tu. Laa xcuent reni'c ni bieņ diajgtu cheni bacuadiajgtu xtidxlii Jesucrist xcuent yālruslaa lo dojl. <sup>6</sup> Laa rediidxga ni abiāād lojtu sigajc ni bire'chni guideb lo guedxliuj, luxh cayac xhidajlru rebeņ ni cayacbee diidxre, asalilajzreni diidxga, sigajc guzajctu la'tu. Cheni bieņ diajgtu xtidx Jesucrist, dxejc biembeezatu guliipac najc xcālrulasļajz Dios. <sup>7</sup> Sigajcza bisieedtuni lo Epafra, ni sanuutis cayacnājni nuure lo dzuun. Laani najc te beņsa'c, yu'ni lojtu cayujņpacni xtzuum Jesucrist lacuaa nuure. <sup>8</sup> Laani abasule'ni diidx loonu xho sanāļajz sa'tu sa'csi nabajņ Sprit Dxan xten Dios neņ lastootu.

<sup>9</sup> Laa ni'cni dxeļi nani bieņ diajgņ diidxre xcuenttu, di cuāāz cabedx-canabnu lo Dios, canabnu gacheduxhtu xho rļajz Dios guntu, guniidxni guiraa yālnajņ nāja gusanijņi xcāriejntu <sup>10</sup> te guibajntu si'cni nungāļl guibajņ beņ ni sanajļ Dad Jesucrist, te guspaatu lajzni lo guiraa redzuun. Chanuuzatu gunrutu guiraa redzunsā'c nāja jianijru xcāriejntu xcuent yālrīembee Dios. <sup>11</sup> Tioobrutu loj xcālnadip, xcālrīembee Dios te guibaa lajztu gusutipla-jztu, cue'cdxilajztu loj xhtis ni sajct. <sup>12</sup> Guibalajznu guideednu xquixtios loj xtdadnu Dios nani basudz'u'tz nuure te xca'nu yālnabajņ par tejas sigajc guiraa rebeņ nani ahuililajz xtiidxni yu'reni lo xpianijņi. <sup>13</sup> Laani abaslaani nuure loj xcālrīembee yālnacājy, abateedni nuure lo xcālrīembee xi'nni ni sanāļajzni. <sup>14</sup> Laa xi'nni ni baslaa nuure neņ dojl cheni baxhe'ni xtiejņni, gujtni lo cruzj, dxejc gudijxni rextojļnu.

### *Gubisacnu loj Dios xcuent xcālgujt Jesucrist*

<sup>15</sup> Rut rajcti ruhuii lo Gueb-Dios, niluxh xi'nni najc si'cpac najc Dios; si'cpac rujņ lojni. Laani guyu'ni galodoo luxh rīembeeni lo guiralii ni yu' lo guedxliuj. <sup>16</sup> Por laani benchee Dios guiralii ni yu' xhaguibaa ni yu'za lo guedxliuj, renani ruzeņ sigajc renani di guzeņ: rerei, nāja reni rīembee loj rexangļ Dios, nāja reni rīembee loj rexangļ bendxab, nāgajcza reyālrīembee xten reguixhaj, sigajczani loj regubier, lo reguxhtis ni rajp yālrīembee, guiraani guc-chee por laani, nāja par laani. <sup>17</sup> Alanabajņ Jesucrist galooli, che gajdli quirixtiej guedxliuj. Por laani yu' guira'ti ni yu'. <sup>18</sup> Laani najc nani rīembee guidoo, nalajznu rebeņ nani ahuililajz xtiidxni. Laani najc ni gulāxtieļ guira'ti. Ganiddoo laani huājs lo rebengut te rīembeeni. Loj guira'ti ni yu' laatisni najc nani sajc guinibee. <sup>19</sup> Sa'csi bidxagļajz Dad Dios ga'p Jesucrist guiralii yālrīembee nani najc xten Dios, <sup>20</sup> por lajajcza Jesucrist badzņ ni re' lo guedxliujre. Loj gubi'reni lojni, reni yu' lo guedxliuj sigajc reni yu' xhaguibaa, sa'csi abiāļl-lajzni, aguredxi lajzni sa'csi bixe' xtiejņ Jesucrist lo cruzj.

<sup>21</sup> Luxh la'tu guctu si'c beņzijt lo Dios sa'csi galoo rdxe'chtu lo Dios neņ lastootu xcuent redzungujdņ nani bejntu. <sup>22</sup> Niluxh najc abiāļl-lajz Dios abadzu' Jesucrist la'tu, agucnayatu gubi'tu lo Dios xcuent xtiejņ Jesucrist ni baxhe'ni lo cruzj cheni gujtni. Ni'c bejņni te che suutu nez lojni, xhetiru xtojļtu, xhet xhi guiniidi Dios lojtu sa'csi anayapactu. <sup>23</sup> Niluxh riāļl chanuu sudzu'tztu, cuedxitu lo yālrililajz. Na'c gusaantu chu gusiejch-lajztu te cuālaztu xtidx Jesucrist nani abiejņ diajgtu. Rediidxga abasule'zanu loj guiraa rebeņ ni re' lo guedxliujre. Luxh lajajc narā, Pabl rusule'ā diidxga sa'csi parpac ni'c gule Dios narā.

### *Dzuun guidoo najc xcuent Pabl*

<sup>24</sup> Naj rbalazā cadedā trabajw xcuenttu sa'csi retrabajw ni cadedā lajajc narā cagusa' nani cayāādx lo retrabajw xten Crist xcuent guidoo, nalajznu rebeņ ni ahuililajz xtiidxni, ni najc si'c tiejxh Jesucrist. <sup>25</sup> Ni'c nacā te beņ ni rusule' diidx neņ guideoga. Dzuunga baniidx Dios gunā par xcālnasa'ctu te gusule'āpac guiragajc xtidx Dios, <sup>26</sup> te gabeena rexhigabxhiga'tz nani najc xhiga'tz galododuxh niluxh najc abaluiini rediidx-xhiga'tzre loj rexpejņni. <sup>27</sup> Lojreni bejņ Dios xhigab guluiini reyālnasa'c xten yālrđimbicha' xten rediidx-xhiga'tz ni cagusule'ni loj rebeņzijt. Yālxhiga'tzre sāloj Jesucrist rbājz neņ lastootu ni'c runlojtu chalājztu lo yālrđimbicha' xten Dios.

<sup>28</sup> Rusule'nu diidx xcuent Jesucrist, ruliidxnu guiraa rebejn, guideb yäl'najn ruluiinu te guisa' yäl'najn xten guiraa rebejn xcuent Jesucrist che guidzujñreni nez loj Jesucrist. <sup>29</sup> Xcuent dzuunre guideb xtipä runä dzuun con guiraa yäl'rnibee nani runiidx Jesucrist narä.

## 2

<sup>1</sup> Rlazä gacheetu lacti cadedä trabajw xcuentu, näjza xcuent reni yu' guedx Laodicea, näjza xcuent guiraa reni gajd gumbee narä. <sup>2</sup> Te tioob lastoo guiraatu sa'csi abidxagsa' lastootu lo yäl'sanälajz, näjza te ga'ptu guiraa reyäl'nasa'c ni rajp bejn che racbesa'creni xtidx Dios. Te gumbeezatu guiraa redidx-xhiga'tz xten Dios xtdnu näjza Dad Jesucrist. <sup>3</sup> Nen lastoo Dios näjza lastoo Jesucrist naga'tz guiraa reyäl'nasa'c xten guiraa reyäl'najn, guiraa yäl'nubee. <sup>4</sup> Dee rniä lojtu te di gusguee chu gusgueetu con rediidx-xhii. <sup>5</sup> Te palga ruti narä ro'c, canaj lazä la'tu, cabaa lazä cahuiä laaca cayujntu, sugatzu'tztu loj yäl'rillilajz xten Jesucrist.

<sup>6</sup> Ni'cni sigajc ni huililajztu xtidx Jesucrist, sigajcza colchasanäj Jesucrist. <sup>7</sup> Col'sudzu'tz lo Jesucrist si'c rsiobdzu'tz xlobaa te yajg. Col'sudzu'tz lo yäl'rillilajz xten Jesucrist si'c ni abisieedu. Col'gudedduxhru xquixtios lo Dios.

### *Yäl'nabañ'coob ni rudeed Jesucrist*

<sup>8</sup> Col'huii, na'c gusaantu guxhiid bejn xcäl'rillilajztu con xtiidxtisreni näjza rediidx nani xhet sajcdi, si'c najc xtidx reben galoo, näjza si'c najc diidx xcuent xhigab xten reben guedxliuj, di rediidxga gac si'cni rrlajz Jesucrist.

<sup>9</sup> Sa'csi guiralii ni najc Dios, lagajc ni'c najc Jesucrist, niluxh yu' tiejxh Jesucrist. <sup>10</sup> Xhet cayäädxd di lo yäl'nabajn xten Dios ni rajptu sa'csi najctu tejsi con Jesucrist. Laani rnibee guiraa reyäl'guxhtis, guiraa reyäl'rnibee ni yu' guirala'jt. <sup>11</sup> Sa'csi huililajztu Jesucrist aguyu'tu bee, niluxh xhet beedi nani rusäl bejn con ñaareni, alga xpee Jesucrist, ni najc yäl'rusia xtojł bejn sa'csi rusaan bejn redzunguijdx, rujñreni tejsi xhigab con Jesucrist. Si'c najc xpee Jesucrist. <sup>12</sup> Cheni gurobñstu najcni si'cni agujttu ni'c biga'tztu con Jesucrist, najczani si'cni gubansactu con laani sa'csi huililajztu rajp Dios yäl'rnibee nani gulässac Jesucrist lo rebengut. <sup>13</sup> Che najctu si'c bengut lo dojł, näjza sa'csi di bee niu' tiejxhtu, dxejclj baniidx Dios yäl'nabajn par tejpas lojtu con Jesucrist, badzucajni guiraa rextojłnu. <sup>14</sup> Dios badzucaj guiraa releii nani basäuu nuure nen dojł, badzucajñini lojni, sa'csi bacuaanini lo cruzj, cadre gudijx Jesucrist guiralii rextojłnu. <sup>15</sup> Cheni gujt Jesucrist lo cruzj bejñni gaan loj reyäl'guxhtis näjza guiraa reyäl'rnibee xten bendxab näjza rexspritni. Basanxtujñreni nez loj guiraa rebejn. Laani bejñni gaanreni cheni cuajni lo cruzj.

### *Col'quii recos ni najc xten xhaguibaa*

<sup>16</sup> Nicla tejtü na'c cubee sa'ni xcuent reyäl'rajw näjza reyäl'rä', niclaza xcuent redxe lanij näjza rexchej rebäicoob, näjza redxej ni rusilajzñi. <sup>17</sup> Guiraa redee najc si'csi te balaa xten nani churu jiaäd, te guluiireni ni rujñ balaaga, nalajznu ni'c najc Jesucrist. <sup>18</sup> Na'c gusaantu gudzucaj bejn xcäl'nasa'ctu te gunreni gactu nadolajz, te gan'tu reangl. Sa' bejnğa richu' loj nani gajdreni fii; rchaloreni najcñeni benro xcuent lagajc xhigabreni. <sup>19</sup> Laareni ñireni chanajł Jesucrist nani rnibee, nani rujñ roobru tiejxhni, nalajznu rexpejñni, sa'csi lojni rca'reni ni rquiiñ lastooreni, te ruchaagni sa' tejjareni si'c nadxaquiid bääl cuä' dzujt lo tiejxh bejn, te gacñeni tejsi con Dios.

<sup>20</sup> La'tu agujttu con Jesucrist, abiriitu lo rexhigab xten guedxliujre. Naj çxhicuent guibajntu sigajctis nabajn rebejn nani di gumbee xtidx Jesucrist, ä? çXhicuent rusoobtu rediidx ni caj lo releii? Loj releii caj sa' diidxre: <sup>21</sup> "Di chahuallu dee, di gaulu ni'c, di canlu dec." <sup>22</sup> Luxh guiraa redee rnitloj che runnäjnini dzuun. Luxh guiraa sa' leiiga najc diidxtis nani ruluii bejn. <sup>23</sup> Guluicani sa' releiiga rieñ asdooruluiireni yäl'nanduxh, luxh che rusoob bejn releiiga rchaloreni rajñreni Dios, rchaloreni rac nadolajzreni, rusacsireni lagajc tiejxhñeni. Niluxh xlai'si rujñreni guiraa redzuंगा, sa'csi sanuutis rujñreni si'ctisni rrlajz tiejxhñeni.

## 3

<sup>1</sup> Palga anabansactu con Jesucrist, col'quii reyäl'nasa'c ni yu' xhaguibaa cadre sobga' Jesucrist xladbee Dios. <sup>2</sup> Col'yejn xhigab xcuenttis reyäl'nasa'c ni yu' xhaguibaa, na'c guntu xhigabtis xcuent reni yu' lo guedxliuj. <sup>3</sup> La'tu anajctu si'c bengut loj reyäl'nasa'c ni yu' lo guedxliuj, luxh yäl'nabajn ni rajptu naj, yäl'nabajnğa naga'tz con Dios xcuent Jesucrist. <sup>4</sup> Che guluioisac Jesucrist ni najc xcäl'nabajntu, dxejc näjza la'tu suluiilojtu con laani lo xcäl'rdimbicha'ni.

### *Yäl'nabañ'biejw con yäl'nabañ'coob*

<sup>5</sup> Colcuälaz redzunguijdx xten guedxliuj nani rujntu, yälrusguee gunaxteb, yälrujn recos-dxuudx, recos ni rdxagljaj tiejxhtu, rehxigab-guijdx, yälrsiäb-lajz xhi xten bejn, guiraa redee rujn runijt bejn lo Dios sigajc rujn bejn che rajn bejn rebanäjb. <sup>6</sup> Guiraa redzuunga rujn riääd xcälrdxe'ch Dios yejc renani rujn sa' redzuunga. <sup>7</sup> Näjza la'tu bejntu sa' redzunguijdxga galoo cheni guyu'tu lo sa' yäl'nabajnga. <sup>8</sup> Niluxh naj näjza la'tu colgusaan recosre; nalajznu yälrdxe'ch, yälruche'ch sa'ni, yälrujn latzsjaj sa'ni, yälrniyaj sa'ni, näjza rediidx-dxuudx ni rniitu. <sup>9</sup> Na'c gusgueetu resa'tu, sa'csi nanab gusaantu nani bejntu cheni guyu'tu loj redzunguijdx. <sup>10</sup> Colyajc te bencoob, ni guixe-guixee cayanijru xcäriejnmi, te gumbesa'ctu Dios, te gactu sigajc najc Dios ni benchee benguedxliuj. <sup>11</sup> Lo yäl'nabañcoobre rutiru benzijt, niclaza xpeñ Israel, rutiza rebejn ni ru' bee, niclaza bejn ni di chu bee; rutiza benzijt, niclaza bejn ni siääd zitduxh; rutiza mos, niclaza bejn nani di chu lo bejn, sa'csi che rililajz te bejn xtidx Jesucrist najcni tebloj con guiraa reni rililajz xtidx Jesucrist; guiraareni najc xpejn Jesucrist.

<sup>12</sup> Naj agule Dios la'tu te gactu xpejnmi nani gac naya, nani sanälajzni, colguibajn con yäl'rulaslajz, na'c guidxe'chtu, colyacnadoo con yäl'nadolajz, colniiza nadolajz. <sup>13</sup> Colyujn huant, na'c guidxe'chtu loj sa'tu, palga yu' chu sa'tu rdx'e'ch loj sa'ni, colgusiäjl-lajztu sigajcni basiäjl-lajz Dad Jesucrist lojnu xcuent rextoljnu. <sup>14</sup> Che abejntu guiraa recosre, colguilru yäl'sanälajz nani rusa' loj guiraa recosre. <sup>15</sup> Xcäl'rbedxialajz Dios guinibee neñ lastootu, sa'csi parpac ni'c gurejdxni la'tu, te gaczatu tejsi con rexpejn Jesucrist. Colgudeed xquixtios loj Dios.

<sup>16</sup> Xtidx Jesucrist chuduxh neñ lastootu con guiraa yäl'najn, te guluiitu, te gulijdxtu tejga resa'tu con redij nani gulä'p toDavid xpala'n Dios, näjza redij nani roltu, näjza redij nani rliä'p xpala'n Dios. Redijga golnu te guideednu xquixtios lo Dios neñ lastoonu. <sup>17</sup> Guira'ti nani guntu, sigajc rediidx ni rniitu, sigajcza redzuun ni rujntu, colyejn guiraani con laj Dad Jesucrist, coldeed xquixtios lo Dios xtdanu con laj Jesucrist.

#### *Xho nanab guibajn te famil ni najc xpejn Jesucrist*

<sup>18</sup> Regunaa nani abachnaa, colgusoob xtidx chäältu sa'csi si'c rrlajz Dad Jesucrist. <sup>19</sup> Reniguii nani abachnaa, colchanälajz chäältu, na'c guidxechnäjturenä. <sup>20</sup> Reni najc biuux, colgusoob xtidx atadtu loj guira'ti, sa'csi si'c rchagljaj Dad Jesucrist. <sup>21</sup> Reni najc Dad, na'c guche'chtu rexi'ntu, didi gac-huin lajzreni. <sup>22</sup> Reni najc mos, colgucua diajg xtidx xlamtu lo guedxliujre loj guira'ti xtzuunni. Na'c gusa'ctu dzuun che cahuiitisreni si'c rujn renani ruspaalajz bejntis. Con yäl'nadolajz colyejn dzuun sa'csi sanälajztu Dios. <sup>23</sup> Guira'ti nani guntu, colyejnmi guideb lastootu si'c xtzuun Dios, et si'c xtzuundi rebejntis. <sup>24</sup> Anajntu lo Dad Jesucrist sica'tu yäl'nasa'c ni najc yäl'nabajn par tejpas, sa'csi loj Dad Jesucrist rujntu dzuun. <sup>25</sup> Niluxh nani rujn recosguijdx, lagajc xcuent recosguijdxga gudeed Dios lojni, sa'csi tebloj rujn Dios guiraa rebenguijdx.

## 4

<sup>1</sup> Renani najc lam, coldeed loj rexmostu nani riäj xca'reni sa'csi anantu näjza la'tu rajttu xlamtu xhaguibaa.

<sup>2</sup> Colchanuu colnab lo Dios, colsusin che rniabtu lo Dios. Colgudeed xquixtios lo Dios. <sup>3</sup> Colnabza lo Dios con nuure te gacnäj Dios narä gusule'ä xtidx Jesucrist, te gusule'ä redidx-xhiga'tz xten Crist. Xcuent ni'cza yu'ä neñ latzguiib. <sup>4</sup> Colnab lo Dios te guyasi gusule'ä rediidxga si'cni riäj guiniä.

<sup>5</sup> Colguibañsin loj rebejn nani di gumbee xtidx Jesucrist, colgusule' diidx cheni riäj guiniitu lojreni. <sup>6</sup> Rextiidxntu nanab gacni si'c rchagljaj Dios, saruduxhza gac xtiidxntu te gacheetu xho riäj gudzu'tu diidx loj tejegareni.

#### *Lult xtixtios*

<sup>7</sup> Tíquico, bejtznu ni sanälajznu, ni runsa'c dzuun, ni najc xmos Dad Jesucrist, laani gusule'ni diidx lojtu xcuent guiraa rextzunä. <sup>8</sup> Ruxhaläni lojtu te gacheepactu xho yu'ä, te guspaani lajztu. <sup>9</sup> Laani jiädnäzani Onésimo nani najc te betznu ni sanälajznu. Laani najc tej resa'tu. Laareni gusule'zaren guira'ti nani cadeednu ree.

<sup>10</sup> Aristarco, nani yunäj narä neñ latzguiib, ruxhalni xtixtios lojtu näjza Marcw, betz prim xten Bernabé (abacuaä lojtu xcuentni, xho guntu, palga jiädhuini la'tu, sacru colhuini). <sup>11</sup> Näjza Jesús nani laaza Justo, ruxhal xtixtios lojtu. Laatisreni najc rexpejn Israel nani cayachäj loj dzuun xten xcäl'rniabee Dios. Laareni ruspaalazä. <sup>12</sup> Epafra, ni najc te sa'tu, ruxhal xtixtios lojtu, luxh rniabduxhni xcuenttu lo Dios te sudzu'tztu guntu guiragajc ni rrlajz Dios guntu. <sup>13</sup> Narä rniäliä xho rdzuun Epafra xcuent la'tu, näjza xcuent rebejn ni yu' guedx Laodicea, näjza guedx Hierápolis. <sup>14</sup> Lucas, doctoor ni sanälajznu, näjza Demas ruxhalzaren xtixtios lojtu.



<sup>15</sup> Coldeed xtixtios loj rebejtzn nani yu' guedx Laodicea, nājza loj Ninfas, nājza lo rebejn nani re' rolijzni. <sup>16</sup> Cheni agulujx bil̄tu guijtze, colguxhal̄ni te jiel̄ni neñ guidoo xten guedx Laodicea, dxejcti colyełza guijtzn nani baxhal̄a lo rebeñ guedx Laodicea. <sup>17</sup> Colye'tz loj Arquipo: "Bahuisa'c xtzuum Dad Jesucrist nani cua'lu lojni. Bensa'c dzuunga."

<sup>18</sup> Lagajc narä Pabl rucuaä xtixtiosre con lagajc naä, con lagajc xleträ. Colgusnaj-lajztu narä yu'ä latzguiib. Gacnäj Dios la'tu. Sugacni si'c.

## Guijtz Ganid Lo Reben Tesalónica

*Bacuaa Pabl con rexamigwni lo guidoo guedx Tesalónica*

<sup>1</sup> Narä, Pabl, näjza Silvan, näjza Timoteu cacuaanu guijtzre lojtu, resa'nu ni yu' guidoo lo guedx Tesalónica, reni yu' lo Dios Xtradnu näjza lo Dad Jesucrist. Guspaa Dios näjza Jesucrist lajztu, guscuecdxizareni lajztu.

*Xho huililajz beñ Tesalónica xtidx Dios*

<sup>2</sup> Guet-guejt rdeednu xquixtios lo Dios xcuent guiraatu, rnaduxhza laaznu la'tu cheni rbejdx rniabnu lo Dios. <sup>3</sup> Ruzä'tnu lo Dios xtradnu xho rujntu dzuun sa'csi rililajztu xtidx Dios; näjza xho runduxhtu dzuun te racnäjtu sa'tu ni xhet rajpdi sa'csi rinälajztu Dios; näjza xho rutip lajztu cabäjztu guibi' Dad Jesucrist lo guedxliuj. <sup>4</sup> Bejtznu, racbeenu sanälajz Dios la'tu, laani aguleni la'tu. <sup>5</sup> Sa'csi che basule'nu xtidx Dios lojtu, et ganax diidxtis gujcn, niluxh xcäl'rmbec Sprit Dxan xten Dios neñ lastootu bejn gubeepactu diidx ni najc didxlii. Nanchesä'ctu xho gujcnu che guyu'nu lojtu. Si'c baluiinu la'tu te guibañsa'ctu.

<sup>6</sup> Sigajcni nabannäjnu Dad Jesucrist sigajza gusloj cua'tu xmoodnu, basoobzatu diidx guideb xcäl'rbalajz Sprit Dxan xten Dios ni baniidxn lojtu, mase gudejdtu trabajw. <sup>7</sup> Si'c gujtc te baluiitu loj guiraa reni rililajz nez Macedonia näjza nez Acaya xho nungäjil gac. <sup>8</sup> Ni'c abire'ch xtidx Dios, xhet nejzdi Macedonia näjza Acayatis, bire'chza diidx guira nejz. Ro'c najjnreni xho sanälajztu Dios, ni'c xhetru nanabti guiniinu lojreni. <sup>9</sup> Alga lagajc laareni rujyreni diidx xho guyu'nu lojtu; nägajza xho basaantu gojntu rebanäjb te rajntu Dios ni nabajnpac ni najc guliipac. <sup>10</sup> Rujyzareni diidx xho cabäjzatu guibisac Jesucrist lo guedxliuj. Laazani najc Xi'n Dios ni guläs Dios lo rebengut, Jesucrist ni rusläa nuurnu lo xcäl'rde'ch Dios ni churu siäd.

## 2

*Xhi bejn Pabl neñ guedx Tesalónica*

<sup>1</sup> Naj lagajc la'tu najntu, bejtznu, et xlia'di bio'pnu lojtu. <sup>2</sup> Et najntu xho gudéreni loonu, basacsireni nuurnu guedx Filipos. Niluxh mase gudejdnu trabajw, gusutijpnu lo Dios, xhet bidxeljbtinu basule'nu xtidx Dios lojtu, mase gudejdnu trabajwduxh. <sup>3</sup> Sa'csi dinu nulijdx la'tu con didx-xhii, niclaza didx-dxuudx, niclaza diidx ni rusguee. <sup>4</sup> Sa'csi rsoobnu xtidx Dios basannäjni nuurnu xtiidxn, ni'c rusule'nu xtidx Dios. Dinu guini diidx te jiansä'cnu lo bejn, rniinu diidx te jiansä'cnu lo Dios ni ruhuii lastoonu. <sup>5</sup> Anajntu xho basule'nu xtidx Dios. Nicla tej dinu ninii xhi stee diidx ni xhet sajcdi lojtu. Dizanu nusule' xtidx Dios te xhiga'tz niennu gaan xhi nica'nu. Dios nanchee xcuent ni riennu. <sup>6</sup> Dizanu nidiil guiliä'p bejn xpala'nnu, niclaza la'tu, niclaza chu stee bejn, mase nungäjil niennu niacheetu rajpnu yäl'rmbec sa'csi baxhal Jesucrist nuurnu. <sup>7</sup> Niluxh guc nadolajznu che guyu'nu lojtu, cuanäjnu la'tu si'c rcanäj te nañ rexpäzni. <sup>8</sup> Sa'csi huinälazduxhnu la'tu, biennu xhigab xhet ganaxdi xtidx Dios guiniidxn lojtu, näjza lagajc xaimnu guniidxn te guseednu la'tu xtidx Dios sa'csi sanälazduxhnu la'tu. <sup>9</sup> Bejtznu, la'tu rnalajztu xho biennu dzuun te biennu gaan xcäl'nabaannu. Biennu dzuun dxej-yääl, te di niednäjtu nuurnu la' ni basule'nu xtidx Dios lojtu.

<sup>10</sup> Lagajc la'tu nancheetu, sigajc nanchee Dios, laaca biennu che guyu'nu lojtu: gujcnu bejn ni rañduxh Dios, gujcnu beñdjojn, gujcnu beñsa'c. <sup>11</sup> Anajntu xho baliidxn la'tu, xho bascuecdxinu lajztu si'c runnäj te dad rexingaanni. <sup>12</sup> Guiraa dee biennu, te guibañsa'ctu si'c nungäjil gun reni najc xi'n Dios, lagajc Dios ni gurejdx la'tu te chunäjtni lo xcäl'rmbecni näjza lo xcäl'rmbichä'ni.

<sup>13</sup> Ni'cni rdedduxhnu xquixtios lo Dios sa'csi che biejn diajgtu xtidx Dios ni basule'nu lojtu, cua'tuni si'c xtidx Dios xhet si'c xtiidxdi beñ guedxliuj. Niluxh guli xtidx Diosni, sa'csi rusiani lastoo renani rililajz. <sup>14</sup> Bejtznu, dxejcti bejntu lagajc si'c rujn rebejn xquidoo Dios neñ reguedx Judea reni najc xpen Jesucrist; luxh gusajctu lagajc ni gusajceni, basacsä reben lajdxtu la'tu. Sigajza birinajl rexpen Israelreni. <sup>15</sup> Rexpen Israel bagu't Dad Jesucrist, si'cza bagu'treni lagajc rexpote'treni, renani bacuaa xtidx Dios, barilaagwzareni nuurnu. Direni chanälajz Dios, dizareni gusaan chanajl rebejn Jesucrist. <sup>16</sup> Che rlanjnu gulijdxnu reni digac rexpen Israel, te näjza laareni laareni lo dojl, direni gusaan, si'ctis cagutajlreni xtojlni. Niluxh naj abiädapac yäl'rde'ch xten Dios yejceni.

*Rlajz Pabl nihuisacni ro'c*

<sup>17</sup> Bejtznu, mase biriinu ro'c, naj dirunu guihuii lojtu, rnalazduxhnu la'tu, batijp lajznu jio'pnu ro'c, rlazduxhnu fisacnu lojtu. <sup>18</sup> Rlajznu nio'pnu, narä, Pabl xhidäl huält rlazä

niälä, niluxh beñxab di nusaan. <sup>19</sup> Łhñini'c najc xcälrbääznu, xcälrbalajznu, xcälracnaronu? Lagajc la'tu gactuni che suunu nez loj Jesucristi che jiädsac Dad Jesucrist. <sup>20</sup> La'tu najc ni ruspaalajznu ni rliä'pza xpala'nnu nez lo Dios.

### 3

<sup>1</sup> Dxejc, che dirunu nutijp lajznu, biennu xhigab bianxtebä guedx Atenas. <sup>2</sup> Dxejc baxhalä Timoteu, bejtznu nez loj Jesucrist, te biädhuiini la'tu, sa'csi laani najcni te xpen Dios ni runnäj nuurnu dzuun, rniini xtidx Jesucrist, te guscuecdxini lajznu, guzudzu'tzni xcälrlilajznu. <sup>3</sup> Te nicla tejtü di guidxejb che jiääd reyälhuini sa'csi la'tu anajntu agule Dios nuurnu ni'c sidejdnü trabajw. <sup>4</sup> Cheni yusijcnu lojtu, rmixgaanu lojtu sidejdnü trabajw; niluxh si'cni agusojb diidxga naj. <sup>5</sup> Ni'cni diruna nutiplazä, baxhalä chu jiädnä diidx xho najc xcälrlilajznu, sa'csi cadxebä andi abasguee beñxab la'tu, luxh xliä'si biennu dzuun guyu'nu lojtu.

<sup>6</sup> Naj agubi' Timoteu, biädhuiini la'tu. Biadnäni ganax didxlii xho sanuu rililajznu xtidx Jesucrist, xho rinälajztuni, näjza sanuutis rnalajznu nuurnu, rlanjzatu fiitu loonu, sigajcza nuurnu rlanjznu fiinu lojtu. <sup>7</sup> Ni'cni, betznu, masä riäädx xhixtenu, masä rdeednu trabajw, rbalajznu sa'csi la'tu sanuutis rililajznu xtidx Dios. <sup>8</sup> Naj laaca rdxunnu sa'csi racbeenu sudzu'tznu nez loj xtidx Dad Jesucrist. <sup>9</sup> Xhocha gac guideednu xquixtios lo Dios xcuent guiraatu näj xcuent yälrbalajz ni yu' lastoonu xcuent la'tu nez lo Dios. <sup>10</sup> Dxej-yääl rniabnu lo Dios gusaanni jiphuiinu la'tu te gusa'nu guiraa rediidx ni cayäädx gacheetu xcuent xcälrlilajznu.

<sup>11</sup> Rniabnu lo Xtadnu Dios, näjza lo Dad Jesucrist, gacnäjreni nuurnu te gac jiphuiinu la'tu. <sup>12</sup> Rniabzanu lo Dad Jesucrist, gunni gustiobruni lastootu te ga'prutu yälrinälajz loj resa'tu näjza loj guiraa rebejn, si'cni rinälajznu la'tu, <sup>13</sup> te gunni sudzu'tz lastootu, na'c ga'ptu dojl nez lo Xtadnu Dios, che jiääd Jesucrist näjza guiraa rexpejn ni xhaguibaali.

### 4

#### *Guibajnu si'c rchaglajz Dios*

<sup>1</sup> Naj, rebejtznu, rniabduxhnu lojtu, rulijdxnu la'tu con laj Dad Jesucrist, guibajntu si'cni baluiinu la'tu nungäjil guibajntu te guspaatu lajz Dios, te si'c chanuutis guibañsa'ctu nez lo Dios.

<sup>2</sup> La'tu, anajntu rediidx ni baluiinu lojtu con xcälrnibee Dad Jesucrist. <sup>3</sup> Lagajc Dios rlanjz nayatis guibañsa'ctu, na'c gun niguii dojl guesnäj gunaa ni di gac chäälni, sigajcza na'c guesnäj gunaa niguii ni di gac chäälni. <sup>4</sup> Tejgatu gantu xho guibañnäjtu chäältu nayatis näjza xpala'nni. <sup>5</sup> Xhet si'c ni rujndi regunadxab näjza reniguii, nicla si'c ni rujn rebejn ni di gumbee Dios. <sup>6</sup> Rut chutejditu gusuee bejtzni lo redzunguijdxre, sa'csi Dios susacsä guiraa rebejn ni rujnza redojlre, ni'cni abiniinu lojtu, agunixgaanu diidxre lojtu. <sup>7</sup> Sa'csi Dios gurejdxni nuurnu te guibajntu lo yäl'nabannaya xteni, xhet lo yäl'nabandxuudxi. <sup>8</sup> Ni'cni bejn ni di gucudiajg rediidxre, dini gac xtiidx te bejn ni dini cuadiajg, xtiidxpac Dios ni dini cuadiajg, Dios nani abaniidx Sprit Dxañ xteni loonu.

<sup>9</sup> Ditu guiquini gucuaäru diidx xho chanälajznu resa'tu, sa'csi lagajc Dios abaluiitu xho chanälajznu resa'tu. <sup>10</sup> Luxh rinälajznu guiraa reni rililajz, guiraa reni siääd guideb nez Macedonia. Ni'cni rniabnu lojtu bejtznu, chä'pru xcälrinälajznu. <sup>11</sup> Colgutijp lajznu, dxitis colguibajñ, coljiu xtzuuncatu, lagajc naatu colyejn dzuun si'cni agunibeenu guntu. <sup>12</sup> Te fi rebejn ni di chalilajz laaca nabañsa'ctu, nägajcza te xhet jiäädxdxi xhi rquiintu.

#### *Xho gac che jiädsac Jesucrist lo guedxliuj*

<sup>13</sup> Bejtznu, rlanjznu gacheetu xcuent rebengut te di gac-huin lajznu si'c rujn rebejn ni di chalilajz xtidx Dios. <sup>14</sup> Si'c ni rililajznu gujt Jesucrist, dxejc gubañsacni, sigajcza rililajznu suspañsac Dios guiraa reni nagayejs neñ baa, renani huililajz xtidx Jesucrist. Luxh che guibi' Jesucrist, siädnäni reni.

<sup>15</sup> Xcuent xcälrnibee Jesucrist rniä lojtu, nuurnu ni nabajntu che jiädsac Jesucrist, dinu nid loj reni nagayejs neñ baa. <sup>16</sup> Sa'csi lagajc Dad Jesucrist siäjt lo guedxliujre, sibeäxa'ni, siejzxa xse' guixhajg ni rnibee, sibeäxa'za trompet xten Dios. Dxejc sibañxgaa reni nagayejs neñ baa, reni huililajz xtidx Crist. <sup>17</sup> Dxejc nuure ni nabañsijcnu sidxaagnureni neñ rebäj te lo bej chachagloonu Dad. Si'c chonnu cholaznäjnuni par tejpas. <sup>18</sup> Ni'cni rniä lojtu, colcuedxilajz sa'tu con rediidxre.

### 5

<sup>1</sup> Niluxh xcuent redxejga, reijzga, xhet riquiinditu gucuaäni lojtu, <sup>2</sup> sa'csi la'tu anansa'ctu sidzujñ dxej ni jiääd Jesucrist cheni rut cayunlojdini, sigajc che riääd te gubaan yääl. <sup>3</sup> Che canii bejn: "laaca dxunnu, dxunsa'cnu", chela gacheereni acadiejdreni trabajw si'c che

rdzujn yäl'nayan te gunaa che rajl xi'nni, luxh digacdi guxunreni lojni. <sup>4</sup> Niluxh bejtznu, di gac nayäältu te di che xhet cayunlojditu dxej xten Jesucrist, guidzunxhiga'tz dxejga si'c gubaan. <sup>5</sup> Sa'csi guiraatu najctu be'nsa'c nabajntu lo bianij, lo rdxee, dinu gac benguijdx, dinu guibajn lo yääl, lo yälrcäy. <sup>6</sup> Ni'cni di nungäj'l guidiesnu si'c rejs stecuaa bejn, ni'cni nungäj'l sunasiñnu na'cza jiennu redojl ni rlajz tiejxhnu. <sup>7</sup> Reni rejs, rejsreni yääl, reni rsiojz, rsiojzreni yääl. <sup>8</sup> Niluxh nuure nabajñnu lo rdxee, ni'cni nanab na'c jiennu si'c, riäj'l xca'nu yäl'rililajz näjza yäl'rinälajz si'c rca' soldaad gamangw guuib ni rajcwni, ni rusäuu lastooni. Riäj'lza guiläzdzu'tznu sa'csi yäl'rusläa lo dojl najc si'c xhumbrel-guib ni ru' yejc soldaad ni rusäuu yejcn. <sup>9</sup> Sa'csi di Dios nibe nuurnu te chonnu gabijl, alga guleni nuurnu te xca'nu yäl'nabajñ ni rudeed xi'nni, Jesucrist. <sup>10</sup> Sa'csi gujt Jesucrist lacuaa nuurnu, te guibanñajñnuni masä nabajñnu lo guedxliujre o nagayejsnu nen baa che guibi'ni. <sup>11</sup> Ni'cni, colguspaa lajz sa'tu, tejtü sigajcza steetu, sigajcni cayujntu naj.

*Rulijdx Pabl resa'ni*

<sup>12</sup> Bejtznu, rniabduxhnu lojtu, col'huiduxh reni ruluii xtidx Dios lojtu, sa'csi agule'c Dadreni te guinibeereni, te gulijdxreni la'tu. <sup>13</sup> Riäj'lza chanälazduxhtureni xcuent dzuun ni rujnreni. Col'cuedxi con resa'tu.

<sup>14</sup> Rulijdxnu la'tu, bejtznu, col'gulijdx reni najc benlatsiaj; col'sudzu'tz lajz reni guxii rbalajz lo xnez Dios; col'gacnäy reni di gumbesa'c xtidx Dios, col'cuedcxi lajz guiraasi bejn.

<sup>15</sup> Col'huii di chu tejtü gunza dol'guijdx lo rebejn ni rujn dol'guijdx. Laaca guntu ganax dzunsa'c lo sa'tu, sigajcza lo chutis bejn.

<sup>16</sup> Col'guibalajztis guideb nabajntu. <sup>17</sup> Na'c cuääz guiniitu lo Dios. <sup>18</sup> Mase xhitis rsiajctu, col'deed xquixtios lo Dios, sa'csi si'c rlajz Dios gun reni rililajz Jesucrist.

<sup>19</sup> Di cuälaztu xtidx Sprit Dxan xten Dios ni rniini nen lastootu. <sup>20</sup> Na'c cuälaztu xtidx reni rniit xtidx Dios xcuent nani churu gac. <sup>21</sup> Col'quiil guiraa rediidx, col'jiannäj'tis rediidx ni najc didxsa'c. <sup>22</sup> Col'bicaj lo guiralii dol'guijdx.

<sup>23</sup> Lagajc Dios, Dios ni rbecdxi lajztu, gusiapac lastootu, te cucheeni xaimtu, näj lastootu, näjza tiejxhtu, te na'c guntu dojl ni di riäj'l guntu te cuääztu dxej ni guibisac Dad Jesucrist. <sup>24</sup> Dad ni gurejdx la'tu rujnza guiraa ni rniini, ni'c sujnzani guiraa redzuunre.

*Ruzadiidxnireni*

<sup>25</sup> Bejtznu, col'nab lo Dios xcuent nuurnu.

<sup>26</sup> Col'gudeed xtixtios lo rebejtznu ni yu' ro'c.

<sup>27</sup> Con laj Dad Jesucrist rnibeä, go'tu guijtzre loj guiraa rebejtznu.

<sup>28</sup> Gacnäy Dad Jesucrist la'tu. Sugacni si'c.

## Guijtz Ni Roj Lo Reben Tesalónica

*Rucuaanu guijsre lojtu, rexpēn Jesucrist ni rbājz guedx Tesalónica*

<sup>1</sup> Narā Pabl, nājza Silvan nājza Timoteu, cacuaanu guijsre lojtu, rebejtznū ni yu' guidoo lo guedx Tesalónica, reni yu' lo Dios Xtradnu nājza lo Dad Jesucrist. <sup>2</sup> Gacnāj Dios Xtradnu nāj Dad Jesucrist la'tu, guscuedxizareni lajztu.

*Gun Dios yālguxhtis loj rebendoj che guibi' Jesucrist lo guedxliuj*

<sup>3</sup> Bejtznū, rudedēnu xquixhtios lo Dios xcuenttu, si'c riājļ jienunni, sa'csi xcālriilajztu siādroobru, nājza yālrinālajz ni rajp tejgatu nājza sa'tu siādroobruni. <sup>4</sup> Ni'cni rliā'pnu xpala'ntu neņ reguidoo xten Dios. Rbaa lajznu sa'csi rsiudzu'tztu sanuutis rililajztu xtidx Dios mase rdejdtu trabajw, rusacsī bejntu. <sup>5</sup> Dee ruluiipac xcālguxhtis Dios najc laaca, ni'c rniī Dios riājļ jiu'tu lo xcālriibeēni sa'csi cadejdtu trabajw xcuent yālribeega.

<sup>6</sup> Sa'csi rujn Dios xhigab riājļza quix reni bateedtu trabajw xtojļreni, ni'c suteddzani reni'c trabajw. <sup>7</sup> Niluxh la'tu ni cadejdtu trabajw, sujn Dios gusilaznājtu nuure che guluiiloj Jesucrist, siriini xhaguibaa siādnājni rexanglīni ni sajc, ni rnibeduxh. <sup>8</sup> Lo te balduxh siāādni, dxejc guisloj susacsīduxhni reni di gan Dios, dizareni gusoob xtidx Dad Jesucrist nani rudzucāj dojļ. <sup>9</sup> Guiraareni sidejre ni trabajw, par tejpas agunijtreni, zijt chureni lo Dios, lo yālrđimbicha' xten xcālriibeēni. <sup>10</sup> Che jāād Dad guiriini xhaguibaa, dxejga siliā'p rexpējni xpala'nni, sidxelojza renani huililajz laani nājza la'tu, sa'csi huililajztu diidx ni basule'nu che guyu'nu lojtu.

<sup>11</sup> Ni'c rniabtsnu lo Dios por la'tu, rniabnu lo Dios guinaj lajz ni nabajntu si'c riājļ guibajni reni guleni. Rniabzanu guniidx Dios lojtu guntu guiraa redzunsac'ni rchaglaiz Dios guntu, gacnājzani la'tu con xcālriibeēni te guntu redzuun ni rujntu sa'csi rililajztu. <sup>12</sup> Te chā'p xpala'n laj Dad Jesucrist si'cni nabajntu, te laani guiliā'pzani xpala'ntu, xcuent yālrinālajz xten Dios nājza Dad Jesucrist.

## 2

*Bendolduxh*

<sup>1</sup> Naj, rniabduxhnu lojtu bejtznū, xcuent dxej ni jāād Jesucrist, dxej ni guidojpzanu lojni, <sup>2</sup> na'c chugajtu yarsia'. Na'cza gusaantu guchejbreni la'tu con diidx ni ruluii te bejñ ni najc profē't, nicla con diidx ni rniī stee bejñ lojtu, niclaza con diidx ni naareni lojtu caj loj te guijsz ni naareni baxhalnu lojtu, cadro caj "dxej ni guibi' Jesucrist abidzujñ". <sup>3</sup> Na'c gusaantu gusguee bejñ la'tu xcuent rediidxre. Che gajd dxejga guidzujñ, su' bejñ ni sibālaz xtidx Dios, dxejc suluiiloj beņlatsiaduxh, xi'n nani sinitloj par tejpas. <sup>4</sup> Bejñre siliā'p lagajc xpala'nni, sidxe'chni lo guiraa ni sanā laj Dios, nājza xhitis ni rajñ bejñ, te cueni neņ xquidoo Dios, guluiilojni si'c lagajc Gueb Dios.

<sup>5</sup> ¿La di lajztu guisaj cheni guyusicā lojtu, rniā rediidxre lojtu, ā? <sup>6</sup> Naj la'tu anajntu xhini'c ruscuāāzni, te na'c guiricajni ansde guisa' redxej xtēni. <sup>7</sup> Te yālxhiga'tz najc dzunlatsiaj ni alacayajc lo guedxliuj, cayāādxhtis guibicaj nani caguscuāāzni galāiini. <sup>8</sup> Dxejc suluiiloj beņlatsiaduxhre. Niluxh Dad Jesucrist, sugu'tnini con bero'ni, che guibi' Jesucrist lo guedxliuj xpianijni sujn nitlojni. <sup>9</sup> Beņlatsiaduxhre najc si'cpac najc bendxab. Che guidzujñni, guidzujñni si'c te bejñ nani rnibee, sujñni seen, sujñzani milagrw ni rusguee. <sup>10</sup> Con xcāllatsiaj bejñre susgueeni guiraa renani alagunijt lo Dios sa'csi direni nicājb ninālazreni didxlii ni nuslaareni neņ dojļ. <sup>11</sup> Ni'cni susaan Dios jāād te yālrusgueduxh te chalilajzreni didx-xhiī. <sup>12</sup> Te gabijļ jii guiraa renani di nicājb nililajz didxlii, alga bidxaglaizreni yāllatsiaj.

*Reni gule Dios guirii neņ dojļ*

<sup>13</sup> Niluxh nuurnu riājļ gudeedtsnu xquixhtios lo Dios por la'tu, bejtznū, ni sanālaz Dad Jesucrist. Rudedēnu xquixhtios sa'csi galooli gule Dios la'tu te guslaani la'tu dojļ, xcuent Xsprit Dxanni ni rusia lastootu, nājza redidxlii ni huililajztu. <sup>14</sup> Ni'cni che biejn diajgtu diidx ni basule'nu lojtu, gurejdx Dios la'tu, te xca'zatu xcālrdimbicha' Jesucrist.

<sup>15</sup> Naj bejtznū, colchanuu, colsudzu'tz, na'cza jāļļajztu rediidx ni balijdxnu la'tu che guyu'nu ro'c, nājza rediidx ni bacuaanu lo guijsz ni baxhalnu lojtu. <sup>16</sup> Lagajc Dad Jesucrist, nāj Dios Xtradnu, ni sanālaz nuurnu, ni ruscājñ lajznu par tejpas, ni baniidx xcālrbāāznu racnājni nuunu, <sup>17</sup> guspaani lajztu, gusudzu'tzni la'tu lo guiraa redidxsac'ni guiniitu nājza redzuunsac'ni guntu.

## 3

*Colñab lo Dios xcuent nuurnu*

<sup>1</sup> Bejtznu, colnab lo Dios xcuent nuurnu te chanuu guire'ch xtidx Dad Jesucrist, te che gusoob bejn diidxga chä'p xpala'n diidxga, sigajcni gujcni con la'tu. <sup>2</sup> Colnabza lo Dios xcanäjni nuurnu te di tednu ladznaa rebenlatsiaj, rebenquijdx, sa'csi xhet guiraadi bejn rajp yälirilajz. <sup>3</sup> Dios rusoob xtiidxni, susudzu'tzni la'tu, sacnäzani la'tu te di sactu dolgujdx. <sup>4</sup> Abascuedxi Dios lastoonu xcuenttu sa'csi anancheenu cayujntu guira'ti nani gunibeenu guntu, luxh si'cza sinuu gusoobtu xtiidxnu. <sup>5</sup> Canabä lo Dad Jesucrist guniidxni gacheerutu xcälsanälajz Dios, canabäza colcuedcxi lajztu si'cni bejn Crist che gudejdni trabajw.

*Nanab jiennu dzuun*

<sup>6</sup> Bejtznu, con laj Xtrad Jesucristnu, rnibeenu guibicajtu lo chutis te sa'nu ni ricanzajtis, ni di rlajz gunni dzuun. Guibicajzatu loj reni di guibajñ si'cni baluiinu riäjł guibajntu. <sup>7</sup> La'tu anajntu xho riäjł guibajntu, chanuutu guntu si'cni riennu nuure. Najntu nuurnu dinu nicanzaj che guyu'nu lojtu sa'csi biennu dzuun. <sup>8</sup> Dizanu nidauxlia' xcu'n chu tejtu; guiraani bidiixnu, biennu dzuun dxej-yääl, te di nutaalnu xtzuun chu tejtu. <sup>9</sup> Masä nungäjł niniabnu niacnäjtu nuurnu, dinu niniabni; alga biennu dzuun te baluiinu xho chanuutu. <sup>10</sup> Cheni guyu'nu lojtu, gunibeenu scree guntu: Chutis ni di rlajz gun dzuun di riäjł xca'ni xhi gauni. <sup>11</sup> Aguniireni loonu baltitu rcanzajtis, direni gun dzuun, alga rihuiireni xhi cayujñ rebejn. <sup>12</sup> Rulijdxnu rebejnre, rnibeenureni con laj Xtrad Jesucristnu: colcuedcxi, colyejn dzuun te gautu.

<sup>13</sup> Bejtznu, na'c guidxajgtu guntu dzunsa'c. <sup>14</sup> Palga yu' chu tejtu di gucuadajg xtiidxnu ni caj lo guijtzre, colhunii chuni'cni te na'c guchaagtuni, te guitujyni. <sup>15</sup> Niluxh na'c ga'ptuni si'c ni rdxe'ch lojtu, colguliidxni si'c bejtztu.

*Rusadiidxnireni*

<sup>16</sup> Gueb Dios xten yälrbedxi, guscuedcxi lajztu guixe-guixee, masä xhitis sajctu. Jiannäj Dad Jesucrist guiraatu.

<sup>17</sup> Narä, Pabl cacuaä xtixtiosre con naäpac si'c runä lo guiraa rexquitzä, scree rucuaä. <sup>18</sup> Gacnäj Xtrad Jesucrist guiragajctu. Sugacni si'c.

## Guijtz Ganid Lo Timoteu

### *Pabl rucuaa te guijtz lo Timoteu*

<sup>1</sup> Narä Pabl, nacä te apost xten Jesucrist, rucuaä guijtzre lojlu. Nacä apost sa'csi si'c gunibee Dios ni rusläa nuurnu lo dojl näjza Dad Jesucrist nani cholääznu. <sup>2</sup> Timoteu, luj najclu si'cpac xinganä lo yälirililajz. Xtdadnu Dios näjza Xtdad Jesucristnu gacnäjl, gulaslajzreni luj, guscuecdxireni lastoolu.

### *Pabl rulijdx xcuent reni ruluii diidx-xhii*

<sup>3</sup> Che sia'ä reguedx Macedonia, gunibeä jia'nlu guedx Éfeso te gulijdxlu gaii bejn te na'c guluiireni garenca diidx, <sup>4</sup> te na'c jiutejreni rexcuent rebeñtiemp, te na'cza jiuuduxhreni chu gujz xepengoldooreni, sa'csi di rediidxre gacnäj guiroobru lastooreni si'c rustioob yälirililajz lastoonu. Näj rnibeä si'c chanuu gulijdxlu rebejn.

<sup>5</sup> Rulijdxnu bejn te ga'preni yälrinälajz sa'reni. Ganid nanab gacnaya lastooreni, nanab ga'preni xhigabsa'c, nanabza chalilajzpacreni. <sup>6</sup> Yu'reni abaro'n rediidxre, riejytis ro'reni saniduxhreni diidx ni xhet sajcdi. <sup>7</sup> Rlajzreni gacreni bejn ni najn leii, niluxh niclaza laareni direni gacbee xhi säloj ni rniireni, niclaza xhi säloj rediidx ni ruluiireni, räjpreni, 'didxliipac dee'.

<sup>8</sup> Anajnnu leii xten Dios najc sacduxhni, palga jiennu si'cni rniipacni. <sup>9</sup> Najnnu di leii gac par bensa'c, najcni par reni najc benlatsiaj ni di jiu leii xten Dios, näjza reni di gusoob diidx; par rebeñ guiidx, näjza rebeñdojl; par reni di jiu Dios, näjza reni rusguee; par reni rugu't xtdadni, xnanni, näjza guiraa reni rugu't bejn; <sup>10</sup> par reni resnäj te gunaa ni digac chäälreni, näjza reni resnäj lagajc saniguiireni; par reni rbajn bejn; reni rniü didx-xhii; reni rniü didx-xhii si'c didxle' parsi rusguee sa'reni; näjza bejn ni rujn xhitis xhi xtee dzuun ni digac dzunsa'c, <sup>11</sup> nalajznu sa' redzunsa'c ni rulijdx xtidx Dios-le', diidx ni rusläa lo dojl. Narä biannää diidxre.

### *Rudeedni xquixtios lo Dios sa'csi rulaslajznini*

<sup>12</sup> Rdedä xquixtios lo Dad Jesucrist ni runiidx yälrnibee narä sa'csi najnni nasobdidxä, ni'cni guleni narä gunä xtuunni. <sup>13</sup> Luxh galoo guniyaäni, birinalä xpejnni, basacsifäreni. Niluxh Dios balaslajz narä, sa'csi dina niacbeä xhini'c cayunä, sa'csi gajdna chalilazä. <sup>14</sup> Niluxh lacti guroob gujz yälracnäj xte Xtdadnu, guideb yälirililajz, näj yälsanälajz ni rajp Jesucrist.

<sup>15</sup> Diidxre najc guliduxh, nanab chalilajzpacnuni: Jesucrist biääd lo guedxliujre te gusläani rebeñ dojl; lo rebeñ dojl narä nacäru beñdojlduxh. <sup>16</sup> Ni'cni balaslajz Dios narä, mase nacä beñdojlduxh lo guiraareni, te ganid con narä guluiini xho rbäjz Jesucrist te chalilajz bejn xtiidxni, te filoj reni churu chalilajz xtiidxni te ga'preni yälrnabajn par tejpas. <sup>17</sup> Dios najc reii, reii ni di guet, reii ni di guzen, laatisni najc Gueb Dios ni nanduxh, ni'cni colguliä'p xpalä'nni, colgajnni guideb guibajntu näjza par tejpas. Si'c gacni.

<sup>18</sup> Xi'nä, Timoteu, dee najc yälrulijdx ni runidxä lojlu te gucusa'clu si'c te soldaad ni abisieed, sigajc ni gunii reprove't xcuentlu galoo. <sup>19</sup> Di gunijtlu yälirililajz, bejnza xhigabsa'c, sa'csi yu'reni abaro'n xtidx Dios, ni'c abanijtreni yälirililajz. <sup>20</sup> Si'c gusajc Himeneo näj Alejandro, luxh abatedäreni ladznäa beñdxab te guisieedreni na'c guniya'reni Dios.

## 2

### *Ruluini xho guiniabreni lo Dios*

<sup>1</sup> Rulidxälu ganidoo cuedxlu, guiniablu lo Dios, gudeedlu xquixtios lo Dios xcuent guiraa rebejn. <sup>2</sup> Guiniabzalu xcuent re'reii näj guiraa reni rnibee lo guedxliujre, te gac guibanxinu, te gac chanuunu xnez Dios, te saru guibajnnu. <sup>3</sup> Sa' yälrniabga najc laaca, luxh si'c rdxaglajz Dios ni rusläa nurnu lo dojl guiniabnu lojni. <sup>4</sup> Dios rlajz laa guiraa bejn lo dojl, rlajzani gacbeepacreni xtidxliini. <sup>5</sup> Yu' tejtis Dios, näjza tejtisza nani rusiälj diidx lo Dios näjza loj rebeñ guedxliuj. Laani najc Jesucrist ni gujzca niguii. <sup>6</sup> Jesucrist gujt lo cruzj te gudijxni redojl xten guiraanu ni tre' lo guedxliuj. Dee gujz che gojl dxej ni gule Dios. <sup>7</sup> Dios gule narä te gacä apost te gusule'ä xtiidxni, yälirililajz näjza didxlii lo reni di gac xpejn Israel. Si'c ni rlajz Jesucrist nniä didxlii, dina guiniä diidx ni rusguee.

<sup>8</sup> Ni'cni rlazä guiraatis lajt guiniab rebejn lo Dios, saru guiliäs naareni, gusaanreni yälrdxe'ch, na'c gunreni bieje. <sup>9</sup> Si'cza regunaa, saru gacwreni xhajbreni, na'c gacreni gunaroxhi, cuedxireni. Xhet si'cni regunaa ni entis rsucheduxh con oor o perl o ladsajc, rajc guichniil yejcnj te guidxeloj bejnreni. <sup>10</sup> Masru ruchaag gunreni si'cni rchalglajz Dios, si'c riälj gun guiraa regunaa ni yu' lo Dios. <sup>11</sup> Riälj dxitis gucuaadijg regunaa xtidx Dios ni

rusule' reniguii. <sup>12</sup> Dina xcäbä gusule' te gunaa diidx lo guiraa rebejn, niclaza guinibeeni lo reniguii, dxitis cueni lo rebejn ni cagucuaiajg diidx nani cagusule'ni. <sup>13</sup> Sa'csi ganid benchee Dios Adán, dxejctiru bencheeni Eva. <sup>14</sup> Luxh et Adandi basguee beñdxab, beñdxab basguee gunaaga, dxejc biajbni nen dojl. <sup>15</sup> Niluxh siliaa regunaa, palga jiuveni xtzuunreni si'c nan, palga chanuu chalilajzreni xtidx Dios, palga chanälajzreni sa'reni, palga chutisreni lo Dios, gaczarení gunasa'c cuedxireni.

### 3

#### *Xho riäjlgac reni rnibee*

<sup>1</sup> Dee najc didx gulii: palga rlaiz te niguii ga'p dzuun xten Dios, gusule'ni xtidx Dios, guinibeeni rebejn, te dzunsa'c najc ni rlaizni gunni. <sup>2</sup> Ni'cni, ni rlaiz gac nani rnibee, riäjlguibansa'cni te na'c chu xhicuent guiniyaj rebejn. Riäjlgacni chääł tejtis gunaa, riäjlgacni susinni, gacni te beñsa'c, cuedxini, te guibansa'cni. Riäjlgacni gudxojni rolijzni guidzujñ bejn, năgajc riäjlgacni te bejn ni nansa'c te guluini. <sup>3</sup> Na'c gacni te bengui, nicla te ni rdxagdijl bejn, na'ca gacni te nani rsia' laizni ga'pni xhidajl meel, riäjlgacni cuedxi laizni, na'c chanälajzni meel. <sup>4</sup> Riäjlgacni guinibesa'cni rolijzni, saru gunni te gusoob rexi'nni xtiidxni. <sup>5</sup> Sa'csi palga di te bejn gan xho guinibeeni lagajc rolijzni, aticaxh gac ga'pni guidoo xten Dios. <sup>6</sup> Di riäjlgacni guinibee te beñcoob nani entis huililajz, te di guschä'pni xpala'nni sas jiajbni lo lagajc xcälñaj Dios ni biajb beñdxab. <sup>7</sup> Luxh riäjlgacni guinii reni di chalilajz xtidx Dios laaca najcni, te na'c jianxtujyni, te na'ca jiajbni ladzñaa beñdxab.

#### *Xho riäjlgac reni rcanäj nen guidoo*

<sup>8</sup> Si'ca rediaconos riäjlgacreni bejn ni yu' xcäriejnreni, nanab gunreni si'cpac ni rniireni, na'ca soozreni, na'c xca'reni meel ni direni niunsa'c gaan. <sup>9</sup> Riäjlgacni gapdzu'tzni rediidx nagajn xten yälñililajz, ni'c nanab gac naya lastooreni. <sup>10</sup> Riäjlgacni fixgaatu xho nabajñreni. Palga nabansa'cni, rutz gacdi gucuaquidireni, sajg gacreni diacono. <sup>11</sup> Regunaa ni rlaiz gac diaconas riäjlgacni chu xcäriejnreni, na'c güireni diidx ni di guchaag, na'c soozreni, gacreni gunasa'c, cuedxireni, gunreni si'cpac ni rniireni lo guira'ti dzuun. <sup>12</sup> Riäjlgacni rediacono chääł tejtis gunaa. Riäjlgacni guinibesa'cni rexi'nni năj guiraa reni yu' rolijzni. <sup>13</sup> Sa'csi rediaconos ni runsa'c xtzuunni, sanälajz bejnreni, dizarení guidxejb rsiudzu'tz lastooreni lo xcälñililajz xtidx Jesucrist.

#### *Gurobduxh najc yälñhiga'tz xten Jesucrist*

<sup>14</sup> Cacuaä diidxre lojlu, niluxh rlaizä jiadhuigaä la'tu. <sup>15</sup> Luxh palga gaclaä, anajñlu xho riäjlgacni guibajn bejn rolijz Dios, nalajznu xquidoo Gueb Dios ni nabajn par tejjas. Guidoore rniadszu'tz năza ruluiuru didxlii xten Dios. <sup>16</sup> Rdxeloyaduxh guiralii bejn yälñhiga'tz xten xcälñajn Dios:  
Dios biääd lo guedxliuj si'c te beñguedxliuj,  
Sprit Dgan xten Dios gunii beñdxanni;  
bahuii rexangl Dios lojni;  
basule'reni xtiidxni lo rebejn ni di gac xpejn Israel;  
guira lajt huililajz bejn xtiidxni;  
huäjsni lo xcälñdimbicha' Dios xhaguibaa.

### 4

#### *Reni rbicaj lo xnezyuj Dios*

<sup>1</sup> Aguniipac Sprit Dgan siääd redxej che chu reni guro'n yälñililajz, sucuaiajgreni xtidx rebejn ni rusguee năj xtidx rebeñdxab, <sup>2</sup> nicla jiuveni rniireni didx-xhii ni rusguee, sa'csi xhetiru xcäriejnreni, anajcni si'c najc cadro rudxujy te guiblaa: xhetru racbeedini. <sup>3</sup> Suluii rebejnre na'c guchñaa bejn, suluiizarení na'c gau bejn guiralaj, niluxh Dios bejn pac redee te xca' rebejn ni rliilajz, ni racbeza didxlii, te gudeedreni xquixtios lo Dios. <sup>4</sup> Guiralii reni benchee Dios najc laaca, di riäjlgacni cuälaznu xhi rca'nu che ruedeednu xquixtios loj Dios. <sup>5</sup> Sa'csi xtidx Dios năj yälñbedx-rniab lo Dios runsa'c guira'ti.

#### *Te ni runsa'c xtzuun Jesucrist*

<sup>6</sup> Palga susnajlu laiz rebejtznu rediidxre, sajclu te mossa'c xten Jesucrist, luxh si'c sisieedruzalu diidx xten yälñililajz, năj yälñluisa'c ni sanuulu. <sup>7</sup> Na'c jiulu ni rniireni regunaroyei ni xheti xtzuunni. Bisieed sudzu'tz lastoolu lo xtidx Dios. <sup>8</sup> Guxii sajg guinibduxh bejn te gusutijpni tiejxhni. Niluxh sacduxhru cucheeni xtidx Dios nen lastooni, sa'csi racnăjni bejn lo yälñabajnre năza lo yälñabajn ni najc par tejjas. <sup>9</sup> Dee najc didxlii, riäjlgacni chalilajz guiraatuni. <sup>10</sup> Ni'c riennu dzuun, rdeednu trabajw, sa'csi cabăjznu Gueb Dios ni nabajn, ni ruslaa bejn lo dojl, ganiddoo renani rililajz xtiidxni.



<sup>11</sup> Sajplu guinibeelu soob rediidxre, nájza guluilu rediidxre. <sup>12</sup> Di gusaanlu cuälazreni luj sa'csi najclu bi'n; riäjł gaclu te ni suu te fii guiraa reni rililazsa'cpac xho rniilu, xho nabajñlu, xho sanälajzlu sa'lu, xho rililajzlu, nájza xho rajplu xhigabsa'c. <sup>13</sup> Lał ni guidzunä ro'c, bił xtidx Dios lo rebejn, balijdxreni, baluiiza xtidx Dios lojreni. <sup>14</sup> Di gusaanlu reyälñajn ni baniidx Dios lojlu cheni basuj rebengool ñaareni yejclu por xtidx Dios, guniireni diidx xcuent nani churu gac.

<sup>15</sup> Guet-guejt basnaj lajzlu rediidxre, biusa'c rediidxre, te gac fii guiraareni xho sanuulu lo xtidx Dios. <sup>16</sup> Gopdzu'tz lagajc luj nájza rediidx ni ruluuulu; guzudzu'tz lo guiraa rediidxre, te si'c laalu lo dojl, te laaza reni rucua diajg xtiidxlu.

## 5

### *Xho guibannäjnu reni rililajz*

<sup>1</sup> Na'c quidxa'lu loj te bengool; guninäjni si'c xtaclu, balijdx rebi'n si'c bejtzlu, <sup>2</sup> balijdx renanbengool si'c xnanlu, balijdx redxap steeb si'c rebisajñlu con rehxigabsa'c.

<sup>3</sup> Gucnäj rebiiud ni guliipac rquiin chu gacñajreni te chu xhi gaureni. <sup>4</sup> Niluxh palga yu' chu biuud yu' xi'nni o xajni, suguisiedxgaareni guibañ nayareni lo xnez Dios, te quixreni di'n ni nasääbreni lo xtaclreni, náj xnanreni ni baslaareni, sa'csi ni'c najc laaca, rdaxaglazza Diosni. <sup>5</sup> Gunaa ni najcpac biuud, abia'n xtebni, ni'c rbäjztisni lo Dios, dxej-yaäl rbejdx-rniabni lo Dios. <sup>6</sup> Niluxh biuud ni nabajñ cadedgustisni najc si'c te ni agajt neñ dojl. <sup>7</sup> Basule' rediidxre lojreni te rut gucuaquijdireni. <sup>8</sup> Palga yu' chutej ni di gacñaj resa'ni, lagajc reni rbäjz rolizni, ni'c agulälaz xtidx Dios, benguijdxru najcni lo rebejn nani di chalilajz xtidx Dios.

<sup>9</sup> Di gucuaalu laj rebiiud lo guijt te gacñajtuni palga gajdni chu gayojñ ijz. Riäjłza gac biuudga te gunaa ni gubannäsa'c chäälni. <sup>10</sup> Riäjłza gumbee bejñni xcuent redzunsac'ni rujnñi; palga baslaani rexi'nni, palga badedlaani rolizni gues beñ zijt, palga gudiibni ni' rexpejñ Dios te si'c guzeñ xcälñadolajzni, palga racnäjni reni rdejñ trabajw, palgaza riuni rujnñi guira'ti redzunsac'.

<sup>11</sup> Niluxh na'c gucuaalu laj biuud ni yu' guxiiru ijz sa'csi che guichaglazjreni te niguii, siälłajzreni diidx ni bia'nreni lo Jesucrist, te rlajzni guchnasacreni. <sup>12</sup> Dxejc siu'reni neñ dojl sa'csi rbälazreni rediidx ni bia'nreni che galoo bejñreni xhigab ninuureni lo xtzuum Dios. <sup>13</sup> Dxejc sia' lojreni xhet gundireni, rijreni rolizj bejñ ricuereñi. Luxh malaii ni'ctis gunreni. Niluxh rliászareni didxxhi, richu'reni lo xhitis, rniizareni diidx ni di guchaag guiniireni. <sup>14</sup> Ni'cni rlazä rebiiud ni najc dxa'pru gucñaareni stehuält, chu xi'nreni, fisa'ceni rolizjreni te na'c guiniyajreni rebejñ ni rdxe'ch lojnu. <sup>15</sup> Sa'csi yu' gaii biuud ni alagubicaj lo xnez Dios sanajñreni beñxab.

<sup>16</sup> Pal yu' tej resa'nu ni najc sa'ni te biuud, riäjł gacñajñni, na'c gusaanni gutajłni xtzuum guidoo, te si'c guidoo sajç gacñaj rebiiud ni rquiinpac chu gacñajreni.

<sup>17</sup> Rebengool ni rnibesa'c guidoo, riäjł chanälajzrutureni náj gudeedrutu guiraa nani rquiinreni, si'c najc reni rusulesa'c xtidx Dios, rulidxsa'ceni la'tu con xtidx Dios. <sup>18</sup> Sa'csi lo xtidx Dios caj scree: "Na'c gusälłu guijxh ro' gon che rusiani triuun"; si'ca caj stee diidx: "Riäjł gax bejñ ni rujn dzuun."

<sup>19</sup> Na'c cucua diajglu xtidx tej ni rucuaquij te bengool palga ruti tio'p, choñ testiigw. <sup>20</sup> Niluxh reni sanuu rujntis dojl, riäjł gulijdxlureni nez loj rebeñ guidoo, te nájza laareni guidxrejñreni. <sup>21</sup> Nez loj Dios, nez loj Dad Jesucrist, nez lojza reangl ni gule Dios, rulidxduxhäu chanuulu lo rediidxre, na'c jiuurulu tej bejñ lo sa'ni. Bejñ tebloj loj guiraa rebejñ. <sup>22</sup> Na'c gusiojñ lajzlu gusuju ñaalu yejç te bejñ, te gacni beñ guidoo palga gajdni guisieed guibañsa'cni lo xnez Dios sa'csi lagajc yejclu jiajñ rextojłni. Gubicaj lo guiraa dolguijdx.

<sup>23</sup> Na'cru yälu ganax nis. Gu'za tudxe'n bin sa'csi racxhuu xque'lu, nájza sa'csi yu'ru rexcälracxhuulu.

<sup>24</sup> Yu' bejñ ruzengajc rextojłni ni'c rajcni castiigw, niluxh yu' bejñ ni di xtojłni guzengajc. <sup>25</sup> Sigajcsa redzunsac'ni rujn bejñ; yu'reni ruzengajc, niluxh mase dini guzengajc, digacdi jianxhiga'tzni, sidzujñ dxej suzeñni.

## 6

<sup>1</sup> Reni najc mos riäjł cuadiajreni xtidx xlamreni, te na'c guiniyaj rebejñ laj Dios niclaza xtidx Dios ni rusule'nu. <sup>2</sup> Palga yu' remos ni najc xlamni te nani rililajz, na'c cuälazreni rextiidxni sa'csi najcni bejtzni lo xcälrililajz Jesucrist. Riäjł gusa'cruene xtzuumni, sa'csi najceni sa'ni loj yälrililajz xten Dios, luxh sanälajzarenini. Rediidxre baluii, basule'.

### *Yälñabansa'c nájza te lastoo ni rbedxi*

<sup>3</sup> Palga yu' chu ruluu garenca diidx, diidx ni digac didxsa'c, si'c najc xtidx Jesucrist, nájza xhet si'c diidxdi ni ruluu xho guibañsa'c bejñ, <sup>4</sup> bejnga rlajz guiliä'p lagajc xpala'nni, niluxh

xhet najndini. Si'c te yälguijdx yu'tis yejcnj yälguiniab diidx, yälrdildiidx. Luxh redee rujn rdxe'ch lajzreni, rujnni rdxe'ch bejn lo sa'ni, rujnni rniyaj bejn, rujnzani di bejn guinisa'c lo sa'ni. <sup>5</sup> Rujnzani rdilnäj bejn sa'ni. Guiraa redee gun bejn ni aguxhijn xcäriejnni, bejn ni diru ga'p didxlii. Rchaloreni sujnreni ganduxh xcuent rediidx ni ruluireni. Gubicaj lo sa' bejnre. <sup>6</sup> Niluxh yäl nabansa'c näjza te lastoo ni rebedxi, redee sa'cduxh. <sup>7</sup> Sa'csi xhet biopnädinu lo guedxliujre, luxh sigajcza xhet sajcdi chonänu che guetnu. <sup>8</sup> Niluxh palga rajpnu xhi gaunu, xhi gajcwnu, con ni'c riäjł guibalaaznu. <sup>9</sup> Niluxh reni rlajz ga'p xhidalduxh meel, riajbreni lo xhigab guijdx, rujnzareni xhidajł dzuun ni xhet sajcdi, ni rujn daan, ni rusiääz bejn lo yälruhxijn, lo yälrnitloj. <sup>10</sup> Sa'csi yälrinälajzni meel najc xlobaa guiraa redzunguijdx. Yu'za bejn ni rlazduxh ga'pni meel, rusaanreni xcälrililajz Dios, dxejc lagajc laareni rujn rdedduxhreni trabajw.

*Dzun-huen xten yälrililajz*

<sup>11</sup> Niluxh luj, bejn xten Dios, baxu'n lo guiraa dee, te chanuulu lo xcälxhigabsa'clu näjza yäl nabansa'clu; te chanajllu yälrililajz näjza yäl sanälajz; te chanuulu lo yälrbecdx lajz näjza yäl nadolajz. <sup>12</sup> Benduxh dzuun xcuent yälrililajz Jesucrist, gunazdzu'tz yäl nabajñ ni najc par tejpas. Ni'cni gurejdx Dioslu, luxh aguniilu rililajzlu xtidx Dios nez loj xhidajł bejn, te anancheereni. <sup>13</sup> Naj rulidxälu nez loj Dios ni ruded yäl nabajñ lo guiraa ni yu' lo guedxliujre, näjza nez loj Jesucrist, ni basule' xtiidxni nez lo Poncio Pila't, <sup>14</sup> rnibeä guzobsa'clu guiraa rediidx ni rniä lojlu, na'c guchaaluni, te na'c guiniyajreni luj naj niclaza cheni jiääd Xtd Jesucristnu. <sup>15</sup> Sidzujñ dxejga nani agunii Dios guidzujñni. Dios ni najc le' sujn scree sa'csi laatisni najc Dios, najcni reii xten rereii, rnibeezani reni rnibee. <sup>16</sup> Laatisni dini guet, nabajñni lo bianij cadro rut rajcdi rbig. Nicla te bejn gajd fii lojni, niclaza gac fiireni lojni. Xtebtis laani riäjł ga'p rebejn xpala'nni. Laani rajp yäl rnibee par tejpas. Sugacni si'c.

<sup>17</sup> Balijdx reni rajp xhidajł xhixtenni lo guedxliujre, na'c guschä'preni xpala'nreni, niclaza chanälajzreni xhixtentisreni. Huenru chanälajzreni Dios ni nabajñ, ni runiidx loonu guiralii xhixtennu ni rquiinnu te guibalajznu. <sup>18</sup> Balijdxreni gunreni dzunsa'c, gundajñreni dzunsa'c, gacnäjreni reni xhet rajpdi, cuenäsa'creni sa'reni. <sup>19</sup> Si'c ga'preni yäl nasa'c ni guzudzu'tzreni che jiääd Jesucrist, te guiniaztsu'tzreni yäl nabajñ par tejpas.

*Rulijdxni Timoteu*

<sup>20</sup> Timoteu, cuenäj ni rniä lojlu. Na'c jiulu didxguijdx ni yu' lo guedxliujre, niclaza didx-xhii, niclaza rediidx ni rusguee, ni rbälajreni 'yäl najñ'. <sup>21</sup> Sa'csi yu' reni sanuu yäl najñre ni'c banijtreni lo Dios xcuent yälrililajz. Gacnäj Dios luj. Sugacni si'c.

## Guijtz Ni Rojp Lo Timoteu

### *Stee guijtz ni baxhal Pabl loj Timoteu*

<sup>1</sup> Narä Pabl, nacä apost xten Jesucrist. Dios gule narä, xcuent yäl nabajn ni gudeed Dios loj reni yunäj Jesucrist, si'c ni bia'n diidx. <sup>2</sup> Cacuaä guijtzre lojlu, Timoteu, xi'nä lo yäl rililajz. Rinälazä luj. Rniabä lo Xtadnu Dios näj lo Dad Jesucrist gacnäj luj, gulaslajzreni luj, guscuecdxireni lajzlu.

### *Rusule'ni xcuent Jesucrist*

<sup>3</sup> Rnaj lazälu che rniabä lo Dios dxej-yääl. Dxejc rdedä xquixtios por luj lo Dios. Naya xcärienä yu'ä lo Dios, runä xtzuunni si'c bejnza rextadgoldoä. <sup>4</sup> Rnaj lazä xho biinlu, naj rlazä fiä lojlu te guibalazä. <sup>5</sup> Rnaj lazäza yu'pac yäl rililajz lastoolu si'cni guyu'ni galoo lastoo xmamlu Loida dxejcru lastoo xnanlu Eunice si'cza yu' yäl rililajzga lastoolu naj.

<sup>6</sup> Ni'cni rniä lojlu naj, si'cni rcanäj bejn rodäj te di juini, si'cza cuanäduh reyal'najn ni baniidx Dios lojlu cheni basuä naä yejclu. <sup>7</sup> Sa'csi di Dios nuniidx te lastoo ni rdxejb loonu, baniidxni te lastoo ni rsiutijp, baniidxni te lastoo ni rinälajz, baniidxzani yuduxh xcäriejnnu. <sup>8</sup> Na'c guitujyлу guiniulu rediidx xten Xtdad Jesucristnu, na'cza guituinäjlu narä sa'csi yu'ä neñ latzguib xcuent Jesucrist. Näj luj gudejd trabajw ni siääd xcuent yäl rusule' xtidx Dios si'ctis gacnäj Dios luj. <sup>9</sup> Dios ni gulää nurnu neñ dojl, gurejdx nurnu te guibansa'cnu lojtisni. Gurejdxni nuurnu xhet sa'csi biennu dzunsa'c, alga sa'csi si'c rlanjni laani, sa'csi balaslajzni nuurnu xcuent Jesucrist galooli che gajdli guncheeni guedxliuj. <sup>10</sup> Niluxh cheni biääd Jesucrist ni badzucaj rextojlu lo guedxliujre, baluiloj yäl rulaslajzga. Jesucrist banitloj yäl rniabee xten yäl guijt. Xtiidxni, ni rusule' xho rbicaj dojl, baluui yäl nabajn, näjza yäl nabajn par tejpas.

<sup>11</sup> Dios gule narä te gacä te ni rusule' xtiidxni, te gacäza te apost, näjza te bejn ni rului loj reni di gac xpejn Israel. <sup>12</sup> Ni'cni rdedä trabajw xcuent guiraa rediidxre. Niluxh dina guituiyä, sa'csi narä nanä chu xtiidx huililazä, nancheä laani sajz gapdzu'tzni dzuun ni baniidxni loä dxejli cheni guibi'ni.

<sup>13</sup> Chanuu guluiulu redidxsac ni banidxä lojlu. Gubajnza lo yäl rililajz näj lo yäl sanälajz ni rajpnu sa'csi yu'nu lo Jesucrist. <sup>14</sup> Cuanädu'tz reyal'najn ni baniidx Dios lojlu näj Sprit Dxan xtenni ni rbäjz neñ lastoonu.

<sup>15</sup> Anajnlу guiraa reni siääd reguedx Asia gulälaz narä; lo redee nadxaag Figelo näj Hermógenes. <sup>16</sup> Dad Jesucrist gacnäj reni yu' rolizj Onesiforo sa'csi balti huält biädspaani lazä, dini nitujy sa'csi yu'ä neñ latzguib. <sup>17</sup> Che bidzujni guedx Roma, gudiilpacni narä te bidxälni narä. <sup>18</sup> Dad Jesucrist gulaslajz laani che guidzujn dxej ni guibi' Jesucrist. Luj anajnlу balti dzunsa'c bejni che guyu'ni guedx Éfeso.

## 2

### *Te ni runsa'c xtzuun Jesucrist*

<sup>1</sup> Ni'cni xi'nä, guzutijp sa'csi rulaslajz Jesucrist luj, racnäjnlu. <sup>2</sup> Rediidx ni abiejn diajglу guniä nez loj xhidal bejn lagajc rediidxga guniini lo rebejn ni rililajzpac, loj rebejn ni sajz guluiiza diidxga lo stecuaa bejn.

<sup>3</sup> Batijp lajzlu tednäjlу narä trabajw si'c te soldadsac xten Jesucrist. <sup>4</sup> Di te soldaad gun dzuun ni bejni che gajdni gac soldaad. Rujjni xtzuun bejn ni guleni gacni soldaad, te si'c guspaani lajz bejnга. <sup>5</sup> Sigajcza, ni rguijt digacdi xca'ni yäl nasa'c palga dini quitsa'c si'c riäj quitni. <sup>6</sup> Bejn ni rujn dzuun loniaa nanab xca'ni xcäl nasa'cni ganidoo. <sup>7</sup> Bejn xhigab xcuent ni rniä lojlu, dxejc sujn Dios gacbeelu guiraani.

<sup>8</sup> Basnaj lajzlu Jesucrist, te xagdoo to David ni huäjz lo rebengut. Dee najc xtidx Dios ni rudzucaj dojl, si'c ni rusule'ä lojlu. <sup>9</sup> Ni'cni cagutipä lazä cadedä trabajw, caduä caden si'c te bejn ni bagu't sabejnni. Niluxh digacdi xcaduu xtidx Dios. <sup>10</sup> Ni'cni cadedä trabajwre te gacnää reni agule Dios te näjza reni'c chalilajz xtiidxni te guibajzreni lo bianj xten Jesucrist par tejpas.

<sup>11</sup> Guliiduxh najc diidxre;

palga agujtnu con laani, sibanäjzanu laani.

<sup>12</sup> Palga rdejdnу trabajw, sinibenäjzanu laani.

Palga dinu guicä'p numbeenuni, dizani guicäjп numbeeni nuurnu loj Xtdadni Dios.

<sup>13</sup> Mase dinu chanuu lo xtiidxni, laani susoobni xtiidxni sa'csi digacdi cuatzlajzni diidx lagajc laani.

*Te bejn nani abia xtzuunni*

<sup>14</sup> Basnaj lajz rebejn xcuent rediidxre, gunibee lojreni nez lo Dad Jesucrist na'c tiidiixreni sa'csi sa' diidxga xhet sajcdini, ruxhintisni reni riendiajgni. <sup>15</sup> Batijp lajzlu te guidzujnlu lo Dios si'c te bejn ni runsa'c dzuun, xheti xhicuent guitujyлу, sa'csi ruluisa'cpaclu xtidxliitis Dios. <sup>16</sup> Gulälaz yälriñiyaj näjza xhidalduxh diidx ni xhet sajcdi, sa'csi renani rucuaadijag rediidxga rijabrurēni lo redolguijdx. <sup>17</sup> Luxh diidx ni ruluiireni suxhingajcni lastoo bejn si'c rxhinlajz tiejxh bejn. Ni'c casiajc Himeneo näj Fileto. <sup>18</sup> Abanijtreni lo didxlii. Caniireni ala huäjs bejn lo rebengut. Si'c cagusiejchreni lajz gaii rebejn ni rilajz. <sup>19</sup> Niluxh xtidx Dios rsiudzu'tzni si'c te guij nani nadipduxh, luxh rajpnu diidxre si'c te seen: "Dad guibaa anumbee guiraa reni najc xpejnñi"; näjza "Nanab guibicajreni lo redolguijdx, guiraa reni ahuililajz xtidx Jesucrist."

<sup>20</sup> Neñ te yuro, xhet ganaxdi cos or näjza cos plat yu'. Yu'za cos yajg näj cos bajn; yu'reni najc parsi te laniro, yu'za reni rquini guixe-guixee. <sup>21</sup> Sigajcza te bejn ni rlaiz gun dzuunro xten Dios, riälj guibicajni loj redolguijdx ni xhet sajcdi. Dxejcti Dad Jesucrist sacnäjni te gunni redzunro xtenni.

<sup>22</sup> Gubicaj lo redzunguijdx ni rujn rebejn, huinuu yälñabansa'c, yälirilajz, yälñanälajz, gulecdxiza lajzlu näj reni rujn xtzun Dios, naya lastooreni rbedx-rniabreni lo Dios. <sup>23</sup> Na'c jiulu rediidx ni ruluii rebejn guedxliuj. Anajnlū rediidxga rujn rdilnäj rebejn sa'ni. <sup>24</sup> Niluxh te xmos Dad guibaa di riälj guchaagni reni rdijl; riälj gacni beñsa'c loj guiraatis bejn. Riäljza guluisa'cni; riäljza gutip lajzni che xhet laadi rujn bejn lojni. <sup>25</sup> Guideb yälñadolajz guluiulu reni rdxe'ch loj rediidx ni ruluiulu. Cuäzlu gaxäjsi gusiejch lajzreni gun Dios gacbeereni didxguli, <sup>26</sup> te jianij xcäriejnreni te guiriireni ladzñaa bendxab, te gunreni ni rlaiztis Dios.

### 3

#### *Xho gac rebejn neñ redxelult*

<sup>1</sup> Nanab gacbeelu neñ redxelult sidzujn dxej tedtu trabajw. <sup>2</sup> Sa'csi su' bejn ni chanälajz lagajctis laani, ni rinälajz xmeeltisni, bejn ni rniyaduxhtis, bejn ni rchaglaiz chä'p xpala'ntisni, bejn ni rniyaj Dios; su' bejn ni di gusoob xtidx xtadreni, su' bejn ni di gudeed xquixtios lo Dios, su' bejn ni najc benguijdx. <sup>3</sup> Neñ redxelultga su'za bejn ni di chanälajz sa'ni, bejn ni di lajzni jiajl, bejn ni rusgueduxh; bejn ni digacdi guscuääz dolguijdx ni rujnreni; bejn ni gualazduxh; bejn nani ru'o'n guira'ti dzunsa'c. <sup>4</sup> Neñ redxelultga su' bejn ni ruto' sa'reni; bejn ni di guidxejb gunreni ni rijabtis yejcreni, bejn ni rchalosi najcreni beñsacduxh; bejn ni rchaglaizru gun nani rchaglaiz tiejxhreni lacuaa chanälajzreni Dios. <sup>5</sup> Neñ redxelult su' bejn ni najc si'c benguido, ascanu rusoobreni xtidx Dios, niluxh naadireni xca'reni yälñadip näj yälriñibee xten Jesucrist ni rucha'a lastoo bejn.

Na'c guchaaglu rebejnğa, <sup>6</sup> sa'csi loj sa' bejnre yu' reni richu' rolizj bejn, sasgueereni regunanayääl ni rujn dojl. Regunaare rinuu rujreni ni rlaiztis tiejxhreni, rujnreni guiraloj. <sup>7</sup> Rebejnre rsiedduxh didxcoob, niluxh di didxlii xten Jesucrist jiu' yejcreni. <sup>8</sup> Sigajcni gujc Janes näjza Jambres ni bidxe'ch loj Moisés, sigajcza najc rebejnre, cadxechnäireni didxlii xten Jesucrist, najcreni bejn ni aguxhijn xcäriejnreni, luxh direni gacbee xtidx Dios, direni ga'p yälirilajz. <sup>9</sup> Niluxh direni chanuu xchej, sa'csi huenliisi suhuüi guiraa rebejn najcreni benguijdx. Si'cza gusajc guiro'p reni bidxe'ch loj Moisés.

#### *Pabl rñibee sudzu'tz Timoteu*

<sup>10</sup> Luj sanuutislu lo nani rusule'ä, näj xho nabanä, näj xhicuent runä dzuunre, lo xcälirilazä, lo xcälñadolazä, lo xcälñanälazä, näjza xho batip lazä. <sup>11</sup> Najnlū xho basacsireni narä gudedäza trabajw ladzñaa rebejn neñ reguejdx xten Antioquia, guedx Iconio, näjza guedx Listra. Gudedäz trabajw niluxh Dios baslaa narä loj guiraa retrabajwga. <sup>12</sup> Guliduxh guiraa reni rlaiz chutis loj Jesucrist sidejdpacreni trabajw. <sup>13</sup> Niluxh rebenguijdx näj reni rusguee, sinuutisreni redolguijdx, sinuuru gusgueereni bejn, luxh sugueeza bejn laareni.

<sup>14</sup> Luj huinuu guzudzu'tz loj ni abisieedlu, nani ahuililajzalu, luj anajnlū chuni'c baluini lojlu. <sup>15</sup> Cheni biuxxliulu racbeelu xtidx Dios, ni ruluiulu xho guiriulu neñ dojl te xca'lu yälñabajn par tejpas sa'csi rililajzlu xtidx Jesucrist.

<sup>16</sup> Guiraa rediidx xten Dios ni caj lo guijt, lagajc Dios baniidxni te xcajni lo guijt.

Guiralii xtidx Dios najc laaca te guluii nuurnu xhini'c najc didxlii,

te gacbeenu xhi najc didx-xhii,

te gacbeezanu xho riälj guibañsa'cnu.

<sup>17</sup> Te susin niguii ni najc xpejn Dios,

te gac gunni guiraa redzunsa'c ni riälj gunni.

## 4

<sup>1</sup> Rulidxälu nez lo Dios näjza nez lo Dad Jesucrist ni jiaäd si'c reii te gunni yälguxhtis loj reni nabajn näjza loj reni agujt; rniäza dee lojlu: <sup>2</sup> basule' xtidx Dios, gususin lo Dios mase xhtis or. Baluui reben dojl, gudilnä j reni di rlanj guzubdiidx xtidx Dios, balidxnä j resa'tu xtidx Dios. <sup>3</sup> Sa'csi sidzujn dxej di rebejn guidxagla jz gucuadia jz yälrluisa'c; alga diidx ni najc lagajc si'c najc xhigabreni rlanjreni jendia jzreni, ni'cni siguiilreni xhidajl bejn ni ruluii te guisiedreni ganax ni rlanjreni gucuadia jzreni. <sup>4</sup> Susäuuren i dia jzreni te di jendia jzreni xtidxlii Dios; alga xhtis diidx gucuadia jzreni. <sup>5</sup> Niluxh luj huinuutis lo xtidx Dios, batiplajz yälhuin, guniitis xho rudzucaj Dios rextoljreni, beñsa'c xtzuuunlu.

<sup>6</sup> Sa'csi narä suga'ä ree te ju'treni narä, asiäddzungajxh dxej ni guetä. <sup>7</sup> Agulu jz bacuaä si'c te soldaad ni huicua sa'c lo guer, agulu jz xnezyua, gopdzutzä yälrlilajz. <sup>8</sup> Naj cabäza xca'a yälñasa'c ni guniidx Dad xhaguibaa, suniidxni yälñabansa'c. Dad najc juejz ni runsa'c yälgu xhtis. Niluxh xhet loätis guniidxni yälñabansa'c. Sudeednini loj guiraa rebejn ni catiplajz cabä jzreni dxej cheni guibisac Jesucrist.

*Rediix ni rä jzni lojtis Timoteu*

<sup>9</sup> Basaaga lajzlu jiaä dhuigajlu narä; <sup>10</sup> sa'csi abasa'n Demas narä. Sanälajzruni redzuun xten guedxliujre, naj sääni guedx Tesalónica. Baxhalä Cresent sää lo reguejdx ni re' nez Galacia. Baxhalä Tito sää guedx Dalmacia. <sup>11</sup> Xtebtis Lucas suganä jz narä. Gudil Marcw te jiaä dñaluni sa'csi sajz gacnä jzni narä lo xtzun Dios. <sup>12</sup> Tiquico baxhalä sää guedx Éfeso. <sup>13</sup> Cheni jiaä dlu, jiaä dñalu ca'p ni basa'nä guedx Troas rolijz Carpo, naj rexlibrä; di jiaälza lajzlu rexquitzä. <sup>14</sup> Alejandro, ni najc gubetzguib, basacsiduxhni narä. Dios quiixni sigajcni bejn i. <sup>15</sup> Luj bahuui te di gunni xhi gunni luj sa'csi rdxe chduxhni lo xtidx Dios ni rusule'nu.

<sup>16</sup> Galoo che bazecä diidx lo reguxhtis, rut gucnä jzdi narä; guiraareni gulälazreni narä. Rniabä lo Dios na'c guchaguentni nani bejnreni. <sup>17</sup> Niluxh Dad ni yu' xhaguibaa gucnä jz narä, baniidxni yälñadip te gujz guniä guiraa xtidx Dios te biejn dia jz reni digac xpen Israel xtidx Dios. Luxh gucnä jz Dios narä gulääni narä ladzña areni, si'c ro' te beedz. <sup>18</sup> Suslaani narä loj guiraa redolgu jdx, saptzu'tzni narä, sigucheezani narä te chunääni lo xcälñibeeni xhaguibaa. Loj i coldeed xquixtios, colgan duxhni par tejpas. Sugacni si'c.

*Rudeedni xtixtios lo rexamigwni*

<sup>19</sup> Badeed xtixtios lo Prisca näjza lo Aquila näjza loj resa' Onesiforo. <sup>20</sup> Erasto bia'n guedx Corinto, niluxh basa'nä Trófimo guedx Mileto sa'csi cayacxhuuni. <sup>21</sup> Jiaä d gajlu ansde guislo j rebäinajl. Eubulo, Pudente, Lino, Claudia, näjza guiraa rebejtzn i ni yu' lo Jesucrist ree, ruxhaljreni xtixtios lojlu.

<sup>22</sup> Dad Jesucrist chunä jz xaimlu. Dios gacnä jz guiraatu. Sugacni si'c.

## Te Guijtz Lo Tito

### *Bacuaa Pabl lo Tito*

<sup>1</sup> Narä Pabl, nacä xmos Dios, apost xten Jesucrist, te gacnää guiroobru xcälrlilajz reni agule Dios, te gacheezareni didxlii ni rusia xcäl'nabajnnu. <sup>2</sup> Cayunlojzanu yäl'nabajñ par tejpas nani Dios, ni digacdi guinii didx-xhii, bia'nni diidx guniidxni cheni gajdli guedxliuj guirixtiej. <sup>3</sup> Niluxh che bidzujñ dxej ni agulexгаа Dios, laani baluini xtiidxni. Si'cza baniidxni xtiidxni loä te gusule'äni si'c gunibee Xtiosnu ni ruslaa nurnu neñ dojl. <sup>4</sup> Cacuaä guijtzre lojlu, Tito, xi'nä lo yälrlilajz ni ria'pnu xcuent Jesucrist. Rniabä lo Dios Xstadnu näj lo Dad Jesucrist ni rbää nuurnu neñ dojl, gacnäjreni luj, gulasajzreni luj, guscuecdxizareni lajzlu.

### *Dzuun ni rujñ Tito guedx Creta*

<sup>5</sup> Che basa'nälu lo yuj ni tre' lo nisdoo, ni laa Creta, basa'nälu te guluuxlu dzuun ni di niajldi nuluxä ro'c, näjza te cuelu rebengool loj reguidoo nen tejga reguejdx si'cni gunibeä gunlu. <sup>6</sup> Gule bengool ni nabansa'c, te na'c guiniyaj bejñreni, nanab gacni chääl tejtis gunaa, riäjłza chalilajz rexi'nni, na'c guibajñreni si'ctisni rlaiz tiejxhrene, jiureni xtidx xtradreni. <sup>7</sup> Niguii ni rnibee guidoo rcanäj rexhixten Dios, ni'cni riäjł ga'pni te yäl'nabanya. Na'c gacni te beñnajd, na'c gacni te beñnadxecha', na'c gacni bengu, na'c gacni te bejñ ni rdxagdił bejñ, na'cza xca'ni meel ni dini niunsa'c gaan. <sup>8</sup> Nanab gacni te bejñ ni rudedlaa rolizjni jia'n beñ biooz, riäjłza chanälajzni dzunsa'c, gac nasiñni, chu xcäriejñni; guibañsa'cni nez lo Dios, sigajcza nez lo bejñ, guibañnayani nez lo Dios, na'c gunni nani rlaiztis tiejxhni. <sup>9</sup> Riäjł chanuutisni lo didxlii ni bisieedni te gac gulidxnäjzani bejñ xtidx Dios, te guzejcni diidx lo rebejñ ni rniyaj xtidx Dios.

<sup>10</sup> Yu' xhidajł benguijdx, bejñ ni rnii diidx ni xhet sajcdi, näjza xhidajł bejñ ni rnii didx-xhii ni rusguee. Näjza lo rexpene Israel ni riuduxh leii yu' sa' bejñre. <sup>11</sup> Sa' redee ni nanab jiäu ro'ni, sa'csi rusgueereni xhidalro sa'reni, ruluiireni ni di riäjł guluiireni te gunreni gaan meel.

<sup>12</sup> Te niguii ni siääd lagajc lajdxreni guniini xcuent lagajc reben lajdxni: "Rebejñ ni najc cretenses rniuduxhrene didx-xhii, niälajzareneni. Rlaizreni gausa'ceni niluxh di rlaizreni gunreni dzuun." <sup>13</sup> Niluxh gulini, ni'cni gudilñajreni, te chalilazsa'ceni xtidx Jesucrist, <sup>14</sup> te na'cruza gucuadiajreni rediidx ni rdxällajz rexpene Israel, niclaza rediidx ni rnibee bejñ ni gulälaz didxlii.

<sup>15</sup> Loj renani rujñ xhigabya, guira'ti najc naya, niluxh loj reni di chalilajz, ni xhet nayadi najc xhigabreni, guira'ti nacdxuudx, xcäriejñlireni nacdxuudx. <sup>16</sup> Naj rujsireni si'cni numbeerene Dios, niluxh ni rujñreni huenliisi ruzene direni nililajz, najceni benguijdx, direni jiu xtidx Dios, digacdi gunreni nicla tej dzunsa'c.

## 2

### *Rulijdx Pabl Tito guluisa'cni rebejñ*

<sup>1</sup> Niluxh luj guniitisi rediidx ni ruluisa'c. <sup>2</sup> Baluui rebengool gac benya, bejñ ni yu' xcäriejñni, bejñ ni rumbee xhini'c najc dzunsa'c, xhini'c najc dzunguijdx, bejñ ni rajpza yälrlilajz, yäl'sanälajz, näjza ni rbecdxi lajzni. <sup>3</sup> Sigajcza, regunagool, nanab guibajñreni si'c te ni yusa'c lo Dios, na'c guiniireni diidx ni di riäjł guiniireni, na'cza soozreni. Riäjł guluiireni redixsa'c <sup>4</sup> te guluiireni regunaa dxa'p chu xcäriejñreni, chanälajzreni chäälreni näj rexi'nreni. <sup>5</sup> Gaceni nasiñ, guibañnayareni, xcanäsa'ceni rolizjreni, gaceni beñsa'c gusoobreni xtidx chäälreni, te rut guiniyajdi xtidx Dios.

<sup>6</sup> Sigajcza gojz lo rebi'n riäjł chu xcäriejñreni. <sup>7</sup> Luj guzuj te fiireni xho riäjł gun bejñ dzunsa'c. Che guluiilureni, saru baluui guiraa reni riäjł guluiilu. <sup>8</sup> Didxsa'c gunii te rut gacdi guiniyaj diidxga, te si'c guitujy chutisi ni rlaiz guidxe'ch lojtu te xhet xhi didxguijdxdi gac guiniireni xcuentlu.

<sup>9</sup> Balijdx remosi te gusoobreni xtidx xlamreni, te gusa'ceni dzuun, na'c guzejceni diidx lo rexlamreni. <sup>10</sup> Na'c cuanreni alga guibañsa'ceni te guluii xcäl'nabajñreni lacti sacduxh xtidx Dios ni baslaa nuurnu neñ dojl.

<sup>11</sup> Sa'csi abiääd xcäl'racnäj Dios, abiädnäni yälruslaa neñ dojl lo guiraa rebejñ. <sup>12</sup> La xcäl'racnäj Dios ni ruluii nuurnu gusa'nnu redzunguijdx, näjza dzuun xten guedxliujre te guibañsa'cnu, te chonälajznu Dios lo guedxliujre. <sup>13</sup> Ruluiizani nuurnu cuääznu guidzujñ dxej ni soob xtiidxni ni basa'nni loonu xcuent dxej che jiääd Gueb Dios näj Xtrad Jesucristnu ni ruslaa nuurnu lo dojl. <sup>14</sup> Laani gujtñi te guslaani nuurnu lo guiraa redolguijdx, te basiani nuurnu te gacnu xpejñni, gaczanu te bejñ ni rdxaglaiz rujñ dzunsa'c.

<sup>15</sup> Diidxre gunii, balijdx, basule' si'c te beɲɲajɲ. Di gusaanlu cuälazreni luj.

### 3

#### *Ni riäjĭ gun reni rililajz*

<sup>1</sup> Basnaj lajz rebejn gusoobreni xtiidx rebejn ni rnibee näjza reguxhtis, gusoobreni xtiidxreni, xcäjbzareni gunreni xhitis dzunsa'c. <sup>2</sup> Na'c guiniyajreni bejn, cuedxireni, gaczareni bensa'c, saru gac nadolajzreni loj chutis bejn.

<sup>3</sup> Sa'csi galoo sigajcza xheti xcäriejnnu, dizanu gusoob xtidx Dios; basguee bejn nuurnu, yu'tisnu lo guiraasi dolguijdx näjza lo ni rchagljaztis rujn tiejxhnu, nabajntisnu lo dolguijdx, rudxonlajznu, rdxe'ch bejn loonu, rdxe'chzanu lo sa'nu. <sup>4</sup> Niluxh che baluiloj xcälrulaslajz näjza xcälrinälajz Dios ni ruslaa nuurnu näjza reben guedxliuj lo dojl, <sup>5</sup> dxejc baslaa Dios nuurnu lo dojl, xhet sa'csi yu'di xhi dzunsa'c biennu, alga sa'csi balaslajzni nuurnu. Baslaa Dios nuurnu lo dojl sa'csi bidiib lastoonu, te biäjt xtojĭnu te najcnu bencoob, sa'csi bascoobza Xsprit Dxan xten Dios xcäriejnnu. <sup>6</sup> Baniidx Dios cuääzpac Xsprit Dxanni neɲ lastoonu xcuent ni bejn Jesucrist ni baslaa nuurnu, <sup>7</sup> te sa'csi rujn Dios cuent najcnu beɲsa'c sa'csi abadzucajni xtojĭnu, naj sica'nu xcälɲasa'cnu ni cabääznu, nalaaznu yälɲabajɲ par tejpas.

<sup>8</sup> Dee ni najc guliipac, ni'cni rlazä chanuutislu guiniilu rediidxre loj rebejn, te rebejn ni rililajz xtidx Dios gunduxhrene ganax dzunsa'c. Rediidxre najc laaca, sacduxhrene loonu. <sup>9</sup> Naj basaan rediidx ni najc xlia'si, rediidx ni gunii reben galoo, yälrdiidx xcuent xleii toMoisés sa'csi guiraa rebieyga xhet sajcdini, xhetza huendi rujnreni.

<sup>10</sup> Palga yu' te bejn ni gun la' sa' reben guidoo, gunii lojni tej o tio'p huält. Palga dini jiejn, colcuääni lojtu. <sup>11</sup> Sa'csi anajntu sa' bejnğa abaro'nni, agulälazni didxlii, lagajc xtojĭni sujn nitni.

#### *Diidx ni bacuaani lojtis Tito*

<sup>12</sup> Che guxhaĭä Artemas o Tíquico lojlu, gudahuiipac narä lo guedx Nicópolis. Ro'c abenä xhigab tedä rebäinajĭ. <sup>13</sup> Gucnäduh licenciaad Zenas näjza Apolos, badeed guiraa ni rquiinreni te chanuureni xpiajreni, te xhet jäädxdireni. <sup>14</sup> Suguisieedza resa'nu gunreni dzunsa'c te gacɲajreni che guiquiinnureni, te na'c guibajɲreni xlia'si.

#### *Ruxhaĭni xtixtios*

<sup>15</sup> Guiraa reni yunäj narä ruxhaĭ xtixtios lojlu. Badeedza xtixtios loj resa'nu lo yälrililajz. Dios gacɲäj guiraatu. Sugacni si'c.

## Te Guijtz Lo Filemón

### *Rucuaa Pabl guijtz lo Filemón*

<sup>1</sup> Narä, Pabl, yu'ä nen latzguiib sa'csi rniä xtidx Dad Jesucrist. Narä näjza bejtznu Timoteu cagucuaanu guijtzre lojlu, Filemón, ni sanälazduxhnu sa'csi najclu sa'nu lo xtzun Dios. <sup>2</sup> Rucuaazanu guijtzre lo Apia, bisiajnnu lo yälirililajz, näj lo Arquipo ni racnäj nuurnu lo dzuunre, näjza loj rebenguidoo ni rchagsa' rolijzlu. <sup>3</sup> Dios Xtdadnu näj Dad Jesucrist gacnäj la'tu, guscuedxireni lajztu.

### *Xcäl'sanälajz näj xcäl'rililajz Filemón*

<sup>4</sup> Rudedä xquixtios lo Dios xcuent luj che rniä lo Dios. <sup>5</sup> Abiejn diagä xcuent yäl'rinälajz näj yäl'rililajz ni rajplu lo Dad Jesucrist, näjza reni yu' lo Dios. <sup>6</sup> Rniabä lo Dios tioobru xcäl'rililajzlu la'l ni rusule'luni, te gachesa'creni xcuent guiraa reyäl'nasa'c ni rajplu, ni runiidx Dad Jesucrist lojlu. <sup>7</sup> Lacti rbalazduxhä, rbedxi lazá sa'csi sanälajzlu resa'nu näjza sa'csi luj, betzá, agulecdxilu lastoo reni rililajz.

### *Pabl rniabni lo Filemón xcasacni Onésimo*

<sup>8</sup> Mase rapä xcäl'rnibee Jesucrist sajc guiniä gunlu xhitis ni riäj'l gunlu, <sup>9</sup> rniabä lojlu gunlu te dzunsa'c sa'csi narä nacä Pabl ni rinälajzlu, nacä bengool, yu'ä latzguiib xcuent Dad Jesucrist. <sup>10</sup> Canabä xcuent Onésimo ni najc si'c xi'nä, sa'csi huililajzni xtidx Dios ni basule'ä lojni naj ni yu'ä latzguiib.

<sup>11</sup> Galoo, dini niajc beñsa'c lojlu, niluxh naj sacnäduxhni guiro'pnu. <sup>12</sup> Ruxhal'sacäni lojlu, te xcasacuni stehuält si'c ni najräni xca'lu, sa'csi siäd'näni lojlu ascanu lagajc lastoä. <sup>13</sup> Narä rlazä niannäjni narä xcuentlu, te niacnäjni narä naj ni yu'ä latzguiib sa'csi basule'ä xtidx Dios. <sup>14</sup> Niluxh di rlazä niunä si'c palga luj dilu xcäjb gacni si'c. Dina guinia gacnäjpaclu narä si'c gojn. Narä rlazä gunluni sa'csi rlazjpaclu gacni si'c. <sup>15</sup> Pet gubicaj Onésimo lojlu tio'p'choñ dxejsi. Niluxh naj xca'luni te chuni lojlu par tejpas. <sup>16</sup> Naj xhetru si'cdi te mos chuni lojlu. Naj sajcruni loj te mos. Naj najcni si'c te betzbiidlu ni sanälajzlu. Narä sanälazduxhäni, niluxh luj riäj'l chanälajzruluni, xhet si'c chutis te bejn, alga si'c te bejtzlu lo Dad Jesucrist.

<sup>17</sup> Näj palga rumbeelu narä si'c te sa'lu, cua'ni sigajc narä. <sup>18</sup> Palga yu' xhi bejnni lojlu o palga yu' xhi nazääbni lojlu, basa'nni lo xcuentä. <sup>19</sup> Lagajc narä, Pabl abacuaä guijtzre con naä con xleträ, narä siguixäni. (Te na'c guiniä nazääbzu lagajc luj loä.) <sup>20</sup> Betzá, beñ'aa hueenre narä si'c te ni sanälajz Dios te guspaalu lazá nez loj Dad Jesucrist.

<sup>21</sup> Bacuaä guijtzre lojlu sa'csi nancheä susooblu xtidxä, sujnzalu maazdi loj ni rniabä lojlu. <sup>22</sup> Sigajcza basuchee te lajt cadro jia'nä, sa'csi cabäzä gudzu' Dios ni gunabtu lojni, gusaan Dios jiädhuiä la'tu.

### *Ruxhal'ni xtixtios lojni*

<sup>23</sup> Epafra ruxhal' xtixtios lojlu. Laani yunäjni narä latzguiib, sa'csi gunizani xtidx Jesucrist. <sup>24</sup> Marcw, Aristarco, Demas, näj Lucas, ni racnäj narä lo dzuunre, ruxhal'zaren i xtixtios lojlu.

<sup>25</sup> Dad Jesucrist gacnäj la'tu. Sugacni si'c.



## Te Guijtz Nani Biäd Loj Reben Hebree

### *Agunii Xi'n Dios xtidx Xtadni*

<sup>1</sup> Neņ redxe galoo garen-garen mood guninä; Dios retoxtadgoldoonu. Xhidajlza huält guniini por reniguii ni bacuaa xtiidxni. <sup>2</sup> Neņ redxeyre aguniini loonu por Xi'nni, lojzani badeed Dios yälrmibee guncheeni guedxliujre, badeedzani guira'ti lojni. <sup>3</sup> Laani najc xtuxh xten xcälrdimbicha' Dios, laani najczani sigajc najc Dios, laazani rapchee guira'ti con xtiidxni ni rnibee. Cheni gulujx basiani xtojlnu, gurejni xladbee Gueb Dios xhaguibaa te canibeeni.

### *Sacduxhru Xi'n Dios loj rexangl Dios*

<sup>4</sup> Ro'c gurej Xi'n Dios sa'csi sajcruni loj reangl xten Dios, sa'csi acua'ni yälrmibee si'c te bejn ni riannä; xhixten Xtadni. Lajzani sajcru lo relaj rexangl Dios. <sup>5</sup> Sa'csi Dios di niäj loj nicla tej rexanglni:

Luj najclu Xi'nä. Narä guleälu te guinibeelu.

Dizani niäj b xcuent nicla tej rexanglni:

Narä gacä xtadni, laani gacni xi'nä.

<sup>6</sup> Niluxh che biädnäni Xi'n xtebni lo guedxliuj, guniini:

Guiraa rexangl xten Dios, iColgan Xi'nä!

<sup>7</sup> Che gunii Dios xcuent rexanglni räjpni:

Rujnni ruxhun rexanglni si'c bej, rujnni rbebajl rexmosni.

<sup>8</sup> Niluxh xcuent Xi'nni guniini:

Luj najc Dios.

Nabajnlu par tejpas;

xcälrmibeelu par tejpas najc te yälrmibesa'c.

<sup>9</sup> Ahuinalajzlu xhigabsa'c, dipaclu nichaglazj xhigabguijdx,

ni'cni Dios ni najc Xtioslu, baniidxru yälrbalajz lojlu quela loj resa'lu.

<sup>10</sup> Rniizani:

Luj, Dad, che guslojli bencheelu guira'ti,

bencheelu cad soob guedxliuj, naazalu bencheelu reguibaa.

<sup>11</sup> Laareni sinitlojreni, niluxh luj nabajnlu par tejpas.

Guiraareni siujx si'c riuix te lajd.

<sup>12</sup> Suse'tlureni si'c rie't te la' lajd, sidxaareni si'c rdxaa te lajd.

Niluxh luj dilu guidxaa.

Lalgajctis nabajnlu, di rexijzlu ted.

<sup>13</sup> ¿Gucxha räjp Dios lo te xanglni scree, ä? Räjpni:

Gurej xladbeä te guinibeelu dxejli cheni gudzugä guiraa ni rdxe'ch lojlu ladz ni'lu.

<sup>14</sup> Guiraa rexangl Dios najc sprit, ruxhal Diosreni te chayacnäjreni rebejn ni xca' yäl'nabajn par tejpas.

## 2

### *Na'c gusaanni diidx ni ruslaani lo dojl*

<sup>1</sup> Ni'cni nanab jjuun xtidx Dios ni abiejn diajgnu, te na'c guibicajnu lo xnezyujni.

<sup>2</sup> Anajntu aguzojb diidx ni gunii rexangl Dios neņ redxe galoo. Luxh reni di nusoob diidxga bejnreni dojl, dxejc bateed Diosreni trabajw. <sup>3</sup> ¿Xho gac guibicaj xcäl'naj Dios vejcnu palga dinu jiu rextidx Dios xcuent yälruslaa lo dojl, ä? Ni Dad, Jesucrist basa'n diidxga lo rexepjpacni, dxejc laareni basule'reni rediidxre loonu. <sup>4</sup> Niluxh Dios baluii najc diidxga guliipac sa'csi bejnri reseen, näjza yälrdxeloduxh, näjza xhidajl remilagrw. Badeedzani Sprit Dxaan xtenni loj renani ahuililajz xtiidxni te gun tejgareni garen-garen xtzunreni si'ctis ni rlazj Dios gunreni.

### *Nani guläxtiej yälruslaa bejn lo dojl*

<sup>5</sup> Di Dios gudeed yälrmibee lo rexanglni te guinibeereni guedxliucoob ni cagusä'tnu naj.

<sup>6</sup> Guyu' tej ni bacuaa xtidx Dios lo guijtz, räjpni:

¿Chu najc niguii, te guinalajz Dios laani?

¿Chu najc xi'n niguii te jädhuiizaluni?

<sup>7</sup> Nagabsi dxej guxiiru sajcnu lo reangl xhaguibaa,

dxejcti badedsaclu xcäl'nasa'cni,

badedsaclu xpala'nni,

badeedzalu yälrmibee lojni te guinibeeni guira'ti ni bencheelu.

<sup>8</sup> Badeedlu guinibeeni guiralii ni yu' lo guedxliuj.

Cheni badeed Dios guira'ti te guinibeeni, xhetliidi basa'n Dios ni digacdi guinibeeni, niluxh naj ruhuiinu gajdni guinibee guiralii ni'c. <sup>9</sup> Alga rhuiinu Jesucrist, ni bejn Dios guxiiru sajčni lo reangl xten Dios che guyu'ni lo guedxliuj balsi dxej. Che baluux Jesucrist xtzuumni lo guedxliuj, badeed Dios yälrdimbicha' näjza xpala'nni lojni. Sa'csi sanälajz Dios nuurnu basaanni gudejd Xi'nni trabajwduxh, gujtni lacuaa niejtnu.

<sup>10</sup> Dios benchee guiralii ni yu' lo guedxliujre, najli rnibeeza Dios guira'ti. Luxh Diosre rlaiz chanäni xhidajl xi'nni xhaguibaa, ni'cni baxhał Dios xi'npacni Jesucrist te guläxtejni yälrusläa bejn lo dojl che gudejđni trabajwduxh lo cruzj. <sup>11</sup> Sa'csi Jesucrist, ni rujn chasanäj bejn te yäl nabanya, näjza reni risanäj yäl nabanya, tejtis najc xtadreni. Ni'cni di Xi'n Dios guitujy guiniini lojreni: "betzä". <sup>12</sup> Scree caj lo xtidx Dios:

Chasule'ä lo rebetzä xho najclu,  
siliä'päza xpala'ndu lojreni.

<sup>13</sup> Räjpzani:

Sibäzä gacnäj Dios narä.

Ste lajt guniini:

Bahuüi loä näjza rexi'nä ni baniidx Dios loä.

<sup>14</sup> Te famıl najc tejsi bääl, tejsiza rejn; ni'cni che biääd Jesucrist lo guedxliuj guyu' tiejxhni naj xtejnni si'c ben guedxliuj, gujtzani te gujc bejnni gunijt nani rnibee yälgujt, nalajznu, bendxab. <sup>15</sup> Te si'c baslaani guiraa reni rdxejb yälgujt, najcreni si'c reni yu'tis loj xlamni guideb nabajnreni, lacti rdxejbreni yälgujt. <sup>16</sup> Guliini dini niääd te gacnäjni reangl xten Dios, biäädni te gacnäjni guiralii rexaj to Abram. <sup>17</sup> Ni'cni gujčni si'cpac te bejtznu, te gac gacni te bixhojz xten Dios ni rulaslajz, te bixhozsa'cza xten Dios, si'cni rlaiz Dios gacni te guslaani rebejn lo dojl. <sup>18</sup> Sa'csi lagajc laani gudejđni trabajw, luxh baquiiłza bendxabni niujjni dojl, ni'c naj sajč gacnäjni renani ruquıl bendxab gun dojl.

### 3

#### *Jesucrist sajču loj Moisés*

<sup>1</sup> Ni'cni bejtznu, reni anabansa'c, sa'csi najctu reni gurejdx Dios gac xi'nni, colyembee Jesucrist ni baxhał Dios loonu. Laani najc bixhojz ni sajču, rusule'zani xtidx Dios xcuent nani ahuililajznu. <sup>2</sup> Laani huinuutis guyu'ni lo Dios ni guleni te gunni dzuunre. Sigajc ni bensa'c to Moisés xtzuum Dios che guyu'ni loj rexpejn Israel, sigajcza bensa'c Jesucrist dzuun che biäädni lo guedxliuj. <sup>3</sup> Sigajc ni yu'ru xpala'n dad lo xpala'n rexi'nni, sigajcza yu'ru xpala'n Jesucrist lo xpala'n to Moisés. <sup>4</sup> Yu' xtad guiraa refamıl lo guedxliuj, niluxh gule'c Dios guiralii bejn, bencheezani guedxliuj. <sup>5</sup> Basoob Moisés diidx si'c te mos, cuanäjni rexpejn Dios si'cni rnibee Dios gunni, te baluiini xho gac redzuun ni gajd gac dxejc, luxh naj agujc redzuunga. <sup>6</sup> Niluxh Jesucrist basoob diidx si'c xi'npac Dios. Cuanäjni xfamıl Dios. Nurnu najcnu xfamıl Dios palga chanuutis sudzu'tznu lo xtiidxni, palga guibalajztisnu, palga gutiplajznu dxejli ni guibi' Jesucrist.

#### *Yälrusilajz xten rexpejn Dios*

<sup>7</sup> Ni'cni, si'cpac rniı Sprit Dxan xten Dios:

Naj, palga jiendiajgtu xse'ni,

<sup>8</sup> na'c gun-najdttu lastootu si'c bejn rebejn ni bidxehnäj Dios che cuansajreni lo reyubijdz.

<sup>9</sup> Ro'c bidxehnäj rextadgoldootu Dios sa'csi direni nililajz Dios siädnäreni,

niluxh bahuiireni redzunduxh ni bejn Dios nez lojreni tiuu ijz.

<sup>10</sup> Ni'cni lał ni cadxe'ch Dios loj rebejnğa, bejn Dios xhigab:

Sujiannäjreni xhigabgujdxreni,  
dina gusanä jiu'reni xcälrusilazä.

<sup>11</sup> Ni'cni bidxe'ch Dios lojreni,

bejn Dios te xhigabduxh,

di rebejnğa jiu' te gusilaznäjni.

<sup>12</sup> Bejtznu, colnatiro andi chu tejtı rujn xhigabgujdx, rlaiz guibicaj lo Dios, ni nabajn par tejpas, sa'csi dini chailajz xtiidxni. <sup>13</sup> Ni'cni colgulijdx resa'tu guixe-guixee, laga najčni nadxej; te di chu tejtı gacnajd lastooni xcuent reyälrusguee xten redojl. <sup>14</sup> Sa'csi palga chanuunu sudzu'tznu lo xtidx Dios ni huililajznu che biembeenuni, dxejc yu' xhi rajpnu con Jesucrist. <sup>15</sup> Si'c caj lo guijt:

Nadxej, palga jiendiajgtu xse' Dios,

na'c gunnajdttu lastootu si'c bejn rebejn ni bidxehnäj Dios lo reyubijdz.

<sup>16</sup> ¿Chu reni'cni bidxehnäj Dios che biendiajgreni xtiidxni? ¿La et laadi guiraa rebejn ni guläa Moisés guedx Egipto, ä? <sup>17</sup> ¿Chuxh loj bidxe'ch Dios tiuu ijz lo reyubijdz, ä? ¿La et laadi reni biajb lo dojl, dxejc gujtreni, huijiajbreni nez loj reyubijdz, ä? <sup>18</sup> ¿Chu loj räjpni dipacreni

jiu' lo xcälrusilajzni? Loj reni di nusoob xtiidxni. <sup>19</sup> Ni'c ruhuiinu di niajcdi niu'reni lo yälrusilajz sa'csi direni nililajz xtidx Dios.

#### 4

<sup>1</sup> Ni'cni palga bia'n diidx siu'pacnu lo yälrusilajz con Dios, nanab jia'pnu lagajc nuure didi yu' chu tejnu di gun gaan jiu' lo yälrusilajzga. <sup>2</sup> Sa'csi nuure abiejn diaagzanu diidx ni rusia dojl, sigajc biejn diajg rebejn; niluxh xlia'si biejn diajgteni diidxga sa'csi bacuadiajgteni niluxh direni nililajzni. <sup>3</sup> Luxh nuure ni ahuililaaznu siu'nu lo yälrusilajzga; caj lo guijtz gunii Dios rediidxre:

Ni'cni bidxe'chä lojreni, benä te xhigabduxh, di rebejnga jiu' te gusilaznäjreni narä.

Mase abaluuxni xtzuumni cheni birixtiejli guedxliuj. <sup>4</sup> Sa'csi loj stee guijtz caj diidx ni guniini xcuent dxej ni rusilajz bejn:

Xho'p dxej bejn Dios xtzuumni, dxejcti basilajzni tebdxej.

Xhet bejndini dxejga.

<sup>5</sup> Stehuält guniini:

Di rebejnga jiu' te gusilaznäjreni narä.

<sup>6</sup> Niluxh yu' reni gajd jiu' loj yälrusilajzga, luxh reni biejn diajgni diidx ni rusia dojl di niu' sa'csi direni nusoob xtiidxni. <sup>7</sup> Ni'cni basoob Dios ste dxej gac "nadxej". Gudejd xhidajl ijz che gunisac Dios xcuent yälrusilajz. Badeed Dios gunii toDavid rediidxre:

Nadxej, palga jëndiajgtu xse'ni, na'c gunnajdtu lastootu.

<sup>8</sup> Paru nudeed Josué yälrusilajzga loj rexpejn Israel, diru Dios ninisac xcuent stee dxejre. <sup>9</sup> Naj ria'nza te yälrusilajz par rexpejn Dios, <sup>10</sup> sa'csi nani riu' lo xcälrusilaznäj Dios, rusilajzani lo xtzuumni sigajc basilajz Dios lo xtzuumni. <sup>11</sup> Nanab chanuu gusoobnu xtiidxni te jiu'nu lo yälrusilajzga, te di chu tejnu ni gacnajd lajzni si'c ni gacnajd lajz renani di nililajz.

<sup>12</sup> Sa'csi naseduxh xtidx Dios, yuduxhza xcälrnibe xtidx Dios. Najcni si'c te guchiil ni caduxh ro'ni, räazni nez neñ redzujt näj yojb. Sigajcza xtidx Dios räaz nez cadro rlia' sa' xsprit näjza xaim bejn. Ruluiiza xtidx Dios rexhigab ni yu' lastoo bejn, näjza redzuun ni rrajz lastoo bejn gun. <sup>13</sup> Xheti xhi bencheedi Dios ni naga'tz nez lojni. Guiralii guyasi ruhuui Dios. Sajpnu gudeednu cuent lo Dios.

#### *Bixhojz ni sajcru najc Jesucrist*

<sup>14</sup> Jesucrist, Xi'n Dios, najc xpixhojzpacnu ni sajcru, nani abiu' loj Dios. Ni'cni nanab chanuu sudzu'tznu chalilaaznu xtidx Dios. <sup>15</sup> Xpixhojznu ni sajcru sajz gulasajzni nuure te di jiajbnu lo dojl, sa'csi laani sigajcza gudejdni trabajw, baquuil bendxabni te niujjni dojl, niluxh dini niujn dojl. <sup>16</sup> Riäjlpac na'c guidxeebnu cuedx-guiniabnu lo Xtiosnu ni sanälajz nuure. Na'cza guitujynu, te gulasajzni nuure, guideb xcälracnäjni gacnäjzani nuure.

#### 5

<sup>1</sup> Galooli guiraa rebixhojz ni sajcru nabee lo rebejn. Bixhojz ni sajcru rniab lo Dios xcuent rebejn. Luxh lojni rudeed rebejn regon näjza reguidxaa ni gudeedni lo Dios te jiäu lo xtojlni nez lo Dios. <sup>2</sup> Rdejzda bixhojz trabajw sigajc benguedxliuj, ni'c sajz ga'pni yälndolajz loj rebejn nani nayääl näjza reni abanijt lo Dios. <sup>3</sup> Niluxh sa'csi näjza laani rujjni dojl, nanab gudeedni guidxaa lo Dios te jiäu lo rextojlni sigajc rudeedni guidxaa lo Dios te riäu lo xtojlni rebejn.

<sup>4</sup> Rut sajcdi gac bixhojz xcuentceni. Dios najc ni rbejdxni te gacni bixhojz, dxejg rudeedni xpala'nni lojni si'c badeedni lo Aarón. <sup>5</sup> Si'cza di Jesucrist niajc bixhojz ni sajcru xcuentceni. Dios najc nani gulälajni gacni bixhojz ni sajcru, räjpni lojni:

Luj najclu Xi'nä, narä guleälu nadxej te guinibeelu.

<sup>6</sup> Scree cajza lo xtidx Dios stee lajt:

Luj najclu bixhojz par tejjpas sigajc gujc te niguii ni laa Melquisedec.

<sup>7</sup> Cheni gubajñ Jesucrist lo guedxliujre, gurejdx-gunabzani lo Dios, guredxa'ni biinzani lo Dios nani sajz nudzucajni lo yälgujt; Dios bacuadiajg xtiidxni sa'csi huinälajz Jesucrist Dios. <sup>8</sup> Ni'cni Jesucrist mase najcni Xi'n Dios bisieedni basoobni diidx luxh näj ni'c gudejdni trabajw. <sup>9</sup> Che bidzujñ dxej baluuxni guiraa redzuun ni rrajz Dios gunni, laani gujcn nani rudeed laa bejn nani rusoob xtiidxni lo dojl par tejjpas <sup>10</sup> sa'csi Dios gulälajni bixhojz ni sajcru, gujcn bixhojz sigajc gujc Melquisedec.

#### *Rxhunjriegzw gusa'nmi xcälrililajzni*

<sup>11</sup> Rrajznu guiniinu xhidalduxhru diidx xcuent Melquisedec, niluxh naganduxh gusule'nuni lojt sa'csi nadyejcti, ditu gacbee. <sup>12</sup> Agujc xchej huililajztu rediidx xcuent Jesucrist. Ariäjlp gusule'tu rediidxre näj, niluxh alga rquinnrutu chu gusule' rediidxre lojt stehuält, luxh rediidxre najc rediidx guyasi xten Dios. Agucsactu si'c báz. Rrajztu yäsactu

le'ch lacuaa gautu yäjt, bääł; nalajznu, redidxnagajn xten Dios. <sup>13</sup> Reni najc si'c báz, rá' le'chtis, direni gumbesa'c redidxa'c xten Dios. <sup>14</sup> Niluxh reben guyajł rajw yäjt. Sigajcza redidxnagajn xten Dios najc par rebejn ni aguyajł lo xtidx Dios, renani ayu' xcäriejnni, arumbeereni nani najc dzunsa'c, nani najcza dzungujdx.

## 6

<sup>1</sup> Nanab guisieedrunu xtidx Dios te churu xcäriejnnu. Na'c guisieedtisnu didx-guyasi xcuent Jesucrist. Na'c guluiitisnu diidx xcuent yälrusiechłajz, xcuent redzuun ni rujn rejł bejn, näj yälřililajz xtidx Dios. <sup>2</sup> Na'c guluiitisnu xcuent yälřobnis, näj yälřrudzubnaa yejc bejn, näj xcuent yälřbajnsac rebengut, näj xcuent yälřguxhtis par tejpas. <sup>3</sup> Alga do'o guisieedru xtidx Dios te churu xcäriejnnu, palga si'c guniidx Dios jiennu.

<sup>4</sup> Yu' bejn ni abianij xcäriejnni, ni acua' reyäl'nasa'c ni rudeed Dios, ni rbäjz Sprit Dvan xten Dios neñ lastooreni, <sup>5</sup> luxh bidxagłajzreni xtidx Dios näj yälřnibee xten Dios ni churu jiaäd. <sup>6</sup> Palga laareni gubisacreni lo sa' yälřnabajn ni gojpreni galoo, diru gacdi guidxaa xmodreni stehuält, sa'csi dxejc sajci si'c ni lagajc laareni gucuasacreni Xi'n Dios lo crujz, nalajznu susanxtujyreni Jesucrist nez loj rebejn. <sup>7</sup> Beñ guedxłiuj ni biejn diajgni najc si'c najc yuj ni rá' nis che riajbtis nisguij. Palga yujga gudeed yäl'nasa'c loj reni rujn dzuun lojni, sunle' Dios yujga. <sup>8</sup> Niluxh palga gudeed yujga ganax yaguejch näjza cuaan ni xhet sajcdi, xlia'sini, sujñ rebejn gac nadeni te cheñi.

### *Diidx ni rusudzu'tz lastoonu*

<sup>9</sup> Mase rniinu scree lojtu, anajnnu huililajztu xtidx Jesucrist näjza xtiidxni ni rusłaa lo dojl. <sup>10</sup> Sa'csi Dios najc ni rujn yälřguxhtissa'c, diza lajzni jiaäl ni rujntu la'tu näj yälřsanälajz ni rajptu par laani che racnäjtu rebejznu lo yälřililajz, luxh guixe-guixee si'c rujntu. <sup>11</sup> Naj řlajznu tejjatu chanuu ga'p lagajc yälřbalajzre dxe lultli, te gac guiraa ni cabäjztu. <sup>12</sup> Řlajznu na'c gactu bejn ni rbedxitis, alga guntu sigajc bejn reben galoo, gopdzu'tzreni yälřřililajz ni batipduxh lajzreni, guläjzreni te cua'reni reyäl'nasa'c ni bia'n diidx gudeed Dios lojreni.

<sup>13</sup> Luxh che bia'n Dios diidx loj toxtadgoldoonu Abram, guniini por lagajc laani sa'csi ruti stee ni sajcru lojni. <sup>14</sup> Scree gunii Dios: "Guliä sacnää łuj, sunidxäza xhidajł xi'nlu." <sup>15</sup> Cheni aguläjz Abram xchej, gusojb diidx, cua'ni nani gunii Dios lojni. <sup>16</sup> Sa'csi cheni rniłiipac bejn te diidx, rniireni diidxga por laj ste'ca bejn ni sajcru lojreni, sas che rusä'treni laj bejnga xhetru yu'di xhi gunreni bieje. <sup>17</sup> Řlajz Dios gacbeepac rexagdoo toAbram sisiojbpac diidx ni bia'nni che guniini loj Abram galooli. Sisiojbpac xtiidxni, sa'csi guniini diidx con lagajc lajni che bia'nni diidxga. <sup>18</sup> Ni'cni naj yu' tiop diidx ni digacdi guichaa sa'csi digacdi gunii Dios didx-xhii, rusoobpacni xtiidxni, rudeedzani yälřrbedxilajz loj renani gubig-guxuñ lojni, loj reni sanuu loj yälřřililajz xtiidxni nani abaniidxni loonu por lagajc lajni. <sup>19</sup> Laa ni'cni cabääznu ni rusudzu'tz lajznu si'c duu-guiib con ancl ni rniadzdu'tz te barcw. Si'c rusudzu'tzni lastoonu te jionnu cadro yu'ni detz ladrž. <sup>20</sup> Lagajc ro'c biu' Jesucrist xcuent nuure, te galooli baxhalni xnez Dios loonu, te gujčni bixhojzro par tejpas si'c gujczza bixhojz nani laa Melquisedec.

## 7

### *Jesucrist najc bixhojzro si'c najc Melquisedec*

<sup>1</sup> Galoo che gujč Melquisedec řei xten guedx Salem, gujčni bixhojzro xten Gueb Dios. Che gubi' Abram che gulujč guer cadro bagu'tni řeřei ni bidxe'ch lojni, huichagłoj Melquisedecni, sas gunabni lo Dios te gacnäjru Dios Abram. <sup>2</sup> Dxejcti bejn Abram tzuu cuaa guiraa ni bejnni gaan, te badeedni tej cuani loj Melquisedec. Laj Melquisedec säloj "řei ni runsa'c yälřguxhtis", dxejctiru řei xten guedx Salem sälojzani "řei xten yälřrbedxilajz". <sup>3</sup> Baluilojni lojreni, niluxh dinu gan chu najc xtdadni, nicłaza chu najc xnanni, nicłaza chu najc resa'ni. Dizanu gan guc gojłni nicłaza guc gujtni. Gujčni si'c najc Xi'n Dios. Najctiszani bixhojzro par tejpas.

<sup>4</sup> Naj colħuii, lacti te beñsa'c, te beñro najc Melquisedec. Lojni badeed toxtadgoldoonu Abram teja ni sajcru lo teja tzuu ni bejnni gaan. Luxh Abram najc bejn ni sajcru lo rexpejnni. <sup>5</sup> Leii xten Moises, rniıbee xca' rebixhojz ni najc xfamil Levi te cuaa lo sa'reni si'c ni badeed toAbram loj Melquisedec, mase najczeni rexagdoo Abram. <sup>6</sup> Niluxh di Melquisedec gac xfamil Levi. Niluxh badeed Abram te cuaa xhixtenni loj Melquisedec. Dxejcti benle'ni Abram ni biannäj xtidx Dios. <sup>7</sup> Naj rut sajcdi guinił garenca, sa'csi nani sajcru runle' yejc nani guxiiru sajč. <sup>8</sup> Naj rebixhojz ni rca' teja lo tzuu ni rajpreni, najc bejn ni rejł. Niluxh rnił xtidx Dios xcuent Melquisedec ni cua' te cuaani galooli: najčni si'c te bixhojz nani nabajn par tejpas. <sup>9</sup> Ni'cni sajč guiniinu xcuent Levi nani rca' te cuaa, lagajc laani agudijx te cuaaga che badeed Abram teja yejc tzuuga lo Melquisedec. <sup>10</sup> Sa'csi mase

gajd xi'n toAbram chu che huichagloj Melquisedecni, batijpni lastooni sa'csi abia'n diidx sudeed Dios xajgni. Ni'cni che agudijxni te cuaaga najcni si'cni suganäjni rexajgni.

<sup>11</sup> Rexpejn Israel cua' leii che gujc bixhojz relevitas, reni najc rexi'n toAarón. Paru ni ajc niujnreni nibansa'c rebejn ni huisanäj leiiga, dirureni niqiuin niääd stee bixhojz ni di gac si'c Aarón, alga si'c najc bixhojz Melquisedec najcni. <sup>12</sup> Sa'csi cheni rdxa te cuaa bixhojz nanab näjza leiiga guidxaa. <sup>13</sup> Niluxh rnii xtidx Dios, Dad Jesucrist najc bejn xten garenca famiļ. Luxh nicla tej bixhojz gajd gac bejn xten familga. <sup>14</sup> Huenliisi najnnu najc Dad Jesucrist te bejn xten xfamili toJudá, niluxh di Moisés ninii gac te rexpejn Judá bixhojz.

<sup>15</sup> Luxh huenliisi najc ni rniinu, sa'csi abiricaj ste bixhojz ni najc sigajc gujc Melquisedec. <sup>16</sup> Luxh dini ni ajc bixhojz si'c rnii releii ni guyu' dxejc. Laani gujcnii bixhojz xcuenti yälrmibee ni najc par tejpas, ni rut gacdi gutzujl. <sup>17</sup> Scree najc diidx ni gunii Dios xcuentni:

Luj najclu bixhojz par tejpas si'c gujc te niguii ni laa Melquisedec.

<sup>18</sup> Dxejcti gunijt leii sa'csi xlia'si gujcnii, di ni ajc di niujn bejn si'cni rniini. <sup>19</sup> Di xleii toMoisés niujn gaan nibansa'c bejn. Naj lacuaa leiiga rajpnu te xcälirililazsa'c; ni'c rujn rbajnu lo Dios.

<sup>20</sup> Dios bejn gacni bixhojz con xtidxliini, ni guniini con lagajc lajni. <sup>21</sup> Stecuaa rebixhojz gujcreni bixhojz niluxh et con didxliidire, con laj te beņro, niluxh bixhojzre gac bixhojz con didxlii, con laj nani räjp:

Agunilii Dios diidx con lagajc lajni,

niluxh dini gusiech lajzni, räjpni:

“Luj najclu te bixhojzro par tejpas, lagajc si'c gujc Melquisedec.”

<sup>22</sup> Ni'cni, Jesucrist najc ni rujn rile' rediidxre, luxh diidxre sajcruni loj xleii Moisés.

<sup>23</sup> Guyu' xhidalduxh stecuaa rebixhojz, sa'csi rejtrei, digacdi chanuureni gacreni bixhojz.

<sup>24</sup> Niluxh Jesucrist rajpni yäl nabajñ par tejpas, naj najczani bixhojz par tejpas. <sup>25</sup> Ni'c rajcza ruslaani bejn lo dojl par tejpas. Ruslaani guiraa renani rbig lo Dios por laani, sa'csi anabajñni par tejpas te canabni lo Dios xcuent laareni.

<sup>26</sup> Jesucrist najc bixhojzro nani rquiuinu. Laani najc dxan, dini niujn dojl, agubicajni lo reben-dojl, huäjszani jiaaru xhaguibaa. <sup>27</sup> Dini gac si'c stecuaa rebixhojz ni nanab ju't man guixe-guixee te guze'c bixhojzroni lo Dios te ganid jiaa lagajc xtojłni. Dxejcti sajc guibi'ni guze'cnini lo Dios xcuent xtojł rebejn. Niluxh Jesucrist tejtis huält gudejđni trabajw, bejn nani cheni cuajni lo cruzj, baxhe'ni xtiejñni xcuent nuure, gujtni. Si'c gudijxni xtojłnu par tejpas. <sup>28</sup> Leii xten Moisés rusaan gac bixhojzro te bejn nani rejñ, niluxh didxlii ni gunii Dios con lagajc lajni guleni tejni gac bixhojzro lagajc Xi'nni nani naya, nani nabansa'c par tejpas.

## 8

### *Jesucrist najc nani rusiäjł diidx*

<sup>1</sup> Diidx ni sajcru loj rediidx ni caniiinu najc scree: bixhojz ni najc xpixhojzronu agurej xladbee Dios lo xcälrdimbicha'ni xhaguibaa. <sup>2</sup> Neņ yu' ni najc dxan, neņ guidoo ni benchee Dios yu' bixhojzre, xhet neņdi guidoo ni runchee reben lo guedxliuj. <sup>3</sup> Guiraa rebixhojz rajc rudeedreni gojñ lo Dios, rajcza ju'treni guidxaa te gusejcreni lo Dios xcuent xtojłreni, ni'cni nanab ga'p Jesucrist xhi gudeedni lo Dios. <sup>4</sup> Paru suga'ni lo guedxliujre, nicla bixhojz dini ni ajc, sa'csi yu' bixhojz ni rudeed regojñ si'c ni rnibee xleii Moisés. <sup>5</sup> Niluxh redzuun ni rujn rebixhojzga najc si'c te balaa xten guira'ti ni yu' xhaguibaa. Najnnu najczeni balaa sa'csi balijdx Dios Moisés cheni agojł gunni xquidoo Dios, räjp Dios lojni: “Bahuii te gunlu guira'ti si'cpac ni baluiä lojlu lo dan Sinai.” <sup>6</sup> Niluxh xpixhojznu Jesucrist rujn dzuun ni sajcru, sa'csi najcni nani suga' galäii xnezuyj Dios loj reben guedxliuj, gusule'ni diidx ni gunii Dios cheni bejnii xhigabcoob, basa'nni didxcoob loj reben guedxliuj. Luxh didxcoobre sacduxhruni.

<sup>7</sup> Paru ni ajc nusiejch leii ni badeed Dios galooli lo Moisés lajz rebejn, di niqiuin niujn Dios ste xhigabcoob. <sup>8</sup> Niluxh bahuii Dios xhet cayunsa'c di reben guedxliuj, dxejc räjpni:

Naj rniilä sidzujñ redxej che gunä stee xhigab,

jia'n stee diidx loj rexpejn Israel näjza loj rexpejn Judá te xca'reni didxcoob.

<sup>9</sup> Xhet si'c di xhigab ni benä che bia'nä diidx loj retoxtadgoldooreni neņ redxej ni gunää ñaareni te gulääreni lajdx reben Egipto.

Laareni direni nusoob xtidxä ni'c basa'näreni, diruna niuäreni.

Si'c gunii Dad, Gueb Dios.

<sup>10</sup> Niluxh diidx nani runä xhigab rlazä jia'n diidx loj rexpejn Israel neņ redxejre gac scree, räjp Dad:

Sunä chu rexleii lo xcäriejnreni, sucuaäza xtidxä neņ lastooreni.

Dxejcti narä gacä Xtiosreni, laareni gac rexpeñä.

<sup>11</sup> Rut chu tejdj guluii sa'ni,

nicla bejtzni, nicla chu stee bejn gäbreni, “colyembee Dad”, sa'csi alanumbee guiraareni narä, rebäz sigajc rebengool.

<sup>12</sup> Narä sulaslazäreni susiaä redzundxuudx ni bejnreni, diru lazä guizaj rextojlreni, nicla latzsiaj ni bejnreni.

<sup>13</sup> Che bia'n Dios didxcoob, diidx nani bia'nni galoo agujcni didx-biejw, luxh nani anajc didx-biejw, xhetru sajcdini.

## 9

### *Xquidoo guedxliujre näjza guidoo xhaguibaa*

<sup>1</sup> Laaca naj. Diidx ni bia'n galoo badeed leii xho gunreni che rajnreni Dios, näjza xho gac guidoo lo guidxliujre. <sup>2</sup> Guc-chee guidoo dxejcti gojl te ladro galäiini te gujcn tio'p yu'. Yu' ni najc ganid laani yudxan. Ro'c suga' candilieer, näjza mex cadro naga' yätxtiil ni aguc le' <sup>3</sup> Ni rojp yu'ga najc dejtz ladro, ro'c najc yudxanduxh. <sup>4</sup> Ro'c suga' te guiib cadro ru' yaal. Najcni ganax oor. Ro'c yu'za te guijn ni laa “arco de pacto”, najcwni ganax oor, sigajc dejtzni, sigajcza nenñi. Nenñä yu' te bo't ganax oor. Nen bo'tga, yu' yätxtiil ni laa mana. Lagajcza nenñi gujnga yu' bar xten toAarón nani biga', guyu' bid lojni, näjza guij cadro bacuaa Dios xleii toMoisés. <sup>5</sup> Yejc gujnga caj tio'p figur oor ni najc si'c xangl Dios. Laareni rujn racbee bejn suga' Dios ro'c. Lagajc redee rusäuu con rexhigareni cadro ruxhe' bixhojzro xtiejn guidxaa xcuent xtoj rebajn. Ro'cti di gacdiru guiniirunu xcuentreni naj.

<sup>6</sup> Che gulujx gusucheereni, riu' rebixhojz si'csi si'c nen guidoo, nen yudxan te rajnreni Dios si'c gunibee Dios. <sup>7</sup> Niluxh nen stee yu'ga ni laa yudxanduxh, ro'c rajc riu' bixhojzrotis. Xtebtisni riu'ni, luxh tejtis huält nen teb ijz, te chanäni xtiejn reguidxaa ni gudeedni te jia xtojlni näjza te jia xtoj rebajn ni najc xpejn Israel. <sup>8</sup> Luxh guiraa reni'c ruluui Sprit Dxan xten Dios loonu, gajd yudxanduxh guxal che sugasijc yu' ganid, yu' ni laa dxan, cadro sanuu rajnreni Dios. <sup>9</sup> Guiraa ni guj galoo najc si'c te balaa, baluiini xho gacni naj. Regon näjza reman ni rudeedreni lo Dios direni nusansa'c xcäriejn reni rudeed gojn lo Dios, sa'csi xtiejn reman rusäutisni lo xtoj rebajn. <sup>10</sup> Dee najc ganaxtis xhi rajwni, ni rä'ni, con yälrobnis, o xhi stee dzuun ni rujn bejn te ria ganaxtis tiejxhrene che guidzujni dxej cheni guchaa Dios guira'ti.

<sup>11</sup> Niluxh abiääd Jesucrist, naj laani najc bixhojzro xcuent redidxcoob ni sajcru naj. Nacoob guidoro cadro biu' bixhojzre, nasa'cruni naj. Xhet con naadi bejn guc-cheeni. Dizani gac guidoo guedxliujre. <sup>12</sup> Abiu' Jesucrist cadro najcpac yu' ni laa dxanduxh, niluxh xhet xtiejndi redxib, regon; ganax lagajc xtiejn ni ca'ni biu'ni yudxanduxh tejtis huält, te si'c baslaani nuure lo dojl par tejpas. <sup>13</sup> Reni basia xtoj rebajn galoo najc redee: xtiejn regon näjza redxib, näj cobdäj xten reguidxaa ni rejc nen guidodxanga; bastiojbn guiro'preni yejc reni yu' xtojlni. <sup>14</sup> Palga basia redee xtoj rebajn, aticaxh xtiejn Jesucrist sajc xusia dojl, sa'csi rajpni yäl nabajn par tejpas. Lagajc laani badeedni xtiejn ni lo Dios. Niluxh najcni renya sa'csi dini niujn dojl, rusiazani xcäriejn nuu xcuent retzuun ni xhet sajcdi, te chunu loj Dios ni nabajn par tejpas.

<sup>15</sup> Ni'cni Jesucrist najc nani suga' galäii: nez lo Dios näjza nez loj reben guedxliuj xcuent didxcoob. Yälgujt xten Jesucrist najc te gudzucajni xtoj rebajn näjza xtoj renani bejn si'cni caj lo leii, te xca' guiraa reni agurejdx Dios yäl nabajn par tejpas, si'c bia'n diidx galooli. <sup>16</sup> Didxcoobre najc si'c che rlanjz tej bejn guinibee xho guidis xhixtenni che agojl guetni, nanab gucuuaa bejnga lo te guijt xho guidisni, dxejcti gucuuaani lajni. Niluxh xhet sajcdi guijtza che gajd bejnga guet. <sup>17</sup> Xhet sajcdi guijtza che nabansijc nani bejnñi. Sajcni che agujt bejnga. <sup>18</sup> Ni'cni che bia'n Dios diidx loj rexpejn Israel galoo, gujt te man te bixe' rejn. <sup>19</sup> Che gulujx gunii Moisés rediidx si'c ni caj lo leii lo guiraa rexpejn Israel, bagu'tni rebiser, redxib, cua'ni rejnga näjza nis, bahuajdxni guid-xiil xnäaa näjza te la' yajg balaghäz, hysopo, dxejcti bastiojbn rejn yejc guijt cadro caj leii, näjza yejc rebejn. <sup>20</sup> Dxejc guniini lojreni: “Rejnre najc seen sile'pac diidx ni abaxhal Dios lojtu.”

<sup>21</sup> Sigajcza bastiojbn Moisés rejn guidoo näj guiraa renani rquiin rebixhojz che rajnreni Dios. <sup>22</sup> Leii xten Moisés niibee jia guiralii con rejn, palga di rejn guixe', di xtoj rebajn jia.

### *Xtiejn Jesucrist rudzucaj dojl*

<sup>23</sup> Ni'cni biquinipac gujt remanre, bixe' xtiejn ni te basiani reni najc xpalaä reni yu' xhaguibaa, niluxh reni yu' xhaguibaa rquiin guixe' xtiejn te ni sajcru. <sup>24</sup> Di Jesucrist niu' nen guidoo ni benchee rebejn, ni najc xpalaä guidoopac xten Dios xhaguibaa. Laani biu'ni lagajc xhaguibaa, te laani suga'ni nez lojpac Dios te caniini xcuent nuure loj Dios. <sup>25</sup> Bixhojzro xten xpen Israel biu' nen yu' ni laa dxanduxh tejtis huält nen teb ijz, ca'ni xtiejn reguidxaa. Niluxh Crist biu' xquidoopac Dios xhaguibaa tejtis huält par tejpas, luxh ca'ni lagajc xtiejnñi. Di guiquiin jiu'runi balti huält. <sup>26</sup> Palga nanab gunni si'cni rujn rebixhojz, sajpn por niejtni te chinaduxh huält cheli birixtiej guedxliuj. Luxh naj, cheni bidzujn dxej,

baluiloj Jesucrist tejtis huält, lagajc laani badeedzani xtiejn ni lo Dios cheni gujtni, cuajni lo cruzj te si'c badzucajni par tejpas xtojł rebejn. <sup>27</sup> Guiraa bejn nanabpac guetreni tejtis huält, dxejctiru sidejdreni yälğuxhtis xten Dios. <sup>28</sup> Sigajcza tejtis huält badeed Jesucrist xtiejn ni ni bixe' lo cruzj te badzucajni xtojł xhidalduxh bejn. Luxh loj renani cabäjzni suluiilojni stehuält, xhet te gudzucajdiruni dojl, alga te gusa'ni xcälruslaa renani cabäjzni.

## 10

<sup>1</sup> Sa'csi leii xten toMoisés najtis si'c te balaa xten nani siäd näj. Niluxh dini gac si'cpac redidxcoobga. Ni'cni leii, con xtiejn reguidxaa ni rxe' cazob ijz digacdi gunsa'cni rebejn nani guibig lo Dios, sa'csi di xtiejn man gudzucajpac rextojłreni. <sup>2</sup> Paru niajc nibicajpac xtojł reni ruedeed xtiejn guidxaa, aguläjz ruedeedreni xtiejn guidxaa, sa'csi che gubicaj xtojłreni, diru xcäriejnreni gumbee dojl. <sup>3</sup> Niluxh yälrejt man näj yälruedeedreni rejn casob ijz rusnajtisreni lajzreni xcuent dojl. <sup>4</sup> Sa'csi digacdi gudzucajpac regon näjza xtiejn redxib xtojł bejn.

<sup>5</sup> Ni'cni che biäd Jesucrist lo guedxliuj räjpni lo Dios:

Di rlaizlu xtiejn guidxaa niclaza regon niluxh abejnlu gacä nigui-guedxliuj.

<sup>6</sup> Dilu nichagljaz yälrejc xten guidxaa niclaza yälruedeed rejn, niclaza gojn ni ruedeed rebejn te gusani xtojłreni.

<sup>7</sup> Dxejc räpä: "Narä basiälä te gunä si'cni rlaizlu Dad, Dios, (si'cni caj neñ reguijtz xcuent ni sacä)."

<sup>8</sup> Che gulujx gunii Jesucrist diidxga: "Di rlaizlu, dizalu guidxagljaz xcälrejt guidxaa näjza regon niclaza xcälrejc guidxaa, niclaza yälruedeed rejn xcuent xtojł bejn si'cni caj lo leii gun bejn." <sup>9</sup> Dxejcti räjpni: "Narä siälä, te gunä si'cpac ni rlaizlu, Dad Dios." Dxejc badzucaj Jesucrist nani gujc galoo, te guläxtiejni didxcoob ni bia'n Dios loonu näj. <sup>10</sup> Abasia Dios lastoonu sa'csi bejn Jesucrist si'c rlaiz Dios cheni baxhe'ni xtiejn ni lo cruzj tejtis huält par tejpas.

<sup>11</sup> Guiraa rexpixhojz Israel rujnreni dzuun guixe-guixee te ruedeedreni lagajctis guidxaa, näjza xtiejn reman, guiraa si'ctis ni caj lo leii, niluxh reni'c digacdi gudzucaj dojl. <sup>12</sup> Niluxh Jesucrist tejtis huält baxhe' xtiejn ni lo cruzj te badzucajni xtojł rebejn par tejpas. Naj agurejni xladbee Dios cadro rnibeeni. <sup>13</sup> Ro'c cabäjzni guiraa ni rdxe'ch lojni te cuereni ladzni'ni. <sup>14</sup> Ni'cni tejtis huält cuajni lo cruzj te basiani par tejpas guiraa renani ahuililajz xtiidxni. <sup>15</sup> Sigajcza rnii Sprit Dxan xten Dios loonu; najni:

<sup>16</sup> Diidx nani jiannääreni neñ redxejre gac scree,

naj Dad Dios: sucuaä rextidxä lo xcäriejnreni,

susäläza xtidxä neñ lastooreni.

Dxejcti räjpni:

<sup>17</sup> Diru lazä guizaj rextojłreni nicla rextolguidxreni.

<sup>18</sup> Ni'cni, cheni abia xtojł bejn, diru quiquün gudeedreni guidxaa te jia rextojłreni.

### *Nanab guibignu lo Dios*

<sup>19</sup> Ni'cni resa'nu, na'c guidxejbtu, sajz jiu'nu yudxanduxh cadro bixe' xtiejn Dad Jesucrist nani abadeedni lo Dios. <sup>20</sup> Naj yu' te nezyuj, nezsiucoob, nezyuj xten xcälnabancoobnu ni baxhalni che badzucajni ladroga. Ni'c säloj cheni biu'ni neñ yudxanduxh, badeedni lagajc xtiejn ni lo Dios. <sup>21</sup> Jesucrist najc xpixhojzronu nani rnibe rexpelj Dios. <sup>22</sup> Ni'cni do'o guibigrunu lo Dios guideb lastosa'cnu, na'c guidxejbdinu, na'cza guituydinu. Con yälirililajzpac abia lastoonu xcuent rexhigabgujdx, abidiibza tiejxnu lo nis-ya. <sup>23</sup> Do'o chanuu sudzu'tznu lo xtiidxni nani huililajznu, na'c guchaanu xhigabnu sa'csi susoob Dios diidx ni bia'nni loonu. <sup>24</sup> Naj do'o guihuii xho jiennu te gacnäy sa'nu te si'c chonälajznu sa'nu nägajcza te jiennu ganax dzunsa'c. <sup>25</sup> Na'c jiennu si'c rujn rebejn nani diru jiäd che rdxagsa'nu. Nanab guilidxnu resa'nu sa'csi näj asiädzdzungajxh dxej ni guibi' Dad Jesucrist.

<sup>26</sup> Palga chanuu jienrunu dojl, niluxh abiejn diajgnu xtidx Jesucrist, diru gacdi guibicaj xtojłnu dxejc. <sup>27</sup> Dxejcsi guidxeebtisnu guilääznu yälğuxhtisduxh xten Dios näj guiboo ni guze'c renani rdxe'ch loj Dios. <sup>28</sup> Cheni guyu' chu tej ni di niujn si'c caj lo xleii Moisés, niluxh bidxaag xtidx tio'p o chon ni nancheepac, räjpreni dini nusoob leii, gujt bejnga, rut balaslajzdini. <sup>29</sup> Maazru yälrusacsíduxh nanab ted renani ruläj yejc Xi'n Dios cheni direni gusobdiajg xtiidxni. Alga ru'o'nreni xtiejn ni ni baxhe'ni lo cruzj te basianini. Rusanxtujzani Sprit Dxan xten Dios nani badeed didxcoob lojni. <sup>30</sup> Anancheenu gunii Dios: "Narä susquixä bejn; loä siguijx bejn", räjp Dios. Stehuält guniini: "Dad sujn yälğuxhtis rexpeljni." <sup>31</sup> Cosduxh gac bejn ni jiajb ladznaa Dios nani nabajñ par tejpas!

<sup>32</sup> Niluxh colsnaj lajztu xho gujctu galoo; cheni entis cua'tu xtidx Dios, xho batip lajztu, gudejdtu trabajw sa'csi cua'tu xtidx Dios. <sup>33</sup> Guyu' resa'tu gudéreni lojni, yu' reni basacsi la'tu nez loj rebejn. Guyu'za huält astoo gudejdzatu trabajw sa'csi cahuiitu rebejn nani

basacsireni, cadejdzareni trabajw. <sup>34</sup> La'tu banaj lajztu renani yu' latzguiib, guideb yälrbalajz batip lajztu che cua'reni guiraa xhixtentu, sa'csi gucbeetu xhaguibaa rajptu reyäl'nasa'c ni sajrcu, niluxh yu'ni par tejpas. <sup>35</sup> Na'c gunijttu xcäl'ririlajz xtidx Jesucrist, sa'csi yäl'ririlajzga gun xca'tu yäl'nabajn par tejpas. <sup>36</sup> La'tu nanab cuedxitu te che abejntu ni rlajz Dios, dxej xca'tu nani aguniini guniidxni. <sup>37</sup> Sa'csi xtidx Dios ni bia'n rni:

Asiäddzungajxhpac dxej ni jiäädni,  
asiäddzungajxhpac dxej ni jiääd nani siääd, dipacni gaclaa.

<sup>38</sup> Renani nabaŋsa'c sibaŋnäj yäl'ririlajz,  
niluxh palga yu' chutej ni guidxejb challilajz,  
dini'c gun guibaa laza.

<sup>39</sup> Niluxh nuure dinu gac si'c reni rusaan yäl'ririlajz te nitreni loj dojl. Nuure najcnu renani rililajz xtidx Jesucrist te laa xaimnu par tejpas.

## 11

### Yäl'ririlajz

<sup>1</sup> ¿Xhini'c najc yäl'ririlajz? Yäl'ririlajz säloj cabääznu sajcpac tejni gajd gac, yu'pacza ni mase dinu fiini, najcni si'cni abahuinuni. <sup>2</sup> Dios huinälajz retoxtadgoldoonu sa'csi huililajzreni xtiidxni.

<sup>3</sup> Sa'csi rililajznu, najnnu benchee Dios reguedxliuj, bencheeni guibaa, bencheezani guiraa nani rhuiinu. Con xtiidxtisni bencheeni nani dinu guihui.

<sup>4</sup> Gojpza toAbel yäl'ririlajz badzubyaalni rexquidxaani lo Dios. Yälrbijbyaal xtenni sajrcu loj yälrbijbyaal xten toCaïn. Ni'cni gunii Dios najc toAbel beŋsa'c. Naj mase agujt Abel, sanuutis racbeenu xcuent yäl'ririlajz ni gojpmi.

<sup>5</sup> Sigajcza gojp Enoc yäl'ririlajz, ni'c sinä Dios Enoc xhaguibaa, guideb nabajnni, te na'c niejtnti. Diru rebejn nidxälni sa'csi asinä Diosni xhaguibaa. Luxh räjp Dios xcuentni che gajd Dios jinäni, gubaŋsa'cni, baspaani lajz Dios. <sup>6</sup> Rut chu tejdi sajz guspaa lajz Dios palga dini chalilajz, sa'csi che guibigni lojni, nanab chalilajzni yu' Dios, chalilajzzeni sudeed Dios xcäl'nasa'cni loj renani rguiilni, nalajznu renani rlajz gumbeepac Dios.

<sup>7</sup> Gojpza toNoé yäl'ririlajz. Che räjp Dios lojni siajbpac nsguij ni gajdreni fii, huililajzni. Bejnni si'c ni räjp Dios. Bidxejbni sa'csi najni rusooob Dios xtiidxni, ni'c bencheeni te canuduxh te di niejt rexi'nni. Sa'csi gojpmi yäl'ririlajzga, bejnni gubibde rebejn guedxliuj, gunijtreni sa'csi direni nililajz xtiidxni. Dxejcti cua'ni yäl'nabaŋsa'c ni siääd xcuent yäl'ririlajz.

<sup>8</sup> Sa'csi gojp toAbram yäl'ririlajz, basoobni xtidx Dios che gurejdz Diosni, biriini lajdxni te huijni cadro gudeed Dios yuj lojni te cuääzni ro'c. Biriini lajdxni, mase dini gan caro cháäni. <sup>9</sup> Gojp toAbram yäl'ririlajz, ni'c huililajzni si'c benzijt loj reyuj ni räjp Dios gudeedni lojreni. Ro'c guläzreni si'c lajdx benzijt. Guläzni neŋ reyuguij, sigajcza bejn toIsaac näjza toJacooob, sa'csi näjza lojreni räjp Dios gudeedni yujga. <sup>10</sup> Niluxh toAbram cayunloj te guejdx nani sudzu'tz, te guejdx nani cuäxtiej Dios, nani gunchee lagajc Dios.

<sup>11</sup> Sigajcza gojp toSara yäl'ririlajz te mase anajcni bengool niluxh agudejd chu xi'nni, cua'ni yäl'rnibee xten Dios te gujnci nan, guyu' te xi'nni, sa'csi huililajzni susoob Dios xtiidxni. <sup>12</sup> Ni'cni mase siäddzungajxh dxej ni guet toAbram, guyu' xhidalduxh xajgni. Si'c rebalxhaguibaa näj si'c reguibäzlu'le' xten yujxh ni tre' ro' nisdoo, si'c najcreni xhidalduxh, nicla gac guigabreni.

<sup>13</sup> Guiraa rebejnre gujt, direni nica' yuj nani räjp Dios gudeedni lojreni; niluxh sa'csi rajpreni yäl'ririlajz, bahuiireni lo yujga zistro, ni'c bibalajzreni, sa'csi anajreni najcreni benzijt, cansajsireni lo guedxliuj. <sup>14</sup> Reni rni si'c, rniliireni caguilsijcreni cadro gac lajdxreni. <sup>15</sup> Paru niujnreni xhigab lajdxreni najc guejdx cadro biriireni, pet niäjz nibisacreni ro'c. <sup>16</sup> Niluxh laareni rlajzreni te lajdxreni ni sajrcu, nalajznu lajdx Dios xhaguibaa, ni'c rguilreni. Ni'cni di Dios guitujy gäbreni najcni Dios xtenreni, luxh alabencheeni guejdx cadro cuääzreni xhaguibaa.

<sup>17</sup> Gojpza toAbram yäl'ririlajz ni'cni cheni bateed Diosni preeb, räjpni loj Abram gudeedni Isaac lojni lacuaa gudeedni xhiil, cuäjbni gugu'tni xi'nni lacuaa xhiil, luxh Dios ni najc tejtis aräjp lojni galooli: <sup>18</sup> "Isaac guniidx chu xhidajl xajglu, xagdoolu." <sup>19</sup> Sa'csi nanchee toAbram rajp Dios yäl'rnibee te guspajnni rebengut. Luxh si'cza cuasacni xi'nni, ascanu loj rebengut cuasacni xi'nni.

<sup>20</sup> Näjza toIsaac gojp yäl'ririlajz benle'ni toJacooob näjza toEsaú, räjpni xhini'c gun tejpgareni. <sup>21</sup> Gojpza toJacooob yäl'ririlajz, che agojl guetni, benle'ni guiro'p rexi'n toJosé. Dxejcti huistieni guzucajni yejc baston xtenni te si'c gojpmi Dios. <sup>22</sup> ToJosé gojp yäl'ririlajz. Che agojl guetni, räjpni sirii rexpejn Israel lajdx Egipto, gunibeezani xho gunnäjreni xtzujtni.

<sup>23</sup> Gojp rexuczajn Moisés yäl'ririlajz, ni'c cheni gojl Moisés, bacua'tzrenini choŋ bäii, sa'csi bahuiireni bäzdaanni. Direni niu xtidx rei ni gunibeeni, räjpni ju'treni bäz niguü.



<sup>24</sup> ToMoisés gojp yälrlilajz, ni'cni che aguroobni di rlanjni nirilajni xi'n xindxa'p reii xten Egipto. <sup>25</sup> Bejnni xhigab tednäjni trabajw rexpejn Dios lacuaa niujnini redzuun ni rchaglaz rujn reben Egipto, sa'csi najc reni'c dojl, luxh tera'tsi ruspaareni lajz bejn. <sup>26</sup> Par laani maazru sajc tedni lagajc trabajw ni gudejd Jesucrist lacuaa niajpnini reyäl'nasa'c xten Egipto sa'csi laani cabäjtznini reyäl'nasa'c nani churu gudeed Dios lojni. <sup>27</sup> Gojp toMoisés yälrlilajz biriini lajdx reEgipto, dini nidxejz yälrdxe'ch xten reii, huinuutis gusudzu'tznini si'cni najc xhigabni, ruhuiini loj nani di guzen, nalajznu Dios.

<sup>28</sup> Gojp Moisés yälrlilajz bejnini lanij xten pascw. Gunibeeni baroobreni rejn ro' xpuert rexpejn Israel te che ted angl xten yälgujt nicla te xingan galoo xten rexpejn Israel di guet. <sup>29</sup> Gojp rexpejn Israel yälrlilajz gudejdreni galäii nisdoo ni laa nisdoxniaa luxh asdoo loj yubijdz rsiajreni si'c gudejdreni. Niluxh che rlanj rebejn Egipto nidejd, gubi' nis, dxejc gulo'reni nen nis.

<sup>30</sup> Xcuent yälrlilajz gurebä'n paderguij xten guedx Jericó, cheni basa' gajdz dxej caded huält rexpejn Israel guejdxga. <sup>31</sup> ToRahab, te gunaguijdx, gojpszani yälrlilajz ni'c dini niejt che gujt renani di nuzobdiidz, sa'csi laani bacua'tznini gaii bejn nani sagula'tz xho najc guejdxga.

<sup>32</sup> ¿Xhiruxh guiniä? Di galäi guiniä xcuent toGedeón, xcuent toBarac, xcuent toSansón, xcuent toJefte, xcuent toDavid, xcuent toSamuel, näjza xcuent retoprote't. <sup>33</sup> Guiraareni gojp yälrlilajz ni'c bejnreni gaan xhidajl reguejdx, bensa'creni yälguxhtis, cua'reni xcälracnäi Dios ni bia'n diidz xca'reni, basäureni ro' rebeedz. <sup>34</sup> Guyu'reni nen te balduxh luxh xhet gujcdireni, gojl baxun'reni te di niejtreni con espaad. Reni gujc benrdxaj, guzutu'tznini gujcreni nadipduxh, gujcreni benduxh lo guer, barilaagwreni resoldaad xten reni rdxe'ch lojreni. <sup>35</sup> Guyu' regunaa ni cuasac rextogoolreni, gubansacreni lo rebengut.

Sgaaireni gujt xcuent yälrusacsäi lacuaa nicäjbreni nusiech lajzreni te nusläa bejnreni sa'csi rlanjreni xca'reni stee yäl'nabajn ni sajcru. <sup>36</sup> Sgaaireni gudejd trabajw guniyaj bejnreni, gudinnäi bejnreni chiir, cuaduuzarenäi caden, guyu'zarenäi latzguib. <sup>37</sup> Guyu'za reni gujt che bacuaa bejn guj yejcreni o che gujcreni tio'p la' con sier. Guyu'za reni basacsi bejn te guro'nreni yälrlilajz. Guyu'za reni gujt con spaad. Guyu' reni cuanzaj nezree nezrec, gojtrene guid-xiil näjza guid-dxib, sa'csi xhet rajpdireni luxh entis rdejdreni trabajw rusacsäi bejnreni. <sup>38</sup> Sa' rebejnnga di nungäil reben guedxliuj niääd rebejnnga lojreni. Cuanzaj rebejnnga nez lo reyubijdz cad xhet yu'di xhi gaureni nicla nis te yäreni, cuanzajreni nez nen redajn, nez nen rebiliäa näj nez nen guedduxh ni yu' nen yuj. <sup>39</sup> Guiraa rebejnnga gojp yälrlilajz, luxh ni'cni huä'p xpala'nreni, niluxh direni nica' ni bia'n diidz gudeed Dios lojreni, <sup>40</sup> sa'csi bejn Dios xhigab gunni te dzunsa'c lojreni. Bejn Dios xhigab guniidxni yäl'nasa'c loonu, naj tejsi guica'nu con laareni nani bia'n diidz guniidz Dios.

## 12

### *Guhuiitisnu lo Jesucrist*

<sup>1</sup> Ni'c najcni si'cni suga'nu galäii guiraa rebejnre luxh cahuiireni xcälrlilaaaznu. Ni'c do'o guisa'n te laad guiraa reni rusäu lo xnejznu, näjza redojl ni ruixhiid nuure lo xcäl'nabajnnu, te di jieednu chosaanu nez lo nezyuj ni sasanäanu nez cadro chonnu. <sup>2</sup> Do'o guihuidzu'tz nez loj Dad Jesucrist nani guläxtiej, nani guluuxza xcälrlilajznu. Jesucrist gudejd trabajw lo crujz, dini nitujy gujtni lo sa' yälgujtga, sa'csi najnini cheni agudejdni trabajw, sica'ni yälrbalajz; naj agurejni xladbee Dios cadro rnibeeni.

<sup>3</sup> Colujn xhigab la'tu xho gudejd Jesucrist ladznaa reben dojl, te na'c guidxajgtu, na'cza jieedtu laj ni cabäjtznini. <sup>4</sup> La'tu gajd xtiejntu guixe' lo yälrucuanäi dojl. <sup>5</sup> ¿La abiäl lajztu xho balijdx Dios la'tu si'c xi'nini, ä? Scree caj xtiidxni lo reguijtz; räjpni:

Xinä, na'c cuälazlu xcäl'naj Dad niclaza jieedlu che tilnäjni luj.

<sup>6</sup> Sa'csi si'c runnaj Dad renani sanälajzni, rujnini riaa guiraa renani rca'ni si'c xi'nini.

<sup>7</sup> Palga gatijp lajzlu lo xcäl'naj Dios, sica'ni luj si'c xi'nini, sa'csi ¿chu dad di gunnaj xi'nini?

<sup>8</sup> Niluxh palga di Dios gunnaj la'tu si'cni runnajni guiraa rexi'nini, ditu gac xi'npacni, najctu xi'n redolgujdx. <sup>9</sup> Anajntu cheni gucnu biuux lo guedxliujre, bennaj xtadnu nuure te rsoobnu xtiidxni, te runsaczanu si'cni rlanjni. ¿Xhicuent dinu cuadijg xtidz xtadnu ni yu' xhaguibaa te si'c jia'pnu yäl'nabajn, ä? <sup>10</sup> Xtadnu lo guedxliujre bennajreni nuure tio'p-chon dxej, te gac gusoobnu xtiidxni. Niluxh si'c runnaj Dios nuure te jia'pnu te yäl'nabanya, te gac nayazanu sigajc najcni laani. <sup>11</sup> Guliini xhet xhi yäl'najdi ni rchalonu najc laaca che rsiajznini, racnaj tiejxhnu niluxh ria'nnu et laadi. Niluxh guiraa renani agudejd loj yäl'najga rusoob xtiidxni, rca'reni te yäl'nabanya ni rbecdxilajzreni.

*Riez guze'ni xtidz Dios*

<sup>12</sup> Ni'cni col̄sudzu'tz reñaatu ni abadxajg, col̄sudzu'tz yecxhijbtu ni abadxajg, <sup>13</sup> te col̄quuil nezuyt xten xtidx Jesucrist te sudzu'tz ni'tu. Na'c guibicajtu lo xnezuyjni.

<sup>14</sup> Col̄quuil xho cuedxinäjtu guiraa rebejn. Col̄chanä te yäl̄nabanya, sa'csi renani di guibanyadi, digacdi fiireni loj Dad Jesucrist. <sup>15</sup> Col̄huisa'c te di gunijt chutejtu lo xcäl̄racnäj Dios, col̄natiro gac chu tejtü si'c te cuanlaa ni rujn daan, sa'csi sa' bejnga suxhiñni guiraa renani ahuililajz. <sup>16</sup> Nicla tejtü na'c ga'p stee gunaa te laad, nungäj̄l cuäznäjni chäältisni. Na'cza gactu bejn ni di jiu xtidx Dios, si'c gujc toEsaú cheni bato'ni xcäl̄nasa'cni ni najc xtenni sa'csi najcni xingan galoo xtadni. Bato'nini te cua'ni yäl̄rajwtis. <sup>17</sup> Anajntu, cheni rlajzni niunle' xtadnini te nica'ni ni najc xten xingangalooni, dini nica'ni mase guc-huin lajzni, binduxhni. Dxejcti diru niajcdi nica'nini.

<sup>18</sup> Col̄natiro, sa'csi la'tu di'tu nibig lo te dajn cadro rajc rsiaj bejn, te dajn ni galoo cayecduxh guiboo, cadro nacäjy, nacäiboo, cayajcza bedonduxh. <sup>19</sup> Diza diajgtu niejn xse' trompet, xse' Dios si'c biendiajg rexpejn Israel agujc xchero. Luxh che biejn diajgreni redi-idxa, direni nutiplajz, gunabduxhrenei na'cru guiniini lojrenei. <sup>20</sup> (Sa'csi direni nutiplajz diidx ni caniiini, räjpni: "Palga ted te mantis guläj̄ xhuj dajnga, col̄ju'tni con guij.") <sup>21</sup> Te yäl̄nadxebduxh najc nani guzen ro'c, lagajc toMoisés räjp: "Cayacditä yäl̄rdxejb."

<sup>22</sup> Niluxh la'tu agubigtu lo dajn xten Siön, cad najc lajdx Dios ni nabajnpac, nalajznu guedx Jerusalén ni yu' xhaguibaa cadro yu' xhidalduxh xangl Dios, <sup>23</sup> cadro re' reni calä'p xpala'n Dios. Ro'c re'za reni najc xi'n Dios, renani acaj lajni xhaguibaa. Agubigzatu lo Diospac, ni najc Juejz xten guiraanu, näjza loj resprit xten rebejn nani abasia Dios te anajcreni ben̄nasa'c. <sup>24</sup> Agubigzanu loj Jesucrist nani suga' galäii nez loj Dios näj benguedxliuj xcuent didxcoob ni bia'n Dios, näjza lo xtiejn Jesucrist ni badeedni lo Dios xcuent nuure. Jesucrist rniab jäj̄l lajz Dios, luxh ni'c sajcru loj nani rniab xtiejn toAbel. Xtiejn toAbel rniab quix̄n nani bagu'tni.

<sup>25</sup> Ni'c col̄natiro te di cuälaztu nani canii lojtu rextiidxni. Palga di rebejn nidedbia sa'csi gulälaz nani baluii bejn ni siäd̄ guedxliujre, ¿xho jienu tedbianu palga guilälaznu nani ruluii nani siäd̄ xhaguibaali? <sup>26</sup> Xse' Dios basniib guedxliuj galooli, niluxh naj rnisacni: "Ste huält susnibä xhet ganaxdi guedxliuj, susnibä näjza xhaguibaa." <sup>27</sup> Che gunii "ste huält", ni'c säloj guibicaj renani benchee Dios ni rac rniib, te jä'n renani digacdi guiniib. <sup>28</sup> Luxh sa'csi lajdxnu ni guniidx Dios digacdi guiniibni, do'o guideed xquixtios lo Dios xcuentni, te si'c chunu loj Dios, chonälaznuni guideb yäl̄rdxejb näjza yäl̄nadolajz, <sup>29</sup> sa'csi Xtiosnu najc si'c te balduxh ni ruse'c, ni runitlojza.

## 13

### *Xho guspaa bejn lajz Dios*

<sup>1</sup> Col̄chanuu lo yäl̄rinälajz sa'ni. <sup>2</sup> Di gusaantu gudeedtu roliztu guidzujn biooz, sa'csi loj reni bejn si'c, yu'reni badeed rolizrenei bidzujn xangl Dios rolizrenei, niluxh direni niacbee chu najcreni.

<sup>3</sup> Col̄snaj lajztu reni yu' nen̄ latzgüiib, ascanu la la'tu ni yunäreni latzgüiib. Col̄snajza lajztu renani basacsi bejn, ascanu la la'tu ni cagusacsireni sa'csi näjza la'tu najctu benguedxliuj si'c najcreni.

<sup>4</sup> Col̄ga'p xpala'n yäl̄guchnaa te guiban̄-nayatu con chäältu sa'csi sujn Dios yäl̄guxhtis rebejn ni resnäjä chääl̄ bejn näjza reni rusguee reben̄xteb.

<sup>5</sup> Na'c chanälajztu meel, col̄guibalaznäjä ni rajtju, sa'csi Dios agunii: "Dipacna gusanälu, dizana cuälazälu." <sup>6</sup> Ni'c dinu guidxeeb guiniinu:

Dad ni yu' xhaguibaa najc ni rcanäj narä;  
dina guidxebä xhitis ni gunnäjä bejn narä.

<sup>7</sup> Col̄snaj lajztu renani baluii guiban̄sa'ctu, ni basule'za xtidx Dios lojtu; col̄huii xho nabajnpacni te sigajcza col̄chanä xcäl̄rililajzrenei.

<sup>8</sup> Sigajc gujc Jesucrist naai, sigajcza najcni nadxej, sigajcza sajcn̄i par tejjpas. <sup>9</sup> Na'c gusaantu gusejchrenei lajztu xcuent ste'ca yäl̄ruluii ni digac si'c najc xtidx Jesucrist. Sac-duxh sudzu'tz lastoonu lo yäl̄racnäjä ni ruluii xtidx Dios, xhet lojdi yäl̄rajwtis. Xhet sajcdi rebejn nani rujntis xhigab xcuent yäl̄rajw.

<sup>10</sup> Nuurnu rajpnu garenca piään, ro'c digacdi xca' rebixhojz xhi gaureni si'c ni cua'reni nen̄ guidoguijd galoo. <sup>11</sup> Sa'csi xpixhojzro xpejn Israel rinä xtiejn reman nen̄ yu' ni laa dxanduxh te biäu lo dojl xten rebejn, niluxh rize'creni xpääl̄ remanga te laad, dejt̄ guejdxga. <sup>12</sup> Si'cza gujt Jesucrist te laad, dejt̄ guejdx, te basiani xtoj̄l rebejn xcuent lagajc xtiejn̄ni. <sup>13</sup> Naj col̄cho' chonnu loj Jesucrist te laad dejt̄ guejdx te guideednu trabajw näjza yäl̄xtujy si'cni gudejd Jesucrist. <sup>14</sup> Sa'csi lo guedxliujre dxunlaasinu, niluxh caguiinu laadxnu ni chu jäädru, te ro'c guidxunnu par tejjpas. <sup>15</sup> Guideb xcäl̄racnäjä Jesucrist do'o guideeditisnu xquixtios lo Dios si'c te gojn ni gudeednu lojni, guiliä'pnu xpala'n̄ni näj jiel̄nu

redij. <sup>16</sup> Na'cza jiälajztu guntu huen, gacnäj sa'tu, sa'csi reni'cni najc redzuun ni rdxaglazj Dios.

<sup>17</sup> Colcuadijg xtidx reni rnibee la'tu, sa'csi laareni rcanäjreni lastoonu, si'cza laareni sudeedreni cuent lo Dios. Colyujn guibalajzreni gunreni xtzuunreni, na'c gac-huin lajzreni sa'csi palga gac-huin lajzreni, xhet sajcdini par la'tu.

<sup>18</sup> Colnab lo Dios xcuent nuunu, sa'csi racbeenu naya xcäriejnno, rlaaznu laaca jiennu guira'ti dzuun. <sup>19</sup> Rniä lojtu, guiniabrutu loj Dios, te gun Dios jiojb guibi'ä jiälä lojtu.

*Te didxle' näj lult xtixtios*

<sup>20</sup> Dios xten yälrbexilajz ni baspajn Dad Jesucrist lo rebengut, Jesucrist najc baxtorduxh xten rexiil xcuent rejn ni bejn gusojb didxcoob xtenni ni najc par tejpas. <sup>21</sup> Dios gun gactu bensa'c, bendxojn loj xhitis te guntu ni rlanjni, näj gunni loj guiraa nuure si'c ni rlanjni xcuent Jesucrist. ¡Colspaa lajz Jesucrist par tejpas! ¡Sugacni si'c!

<sup>22</sup> Resa'nu, rniabä lojtu, colcuedxi lajztu, colcuadijg rediidx ni ruliidxre, sa'csi riojnga cacuaä te labäz guijzre lojtu. <sup>23</sup> Colyacbee abirii bejtznu Timoteu latzguiib. Palga guidzungajni ree, siädnääni jiädhuiä la'tu.

<sup>24</sup> Colgudeed xtixtios loj guiraa renani ruluii la'tu näj loj guiraa rebejtznu ni rililajz. Reben Italia ruxhał xtixtios lojtu.

<sup>25</sup> Gacnäj Dios guiraatu. Sugacni si'c.

## Guijtz Nani Bacuaa Santiaag

*Santiaag rucuaa guijtz loj renani nare'ch lo guedxliuj*

<sup>1</sup> Narä Santiaag, xmos Dios näjza xten Dad Jesucrist, ruxhalä xtixtios loj guitzubitio'p cuaa rexpejn Israel ni nare'ch lo guedxliujre.

*Yäl'najn nani runiidx Dios loonu*

<sup>2</sup> Rebetzä lo xtidx Dios, colguibalazduxhtis che rsiajcturecos nani ruquiiltu cuälaztu xnezyuj Dios, <sup>3</sup> sa'csi che rsiajctureni reni'c, rsiajctureni te don la guliipac ahuililajztu xtidx Dios, dxejct rsiiedrutu yäl'rbeedcxilajz. <sup>4</sup> Dxejcti yäl'rbeedcxilajz sajz gunni xtuuuni nen lastootu, te gactu beñsa'c, bejn ni aguyajl lo xtidx Dios, nani xhet cayäädxdix xcäl'najjni.

<sup>5</sup> Palga yu' tejtü ni cayäädx xcäl'najjni, suguniabnini lo Dios, sa'csi Dios rudeedduxhni yäl'najn loj guira'ti bejn, luxh dini guinii didxlaa lojni. Palga guiniab bejn, sudeedza Diosni. <sup>6</sup> Niluxh che guiniabni, suchalilajzpacni, na'c guntio'p lajzni, sa'csi bejn ni runtio'p lajzni najc si'c bäj ni sanä bej, nezree-nezre'c sääbni. <sup>7</sup> Nani najc si'c, na'c gunni xhigab yu' xhi xca'ni lo Dad Jesucrist. <sup>8</sup> Sa'csi nani runtio'p lajzni, lo guiraa ni rujnni nadxer rujnni tej xhigab, guixee rujnni xte'ca xhigab, di gacdi chanuuni tejsi xhigab.

<sup>9</sup> Te sa'nu ni najc nadolajz, suguibalajzni sa'csi najcni beñro sa'csi guläs Diosni, <sup>10</sup> sigajcza bejznu ni yu' xhixtenni, suguibalajzni sa'csi abalüi Dios lojni najcni bejn ni xhet sajcdini, sa'csi nägajc laani sinitlojni si'c rnitloj reguii ni yu' lo cuaan ni yu' loniaa. <sup>11</sup> Sa'csi che rliejn gubijdz näjza te belaa, li rgol recuaanga, li riuii reguii ni caj lojni, dxejct rejtjbrene, dxejcti agunijt xcäl'sacrüni. Si'cza sinitloj te bejn ni yuduxh xhixtenni la' ni yu'ni lo xnezyujni.

*Xhi xca'ni che tedni trabajw*

<sup>12</sup> Chibaa nigüi ni rsiduzu'tz la' ni cadejdni trabajw, sa'csi che agunii Dios didxsa'c xcent nani bejn sica'ni coron xten yäl'nabajn par tejpas ni bia'n Dios diidx gudeedni loj rebejn ni sanälajz Dios. <sup>13</sup> Che gunijt tejtü, rujntu dojl, na'c gäbtu: "Dios bejn banitä", sa'csi di gacdi quiquil Dios te gunni cosguijdx, digacdi gunijt Dios, luxh sigajcza di gacdi gun Dios gunijt te bejn, gunni dojl. <sup>14</sup> Niluxh tejtatu runijt che rcäy xcariejntu sa'csi riabj yejctü guntu cosguijdx. <sup>15</sup> Che riabj yejctü guntu cosguijdx, runijttu rujntu dojl, luxh dojl che abejntuni, riädnäni yäl'gujt.

<sup>16</sup> Sa'ä ni sanälazä, na'c gusaantu gusgueereni la'tu. <sup>17</sup> Guiraa recoshueen, guiraa recossa'c xhaguibaali säädreni loonu; Dios ruxhal'reni, lagajc Dios ni benchee rebajl xhaguibaa, Dios nani di guchaa, sigajctis najcni. <sup>18</sup> Lagajc xcuentni bejn Dios gacnu xpejnni sa'csi huililajznu xtidxliipacni, te gacnu reben galoo loj rexpejnni.

*Xho nanab jiennu*

<sup>19</sup> Acanajntu recosre, sa'ä ni sanälazä. Niluxh tejtatu nanab gusquejnni te gucuaadjjni, per gaclaani te guiniini, gaclaazani te guidxe'chni, <sup>20</sup> sa'csi xcäl'rdxe'ch bejn dini gun xcäl'nasa'c Dios. <sup>21</sup> Ni'cni colcuälaz guiraa recosguijdx, guiraa recoslatsiaj ni ria'n. Guideb yäl'nadolajz col'chalilajz xtidx Dios ni basule'nu, ni yu'pac lastootu, sa'csi ni'c najc ni sajz gusläa xaimtu lo dojl.

<sup>22</sup> Niluxh balüi lo guira'ti bejn najctü bejn ni rusoobpactü xtidx Dios, xhet bejndi ni rucuaadjgtis xtiidxni, ni rusgueeni lagajc laani. <sup>23</sup> Sa'csi palga najc te bejn te nani rucuaadjgtis xtidx Dios, niluxh dini gusoob diidxga, najcni si'c te bejn ni ruhüi lojni loj te guihuajn. <sup>24</sup> Sa'csi che ruhuüi xho najcni, sägajcni, riallajzajcni xho najcni. <sup>25</sup> Niluxh nani ruhuidzu'tz lo leisa'c, nalajznu leiü nani rusläa bejn, luxh rusobpacni leiiga, nani lacuaa jällajzni nani riejn diajgäni, rujnpacni ni caj lo leiiga, bejnga najc ni sajz yäl'rbalajzpac lo xhitis ni rujnni.

<sup>26</sup> Palga yu' tejtü ni rujn xhigab najcni te bejn ni randuxh Dios, niluxh di gacdi gusäuni ro'ni, guiralajz rniini, bejnga rusguee lagajc laani, luxh xhet sajcdi yäl'rajn Dios xtenni. <sup>27</sup> Yäl'rajn Dios ni najc guliipac, ni xhet nu'chdi lojni najc scree: chahuüni rebisiäjb, näjza regunaa ni agujt chääl'ni che yu' xhi rquineni, näjza na'c säblajztu guntu nani rujn reben guedxliuj ni di chalilajz xtidx Dios.

## 2

*Nanab tebloj jiennänu guira'ti bejn*

<sup>1</sup> Resa'ä, la'tu ahuililajztu xtidx Dad Jesucrist ni rajp guiraa yäl'rdimbicha', ni'c di gacdi guntu xhigab sajcrü tej bejn lo sabejnni. <sup>2</sup> Palga guidzujn te bejn xquidoootu yu' niloor naani, najcwni ladsa'c, dxejcti jiu'za te bejn nani xhet rajpd, najcwni ladyujxh, ladbeed, <sup>3</sup> dxejcti la'tu jiuurutu nani najcw ladsa'cga, naatu: "Ree gurej lo yagxhilsa'cre", dxejcti gäblu lo bejn

ni xhet rajpdi: “Rec gusulii o gurej lo yujre”, <sup>4</sup> ɔla xhet rujnditu xhigab garenca najc tej bejn lo sa'ni, ä? Luxh dxejc acayajctu si'c juejz ni rujn xhigab guijdx.

<sup>5</sup> ɔColgucua diajg, betzä ni sanälazä! Agule Dios bejn nani xhet rajpdi lo guedxliujre te ga'preni yärlililazduxh, te lo xcälrnibee Dios xca'reni xcäl'nasa'c ni bia'n diidx gudeed Dios loj renani sanälajzäni. <sup>6</sup> Niluxh la'tu agulälaztu rebejn nani xhet rajpdi. ɔXhixh xhet laadi rebejn ni rajp ni rusacsítu, li rgobxhaxh'reni la'tu, rinäreni la'tu loj reguxhtis, ä? <sup>7</sup> ɔLa xhet laadi rebejn ni rajp ni rniyaj loj Dios ni sacduxh? La'tu abirilajtu rex'i'n Dios.

<sup>8</sup> Palga guliitu cagusoobtu leii xten xpeiinu Dios, si'cni caj lo xquijtz Dios scree: “Colchanälajz sa'tu sigajc rinälajztu lagajc la'tu”, laaca rujntu. <sup>9</sup> Niluxh palga rinälajzrutu tej cuaa bejn lo stee cuaa bejn, cayujntu dojl, luxh xleii Dios rnii najctu bejn dojl, bejn ni rbälaz leii. <sup>10</sup> Palga yu' te bejn ni rusooob guiraa ni caj lo xleii Moisés, niluxh runijtni lo tejtis diidx ni caj lo leii, abanijtpacni, najcni si'cni dini nusoob nicla tej diidx lo guideb leiiga. <sup>11</sup> Sa'csi lagajc Dios ni gunii: “Na'c guesnäjlü bejn ni di gac cháällu”, lagajc laani guniizani: “Na'c ju'tlu.” Palga dilu guesnäjlü bejn ni di gac cháällu, niluxh rugu'tlu te bejn, abanijtlu xcuent guiralii relei. <sup>12</sup> La'tu colguinii, colguibajñ si'c rebejn ni gun Dios yälguxhtis con xtiidxni ni rusläa bejn lo dojl. <sup>13</sup> Sa'csi renani di gulaslajz bejn, che gun Dios yälguxhtis'reni, dizani gulaslajz laareni. Sajcru yärlulaslajz lo yälguxhtis.

### *Yärlililajz näj dzuun ni rujn bejn*

<sup>14</sup> Resa'ä, ɔxhi sajç palga guinii te bejn: “Ahuuilazä xtidx Dios”, niluxh dini gun dzuun ni riäjil gunni, ä? Sa' yärlililajz're, ɔla susläanini lo dojl, ä? <sup>15</sup> Palga yu' te bejtznu o te bisiajnnu ni dini ga'p xhajbni, luxh xhetiza xhi gauni, xhi yäni, <sup>16</sup> luxh gäb tejtü lojni: “Sucuedxi lajzlu jülu, suguidxa' lajzlu, suguidxaj xque'lu”, niluxh dini gudeed nani caquiinni, ɔxhi sajç rediidx ni räjpni lojni, ä? <sup>17</sup> Sigajcza yärlililajz nani di guquül bejn gunreni xtzuum Dios najc si'c te ni agujt, sa'csi dini guquül bejn gunreni dzuun.

<sup>18</sup> Lu'y'za reni naa: “Luj rajpju yärlililajz, narä runä xtzuum Dios; baluui narä xcälrlililajzlu xhet näjdi xtzuum Dios, dxejcti narä suluiä xcälrlililazä xcuent rextzuum Dios ni runä.” <sup>19</sup> La'tu rilililajz yu' tejtis Dios. Laaca rujntu, niluxh näjza rebendxab rililajz yu' tejtis Dios, radcijtli'reni, rdxebeduxh'renini. <sup>20</sup> ɔLa di rrajztu gacheetu, bennayääl? ɔLa ditu gan, yärlililajz ni di guichagnäj xtzuum Dios najc te yärlililazgut? <sup>21</sup> Dios badzucaj xtojñ toxtadgoldoону Abram sa'csi bejn ni si'c gunibee Dios gunni, che badzuubni xingaanni Isa'c lo piään, nugu'tnini nez lo Dios. <sup>22</sup> Colhüii xho tejsi junt sadxaag xcälrlililajz toAbram dzuun ni bejn ni, dxejcti sa'csi bejn ni nani gunibee Dios gunni, bejn Dios gujc xcälrlililajz ni sa' yärlililajz nani rrajz Dios ga'p rexpejn ni. <sup>23</sup> Dxejcti huile' xtidx Dios cadro caj scree: “Abram huililajz ni räjp Dios lojni, ni'cni badzucaj Dios xtojñni, cua' Dios Abram si'c te bennaya.” Birilajzani “xamiigw Dios.”

<sup>24</sup> Ni'cni ruhuiitu rca' Dios te bejn si'c bennaya nez lojni xcuent xtzuum Dios ni rujnzani, xhet ganaxtis xcuent xcälrlililajz bejn ga. <sup>25</sup> Sigajcza gusajc toRahab, ni gujc te gunadxab. Dios badzucajza xtojñni, bejn Dios xhigab najcni te bennaya sa'csi bejn ni xtzuum Dios che badeedni rolizjni bacua'tzloj tio'p xpejn Israel ni gujc guixhajg ni sagula'tz guejdxga, dxejc gucänj'reni te siireni ste'ca nez yuj. <sup>26</sup> Sigajc ni di gacdi guibajñ tiejxh bejn palga xheti sprit, sigajcza di gacdi guibajñ yärlililajz palga dini gun dzuun ni rnibee Dios gunni.

## 3

### *Rediidx nani rnii luudxnu*

<sup>1</sup> Resa'ä, na'c gac xhidajltu bejn ni rulüii xtidx Dios, sa'csi anajnnu rac yälguxhtisroru rebejn nani rulüii xtiidxni. <sup>2</sup> Sa'csi guiragajcnu riennu xhidajl cuaa dojl. Palga yu' te bejn ni di gunijt lo diidx ni rniiini, laani najcni te beñsa'c, rajcza rnibeeni guideb tiejxhni. <sup>3</sup> Palga rusälnu guib ni ru' ro' cabaii te cháänni cadro rrajznu jüni, rnibeenu guideb tiejxhni. <sup>4</sup> Colhüii rebarcwro, mase siolduxh'reni, luxh rebeduxh rulanaareni, niluxh capitán ni rusaj barcw lo nisdoo, te guibäz ni caj xhajñ barcw neñ nis, con ni'ctis rinänini cadrotis rrajzni. <sup>5</sup> Sigajcza najc luudxnu, najcni te labäz tiejxhnu, luxh colhüii lacti didxro rniiini. Najcni si'c te balbäz ni rajc ruze'c guiragajc reyajg ni yu' dajñ. <sup>6</sup> Luxh luudxnu najc si'c te bajl. Rnii luudxnu guiraa redidxdxuudx ni rnii reben guedxliujre nani rdxe'ch lo Dios. Lo guiraa rela' ni najc tiejxhnu, laa luudxnu ni rundxuudx guideb tiejxhnu. Luudxnu ralguij con xquiboo gabijl. <sup>7</sup> Rebejn sajç gusiadcooreni guiraloj guidxaa, guiraa mane', guiraa bäl, guiraa man lo nisdoo, abasiadcoo bejn'reni, <sup>8</sup> per nicla tej bejn di gacdi gusiadcoo luudxnu. Dini cuedxi, guidxani cosguijdx, najcni si'c te bäl ni rauya'ni rugu'tni te bejn. <sup>9</sup> Lagajc luudxnu rliä'pnu xpala'n Dios Xtdadnu, lagajc laani rniyajnu sabejn nu ni benchee Dios sigajc najcni. <sup>10</sup> Tejsi ro'nu rnile' lo Dios nägajcza rgue lo bejn. Rebetzä, ɔxhet si'c di nungäjl di gacni! <sup>11</sup> ɔLa rbää bejn nisnejxh näjza nisrop lo tejsi bisie, ä? <sup>12</sup> Betzä, ɔla caxajsi sajç xcaj aceitun

loj te yagiigw, ä? ¿O la sajc xcaj iigw lo te yaguub, ä? Sigajcza digacdi guirii nisnejxh nájza nisrop lo tejsi bisie.

*Yálnajn ni siáäd xhaguibaa*

<sup>13</sup> ¿Chuni'c lo guiraatu yu' xcáriejnni, nanduxhni, ä? Suguluuini xho najcni xcuent xcálnabansa'cni, sugunni xtzuumni guideb yálnadolajz ni rudeed xcáriejnni. <sup>14</sup> Niluxh palga yu' yálrđxe'ch lo sa'lu ni runnanlaa lastoolu, nájza rujnlu guira'ti parsi xcálnasa'c lagajc luj, na'c gaclu guyalajz, sa'csi ni'c najc si'c ni caniilu didxrusguee xcuent xtidxlíi Dios. <sup>15</sup> Sa'csi sa' yálnajnre, xhet xhaguibaadi siáädni, alga najcni yálnajn xten guedxliujre, xten rebeñ guedxliuj, xtenza rebeñdxab. <sup>16</sup> Sa'csi cadro yu' yálrđxe'ch lo sa'ni, náj cadro rujn beñ guira'ti parsi xcálnasa'c lagajc laani, ro'c yu' bieje, yu' guiraloj latsiaj. <sup>17</sup> Niluxh yálnajn ni ruxhał Dios, ganidno najcni naya, dxejcti rulecdxni xcáriejn beñ, dxejc rujnri rajc beñ nadolajz lo sa'reni, rujnzani saru runnáj beñ sa'reni, rulazlajz beñ sa'reni, rujnzareni guiraloj dzunsa'c, runle'pacreni xtiidxreni, direni guinii tej diidx laaga cayujnreni garenca dzuun. <sup>18</sup> Renani rguuil yálrbedxi, yálrbedxi rbe'creni te xca'reni te yálnabannaya nez loj Dios si'c xcálnasa'creni.

## 4

*Ni nabannáj guedxliuj*

<sup>1</sup> ¿Casiáäd rebieje, reyálrđxe'ch lo sa'ni ni casiajctü? ¿La direni jiáäd xcuent lagajc xhigab ni yu' lastootu, ä? Lagajc rexhigabga rujn bieje neñ lastootu, ruscájyreni xcáriejntu. <sup>2</sup> La'tu rla-jztu ga'ptu nani ditu ga'p, dxejcti rugu'ttu sa'tu. Rsiáblajztu xhixten sa'tu, luxh sa'csi digacdi xca'tuni, dxejc rucuanájtu sa'tu, rdilnájtu sa'tu. Ditu ga'p nani rla-jztu sa'csi ditu guiniabni loj Dios. <sup>3</sup> Rniabtuni, niluxh dini guniidxnini sa'csi xhet laadi najc xhigabtu gunabtuni, alga gunabtuni sa'csi rla-jztu gunijttuni si'cni rla-jztu. <sup>4</sup> ¡Aii! Beñ ni di gандзу' Diostis. ¿La ditu gan beñ nani rla-jz gun redzuun ni rujn rebeñ guedxliuj, beñga rdxe'chreni lo Dios, ä? Ni'cni palga yu' chu tejtu ni rla-jz chanuu lo ni rajc lo guedxliujre, beñga rdxe'ch lo Dios. <sup>5</sup> O ¿la rchalotu xlia'si caj lo xtidx Dios rediidxre: “Sprit ni baxhał Dios te cuáázni neñ lastoonu, randzu'ni nuurnu sa'csi rla-jzni guinibeeni nuurnu”? <sup>6</sup> Niluxh runiidxru Dios xcálracnájni loonu. Ni'cni rnií xtiidxni scree: “Dios rdxechnáj renani runnaro lagajc laareni, niluxh ruedebruni xcálracnájni lo rebennadolajz.” <sup>7</sup> Coljiu'pac lo xnezuyj Dios. Colsudzu'tzpac te di guntu ni rla-jz beñdxab, te guxunni lojtu. <sup>8</sup> Colguibigru lo Dios te guibizgani lojtu. Bendojł, colquib naatu, nalajznu na'cru guntu latsiaj; colgusia lastootu, la'tu ni runtio'p lajztu. <sup>9</sup> Sugacnaj lajztu, suchuti xliajs, colyonduxh. Colguchaa xcálruxijstu, colca' yálhuin, colguchaa xcálrbalajztu, colca' yálrroon. <sup>10</sup> Colyajc si'c beñ ni xhetliidi sajc nez loj Dad Jesucrist, te laani guiliásni la'tu gunni la'tu beñro.

*Na'c guiniyajtu sa'tu*

<sup>11</sup> Rebetzá, na'c guiniyajtu resa'tu. Sa'csi renani rniyaj sa'ni o rujnri yálguxhtis sa'ni, reni'c rniyaj xleii Dios, rujnreni yálguxhtis xleii Dios luxh palga guntu si'c, dirutu gac renani rusooob xtidx Dios, alga najctü juejz xten leii. <sup>12</sup> Tejtis najc nani runiidx leii loonu, tejtis najc juejz; najcni nani rajc ruslaa beñ lo dojł, nani sajcza gunitloj beñ. La'tu, ¿chuxh najctü te guntu yálguxhtis lo sa'tu, ä?

*Dinu gan xhi gac guixee*

<sup>13</sup> Naj colcuadiajg dee, la'tu ni rniitu, nadxej o guixee chonnu te guejdx nezrec. Ro'c guideednu tebijz te guiziinu, guito'nu te jiennu gaan meel. <sup>14</sup> Luxh nicla gantu xho gac xcálnabajntu guixee. Xcálnabajntu najc si'csi te za nani rienloj teja'tbáz, dxejcti rnitlojni. <sup>15</sup> Hueenru guiniitu scree: “Palga rla-jz Dios sibaannu, te jiennu dee o dec.” <sup>16</sup> Niluxh si'c ni rujntu naj, rajc guyalajztu rniitu didxro; luxh guiraa redidxroga najc dojł. <sup>17</sup> Ni'cni ni najn xho riájl gunni, palga dini gun si'c, rujnri dojł.

## 5

*Rulijdxni rebeñ ni yu' xhidajł xhixtenni*

<sup>1</sup> Colgucuaadiajg xtidxá, beñ ni yu' xhidajł xhixtentu. Colyoon, colcuedxa' xcuent reca-sionduxh ni sactu. <sup>2</sup> Guiraa rexhixtentu nani rajptu aguxhijn, luxh rexhajbtu agudajw rebaguiidni. <sup>3</sup> Oor nájza pla't xtentu agubibtiejnri, aguxhijnri. Lagajc dee gun gacbee Dios ditu niujn ni rla-jz Dios guntu, lagajc ni'c gun chectu, nitlojtu. ¡Xlia'si batiedajntu xhixtentu neñ redxej lultga! <sup>4</sup> ¡Colhuui! Ditu niguixsa'c loj reni beñ xtzuumtu, ni'cni laareni cayujnreni yálquij lo Dios xcuenttu. Luxh xhadiajglı Dios xten reangl ni yu' xhaguibaa abidzujn yálquij xtentu ni cabe'c renani batie' xcálnasa'ctu. <sup>5</sup> Agubansa'cpactü lo guedxliujre, bejntu lanij si'tis ni rla-jztu, abastio'tu lastootu neñ redxej xten yálrugu't. <sup>6</sup> Gudiiltu xho bagu'ttu rebensa'c luxh laareni dxiiis gusujreni, xhet bejndireni te na'c nugu'ttoreni.

*Colcuääz jiaäxhii Diostu*

<sup>7</sup> Resa'ä, dxitis colcuääz guidzujñ dxej cheni jiaäd Dad Jesucrist. Colhuii xho rujn bejn ni rbe'c binij, dxitis rbäjzni gac xcäjlni laļ ni riabj nisguigaloo näjza nisguij ni riabj lult. <sup>8</sup> Si'cza la'tu colcuääzdx, colgustioob lastootu sa'csi asiäddzungajxh dxej ni jiaäd Dad Jesucrist. <sup>9</sup> Resa'ä, na'c chale'ctu xquej sa'tu, didi gun Dios yälguxhtis la'tu, sa'csi asiäddzungajxh dxej che guidzujñ Dios ni najc Juejz. <sup>10</sup> Rebetzbidä, colhuii xho gudejd reniguii nani bacuaa xtidx Dios trabajw galoo, xho guläjzareneni. <sup>11</sup> Colhuii xho rniinu chichaa renani guläzdx lo trabajw ni gudejdreni. Abiejñ diajgzatu xho bejn Job che gudejdni trabajw, anajnzatu xho guzajcni xcuent redzuna'sc ni bennäsac Diosni, ni ruluioj xho riaduxh Dios bejn, rapduxhni yälrulasajz.

<sup>12</sup> Rebetzä, che ria'ntu diidx lo te bejn, gunatiro palga gusa'ttu xhaguibaa, o guedxliuj, o xhi steeni. Che naatu: "Mbaj", ni'ctisza colguinii. Che naatu: "Na'c", ni'ctisza colguinii te na'c gun Dios yälguxhtis la'tu.

<sup>13</sup> ¿La yu' tejtü ni cadejd trabajw, ä? Suguiniabni lo Dios. ¿La yu' chu tejtü ni cabalajz, ä? Sugoļni dij te guiliä'pni xpala'n Dios. <sup>14</sup> ¿La yu' chu tejtü ni cayacxhuu, ä? Sucueedxni rebengool ni rnibee neñ guidoo, te guiniabreni lo Dios xcuentni laļ ni cagusälzareneni se't lo cuajni con laj Jesucrist. <sup>15</sup> Luxh palga rililajzpacreneni che canabreni, siajc beñracxhuuga, siliäs Jesucrist bejnga. Luxh palga bejnni dojļ, sibicaj xtojļni. <sup>16</sup> Ni'cni colguxhobdojļ lo sa'tu, colnab lo Dios xcuent sa'tu te jiajctu. Che rniabduxh te beñ naya lo Dios, dzunroza rujn Dios. <sup>17</sup> Elías, te bejn ni gunii xtidx Dios agujc xchero, gujca te bejn sigajc najcnu. Gunabdipni loj Dios te na'c jiajb nisguij, luxh di nisguij niajb lo guedxliuj choñ ijz garol. <sup>18</sup> Dxejc gunabsacni lo Dios, dxejc bixal xhaguibaa, biabsac nisguij, dxejcru gujc reyäl'nasa'c xtenreneni lo guedxliuj.

<sup>19</sup> Rebetzä, palga yu' chu tejtü ni guibicaj lo xtidx Dios, luxh yu' chu gacnäj guibisacni lo xtidx Dios, <sup>20</sup> sugabee bejn nani racnäj guirii beñdojļ lo xnezuyuguidxni te guibisacni lo Dios, bejnga agucnäjni te gulaa xaimni lo yälgujt, te gubicajza guiraa xtojļni, mase xhidalduxh najc xtojļni.

## Guijtz Ganid Nani Bacuaa Pedr

*Pedr cacuaa guijtz loj reni rililajz ni nare'ch*

<sup>1</sup> Narä Pedr, te apost xten Jesucrist, cacuaä guijtzre loj renani agule Dios gac rexpejnäni nani rbäjz si'c beñzjt lo reguedx Ponto, Galacia, Capadocia, Asia, näjza Bitinia. <sup>2</sup> Xtdadnu Dios gule la'tu galooli bencheeni niguii, aguleni la'tu par lagajc laani te gun Sprit Dhan xtenni xtzuumni neñ lastootu te gusoobtu xtidx Jesucrist te jia lastootu con xtiejn Jesucrist. Rniabä lo Dios gacnäduxhruni la'tu, guscuedcxini lastootu lo guiraliiti.

*Te yäl'nabajn ni cabääznu*

<sup>3</sup> Colguiliä'p xpala'n Dios ni najc Xtdad Jesucrist, Dios nani xcuent xcäl'rulaslazduxhni bejnäni gojpnäni te yäl'nabanc'coob sa'csi baspañsacni Jesucrist loj rebengut. Sa'csi rajpnäni yäl'nabanc'coob, ni'c nadippac lajznu. <sup>4</sup> Ni'cni laani suniidxni te yäl'rusalajz ni di nitloj, ni di xhin, ni di jiuui si'c riuii rebalajc. Yäl'rusalajzga aguluchedzu'tzni xhaguibaa par la'tu, <sup>5</sup> nani cayapdzu'tz xcäl'milaagwr xten Dios sa'csi rililajztu xtiidxni, te guluii Dios guira'ti ni rajpnäni par la'tu, ni arapcheeni te guluiinireni lojtu che luux guedxliujre.

<sup>6</sup> Ni'cni rbalazduxhtu, mase nanab tedtu balti trabajw gaie'si dxej lo guedxliujre, <sup>7</sup> te guzen xho rililajztu. Xcäl'r'ililajztu sajcrä lo oor nani rnitloj, niluxh xcäl'r'ililajztu di nitloj, mase tedni lo guiboo, ni'cni sinii Dios didxsa'c, didxro, siliä'pni xpala'ntu che guibisac Jesucrist lo guedxliujre guideb xcäl'milaagwrni, näjza xcäl'r'dimbicha'ni.

<sup>8</sup> Mase gajdäni fii lojni, sanälajztuni. Mase ditu fii lojni naj, ahuuililajztu xtiidxni, rbalazduxhtu guideb yäl'r'balajz ni rut rajcädi rusule', sa'ni yu' xhaguibaatis, <sup>9</sup> sa'csi xcäl'r'ililajztu susläa xaimtu lo dojl, sica'tu yäl'nabajn par tejpas.

<sup>10</sup> Luxh xcuent yäl'r'usläa dojl're, rebejn nani gunii xtidx Dios agujc xchero, laareni abasulexgaareni xcuent xcäl'r'acnäj Diosre nani siääd lojtu. Luxh bisiedduxhrene, gunabdiidzarenäni, <sup>11</sup> te r'rajzrene gacheereni chu bejn o gupcac gac nani cagasä't Sprit xten Crist ni yu' neñ lastooreni che gunixgaani xho nungäj ted Jesucrist trabajw, dxejcrä xcasacni yäl'r'nibee. <sup>12</sup> Baluii Dios lojreni, di rediidxga soob neñ redxer ni nabajnreni, alga par la'tu najc rediidxga. Naj agunii rebejn ni rusule' xtidx Dios rediidxga lojtu. Abasule'reni xtidx Jesucrist sa'csi xhaguibaali baxhał Dios Sprit Dhan xtenni te cuääzni neñ lastooreni. Näjza rexangl Dios ni rbäjz xhaguibaa r'rajz gacheeruni rediidxga.

*Xcäl'nabatnayanu nez loj Dios*

<sup>13</sup> Ni'cni, col'sanij xcäriejntu, col'gusudzu'tz lastootu, guideb lastootu col'yenloj yäl'r'acnäj xten Dios ni abia'n diidx xca'nu che guibisac Jesucrist lo guedxliuj. <sup>14</sup> Gactü si'c biuux nani rusooob xtidx xtdadni. Na'cru xcäjbtu guntu redzunguijdx ni bejntu galoo che gajdäni gumbee Dios. <sup>15</sup> Dios ni gule la'tu najc dxan. Sigajcza la'tu, loj guiralii ni rujntu col'yajc beñdxan. <sup>16</sup> Sa'csi lo xtidx Dios caj scree: "Sajctü beñdxan sa'csi narä nacä dxan."

<sup>17</sup> Palga la'tu rniiti "Dad" lo Dios nani tebloj rujn yäl'guxhtis loj guiraa bejn xcuent dzuun ni bejnäni, la'tu riäjł guidejebtuni guiraa dxej ni nabansijctü lo guedxliujre. <sup>18</sup> Anajntu di Dios nudeed yäl'nasa'c ni rnitlojdi, si'c oor näjza pla't, te baslaani la'tu lo recostumbr ni cua'tu lo retoxtadgoldootu. Recostumbrga xhet sa'cdireni. Di Dios nudeed oor nicla pla't te baslaani la'tu, <sup>19</sup> badeedni rejn ni sacduxh te baslaani la'tu loj xtojltu. Rejn si'c xtiejn te xiil ni naya, xhetpac najcädni, xtiejn lagajc Jesucrist. <sup>20</sup> Gulipacni che gajdli guirixtiej guedxliujre, gule Dios Jesucrist, niluxh najru, neñ redxelut che gajd guedxliujre nitloj, biädliulojni par xcäl'nasa'ctu, <sup>21</sup> la'tu nani rililajz xtidx Dios xcuent Jesucrist. Luxh Dios baspañsac Jesucrist loj rebengut, badeedni yäl'r'nibee lojni, ni'cni ahuuililajztu xtidx Dios, luxh Diostis cayenlojtu naj.

<sup>22</sup> Naj sa'csi abasoobtu xtidxliini, te si'c abasiatu lastootu te gac chanälajztu sa'tu, najc guideb lastootu col'chanälajzpac sa'tu. <sup>23</sup> Sa'csi acua'tu xcäl'nabanc'coobtu xcuent xtidx Dios ni najc par tejpas, et xcuentdi xtidx beñ guedxliuj ni rnitloj. La'tu najctü si'c cuaan ni rliejn lo bejdz ni siääd xhaguibaa, xhet lo bejdzdi ni rnitloj. <sup>24</sup> Galooli gunii Dios scree:

Guiraa rebeñ guedxliuj najc si'c recuaan,  
guiraa xcäl'nasa'creni najc si'c reguii ni rcaj lo cuaan,  
recuaan rgol, lirtejbza reguii xtenni,

<sup>25</sup> niluxh xtidx xtdad Jesucristnu rsiudzu'tzni tejpas.  
Luxh diidxre najc diidx ni basule'reni lojtu.

## 2

<sup>1</sup> Ni'cni col'gusaan guiraa redzunguijdx ni yu' lo guedxliuj, na'c gusgueetu sa'tu, na'c guntiop lajztu, na'c chuguij lajztu xhixten sa'tu, na'c guiniyaj sa'tu. <sup>2</sup> Si'c riojł rebäznite'



le'ch, si'cza colquuil xtidx Dios par sprittu. Coljioj l xtidx Dios te gustioobruni la'tu lo yäl<sup>1</sup>rusläa lo dojl, <sup>3</sup> palga agucbeetu lacti hueen najc xcäl<sup>2</sup>racnäj Jesucrist.

*Crist najc si'c te guij ni nabajn*

<sup>4</sup> Colguibig loj Jesucrist ni najc si'c te guij ni nabajn. Laani suniidx yäl<sup>1</sup>nabajn par tejjpas loonu. Rebejn badzucaj guijga, niluxh Dios gulenini sa'csi sacduxhni. <sup>5</sup> Sigajcza tejjgatu najctu si'c guij ni nabajn, ni'c colgusaan xca' Dios la'tu, reguibajn, te con la'tu gunchee Dios te yu' cadro cuääz Sprit xtenni, te gactu rexpixhojz Dios, nani nayapac lastooreni. Ni'cni sa'csi najctu tejtis con Dad Jesucrist sudeedtu lo Dios guiraa xcäl<sup>2</sup>nasa'ctu con xprit xtentu. Dee najc nani rchaglajz Dios. <sup>6</sup> Sa'csi galooli gunii Dios scree:

Agule'cä te bejn nen<sup>1</sup> guedx Sión, nalajznu Jerusalén, ni gac si'c te guisa'c, te guiro ni rsiuj squiin te yuro. Chutis bejn ni chalilajz xtiidxni, dini jianxtujuj.

<sup>7</sup> Lojtu ni ahuillajz xtiidxni najcni si'c te guisacduxh, niluxh loj renani gajd chalilajz xtiidxni, najcni:

Guij ni gulälaz renani cayunchee yu', lagajc guijga gujic guijpac ni baliib squiin xten yu'ga

<sup>8</sup> näjza:

Te guij ni rliaj ni' bejn, ni ruzäl<sup>1</sup>ta'reni, laareni riajbreni sa'csi direni gusoob xtidx Dios, luxh agunibexgaa Dios nitlojreni.

*Renani gule Dios*

<sup>9</sup> La'tu najctu te cuaa bejn ni agule Dios, tejjgatu najctu rebixhojz ni najc si'c rei<sup>1</sup> xten Dios. La'tu najctu te ben<sup>1</sup>naya, te ben<sup>1</sup>sa'c, rexpelj<sup>1</sup>pacni. Aguleni la'tu te gusule'tu reyäl<sup>1</sup>nasacduxh ni bejn Dios ni gurejdxtu che guyu'tu lo nezyunacäy xten guedxliujre te biu'tu lo nezyuj ni rdimbichasejz xten Dios. <sup>10</sup> La'tu galoo rut najcditu, niluxh naj najctu rexpelj<sup>1</sup>pac Dios. Galoo gajd Dios gulaslajztu, luxh naj abalaslajz Dios la'tu.

*Colguibajn lo xnezyuj Dios*

<sup>11</sup> Rebetzä ni sanälazä, nabajntu lo guedxliujre si'c benzijit, ni rbäjz te laad, ni'c rniabduxhä lojtu, na'c guntu recosguijd<sup>1</sup>x xten guedxliujre, ni rutijl nen<sup>1</sup> lastoo bejn te cuälazreni xnezyuj Dios. <sup>12</sup> Colguiba<sup>1</sup>nsa'c lal ni yu'tu loj rebenzijit ni di gac xpejn Israel te palga guiniyajreni la'tu gäbreni najctu ben<sup>1</sup>latsiaj, che fiireni redzunsä'c ni rujntu, siliä'ppacreni xpala'n Dios che jiädsac Jesucrist te gunni yäl<sup>1</sup>guxhtis.

<sup>13</sup> Ni'cni, sa'csi huillajztu xtidx Jesucrist, colgusoob xtidx guiraa reni rnibeetu lo guedxliujre, si'c najc presidentro, <sup>14</sup> regubernadoor nani ruxhä<sup>1</sup>ni te rujnreni yäl<sup>1</sup>guxhtis rebendojl näjza te guiliä'pni xpala'n reben<sup>1</sup> nani laaca rujnreni. <sup>15</sup> Sa'csi Dios rlanj guntu recossa'c te cuedcxitu rextidxnayäl<sup>1</sup> ni rni<sup>1</sup> reni di rlanj gumbee didxlii xcent Jesucrist.

<sup>16</sup> Colguibajn si'c bejn ni rut rnibeedi, na'cza guntu latsiaj sa'csi rut rnibeeditu, colguibajn si'c guinibee Dios. <sup>17</sup> Ga'put yäl<sup>1</sup>nadolajz loj guiraasi bejn. Colchanälajz sa'tu ni rililajz. Colguidx<sup>1</sup>ejb Dios, colguiliä'p xpala'n presidentro.

*Gudejd Jesucrist trabajw te baluiini xho jiennu*

<sup>18</sup> La'tu ni najc mos, guideb yäl<sup>1</sup>nadolajz colgusobdiajg guiraa xtidx rexlamtu, xhet ganaxdi relamsa'c ni najc nadolajz, näjza relam<sup>1</sup> ni najc benguidx. <sup>19</sup> Sa'csi rchaglajz ruhu<sup>1</sup>i Dios te bejn palga sa'csi rililajz te bejn xtidx Dios rujn bejn huant che rdej<sup>1</sup>dni trabajw luxh xhet bejndini. <sup>20</sup> Palga la'tu rujntu latsiaj ni'cni rusacsini la'tu, x<sup>1</sup>hi guntu gaan palga rujntu huant rdej<sup>1</sup>dtu trabajw? Niluxh palga la'tu rdej<sup>1</sup>dtu trabajw sa'csi rujntu redzunsä'c, luxh rujntu huant, ni'c najc laaca nez loj Dios. <sup>21</sup> Te guntu si'c gurejdx Diostu, sa'csi gudejdza Jesucrist trabajw xcenttu te guluini xho guntu che chanuutu lo xnezyujni. <sup>22</sup> Laani dini niujn nicla tej dojl, laani dini nusguee nicla tej bejn con didx-xhii. <sup>23</sup> Che guniyajreni lojni, dini nudzu' yäl<sup>1</sup>rnijajga. Che cadej<sup>1</sup>dni trabajw, dini nudzu' diidx niluxh bateedni lagajc laani ladznäa Dios ni rujn yäl<sup>1</sup>guxhtissa'c. <sup>24</sup> Gudeed Jesucrist trabajw si'c te bendol<sup>1</sup>duxh, bacuaarenini lo crujz te ro'c gusacsi<sup>1</sup>duxh tiejxhni xcent xtojlnu, te na'c gunrunu dojl, te guiba<sup>1</sup>nsa'cnu lo xnezyuj Dios. Gudil<sup>1</sup>gujdxreni tiejxhni te basiaj<sup>1</sup>cni la'tu. <sup>25</sup> Sa'csi galoo gujct<sup>1</sup>u si'c rexil ni rut rajpdi, rijreni nezree-nezrec. Niluxh naj agubisactu lo xpaxtoortu näjza nani randzu' xaimtu, Jesucrist.

### 3

*Xho nanab guiba<sup>1</sup>näjt<sup>1</sup>u chäältu*

<sup>1</sup> Sigajcza la'tu, regunaa ni abachnäa, colgusoob xtidx chäältu, te mase yu' tejjreni ni di chalilajz xtidx Dios, sililajzni xtidx Dios sa'csi fiini xho rujntu mase xhet rniidilu. <sup>2</sup> Sa'csi fiini xho riulu xtiidxni näjza xho rniilu nadolajz lojni, näjza xho naba<sup>1</sup>näsa'cluni. <sup>3</sup> Na'c

gusucheetu ganax lo jiaatis, si'c najc guichniil yejctu, nájza biaoor ni rcaj diajgtu, guejntu, naatu, nájza ladsa'c ni najc sacru. <sup>4</sup> Colgusuchenáj lastootu yálnadolajz, yálrbedcxi lajz, nájza yálsanálajz, sa'csi direni nitloj, luxh sacduxhrene nez loj Dios. <sup>5</sup> Galoo si'cza bejn regunaa ni gujc xpejn Dios ni huillilajz xtidx Dios, basucheereni lastooreni, basoobreni xtidx cháälreni. <sup>6</sup> Si'c gujc toSara, basobdiajgni xtidx toAbram, guniizani lo toAbram, Dad. Naj najctu si'c laani palga rujntu redzunsac, nájza na'c guidxejbditu.

<sup>7</sup> Sigajcza la'tu, niguii ni abachnaa, colguibannäsa'c cháältu. Colgapdani sa'csi dini gacnadip si'c te niguii; nanab guntu si'c sa'csi nájza lojreni badeed Dios yálnabajn par tejpas. Colyejn si'c, te gucuadiajg Dios che cuedx-guiniabtu lojni.

#### *Renani rdejd trabajw che laaca rujnreni*

<sup>8</sup> Dee najc ni cania' loj guiraatu, saru colguibannáj sa'tu. Colgulaslajz sa'tu, colchanälajz sa'tu si'c rinälajz te niguii bejtni. Gactu bensa'c, bennadolajz. <sup>9</sup> Na'c gudzu'tu didxguijdx che guiniireni didxguijdx lojtu, na'cza gudzu'tu didxyaj che guiniireni didxyaj lojtu. Alga gunab lo Dios gacnájreni, sa'csi ni'cni gule Dios la'tu, te sica'zatu reyálnasa'c ni guniidxni lojtu. <sup>10</sup> Sa'csi scree caj lo xtidx Dios:

Nani rchagljajz guibajjni,

luxh rljazzani saru tedni redxej lo guedxliujre,  
sugudxojni guinii ro'ni didxnaj nájza didx-xhii.

<sup>11</sup> Guibicajni loj redzunguijdx, sugunni redzunsac'tis.

Suguilni yálrbedxi te ni'c chanuuni.

<sup>12</sup> Sa'csi ruhuii Dios rebejn ni rujn dzunsac,  
rucuadiajzani xtiidxreni che rniabreni lojni.

Niluxh rdzuréni lojni, rbälazzani renani rujn latsiaj.

<sup>13</sup> ¿Chu laa ni gun latsiaj la'tu, palga la'tu rbaali lajztu rujntu dzunsac? <sup>14</sup> Palga caxäsi tedtu trabajw che guntu redzunsac. ¡Chicbaatu! Na'c guntu xhigab, niclaza guidxejbtu xcálrchejbreni. <sup>15</sup> Colgusaan guinibee Dad Jesucrist neñ lastootu, gususin te gudzu'tu diidx loj reni rniabdiidx lojtu xhucient runlojtu guibi' Jesucrist. Guideb yálnadolajz saru gudzu'tu diidx. <sup>16</sup> Colguibansa'c te cuedxí xcálrjejntu te che guiniyajreni la'tu sa'csi nabansa'ctu loj Crist, jianxtujy reni rniyaj la'tu. <sup>17</sup> Sa'csi hueenru tedtu trabajw che cayuntu te dzunsac, palga si'c rljaz Dios, lacuaa tedtu trabajw sa'csi cayujntu dojl.

<sup>18</sup> Sa'csi sigajcza tejtis gujt Jesucrist xcuent rextojlnu. Xhetliidi xtojlni guyu' nez loj Dios, niluxh gudejndi trabajwduxh xcuent rebendojl. Bejnii si'c te gac guibignu lo Dios sa'csi gujt tiejxh Jesucrist, luxh guyusac sprit xtenni lo tiejxhni te gubansacni. <sup>19</sup> Che gajd xpritni guibisac lo tiejxhni, huij spritni basule'ni diidx loj respit ni yu' latzguuib. <sup>20</sup> Respritga najc renani di nusoob xtidx Noé che basule'ni xtidx Dios lojreni. Gulájz Dios rebejnja guiraa redxej ni cayujn Noé barcwo agujc xchero. Baslaa Dios xcálnabajn xhujntis bejn, xhet gujcdireni gudejdreni lo nisguiro ni biajb guideb guedxliujre. <sup>21</sup> Che robnisnu naj, rusnaalajznu rebejnja; yálrrobnisga rululiloj xho ruslaa Diosnu lo dojl. Et sa'csi riäjt beed lo tiejxhnu neñ nisga, alga sa'csi dxejc rniabnu lo Dios guniidxni te xcäriensa'c, sa'csi sajc xca'nuni xcuent ni gubansac Jesucrist lo rebengut. <sup>22</sup> Che birii Jesucrist lo rebengut, biu'ni xhaguibaa cadro gurejni xladbee Dios te ro'c rnibeeni loj rexangl Dios, nájza loj guiraa respit ni rajc rniabee, ni yu' lo guedxliuj nájza xhaguibaa.

## 4

#### *Colyejn xtzuun Dios*

<sup>1</sup> Ni'cni sa'csi agudejd Jesucrist trabajw cuajni lo crujz xcuentnu, sigajcza la'tu riälj guntu xhigab sidejdtu trabajw lo guedxliujre sa'csi nani agudejd trabajw, diruni gun dojl. <sup>2</sup> te guideb nabajjni lo guedxliuj, guibajjni si'c rljaz Dios, diruni guibajn te gunni redzunguijdx xten guedxliujre. <sup>3</sup> Sa'csi bejntu si'ctis ni rljaztu galoo, bejntu si'c rujn rebejn ni di gumbee Dios, bejntu si'cni rljaz tiejxhtu, bejntu latsiaj, gusojztu, bejntu relaniro, gudedcaj gusojztu, luxh bejntu cosxtuiduxh bazuxhijbzatu loj rebanäbdx. <sup>4</sup> Dxejcti rebejn ni rujn recosga naj, rdxeloreni sa'csi dirutu gun ni rljazreni, ni'c rniyajreni la'tu. <sup>5</sup> Niluxh laareni suureni nez loj Jesucrist ni agojlj gun yálguxhtis loj guiraa rebejn, rebejn ni nabajn nájza renani agujt, te gusule'reni xcuent nani bejnreni. <sup>6</sup> Ni'cni basule' Jesucrist xtidx Dios loj reni agujt, te mase che gubajreni lo guedxliuj gujcreni yálguxhtis si'ctis ni rajc bejn, dxejc gujtreni, naj sprit xtenreni sinuu guibajn si'c ni rljaz Dios.

<sup>7</sup> Asiäddzungajxh dxej che guibisac Jesucrist lo guedxliujre. Ni'cni ganax laaca colyejn xhigab, colgusin xcäriejntu te saru cuedx-guiniabtu lo Dios. <sup>8</sup> Niluxh ni maazru sajc najc yálsanälajz resa'tu sa'csi che rinälajztu resa'tu, riallajztu xtojln sa'tu. <sup>9</sup> Saru gurenáj bejn ni rdzujn rolizjzlu, na'c jiejyutu. <sup>10</sup> Abaniidx Dios loj tejjatu te dzuun ni sajc guntu. Dzuunga colyacnáj resa'tu, te si'c guluiutu lo resa'tu laaca cayunsa'ctu guira'ti nani baniidx Dios lojtu.

<sup>11</sup> Palga tejtü najc xtzüunni guluini xtidx Dios, sugüiniini ascanu najcni xtiidxpac Dios. Palga tejtü najc xtzüunni gacnäjni sa'ni, sugünnini, guideb yälñadip yälñadaan ni rüdeed Dios lojni, te guira'tis ni rajc sujñ guiliä'p xpala'n Dios xcüent Jesucrist. Sa'csi laatisni riäj] chä'p xpala'nni, laatisni riäj] guinibeeni tejpas. Sugacni si'c.

*Xho nanab tednu trabajw*

<sup>12</sup> Rebetzä ni sanälazä, na'c guidxelojtu sa'csi cadejdtu trabajw ni najc si'c guiboo, ni siäd te gactu preeb. Na'c guntu xhigab xhichani'c casiajctü. <sup>13</sup> Colguibalajz sa'csi sigajc ni cadejdtu trabajw sa'ni gudejd Jesucrist, sigajcza sibalajztu che guiluiloj xcälrdimbicha' Jesucrist. <sup>14</sup> Palga rniyajreni la'tu sa'csi rililajztu xtidx Jesucrist, chicbaa la'tu, sa'csi rbäjz Xpirt Dxan xten Dios guideb xcälrdimbicha'ni neñ lastootu. <sup>15</sup> Gunatiro, andi gusaantu ted tejtü trabajw sa'csi bagu'ttu bejn, o sa'csi gulajntu xhi xten bejn, o sa'csi bejntu latsiaj, o sa'csi huichu'ni lo xcüent sa'ni ni xhet nungäj]di gacbeeni. <sup>16</sup> Palga yu' chu tej tedni trabajw sa'csi rililajzni xtidx Jesucrist, na'c guitujyni, alga sugüiliä'pni xpala'n Dios xcüent Jesucrist.

<sup>17</sup> Abidzujñ dxej che ganid rexpejn Dios ted trabajw. Luxh palga ganid nuurnu gacnu yäl]guxhtis luxh ahuililaznu xtiidxni, ]xhocha gun rebejn nani di chalilajz xtidx Dios xcüent Jesucrist! <sup>18</sup> Lo xtidx Dios caj scree:

Lacti naganlajz r]iaa rebennaya lo dojl,

]xhocha gunäjni rebejn nani di chalilajz xtidx Dios näjza rebendojl?

<sup>19</sup> Ni'cni, guiraatu nani cadejd trabajw xcüent xtidx Dios si'cni rlajz Dios, col]gudeed xprittü lo Dios ni di gusguee, ni benchheetu, te chanuutis guntu ni riäj] guntu.

## 5

*Yäl]rulijdx loj renani ahuililajz xtidx Dios*

<sup>1</sup> Narä nacä te beñgool, bahuiä trabajw ni gudejd Jesucrist, bahuiäza xcälrdimbicha' Jesucrist ni guniidxni loonu che guibisacni lo guedxliujre. Ni'cni rulidxä la'tu ni najc rebengool, <sup>2</sup> colgajp renani rililajz xtidx Dios nani rajptu fiipactu xhi rujnreni. Colga'preni si'c te bejn ni rajp xiil, col]yeyjni guideb yejc, guideb lajztu. Col]yeyn si'c sa'csi si'c rlajz Dios guntu, na'c gunlojtu meel. Colguibalajz cayajptu rexpejn Dios. <sup>3</sup> Na'c guinibeetu lojreni si'c rnibee te lam loj reni rujñ xtzüunni, col]guluireni xho gunreni con xcäl]nabansa'clu. <sup>4</sup> Che guibisac Jesucrist, ni rajp nuure, laani suniidxni xcüentnu, te yäl]nasacduxh nani dipac nitloj.

<sup>5</sup> Sigajcza la'tu ni najc bi'n, col]gusobiajg xtidx rebengool. Guiraatu col]ju xtidx sa'tu, col]gului sa'tu guideb nadolajz. Sa'csi:

Dios rbälaz rebejn ni runnaro lagajc laareni,  
niluxh racnäjni rebejn ni najc nadolajz.

<sup>6</sup> Ni'cni guideb yäl]nadolajz col]ju lo Dios sa'csi rajpni yäl]rnibeduxh, te guiliä'pni xpala'ntu che gal]dxej ni guibisacni. <sup>7</sup> Col]gudeed guiraa reyärsia' ni yu' lastootu lo Jesucrist te guscuecdxini xcäriejntu sa'csi laani sanälajzni la'tu.

<sup>8</sup> Col]gusanij xcäriejntu, col]susiñ sa'csi rdxe'ch beñdxab lojtu, cansaxhiga'tzni si'c te beedz nialajz, cagüilni chu guxh]ni. <sup>9</sup> Col]sudzu'tz nez lojni, guideb lastootu col]chalilajz xtidx Dios, sa'csi anajntu sigajcza cayunnäjni guiraa rebetznu ni nabajñ lo guedxliujre. <sup>10</sup> Che agudejdtu trabajw tiop-choñ dxej, Dios nani rajp guiraa yäl]racnäj, nani gurejdx la'tu te näjza la'tu xca'tu xcälrdimbicha'ni xcüent lagajc Jesucrist, lagajc laani sunsa'cni la'tu, bejn ni rsiudzu'tz lo xtiidxni, bejn ni nadip lajzni, bejn ni di guidxejb. <sup>11</sup> Laani rajpni yäl]rnibeduxh par tejpas, guiliä'pnu xpala'nni par tejpas. Sugacni si'c.

<sup>12</sup> Siädnä Silvan guijtze lojtu. Runä xhigab najcni te bejn nani huililazsa'c xtidx Dios. Abacuaä bale'si diidxre lojtu te gulidxä la'tu, te guiniliä lojtu dee najc xcäl]racnäjpac Dios. Col]sudzu'tz xcüent yäl]racnäjre.

<sup>13</sup> Rexpejn Dios ni re' lo guedx Babilonia ruxhal] xtiitios lojtu sa'csi gule Dios la'tu sigajc guleni laareni. Marcw, ni najc si'c xi'nä, ruxhal]za xtiitios lojtu. <sup>14</sup> Col]guini "xchan" lo teja sa'tu ro'c.

Rniabä lo Dios guscuecdxini lastoo guiraatu ni rililajz xtidx Crist.

## Guijtz Ni Rojp Ni Bacuaa Pedr

### *Pedr rucuaa te guijtz loj reni ahuuilajz*

<sup>1</sup> Narä nacä Simón Pedr, ni rujn xtzun Jesucrist, te apost xtenni. Rucuaä guijtzre lojtu nani rililajz xtidx Dios sigajc ni rililajznu, sa'csi bahuii Dios loonu si'c bebnaya xcuent Xtiosnu Jesucrist nani baslaa nuurnu lo dojl. <sup>2</sup> Rniabä lo Dios gacnäduxhroni la'tu, guscuecdxiruni lastootu, te gacbeerutu xtidx Dios näjza Dad Jesucrist.

### *Xho riäjł gac rexpejn Crist*

<sup>3</sup> Sa'csi xcälrnibee Dios baniidx guira'ti ni rquiinnu te guibaŋsa'cnu, te gacnu bebnaya nez lojni, xcuent rililajzpac xtiidxni ni nansa'cnu xcuent Jesucrist nani gurejdx nuure, nani gule nuure te xca'zanu xcälrdimbicha'ni, näjza guiraa xcäl'nansa'cni. <sup>4</sup> Lagajc xcuent redee baniidxni rextidxliini, rextidxsacduxhni. Palga chalilajznu xtiidxni, sajcnu xpejnni, sajcnu beŋsa'c si'c najcni sa'csi abiriinu loj redzunguidx ni chagljaz rujn rebejn ni ruxhiŋ guedxliujre. <sup>5</sup> Ni'cni nanab gacbeenu xho nabaŋnu lo guedxliujre. Siroobru xcäl'rililajztu sacnäjni la'tu te guibaŋsa'cnu lo Dios; luxh sa'csi nabaŋsa'ctu, siroobru xcäl'najntu xcuent dzunsa'c näjza dzunguidx. <sup>6</sup> Luxh palga guroob xcäl'najntu xcuent dzunsa'c näjza dzunguidx sajç guinibeetu tiejxhtu te na'c guntu dzunguidx. Che guinibeetu tiejxhtu, sibedxi lajztu. Che arajptu yäl'rbedxilajz, sajctu beŋsa'c, bendxan. <sup>7</sup> Che anajctu beŋsa'c, bendxan, sinälajztu resa'tu; che asanälajztu sa'tu, arajptu yäl'sanälajz sa'tu xten Jesucrist.

<sup>8</sup> Palga la'tu rusooobtu guiraa rediidxre, luxh chanuutis caroobreni neŋ lastootu, ditu guibaŋxlia'; sujnpactu xtzun Dios, luxh rediidxre sacnäjrutu gumbeetu Dad Jesucrist. <sup>9</sup> Sa'csi renani di ga'p rediidxre, najcni si'c te lotiä'p ni di fii, o te ni di gacdi fii zijt, ni'cni abiäl'ljazni xho basia Dios rextojłni nani bejnni galoo. <sup>10</sup> Ni'cni rniä lojtu rebetzä, colsejs, colguisied xtidx Dios te gacbeepactu, guluulojzatu lo bejn xho gurejdx, xho gule Dios la'tu, sa'csi lał ni chanuu gucuadijgtu rediidxga, dipactu gunijł lo Dios. <sup>11</sup> Palga guibajntu si'c lo guedxliujre, siu'pactu xhaguibaa cadro rnibee Dad Jesucrist par tejpas.

<sup>12</sup> Ni'cni anasuga'ä te gusnä lajztu xcuent rediidxre, mase anajntureni, mase risutzut'ztu yäl'rililajz xten didxlii ni yu' neŋ lastootu. <sup>13</sup> Narä runä xhigab laaca runä che rusnä lajztu, te gusnihä la'tu, te gusnä lajztu. Si'cza gunä guideb ni nabaŋä lo guedxliujre. <sup>14</sup> Ananä asiäddzungajxh dxej ni xca' Dios narä, sa'csi abaluui Dad Jesucrist ni'c loä. <sup>15</sup> Ni'cni cayunduxhä dzuun naj, te che guiquiinni sinaj lajztu xtidxä che agu'tä.

### *Renani bahuii loj yäl'nasa'c xten Crist*

<sup>16</sup> Che basule'nu lojtu xcäl'rnibee näj xcäl'rdimbicha' Dad Jesucrist, xcuent ni guibisacpacni, dinu niniitisi, dizanu nusguee la'tu, sa'csi abahuiloonu xcäl'rdimbicha'ni. <sup>17</sup> Sa'csi che badeed Dios xtadnu yäl'rnibee, yäl'rdimbicha' lojni, dxejç biejn diajgnu gunii Dios, birii xse'ni neŋ te za ni gurej xhaguibaa, räjpni: "Dee najc xi'nä ni sanälazä, rbanälazduxhäni." <sup>18</sup> Lagajc nuure biejn diajgnu xse' Dios che guniini xhaguibaali che guynäjnu Jesucrist lo dajn ni najc dxan.

<sup>19</sup> Ni'cni naj guliiru rediidx ni gunii reprove't. Ni'cni sujntu laaca palga gosubdiajglu rediidxga, sa'csi najceni si'c te bajł ni rusanij te lajt ni nacäy, susanijnreni xcäriejntu dxejli ni jiaäd bajł xhaguibaa. Dxejç lagajc laani susanij lastoonu. <sup>20</sup> Niluxh ganiddoo nanab gacbeetu dee: nicla tej bejn sajç guinii laatisni sajç guinii xhi säloj xtidx Dios, <sup>21</sup> sa'csi nicla tej diidx ni bacuaa reprove't dini gac diidx ni biajtis yejcreni. Guiraliireni bacuaareni ganaxtis diidx ni badeed Xpřit Dxan Dios lojreni gucuaareni.

## 2

### *Rebejn nani rusguee*

*(Judas 4-13)*

<sup>1</sup> Niluxh galoo biricajza te cuaa bejn ni basguee rexpejn Israel, sigajcni siääd stee cuaa bejn ni susguee la'tu. Laareni guluixhiga'tzreni didx-xhii nani rujn rusiejxh lajz bejn xcäl'rililajzreni, sibälazreni lagajc Dad Jesucrist nani gudijx xcuent xtojłreni. Niluxh renani rusguee, siojß nitlojreni par tejpas. <sup>2</sup> Xhidajlza bejn sinajłreni lo xcäl'nabanguidxreni, dxejcti ni'c gun sinijaj xhidajł bejn zneyuj xtidxlii Dios. <sup>3</sup> Sa'csi ruguilajzreni xmeeltu, xhixtentu, ni'c siädgusgueereni la'tu te xca'reni xhixtentu. Niluxh xcäl'guxjxhtisreni nani gun Dios, näjza xcäl'rnitlojreni cabäzgjajceni agujç xchero.

<sup>4</sup> Najcni si'c sa'csi di Dios niäl'ljaz rextojł rexangłni nani bejn dojl, niluxh baxhałniren i gabijł, basäuniren i neŋ reguednacäy cadro cabäjzreni dxej ni gun Dios xcäl'guxhtisni. <sup>5</sup> Sigajcza rebejn ni guyu' galoo, banitloj Diosreni, baslaa Dios xcäl'nabajñ Noëtis näjza

sgajdzreni, sa'csi basule' Noé xtidx guluii Dios. Luxh baxhalni nisguiro te biädnitlojni guiraa rebejn nani di nucaadijg xtidx Dios. <sup>6</sup> Bejn Dios yälguxhtis xten guedx Sodoma näjza guedx Gomorra, base'cni reguejdxga, gujcreni cobdäj. Si'c bejn Dios te gacbee bejn xho runnäj Dios rebejn ni di gusoob xtidx Dios. <sup>7</sup> Gulää Dios Lo't ni gujc te bens'a'c lo reguejdxga, sa'csi guc-huin lajzni xcuent relatsiaj ni bejn rebendojlgä. <sup>8</sup> Guideb ni guläjs Lo't, te bens'a'c, lo guejdxga, dxej, yääl guc-huin lastooni xcuent nani bahuiini, nani biejn diajgni, xcuentza latsiaj ni bejnreni, sa'csi bens'a'cni. <sup>9</sup> Anajn Dios xho racnäjni rebensa'c te rbäänireni lo retrabajw ni cadejdreni, anajnza Dios xho gusacsini rebendoj cheni guidzujnli dxej ni gunni xcälguxhtisreni.

<sup>10</sup> Guliduxhni, sujnru Dios yälguxhtis loj rebejn nani rlaiz gun si'ctisni rlaiz tiejxhrene, näjza renani rbälaz xcälrmibee Dios. Najcreni bejn ni di guidxejb, rujnreni ni rlaibtis yejcreni, direni guidxejb guiniyajreni rexangl Dios ni rdimbicha'. <sup>11</sup> Niluxh nicla tej rexangl Dios ni rajpru yälrmibee lo rebejnre, direni guiniyaj, cue'creni xquejreni lo Dios.

<sup>12</sup> Luxh, rebejnga najc si'c reguidxaa nani xheti xcäriejnreni, cabäzjtisreni chu guiniaazreni te guetreni. Rniyajreni luxh direni gan xhini'c rniireni. Niluxh sigajc rnitloj reguidxaa, sigajcza sinitlojreni. <sup>13</sup> Bejnreni dojl, ni'c sinitlojreni, sidejdreni yälrusacsiduxh xcuent rextojlreni. Laareni rchaglaizreni guntisreni laniro rdxee. Laareni najcreni si'c te cosdxuudx o si'c te manch ni rcaj lo te ladnol, rbaali laizreni rusgueereni la'tu laj ni cayajc lanij cayaunäjreni la'tu.

<sup>14</sup> Digacdi fiireni loj te gunaa, li rsia' laizreni, direni guidxajg rujnreni dojl, rusgueereni rebejn te gunzaren dojl, ruluiireni lastooreni te säblajzreni meel, najcreni bejn nani batzubde Dios, <sup>15</sup> agulälazreni nezyusa'c, abanijtreni, naj sanajlreni xnezyuj Balaam, xi'n Beor, nani huichaglaizru nani rquijx yällatsiaj. <sup>16</sup> Niluxh gudilnäj Diosni xcuent xtojlri, bejn Dios gunii te mandip si'c xse' bejn, te bascuääzni profe'tga, dini nusaan niujnri nani cayujnri, cayujnri si'c te bejn ni rajc yejcnri.

<sup>17</sup> Reben latsiajre najc si'c te bisie cadro xheti nis, najczaren si'c rexcäy ni sanä bej nezree nezrec che cabi' te bero. Laareni su'reni lo xcäy par tejjas che gun Dios yälguxhtis. <sup>18</sup> Sa'csi rniduxhrene didxro, niluxh xhet sajcdi rediidxga luxh rniireni huenduxh najc gun bejn ni rlaiztis tiejxhrene, con yällatsiaj rusgueereni rebejn nani entis birii loj reni rujn sa' dzunguidxga. <sup>19</sup> Rusgueereni, rniireni rut gudxojnndini palga jäädnajlrireni, niluxh lagajc laareni najcreni mos, sa'csi rniibee latsiajreni. Xhitis ni rniibee te bejn, ni'c rusääni neñ laizguiib. <sup>20</sup> Sa'csi palga agubicaaj te bejn loj redzunguidx xten guedxliuj sa'csi huillilajzreni xtidx Dad Jesucrist nani ruslaa rebejn lo guiraa dojl, dxejctiru gubisacni loj xtojlri, abixhidsacreni lo xtojlreni, nalajz najcreni si'c che gajdreni gumbee xtidx Dios. <sup>21</sup> Huenru direni niembee xnezyuj Dios, quela che abiembeereni nezyujga, cuälazreni didx dxan, xtidx Dios ni basule'reni lojreni. <sup>22</sup> Dxejcsii rsiojb diidx ni najc scree: "Rbisac te bä'cw loj xcälrdzujbni. Cuch ni entis gojz richusacni lo xpajnni."

### 3

#### *Xho gac che guibisac Jesucrist*

<sup>1</sup> Rebetzä, dee najc ni rojp guijtze ni caguxhalä lojtu; lo guiro'p guijtze cagusnibä la'tu xcuent reyälrulidjx ni gusnaj lajztu. <sup>2</sup> Colgusnaj lajztu rediidx ni gunii reprofe't agujc xchero, näjza rediidx ni gunii Dad Jesucrist nani basule' reapost.

<sup>3</sup> Ganiddoo, colgacbee dee: che asiäddzungajxh redxelult, siääd rebejn ni rgubee rextidx Dios, laareni sujnreni si'ctis ni rlaiz tiejxhrene. <sup>4</sup> Siniabdiidxreni: "Z'Xhicuent gajd Jesucrist guibisac si'cni bia'n diidx? Cheni gutlri rextadgoldoonu, guira'ti sanuutis najcni si'c gujcnri cheni guc-cheeli guedxliujre." <sup>5</sup> Niluxh che rniireni si'c, rlaizpac jäällajzreni agujc xchero benchee Dios xhaguibaa xcuent xtiidxtisni, näjza guniitis Dios te si'c guc-chee guedxliuj, biriini neñ nis, naj tre'ni loj nisga. <sup>6</sup> Dxejcti gunitloj guira'ti ni yu' lo guedxliujga che biajb te nisguiro, gunitlojni. <sup>7</sup> Niluxh xhaguibaa näjza guedxliuj ni tre' naj, cayajp Diosreni xcuent xtiidxtisni te checneni che guidzujn dxej ni gunni yälguxhtis, che gunitlojni rebendoj.

<sup>8</sup> Rebetzä, na'c jäällajztu, Jesucrist ruhuii tebdxej si'c te tzugayuu ijz, rhuiizani te tzugayuu ijz si'c tebdxej. <sup>9</sup> Di gaclaa gusoob Dios diidx ni bia'n, si'c rujn bejn xhigab raclaani, niluxh cabecdxiru lajzni xcuent la'tu, sa'csi cabäjzni gusiejch lajztu, sa'csi di rlaizni nitloj nicla tejtü.

<sup>10</sup> Niluxh sidzujn dxej che guibisac Jesucrist lo guedxliujre si'c rdzujn te gubaan, rut gacbeedi siäädni. Dxejcti sibicaaj xhaguibaa, gac te bieiduxh, guira'ti sialni lo te guiboduxh, guedxliujre näjza guira'ti ni tre' lojni, guiragajcni sejcni.

<sup>11</sup> Sa'csi sinitloj guiraa redee, ni'c nanab guibanayatu lo guedxliujre, na'c guntu dojl. <sup>12</sup> Colcujz dxejctis ni jääd Dios lo guedxliuj. Dxejc sejc xhaguibaa, sinitlojni, luxh guiralii ni

yu' sialni lo guiboro. <sup>13</sup> Niluxh abasa'n Dios diidx loonu, ni'cni cayenloonu te guibacoob, te guedxliucoob, cadre gunreni ganaxtis dzunsa'c, xhetiru dojl.

<sup>14</sup> Ni'cni rebetzä ni sanälazä, sa'csi cabääznu guiraa ni gac, colyejn huant te che guibisac Dios, sidxälni la'tu dxitis nabajntu, nabañnayatü, xhetiru xtojltu. <sup>15</sup> Colhuii xhi dzuun bejn Dad Jesucrist ni'c rajpnu yälrusläa lo dojl. Sigajcza bacuaa bejtznu Pabl ni sanälajznu. Bacuaani sa'csi badeed Dios yälñajni lojni. <sup>16</sup> Neñ guiraa rexquijtzni bacuaani xcuent rediidxre. Yu' gatii guijtz ni bacuaani ni najc naganduxh. Luxh bejn ni guxii rachee, ni runtio'p lajzreni, reni'c ruxhiid rextiidxni, sigajc runnäjreni guiraa xtidx Dios, ni'cni sinitlojreni.

<sup>17</sup> Ni'cni rebetzä ni sanälazä, sa'csi ananxgaatu rediidxre, colnatiru didi jiajbtu ladzña renani gusguetu, te na'c gunijttu xcälrsiudzu'tztu lo xtidx Dios. <sup>18</sup> Colgustioob xcäriejntu con yälracnäñ näjza yälñajni xten Dad Jesucrist nani rusläa nuure lo dojl. Suguiliä'pnu xpala'n Dad Jesucrist, naj näjza par tejpas. Sugacni si'c.

## Guijtz Ganid Ni Bacuaa Juan

### *Xtidx Dios ni runiidx yäl'nabajñ par tejpas loonu*

<sup>1</sup> Galooli che gajd Dios gun guedxliuj, agac nabajñ Jesucrist. Niluxh narä bahuiä loj Jesucrist, biejn diağä rediidx ni guniini loä, gunazä ñaani. Laani najc Diidx ni runiidx yäl'nabajñ par tejpas loonu. <sup>2</sup> Baluilojni loonu; reapost bahuiinu lojni. Ni'cni rniä lojtu, nabajñ Jesucrist par tejpas. Rniliäpac nabajñ Jesucrist Dios. Baluii Dios Jesucrist loonu. <sup>3</sup> Caniä stehuält lojtu, bahuiinu lojni. Biejn diağnu rediidx ni guniini loonu. Xhigab xtenu najc tejtis con Dios, näjza Jesucrist Xi'n Dios. Ni'cni cagusule'ä rediidxga lojtu, te tejtis xhigab jiennänu resa'nu. <sup>4</sup> Cagucuaä rediidxre lojtu te guibalazduxhtu.

### *Dios najc Bajl*

<sup>5</sup> Naj cagusule'ä rediidx nani baluii Jesucrist loonu. Dios najc bajl. Guiraa redzuun ni rujñni, ganax dzunsa'cni. Xhet yäl'nacäyji yu' lo Dios. <sup>6</sup> Palga chutis tejnu naa, tejtis najc xhigabnu con Dios, niluxh riennu redzunguijdx, rniinu didx-xhii, runijtnu dinu chasanäj xtidx Dios. <sup>7</sup> Palga nabajñnu lo bianij si'cni nabajñ Dios lo bianij, tejtis xhigab riennu con resa'nu. Dxejc rusiäza xtiejn Jesucrist Xi'n Dios lastoonu che riennu dojl.

<sup>8</sup> Palga naanu xheti xtojñnu, rusgueenu lagajc nuunu, luxh dinu ga'p xtidx Dios neñ lastoonu. <sup>9</sup> Palga guicäjñnu lo Dios guiraa redojl ni cayennu, siäl'lajzni xtojñnu, sudzucajni rextojñnu, sa'csi laaca rujñni luxh guliij najc rextiidxni. <sup>10</sup> Palga guinuunu dinu niujn dojl, rniinu najc Dios si'c te bejn ni rniü didx-xhii sa'csi anaj Dios yu' xtojñnu, luxh dizanu ga'p xtidx Dios neñ lastoonu.

## 2

### *Racnäj Jesucrist nuunu nez loj Dios*

<sup>1</sup> Guejbtu, resa'ä nani huililajz xtidx Dios, cagucuaä rediidxre lojtu lo guijtz te na'c guntu dojl. Niluxh palga jiennu dojl, racnäj Jesucrist nuunu, rniini xcuentnu lo Dios, sa'csi xheti xtojñni. <sup>2</sup> Gujt Jesucrist xcuentnu lo crujz. Gudijxni rextojñnu lo crujz. Luxh et rextojltisnu gudijxni. Gudijxni rextojl guiraa rebejn ni re' lo guideb guedxliuj.

<sup>3</sup> Palga rusoobnu rextidx Dios, huenliisi rluii riembeenu Dios. <sup>4</sup> Cheni rniü te bejn, "narä rumbeäni", niluxh dini gusoob rextiidxni, rusgueeni resabejnñi. Di lajzni nilii xtidx Dios. <sup>5</sup> Palga rusoobnu xtidx Dios, guliipac rinälaaznu Dios, ni'c najñnu nabajññjñuni. <sup>6</sup> Cheni rniinu nabajññjñu Jesucrist, nanabpac guibañsa'cnu si'c gubajñ Jesucrist lo guedxliuj.

### *Redidxcoob*

<sup>7</sup> Guejbtu resa'ä, xhet didxcoobdi ni cagucuaä lojtu. Cagucuaä lagajc diidx ni najntu galooli che huililajzlitu rextidx Dios, nalajznu rediidx nani biejn diağtu galooli. <sup>8</sup> Niluxh najcza rediidxre didxcoob loonu, sa'csi che huililajznu rextiidxni gusloj dirunu guibajñ lo yäl'nacäjy. Baluii Jesucrist redidxcoobga loonu. Guliipac najc Dios si'c bajl. Dini guibajñ lo nacäjy.

<sup>9</sup> Palga chutis tejnu rniü, "nabañä lo nianij xten Dios", niluxh rdxe'chni lo resa'ni, lo yäl'nacäjy yu'ni. <sup>10</sup> Chutis tejnu ni rinälajz sa'ni, nabajñni lo bianij xten Dios, rujñni dzunsa'c, dizani guichagljaz gunni dojl. <sup>11</sup> Niluxh palga rdxe'chnu lo resa'nu, nabajñnu lo yäl'nacäjy sa'csi riennu dojl, sasaanu lo yäl'nacäjy. Nicla gacheenu canejn chonnu, sa'csi ruscäjy bendxab balojnu.

<sup>12</sup> Cagucuaä rediidxre lo guejbtu, resa'ä ni rililajz, sa'csi abadzucaj Dios rextojñnu, sa'csi lo crujz gudijx Jesucrist rextojñnu. <sup>13</sup> Cagucuaä rediidxre lo guejbtu, redad bengool, sa'csi huililajztu rextidx Jesucrist, najntu laani nabajñni galooli näjza par tejpas. Cagucuaä rediidxre lojtu, reb'i'n sa'csi dirutu jiu xtidx bendxab.

Cagucuaä rediidxre lojtu rexi'nä, sa'csi rumbeetu Dios. <sup>14</sup> Abacuaä rediidxre lo guejbtu, redad bengool, sa'csi numbeetu Jesucrist nani nabajñ galooli näjza par tejpas. Abacuaä rediidxre lojtu reb'i'n, sa'csi sudzu'tztu, sa'csi yuchee xtidx Dios neñ lastootu, dirutu jiu xtidx bendxab.

<sup>15</sup> Na'c guichagljaztu guntu renani rujñ rebejn nani di chalilajz xtidx Jesucrist; na'cza chanälaztejtü xhixtentu ni rajptu lo guedxliuj. Palga rinälaztejtü rehxixtentu ni ra'pnu lo guedxliuj, dxejc dinu chanälajz Dios. <sup>16</sup> Rebeñ guedxliuj ni di chalilajz xtidx Dios rchagljazreni rujñreni redzunguijdxre: rujñreni dzunguijdx nani rchagljaz tiejxhreni; rujñreni dzunguijdx nani rchagljaz balojreni, näjza lagajc laareni rlii'preni xpala'nreni. Niluxh guiraa reni'c najc dzun guedxliuj, xhet dzuundi ni gunibee Dios gac. <sup>17</sup> Luxh rnitlojpac guedxliuj. Sinitlojza guiraa reni rchagljaz rujñ rebeñ guedxliuj ni di chalilajz xtidx Dios. Niluxh palga gusoobtisnu xtidx Xtadnu Dios, sibajññjñuni par tejpas.

*Didx gului nájza didx-xhii*

<sup>18</sup> Guejbtu resa'á ni rillilajz xtidx Dios, asiáddzungajxh dxej che gululioj niguii nani rdxe'ch loj Jesucrist. Abiejn diajgtu siáád niguiiga. Naj yu' xhidajl reniguii nani rdxechlajz lo Crist. Ni'c alaracheenu asiáddzungajxh dxejga che gululioj niguiiga. <sup>19</sup> Yu' xhidajl rebejn ni rdxechlajz lo Jesucrist. Biriireni lo resa'nu. Direni nililajz xtidx Jesucrist. Palga nililajzreni xtidx Jesucrist si'c huililaaznu nuure xtidx Jesucrist, direni nirii lo resa'nu. Biriireni lo resa'nu, ni'c racbeenu direni gac xpejn Jesucrist.

<sup>20</sup> Gule Dios Jesucrist. Jesucristre baniidx Sprit Dxan xten Dios loonu te gacbeenu xhini'c najc redidxliipac. <sup>21</sup> Et sa'csi ditu gan xhi diidx najc didx gului bacuaá rediidxga lojtu. Sa'csi najntu xhi diidx najc didx guliipac, ni'c bacuaáni, te gutijp lajztu. Palga rucuaá rediidx ni najc gului, anajntu dina gusgueá la'tu.

<sup>22</sup> Chutis ni naa di Jesús gac Crist Xi'n Dios, xhet guliidi rextiidxni. Renani rnii di Jesucrist gac Xi'n Dios rdxechlajzni lo Jesucrist. Di reni'c nililajz xtidx Dios. <sup>23</sup> Chutis reni rnii di Jesucrist gac Xi'n Dios, di reni'c gumbee xtadnu Dios. Niluxh renani rnii Jesucrist najc Xi'n Dios, huililajzreni xtidx Dios, numbeezareni Dios.

<sup>24</sup> Colgusoob rediidx ni biejn diajgtu galooli che huililajztu rextidx Dios. Palga ru-soobtu rediidxga, nabañajtu Dios naj xi'nni Jesucrist. <sup>25</sup> Abia'n Jesucrist diidx guniidxni yálnabañcoob loonu. Naj ara'pnu yálnabajre, ra'pnumi par tejpas.

<sup>26</sup> Abacuaá rediidxre lojtu xcuent rebejn ni rlajz chalilajztu rediidx ni xhet guliidi. <sup>27</sup> Baxhal Jesucrist Sprit Dxan xten Dios loonu. Rbájzni neñ lastoonu. Dinu guiquiini chu stee bejn guluii loonu xhi diidx najc gului, sa'csi lagajc Sprit Dxan xten Dios ruluii xtiidxni loonu. Naj ruluiini la'tu guiraa ni najc gului, dini gusguee la'tu. Colguibañaj Jesucrist; colgusoob xtidx Jesucrist si'cni ruluii Sprit Dxan xten Dios lojtu.

<sup>28</sup> Naj guejbtu resa'á, colguibañaj Jesucrist, te che jiádsacni lo guedxliuj sisiytzu'tznu nejz lojni, dinu guitujy nejz lojni. <sup>29</sup> Anajntu laaca najc Dios. Anajntu renani rusoob xtidx Dios sasanájreni Dios, ni'c najczeni xi'n Dios.

### 3

*Rexi'n Dios*

<sup>1</sup> Bahuii xho huinälazduxh Dios nuure, ni'c anaj Dios nuure najcnu rexi'nni. Luxh gului najcnu rexi'n Dios. Rebejn guedxliuj ni di chalilajz xtidx Dios, direni gumbee nuure, rexi'n Dios, sa'csi dizareni gumbee Dios ni najc xtadnu. <sup>2</sup> Resa'á ni rinälazá, nuunu rionälaznu rextidx Dios, ni'cni najcnu rexi'n Dios. Dinu gacbee xho gacnu niluxh che guibisac Jesucrist loonu, suhuini lojni si'c ni najcni, sa'csi suchaani nuure te gacnu si'c ni najcni laani. <sup>3</sup> Che rñaj laaznu sidzujñ dxej gac tejanu si'c ni najc Jesucrist, dxejc rbañsa'cnu si'c ni gubajñ Jesucrist lo guedxliuj.

<sup>4</sup> Di rebejn ni rujñ dojl gusoob leii xten Dios. Che riennu dojl, runijntu lo leii xten Dios. <sup>5</sup> Racbeenu Jesucrist biáád lo guedxliuj, gujñni niguii te gujñ badzucajni rextoljnu. Laani dini niujñ dojl. <sup>6</sup> Che sasanájnu Jesucrist, dinu gac benguijdx. Di bejn nani rujñ dojl chalilajz xtidx Jesucrist, dizani gumbeeni. <sup>7</sup> Resa'á, na'c chalilajztu didx-xhii ni rnii bejn lojtu, che rñiireni cayujntu dojl. Rebejn ni rujñ laaca, najczareni si'c najc Jesucrist. <sup>8</sup> Rebejn nani rujñ dojl najc xi'n beñdxab. Galodooli rujñ beñdxab dojl. Ni'cni biáád Jesucrist Xi'n Dios lo guedxliuj te gudzucajni redojl nani rujñ bejn xcuent beñdxab.

<sup>9</sup> Rebejn nani najc xi'n Dios direni guichagljaz gunreni dojl, sa'csi abachaa Dios xcáriejnreni, sa'csi rbájz Dios neñ lastooreni. Direni gun dojl, sa'csi najczeni xi'n Dios. <sup>10</sup> Si'c ríembeenu rebejn ni najc xi'n Dios, nájza rebejn ni najc rexi'n beñdxab. Chutis tejni di gun dzunsa'c, ni dini chanälajz resa'reni, dini gac xi'n Dios.

*Nungájl chanälajznu resa'nu*

<sup>11</sup> Lagajc rediidxre biejn diajgtu galooli che huililajztu rextidx Dios: colchanälajz resa'tu. <sup>12</sup> Xhet si'c'di toCain nani gujñ xi'n beñdxab. Bejnñi dojl, bagu'tni bejtzni. ¿Xhicuent bagu'tnini? Bagu'tnini sa'csi bejn bejtzni ganax dzunsa'c, luxh toCain bejn dzunguijdx. <sup>13</sup> Na'c guidxelojtu che guidxechljaz rebejn lojtu. <sup>14</sup> Racbeenu dirunu sa lo xnezuyuj yálgujt, sa'csi dinu guidxechljaz loj resa'nu. Rajpnu yálnabajñ par tejpas sa'csi rionälaznu resa'nu. Chutis tej ni di chanälajz resa'reni canzaj lo xnezuyuj yálgujt, sa'csi rdxechlajzreni lo sa'reni. <sup>15</sup> Chutis ni rdxechlajz lo resa'ni, najcni nejz lo Dios si'c ni abagu'tni te bejn. Najñnu che rugu't te niguii te bejn dini ga'p yálnabajñ par tejpas. <sup>16</sup> Racbeenu rinälajz Jesucrist nuunu, sa'csi gujñni lacuaa nuunu lo crujz. Sigajza nungájl gacnájnu resa'nu, mase guetnu lacuaa guetreni. <sup>17</sup> Chutis tejnu ni rajp xhidajl xhixtenni, luxh dini gacnájni nicla tejnu ni xhet rajpdi, di bejnga chanälajz Dios. <sup>18</sup> Guejbtu resa'á, na'c chanälaznu resa'nu con rextiidxtisnu, na'c guiniitnisnu rionälaznu resa'nu. Palga rionälazpacnu resa'nu, sacnájnu resa'nu.



### *Sisiutzu'tznu nez loj Dios*

<sup>19-20</sup> Palga rionälaznu resa'nu, nancheenu najcnu rexi'n Dios. Palga jiajbnu xhigab dinu gac beñsa'c, dizanu gac xi'n Dios, nanab jiunu rextiidxtis Dios, na'c jiunu rehxigabnu. Dios najn rehxigabga. Niluxh Dios anaj: renani rinälaz resa'reni, reni'c najc rexi'n'ni. <sup>21</sup> Rniä lo guejbtu nani rinälazä, palga lagajc lastoonu rniü loonu, "cagusooblu xtidx Dios", sisiutijp lastoonu che rbedx-rniabnu lo Dios. <sup>22</sup> Xhitis ni rniabnu lo Dios, runiidxni loonu sa'csi rusooobnu xtiidxni, riennu redzuun ni ruspaaj lajz Dios. <sup>23</sup> Dee najc rediidx ni gunibee Dios gusoobnu: chalilaaaznu xtidx Dios, diidx ni rniü xho gujt Jesucrist lacuaa nuunu, chonälazaaznu resa'nu si'cni gunibee Dios. <sup>24</sup> Palga rusooobnu guiraa nani gunibeeni, nabannäjnni, si'cza nabannäjni nuunu. Nancheenu nabannäj Dios nuunu, sa'csi baniidxni Sprit Dxa xteni te cuääz neñ lastoonu.

## 4

### *Scree gacbeenu xhi didx najc guliipac*

<sup>1</sup> Guejbtu renani rinälazä, na'c chalilajztu rextidx chutis bejn nani naa, "rniä rextidx Dios lojtu". Ganiddoo colgula'tz rextiidxni te gacbeetu don chu xtidx caniiini, sa'csi xhidajl bejn sinii lojtu, "nuunu rniinu rextidx Dios", niluxh caniiisireni si'c. <sup>2</sup> Scree gacbeenu xhi diidx najc guliipac. Guiraa rebejn nani guinii "Jesucrist, Xi'n Dios, ni biääd lo guedxliuj si'c niguii", reni'c cayacnäj Sprit Dxa xten Dios, reni'c canii xtidx Dios. <sup>3</sup> Guiraa rebejn nani di guinii biääd Jesucrist Xi'n Dios si'c niguii, xhet xtidx Diosdi rniireni. Reni'c rdxe'chreni loj Jesucrist. Abiejn diajgtu siääd te niguii ni rdxe'chduxh loj Jesucrist, luxh naj abidzujn rextzuun niguiiga lo guedxliuj.

<sup>4</sup> Guejbtu resa'ä, najcnu rexi'n Dios. Naj abiennu gaan lo rebejn ni rdxe'ch lo Jesucrist sa'csi Dios ni rbäjz neñ lastoonu abejnni gaan lo bendxab ni nabajn lo guedxliuj. <sup>5</sup> Rebejn ni rniü xhet guliidi xtidx Dios, rililajztisreni rediidx ni najc xten guedxliuj. Xhidalduxh rebejn ni re' lo guedxliuj riu rediidx ni xhet guliidi. <sup>6</sup> Nuunu najcnu xi'n Dios. Rebejn nani riembee Dios riu xtiidxnu. Rebejn nani di gac xi'n Dios direni jiu xtiidxnu. Scree gacbeenu chu rebejn rniü didxliipac. Scree gacbeezanu chu rebejn rniü diidx ni xhet guliidi.

### *Rinälajz Dios rebejn*

<sup>7</sup> Rniä lo guejbtu nani rinälazä, nanab chanälaznu resa'nu, renani huililajz xtidx Dios, sa'csi Dios racnäj nuunu te chanälaznu resa'nu. Palga rinälaznu resa'nu, dxejc najcnu rexi'n Dios, luxh guliü riembeenu Dios. <sup>8</sup> Palga chutis tejnu di chanälajz resa'ni, dizani gumbee Dios, sa'csi lagajc Dios racnäj chanälaznu Dios, racnäjzani chanälaznu resa'nu. <sup>9</sup> Abasule' Dios loonu lacti rinälajzni nuunu. Yu' tejtis Xi'n Dios. Abaxhañni Xi'n'ni lo guedxliuj te gudijxni rextojl'nu lo cruzj te si'c guibannäjnni par tejpas. <sup>10</sup> Si'c racbeenu rinälajzpac Dios nuunu. Galoo dinu ninälajz Dios. Niluxh Dios huinälajz nuunu, ni'c baxhañni Xi'n'ni lo guedxliuj te gudijxni xtojlnu lo cruzj.

<sup>11</sup> Rniä lo guejbtu nani rinälazä, si'cni rinälajz Dios nuunu, sigajcza rlanjzni chanälaznu resa'nu. <sup>12</sup> Nicla tej bejn gajd fii lo Dios. Niluxh palga chanälaznu resa'nu, Dios nabajn neñ lastoonu, dxejc guliü rinälazpacnu Dios. <sup>13</sup> Nancheenu nabannäjnu Dios, sigajcza nabannäjpac Dios nuunu, sa'csi abaxhañni Sprit Dxa xteni cuääz neñ lastoonu. <sup>14</sup> Narä näjza reapost abahuinu loj Jesucrist. Caniä lojtu abaxhañ Xtdadnu Dios Xi'n'ni lo guedxliuj te guslaani rebejn lo xtojlni. <sup>15</sup> Chutis tejnu ni rniü "Jesucrist najc Xi'n Dios", nabannäjni Dios, nabannäjza Dios bejnğa.

<sup>16</sup> Racbeenu, rililazaaznu rinälajz Dios nuure. Guliduxh rinälajz Dios nuunu. Palga rinälaznu Dios, nabannäjnu Dios, nabannäjza Dios nuunu. <sup>17</sup> Naj sanälaznu Dios si'cni rlanjzni luxh palga chanälaznuni guidebtis ni guibajnnu, dinu guidxejb che guidzujn dxej ni gun Jesucrist yälguxhtis lo guedxliuj. Dinu guidxejb sa'csi guideb nabajnnu lo guedxliuj, nabannäjnu Dios si'c nabannäj Jesucrist Dios. <sup>18</sup> Palga rinälazsa'cnu Dios, dinu guidxejb, palga rinälajzpacnu di gacdi guidxeebnu. Palga guliipacnu rinälaznu Dios, xhetliidi rdxejbdinu. Nani rdxejb, rdejdnı trabajw, gajd bejnğa chanälazsa'c Dios.

<sup>19</sup> Rinälaznu Dios sa'csi ganiddoo Dios huinälajz nuunu. <sup>20</sup> Palga chutis tejnu naa "rinälazä Dios" niluxh rdxe'chlanjzni lo resa'nu, xhet guliidi xtiidxni. Palga dinu chanälajz sa'nu nani cahuiinu, xhixh sajz chanälazaaznu Dios nani gajdnu fii. <sup>21</sup> Agunibee Dios, nani rinälajz Dios chanälajzni resa'ni sigajc rinälajzni Dios.

## 5

### *Riennu gaan lo guiraa redolgujidx lo guedxliuj*

<sup>1</sup> Chutis ni rililajz Jesús najc Crist nani baxhañ Dios, ni'c najc Xi'n Dios. Palga rinälaznu Xtdadnu Dios, sigajcza sinälaznu renani najc Xi'n Dios. <sup>2</sup> Palga rinälaznu Dios, palga rusooobzanu xtiidxni, dxejc najnnu rinälaznu resa'nu nani najc Xi'n Dios. <sup>3</sup> Ni'cni, palga

rinälaaznu Dios, susoobnu xtiidxni. Luxh dinu guichalo nagajn gusoobnu xtiidxni. <sup>4</sup> Chutis tejnu ni najc xi'n Dios, riennu gaan lo redojl ni re' lo guedxliuj. Riennu gaan lo redojl lo guedxliujre sa'csi huililaaznu xtidx Jesucrist. <sup>5</sup> ¿Chuni'c cayujn gaan lo redojl lo guedxliuj, ä? Renani rililajz najc Jesucrist, Xi'n Dios, reni'c rujn gaan lo redojl lo guedxliujre.

*Rediidx ni baluui Dios loonu xcuent Jesucrist*

<sup>6</sup> Biääd Jesucrist lo guedxliujre. Birobnis Jesucrist, baxhe'zani xtiejnni lo cruzj. Xhet ganaxdi te guirobnisni biäädni, näjza te guxhe'ni xtiejnni lo cruzj che biäädni. Sprit Dxiän xten Dios canii rediidxre. Guliipac rextiidxni. <sup>7</sup> Yu' choñ ni baluiloj xhaguibaa. Rniireni xcuent Jesucrist tejsi diidx. Tejni najc Dios, steeni najc nani laa Diidx, steeni najc Sprit Dxiän xten Dios. <sup>8</sup> Sigajcza yu' choñ ni baluiloj lo guedxliuj. Rniireni xcuent Jesucrist tejsi diidx. Tejni najc Sprit Dxiän xten Dios. Steeni najc che birobnis Jesucrist, steeni najc che baxhe' Jesucrist xtiejnni lo cruzj che gujtni. <sup>9</sup> Palga rililaaznu xtidx rebejn ni rbäjz lo guedxliuj, nungäjł chalilaazrunu xtidx Dios. Rediidx nani rnii jion reni baluiloj tejsi diidx najcreni con nani rnii Dios xcuent Jesucrist Xi'n Dios. <sup>10</sup> Palga rililaaznu xtidx Jesucrist Xi'n Dios, rnii Dios xcuent Jesucrist neñ lastoonu. Chutis tejnu ni di chalilajz xtidx Dios, rujnni najc Dios si'c tej ni rusguee sa'csi dini chalilajz xtidx Dios ni rniini xcuent Jesucrist. <sup>11</sup> Scree najc rediidx ni rnii Dios. Abaniidx Dios loonu yälñabajn par tejpas. Yälñabajnga biädñä Xi'nni, Jesucrist. <sup>12</sup> Palga nabannäjnu Xi'nni, rajpnu yälñabajn par tejpas. Palga dinu guibanäj Xi'nni, dinu ga'p yälñabajn par tejpas.

*Xtixtios con diidx ni rulijdx*

<sup>13</sup> Abacuaä rediidxre lojtu ni rililajz rextiidx Jesucrist te gacbeepactu rajpntu yälñabajn par tejpas.

<sup>14</sup> Ni'cni dinu guidxejb che guiniinu lo Dios, sa'csi riu Dios xtiidxnu palga tejsi najc xhigabnu con Dios che rniabnu lojni. <sup>15</sup> Luxh palga najnnu riu Dios nuunu che rniinu lojni, sigajcza najnnu suniidxni nani rniabnu lojni.

<sup>16</sup> Palga tejnu fii tej resa'nu cayujn dojl, niluxh riuruni xtidx Dios, nuunu rajpnu por guiniabnu lo Dios xcuent laani, te gudeed Dios yälñabajn lojni. Niluxh yu' te dołroduxh. Chutis te bejn ni gun dojlga, di Dios gudeed lo bejnga yälñabajn par tejpas. Dizana guiniä guiniabtu lo Dios xcuent bejn ni rujn dołroga. <sup>17</sup> Guiraa redzunguijdx nani rujn rebejn najc dojl. Niluxh yu' redojl nani di gun gunijt bejn lo Dios par tejpas palga jiu bejn xtidx Dios.

<sup>18</sup> Racheenu guiraanu nani najc xi'n Dios di rlaaznu jiennu dojl. Racnäj Jesucrist nuunu te di beñxab gun gaan nuunu, te dizanu gusoob xtidx beñxab.

<sup>19</sup> Nancheenu nuure najcnu xi'n Dios, niluxh guiraa rebejn nani riutis rextzun guedxliuj cagusoobreni xtidx beñxab.

<sup>20</sup> Najnnu biääd Jesucrist Xi'n Dios lo guedxliuj. Baluini nuunu rextiidx Dios te jiembeenu Dios, nani najcpac Dios gullii. Nabannäjnu Dios ni najc gullii, sa'csi nabannäjnu Jesucrist. Laani najc Dios ni najc gullii. Caguniidxni loonu yälñabajn par tejpas. <sup>21</sup> Resa'ä, na'c guzuxhijbtu lo rebanäjb ni xhet guliidi. Sugacni si'c.

## Guijtz Ni Rojpa Ni Bacuaa Juan

### *Diidx guli nájza yárinálaaznu resa'nu*

<sup>1</sup> Nará nacá bengool. Cagucuaá guijtzre lojlu nane' nani agule Dios, nájza loj rexi'nlu. Rinálašápac la'tu luxh xhet xtebádi; nájza guiraa reni rililajz xtidx Dios sanálajztu. <sup>2</sup> Nuure rinálaaznu la'tu sa'csi yuchee neñ lastoonu rediidx nani najc guli, luxh dilajznu jiá rediidxre. <sup>3</sup> Xtadnu Dios, nájza Jesucrist Xi'nni, gacnáj nuunu, jiareni nuunu, guscuedcxí lajznu con xcálnajn didxlii nájza yárinálajz.

<sup>4</sup> Bibalazduxhá che gucheá yu' rexi'nlu ni rusoob xtidx Dios si'c gunibee Dios loonu gusoobnuni. <sup>5</sup> Nane' ni gule Dios, diidx nani rniabá gusoob guejblu naj dini gac didxcoob, niluxh lagajc diidx ni biejn diaagnu galooli, che huililaazlinu xtidx Jesucrist. Lagajc dee najc nani gunibee Dios loonu: nungájlpac chanálaaznu resa'nu. <sup>6</sup> Sinálaaznu resa'nu palga cagusoobnu xtidx Dios. Dee najc xtidx Dios ni biejn diaagnu galooli, che huililaazlinu xtidx Jesucrist: chanálaaznu resa'nu.

### *Rebejn ni rnii garenca diidx ni xhet guliidi*

<sup>7</sup> Balti bejn birii loonu, naj cagugueerene xhidajl bejn ni re' lo guedxliuj. Caniireni di Jesucrist niajc niguii che biáadni lo guedxliuj. Sa' bejnre najc benrusguee. Sa' bejnre rdxe'chreni loj Jesucrist. <sup>8</sup> Colga'p la'tu te na'c chalilajztu xtiidxreni, didi xlia'si biennu dzuun ro'c, te xca'tu guiraa ni guniidx Dios lojtu.

<sup>9</sup> Chutis bejn ni rlaiz gugu'ch xtiidxpacni lo xtidx Jesucrist, di bejn ga gumbee Dios. Niluxh chutis bejn ni riu xtidx Jesucrist, rumbenei Dios, rumbeezani Jesucrist Xi'n Dios. <sup>10</sup> Palga jiáad te bejn rolijztu ni di chasanáj xtidx Jesucrist, na'c xcájbtu jiu'ni rolijztu, na'cza guiniitu lojni, "Xchan. Biu'." <sup>11</sup> Sa'csi chutis bejn ni guinii "xchan" loj te bejn ni di chasanáj xtidx Jesucrist, cayacnájzani redzunguijdx ni rujn bejn ga.

### *Rudeedni xtixtios*

<sup>12</sup> Xhidalduxhru diidx rlazá guiniá lojtu, niluxh di rlazá gucuaareni lo guijtz. Cabázá jiádhuiá lojtu ro'c te guiniá rediidxre lojpacu, te guibaalajztu. <sup>13</sup> Rexi'n bájllu, nani aguleza Dios, ruxhá xtixtios lojlu. Ni'ctis najc ni rucuaá lojtu. Sugacni si'c.

## Guijtz Ni Riojn Ni Bacuaa Juan

### *Cagucuaani didxa'c lo Gayo*

<sup>1</sup> Narä nacä te bengool. Caguxhalä guiτζzre lojlu, dad Gayo. Rinälazduxhälu sa'csi huililajzlu rextidx Dios.

<sup>2</sup> Sanälazälu, nanä laaca yu' lastoolu loj Dios. Naj rniabä lo Dios gacnäjni luj, guniidxzani yäl'nadaanlu. <sup>3</sup> Bibalazduxhä che gubi' gaii resa'nu, guniliireni loä xho huililajzlu xtidx Jesucrist, xho basoobzalu xtidx Jesucrist. <sup>4</sup> Xheti stee diidx ni ruspaä lazä si'c rbaa lazä che racbeä rusoob resa'nu redidxlii xten Jesucrist.

<sup>5</sup> Dad Gayo, laaca cayujnlu che racnäjlu renani rililajz xtidx Jesucrist, mase dilu gumbeereni che riädreni lojlu. <sup>6</sup> Aräjpreni lo resa'nu ni rdxagsa' ree xho huinälazjlureni näjza xho gucnäjlureni. Laaca bejnlu gucnäjlu resa'nu, badeedlu xhi biquiireni lo nejz che biriireni rolizjlu. Si'cza nanab jiennu lo guiraa resa'nu, nalajznu rebejn ni ruluii xtidx Dios. <sup>7</sup> Ruluiireni xtidx Jesucrist sa'csi sanälajzreni Jesucrist. Xhet rca'direni lo rebejn ni di challajz xtidx Jesucrist. <sup>8</sup> Si'cza nanab gacnäjnu rebejn ni riluii xtidx Jesucrist nen garen-garen guejdx, te si'c jiennänu xtzuun Dios guiraa renani ruluii xtidx Dios.

### *Di Diótfefes niujn redzunsac*

<sup>9</sup> Abaxhalä te guiτζz lo rexpejn Jesucrist ro'c. Niluxh Diótfefes rlanj guinibeeni lo resa'nu ro'c. Dini jiu xtidxä. <sup>10</sup> Ni'cni che guidzunä ro'c, narä siniä rediidxre lo resa'nu ro'c, che guidxaag sa'nu ro'c. Diótfefes rniyaj narä lo resa'nu ro'c. Dizani jiu resa'nu che rdzujnreni ro'c. Dizani gusaan fiitu resa'nu ni riäd ro'c, mase rlanj chu tejtü fiireni. Luxh rlanjni gudxojnni guidxagnäjtü rebejn nani ruhuii resa'nu ni ruluii xtidx Jesucrist.

<sup>11</sup> Sa'ä ni rinälazä, na'c gunlu redzunguijdx, bejn redzunsac. Nani rujn dzunsac ni'c najc Xi'n Dios. Chutis tej ni rujn redzunsac najc xpejn Dios. Chutis tej ni rujn redzunguijdx, di ni'c gumbee Dios.

### *Rniireni didxa'c xcuent Demetrio*

<sup>12</sup> Guiraa rebejn ganax didxa'c rniireni xcuent Demetrio, luxh huenliisi rusoobni xtidx Jesucrist. Sigajcza narä rniä didxa'c xcuentni. Najnlu guliipac rediidx ni rniä.

### *Rudeedni xtixtios*

<sup>13</sup> Rlazä guiniä xhidalduxhru diidx lojlu, niluxh di rlazä gucuää rediidxga lo guiτζzre. <sup>14</sup> Runä xhigab di gaclaa jäadhuiä lojlu, dxejcti jieinu diidx.

<sup>15</sup> Gulecdxi lajzlu. Rexamigwlu ruxhal'reni xtixtios lojlu. Badeed xtixtios lo tejga reexamigwä ro'c.

## Guijtz Ni Bacuaa Judas

### *Judas cagucuaa loj renani agule Dios*

<sup>1</sup> Narä nacäzä Judas, ni rujn xtzuun Jesucrist. Narä nacäza betz Jacob. Cagucuaä guijtzre loj renani agule xtdanu Dios, renani sanälazduxhni, nani cayapcheeni par Jesucrist. <sup>2</sup> Rniabä lo Dios, gulaslazduxhruni la'tu, guscuedxiduxhruni lastootu, gacnäjni la'tu, guniidxruni yäl'sanälajz.

### *Renani ruluui yäl'rusguee (2 Pedro 2:1-17)*

<sup>3</sup> Rebetzä nani sanälazä, che cayunduxhä xhigab gucuaä lojtu xcuent yäl'ruslaa lo rextoljnu ni rajpnu, benä xhigab riojbru gucuaä te guijtz lojtu te gulidxätu sudzu'tznu, gapdzu'tztu yäl'riliilajz ni basule'reni par tejpas loj rexpejn Dios. <sup>4</sup> Sa'csi abixhiga'tz gaii bejn, renani galooli gunii Dios siädreni, niluxh sinitlojreni. Najczeni bejn ni di chaliilajz xtidx Dios, najczeni benguidduxh, rutzuräreni xcäl'racnäj Dios, rujnreni xtujy, sanäreni te yäl'nabandxuudx. Rbälazzareni xpaxhuaannu nani rnibee loonu, Dad Jesucrist.

<sup>5</sup> Mase anajntu guira'ti rediidxga tejpas, rlazä gusnaä lajztu che gudejd gulää Dad Jesucrist rexpejn Israel lo guedx Egipto, dxejcti bagu'tni renani di nililajz xtiidxni. <sup>6</sup> Rexangl Dios nani di nucuaadijg diidx, ni birii cadro rlazj Dios chureni, reni'c basäu Diosreni cadro nacäiboo te cabäzreni gun Dios xcäl'guxhtisni lojreni. <sup>7</sup> Si'c bejnri guedx Sodoma näjza Gomorra näjza reguedxbäz ni tre' gajxh ro'c, sa'csi bejnreni dojl, reniguii guyunäjreni niguii biräax, regunaa guyunäjzaren i regunabiräax. Dxejc gudejdreni trabawduxh huejcreni nen guiboo par tejpas xcuent xtojlreni, ni'c najc te yäl'rulijdx loonu.

<sup>8</sup> Rebejn ni riu' lojtu najc si'c reben galoo ni bejn dojl. Nabajreni si'c ni bisieedreni lo guiraa nani ruluui yäl'rnixca, ruxhinreni tiejxhreni, rbälazreni xcäl'rnibee Dios, rniyajzaren i rexangl Dios. <sup>9</sup> Miguejl ni rnibeeru loj rexangl Dios, che gudildiidxni bendxab yejc tiejxh toMoisés, dini niniyaj bendxab, alga räjpni: "Sugun Dad Jesucrist yäl'guxhtis lojlu." <sup>10</sup> Niluxh rebejnra rniyajreni nicla ganreni xhini'c rniireni. Niluxh nani racheepac rebejnra najc yäl'najn nani nicla niqiuin nisieedreni, lala sa' nani rujnza reguidxaa, ni xheti xcäriejnri, reni'c sujn nitlojreni.

<sup>11</sup> ¡Aii! ¡Riazanureni! Sanajlreni xnezuy Caïn, luxh te gunreni gaan meel ruxhunlreni rujnreni sa' dojl ni bejn Balaam agujc xchero, näjza sa' dojl ni bejn Coré, ni gudilnäj Dios, luxh gunitlojni. <sup>12</sup> Laareni najczeni te xtuiduxh lo rexchej ni rajc guidoo, direni guidxeyb gauxchenäjreni la'tu, sa'csi xque'tisreni riuren i. Najczeni si'c te xcäji ni xhet nisguij siädnäni, nani sanä bej nezree nezrec; najczaren i si'c te yagbigool nani di ninejxh xcax lojni, tio'p huält agujtreni, najczeni si'c te yajg ni abiliäädx. <sup>13</sup> Laareni najc si'c nis ni räjs lo nisdoo, che cayajc te bidonduxh, sää, siädni, carii xtujyreni si'c räjs nis lo nisdoo. Najczeni si'c bale' ni rtejb xhaguibaa, rijreni lo te yäl'nacäiduxh ni benchee Dios par tejpas.

<sup>14</sup> Xcuentza redee agunixgaaza Enoc ni najc xagdodoo Adán, räjpni: "Bahuii, siädnä Dios xhidalduxh xanglri <sup>15</sup> te gunni yäl'guxhtis loj guiraa bejn te gusacsiduxhni guiraa rebejn ni di gumbee Dios xcuent redojdduxh ni bejnreni, xcuentza redidxnaj ni guniyaj rebendolduxhre Dios." <sup>16</sup> Rebejnre laa reni rmojm, runduxhreni quej, rujnreni si'ctis ni rlazj tiejxhreni, rniireni guiraloj didxnaj, rniisireni didxsa'c loj rebejn te gun rebejnra si'c ni rlazjreni gunreni.

### *Rulijdxni rebejn nani ahuililajz xtidx Dios*

<sup>17</sup> La'tu, betzä ni sanälazä, riäj'l guinaj lajztu rediidx nani gunii reapost xten Dad Jesucrist, <sup>18</sup> sa'csi guniireni lojtu: "Neñ redxelult che guibisac Jesucrist, su' bejn ni suxhiznäjreni rextidx Dios, sujnreni si'ctis guisia' lajzreni." <sup>19</sup> Redee najc renani run rlia' rexpejn Dios lo sa'reni; rinuuzaren i ni yu' lo guedxliuj, diza Xpriet Dxan xten Dios cuääz neñ lastooteni.

<sup>20</sup> Niluxh la'tu rebetzä nani sanälazä, col'tioob loj xcäl'riliilajztu ni siäd lo Diostis, col'nab lo Dios xcuent yäl'rnibee xten Xpriet Dxan xten i. <sup>21</sup> Col'guibajntis lo yäl'sanälajz xten Dios, col'susintis la' ni cayunlojtu yäl'rulasajz xten Dad Jesucrist ni guniidx yäl'nabajn par tejpas.

<sup>22</sup> Col'gacnäj renani di chaliilazsa'c te chaliilajzpacreni xtidx Dios. <sup>23</sup> Col'yacnäj sgaii te guibicajreni lo dojl, gudobxhaxjreni, col'eyjn xhigab lo guiboo cayejcreni. Col'yacnäj sgaii bejn, col'gulasajzreni con yäl'rdxeyb, niluxh col'natiru te di guntu lagajc dojl ni rujnreni. Gulälaz nani rujnreni, nani ruxhinreni.

### *Redidx lult*

<sup>24</sup> Col'guiliä'p xpala'n Dios nani racnäj la'tu didi jiajbtu lo dojl, nani rujn sajz suutu lo xcäl'rdimbicha' Dios, nayadujtu, rbaduxh lajztu. <sup>25</sup> Yu' tejtis Dios. Laatisni räjpni yäl'najn te

guslaani nuurnu lo dojl xcuent ni bejn xtadnu Jesucrist. Colguiliä'p xpala'nni, rajpni guiralii yälrnibee, yälrdimbicha', galooli, näj naj, näjza par tejpas. Sugacni si'c.

## Rediidx Nani Bacuaa Juan Xcuent Recos Ni Churu Gac

### *Baluij Jesucrist lo Juan*

<sup>1</sup> Dee najc rediidx ni badeed Dios loj Jesucrist te guluilojnini loj rexmoksi, xcuent recos nani di gaclaa gac. Jesucrist baxhaĵ xanglni lo Juan, te baluiini guiraa recosga lojni. <sup>2</sup> Ni'cni bacuaa Juan lo guijtze guiraa xtidx Dios nani baluii Jesucrist lojni, xcuent guiraa recos nani bahuijopacni.

<sup>3</sup> Chicbaa renani roĵ guijtze xcuent recos ni churu gac, renani riuza rediidxga, renani rguchee rediidxga neĵ lastooni sa'csi siäddzungajxh redxej che soob rediidxga.

### *Juan cagucuaa guijtza lo gajdz guidoo*

<sup>4</sup> Narä nacä Juan. Cagucuaa guijtze loj guigajdz reguidoo ni tre' lo región Asia. Dios guspajdz la'tu, guscuedxini lajzu, lagajc Dios ni sigajc najc nadxej, sigajca gujcnii nani, sigajca sajcnii par tejpas. Xca'zatu xcälruspalajz näj xcälrbexilajz guigajdz resprit ni suga' guideb gabi cadro rniweeni, <sup>5</sup> näj xcälruspalajz, xcälrbexilajz Jesucrist nani gunilii diidx ni badeed Dios lojni, nani ganiddoo gubansac lo rebengut, nani rniweena lo guiraa rereii loj guedxliujre. Laani sanälazduxhni nuure, laani rudzucajni xtojlnu con xtiejnii. <sup>6</sup> Laani bejnii gacnu te beĵro, te guedxro, gaczanu bixhojz lo Dios Xtadni. Suchä'p xpala'nii, suga'pni yälrnibee par tejpas. Sugacni si'c.

<sup>7</sup> ¡Colgacbee! Laani sibisacni lo rexcäy, luxh guiragajc rebejĵ suhuii lojni, nägajc renani gudzuĵd cuä' xcustiini. Guiraa rebejĵ guedxliujre soon xcuentni. Si'cti, sugacni si'c.

<sup>8</sup> —Narä nacä ganid, nacäza lult, si'c najc relettr A con Z —rnii Dad Dios—. Nabaĵnä nadxej, sigajca gubana nani, sigajca sibanä par tejpas, dipacna gacä ste'ca. Rapä yälrnibeduxhu lo chutis.

### *Bahuiä loj Jesucrist lo xcälrdimbicha'ni*

<sup>9</sup> Narä, Juan, bejtztu, näjza ni cadednäjtu trabajw xcuent Jesucrist, ni riunäjzatu cadro rniween Dios, ni rsiudzutnäjzatu lo xtidx Jesucrist, guyu'ä lo yuj nani tre' lo nisdoo, ni laa Patmos. Ro'c baxhaĵreni narä pres sa'csi basule'ä xtidx Dios näjza diidx xcuent ni bejn Jesucrist lo guedxliujre. <sup>10</sup> Te dumingw, laĵ ni cayunää Dios, guzacä astoo canixcalä, dina niacheä caro yu'ä, dxejcti nez detzä biejn diagä xse' te ni gunii dipduxh, astoo te trompet, <sup>11</sup> najni loä:

—Narä nacä ganiddoo, nacäza lult. Lo te guitzro bacuaa nani fiilu, dxejcti baxhaĵ guijtza loj guigajdz guidoo ni yu' nez Asia, neĵ reguejdxre: Éfeso, Esmirna, Pérgamo, Tiatura, Sardis, Filadelfia, näjza Laodicea.

<sup>12</sup> Dxejc gubireä te bahuiä chuni'c canii loä. Che gubireä bahuiä lo gajdz gandilier oor. <sup>13</sup> Galäii guigajdz recandiliera, suga' te ni najc Xi'n Dios nani gujcnii Niguii, najcwni te lajd ni rdzujĵ lo ni'lini, lastoozani naliib te cinturon gulajz ni najc ganaxduj oor. <sup>14</sup> Yejcni näjza xquidxejcnii najczareni nolbäj si'c xquichlajd xiil, nolbäj si'c yejg. Dxejcro rrebajĵ lojni. <sup>15</sup> Ni'ni rdimbicha' si'c guiib ni laa bronx che cayejcnii lo guiboo. Xse'ni riejn nadipduxh astoo che riäjt nisro neĵ regueuu. <sup>16</sup> Ladbee ca' ñaani gajdz balxhaguibaa; ro'ni rii te espaad ni guiro'p laad caj ro'ni; dxejctiru lojni rujn si'c rujn loj gubijdx che cagusanijni guideb lagaa.

<sup>17</sup> Che bahuiä lojni, biabroä nez lojni si'c te bengut. Dxejcti batzuubni ñaani xladweeni yecä, dxejc guniini loä, najni:

—Na'c guidxejblu, narä nacä ni gubajĵ galooli, narä nacäza ni guibajĵ lult. <sup>18</sup> Narä nacä ni nabajĵpac; gutä, niluxh naj nabaĵnä par tejpas. Rapä yälrnibee lo yälgujt näjza lo gabijl. <sup>19</sup> Ni'cni bacuaa recos ni abahuiilu, nani cayajc naj, näjza nani churu gac. <sup>20</sup> Dee najc laa yälxhiga'tz xten regajdz balxhaguibaa ni bahuiilu lo ñaä ladbee näjza regajdz gandilier oor: guigajdz balguibaa sälojni xangl Dios xten reguidoo. Dxejcnii gajdz gandiliera sälojni guigajdz reguidooga.

## 2

### *Rediidx nani chää loj rexepejn guidoo Éfeso*

<sup>1</sup> Dxejcti najni loä:

—Bacuaa rediidxre lo xangl Dios xten guidoo Éfeso: “Nani ca' guigajdz balxhaguibaa ñaani ladbee, näjza nani rsiaj galäii guigajdz gandilier oor, rnii rediidxre lojtu: <sup>2</sup> Narä numbeä xhi redzuun rujntu, xhi trabajw rdejdtu rujntu dzuunga, näjza xho rsiudzu'tztu. Dizatu guchagsa'tu beĵlatsiaj; näjza bala'tztu xho rujn rebejĵ nani rniireni najcreni apost ni rnii xtidx Dios, luxh direni gac, luxh la'tu gucbegajctu cagugueereni bejn. <sup>3</sup> Rsiudzu'tztu,

rujntu huant xcuent xtidxä, gajdtu guidxajg. <sup>4</sup> Empac yu' te quej ni rbe'cä xcuenttu: dirutu chanälajz narä si'cni huinälajztu narä ganiddoo. <sup>5</sup> Ni'cni colguzaa lajztu caro banijttu, colgusiejch lajztu, colyejn lagajc redzuun ni bejntu galoo che guslojtu huililajztu xtidxä. Palga ditu gusiechajztu, sudzucaä xcandilieertu cadro suga'ni. <sup>6</sup> Laaca rujntu rbälaztu xtzuun rebejn ni laa nicolaïtas, sa'csi näjza narä rbixlazä xtzuunreni. <sup>7</sup> Nani yu' diajgni te cuadiajgni diidx, sucuadiajgni diidx ni rniü Sprit Dxan xten Dios loj reguidoo: loj renani gun gaan lo dojl, gudedä gauni ninejxh ni rcaj lo yajg yäl'nabajñ, ni yu' xhaguibaa cadro yu' Dios."

*Rediidx ni rniüni loj rexpejn guidoo ni yu' Esmirna*

<sup>8</sup> Dxejcti najni loä:

—Bacuaa rediidxre lo xangl Dios xten guidoo ni yu' Esmirna: "Nani najc ganiddoo, nani najcza lult, nani agujt, dxejctiru gubansacni par tejjpas, rniü diidxre lojtu: <sup>9</sup> Narä nanä xho cadejdlu trabajw, nanäza guxilli rajplu, niluxh nez loj Dios yu' xhidajl xhixtenlu. Nanäza yu'reni rniyajlu. Reni rniyajlu rniireni najcreni rexpejn Israel, luxh direni gac. Najcreni xpejn xquidobäz bendxab. <sup>10</sup> Na'c guidxajblu trabajw nani agojl tedlu. Aree bendxab gusäl gaii sa'tu neñ latzguuib, te gacbeeni don la guliitu ahuililajztu xtidx Dios, te tedzatu trabajw tzuu dxej. Colgutip lajztu mase guettu, dxejcti narä gunidxä te coron xten yäl'nabajñ. <sup>11</sup> Nani rrlajz cuadiajg diidx sucuadiajgni diidx ni rniü Sprit Dxan xten Dios loj reguidoo: nani gun gaan lo dojl, xhet gundi yälgujt ni rojpa lojni."

*Rediidx ni rniüni lo rexpejn guidoo ni yu' Pérgamo*

<sup>12</sup> Dxejcti najni loä:

—Bacuaa rediidxre lo xangl Dios xten guidoo ni yu' Pérgamo: "Nani ca' spaad ni caduxh ro'ni guiro'p laad rniü rediidxre lojtu: <sup>13</sup> Narä nanä caro rbäjztu, rbäjztu lo guejdx cadro rniübe Bendxab. Rsiudzu'tztu xcuent xtidxä. Lahtis rsiudzu'tztu rililajztu xtidxä, mase neñ redxex cheni bagu'treni Antipas, ni gunii diidx xcuenta, nani gusudutztpac nez loä, nani bagu'treni neñ guejdx cadro rniübe Bendxab. <sup>14</sup> Niluxh yu' tiop-chon xtojltu. Lojtu nadxaag gaii bejn ni rujn si'c bejn toBalaam agujc xchero. Laani baseedni Balac xho gunni te jiajyb rexpejn Israel neñ dojl, baseednireni gaureni recos ni gurej lo dxan nez loj rebanäjb, baseedzani rexpejn Israel guesnäjäni chutis gunaa. <sup>15</sup> Sigajcza nadxaag lojtu gaii bejn ni riu rediidx ni rusule' reni laa nicolaïtas. <sup>16</sup> Colgusiechxga lajztu, te di jälgacä lojtu te gucuanääreni spaad ni yu' ro'ä. <sup>17</sup> Nani rrlajz cuadiajg diidx, sucuadiajgni diidx ni rniü Sprit Dxan xten Dios loj reguidoo: renani gun gaan lo dojl, lojni gudedä yäxttiil ni laa mana ni yuchee-xhiga'tz. Sudedäza lojni te guibäz ni najc nol, lojni caj te lajni ni nacoob, nani rutru racbeedi, xtebtis nani xca'ni."

*Rediidx nani rniüni lo rexpejn guidoo ni yu' Tiatira*

<sup>18</sup> Dxejcti najni loä:

—Bacuaa rediidxre lo xangl Dios xten guidoo ni yu' Tiatira: "Xi'n Dios nani rbebajl balojni, ni rdimbicha' ni'ni si'c bronz, ni'c rniü rediidxre lojtu: <sup>19</sup> Ananä xtzuuntu, sanälajztu sa'tu, nanä xho rililajztu xtidxä, xho racnäjtu resa'tu, näjza xho rsiudzu'tztu, runduxhtu huant. Nanäza cayujntu dzunroru naj loj ni bejntu che guslojtu. <sup>20</sup> Niluxh yu' xhicuent rdxe'chä lojtu. Rcäjbtu riu'tu loj te gunaa ni laa Jezabel. Laani rniüsiini najcni te profe't, gunaa ni rniü xtidx Dios, rusguetisni bejn. Luxh xcäl'ruseedni cagugueeni rexpenä nani ahuililajz xtidxä, te naj rujnreñi cosgujdx, si'c yäl'renäj ni di gac chäälni, rajwzarenani nani gurej lo dxan xten rebanäjb. <sup>21</sup> Aguläzä xchej te gusiechajzni, gusaanni gunni dojl, luxh naaddini gusiechajzni xcuent redzunguijdx ni rujnri. <sup>22</sup> Luxh palga laani dini gusaan gunni redzuun nani rujnri, narä siguixäni, gudedä te yäl'racxhuro. Luxh sutedä trabajwduxh guiraa renani bennäjni dzunguijdx palga direni gusiejch lajzreni, palga direni guchaa xmoodreni. <sup>23</sup> Sugutxhiä, sunitloä rexi'n gunaaga, te si'c gacbee guiraa rebejn ni yu' neñ reguidoo narä nacä ni rula'tz rexhigab ni yu' xcäriejnreni, näjza yäl'rililajz ni yu' neñ lastooreni. Te gacbeezarenani narä sunidxä lo tejgatu ni riäl' xca'tu xcuent redzuun ni rujntu. <sup>24</sup> Dxejcti loj guiraa reni yu' lo guedx Tiatira, la'tu ni di guirinajl xnezuy Jezabel, la'tu ni di gumbee nani rniüreni najc recosduxh xten bendxab, xhetru rniüdi lojtu, dirunä gotalä xtzuuntu. <sup>25</sup> Colyapdu'tz rextidxä nani arajptu dxejli ni guibisacä lojtu. <sup>26</sup> Nani gun gaan lo dojl, näjza nani cagusoob xtidxä dxe lultli, lojni sudedä yäl'rniübe te guinibeeni renacion. <sup>27</sup> Si'cni baniidx Xtadä yäl'rniübe loä, sudedä yäl'rniübe lojni, te guinibeeni guiraa reben guedxliuj, gunnäjni yäl'guxhtis lojreni te barguuiib si'c rujn ni runchee guesbajñ, rlia'ni guiraa regues nani xhet sajcdi. <sup>28</sup> Sunidxäza bale' xhaguibaa ni rii rsiidoo (ni säloj guibannäjnu Dios). <sup>29</sup> Nani rrlajz cuadiajg sucuadiajgni diidx ni rniü Sprit Dxan xten Dios loj reguidoo."



## 3

*Rediidx nani rniini lo rexpejn guidoo ni yu' Sardis*

<sup>1</sup> Dxejcti najni loä:

—Bacuaa rediidxre lo xangl Dios xten guidoo ni yu' Sardis: “Si’c naj nani rajp guigajdz Sprit xten Dios näj guigajdz rebal xhaguibaa: Narä nanä guiraa redzuun nani rujntu, rniü rebejn nabajntu, niluxh narä nanä ascanu agujttu, dirutu gun xtzunä. <sup>2</sup> Colguibajn, colgula’tzru nani rapsijctu xcuent rextidä nani ameer nitlo nen lastootu. Narä ruhuiä ditu niunsa’c dzuun xtenä nez loj Dios. <sup>3</sup> Colgusnaj lajztu rediidx ni basule’reni lojtu, nani abacuadiajgtu, colgusoob rediidxga, colgusiech lajztu. Palga ditu guibajn, palga ditu guchaa xmoodtu, sidzunä nez lojtu si’c te gubaan, nicla gaantu cor guidzunä lojtu. <sup>4</sup> Niluxh yu’ gaiisi bejn lo guedx Sardis nani naya, nani gajdreni gun dojl. Sajcwreni ladnolbäj te sanäreni narä xhaguibaa, sa’csi laareni säbyäjlrreni. <sup>5</sup> Nani gun gaan lo dojl, ni’c sajc gacwni ladnol, luxh dizana guche’nä lajni loj xlibr cadro caj laj renani sibajnnäj Dios par tejpas. Sicäpäza nez loj Xtaä näjza nez loj guiraa rexquixhajgni, bejnga najc rexpenä. <sup>6</sup> Nani rlanj cuadiajg diidx, sucuadiajgni diidx ni rniü Sprit Dxan xten Dios loj reguidoo.”

*Rediidx nani rniini lo rexpejn guidoo ni yu' Filadelfia*

<sup>7</sup> Dxejcti najni loä:

—Bacuaa rediidxre lo xangl Dios xten guidoo yu' Filadelfia: “Nani najc dxan, nani najc guliipac, nani rajp xliäii toDavid (ni säloj guiragajc yälrnibee), nani che ruxhalni, rut rusäüudi, nani che rusäüuni, rut ruxhaldi, laani rniini diidxre lojtu: <sup>8</sup> Narä nanä xhini’c rujntu. Si’c te puert ni naxhal, ni rut rusäudi, ni rut rusäudi yälrnibee lojtu te gusule’tu xtidä, rutliidi sajc gusäuu ro’tu. Mase guxii nadip-nadaantu, atu canii xtidä, ditu cuatzlajz xtidä. <sup>9</sup> Suhuiitu xho gunä rebejn ni yu’ lo guidobäz xten bendxab. Rniisireni najceni xpejn Israel, luxh direni gac; rusgueereni bejn. Narä sunäpac jädzuxhijbreni nez lojtu, sunäza gacbeepacreni sanälazduxhä la’tu. <sup>10</sup> Sa’csi basoobtu xtidä ni gunibeä sutijptu, na’c jieedtu, ni’cni narä sacnääzatu che guidzujn dxej tedtu trabajw. Luxh orga ameer guidzujn lo guideb guedxliuj, luxh sidejd guiraa reben guedxliuj trabajw, te guibee rebensa’c lo reben guedxliuj. <sup>11</sup> Narä di gac laa jäälä, gopdzu’tz ni rajptu, te rut gudzucajdi ni gunidä xca’tu. <sup>12</sup> Nani gun gaan lo dojl, narä gunäni si’c te pilajr nen xquidoo Xtioozä, nalajznu, sajcnj te bejn nani gac guinibee cadro yu’ Dios. Sibajnni ro’c par tejpas, diruni guirii ro’c. Lojni gucuaä laj Dios näjza laj guejdx xten Dios ni najc Jerusaléncob, nani guirii xhaguibaa cadro yu’ Dios; lojni sucuaäza laä ni najcza nacoob sa’csi najcni xpenä. <sup>13</sup> Nani rlanj cuadiajg diidx, sucuadiajgni ni rniü Sprit Dxan xten Dios loj reguidoo.”

*Rediidx nani rniini lo rexpejn guidoo ni yu' Laodicea*

<sup>14</sup> Dxejcti najni loä:

—Bacuaa rediidxre lo xangl Dios xten guidoo ni yu’ Laodicea: “Nani laa Amén (ni säloj sugacni si’c), nani najc testiigw ni rniliipac, ni di cuääz guiniini didxliiga, nani guläxtej guedxliujre näj guiralii ni benchee Dios, laani rniini scree: <sup>15</sup> Nanä redzuun ni cayujntu. Ditu sasa’c lo xnezyuä, dizatu cuälaz xnezyuä. ¡Maläii guntu tejni o steeni! <sup>16</sup> Ni’cni, sa’csi najctu si’c nistiib, ditu gac si’c nisnajl, niclaza gactu si’c nislää, sibäro’ä la’tu. <sup>17</sup> Sa’csi rniilu: Ri’cw narä, rapä xhidalduxh xhixtenä, xhet rquinädi. Luxh dilu gan xhet rajpdilu, alga najclu ben gubijn, te ben probduxhlu, di lojlu jien, luxh suga’lu xhabäalu nez lo Dios. <sup>18</sup> Ni’cni rulidxälu siilu loä oor xtenä nani agudejd lo guiboo te gac lu ri’cw; gusii loä ladnol gacwlu, te di guitujy lu suulu xhabäalu; gusiiza unguent loä te chää balojlu, te jien lojlu. <sup>19</sup> Rebejn nani sanälazä, reni’c rulidä, runäza riareni che et laadi rujnreni. Ni’cni colsäblajz; colgusiech lajztu. <sup>20</sup> Colhuii, ana suga’ä roxlä’ lastootu, cagusezä, cabedxä’ä. Palga yu’ chu tejtü ni jiejn diajgni xse’ä, guxhalni xpuert lastooni, siu’ä lastooni, te gacnäni, te guiban sa’czani nez loä. <sup>21</sup> Loj nani gun gaan lo dojl, lojni gudedä guinibenäjni narä xhaguibaa, sa’csi näj narä abenä gaan lo dojl, ni’cni gurenä Xtaä cadro rnibeeni xhaguibaa. <sup>22</sup> Nani rlanj cuadiajg diidx, sucuadiajgni diidx ni rniü Sprit Dxan xten Dios loj reguidoo.”

## 4

*Calä’preni xpala’n Dios xhaguibaa*

<sup>1</sup> Che gulujx bacuaä rediidxga, guläsä loä, bahuiä astoo naxhal ro puert xhaguibaa. Dxejcrü gunii xse’ nani biejen diagä ganiddoo, nani riejn si’c xse’ te trompet, najni loä:

—Huä’p, gudaa ree, te guluiä lojlu recos ni churu gac che luux gac recosre.

<sup>2</sup> Lagajc dxejc astoocanu si’cni huij sprit xtenä xhaguibaa. Ro’c bahuiä te yagxhilo cadro rbejn nani rnibee xhaguibaa, luxh ro’c sobga’ nani rnibeeni. <sup>3</sup> Nani sobga’ lo yagxhilga, rienni si’c te guisa’c ni rbabalsejs, si’c reguisa’c ni laa jaspe, näj cornalina. Guideb gabi

yagxhil cadro rnibeeni dejd te xquitgubijdx ni rbebalsejs si'c guisa'c ni laa esmeralda. <sup>4</sup> Guideb gabi cadro rnibeeni suga' sgalbitajp yagxhil, loj reyagxhilga sobga' galbitajp rebengool, najcwreni ladnol, yu' coron oor yejc teygareni. <sup>5</sup> Nez lo yagxhilro cadro rnibeeni rii reyälrdinya' näjza guzii. Nez loj cadro rnibeeni cayalguij gajdz bajl ni najc gajdz Sprit Dxan xten Dios. <sup>6</sup> Nez loj cadro rnibeeni yu' astoocanu te nisdoo ni rien si'c te guihuanro, rdimbichasejsni.

Galäii yagxhilroga näjza guideb gabini suga' tajp man, guideb nez lojreni näjza nez dejtzeneni yu' balojni. <sup>7</sup> Manganidga najc si'c te lion; man ni rojpga najc si'c te gonbäz; man ni riojnga rujn lojni si'c rujn loj te niguii; man ni rdajpga najcni si'c te bisiro cagutajt xhaguibaa. <sup>8</sup> Niluxh guidap remanga teygareni yu' xho'p xhigareni, guideb gabireni, näj nez nenreni liguidxa balojreni, niluxh direni gusilajz, dxej-yääl caniireni:

Dxan, dxan, dxan najc Dad Dios ni rajp yälrnibeduxh,  
nani yu' galooli, nani yu' naj, nani churu jääd.

<sup>9</sup> Guidap remanga rliä'preni xpala'n Dios, rusuxhijbreni rajnrenini, rdeedzareneni xquixtios loj nani rnibee par tejpas. <sup>10</sup> Dxejc guigalbitap rebengool, suzuxhijbzareneni loj nani rbej lo yagxhilro, te ganreni nani nabajn par tejpas. Sucuaareneni xcoronreni nez loj xyagxhilroni, siniireni lojni, säjpreni:

<sup>11</sup> Dad Dios baxhuaannu, Guejbpacul riäjl xca' guiraa rebala'n, guiraa reyälruzuxhijb, guiraa reyälrnibee,

sa'csi Guejblu guläxtiej guira'ti nani yu' naj,  
yu'reni sa'csi rlajz Guejblu chureni,  
ni'cni benchee Guejblu guiraareneni.

## 5

### *Te guijtznäj te ni najc Xiil xten Dios*

<sup>1</sup> Dxejcru narä Juan bahuiä lo nani sobga' lo yagxhilroga. Naani ladbee ca'ni te libr; najcni si'c te bilii guijtzn. Caj diidx nez lojni caj diidx nez dejtzn, nadxe'ni, caj gajdz sei lojni.

<sup>2</sup> Dxejcti bahuiä lo te xangl Dios ni nadipduxh, dip guniini, najni:

—¿Chuni'c riäjl guxhal guijtznre? ¿Chuni'c riäjl gutiäjs reseire?

<sup>3</sup> Niluxh nicla tej bejn di nidxäjl ni riäjl gutiäjs reseiega te guxhalni guijtzn; nicla xhaguibaa, nicla lo guedxliujre, nicla xhajiät nez nen guedxliuj. Niclaza nidxäjl chu ni ajc nuhuii lo guijtzn. <sup>4</sup> Narä ronduxhä sa'csi nicla tej rut riäjl di gutiäjs reseiega, niclaza ni riäjl gol guijtzn, niclaza ni riäjl fiitis lo guijtzn. <sup>5</sup> Dxejcti gunii te bengool loä, najni:

—Na'cru goonlu. Bahuii gan, niguii ni rniireni Lion, xagdo toJudä, xagdo toDavid, abejjni gaan lo yälgujt ni'c naj riäjl guxhalni guijtzn, gutiäjszani guigajdz reseiega.

<sup>6</sup> Dxejc bahuiä nez cadro suga' yagxhilroga näj guidap remanga, näj cadro suga' guiraa rebengool luxh te galäiiga suga' tej ni najc Xiil xten Dios, astoo abagu'trenini. Sojb gajdz xca'chni näjza gajdz balojni, ni najc gajdz Sprit xten Dios nani ruxhalni guiraa nez lo guedxliuj. <sup>7</sup> Laani gubigni, cua'ni guijtzn, guläänini naa ladbee xten nani sobga' lo yagxhilroga canibee. <sup>8</sup> Che cua'ni guijtzn, guidap remanga näjza guigalbitap rebengool bazuxhijbreni nez loj Xiilga. Tejga rebengoolga ca' te arp, ca'zareneni taz oor guidxa te ni najc si'c yaal. Yaalga najc guiraa reyälrbeydx, yälrnab xten rexpejn Dios. <sup>9</sup> Cayolzareneni te dicoob ni najc scree:

Guejblu sacduxh,  
riäjlpac xca' Guejblu guijtzn,  
gutiäjs Guejblu reseiega, sa'csi bagu't rebejnlu,  
näjza xtiejnlu gudijx xcuent bejn lo Dios.  
Gudijxlu xcuent bejn ni najc garen-garen raz,  
ni rnii garen-garen didxsaj,  
ni siääd garen-garen guejdx lo garen-garen ladxbejn.

<sup>10</sup> Badeedlu gacreni reii näjza bixhojz lo Dios.

Laareneni sinibeereneni reben guedxliuj.

<sup>11</sup> Che bahuiä, bejn diagä xse' xhidalduxh xangl Dios ni suga' guideb gabi yagxhilro cadro rbej nani rnibee, näjza xse' guidap reman, näjza xse' guiraa rebengool. Luxh di gacdi guigab xangl Dios ni tre' ro'c sa'csi xhidalduxhtej najczeni, xhidalduxh miyon najczeni.

<sup>12</sup> Dipduxh najc xse'reni, caniireni scree:

Sacduxh Xiil nani bagu'treni,  
ni'c riäjl xca'ni yälrnibeduxh, yälrapduxh, yälmanduxh, yälmilagwr.

Riäjlza guiliä'pnu xpala'nni, guzuxhijbnu lojni ganuni, gudeednu xquixtios lojni.

<sup>13</sup> Dxejcti biejn diagä xse' guiragajcreni, guiraa reni benchee Dios ni yu' xhaguibaa, näj guiraa reni yu' loj guedxliujre, näjza guiraa reni yu' xhajiät nez nen guedxliuj näj lo nisdoo, biejn diagä caniireni scree:

Loj nani sobga' lo yagxhilo cadro rnibeeni, näjza loj ni najc Xiil xten Dios, laatisni sacduxhni, guliä' pnu xpala'nni, guzuxhijbnu nez lojni ganuni, gäbzanu rinibeeni par tejpas.

<sup>14</sup> Dxejcti guidap remanga rnigajcreni scree:

—Sugacni si'c.

Dxejcti guigalbitap rebenḡool bazuxhijbreni nez loj nani nabajn par tejpas, gojnrenini.

## 6

### *Guigajdz reseii*

<sup>1</sup> Dxejcti bahuiä loj ni najc Xiil xten Dios. Batiäjsni tej seiiga. Biejn diagä gunii tej lo guidap remanga, luxh che guniini riejn xse'ni si'c che ni canii guzii, najni loä:

—Gudaa te fiilu.

<sup>2</sup> Dxejc bahuiä lo te cabai nol. Nani bijb dejtzni ca' te arcw nani rucuaa fle'ch. Badeedreni te coron lojni. Biriini cayujnni gaan te chanuutis gunni gaan.

<sup>3</sup> Che batiäjsni ni rojp seiiga, biejn diagä gunii ni rojp manga, najni loä:

—Gudaa te fiilu.

<sup>4</sup> Dxejc bahuiä lo te cabai xniaa. Loj nani bijb cabai xniaaga badeedreni yälrnibee gudzucajni yälñadoo, yälrbexilajz, lo guedxliujre, te ju't sa' rebejn. Badeedreni te spadro cua'ni.

<sup>5</sup> Dxejcti che batiäjsni ni riojn seiiga, biejn diagä gunii ni riojn manga, najni loä:

—Gudaa te fiilu.

Dxejc bahuiä lo te cabai yas. Nani bijbni naazni te balans. <sup>6</sup> Biejn diagä astoo galäii guidap remanga, birii xse' te ni canii scree:

—Tej kil xob xca'lu gunlu dzuun tebdxej; choḡ kil salbaad xca'lu gunlu dzuun tebdxej. Niluxh na'c guhuallu bin niclaza se't.

<sup>7</sup> Dxejcti che batiäjsni ni rdap seiiga, biejn diagä gunii ni rdajp manga, najni loä:

—Gudaa te fiilu.

<sup>8</sup> Dxejc bahuiä lo te cabai gojtz. Nani bijbni laa yälḡujt, luxh dejtzni siädnaḡajc ni rnibee gabijl. Gula'ni rebejn ni re' lo guedxliujre gujcreni tajp gala', dxejc loj redee badeedreni guinibeeni lo te cuaa rebenḡuedxliuj te ju'treni rebejnḡa con spaad, näj yälrliaan, näj yälracxhuu, näjza remanduxh ni yu' dajn.

<sup>9</sup> Dxejcti che batiäjsni ni rajc gaii seiiga, bahuiä nez ni' xpiändxan Dios, ro'c naga' xaim rebejn nani bagu'treni sa'csi huililajzreni xtidx Dios, näjza sa'csi gusutijpreni basule'reni xtidx Dios. <sup>10</sup> Dipduxh caniireni, canabreni lo Dios, räjpreni:

—Dad, ni najc Dxan, ni najc guliipac. ¿Gucli cuääz, gaclaa gun Guejblu yälḡuxhtis loj reni bagu't nuure lo guedxliuj te quiixreni ni bejnreni?

<sup>11</sup> Dxejcti cua'reni te ladmöbäj gojt tejegareni. Dxejc räjpreni lojreni cuäzsjcreni, gusilajzreni, laḡ ni guiza' resa'reni ni rusule' xtidx Dios, ni churu gugu'treni sigajc bagu'treni laareni.

<sup>12</sup> Bahuiäza cheni batiäjsni ni rajc xho'p seiiga, luxh gujc te xuduxh, bigasboo loj gubijdx si'c te ladyas, sas bäii gujc guidebni si'c rejn. <sup>13</sup> Rebaḡl ni yu' xhaguibaa bitejbreni lo guedxliujre, si'c rtejb rebetz yagxhejn che rusniib te beduxh yajḡa. <sup>14</sup> Dxejcti gunitloj guibaa si'cni rnitloj te guijtz che re'ni, rajcni te bilu. Guiraa redajn näjza reyuj ni re' galäii lo nisdoo biniibreni, bidxaa xladreni. <sup>15</sup> Ni'cni guiraa reben guedxliuj, rebejn nani rnibee, näjza rebenḡo, näjza recapitän, näjza rebenḡo rapduxh, näjza rebenḡo ni nadiplajzreni, näjza remos, näjza renani rut lojdi yu'reni, guiragajcreni baxunreni, huicuatzojreni nen rebiliää nen redajn. <sup>16</sup> Dxejc räjpreni loj redajn, loj reguilaj:

—Colguitejb yejcnu, colgucua'tz nuure loj nani rbej lo yagxhilo xhaguibaa näjza loj yälḡuxhtis xten nani najc Xiil xten Dios. <sup>17</sup> Sa'csi abidzujḡ dxero xten xcälḡuxhtisni, ¿chuni'c sajc suu nez lojni?

## 7

### *Tegayuu tiubitajp miḡ rexejn Israel*

<sup>1</sup> Dxejcti bahuiä lo tajp xangl Dios ni suga' loj guidajp laad guedxliuj. Caguscuääzreni guidajp rebej xten guedxliuj te xhet bejdi guibi' lo guedxliuj nicla lo nisdoo niclaza yejcyajḡ. <sup>2</sup> Bahuiä lo stee xangl Dios, ni siääd nez cadro rliejn gubijdx, ca'ni seii xten Gueb

Dios ni nabajn par tejpas. Dipduxh guniini lo guidap xangl Dios ni rajp yälrnibee te gunreni daan lo guedxliuj, näjza lo nisdoo. <sup>3</sup> Räjpmi lojreni:

—Guläzsjctero, la! ni guicuaanu te seen lo cuaj reni najc xpejn Dios, te dxejcru sajc guntu daan lo yuj, näj loj nisdoo, näj loj reyajg.

<sup>4</sup> Dxejcti biejn diagä najreni bal bejn guyu' seenga lo cuajreni, basa'reni tegayuu tiubitajp mil bejn ni bibee loj rexpejn Israel. <sup>5</sup> Loj rexpejn Judá bibee tzubitio'p mil; loj rexpejn Rubén bibee tzubitio'p mil; loj rexpejn Gad bibee tzubitio'p mil; <sup>6</sup> loj rexpejn Aser bibee tzubitio'p mil; loj rexpejn Neftalí bibee tzubitio'p mil; loj rexpejn Manasés bibee tzubitio'p mil; <sup>7</sup> loj rexpejn Simeón bibee tzubitio'p mil; loj rexpejn Leví bibee tzubitio'p mil; loj rexpejn Isacar bibee tzubitio'p mil; <sup>8</sup> loj rexpejn Zabulón bibee tzubitio'p mil; loj rexpejn José bibee tzubitio'p mil; loj rexpejn Benjamín bibee tzubitio'p mil.

*Benguixhuj ni najcw ladnolbäj*

<sup>9</sup> Dxejcti bahuiä lo xhidalduxh bejn, benguixhuj, nicla tej bejn digacdi gulabreni. Garen-garen ladx-bejn siädreni, garen-garen najc lajdxreni, näj řaz xtenreni, näj xtiidxreni. Suga'reni nez loj yagxhilo xten ni rnibee, näjza nez lojni ni najc Xiil xten Dios. Najcwreni ladnolbäj, ca'zareni zijñ. <sup>10</sup> Dipduxh niireni, räjpmi:

Dios ni rnibee lo yagxhilo, näjza nani najc Xiilre, baslaareni nuure lo xtojlnu.

<sup>11</sup> Suga'za guiraa rexangl Dios guideb gabi yagxhilo cadro rnibeeni, näjza guideb gabi rebengool näjza guidap remanga, dxejcti bazuxhijbreni, basajbreni lojreni nez lo Dios, <sup>12</sup> räjpmi:

Sugacni si'c. Loj Xtiosnisnu colye'tz sacduxhni;

colguiliä'p xpala'nni;

laatisni rajpmi yälñajn;

lojtisni colgudeed xquixhtios, laatisni colgan,

colsuxhijb lojni; laatisni rajpmi yälrnibee näjza yälmilagwr.

Sugacni si'c par tejpas.

<sup>13</sup> Dxejcti gunii te bengool loä, najni:

—Renani najcw reladnolbäjre, řchu najcreni? řCasiädreni?

<sup>14</sup> Dxejcti räpä lojni:

—Dad, anajn Guejblu.

Dxejcti najni loä:

—Redee najc renani agudejd yälřabajwduxh, renani abia rextojlreni sa'csi xtiejn Xiil xten Dios agudijx xtojlni. <sup>15</sup> Ni'cni suga'reni nez loj yagxhilo xten Dios dxej-yäl cayujnreni xtzuumni neñ xquidooni. Ni'cni sacnäñ nani sobga' lo yagxhilroga guiraa renani suga' nez lojni, sunäjitsni laareni. <sup>16</sup> Dirureni guiliaan, niclaza jiojlni, diza gubijdx guze'c lojreni, dizareni gacnanlaa. <sup>17</sup> Sa'csi nani najc Xiil xten Dios ni sobga' galäii loj yagxhilo xten Dios, laani cayajpnireni si'c xilbäz, sinänireni cadro yu' nisya ni rüdeed yälñabajn par tejpas. Suspijdz Dios nisbee balojreni, dirureni goon par tejpas.

## 8

*Ni rajc gajdz seiiga*

<sup>1</sup> Che batiäjsni ni rajc gajdz seiiga, gucdxi xhaguibaa si'cti med or. <sup>2</sup> Dxejcti bahuiä loj guigajdz xangl Dios ni suga' nez loj Dios. Lojreni badeedreni gajdz trompe't. <sup>3</sup> Dxejctiru biäd stee tee angl, ca'ni te bacue ni najc ganax oor, bazujnini nez loj piändxan. Badeedreni lojni naclejñ yaal te cachaagnini loj guiraa rextidx xpejn Dios ni rniiireni che řbedx-rniabreni lo Dios, te checni lo piändxan ni najc ganax oor, ni yu' nez loj yagxhilroga. <sup>4</sup> Dxejcti gujxhga nägajc rextidx rexpejn Dios, birii ladsnaa xangl Dios ni ca' bacue, huä'preni nez loj Dios. <sup>5</sup> Dxejcti lagajc anglga cua'ni guiboo ni dzuub lo piändxanga, bachajni bacue, dxejcti baslojnini lo guedxliuj. Dxejcti guyu' te guziduxh, bidinyaduxh, gujca te xuduxh.

*Retrompe't*

<sup>6</sup> Dxejcti guigajdz rexangl Dios ni ca' guigajdz retrompe't, guzusinreni te guisloj gojreni retrompe'tga.

<sup>7</sup> Che biñ trompetganid, guixob näj guiboo nu'chreni rejn gusloj cayajbreni loj guedxliuj. Dxejcti huejc ni riojn la' guedxliuj, huejca ni riojn la' reyajg näjza guiralii recuaan.

<sup>8</sup> Che biñ ni řojp xangl Dios trompe't ni ca'ni, ascanu yu' chu bacuaani biajb si'c te danro ni cayejc loj nisdoo. Dxejcti gujc ni riojn la' nisdoo si'c rejn. <sup>9</sup> Dxejcti gujt ni riojn la' rebäjñ näj guiraa reman ni yu' loj nisdoo. Gunitlojca ni riojn la' rebarcw ni sazaj lo nisdoo.

<sup>10</sup> Che biñ ni riojn xangl Dios trompe't ni ca'ni, biajb te balro xhaguibaa, cayejcni si'c te balguedj. Bitejbni loj ni riojn la' regueuu, näjza cadro rliejn nis. <sup>11</sup> Laj bajlga najc Ajenjo,

ni säloj te cos ni nañladuxh. Ni riojn la' nis gujc nis nañladuxh. Dxejcti gujt xhidalduxh bejn xcuent nisnañlaaga.

<sup>12</sup> Che bil ni rdajp xangl Dios trompe't ni ca'ni, guxhijn ni riojn la' gubijdx, nájza ni riojn la' báii, nájza ni riojn la' rebal xhaguibaa, bicäjäyreni. Dxejcti dirureni guzanij ni riojn la' dxej, náj ni riojn la' yääl.

<sup>13</sup> Dxejcti bahuiä xhaguibaa, biejn diagä si'c te bisij cagutajt nez galäii xhaguibaa. Biejn diagä cabedxa'ni, caniini rediidxre:

— ¡Aii! ¡Aii! ¡Aii! Riaduxhä reben guedxliuj che guisloj goļ schoņ rexangl Dios retrompe't ni ca'reni. Sidejd reben guedxliuj trabajwduxhru.

## 9

<sup>1</sup> Che bil ni rgaii xangl Dios trompe't, bahuiä lo te bal xhaguibaa ni bitejb lo guedxliujli. Bajl xhaguibaaga cua'ni läii ni ruxhal ro' gabijl. <sup>2</sup> Baxhaltini ro' gabijl, dxejcti huäjs te gujxh ro'ni si'c räjs gujxh ro' te orguiboro. Dxejcti gujxhga basäuni loj gubijdx, gudxajni lo bej. <sup>3</sup> Dxejcti lo gujxhga birii betzsu gusujreni guideb lo guedxliuj. Cua'reni yälrmibee gacreni nialajz si'c nialajz renaxejb. <sup>4</sup> Cua' remanga yälrmibee na'c gunreni daan loj reguixa', loj recuaan, loj reyagbajñ; rebejntis nani xhet beedi xten Dios caj lo cuajreni, reni'c gusacsireni. <sup>5</sup> Cua'reni yälrmibee na'c ju'tni bejn, gaii bäii gusacsireni xcälñayanreni bejn. Luxh xcälñayanreni najc si'c yälñayan cadro rauya' te naxejb te bejn. <sup>6</sup> Neñ redxejga, siguiil rebejn yälgujt, luxh direni guidxälni. Luxh mase rlazreni guetreni, sibicaj yälgujt lojreni.

<sup>7</sup> Rebetzsure najc si'c recabaii ni suchee te chääreni lo guer. Yejcreni yu' te ni najc si'c te coron oor; luxh lojreni rujñ si'c loj rebejn. <sup>8</sup> Xquichejcreni si'c najc xquichejc gunaa; reläjäyreni najc si'c läjy lion. <sup>9</sup> Luxh guideb tiejxhreni caj si'c guib ni rusäudzu'tzreni. Rubeduxh rexhigaareni, si'c rubej che ruxuñ xhidalduxh cabaii náj xca'reni che agoj chääreni guer. <sup>10</sup> Xhibaanreni najc si'c xhibaan naxejb, xcuchreni yu' yälñayan te gusacsireni reben guedxliuj gaii bäii. <sup>11</sup> Yu'za ni rnibee lojreni, xangl bendxab ni birii gabijl. Xtidx hebreo laani Abadón, xtidx griegw, laani Apolión.

<sup>12</sup> Naj agudejd tej casionroga, naj cayädx stio'pni.

<sup>13</sup> Che bil ni rxho'p xangl Dios trompe't, biejn diagä te xse' bejn ni lascanu siäädni galäii guidajp reca'ch ni caj loj xpäändxan ni nac-chee ganax oor, ni yu' nez loj Dios. <sup>14</sup> Luxh xse' bejnğa canii loj ni najc rxho'p xangl Diosga, ni ca' trompe't:

— Baslaa guidap reangl nani caduu nez rogueeu ni laa Eufrates.

<sup>15</sup> Dxejcti baslaani guidap reanglga te ju'treni ni riojn la' beñ guedxliuj. Luxh gule Dios reanglga parpac dxejga, bäiiga, ijzga. <sup>16</sup> Biejn diagä bal najc guiraa resoldaad ni rbijb cabaii: najceni tio'p gayuu miyon.

<sup>17</sup> Scree bahuiä lo bacad recabaiiga nájza renani bijb recabaiiga. Lastoo reni bijb recabaii caj te guib, najcni xnäa náj zul náj gojtz. Dxejcru yej recabaiiga najc si'c yej te beedz. Ro'reni carii bajl náj gujxh, náj sufr. <sup>18</sup> Ni riojn cuaa bejn gujt xcuent guichon replaag nani carii ro' recabaii, xcuent bajl náj gujxh, nájza sufr. <sup>19</sup> Recabaii runnáj daan ro'reni nájza xhibaanreni, sa'csi xhibaanreni najc si'c bäl, yu' yejcreni, náj ni'c runnäjäreni daan.

<sup>20</sup> Luxh guiraa rebejn nani di replaagre nugu't, direni nusiejch lajzreni xcuent ni cayujñ ñaareni, te rajñreni rebenxab, nájza rebanäjb ni nac-chee oor, nájza pla't, nájza latón, nájza guj, nájza yajg. Luxh rebanäjbga di gacdi fiireni, di diajgreni jiejn, di gacdi saren. <sup>21</sup> Diza rebejnğa nusiejch lajzreni xcuent xcäl'rugu'treni, xcäl'rujnreni yälbidxaa, xcäl'resnäjäreni bejn ni di gac chäälni, ni claza xcäl'gubaanreni.

## 10

### *Te angl ni ca' te guiitz*

<sup>1</sup> Bahuiä stee xangl Dios ni rajp yälrmibeduxh, siädjiäjtñi xhaguibaa, li yu'ni neñ báj, yejcnj dejd xquitgubijdx, luxh lojni najc si'c gubijdx. Reni'ni najc si'c tio'p pilajr bajl. <sup>2</sup> Ca'ni te librbäze', naxhal libre'ga. Bazujni ni'ni ladbee loj nisdoo, bazujni ni'ni ladbäjägw lo yuj, <sup>3</sup> dxejcti guredxaduxh anglga si'c rbedxa' beedz. Dxejcru gunii guigajdz guzii sigajcsa. <sup>4</sup> Che gulujx gunii guziiga, narä rlazä nucuaä lo guiitz nani guniireni, per biejn diagä xse' tej ni gunii xhaguibaali, najni loä:

— Guluchedzu'tz rediidxga nani gunii reguzii, na'c gucuaaluni.

<sup>5</sup> Angl nani suj ni'ni loj nisdoo nájza loj yuj, guläs ñaani ladbee nez xhaguibaa. <sup>6</sup> Guniliini diidx con laj GuebDios ni nabajñ par tejpas, ni guläxtiej xhaguibaa nájza guiraa ni tre' xhaguibaa; ni guläxtiej guedxliujre nájza guiraa ni tre' lojni; ni guläxtiej nisdoo nájza guiraa ni tre' neñ nisdoo. Räjñni:

—Diru redxejre gaclaa. <sup>7</sup> Che guidzujntis dxej ni agojl goł ni najc rgajdz xangl Dios ni ca' trompe't, dxejc abaza' rextidxxhiga'tz Dios, si'c ni basule' redade' ni gunii xtidx Dios agujc xchero.

<sup>8</sup> Dxejc gunisac xse' nani gunii xhaguibaali, stehuält biejn diagä caniini loä, najni:

—Huij, te xca'lu libre' ni naxhal ni yu' ladzŋaa angl ni suj te laad ni'ni loj nisdoö, stelaad ni'ni lo guedxliuj.

<sup>9</sup> Dxejcti hua'ä lo anglga, räpä lojni:

—Guniidxlu libre'ga.

Laani najni loä:

—Anire, cua'ni, gudajwni. Sun nanlaani xque'lu, niluxh ro'lu sajcnj nejh si'c dzujn.

<sup>10</sup> Dxejcti cua'ä libre'ga lo ŋaa anglga, dxejc gudauäni. Ro'ä guyu'ni nejh si'c dzujn, luxh che gudämäni, lacti guc nanlaani xque'ä. <sup>11</sup> Dxejc najni loä:

—Nanab chasulesaclu xtidx Dios xcuent nani churu gac loj xhidalduxh bejn, näjza guejdx, näjza renani rnii garen-garen xtiidxreni, näjza loj rereii.

## 11

### *Tio'p niguii ni rusule' xtidx Dios*

<sup>1</sup> Dxejcti baniidxni loä si'c te biquii nani rurejxh. Dxejc guyu' chu naj loä:

—Huisu te charejxhlu xquidoo Dios, näjza piändxn, balabza balti bejn rusuxhijb nenga.

<sup>2</sup> Na'c tiuetxhlu gabi lole' guidooga, sa'csi ni'c acua' rebenzizjtni te tiubitio'p bäii chaläjsreni guedxdxn si'ctis ni rlanjreni. <sup>3</sup> Narä sudedä yälrnibee lo tio'p dade' ni guinii diidx xcuentä, luxh guideb najcwreni ladyas, susule'reni xtidxä lojreni te mił tio'p gayuy loj gayojn dxej.

<sup>4</sup> Guiro'preni najc si'c tio'p yag oliib, si'c tio'p gandilieer ni suga' nez lo Dios. <sup>5</sup> Palga yu' chu bejn rlanj gun latsiaj loj redade'ga, sirii bajl ro'reni te chec nani rdxe'ch lojreni. Luxh si'cpac riäjł guet chutis ni rlanj gun latsiajreni. <sup>6</sup> Guiro'p redade'ga rajp yälrnibee te gusaüreni xhaguibaa te na'c jiajb nisguij guideb neñ redxej nani cagusule'reni xtidx Dios, rajpzareni yälrnibee te guchaareni nis te gacni rejn, rajpzareni yälrnibee te jiadgusacsı xhitis plaag lo guedxliuj, si'ctis huält ni rlanjreni. <sup>7</sup> Che luux gusule'reni xtidx Dios, dxejcti ni najc si'c te man nialajz sirii gabijł te jiadchagdijłni guiro'preni. Sujnni gaanreni, sugu'tnirenı. <sup>8</sup> Dxejcti jia'n guiro'p rebenğutga lad caii xten guejdx cadro bacuaareni Dad Jesucrist lo crujz. Guejdxroga rbälajzareni Sodoma näjza Egipto. <sup>9</sup> Choñ dxej garol guiraa rebejn ni siäd guedxbäz, ni siäd guedxro, ni najc garen-garen raz, ni rnii garen-garen xtidx guiraa rebejn guedxliuj, suhuii loj guiro'p rebenğutga, direni gusaan guiga'tzreni neñ baa. <sup>10</sup> Guiraa renani nabajñ lo guedxliujre sibalazduxhreni sa'csi gujtreni. Luxh sa'csi rbalajzduxhreni, suxhalzareni xhi xca' sa'reni; sa'csi guiro'p redade' ni basule' xtidx Dios baxhal trabajwduxh lojreni. <sup>11</sup> Che gudejd choñ dxej garolga, baspañsac Diosreni, dxejcti huitiesacreni. Guiraa reni bahuii lojreni, bidxebduxhreni. <sup>12</sup> Dxejcti biejn diajg guiro'preni xse' te ni canii dipduxh desde xhaguibaali, räjpni lojreni:

—Colchä'p jiaare.

Dxejcti huä'preni xhaguibaa lo te za, luxh guiraa renani rdxe'ch lojreni, bahuiireni huä'preni xhaguibaa. <sup>13</sup> Lagajc orga gujc te xuduxh, gurebän te j lo tzuu la' guejdxga, gujt gajdz mił bejn lo xu ni gujc ro'c. Rebejn ni bia'n ro'c bidxebduxhreni, guslojreni calä'preni xpala'n Dios ni yu' xhaguibaa.

<sup>14</sup> Si'cti gulujx ni rojp casioon, luxh agojl guidzujn ni riojnga.

### *Ni rajc gajdz xangl Dios goł trompe't*

<sup>15</sup> Che bił ni rajc gajdz xangl Dios trompe't ni ca'ni, dxejc biejn xse' reni dipduxh canii xhaguibaa, cayäjpreni:

Xcälrnibee guedxliuj agudejd ladzŋaa Dad Dios näjza Jesucrist; luxh laani sinibeeni par tejpas.

<sup>16</sup> Galbitajp rebenğool nani sobga' lo tron xtenreni cadro rnibee Dios, biabrløjreni nez loj Dios te calä'preni xpala'n Dios. <sup>17</sup> Räjpreni:

Xquixtioste Guejblu Dios, nani rajp yälrnibeduxh, nani najclu, nani gujclu, nani churu gac, sa'csi acua'lu xcälrnibeduxhlu te agusloj canibeelu.

<sup>18</sup> Bidxe'ch rebenğ guedxliuj lojlu,

luxh abidzujn dxej guidxe'chlu lojreni,

gunlu yälğuxhtis rebenğut, te gudeedlu cossa'c loj rexpejñlu,

lo renani gunii xtidx Dios, lo renani huililajz xtiidxlu, lo renani rusuxhijbni nez lojlu;

rebenğroob sigajc rebenğro.

Abidzujnza dxej che cuäcajlu renani bejn daan guedxliujre,

te nitlojreni par tejpas.

<sup>19</sup> Dxejc bixal xquidoo Dios ni yu' xhaguibaa, nen guidooga bien te guijn cadro yu' guij cadro caj rediidx ni bia'n Dios loj rexpejn Israel. Dxejcti lacti bidinya', lacti guiniiza reguziro, gujc te xu, dxejc biajb te guixobroduxh.

## 12

### *Te gunaa naj te ni najc si'c te gutiatzro*

<sup>1</sup> Dxejcti guyu' te senro xhaguibaa: te gunaa ni najcw si'c gubijdx, ni'ni sojb baai, yejcti yu' te coron ni nac-chee tzubito'p balxhaguibaa. <sup>2</sup> Gunaare nuxi'nni. Rbedxa'ni sa'csi agusloj cayu' yoob xque'ni te gaal xi'nni, cadejdni trabajwduxh. <sup>3</sup> Dxejcti bahuiä stee seen xhaguibaa: te manxnaa ni rujn lojni si'c loj te gutiatzro, manduxhni. Yu' gajdz bitiuvejcti, sojb tzuu xca'chni. Tejga yejcti yu' te coron, najceni gajdz coron. <sup>4</sup> Dxejcti xhibaanni cagobxajxhni ni riojn la' rebalxhaguibaa, dxejcti bacuaanireni lo guedxliuj. Dxejcti biädsu manroga nez loj gunaaga ni ameer gaal xi'nni, te gauni xi'nni che gaalni. <sup>5</sup> Dxejcti gojl xi'n gunaaga, najcni te nigui, luxh te bar guiib nungäjł guinibenäni lo guiraa reben guedxliuj. Guläsgajceni bäzga te sanärenini xhaguibaa cadro rnibee Dios. <sup>6</sup> Dxejcti baxuñ gunaaga, siini nez loj reyubijdz cadro yu' te lajt ni basuchee Dios te cuääzni, te ro'c guyaannini te ml tio'p gayuu gayojn dxej.

<sup>7</sup> Dxejc guyu' guer xhaguibaa, xangl Dios nani laa Miguejl naj resa'ni bacuanäjreni gutiatzro. Gutiatzroga najza rexangni gudilduxhni, <sup>8</sup> niluxh direni niujn gaan, luxh di najcdiru nia'n manga najza resa'ni xhaguibaa. <sup>9</sup> Dxejcti bacuaareni manroga najza resa'ni lo guedxliujre. Laani najc ni gujc bäl galoroga, ni najc gueb bendxab, ni laaza Satanás, ni rusguee guideb guedxliujre.

<sup>10</sup> Dxejcti biejn diägä xse' te ni canii dipduxh xhaguibaali, räjpni:

—Abidzuñ yälruslaa lo dojl, naj yälmilagwr, naj yälrnibero xten Dios, najza yälrnibee xten Jesucrist, sa'csi agulääreni bejn nani entis rbe'c xquej rexpejn Dios loj Dios dxej-yääl.

<sup>11</sup> Laareni gujc bejnreni gaan loj bendxabre, xcuent xtiejn ni najc Xiil xten Dios, najza sa'csi huililazsa'ceni xtidx Dios, dizareni nidxejb mase nejtzareni. <sup>12</sup> Ni'cni, guiraa la'tu ni yu' xhaguibaa najza gueb xhaguibaa, colquibalazduxh. Niluxh riaduxhnu renani rbäjz lo guedxliujre, najza lo nisdoo, sa'csi abiäjt bendxab lo guedxliuj, luxh cadxcheduxhni sa'csi anajnni guxii dxej räjpni.

<sup>13</sup> Che gucbee gutiatzroga abacuaarenini lo guedxliuj, birinajlni gunaa nani guyu' xi'ngaanni te gusacsini. <sup>14</sup> Dxejc badeed Dios lo gunaaga tio'p xhiga xten bisiro, te gac gutajtne nez lo reyubijdz cadro nac-chee cadro cuääzni. Chon ijz garol guyu'ni ro'c, nacuatzlojni lo bälga. <sup>15</sup> Dxejcti ro' gutiatzrore birii nis si'c te gueuu te nuslo'ni gunaaga. <sup>16</sup> Dxejc gucnäj guedxliuj gunaaga, baxhal guedxliuj ro'ni, gu'ni gueuu ni birii ro' gutiatzroga. <sup>17</sup> Dxejc bidxcheduxh gutiatzroga loj gunaaga, ni'c säani te gucuanäni sgaii rexi'n gunaaga, renani cagusoob diidx ni gunibee Dios, renani rililajza xtidx Jesucrist.

## 13

### *Tio'p manduxh*

<sup>1</sup> Narä gusuä lo yujxh ni tre' ro' nisdoo, dxejc bahuiä carii te manro lo nisdoo. Sojb tzuu xca'chni. Dxejc lo tejga xca'chni yu' te coron. Yu' gajdz bitiuvejcti cadro caj diidx ni rniyaj Dios. <sup>2</sup> Manduxhre najc si'c te beedz, ni'ni najc si'c ni' te os, luxh ro'ni najc si'c ro' te bedzro. Gutiatzroga badeed xcälmlaagwrni lojni, najza tron cadro rbejni, najza xcälrnibeduxhni. <sup>3</sup> Dxejcti bahuiä te yejcti najc ascanu yu' chu batiuigni con madxed, ameer guetni, luxh biajc cadro guruj yejcti. Ni'cni rdxeloduxh guiralii rebejn guedxliuj, sanajlreni manduxhga. <sup>4</sup> Bazuxhijbreni gojnreni gutiatzroga sa'csi badeedni xcälrnibeeni lo manduxhga, dxejctiru bazuxhijbreni gojnzareni manroga, räjpreni:

—¿Chu stee najc si'c manrore, ä? ¿Chu laa ni gac guichagdijłni, gucuanäjni?

<sup>5</sup> Yu' chu badeedza lo manroga diidx dxejcti gosloj caniini guraloj didx-guyalajz, diidx ni rniyaj Dios. Yu'za chu badeed ga'pni yälrnibee tiubito'p baai, gunni si'ctis ni rlanjni. <sup>6</sup> Baxhalni ro'ni, guniyaduxhni Dios, guniyajni laj Dios, najza xquidoo Dios, nalajznu renani yu' xhaguibaa. <sup>7</sup> Dxejcti yu' chu basaan bacuanäj manroga rexpejn Dios. Bejn manroga gaan rexpejn Dios, dxejcti gunibee manroga guiraa reguedxbäz, naj guiraa rebejn ni rnii garen-garen xtidxreni, najza guiraa reguedxroduxh. <sup>8</sup> Dxejcti guiraa reben guedxliuj sazuxhijbreni, sagajreni manroga, guiraa rebejn nani di lajreni nicaj lo libr xten yäl'nabajn xten Xiil nani gujt xcuentreni, sa'csi galooli guirixtiej guedxliuj cuaj lo guijtze laj guiraa ni gac xpejn Dios.

<sup>9</sup> Palga yu' chu rlanj cuadiajni, sugucudiagsa'cni. <sup>10</sup> Palga yu' chu nungäjł jäuu nen latzguiib, säuupacni. Chutis ni ju't te bejn con te madxed, con madxedza guetni. Ni'cni renani anumbee Dios, riäjł gunreni huant, chanuutis chalilazsa'ceni xtidx Dios.

<sup>11</sup> Dxejcti bahuiä loj stee manro, cariini nen yuj. Sojb tio'p xca'chni si'c xca'ch te xiil, rniini si'c rniit te gutiatz. <sup>12</sup> Luxh rnibeezani si'cni rnibee manroga lagajc nez loj manroga, rujnzani rusuxhijb reben guedxliuj loj manrogalooga ni gurujc yejcti, luxh biajc yejcti. <sup>13</sup> Manroga ni birii nen yuj rujnzani remilagwrro, rujnni rtejb bal-guiboo xhaguibaali, rtejbni lo guedxliuj nez loj rebejn. <sup>14</sup> Rusgueeni rebejn nani nabajn lo guedxliuj xcuent remilagwrro nani rujnni nez loj manrogalooga. Guinibeeni gun reben guedxliuj te banäjb si'c najc manroga nani batiuug madxed yejcti, luxh biajca yejcti. <sup>15</sup> Dxejcti man ni rojppa baspajn banäjbga te guinii banäjbga, dxejcti gunibeeni guet guiraa rebejn nani di guzuxhijb lojni te ganrenini. <sup>16</sup> Gunibeezani chu bejn te seen lo cuajni o naani ladbee, guiraa rebejn ni xhet rajpdi, guiraa rebejn ni rajp, guiraa reni najc mos, guiraa reni najc lam, guiraa reni najc bebro, guiraa reni najca benbäz. <sup>17</sup> Gunibeezani digacdi sii, digacdiza guto bejn palga xhet seendi caj naani o lo cuajni. Seenga najc laj manga o numbr xten laj manga. <sup>18</sup> Dee rquini yäl'najn. Renani rajp yäl'najn sugulabreni xseen manga, numbrga najc si'c xnumbr bejn; numbr xten manga najc xho'p gayuu gayonbixho'p.

## 14

### *Dij ni rol te gayuu tiubitajp mil*

<sup>1</sup> Che bahuiä stee, bahuiä suga' Xiil xten Dios yejc dajn ni laa Siön. Sugañjni te gayuu tiubitajp mil bejn nani caj lo cuajreni laj Xiil näj laj Xtdani. <sup>2</sup> Biejn diagä rubej xhaguibaali, rubeduxh, riejnni si'c rubej xhidajl gueuro, näj te guziro; riejnzani si'cni riejn che cayol xhidajl bejn ni rol arp. <sup>3</sup> Cayolreni te dicoob nez loj tron cadro rbej nani rnibee, näjza nez loj guidap reni najc si'c man ni nabajnpac, näjza nez loj rebengool. Rutliidi gujc bisieeddi dijga, xtebtis tegayuu tiubitajp mil bejn nani gulaa lo reben guedxliuj. <sup>4</sup> Reniguiire najc renani gajd xhin con gunaa; nicla tejreni di niesnäj te gunaa, najczeni bej dxan. Laareni rinajlreni Xiil xten Dios cadrotis sääni. Redee gulaa lo reben guedxliuj si'c te gojn lo Dios näjza lo Xiil xten Dios. Gojnre najc si'c gonganid ni rudeed bejn xten te cose'ch. <sup>5</sup> Nicla tej didx-xhii di guirii ro'reni, sa'csi xhetliidi xtojlneni, nayareni suga'reni nez loj tron cadro rnibee Dios.

### *Rediidx nani bazule' jion rexangl Dios*

<sup>6</sup> Dxejcti bahuiä loj stee xangl Dios, rutajtni nez galäii xhaguibaa, siädnäni diidx ni najc par tejpas xten Dios te gusule'nini loj reben guedxliuj, guiraa lo reguedxro, guiraa lo reguedxbäz, loj reben ni najc garen-garen raz, nani rniit garen-garen xtiidreni. <sup>7</sup> Dipduxh guniini, räjpni:

—Colguidxjeb Dios, colguiliä'p xpala'n Dios sa'csi abidzujn or gunni yäl'guxhtis guiraa rebejn. Colguzuxhijb loj nani benchee xhaguibaa, näjza guedxliuj, näjza nisdoo, näjza cadro rliejn nis.

<sup>8</sup> Dxejcti siädnajl stee angl nani canii:

—Abiajb, abiajb guejdxroga nani laa Babilonia, sa'csi baquili ni guzojz guiraa reguejdx xten guedxliuj xcuent xcäl-latsiajni, xcuent dojl ni bejnni guideb lagaa; najcni si'c reni rä' nej.

<sup>9</sup> Dxejc biädnajl ni riojn xangl Dios, dipduxh guniini, Räjpni:

—Palga yu' chu bejn guzuxhijb loj manroga o loj banäjb ni najc si'c manroga, o xcäjbni xca'ni xseen manro lo cuajni o lo naani, <sup>10</sup> sidxechduxh Dios lojni, di xcäl'guxhtisduxh Dios tedcaj lojni. Sidejdpacni trabajwduxh nen balro näjza azufr nez loj rexangl Dios näjza nez loj Xiil xten Dios. <sup>11</sup> Luxh gujx xten reni cayejc sä'p nez lojreni guixe-guixee par tejpas. Digacdi gusilajzreni dxej-yääl, renani guzuxhijb, reni gojn manroga näjza reni gojn banäjb ni najc si'c manroga, chutisza ni rca' seen xten lajni. <sup>12</sup> Ni'cni renani huililajz xtidx Dios, reni rusoozbaz xtidx Dios, ni rinuutis lo xnezyuj Jesucrist, nanab di guidxajgreni.

<sup>13</sup> Biejn diagä xse' te ni caniini loä xhaguibaali:

—Scree bacuaa: “Chicbaa rebejn ni guet najli nani rililajz xtidx Jesucrist.” “Gulini”, naj Sprit Djan xten Dios: “Te gusilajzreni, na' cru gunreni dzuun, sa'csi anancheenu xhi dzuun bejnreni.”

### *Yäl'nasa'c ni rudeed guedxliujre*

<sup>14</sup> Dxejcti bahuiä tre' te bänol, loj bänolga sobga' te ni najc si'c Xi'n Dios ni gujc Niguii. Yu' te coron ganaxduj oor yejcti, dxejcti naani ca'ni te guiboz ni caduxh ro'ni. <sup>15</sup> Dxejcti birii te xangl Dios loj xquidoo Dios, dipduxh canini loj ni sobga' loj häjga, räjpni:

—Basäl' xquibozlu, batiuug, te batie' yäl'nasa'c, sa'csi agojl or guire' yäl'nasa'c, guideb guedxliuj aguyajlni.

<sup>16</sup> Dxejcti nani sobga' lo häjga basniilbni xquibozni, batiuugni yäl'nasa'c ni caj lo guedxliujre.



<sup>17</sup> Dxejcti stee xangl Dios birii neñ guidoo ni yu' xhaguibaa, ca'zani te guiboz ni caduxh ro'ni. <sup>18</sup> Dxejcti birii stee xangl Dios nez loj piändxan xten Dios. Laani rajpni yälrmibee lo balro. Dipduxh guniini, räjpni loj ni ca' guiboz ni caduxh ro'ni, räjpni:

—Basäl xquibozlu nez ni' reyaguub, batiuug guiraa resesim uub ni yu' lo guedxliujre, sa'csi aguyajlreni.

<sup>19</sup> Dxejcti batiuug anglga guiraa resesim uub ni yu' lo guedxliujre nalajznu rebenguidx, basälnireni neñ tanc cadro guläjreni yejcti sa'csi rdexchduxh Dios lojreni. <sup>20</sup> Dxejcti baläjreni yejcti reuub nez orii te guejdx. Biriiduxh rejn yejcteni, gutiäs rejnga, bidzujñ rejnga ro'li recabaii, gujcti si'c che riu' nisro gueuu, biäjtni si'cti chon gayuu mil metr guideb gabi cadro baläjreni yejcti reuub.

## 15

### *Guigajdz xangl Dios näj lult xcälguxhtis Dios*

<sup>1</sup> Dxejcti bahuiä stee senro xhaguibaa, nani bascheloduxh narä. Bahuiä loj gajdz xangl Dios, tejjareni ca' te plaag ni gusacsi reben guedxliuj. Redeetis najc lult, sa'csi che ted redee ati agulujx yälrdxe'ch xten Dios.

<sup>2</sup> Dxejcti bahuiä loj tej ni najc si'c te nisdoo ni najc si'c biidr nu'chni bajl. Dxejcti galäii nidooga suga' renani bejn gaan loj manroga näjza lo banäjb ni najc si'c manroga, ni bejnza gaan di nica'reni seen xten lajni. Ca'reni arp xten Dios. <sup>3</sup> Cayolreni dij xten toMoisés ni gujcti xpejn Dios, cayolzaren di xten Xiil xten Dios. Scree najc dijga:

Sacduxh, ruscheloz guiraa redzuun ni rujn Guejblu, Dad Dios, ni rajp guiraa yälrmibee.

Rujn Guejblu ganax dzunsa'c, rnii Guejblu ganax didxlii.

Guejblu rmbiee loj guiralii reguejdx ni yu' lo guedxliuj.

<sup>4</sup> Bahuii, Dad, zchu laa ni di guidxiejb Guejblu ni di guiliä'p xpala'n Guejblu?

Sa'csi Guejbtislu najc dxan, ni'cni guiraa reguejdx ni yu' guedxliuj siädzuxhijbreni,

siädgajñreni Guejblu,

sa'csi abaluiloz guiraa rextzunsa'cpac Guejblu.

<sup>5</sup> Dxejcti bahuiä xhaguibaa, bixal ro' yu' ni najc dxanro neñ guidoo, cadro yuchee guij cadro caj xleii toMoisés. <sup>6</sup> Ro' yudxanroga birii gajdz xangl Dios ni ca' plaag te gusacsi'reni reben guedxliuj. Najcwreni te ladlin ni najc nolbäj, ni rdimbichaduxh. Dejd si'c te cinturon lastooreni ni najc ganaxduj oor. <sup>7</sup> Dxejcti yu' tajp reni najc si'c man nabajn ni yu' nez loj Dios xhaguibaa. Tej reni badeed loj tejsa reangla te co'p ni najc ganaxduj oor. Guidxa tejsa rexhijga xcälguxhtisro Dios nani nabajn par tejsa. <sup>8</sup> Gudxaj guidoo ni najc yudxanroruga gujxh ni siädä xcento xcälmilaagwr, xcälrdimbichaduxh xten Dios. Rut gujcti biu' neñ yudxanroruga che gulujxli guiraa replaag ni ca' guigajdz reangla.

## 16

### *Rexhijg ni guidxa xcälguxhtis Dios*

<sup>1</sup> Dxejcti biejn diagä xse' te ni canii dipduxh xquidoolini, caniiini loj guigajdz rexangl Dios, räjpni:

—Colchäj, colchasloj guigajdz rexhijga lo guedxliuj, colca' rexhijg ni guidxa xcälguxhtis Dios.

<sup>2</sup> Anglalo ni huij, baslojni ni yu' neñ xhijg ni ca'ni lo guedxliuj. Dxejcti loj guiraa rebejn nani caj xseen manduxh, reni rusuxhijb, rajñreni banäjb ni najc si'c manroga, birii tiejxhni te guedxyanduxh ni najc si'c cancer.

<sup>3</sup> Dxejcti ni rojp anglga baslojni ni yu' neñ xhijg ni ca'ni loj nisdoo, te bejnni gubixhloj nidooga gujcti si'c rejn xten te bengut. Dxejcti gujt guiralii reman ni yu' lo nisdoo.

<sup>4</sup> Ni riojn anglga baslojni ni yu' neñ xhijg ni ca'ni loj regueuu näjza cadro rliejn nis. Gubixhlojreni gujcteni rejn. <sup>5</sup> Dxejcti biejn diagä gunii angl ni rajp yälrmibee lo nis räjpni:

—Huenduxh najc Guejblu Dad ni najc naj sigajc gujcti Guejblu galoo, dxanduxh najc Guejblu sa'csi cayujñ Guejblu yälguxhtis redzunguidx. <sup>6</sup> Sa'csi laareni baxhe'reni rejn, bagu'treni rexpejnlu näjza renani gunii xtiidxlu, luxh naj badeed Guejblu rejn cayä'reni. Si'cpac nungäjñ gacreni.

<sup>7</sup> Dxejcti biejn diagä canii steeni lagajc lo piändxan, räjpni:

—Guliipacni Dad Dios ni rajp guiralii yälrmibee, xcälguxhtis Guejblu najc laaca, si'c riäjñ gacni.

<sup>8</sup> Dxejcti ni rdajp anglga cua' xhijg ni ca'ni, baslojni ni yu' neñ xhijgga lo gubijdx, te badeedni lo gubijdx yälrmibee guze'cnäjni rebejn guiboo. <sup>9</sup> Guiralii'reni gusloj cayejcteni, lacti nanladuxh, dxejcti gusloj caniyajreni Dios ni rajp yälrmibee loj recosga. Niluxh direni nusiechlajzreni, niclaza niliä'preni xpala'n Dios.

<sup>10</sup> Dxejcti ni rajc rgaii anglga cua' xhijg ni ca'ni baslojni ni yu' neñ xhijgga lo tron cadro rnibee manroduxh. Bicäy guideb cadro rnibee manduxhga, luxh rebejn rauya'tisreni lujdxreni sa'csi cayajczeni yälñayanduxh. <sup>11</sup> Guniyajreni Guejb Dios ni yu' xhaguibaa sa'csi rajczeni yälñayanduxh, xcuentza rexquedxnayanreni. Luxh direni nusiechljazreni xcuent xtojlreni.

<sup>12</sup> Dxejcti ni rajc xho'p anglga cua'ni xhijgni, baslojni ni yu' neñ xhijgga loj gueuro ni laa Eufrates. Gueuga gubidzlii nisni te guc-chee te nezuyuj xten rereii ni jääd nez cadro rliejn gubijdx.

<sup>13</sup> Bahuiäza birii ro' gutiatzro, näjza ro' manro, näjza ro' ni najc profe't ni rusguee, birii chon spritgijdx ni najc si'c bedz, <sup>14</sup> sa'csi najczeni resprit xten bendxab, rujnreni milagwr, senro. Rijreni loj guiraa rereii loj guedxliuj te gutie'reni guiraa bejn loj guedxliuj te gac guerroduxh, te gucuanäjreni Gueb Dios ni rajp guiralii yälñrnibee che guidzujñni lo guedxliuj, <sup>15</sup> "Narä siädxhiga'tzä si'c riääd te gubaan. Chicbaaza renani cabäz, cagutie'chreni bacal lojni che guibi'ä si'c rujn nani najcw guiraa xhajnbi, te na'c guiga'ni xhabäälni, jianxtujyni che guibi'ä." <sup>16</sup> Dxejc gutie'reni guiraa rebejnre te lajt ni laa lo didx hebre "Armagedón".

<sup>17</sup> Dxejcti ni najc rgajdz anglga cua'ni xhijgni baslojni ni yu' neñ xhijgni loj bej. Dxejcti biejn xse' te ni gunii dipduxh xquidooli Dios xhaguibaali cadro yu' tron cadro rnibee Dios, räjpni:

—Agujcni, agulujxhni.

<sup>18</sup> Dxejc guyuduxh yälrdinya' näj guziro. Gujczä te xuroduxh lo guedxliuj, te xu sa' ni gajdpac gac. <sup>19</sup> Che gujc xuroga, biräjs guedxroduxhga, gujcn chon la', dxejcti gurebä'n guiraa reguejdx guideb guedxliujre. Dxejc banaj lajz Dios guedxro ni laa Babilonia, bialoj bejn Dios yälñuxhtis guedxga. <sup>20</sup> Li gubicaj, gunitloj reyuj ni tre' lo nisdoo, gunitlojza redajn. <sup>21</sup> Xhaguibaali biajb te guixhobro yejc rebejn; tejga guixhobga na' si'cti tiuu kil. Guniyaj rebejn Dios xcuent guixhobroga, sa'csi cuentroduxh gujcn.

## 17

### *Gun Dios yälñuxhtis te gunadxab*

<sup>1</sup> Lo regajdz anglga ni ca' gajdz xhijg birii tej ni gunii loä, najni:

—Gudaa ree te guluiä lojlu retrabajwduxh ni ted gunadxabre ni sobga' cadro yu sijn nis. <sup>2</sup> Guiraa rereii lo guedxliujre bennäjreni gunaaga dojl, sigajczä guiraa reben guedxliuj bennäjreni gunaaga dojl. Gusosnäjreni gunaaga bejnreni si'ctis ni rlanjreni.

<sup>3</sup> Dxejcti huinäni narä si'c lo te bacal nez lo reyubijdz. Bahuiä loj te gunaä, bijbni dejtz te manro ni najc xniaa, luxh guidebni caj diidx ni rniyaj Dios. Gajdz najc bitiujejcni, sojbza tzuu xca'chni. <sup>4</sup> Gunaaga najcw te lad moraad con xniaa, sucheduxh gunaaga oor, näj reguisa'c, näj perl ni sa'cduxh. Ca'ni te copro ni najc ganaxduj oor ni guidxa ganax recosgujdx, recosdxab ni bennäjni reben guedxliuj. <sup>5</sup> Caj te diidx lo cuajni, luxh rut racbeedi xhi sälojni. Scree rnii diidxga: "Babilonro, xnan regunadxab, xnan recosdxab ni rajc lo guedxliuj." <sup>6</sup> Bahuiä agusojz gunadxabga. Agusosnäjni xtiejn rexpejn Dios nani bagu'tni, näj xtiejn renani basule' xtidx Jesucrist ni bagu'tzani. Che bahuiä lojni, bidxeloduxhä. <sup>7</sup> Dxejcti gunii anglga loä, najni:

—¿Xhicuent rdxelojlu, ä? Narä siniä xhi säloj gunadxabga, näjza manroga ni sojb gajdz bitiujejcni näj tzuu xca'chni. <sup>8</sup> Manroga ni bahuiilu gubajñni galoo, niluxh agunitlojni naj, luxh agojl guiriini gabijl, dxejcti sinitlojni stee, sejtñi par tejpas. Rebejn ni nabajn lo guedxliuj nani di lajreni niceaj lo guijtz xten yälñabajn xten Dios, guijtz ni guc-chee che birixtiejli guedxliuj, rebejnğa sidxeloduxhreni che fiireni loj manroga nani gubajn galoo, ni gunitloj, niluxh naj agubansacni.

<sup>9</sup> Ree nanab ga'pni yälñajn. Gajdz rebitiujejcni säloj gajdz dajn cadro sobga' gunaaga, <sup>10</sup> sälojzarenı gajdz reiı. Agujc gaii reiıga ni cayajb. Tej rereıga canıbee naj. Stee reiıga churu jääd. Luxh che jääd lult reiıga, guxii dxej guinıbeeni. <sup>11</sup> Manro ni gubajn galoo, ni agunitloj naj, ni'c rac xhujn reiı, najczani tej loj guıgajdz rereıı, luxh sinitlojni, sejtñi par tejpas.

<sup>12</sup> Guidzuo rexca'chni ni bahuiilu säloj tzuu reiı. Gajdreni gusloj guinıbee naj. Laareni näjza manroga xca'reni yälñrnıbee teb or, nalajznu guxii dxej. <sup>13</sup> Tejtis xhıgab gun rereııga, gudeedreni xcälñadıpreni, xcälñrnıbeereni lo manroga. <sup>14</sup> Laa redee ni sucuanäj Xiil xten Dios. Dxejcti sujñ Xiilga gaan lojreni sa'csi laani najcni Dad ni rnıbee loj guiraa redad, najcni Reiı ni rnıbee lo guiraa rereıı. Luxh renani siädñajlni najc reni agurejdxni, reni aguleni, sısiudzu'tznäjrenıni.

<sup>15</sup> Dxejcti najza anglga loä:

—Reni ni bahuiilu cadro sobga' gunadxabga säloj guiraa guejdx, guiraa ben guedxliuj, guiraa bejn ni rnii garen-garenca xtiidxreni, ni siääd garen-garen reguejdx. <sup>16</sup> Guitzuo reca'chga näjza manroga ni bahuiilu, sidxe'chreni loj gunadxabga, suro'nreni gunadxabga,

susa'nreni gunadxabga xhabäälni, sa'wreni bältiejxhni, suze'creni gunadxabga lo guiboo. <sup>17</sup> Sa'csi abasniib Diosreni te gunreni tejsi xhigab, te gudeedreni xcälrnibeereni lo manroga che guidzujnli dxej ni chale' guira'ti ni gunii Dios gac. <sup>18</sup> Gunadxabga ni bahuiilu säloj guedxro ni rnibee loj guiraa rereii loj guedxliuj.

## 18

### *Xho jiajb guedx Babilonia*

<sup>1</sup> Dxejcti bahuiä loj stee xangl Dios ni sädyäjt xhaguibaa. Siädnäni yälrnibeduxh, xcälrdimbicha'ni bazanij loj guedxliujre. <sup>2</sup> Dxejcti dipduxh gunii anglga, guredxa'ni:

—Abiajb, abiajb guedx Babilonia, agubixhlojni, naj najcni guejdx cadro rbäz rebendxab, ro'c ranczaj guiralii cuaa spritdxab, najczani xpitiääz guiraa reman xhaguibaa ni najc mandzab, mandxuudx. <sup>3</sup> Sa'csi guiraa rebeñ guedxliuj agusojzreni xcuent dojl ni bennäjreni gunadxabga, guiraa rereii loj guedxliuj bejn dojl guläsänäjreni gunadxabga, luxh guiraa rebeñ guedxliuj ni ruto' abejnreni ganduxh, agujcreni ri'cw xcuent recosdxab ni rujn gunabdxabga.

<sup>4</sup> Dxejcti biejn diagä xse' stee nani canii xhaguibaa:

—Colguirii guejdxga rexpänä, te di näj la'tu gunnäjtu gunadxabga dojl, te di tedtu trabawduxh lo replaag xtenni. <sup>5</sup> Sa'csi yuduxh rextoljni, abidzujnreni xhaguibaali, luxh abanaja lajz Dios rextoljni. <sup>6</sup> Colgudeed loj gunaaga sigajc ni badeedni lojreni. Colquijx loj gunaaga tio'pli huält lo ni bejnni laani. Neñ co'p cadro badeedni gu' bejn (te trabaw ni bateedni bejn), lagajc nenga colyejn te ni najc tio'p huält maazru fuert yä gunadxabga, nalajznu tedni trabawj tio'p huält. <sup>7</sup> Lacti gulä'p gunaaga xpala'nni, gubajnni si'ctis ni rlajzni lo guedxliuj. Naj colguteed gunaaga trabawj, si'cti mediid ni gulä'pni xpala'nni; si'cti mediidza ni bibalaznäjni mood ni gubajnni, sigajcza gac-huin lastooni sa'csi bejnni xhigab neñ lastooni: “Narä sobga'ä ree si'c te reiñ, te beñroduxh, dina gacä biuud, niclaza gac-huin lazä.” <sup>8</sup> Ni'cni tejsi dxej siajb yejcni guiraa replaag xten Dios: yälgujt, yälhuin lajz, näj yälrliaan, luxh sejczeni lo balguiboo, sa'csi rnibeduxh Dad Dios ni gun xcälguixhtisni.

<sup>9</sup> Guiraa rereii lo guedxliujre ni bennäj gunaadxabga cosgujdx, reni cuansanäjnini, sonduxhreni, siaduxhreni che fiireni gujxh ni carii cadro cayejcti. <sup>10</sup> Zijtru sisiujreni sa'csi rdxejbreni replaag xten gunadxabga, dxejc siniizaren:

—Aii, aii, riaduxhnu guedxrore, Babilonia, guedxdipduxh gujclu, luxh chela gucbeenu, ala bidzujñ yälguixhtis yejclu.

<sup>11</sup> Rebejn ni ruto' loj guedxliuj sonduxhreni, siareni guejdxga sa'csi rutru rsiidi xhixtenreni ni ruto'reni. <sup>12</sup> Laareni ruto'reni oor, pla't, guiraloj reguisa'c, perl, ladlin, ladmuraad, laddseed, näjza guiraloj baräjd yagdo, näj guiraloj cos saru, ni nacchee läi elefant, näj cos saru ni nacchee bronz, näj guuib, näj märm, <sup>13</sup> näjza caneel, guiraloj laj comiid, näjza yalnejh, näj perfum, näjza yaal, näjza bin, näjza se't oliib, näjza arinsa'c, näjza triuu, näjza gon, näjza rexii, näjza cabaii, näjza gare't, näjza bejn ni ruto'reni tiejxhreni, xaimreni. Guiraa reni'c ruto'reni. <sup>14</sup> Dxejc guniiza xse' ni canii xhaguibaali, najni:

—Ninexhsa'c ni rlazduxhlu, agunitloj. Guiraa recossa'c, recossaruduxh agubicajreni lojtu, luxh di gacdiru guidxäl bejn reni'c.

<sup>15</sup> Reni ruto' guiraloj recosga, nani gujcreni ri'cw xcuent guedxroga, zijtru sisiujreni sa'csi rdxejbreni trabawj ni cadeed guejdxga, sonduxhreni, sac-huinduxh lajzreni, <sup>16</sup> säjbre:

—Aii, aii, riaduxhnu guedxrore, nani gojtni ladsacduxh, guiraa ladlin, ladmuraad, ladxniaa, gusuccheeni con oor, con guisa'c, con perl, <sup>17</sup> tera'tbäzti baralii recosro ni najc xhixtenni, guxhijreni.

Guiraa recapitän xte barcw, näjza guiraa remarineer, näjza rebejn ni rij biaj lo rebarcw näjza guiraa reni rujn dzuun lo nisdoo, gusujreni zijt, <sup>18</sup> näjza laareni cahuiireni cayäjs gujxh guejdxga, cabedxa'reni, caniireni:

—Xhaci stee guejdx najc si'c najc guedxrore, ä?

<sup>19</sup> Bachajreni uyul yejceni sa'csi rac-huin lajzreni, binduxhreni, guredxa'reni:

—iAii! iAii! Riaduxhnu guedxro sa'csi xcuenttis guedxduxhre gujx ri'cwduxh guiraa rebejn ni rajp barcw ni rujn dzuun loj nisdoo. Luxh naj tera'tbäzsi aguxhijñ guedxrore.

<sup>20</sup> Guniiiza xse' ni yu' xhaguibaa, najni:

—La'tu ni yu' xhaguibaa, la'tu rexpejn Dios, reapost xtenni, rebejn ni gunii xtidx Dios galoo, colbalasduxh sa'csi abiajb guedxrore, abejn Dios yälguixhtis xcuent ni bejnni lojtu.

<sup>21</sup> Dxejcti te xangl Dios ni rajp yälrnibee, guläs te guiro ni najc si'c te guij ni ro't dojb, bacuaanini loj nisdoo, dxejc najni:

—Screeza gac guedxro ni laa Babilonia siajbni lo trabawduxh, sinitlojni par tejpas, dirutu fi lojni. <sup>22</sup> Diru guibi' jiejn cayel nez xladcaillu reharp, reflaut, retrompe't; diru

guibi' chu tej ni gun xhitis dzuun; diruza guibi' chubej molin ni cayo't. <sup>23</sup> Diru guibi' jien xcälrdimbicha' te bajl ni cagusanij; diruza guibi' jiejn xse' bi'n näj dxa'p loj te sa' sa'csi rexpejnlu ni ruto' gujcreni beñroduxh lo guedxliuj sa'csi basguezalu reben guedxliuj xcuent rextzundxablu.

<sup>24</sup> Neñ guejdxga bidxäjla xtiejn renani gunii xtidx Dios, näjza xtiejn rexpejn Dios, näjza xtiejn guiraa reben guedxliuj ni bagu'treni.

## 19

<sup>1</sup> Che gulujx recosre, biejn diagä lascanu xse' xhidaltro bejn ni canii xhaguibaa, cayäjpreni: jColguiliä'p xpala'n Dios!

Xtentis Dios, xtenni najc yälruslaa lo dojl, näj yälrdimbicha', näj yälmilagwr.

<sup>2</sup> Sa'csi xcälguxhtisni najc ganax laaca,

huentis najcni, sa'csi abejnni yälguxhtis gunadxabga nani caguxhin reben guedxliuj xcuent xcälñadxabni.

Abejn Dios yälguxhtisni,

agudijxhni xcuent xtiejn rexpejn Dios ni baxhe' gunadxabga, che bagu'tnireni.

<sup>3</sup> Guibi' guniizareni:

—jColguiliä'p xpala'n Dios! Gujxh xten gunadxabga sanuutis cayä'p par tejpas.

<sup>4</sup> Guiraa regalbitajp rebengool näjza guidap remanbajnga bazuxhijbreni, biabrojreni gojnreni Dios ni rbej lo tron cadro rnibeeni, caniireni:

—Sugacni si'c. jColguiliä'p Xpala'n Dios!

<sup>5</sup> Dxejti nez lo tron cadro rnibee Dios biejn xse' tej ni canii:

Colgudeed xquixtios lo Dios,

guira'tu ni rujn xtzuum Dios,

guira'tu ni rajntu Dios, rebenro sigajc rebenñadolajz.

*Sa' xten Xiil xten Dios*

<sup>6</sup> Dxejti biejn diagä ascanu xse' xhidalduxh bejn, riejnni si'c che cayajt nisro xhidajl gueu, näjza si'c che caguidxaduxh guzii, caniireni:

jColguiliä'p xpala'n Dios!

Sa'csi Gueb Dios, Dad xtenu ni rajp guiralii yälrnibee, ani acanibee.

<sup>7</sup> Guibalajznu, guibalazduxhnu, guiliä'pnu xpala'nni sa'csi abidzujñ dxej guchnaa Xiil xten Dios, aguzucheeza dxa'p.

<sup>8</sup> Abadeedreni ladlñ ni najc nuiduxh gacwni.

Ladnolni, luxh rdimbicha'ni sa'csi nayadujni.

Ladnayare säloj redzunsac ni bejn rexpejn Dios.

<sup>9</sup> Najza anglga löä:

—Bacuaa diidre: “Chicbaa renani bidon jiaäd lo xsa' Xiil xten Dios.”

Guniizani löä, najni:

—Rediidre najc didx-guliipac xten Dios.

<sup>10</sup> Dxejti bazuxhibä lojni te ganäni, dxejc laani najni löä:

—Na'c gunlu si'c, sa'csi narä nacä sigajc najclu, nacä te ni rujn xtzuum Dios, näjza bejtzlu ni rusule' xtidx Jesucrist. Bazuxhijb lo Diostis sa'csi Dios rudeed gusule' bejn xcuent Jesucrist, gusule'zareni xtidx Dios.

*Nani bijb te cabainol*

<sup>11</sup> Dxejti bahuiä bixal xhaguibaa, biricaj te cabainol. Luxh laj nani rbijbni säloj casobsa'cpacni diidx, rniizani ganax didxguli. Entis laaca rujnni yälguxhtis, entis laaca rucuaani che rujnni guer. <sup>12</sup> Rebalojni rbebajl, yejcni yu' xhidalduxh coron, luxh caj te laj lojni nani rutliidi rachee, luxh laatisni racheeni xhi sälojni. <sup>13</sup> Najcwni te lajd ni nadiini rejn; lajni najza Xtidx Dios. <sup>14</sup> Guiraa resoldaad guibaa xten Dios siädñajlni najcwreni ladnol, ladnaya, bijbzareni cabainol. <sup>15</sup> Ro'ni carii te spaad ni caduxh guiro'p laad ro'ni te ni'c tilñajni guiralii reguejdx lo guedxliuj, te guinibeeni guiraa reben guedxliuj ca'ni si'c te barguüb. Sujnzani yälguxhtis loj reni rdxechlajz lo Dios, si'c ruläjreni yec uub che rbääreni bin, si'c sujnza Dios ni rajp guiralii yälrnibee. <sup>16</sup> Lo xhajibni näjza cuä' cujdni caj lajni: “Reii xten rerei, Dad xten redad.”

<sup>17</sup> Bahuiä loj te angl suga'ni galäii gubijdx, cabedxa'ni caniini loj guiraa reman ni rutajt xhaguibaa, räjpni:

—Coltaa, colguire' ree, te gautu xcheroduxh xten Dios; <sup>18</sup> te gautu xpääl rerei, näjza xpääl recapitan, näjza xpääl rebenro, näjza xpääl recabai, näjza xpääl renani rbijb recabai, näjza xpääl guiraa bejn, bejn ni rdo' si'c rdo' guidxaa sigajc rebejn ni di gun xtzuum bejn, rebenbáz sigajc rebenro.

<sup>19</sup> Dxejcti bahuiä loj manro näjza loj reñeni guedxliuj, abire' reni te gucuanäjreni nani rbiñb cabainol näjza guiraa resoldaad xtenni. <sup>20</sup> Biga' manroga näjza profetxhii ni bejn nenro nez loj manroga te basgueeni guiraa renani cua' seen xten manroga, näjza renani bazuxhijb lo banäjb xten manroga. Guiro'p redee bacuaareni guideb nabajñreni nen te bal guiboduxh ni recnäj sufr. <sup>21</sup> Dxejc guiraa reni bia'n bagu't spaad ni birii ro' ni bijb cabainol. Guiraa reman xhaguibaa gudajw xpäähleri.

## 20

### *Te miñ ijz*

<sup>1</sup> Dxejcti bahuiä loj te xangl Dios ni siädjiäjti xhaguibaa, siädñani liäii ni ruxhal guedro ni laa gabijl. Ca'zani te cadenro. <sup>2</sup> Angre gunaaz gutiatzroga, ni gujc bäl galooli, ni najcza bendxab, ni laaza Satanás. Bacuaduunini te miñ ijz. <sup>3</sup> Basälñini neñ gabijl, te ro'c basäunini, bacuaani liäii te na'cru gusgueeni reben guedxliuj lañ ni guiza' te miñ ijz. Che guiza' rejizga, empac sibi' lasacni bale' si dxej.

<sup>4</sup> Dxejc bahuiä retron cadro rbejreni rnibeereni, bahuiäza loj renani rbej lo retron, cua'reni yälrnibee te gunreni yälguxhtis. Dxejcti bahuiä xaim rebejn nani biru' yejñni sa'csi huililajzreni xtidx Jesucrist näjza sa'csi basule'reni xtidx Dios. Direni nuzuxhijb loj gutiatz niclaza lo banäjb ni najc si'c manroga, dizareni nica' seen lo cuajreni nicla lo ñaareni. Gubansacreni loj rebengut, gurenäjreni Jesucrist te laani gunibenäjreni te miñ ijz. <sup>5</sup> Dee najc yälrbansac galoo lo rebengut. Niluxh stecuaa rebengut, direni guibansac che guisa'li te miñ ijz. <sup>6</sup> Chicbaa rebejn nani guibansac ganiddoo, najczeni bendxan ni agubicaj xtojñreni. Ni rojp yälgujt di guidzujñ lojreni. Laareni sajcreni xpixhojz Dios näjza Jesucrist, sibenäjreni Jesucrist, sinibenäjreni Jesucrist te miñ ijz.

<sup>7</sup> Che guiza' te miñ ijzga, suslasacni Satanás neñ gabijl. <sup>8</sup> Che guiriini ro'c, gusgueeni guiraa reguejdx ni tre' lo guidap laad guedxliujre. Susgueeni reben Gog näjza reben Magog te gutie'nireni te gunreni guer. Xhidalduxh gacreni, pet si'cti yujxh ni tre' ro' nisdoo. <sup>9</sup> Huä'preni lo te camp cadro galugduxh. Gudäyreni guideb gabijb cadro rnibee rexpejn Dios neñ guejdx nani sanälajz Dios. Per baxhañ Dios bal guiboo xhaguibaali bitejbni, te guyejc guiragajczeni. <sup>10</sup> Dxejc bacuaareni bendxab nani biädgusguee rebejn lo bal guiboo ni cayecnäj sufr, lagajc cadro yu' manro, näjza profetxhii nani basguee; lo bal guibooga susacsireneni sidejreni trabawduxh dxej-yääl par tejpas.

### *Yälguxhtis ni gujc nez loj tronronol*

<sup>11</sup> Dxejcti bahuiä lo te tronronol näjza lo nani sobga' lojni te rujñni yälguxhtis. Nez lojni gunitlojli guedxliuj näjza guibaa, xhetru lajtdi bidxäjñ par laareni. <sup>12</sup> Bahuiä lo rebengut, beño sigajc bennadolajz, tre'reni nez lo Dios. Bixal rexquijtz Dios, dxejcti bixalza stee xquijtz Dios ni najc guijtz xten xcälñabannäj Dios par tejpas. Dxejcti bejñni yälguxhtis rebengut xcuent ni bejnreni, xcuentza rediidx nani caj loj reguijtzga. <sup>13</sup> Guiranejz biääd rebengut: nisdoo batzuug rebengut ni yu' lojni, gabijl näjza yälgujt batzuugza rebengut ni yu' lojreni. Dxejcti bejn Dios yälguxhtis tejjareni xcuent ni bejnreni. <sup>14</sup> Dxejcti bacuaani yälgujt näjza gabijl lo bal guiboo ni najc si'c te nisdoo te ro'c checreni par tejpas. Dee najc yälgujt ni rojp. <sup>15</sup> Guiraa bejn ni di lajni nidxäjñ lo xlibr yälñabajñ bacuaazani reni'c lo bajlga.

## 21

### *Xhaguibacoob näjza guedxliucoob*

<sup>1</sup> Dxejcti bahuiä te xhaguibacoob näjza te guedxliucoob, sa'csi agunitloj guibabiejw, näjza guedxliubiejw, luxh xhettiruzo nisdoo. <sup>2</sup> Narä Juan, bahuiä lo guedx Jerusaléncoob, guedxdxan, siädjiäjtni xhaguibaali cadro rnibee Dios. Sucheduxhni si'c rsiuchee te dxa'p nani agojñ gucña. <sup>3</sup> Dxejcti biejn diagä te xse' te ni canii dipduxh, ascanu lo tron cadro rnibee Diosli carii se'ga, scree caniini:

—Colñuii, aguzuj xquidoo Dios galäii rebejn, anabannäj Dios rebejn, sajczareni rexpejñni. Sibannäj lagajc Gueb Diosreni. <sup>4</sup> Sütia Dios guiraa nisbee balojreni te na'cru goonreni. Sinitloj yälgujt, xhetru xliajñdi chu, diru bejn goon, dirureni jiajñ, sa'csi guiraa redee ni guyu' galoo agunitloj.

<sup>5</sup> Dxejcti ni sobga' lo tron cadro rnibeeni guniini, najni loä:

—Bahuii, najrä guscobä guira'ti.

Guniizani loä:

—Bacuaa rediidxre, sa'csi guliipacreni, sajç chalilajz bejn rediidxre.

<sup>6</sup> Dxejcti najzani loä:

—Agujñni. Narä nacä A näjza Z, ni säloj nani rbaxtiej näjza nani ruluux. Lo chutis ni cayojñ, sudedxliä'ä nis yäni, nalajznu yälñabajñ par tejpas. <sup>7</sup> Chutis nani gun gaan lo dojñ, sica'zani guiraa dee si'c yälñasa'c, luxh narä sacä Xtiosni, laani sacni xi'nä. <sup>8</sup> Niluxh renani rdxejb,

renani di chalilajz xtidxä, reni rdxe'ch loä, reni rugu't sa'reni, reni runnäj gunaa dojl, renani najc bidxaa, renani rusuxhijb lo banäjb, guiraa renani rusguee rniireni didxxhii, guiragajc reni'c sij lo nisdoo ni najc ganax bal guiboo, cadre rejc guiboo näjza sufr par tejpas. Dee ni najc yälgujt ni rojp.

*Guejdx Jerusaléncoob*

<sup>9</sup> Dxejcti lo guigajdz xangl Dios ni ca' guigajdz xhijg ni guidxa guigajdz reyälguxhtis xten Dios, birii tejni, najni loä:

—Gudaa, te guluüä lojlu dxa'p nani guchnaa Xiil xten Dios.

<sup>10</sup> Dxejcti bejnni gunixcalä, huinäni narä lo te danro ni jiaduxh, ro'c baluüni loä te guedxro, te guedxdxan ni laa Jerusalén, luxh xhaguibaali siädjiäjtnei nez lo Dios. <sup>11</sup> Guejdxga rdimbicha' guideb xcälrdimbicha' Dios. Luxh yälrdimbicha'ga najc si'c najc te guisacduxh ni laa jaspe, rdimbicha'zani si'c biidr. <sup>12</sup> Guideb gabi guejdxga dejd te paderro cadre caj tzubutio'p xportonroni. Te angl xten Dios suga' ro' tejsa portonga. Loj tejsa portonga, caj laj tej retzubutio'p cuaa xten rexpejn Israel. <sup>13</sup> Chon portonga caj nez cadre rliejn gubijdx, yu'za chon portonga nez ladbee, yu'za chon portonga nez ladbäw, yu'za chon portonga cadre räaz gubijdx. <sup>14</sup> Yu' tzubutio'p guiro lo cimient xten guejdxga. Lo tejsa reguijga caj laj tej retzubutio'p apost xten Xiil xten Dios.

<sup>15</sup> Angl ni caninäj narä ca' si'c te biquii ni najc ganaxduj oor te gurejxhni guejdxga, näj reportonga, näjza padeerga. <sup>16</sup> Guejdxga najc cuadraad: sigajc ni siolnei, sigajc ni gulajni. Dxejcti cua'ni biquii barejxni guejdxga, barejxni tio'p mil tio'p gayuu kilometros tejsa laad. Sigajc siolnei, sigajc gulajni, sigajc jiaani. <sup>17</sup> Dxejcti barejxni padeerga, yu'ni gayonbitajp metr seguñ mediid xten bejn, sa'csi ni'c najc ni cagutiexhnäjza anglga.

<sup>18</sup> Padeerga naccheeni guij ni laa jaspe. Guejdxga najc ganaxduj orsa'c, rdimbicha'ni si'c guihuajn. <sup>19</sup> Recimient xten padeerga nac-chee guisa'c. Guiganid najc guijaspe; ni rojppa najc zafiro; ni riojnga najc ágata; ni rdajppa najc esmeralda; <sup>20</sup> ni rgaiiga najc onix; ni rxho'pga najc cornalina; ni rgajdzga najc crisólot; ni rxhujnga najc berilo; ni rgaaga najc topacio; ni rtzuuga najc crisopraso; ni rtzubiteebga najc jacinto; ni rdzubutio'pga najc amatista. <sup>21</sup> Guitzubutio'p portonga najc tzubutio'p perl. Tejsa portonga guc-chee tej perl. Nezyuro ni rdeed galäii guejdxga najc ganaxduj oor, rienni si'c te guihuajn.

<sup>22</sup> Dina nuhüä nicla tej guidoo nen guejdxga, sa'csi suga' Gueb Dios ni rajp guiralii yälrnibeduxh, näjza Xiil xten Dios. Laani najc xquidoo guejdxga. <sup>23</sup> Guejdxga dini guiquiin gusanij nicla gubijdx niclaza bäii, sa'csi lagajc xcälrdimbicha' Dios näjza Xiil xten Dios ruzanij ro'c. <sup>24</sup> Rebejn guedxliuj ni rililajz xtidx Dios sajc sareni lo bianijga, luxh rerei ni siääd lo guedxliujre siädnäzarenii xcälrnibeereni, näj xpala'nreni ro'c. <sup>25</sup> Di ro' reportanga jiäuu rdxej, luxh ro'c xhettiza yäl. <sup>26</sup> Ro'c chanäzarenii yäl'nasa'c näj xpala'n reguejdxro ni yu' lo guedxliuj. <sup>27</sup> Niluxh di gacdpac jiu' nicla tej cosguijdx ro'c, niclaza te bejn ni rujn cosguijdx näj yälrusguee. Ro'c siu' ganaxduj renani caj lajni lo libr xten yäl'nabajn par tejpas nani ca' Xiil xten Dios.

## 22

<sup>1</sup> Dxejc baluüi anglga te gueuro loä, cadre yu' nisya xten yäl'nabajn. Rdimbicha'ni si'c te guihuajn, luxh cariini lo tron cadre rnibee Dios näjza Xiil xten Dios, <sup>2</sup> rdejndi loj nezyuro ni rdejndi galäii guejdxga. Guiro'p laad gueuga sojb reyajg xten yäl'nabajn, lojreni rcaj tzubutio'p cuaa ninejxh nen tebijz, tejsa cuuani tejsa bäii; luxh rebalajg ni rcaj lo reyajgga najc te gusajcni reben guedxliuj. <sup>3</sup> Dxejcti ro'c xhettiru yälrdzudbe, sa'csi ro'c yu' tron cadre rnibee Dios näjza Xiil xten Dios, ruzuxhijbza rexpejn, rajnreni laareni. <sup>4</sup> Suhuiireni lojpacni si'cpac ni najcni, sicajza laj Dios lo cuajreni. <sup>5</sup> Ro'c diru yäl chu. Luxh reni rbäjz ro'c di guiquiin nicla bajl, niclaza xhanij xten gubijdx, sa'csi Gueb Dios susanij lojreni. Luxh sinibenäjreni par tejpas.

*Siädzungajxh dxej ni guibisac Jesucrist*

<sup>6</sup> Dxejc naj anglga loä:

—Guliipac najc rediüxga, sajcpac chalilajzlureni. Dad Dios lagajc nani basniib lastoo rebejn ni gunü xtiidxni agujc xchero, lagajc laani baxhalni xanglni te baluülojni loj rexpejn ni guira'ti nani agojl gac.

<sup>7</sup> —Sajngalu gan, siojb jiälä. ¡Chicbaa nani riu rediüx ni caj lo librrre!

<sup>8</sup> Luxh narä, Juan, biejn diägä rediüxre, bahüäza recrose. Luxh che bahüä, che biejn diägä bazuxhibä te ganä xangl Dios nani baluüi loä guiraa redde. <sup>9</sup> Luxh laani najni loä:

—Na'c gunlu si'c, sa'csi narä runä xtzuunni sigajc rujnluni, sigajc rujn rebejn ni gunii xtidx Dios agujc xchero, sigajc rujn rebejn ni rusoob rediüx ni caj lo librrre. Bazuxhijb loj Diostis.

<sup>10</sup> Dxejc najni loä:

—Na'c gusäuulu guijtz cadro caj rediidxre xcuent nani churu gac, sa'csi asiäddzungajxh redxej ni chale'reni. <sup>11</sup> Luxh laĵ ni guidzujñ dxejga, basaan suchanuu gun dojl renani cayungajc dojl; basaan suchanuu gun dzunguijdx renani cayungajc dzunguijdx. Per renani cayujñ dzunsa'c, chanuu gunreni dzunsa'c, nani najcza beñnaya, si'cza chanuu gacni beñnaya.

<sup>12</sup> Gunajtiro:

—Siojb jiälä, luxh siädnaä xhi gunidxä loj tejgatu si'c ni riäjl xca'tu xcuent dzuun ni bejntu. <sup>13</sup> Narä Jesucrist nacä si'c najcza A näjza Z, ni säloj nani rbäxtiej näjza nani ruluux.

<sup>14</sup> Chicbaa renani riu xtidx Dios, najcreni si'c ni rguuib xhajibreni te sajc jiu'reni nez porton xten guejdxga, sajza gauni ninejxh ni caj lo yajg xten yälñabajñ par tejpas. <sup>15</sup> Per dejtz guejdxga chajia'n reni najc si'c hä'cw, nalajznu rebidxaa, renani rusguee chälbejn, renani rugu't sa'reni, renani ruzuxhib lo rebanäjb, näjza ni rchaglazj rñii didx-xhii te gusgueeni.

<sup>16</sup> Narä Jesucrist, abaxhalä xanglä lojlu te gusule'ni lojtu diidx xcuent guiraa redee, te gusule'zalu rextidxä neñ reguidoo loj rexpenä. Narä nacä te xajg to'reii David, nacäza si'c balxhaguibaa nani rdimbidxa' cäjysi che gajd jianij lo guedxliuj.

<sup>17</sup> Sprit Dxan xten Dios näjza chääl Xiil canii, najreni:

—Coltaa.

Suguiniiza nani riejñ diajgrenti diidxre, gäbreni:

—Coltaa.

Sujiäädza chutis ni cayojl, sujiädyaäxlia'ni nis yälñabajñ par tejpas.

<sup>18</sup> Sa'csi narä rñiliä'ppac lojtu, guiraatu ni riejñ diajgtu rediidx ni caj lo guijtzre xcuent recos ni churu gac, palga yu' chu tejtü gutajlru diidx ni caj lo guijtzre, sutedru Dios bejnğa replaag yejñi loj ni caj lo guijtzre. <sup>19</sup> Palga yu' chu gudzucaj loj rediidx ni caj lo guijtzre, sudzucajza Dios nani nica'ni lo yajg xten yälñabajñ par tejpas, näjza lo guedx Dxan, ni caj xcuentreni lo guijtzre.

<sup>20</sup> Nani cagusule' diidx xcuent guiraa redee guniini, najni:

—Guliipacni siojb jiälä.

Sugacni si'c. Gudaa Dad Jesucrist.

<sup>21</sup> Sujiäd xcalracñäj Dad Jesucrist lo guiraatu. Sugacni si'c.